


Didza' cubi rucá'ana  
tsahui



New Testament in Zapotec, Rincón (MX:zar:Zapotec, Rincón)

**Didza' cubi rucá'ana tsahui'**  
**New Testament in Zapotec, Rincón (MX:zar:Zapotec, Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Rincón

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 7 Nov 2023 from source files dated 29 Jan 2022  
58bf86df-ae22-508c-81dc-936dbf138c25

## Contents

Salmos . . . . .	1
San Mateo . . . . .	126
San Marcos . . . . .	180
San Lucas . . . . .	214
San Juan . . . . .	270
Hechos . . . . .	311
Romanos . . . . .	361
1 Corintios . . . . .	383
2 Corintios . . . . .	403
Gálatas . . . . .	416
Efesios . . . . .	424
Filipenses . . . . .	432
Colosenses . . . . .	437
1 Tesalonicenses . . . . .	442
2 Tesalonicenses . . . . .	446
1 Timoteo . . . . .	449
2 Timoteo . . . . .	456
Tito . . . . .	460
Filemón . . . . .	463
Hebreos . . . . .	465
Santiago . . . . .	481
1 Pedro . . . . .	486
2 Pedro . . . . .	492
1 Juan . . . . .	496
2 Juan . . . . .	501
3 Juan . . . . .	502
Judas . . . . .	503
Apocalipsis . . . . .	505

## YUGU' SALMO

### 1

<sup>1</sup> Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxön nupa tun dul-la', en biti' runë' tsözxön le tun nupa ta'zí' quidza' Dios.

<sup>2</sup> Le raza ládxë'ë náca'gaca xibá nuguixjé' Xanru', en ca náca'gaca xibá na' rëla, en te dza rulaba ládxë'ë.

<sup>3</sup> Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en biti' ca' rizóa gubá'ayisö.

Yúgu'të le runë' ta'ruáj dxi'a.

<sup>4</sup> Biti' raca caní quégaca nupa tuá' dö'.

Náca'gaca ca bëbu zxe café ruá' le bö'.

<sup>5</sup> Que lë ni na' biti' ulu'ruájé' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.

<sup>6</sup> Rapa chi'ë Xanru' Dios nöza ga ta'dé' bönni' tsahui' na', pero uniti tsaz nu ridá gapa ta'dá nupa tuá' dö'.

### 2

<sup>1</sup> ¿Bizx que tu'tsatsa bönachi yugu' yödzö en tu'pá'a nítisö le ilúngaca?

<sup>2</sup> Bönni' ta'nná bë'ë luyú ta'dá'baguë'ë Dios.

Tun tuz xtídza'gaca nupa dë lu ná'agaca para ila'dá'baga' Xanru', en Nu na' nabö cazë' para inná bë'ë,

<sup>3</sup> ta'nná: "Uzxuzxaj uquínnajru' le ta'nná bé'enë' rë'u, en chú'unaru' yugu' le tu'zenë' bach rë'u."

<sup>4</sup> Dios na' zoë' yehua' yubá uzxídxisé'.

Xanru' Dios utitaj cazë' léguequi.

<sup>5</sup> Ní'irö lu yöl-la' rilé queë' gü'ílenë' léguequi didza',

en lu yöl-la' ridzá'a queë' uzenë' bach léguequi.

<sup>6</sup> Innë': "Nuzóa caza' bönni' nabö caza' xilatjé' ga inná bë'ë.

Inná bë'ë lu Guí'a Sión, le naca guí'a lá'ayi quia'."

<sup>7</sup> Quíxjöi'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zxí'ina'.

Na'a dza nuzóa caza' Li'.

<sup>8</sup> Gunábini neda', ate' guna' ga ilequi quiu' yugu' yödzö.

Guequi ca' quiu' idútë yödzölió.

<sup>9</sup> Quitsju' léguequi len tu xiyaga guíë.

Uzxuzxju' léguequi ca run nu rilá'a tu zxiga' yö'öna."

<sup>10</sup> Que lë ni na', libí'ili' na' rinná bë'ëli', guli'tséajni'i.

Guli'sedi cuinli', núlöli' ruchi'a rusöröli' le raca luyú.

<sup>11</sup> Lu yöl-la' ba'a ladxi' queëli' guli'gún xichinë' Xanru'.

Lu yöl-la' rixxizi queëli' buli'sí' xibë'.

<sup>12</sup> Guli'gún bal Zxí'inë' Dios para cabí ilétenë',

en para cabí udxi queëli' la' nöza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

## 3

<sup>1</sup>Xan, chinayángacada' nupa ta'lé neda'.

Zián nupa ta'dá'baga' neda'.

<sup>2</sup>Zián nupa ta'nné quia', ta'nná:

“Biti' usölé' Dios lé'.”

<sup>3</sup>Pero Li', Xan, run chí'ítica'su' neda'.

Nacu' yöl-la' ba quia', en Nu rutipa neda'.

<sup>4</sup>Bë'a zidzaj didza', bulidza'-në' Xanru',  
ate' Lë' biyönnë' chi'a ga na' zoë' lataj lá'ayi queë'.

<sup>5</sup>Neda' rata', en rasia',  
ate' rubana', tu' nazöntica'së' Xanru' Dios neda'.

<sup>6</sup>Biti' gádxida' gayuá' gayuá' bönachi,  
nupa na' nagú'ugaca neda' lé'ajlö.

<sup>7</sup>¡Guyasa, Xan! ¡Busölá neda', Dios quia'!  
Budxía huë' xága'gaca nupa tu'dí'i neda',  
en buquínnajda' nupa nácagaca xihui'.

<sup>8</sup>Xan, rusölá cazu' bönachi quiu'.  
Ben ga gaca dxi'a quégaca bönachi quiu'.  
¡Ca' gaca!

## 4

<sup>1</sup>Bubí'i didza' cate' rulidza' Li', Dios.  
Nacu' Nu ruchi'a rusörö le raca quia'.  
Cate' gurö'a böniga, bida cazu' Li' ga zoa', en gúcalenu' neda'.  
Ruhuéchi' ladxi' neda', en ruzé nagu' le rinábida' Li'.

<sup>2</sup>Rnnë' Dios: “Libí'ili', bönachi, ¿gáca'xte ulidza dítajli' neda'?”  
¿Gáca'xte caz idxí'ili' le cabí nazaca', en güi'i ládxi'li' le cabí naca?”

<sup>3</sup>Guli'tsöjné nabö cazë' Xanru' nu radxi Lë',  
ate' riyönnë' neda' cate' rulidza'-në'.

<sup>4</sup>Guli'gadxi Lë', en bíti'rö gunli' dul-la'.  
Guli'sá' ladxi' ca naca lë ni cate' dëli' ga ráta'li', en guli'sóa dxisö.

<sup>5</sup>Guli'cú'u lahuë' Xanru' le naca dxi'a,  
en buli'zxöni ladxi' Lë'.

<sup>6</sup>Zián nupa ta'nná: “¿Nuzxi caz gun ga gaca dxi'a queëru'?”  
Lu yöl-la' dxi'i ladxi' quiu' buyú netu', Xan.

<sup>7</sup>Runu' ga rudzëjade'eröda'  
ca tu'dzeja nupa tu'zí' xibé zxoá' za guizxi yu, en xisi lubá uva.

<sup>8</sup>Cate' rata', la' rásitia' lu yöl-la' riböza dxi ladxi' quia',  
tu' run cazu' Li', Xan, ga riböza' dxi'a tsáhui'do'.

## 5

<sup>1</sup>Ruzé nagu' didza' ruá'a, Xan.  
Buyú ca rinnëda' ládxa'a lu yöl-la' ruhuí'ini quia'.

<sup>2</sup>Dios quia', Nu rinná be'e neda', ruzé nagu' cate' rinábida' Li'  
gácalenu' neda', na' güi'ilena' Li' didza'.

<sup>3</sup>Yugu' zila yönnu' chí'a.  
Zílado' idxina' lo', en cöza' didza' ubi'u.

<sup>4</sup>Nacu' Li' Dios bití' raza ládxi'u le cabí naca,

en biti' ru'u lataj ibiga' ga zu' nu ruá' dö'.  
<sup>5</sup> Biti' ru'u lataj nupa tun ba rahui ila'dxín lo',  
 en biti' rilé'enu' dxi'a nupa nácagaca xihui'.  
<sup>6</sup> Rusunítu' dërö nupa ta'zí ye'e luzé'eguequi,  
 en biti' rilé'enu' dxi'a nupa tuti bönachi, en ta'zí yë'.  
<sup>7</sup> Gaca tsu'a neda' lu yu'u lidxu', tu' nadxí'ide'enu' neda'.  
 Lu yöl-la' ba'a ladxi' quia' tsu'a ga naca yudo' lá'ayi quiu', en tseaj ládxa'a Li'.  
<sup>8</sup> Tu' nacuá' zían nupa ta'lé neda', buluí'i neda' le naca dxi'a ré'ënu' guna', Xan.  
 Busèdi neda' para gaca guna' ca ré'ënu' Li'.  
<sup>9</sup> Biti' gaca nu tseajlë' didza' tuí'i nupa na' ta'lé neda'.  
 Nácagaca xihui' icja ládxi'do'guequi.  
 Naca ruá'agaca ca tu yeru ba nayalaj,  
 en lu yöl-la' rizí' yë' quéguequi tuí'i yulaj didza'.  
<sup>10</sup> Ben léguequi xiguia', Dios.  
 Ben ga biti' udxín xtídza'guequi.  
 Gurú'una léguequi tu' túntica'sö dul-la',  
 en tu' ta'dá'baga' xtídz'u.  
<sup>11</sup> Ulu'dzeja nupa tu'zxöni ladxi' Li'.  
 Lu yöl-la' rudzeja quéguequi gúl-lagaca quiu' tu' rácalenu' léguequi.  
 Tu'zí' xibó' nupa nadxí'igaca Li'.  
<sup>12</sup> Run cazu' Li' ga raca dxi'a quégaca nupa tun ca rnna xtídz'u, Xan.  
 Lu yöl-la' dxi'i ladxi' quiu' run chí'u léguequi.

## 6

<sup>1</sup> Biti' uzenu' bach neda' lu yöl-la' rilé quiu', Xan.  
 Biti' gunu' neda' xiguia' lu yöl-la' ridzá'a quiu'.  
<sup>2</sup> Buéchi' ladxi' neda', Xan, tu' rudú ládxa'a.  
 Bun neda', Xan, tu' riguí'i rizáca'a.  
<sup>3</sup> Rö'ö böniga idútë le naca'.  
 ¿Gáca'xte caz gaca caní, Xan?  
<sup>4</sup> Gudá dusöló' neda', Xan.  
 Tu' nadxí'inu' neda', busölá neda' lu yöl-la' guti.  
<sup>5</sup> Lu lataj chul-la cuntu nu tsöjné Li'.  
 Cuntu nu zoa ni' nu gaca cu'u Li' yöl-la' ba.  
<sup>6</sup> Rudú ládxa'a tu' rinnética'sö ládxa'a.  
 Yugu' dzö' ribisa le ráti'da' len nisa ribödxí quia'.  
 Rusubisa' xcúgua' len nisa ribödxí quia'.  
<sup>7</sup> Rö'ö gui guiöj lahua' tu' ribödxítica'sa'.  
 Biti' gaca ilé'eda' tu' nözigaca nupa tu'dí'i neda'.  
<sup>8</sup> Guli'cuíta ga zoa', libí'ili', ruá'ali' dö',  
 tu' riyönnë' Xanru' ribödxá' neda'.  
<sup>9</sup> Ruzé naguë' le rulidza', ráta'yua' lahuë',  
 en rubi'ë didza' cate' bi rinábida' Lë'.  
<sup>10</sup> Ulu'tuí'i nupa tu'dí'i neda', en ila'bö' böniga.  
 Lu yöl-la' rutuí'i quéguequi ulu'biga' ga zoa'.

## 7

<sup>1</sup> Ruzxöni ládxa'a Li', gácalenu' neda', Xana' Dios.  
 Busölá neda' lu ná'agaca nupa ta'bía no neda', en gúcalen neda'  
<sup>2</sup> para cabí soa nu cuéaj neda' ca runba' bëdxi guixi',

en para cabí usuniti neda' ga cuntu nu zoa gácalen neda'.

<sup>3</sup> Xana' Dios, channö caní nuna':

Channö nabága'a xigua',

<sup>4</sup> o channö bubí'a dö' que nu gúcalen neda',

o channö bí'a dö' que nu bití' bi ben quia' lu bití' rilé'e neda' dxi'a,

<sup>5</sup> bë' lataj soa regu' neda' nu na' bití' rilé'e neda' dxi'a, en ucul-la neda'.

Bë' lataj nu na' quin neda' lu yu,

en ucá'ana neda' cá'asö.

<sup>6</sup> Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusörö le raca quia'.

<sup>7</sup> Ben ga ulu'dubi quiu' yúgu'të bönachi,

en gunná be'e léguequi ga ni' zu' xitsá'tërö.

<sup>8</sup> Ruchi'a rusöröu' quéguequi yúgu'të bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

<sup>9</sup> Ben ga udxí que le xihui' tun nupa tuá' dö',

pero buzóa tsutsu nupa tun le naca dxi'a,

tu' nacu' Li' idú tsahui', Dios, en ruchi'a rusöröu'

le ta'zá' ládxi'gaca bönachi, en le ta'guínnaj ícjaguequi.

<sup>10</sup> Naca cazë' Dios Nu run chi'i neda'.

Rusölé' nupa nácagaca idú ladxi'.

<sup>11</sup> Dios ruchi'a rusöröe' queëru' ca naca le naca tsahui',

en richúgutica'së' quégaca nupa tuá' dö'.

<sup>12</sup> Channö cabí ulu'bí'i ladxi' bönachi, utuchë' guíë tuchi' queë'.

Chinucözë' uxiti' yaga queë'.

<sup>13</sup> Chinupë'ë yugu' le rudí'inë' lu gudil-la,

en nudxië' lu du uxiti' yugu' yaga túchi'do' zoa guí' láhuiguequi.

<sup>14</sup> Buyútsöca', riguínnaj ícjë' bönni' ru'ë dö' le xihui' gunë'.

Ruí'i ládxi'ë le naca dö', en rizi' yë'ë.

<sup>15</sup> Nachö'önë' ga rë' tu yeru zxön ga nu ibixi,

pero lë cazë' yöjbixë' lu yeru na' guchö'önë'.

<sup>16</sup> Budxín la' queëzë' dö' na' bí'ë,

en dxië' huë' ca naca xigua' nabáguë'ë.

<sup>17</sup> Guía'-në' Xanru': "Xclenu" tu' náquië' tsahui',

en gul-la' yöl-la' ba que Lë' Xanru', Nu nayépisëtërö.

## 8

<sup>1</sup> ¡Xana' Dios,

bica' ba Lo' idútë yödzölió!

¡Xitsá'tërö ca lúzxiba nayépisu' Li'!

<sup>2</sup> Túl-labi' bí'ido', enca' bí'i huë'ënido' yöl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' bití' ta'lé'e Li' dxi'a, enca' nupa ta'dá'baga' Li'.

<sup>3</sup> Cate' ruyúa' lúzxiba quiu', le nunu' len xibön na'zu',

enca' beu', en yugu' bôlaj bení' nuzú' xilátjaguequi,

<sup>4</sup> ní'irö rnnía': ¿Bizxi caz bönni', tu' röjné cazu' lë'?

¿Bizxi caz nu naca bönáchisö, tu' ruí'i ládxi'u Li' nu na'?

<sup>5</sup> Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca  
tu le néquini oro dxía icjë'.

<sup>6</sup> Nunu' ga rinná bé'ené' yugu' le nun cazu' Li'.  
Yúgu'të nuzú' xini'ë lë'.

<sup>7</sup> Nuzú' xini'ë yúgu'tëba' bö'cu' zxila', en yúgu'tëba' bëdxi,

<sup>8</sup> en lës caní nunu' ca' quégacaba' biguínido',  
en quégacaba' böla dzö'öba' nísado',  
enca' quégacaba' yúgu'tëba' böa' ta'dödiba' lu nísado'.

<sup>9</sup> ¡Xana' Dios,  
bica' ba lo' idútë yödzölió!

## 9

<sup>1</sup> ¡Idú ládxa'a rigu'a Li' yöl-la' ba, Xan!

¡Usiyönda' bönachi ca naca yúgu'të yöl-la' huáca nunu'!

<sup>2</sup> ¡Udzéjada', en uzi'a xibó'!

¡Gul-la' yöl-la' ba que Lo', tu' nayépisëtëru'!

<sup>3</sup> ¡Ta'zxunnaj nupa ta'dá'baga' neda'!

¡Ta'dzö'ö, en tu'niti lo' Li',

<sup>4</sup> tu' nubéaju' tsahui' le naca dxi'a runa'!

¡Rö'u ga rinná bë'u, en ruchi'a rusöröu' queëtu' ca naca le naca tsahui'!

<sup>5</sup> Bulidza zi'u yugu' yödzö, en busunítu' nupa tuá' dö'.

Tsaz busulu' lu guichi quiu' gapa gula'zúaj léguequi.

<sup>6</sup> Chigula'niti nupa gula'dá'baga' Li'.

Tsaz naguínnajgaca gapa gula'cuá'.

Busunítu' yugu' yödzö gapa na' gula'cuá',

ate' cuntu nu zoa röjné yugu' yödzö na'.

<sup>7</sup> Zóatica'së' Xanru' Dios.

Naguixjë' tsaz lataj ga rö'ë rinná bë'ë en ruchi'a rusöröë' quégaca bönachi.

<sup>8</sup> Uchi'a usöröë' quégaca bönachi yödzölió lu le naca tsahui'.

Uchi'a usöröë' quégaca yugu' yödzö lu le nácatë.

<sup>9</sup> Gun chi'ë Xanru' Dios nupa nátagaca yechi'.

Gácalenë' léguequi cate' nu gun léguequi zi'.

<sup>10</sup> Ulu'zxöni ladxi' Li' nupa núnbë'gaca Lo'.

Caní gaca, Xan, tu' cabí nusán ládxa'u nupa tu'guilaj Li'.

<sup>11</sup> Guli'gul-la yöl-la' ba queë' Xanru', zoë' ga na' nazí'i le Sión.

Buli'siyón bönachi yugu' yödzö ca naca yugu' le nunë'.

<sup>12</sup> Biti' ral-la ládxe'ë nupa ta'guí'i ta'zaca' cate' tu'lidza Lë',

tu' röjné léguequi Nu na' ruzí' lëbi nu ruti bönachi.

<sup>13</sup> Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

<sup>14</sup> para gaca usiyönda' bönachi yöl-la' ba quiu' Li'.

Ga naca ga nu tsaza yödzö quiu' nazí'i le Sión,

udzéjada' tu' nusöló' neda'.

<sup>15</sup> Yöjbíxigaca bönachi yugu' yödzö lu yeru gula'chö'öna ga tsöjbíxigaca luzë'eguequi.

Bila'röli ni'aguequi lu yöxaj bulu'cachi' para ila'zön léguequi.



16 Chinunë' Xanru' Dios ga núnbë'gaca bönachi Lë' tu' buchi'a busöröë' quéguequi.

Lu lë na' nun nu ruá' dö' zön la' cuinsi.

17 Ila'yaza lataj chul-la nupa tuá' dö',  
yúgu'të nupa na' nal-la ládxi'gaca Dios.

18 Calëga tsaz ulu'gá'ana cá'asö nupa ta'yadzaj ta'yudxi,  
en biti' initi tsaz yöl-la' run löza quégaca nupa nácgaca yechi'.

19 Guyasa, Xan.

Biti' gu'u lataj tsépisë nu naca bönáchisö.

Buchi'a busörö quégaca bönachi yugu' yödzö.

20 Buxös léguequi, Xan.

Ben ga ulu'únbë' le nácgaca, tu' nácgacasö bönachi.

## 10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

2 Lu yöl-la' run ba rahui quégaca nupa tuá' dö'  
ta'bía no nupa nácgaca yechi'.

Ben ga ila'zön du yalaj na' nucáchi'gaca la' léguequisö.

3 Run ba zxön cuinë' bönni' ru'ë dö' ca naca le xihui' rizë ládxi'ë.

Bönni' ruhuídi'në' rulidza ditjë' luzë'ë, en ruzóë' Dios tsölá'alö.

4 Lu yöl-la' run ba zxön cuinë' bönni' huía' dö' biti' ruí'i ládxi'ë Dios.

Rizá'asö ládxi'ë, rnnë': Biti' ca' zoa Dios.

5 Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca bönachi.

Ruzóë' tsölá'alö nupa biti' ta'lé'e lë' dxi'a.

6 Rë' la' cuinsë': "Gatga ichíxida'.

Catu caz bi gaca quia'."

7 Didza' ru'ë nácgaca le rudxía dö', enca' le rizí' yë', en le rudidza' yudxi yugu' luzë'ë.

Ruí'itica'së' didza' le cabí nácatë, en le naca xihui'.

8 Rucachi' cuinë' yugu' lu yödzö.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

9 Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

10 Riguinë' luyú nu na' nazönë'.

Zián nupa rucul-lë' len në'ë nal-la.

11 Rë' la' cuinsë': "Nal-la ládxi'ë Dios.

Nucachi' lahuë', en biti' ca' rilé'enë' le runa'."

12 ¡Guyasa, Xan!

¡Gulís no'o, Dios!

¡Biti' gal-la ládxi'u nupa ta'guí'i ta'zaca'!

13 ¿Bizx que bönni' na' ru'ë dö' nuzóë' Dios tsölá'alö?

Gudxë' la' cuinsë': Biti' uzí' lë' Dios neda'.

14 Lí' bilé'e quézinu' lë' ni, Xan.

Ruí'i ládxi'u nu riguí'i rizáca', en nu risëbi ladxi',

en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

<sup>15</sup> Bugúa yöl-la' unná bē' quégaca nupa tuá' dö', en nácagaca xihui'.  
Bubí'i quéguequi ca naca xiguia' nabága'gaca.

<sup>16</sup> Inná bē'tica'sē' Xanru' Dios.  
Nupa tu'béaj ícaguequi Xanru' ulu'niti tsaz lu xiyú cazē'.

<sup>17</sup> Ruzé nagu', Xan, le ta'nábini Li' nupa nácagaca do' ladxi'.  
Rutipu' ládxi'guequi, en ruzé nagu' chí'iguequi.

<sup>18</sup> Ruchi'a rusöröu' quégaca nupa nácagaca uzēbi,  
en nupa zoa nu ribía no léguequi,  
para cabirö ulu'xösa bönachi yödzölió ni luzé'eguequi.

## 11

<sup>1</sup> Ruzxöni ládxa'a Xanru' gácalenē' neda'.

¿Naru' guíetso' neda':

“Buzxúnaj lu guí'a ca runba' biguínido”?

<sup>2</sup> Buyútsöca', zöngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,  
para ilútiē' bagáchi'sö nupa nácagaca dxi'a.

<sup>3</sup> Channö ila'guínaj yugu' le tu'zóa tsutsu le naca dxi'a,  
¿bizxi caz gaca gun nu naca tsahui'?

<sup>4</sup> ¿Zoa cazē' Xanru' yudo' lá'ayi queē'!

Yehua' yubá zoa ga rö'ë rinná bē'ë Xanru' Dios.

Rilé'e guiój lahuē' para uyúē' le tun bönachi.

<sup>5</sup> Rizí' bē'ë Xanru' nu naca tsahui'.

Biti' rilé'enē' dxi'a nu ruá' dö', en nu raza ladxi' ta'dá'baga' yúlahui'.

<sup>6</sup> Gunē' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

<sup>7</sup> Caní gunē' Xanru' tu' náquiē' tsahui', en nadxí'inē' le naca tsahui'.

Nupa tun le nácatē' ila'lé'e lahuē'.

## 12

<sup>1</sup> Busölá neda', Xan, tu' cabirö zoa nitú nu naca dxi'a,  
en biti' gaca nu idzöli nitú nu run ca rnna xtídza'a.

<sup>2</sup> Ta'zí' ye'e yúgu'tē' bönachi luzé'eguequi.

Lu yöl-la' rizí' yē' quéguequi tuí'ilen luzé'eguequi didza' yúlajdo'.

<sup>3</sup> Xan, buzóa dxisö nupa na' tuí'i didza' yúlajdo',  
en buzaga' ruí'igaca nupa tun ba zxön cuínguequi.

<sup>4</sup> Ta'nná: “Güí'iru' didza' ca rizēsö ládxi'ru',  
ate' cuntu nu tá'baga' rē'u.

¿Nuzxi caz inná be'e rē'u ca naca didza' ruí'iru'?”

<sup>5</sup> Rnnē' Xanru': “Na'a guída' tu' nacuá' nupa tun zi' nupa ta'yadzaj ta'yudxi,  
ate' rinnē' ládxi'gaca nupa ni tu' zoa nu ribía no léguequi.

Ca ta'zēsö ládxi'gaca, la' guídatea' dusölá' léguequi.”

<sup>6</sup> Huáca uzxöni ládxi'ru' didza' ru'ë Xanru'.

Nácagaca ca guíé' plata ba nequi,  
le nudxi'a gadxi luzuí' tu lu guí' lálē'e.

<sup>7</sup> Li' caz, Xan, gun chi'u léguequi,  
en usöló' léguequi lu ná'agaca nupa tuá' dö' na'a dza.

<sup>8</sup> Gáti'tës nacuá' nupa tuá' dö',  
cate' tun zxön bönachi le ruá' dö'.

## 13

<sup>1</sup> ¿Gáca'xte caz gal-la ládxi'u neda', Xan?

¿Naru' tsaz gal-la ládxi'u neda'?

¿Gáca'xte caz ucache' cuinu' lahua'?

<sup>2</sup> ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

<sup>3</sup> Buyú neda', Xan, en bubí'i didza'.

Butipa ládxa'a para cabí gátia'.

<sup>4</sup> Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lë'."

Bití' gaca ulu'dzeja tu' nőtjada' ládxa'a neda'.

<sup>5</sup> Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

<sup>6</sup> Gul-la' queë' Xanru',

tu' benë' quia' le naca dxi'a.

## 14

<sup>1</sup> Lu icja ládxi'da'ahuë' rnnë' bönni' tu' canöz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

<sup>2</sup> Ga zoë' Dios yehua' yubá buyúë' luyú ni ga nacuá' bönachi  
para ilé'enë' channö zoa nu réajni'i, nu na' riguilaj Dios.

<sup>3</sup> Yúgu'të' nadödigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

<sup>4</sup> ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Bití' ca' tu'lidza neda', Xángaca bönachi.

<sup>5</sup> Lu yöl-la' radxi ridzöbi quéguequi ta'zxizi  
tu' ta'lé'e Xanru' Dios, en zóalenë' bönachi tsahui'.

<sup>6</sup> Tu'titaj xtídza'gaca nupa nácagaca yechi',  
pero nupa ni tu'zxöni ladxi' gácalenë' Xanru' léguequi.

<sup>7</sup> Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,  
ulu'dzeja zxí'ini xi'sóë' Jacob, bönachi Israel, en ulu'zí' xibë' Dios.

## 15

<sup>1</sup> ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

<sup>2</sup> Nu na' naca idú ladxi', en run le naca tsahui',  
en lu icja ládxi'da'ahui ruí'i didza' le nácatë.

<sup>3</sup> Nu na' bití' rizí' quidza' bönachi,

en bití' ruá' dö' que luzë'e,

en bití' ruzë naga nu rizí' quidza' luzë'e.

<sup>4</sup> Nu na' bití' run bal nu ruá' dö',

pero run bal nupa tun zxön Dios,

en sal-la' bi uniti cate' chinún xtidza', biti' ca' rutsá' didza' na'.  
<sup>5</sup> Nu na' biti' rizi' icja dumí cate' runödzej dumí que tu chí'ido'sö,  
 en biti' rizi' dumí para si' yë' ca naca le nun nu biti' nabaga' xigua'.  
 Nu na' run yúgu'të le caní biti' ca' idzá' xilataj.

## 16

<sup>1</sup> Ben chi'i neda', Dios, tu' ruzxöni ládxa'a Li'.

<sup>2</sup> Lu icja ládxi'da'ahua' gudxa'-në' Xanru':

“Li' nacu' Xana'.

Bíti'rö bi zoa quia' le naca dxi'a, pero tuzu' Li'.”

<sup>3</sup> Riyaza ládxi'lëna' nupa nácagaca queë' Dios luyú ni,  
 en nupa nácagaca idú ladxi'.

<sup>4</sup> Ila'yán le ila'guí'i ila'zaca' nupa ta'yéaj ladxi' yugu' dios izá'a.

Biti' ca' cu'a láhuiguequi rön ca tun bönachi na',  
 en biti' ulidza' lágaca dios na'.

<sup>5</sup> Náquië' Xanru' Dios Nu nabánida', en Nu ruzi'a xibé.

<sup>6</sup> Li', Xan, nuzú' xilatja'.

Lataj na' nuzú' quia' naca le ruzi'a xibé,  
 en lachi naca lataj na' nequi quia'.

<sup>7</sup> Gul-la' yöl-la' ba queë' Xanru', Nu rigú'u yöl-la' neda' le naca tsahui',  
 ga ridxintë ruzéajni'inë' neda' cate' ni' rasia'.

<sup>8</sup> Chinuna' ga zóatica'së' Xanru' lahua'.

Tu' zoë' cuita' biti' bi utsá' neda'.

<sup>9</sup> Que lë ni na' budzeja ládxa'a, en buzi' xibé ládxi'da'ahua',  
 ate' gun löza le naca' cate' igácha'a yeru ba,

<sup>10</sup> tu' cabí uca'anu' neda' lataj chul-la,  
 en biti' gu'u lataj uniti nu nequi quez quiu'.

<sup>11</sup> Nunu' ga núnbë'a nöza ichë' neda' ga soa' ibana'.

Ga zu' Li' gata' quia' yöl-la' rudzeja idú,  
 ate' cuitu' Li' uzí'tica'sa' xibó'.

## 17

<sup>1</sup> Ruzé nagu' neda', Xan.

Lu le naca tsahui' quia' rulidza' Li'.

Bë' ladxi' le rinábida' Li' tu' cabí ca' rizi' yë'a.

<sup>2</sup> Buchi'a busörö quia'

tu' runu' Li' le naca tsahui'.

<sup>3</sup> Núnbë'u Li' le yu'u ládxi'da'ahua'.

Ruyú' neda' chí'i dzö'ölö.

Guzxí' bë'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

<sup>4</sup> Runa' ca rinná bë' xibá quiu',

en biti' ca' ruá'a dö' ca tun bal-la bönachi.

<sup>5</sup> Ridática'sa' la' nöza tsahui' quiu',

en biti' ca' ridöda' tsölá'alö.

<sup>6</sup> Rulidza' Li', Dios, tu' rubi'u didza'.

Ruzé nagu' yugu' didza' ruá'a.

<sup>7</sup> Buluí'i lahui yöl-la' dxi'i ladxi' quiu'.

Rusóla cazu' nupa tu'zxöni ladxi' Li'

lu ná'agaca nupa ta'dá'baga' léguequi.

<sup>8</sup> Ben chí'i neda' ca run chí'u la' guiöj lo cazu'.

Bucachi' neda' cuitu' Li' ca runba' böra, rucáchi'gacaba' börado' zخان xílaba',

<sup>9</sup> para cabí bi ilún quia' nupa tuá' dö',  
nupa na' ta'lé neda', en nagú'ugaca neda' lé'ajlö.

<sup>10</sup> Biti' ca' zóalen léguequi yöl-la' ruhuéchi' ladxi',  
ate' tuí'i didza' lu yöl-la' run ba zخون cuínguequi.

<sup>11</sup> Gátitës ga ridöda' ta'gú'u neda' lé'ajlö,  
en té'ëni ila'guín neda' luyú.

<sup>12</sup> Nácagaquië' ca yugu' bëdxi guíxi'do'.

Të'ënë' ulu'sunítië' neda'.

Nácagaquië' ca yugu' bëdxi guíxi'.

Nucachi' cuíngaqüë' para ila'zönë' neda'.

<sup>13</sup> Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guíë tuchi' quiu'.

<sup>14</sup> Lu yöl-la' huáca zخون quiu' busölá neda', Xan,  
lu ná'agaca nupa tu'zì' xibé na'a dza,  
nupa na' nuhuólaj nudzë'egaca yöl-la' tsahui' quiu'.

Nayángacabi' zxi'inigaquië',  
ate' tu'cá'anë' lu ná'agacabi' le dë sizxöni quégaquië'.

<sup>15</sup> pero neda' ilé'eda' lo' tu' naca' tsahui',  
en tsaza ládxa'a gaca' ca nacu' Li' cate' ubana'.

## 18

<sup>1</sup> ¡Nadxí'ide'eda' Li', Xan!

¡Li' rutipa cazu' ládxa'a!

<sup>2</sup> Ruzóë' Xanru' neda' tsutsu, en rapa chí'ë neda', en rusölë' neda'.

Náquië' Dios quia', en Nu rutipa ládxa'a,

ate' ruzxöni ládxa'a Lë'.

Rácalenë' neda' lu gudil-la: Rusölë' neda', en rizönë' neda'.

<sup>3</sup> Rulidza'-në' Xanru' Nu ral-la' cú'uru' yöl-la' ba,  
ate' usölë' neda' lu ná'agaca nupa tu'dí'i neda'.

<sup>4</sup> Ia'látisö la' gútia',  
ate' yöjbaga' neda' le usuniti neda', le ben ga gúdxida'.

<sup>5</sup> Ia'látisö la' yöjtsu'a lataj chul-la que yöl-la' guti,  
tu' la' gútitia'.

<sup>6</sup> Lu le guca quia' bulidza'-në' Xanru'.

Bulidza'-në' Dios quia' para gácalenë' neda'.

Ga na' zoë' lataj lá'ayi queë' biyönnë' chí'a.

Buzë naguë' le gunabi yúdxida' Lë'.

<sup>7</sup> Ní'irö gudödi budó' zxu', en guzxizi luyú.

Guzxízida' xilíbigaca yugu' guí'a sibi.

Guzxízigaca tu' gulénë' Lë'.

<sup>8</sup> Birúaj dzön zxinë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

<sup>9</sup> Benë' ga bötaj lúzxiba, en bötajë' Lë' cazë',

ate' guzóa zخان ni'ë le naca chul-la.

<sup>10</sup> Gudödë' lu bö'ös dxíë' tu le nayëpisë nazí'i le querubín.

Carelö gudödë' tu lu bö' budunu'.

- 11 Busubaga' cuinë' le naca chúl-lasö.  
Lë na' naca böaj gasaj le richë'lë'e nisa.
- 12 Lu le rëpi yösa queë' lu böaj gasaj na'  
bila'rúaj bo' yalaj, en guiöj bögui' yöla sunna.
- 13 Gunnë guziú' que chi'ë Xanru' lúzxiba xitsá'.  
Biyön chi'ë Dios nayëpisëtërë',  
lu dzön, en yugu' lu bo' yalaj, en lu guiöj bögui' yöla sunna.
- 14 Gusöl-lë'ë yugu' yaga lahui tuchi' queë', en bësilásië' nupa na' tu'dí'i neda'.  
Gusöl-lë'ë yugu' yösa queë' yugu' le bulu'cul-la léguequi.
- 15 Ní'irö bilá' lahui le zoa znan nísado',  
ate' bilá' lahui xilibi yödzölió,  
cate' buzenu' bach nupa biti' ta'lé'e Li' dxi'a, Xan,  
en lu yöl-la' rilé quiu' bulidza zi'u léguequi.
- 16 Bötjë' zaca' xitsá'alö, en gudélë'ë neda'.  
Bubéajë' neda' lu nisa zili.
- 17 Busölë' neda' lu na' nu biti' rilé'e neda' dxi'a, en nál-latërö,  
enca' lu ná'agaca nupa tu'dí'i neda', en nál-lágacatërö ca neda'.
- 18 Cate' ni' chizóa inítia' gula'zóa régu'ë neda',  
pero Xanru' gúcalenë' neda'.
- 19 Bubéajë' neda', en buzóë' neda' tu lu lataj zxon.  
Busölë' neda' tu' guyaza ládxë'ë neda'.
- 20 Bubi'ë Xanru' quia' tsca le tsahui' naca',  
en benë' quia' le naca dxi'a tu' cabí nabága'a xiguia',
- 21 tu' runa' ca naca le rusëdinë' Xanru' neda',  
en biti' ca' ridá'baga'a Lë'.
- 22 Runa' ca ta'nná xibá nunë' Xanru',  
en biti' ridá'baga'a le rinná bë' naguixjë' Lë'.
- 23 Biti' bi le naca dö' nabága'a lahuë' Lë',  
ate' ben chi'a le innía' para cabí gu'a dö'.
- 24 Que lë ni na' bubi'ë Xanru' quia' tsca le tsahui' naca',  
en tu' cabí nabága'a xiguia' lahuë' Lë'.
- 25 Ruhuéchi' ládxi'u nupa tu'huechi' ladxi' luzë'eguequi,  
en nacu' idú dxi'a len nupa ná'agaca idú dxi'a.
- 26 Ruluí'i cuinu' idú ladxi' len nupa ná'agaca idú ladxi',  
pero ridá'bagu'u nupa ta'dá'baga' xtídz'u.
- 27 Rusöló' nupa ta'guí'i ta'zaca',  
pero ruzötju' nupa tun ba rahui.
- 28 Ruquéla' cazu' guí' quia', Xana' Dios,  
en rigú'u quia' bení' cate' ridá' ga chul-la.
- 29 Lu yöl-la' huáca queë' Dios rucul-la' bönni' guizxi yu röjáquië' gudil-la.  
Tu' zóalenë' Dios quia' neda',  
rixítia' ribixa' lu zö'ö run chi'i léguequi.
- 30 Idú dxi'a ná'agaca le runë' Dios.  
Nurúaj tsahui' xtídzë'ë.  
Rapa chi'ë yúgu'të nupa ta'nábini Lë' gácalenë' léguequi.
- 31 ¡Tuzë' Xanru' náquië' Dios!  
¡Tuzë' Dios rapa chi'ë rë'u!

32 Dios ni ruzalë' neda',  
en runë' ga naca' idú ládxa'a.

33 Runë' ga nácgaca ni'a ca ní'agacaba' bidxina' guixi',  
en ruzóë' neda' yugu' lu guí'a zxön.

34 Rusédinë' neda' para gaca tseja' gudil-la,  
en para gaca uguna' dxin uxiti' yaga néquini guié bronze.

35 Lu yöl-la' rusölá quiu' run chi'u neda'.  
Len no'o nál-la rizönu' neda',  
en lu yöl-la' dxi'i ladxi' quiu' nunu' ga nayëpisëtëra'.

36 Ruchi'u nöza ga ral-la' töda',  
en runu' ga biti' cuila'.

37 Guzóa régu'a nupa tu'dí'i neda', en bucul-la' léguequi.  
Biti' buécja' ga bidxintë busunítia' léguequi.

38 Gudina' léguequi luyú, ate' biti' guca ulu'huóása.  
Gula'dzö'ö zخان ni'a.

39 Benu' neda' nál-la para tseja' gudil-la,  
en benu' ga bucul-la' nupa gula'dá'baga' neda'.

40 Benu' ga bulu'zxunnaj lahua' nupa biti' ta'lé'e neda' dxi'a,  
ate' busunítia' nupa na' bulu'dí'i neda'.

41 Bulu'lidza nu gácalen léguequi,  
pero cuntu nu zoa usölá léguequi.  
Bulu'lidza ca' Xanru', pero biti' bubí'ë didza'.

42 Buzxuzxja' léguequi ca bëchtö yu naché' lu bö'ös.  
Buliba' léguequi ca ruliba' guna' la' nöza.

43 Busöló' neda' lu ná'agaca nupa ta'dá'baga',  
en nunu' ga rinná bé'eda' bönachi zían yödzö.  
Tun ca rnna xtídza'a bönachi biti' núnbë'a zí'alö.

44 Cate' ta'yöni neda', la' tun ca rnna xtídza'a.  
Tadxi neda' bönachi zían yugu' yödzö izá'a.

45 Ta'cuidi' ladxi', en lu yöl-la' rizxizi quéguequi  
ta'rúaj yugu' lu yödzö tsutsu quéguequi.

46 ¡Zoë' nabanë' Xanru'!  
¡Yöl-la' ba Nu na' run chi'i neda'!  
¡Guli'gún zxön Dios Nu rusölá neda'!

47 Náquië' Dios Nu rizi' la nupa tu'dí'i neda',  
en runë' ga tadxi bönachi guízxi yu neda'.

48 Rusölé' neda' lu ná'agaca nupa biti' ta'lé'e neda' dxi'a.  
Le nácatë runë' ga rucul-la' nupa ta'dá'baga' neda',  
en rusölé' neda' lu na' bönni' ridzá'a.

49 Que lë ni na' guía' Li': Xclenu' Xan, lógaca bönachi zían yödzö,  
en gul-la' yöl-la' ba que Lo' La'ayi.

50 Rusölá cazë' Xanru' bönni' rinná bë'ë uláz queë',  
en nadxí'itica'së' nu na' nabö cazë',  
nu na' naca David, en yugu' zxí'ini xi'sóë' ga idxinrö dza udxi.

**19**

<sup>1</sup> Yugu' le nacua' lúzxiba tu'luí'i lo yöl-la' zxön queë' Dios, ate' yugu' le raca lu bö'ös nacagaca bë' le nunë'.

<sup>2</sup> Yugu' dza tu'zéajni'i, en yugu' dzö' tu'luí'i lo yöl-la' réajni'i.

<sup>3</sup> Biti' zoa didza' tuí'i, en bití' riyön tu le ta'nná. Biti' riyön chí'iguequi.

<sup>4</sup> Le tu'zéajni'i ridxín ga naguéla'të luyú, en le tu'sedi ridxín idútë yödzölió.

Ga na' nacua' nuzóë' Dios xilataj gubidza,

<sup>5</sup> le naca ca tu bönni' utsaga në'ë rirúajë' yu'u, en naca ca' ca tu bönni' nál-la rudzéjanë' cate' zéajë' carelö lu huitaj.

<sup>6</sup> Ga naguela' lúzxiba rilén gubidza, en ridödi ga ridxintë ga ribía.

Biti' bi zoa le cabí rutsë'e gubidza na'.

<sup>7</sup> Tsahui' naca ca rinná bë'ë Xanru', en run ga huöáca ládxi'ru'. Idútë li naca didza' nuzóë' Xanru', le run ga réajni'i nu naca nöxaj ladxi'.

<sup>8</sup> Tsahui' nacagaca xibá queë' Xanru', le tun ga rudzeja ládxi'ru'. Nacagaca idú dxi'a le gunná bë'ë Xanru', en ta'gú'u bení' icja ládxi'do'oru'.

<sup>9</sup> Dxi'ado' naca gádxiru'-në' Xanru', para sóatica'siru'. Idú li naca ca ruchí'a rusöröë' Xanru' bönachi, en idú tsahui'.

<sup>10</sup> Nazáca'gacatëro didza' na' ca oro, enca' ca oro ba nequi. Nacagacatëro zxixi ca bidxina' buz, en ca le zxixi queëba'.

<sup>11</sup> Didza' na' tu'zéajni'i neda', huen dxin queë'. Uzí'tëro xibé nu run ca rnna xtídzë'ë na'.

<sup>12</sup> ¿Nuzxi caz gaca inöz channö richixi rinigui? Busólá neda' lu dul-la' nuna' le cabí gúquibe'eda' bena'.

<sup>13</sup> Ben chí'i neda' para cabí udödi cuina' lu dul-la', para cabí inná be'e neda' lë na' naca dul-la'.

Ní'irö ugá'ana' tsahui', en bití' ibága'a xiguia'.

<sup>14</sup> Ben ga ilaca didza' ruá'a, en le rizá' ládxa'a ca raza ládxi'u Li'. Nacu' Xana' ruzú' neda' tsutsu, en ruhuóá'au' neda'.

**20**

<sup>1</sup> Rinábida'-në' Xanru' uzé naguë' li' cate' idxín dza qui'i sacu'u. Dios queë' Jacob gácalenë' li'.

<sup>2</sup> Rinábida'-në' isól-lë'ë le gácalen li' le irúaj lataj lá'ayi queë'. Lë na' irúaj Sión gun ga gacu' tsutsu.

<sup>3</sup> Rinábida'-në' tsöjnenë' yúgu'të le gulú'u queë', en si' lu në'ë le buzégui'u lahuë'.

<sup>4</sup> Rinábida'-në' gunnë' quiu' tsca naca le rizë ládxi'u, en gunë' ga gacatë yúgu'të le rizá' ládxi'u.

<sup>5</sup> Udzéjatu' cate' usölë' li', en uchísatu' le gaca bë' rulidztu'-në' Dios queëru'. Rinábida'-në' Xanru' gunnë' quiu' yúgu'të le rinábinu' Lë'.

<sup>6</sup> Na'a nözda' rusölë' Xanru' nu nabö cazë'. Riyönnë' nu na' naböë' ga ni' zoë' yehua' yubá la'ayi queë'. Isól-lë'ë yöl-la' huáca idú queë' le usólá nu na'.

<sup>7</sup> Nacuá' nupa tu'zxöni ladxi' yugu' carreta que gudil-la,



ate' nacuá' bönachi yúbölö tu'zxöni ladxi' yugu' böa',  
pero rë'u ruzxöni ládxi'ru' Lë' Xanru' Dios.

<sup>8</sup>Ta'cuídi'në' nupa na', en ta'dzö'ë,  
pero rë'u ni zuíru', en zóaru' tsutsu.

<sup>9</sup>Busölá netu', Xan, tu' nacu' Nu rinná be'e netu'.  
Rinábitu' Li' uzë nagu' netu' cate' ulídzatu' Li'.

## 21

<sup>1</sup>Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.  
Tu' busöló' lë', yënni'tërö rudzéjanë'.

<sup>2</sup>Bunödzu' queë' le rizë ládxi'ë.

Biti' gudá'bagu'u le gunábinë' Li'.

<sup>3</sup>Tu' raza ládxi'u lë' ruzú' queë' yugu' le naca dxi'a.  
Nudxiú' icjë' tu le néquini oro idú.

<sup>4</sup>Gunábinë' Li' gu'u queë' yöl-la' na'bán, ate' bë'u le queë'.

Nunu' ga sóatica'së' ibanë' yugu' dza si' zaca.

<sup>5</sup>Zxöntë naca yöl-la' zxön queë' tu' nusöló' lë'.

Nunu' lë' bal, en nunu' ga nayëpisë'.

<sup>6</sup>Zóatica'sö le naca dxi'a nuzú' queë'.

Runu' ga rudzéjade'enë' tu' zóalenu' lë'.

<sup>7</sup>Caní raca queë' bönni' na' rinná bë'ë tu' ruzxöni ládxi'ë Xanru'.

Biti' bi utsá' lë' tu' ruhuéchi' ládxi'ë Dios nayëpisëtërë' lë'.

<sup>8</sup>Huadeli' no'o ga nacuá' yúgu'të nupa ta'dá'baga' Li'.

Huadeli' no'o ibëla ga nacuá' nupa tu'dí'i Li'.

<sup>9</sup>Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítu' léguequi, Xan, lu yöl-la' rilé quiu',  
ate' tséguiguequi tu lu guí' zxön.

<sup>10</sup>Ucuítu' yugu' xzí'ini xi'sóagaca nupa na' luyú ni,  
en ubéaju' yugu' xzí'iniguequi ládxi'gaca bönachi.

<sup>11</sup>Caní gunu' tu' gulë'ë'niguequinë' ilu'ë dö' quiu'.

Gulún xtídza'gaquië' bi ilunë', pero biti' gaca ilunë' ca rnna xtídza'gaquië',

<sup>12</sup>tu' gunu' Li' ga ulu'zxúnnajë'.

Ichisu' uxiti' yaga quiu', en gunu' léguequi huë'.

<sup>13</sup>Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca quiu'.

## 22

<sup>1</sup>Dios quia', Dios quia', ¿bizx que nusán no'o neda'?

¿Bizx que bití' riyönnu' le rinnëda' ládxi'a, en bití' rácalenu' neda'?

<sup>2</sup>Dios quia', idú dza rulidza' Li', pero bití' bi didza' rubi'u.

Idú yëla rulidza', en bití' ca' rasia'.

<sup>3</sup>Lá'ayi nacu' Li'.

Zu' ga riyön yöl-la' ba ta'gú'u bönachi Israel Li'.

<sup>4</sup>Bulu'zxöni ládxi'ë xuz xtó'otu' Li'.

Bulu'zxöni ládxi'ë Li', ate' busöló' légaquië'.

<sup>5</sup>Bulu'lidzë' Li', ate' gúcalenu' légaquië'.

Bulu'zxöni ládxi'ë Li', en bití' bulu'tuí'inë'.

- 6 Naca' neda' ca tuba' bëla guna', en calëga bönni'.  
 Tu'dí'i bönachi neda', en tu'cá'ana neda' cá'asö.  
 7 Yúgu'të nupa ta'lé'e neda' tu'titaj neda'.  
 Ta'salaj ru'íguequi lu yöl-la' rutitaj, en tu'tá ícjaguequi, ta'nná:  
 8 "Lë' buzxöni ládxe'ë Xanru' para usölë' lë'.  
 Xanru' usölë' lë' channö tsaza ládxe'ë lë'."  
 9 Nacu' Li' Nu guléaj neda' lë'ënu xiná'a.  
 Benu' ga ruzxöni ládxa'a Li'  
 cate' ni' gúdx'a'a luchú'unu xiná'a.  
 10 Nagá'ana' lu no'o Li' ga gudéla'të gulja'.  
 Ga gudéla'të buzóanu xiná'a neda' nacu' Dios quia'.  
 11 Biti' su' zi'tu' ga ni zoa', tu' zoa' gagu le gun neda' zi',  
 ate' cúnturö nu zoa nu gácalen neda'.  
 12 Gula'gu'ë neda' lë'ajlö ca tunba' yugu' bëdxi.  
 Ca yugu' bëdxi que yödzö Basán gula'bía di'ë neda'.  
 13 Ta'salaj ru'ágaquië' lahua' neda'  
 ca runba' bëdxi guixi', ridunba', en ribödxi'aba'.  
 14 Nuhuöáca' ca nisa nalalaj luyú, ate' nazángaca bëch dxita quia'.  
 Nuhuöáca ládxi'da'ahua' ca bidxina' buz la lu lë'a.  
 15 Nacuidi' yöl-la' huáca quia' ca tu rö'ö nalá'a,  
 ate' da' lúdx'a'a chichja'.  
 Nuzú' neda' lu bëchtö yu que yöl-la' guti.  
 16 Ta'gu'ë neda' lë'ajlö ca tunba' yugu' bö'cu'.  
 Nagú'ugaquië' neda' lë'ajlö bönni' tu'ë dö'.  
 Nuzóagaquië' yeru blaga na'a, en ni'a.  
 17 Nalá'gaca yúgu'të dxita néquinida'.  
 Ta'në'ë neda', en tu'yú yénnië' neda'.  
 18 Ta'guísië' zxa' que queégaquië',  
 en tu'yúë le gaca bë' lahui lari' rixóa cúdza'a.  
 19 Biti' gá'anu' zi'tu', Xan.  
 Gúcalentë neda', Li', Nu naca yöl-la' huáca quia'.  
 20 Busölá neda' lu guíë tuchi'.  
 Busölá yöl-la' na'bán quia' lu ru'á'agacaba' bö'cu'.  
 21 Busölá neda' lu ru'á'agacaba' bëdxi guixi',  
 en lu lúzugacaba' bëdxi gú'una.  
 Li' riyön quézinu' chi'a.  
 22 Usiyönda' yugu' böchi' luzá'a ca naca Lo'.  
 Gatsaj láhui'lö ga na' tu'dubi bönachi lo' cu'a Li' yöl-la' ba.
- 23 ¡Guli'cu'ë Xanru' yöl-la' ba, libí'ili' na' rádxili'-në!  
 ¡Guli'gun zxön Lë', yúgu'tëli' zxi'ini xi'sóë' Jacob!  
 ¡Guli'gadxi Lë', yúgu'tëli' zxi'ini xi'sóë' Israel!  
 24 Caní ral-la' gunli' tu' cabí bucá'anë' cá'asö,  
 en bití budí'inë' nupa gula'guí'i gula'zaca',  
 en bití bucachi' lahuë' para cabí ilé'enë' léguequi,  
 pero cate' bulu'lidza Lë', biyönnë' léguequi.
- 25 Cu'a Li' yöl-la' ba ga tu'dubi bönachi guizxi yu lo'.  
 Lógaca nupa tadxi Li' usudxina' le guzxí' lu na'a guna' quiu'.
- 26 Ilágugaca nupa nácagaca nöxaj ladxi', en ulu'huölaj ulu'dzë'e.

Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.

<sup>27</sup> Bönachi idútë yödzölió tsöjnégaca Xanru', en ulu'huóaca queë'.

Bönachi yúgu'të yödzö luyú ila'gú'u Lë' yöl-la' ba.

<sup>28</sup> Caní gaca tu' dë lu në'ë Xanru' inná bë'ë.

Inná bé'enë' yúgu'të bönachi luyú.

<sup>29</sup> Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.

Yúgu'të nupa ila'niti ulu'zechu zxíbigaca lahuë' Lë',

nupa na' bití' ca' gaca ilún chi'i yöl-la' na'bán quéguequi.

<sup>30</sup> Zxí'ini xi'sóali' ilún xichinë'.

Ila'guixjò' lë ni ca naca queë' Xanru' para ila'yöni nupa tsöjsétëgaca luyú ni.

<sup>31</sup> Ilidë', en ulu'lu'inë' lahui náquië' Xanru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

## 23

<sup>1</sup> Ruyú cazë' Xanru' Dios neda' ca tu nu ruyú bö'cu' zxila'.

Bití' bi riyádzjada'.

<sup>2</sup> Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda' le iláguba'.

Ga naca ra' nisa rizá' tsahui' ládxi'do' richë'ë neda'.

<sup>3</sup> Runë' ga ruhuóaca ládxa'a.

Richë'ë neda' ga naca nöza tsahui' tu' nadxí'inë' neda'.

<sup>4</sup> Sal-la' ridá' ga zoa bönadxi gátia',

bití' bi gádxida' tu' zóalen casu' neda', Dios.

Len xiyaga quiu', en no'o rutipu' ládxa'a.

<sup>5</sup> Ga nacué' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guí'jada'.

<sup>6</sup> Le nácatë dusóalengaca neda' le naca dxi'a,

en yöl-la' dxi'i ladxi' queë' yúgu'të dza soa' ibana',

ate' lu yu'u lidxë' Xanru' sóatica'sa'.

## 24

<sup>1</sup> Nequi queë' Xanru' Dios luyú ni, en yúgu'të le dë lahui.

Nequi queë' yödzölió, en yúgu'të nupa nacué' ni'.

<sup>2</sup> Naguixjè' le lahui nísado' rö'ö zxánilö,

en nuzóë' xilibi luyú ga rë' zxan nísado'.

<sup>3</sup> ¿Nuzxi caz bönni' dë lu në'ë cuenë' guí'a lá'ayi queë' Xanru'?

¿Nuzxi caz gaca tsaza lu lataj lá'ayi queë'?

<sup>4</sup> Huáca bönni' na' naca dxi'a ca runë', en ca rizá' ládxi'ë,

bönni' na' bití' runë' bal budó' guiój budó' yaga,

en bití' rizí' yë'ë cate' rizí' lu në'ë bi gunë'.

<sup>5</sup> Gunë' Xanru' ga gaca dxi'a queë' bönni' na'.

Caní gunnë' Dios, Nu rusölá lë', en náquië' tsahui'.

<sup>6</sup> Caní nácgaca nupa ta'dxín lahuë' Dios,

nupa na' ta'biga' lahuë' Dios quégaca zxí'ini xi'sóë' Jacob.

<sup>7</sup> Guli'salaj ga nu riyaza yödzö la'ayi.

Guli'salaj ga nu riyaza xilatjè' Dios le nuzóë' tsaz,

ate' tsazië' Bönni' unná bë' nayépisëtëré'.

<sup>8</sup> ¿Nuzxi caz Bönni' unná bë' nayépisëtëré' na'?

Náquië' Xanru' nál-latëré', en nápatëré' yöl-la' huáca,

Lë', Xanru', Nu rideli' lu gudil-la.

<sup>9</sup> Guli'salaj ga nu riyaza yödzö la'ayi.  
Guli'salaj ga nu riyaza xilatjë' Dios le nuzöë' tsaz,  
ate' tsázië' Bönni' unná bë' nayëpisëtëré'.

<sup>10</sup> ¿Nuzxi caz Bönni' unná bë' nayëpisëtëré' na?  
Náquië' Xanru' Dios quéguequi ni'a në'ë guizxi yu.  
Lë' náquië' Bönni' unná bë' nayëpisëtëré' na'.

## 25

<sup>1</sup> Idú ládxa'a rulidza' Li', Xan.

<sup>2</sup> Ruzxöni ládxa'a Li', Dios quia'.

Ben ga cabí utuí'ida',  
en cabí ulu'dzeja nupa biti' ta'lé'e neda' dxi'a.

<sup>3</sup> Biti' ila'bö' böniga nupa tun löza Li',  
pero ulu'tuí'i nupa ta'dá'baga' xtídz'u.

<sup>4</sup> Buluí'i neda' le ré'ënu' guna', Xan,  
en buzéajni'i neda' le raza ládxa'u Li'.

<sup>5</sup> Busedi neda' para guna' ca naca le naca idútë li quiu'.  
Tu' nacu' Dios, Nu rusölá neda'  
gúntica'sa' löza Li'.

<sup>6</sup> Yöjné ca naca yöl-la' dxi'i ladxi' quiu', Xan,  
en yöl-la' ruhuéchi' ladxi' quiu', yugu' le nacua'tica'sö.

<sup>7</sup> Buniti lo neda' ca naca dul-la' bena',  
en le gudá'baga'a Li' cate' ni' zoa' iz cuidi' quia'.

Lu yöl-la' ruhuéchi' ladxi' quiu',  
en yöl-la' dxi'i ladxi' quiu' yöjné neda', Xan.

<sup>8</sup> Náquië' Xanru' dxi'a tsahui', en li ladxi'.  
Que lë ni na' rulu'inë' nupa tun dul-la' le ral-la' ilún.

<sup>9</sup> Ca naca le naca tsahui' richë'ë Dios nupa nácagaca nöxaj ladxi',  
en rulu'inë' nupa nácagaca do' ladxi' le ré'ënë' ilún.

<sup>10</sup> Lu yöl-la' ruhuéchi' ladxi' queë', en yöl-la' rusudxín didza' queë',  
richë'ë Xanru' nupa tun ca rinná bë' xibá naguixjë',  
en ca naca didza' rucá'ana tsahui' nunë'.

<sup>11</sup> Tu' nacu' dxi'i ladxi', Xan,  
buniti lo neda' ca naca dul-la' nuna', le naca dul-la' zxön.

<sup>12</sup> Nupa tun bal Xanru'  
ulu'í' quézinë' léguequi le naca dxi'a le ral-la' ilún.

<sup>13</sup> Ulu'zí' xibé le naca dxi'a gunné' quéguequi,  
ate' guequi quégacabi' zxí'ini xi'sóaguequi luyú ni.

<sup>14</sup> Xanru' zóaléntica'së' nupa tun ca rnna xtídzë'ë,  
en ruzéajni'inë' léguequi ca naca didza' rucá'ana tsahui' nunë'.

<sup>15</sup> Ruyútica'sa' guidë' Xanru' gácalenë' neda',  
tu' usölë' neda' lu na' nu ré'ëni sön neda'.

<sup>16</sup> Buécja quia', Xan, en buéchi' ladxi' neda',  
tu' zoa' tuza', en nacuí'da'.

<sup>17</sup> Nayán le tu'quí'i tu'saca' neda'.  
Busölá neda' lu le ruúbi ruguí'i ládxi'da'ahua'.

18 Buyú ca riguí'i rizáca'a, en rudú ládxa'a.  
 Buniti lo neda' ca naca yugu' dul-la' nabága'a.  
 19 Buyú ca nayán nupa tun neda' zì'.  
 Buyú ca tu'dí'i neda'.  
 20 Ben chí'i neda', en busölá neda'.  
 Biti' gu'u lataj utuí'ida' tu' ruzxöni ládxa'a Li'.  
 21 Ben ga ilún chí'i neda' le naca idú ladxi',  
 en le naca li ladxi', tu' runa' löza Li'.  
 22 Buá'au' bönachi Israel,  
 Dios lu yugu' le raca quéguequi.

## 26

1 Guléaj neda' tsahui', Xan, tu' runa' le naca dxi'a,  
 en idú ládxa'a ruzxöni ládxa'a Li'.  
 2 Buyú lu icja ládxi'da'ahua', Xan, en guzxi' bē' neda'.  
 Buyú le rizá' ládxa'a, en le ribequi icja',  
 3 tu' riché' yöl-la' dxi'i ladxi' quiu' neda',  
 ate' runa' ca naca le naca idútē li quiu'.  
 4 Biti' runa' tsözxön nupa ta'zì' yē',  
 en bitì' ridálena' nupa tu'lu'isö cuínguequi tsahui'.  
 5 Biti' raza ládxa'a udúbilena' nupa tuá' dö',  
 en bitì' guna' tuz didza' len nupa nácagaca xihui'.  
 6 Richisa na'a lo' Li', Dios, cabí dxía dö' na'a,  
 en idú ládxa'a ribíga'a lo bucugu quiu', Xan,  
 7 para gul-la' le guía' Li': "Xclenu"  
 en usiyönda' bönachi ca nácagaca le zxön nunu'.  
 8 Nadxí'ida' yu'u lidxu' ga na' zu', Xan,  
 enca' lataj ga na' yu'u bení' lá'ayi quiu'.  
 9 Biti' usunítu' neda' tsözxön len nupa tun dul-la',  
 en bitì' gútiu' neda' len nupa tuti bönachi,  
 10 nupa na' ta'yaza ladxi' tuá' dö',  
 en nacuá'tica'sö ila'guixxaj dumí para ulu'rúaj tsahui'.  
 11 Gúntica'sa' neda' le naça dxi'a.  
 Buzá' ladxi' quia', en buá'uö neda'.  
 12 Nuzóë' Dios neda' ga zoa' tsutsu ladja bönachi guizxi yu  
 nudúbigaca queë' para cu'a-nē' yöl-la' ba Xanru'.

## 27

1 Náquië' Xanru' Dios bení' quia', en Nu rusölá neda'.  
 ¿Nuzxi caz ral-la' gádxida'?  
 Rapa chí'ë Xanru' Dios caz yöl-la' na'bán quia'.  
 ¿Nuzxi caz gaca gun ga gadxi idzöbida'?  
 2 Cate' gula'dá'baga' neda' nupa tuá' dö' para iluti neda',  
 nupa na' bitì' ta'lé'e neda' dxi'a, en tu'dí'i neda',  
 yöjchégu'gaca, en yöjbíxigaca.  
 3 Sal-la' ila'dá'baga' neda' bönachi guizxi yu,  
 bitì' ca' tsaza yöl-la' radxi ládxi'da'ahua'.  
 Sal-la' ila'díl-lalen bönachi neda',  
 naca' neda' tsutsu ladxi'.  
 4 Tu le rinaba' lahuë' Xanru' Dios, lē na' gü'i ládxi'sa',  
 le naca para sóatica'sa' lidxë' Xanru' yúgu'tē dza soa' ibana',

para gaca uyúa' yöl-la' lachi queë' Xanru' Dios,  
 en para sa' ládxa'a ca naca queë' lu yu'u lá'ayi queë'.  
 5 Cate' idxín dza soa bönadxi quia', ucáchë'ë Lë' neda' lu yu'u lidxë'.  
 Ga nagachi' lu yu'u lidxë' ucáchë'ë neda'.  
 Uzóë' neda' tsutsu ca tu lu guiõjto'o.  
 6 Gunë' ga ucul-la' nupa tu'dí'i neda',  
 ate' lu yöl-la' rudzeja quia' cõdxi'atica'sa'  
 cate' bi unödza' queë' lu yu'u lidxë'.  
 ¡Gul-la' queë'! ¡Ön, gul-la' queë' Xanru' yöl-la' ba!

7 Buzë nagu', Xan, cate' ulidza' Li'.  
 Buzá' ladxi' quia', en bubí'i didza' ca naca le inábida' Li'.  
 8 Cate' Li' gudxu' neda': "Buguilaj neda'",  
 idú ládxa'a bubí'a didza', gunnía': Uguilja' Li', Xan.  
 9 Biti' ucachi' lo' lahua' neda'.  
 Biti' ta'bagu'u neda' lu yöl-la' rilé quiu'.  
 Li' nacu' Nu rácalen neda'.  
 Biti' ucá'anú' neda', en bití' usán no'o neda'.  
 Nacu' Dios, Nu rusölá neda'.

10 Huáca ulu'sán ládxe'ë xuz xiná'a neda',  
 pero uzí' cazë' Xanru' Dios neda'.

11 Busedi neda' para guna' ca rë'ënu' Li', Xan.  
 Buluí'i neda' para guna' le naca tsahui',  
 tu' nacuá' nupa ta'dá'baga' neda'.  
 12 Biti' usanu' neda' lu ná'agaca nupa bití' ta'lé'e neda' dxi'a  
 para cabí ilún quia' le tē'ëni.  
 Ta'dá'baga' neda' nupa ta'zí' yë',  
 en nupa tē'ëni iluá' dö' quia'.

13 Guzxí' lu nē'ë Xanru' Dios gunë' ga ilé'eda' le naca dxi'a,  
 en le naca tsahui' queë' ga nacuá' nupa nabángaca.  
 La'tu' cabí réajlë'a lë ni, chibõaj ládxa'a.

14 ¡Guli'gún lözë' Xanru'!  
 ¡Guli'gaca tsutsu, en buli'tipa ládxi'li'!  
 ¡Ön, guli'gún lözë' Xanru'!

## 28

1 Rulidza' Li', Xan.  
 Nacu' Guiõj le ruzóa neda' tsutsu.  
 Ruzë nagu' chí'a, tu' channö usayju' ru'u,  
 gaca' ca tu bönni' razië' lataj chul-la.  
 2 Ruzë nagu' le rulidza' Li' cate' rinábida' Li' gácalenu' neda',  
 cate' richisa' na'a zaca' Lataj Lá'ayi ga na' zu'.  
 3 Biti' ichë'u neda' tsözxõn len nupa tuá' dö',  
 en tsözxõn len nupa ná'cagaca xihui',  
 nupa na' tuí'i didza' dxi'a lahui' lógaca dzaga yu'u quéguequi,  
 pero yu'u ládxi'do'guequi le cabí naca tsahui'.  
 4 Bubí'i quéguequi tsca naca le tun, en tsca naca dö' ruí'igaca.

Bubí'i quéguequi tsca naca le tun nē'eguequi.  
Bubí'i quéguequi tsca ral-la' gaca quéguequi.

<sup>5</sup> Caní gaca quéguequi tu' cabí tun bal le nunē' Xanru',  
en bití' tun bal le nun nē'ë.  
Uquínnajé' léguequi, en bití' ca' uchisē' léguequi.

<sup>6</sup> ¡Yöl-la' ba Xanru',  
tu' riyönnē' cate' rinábida' Lē' gácalenē' neda'!

<sup>7</sup> Xanru' caz náquiē' yöl-la' huáca quia', en le run chí'i neda'.  
Ruzxöni ládxa'a Lē', ate' rácalenē' neda'.  
Que lē ni na' ruzí' xibé' ládxi'da'ahua',  
ate' gul-la' le guía' Lē': "Xclenu'."

<sup>8</sup> Naca cazē' Xanru' yöl-la' huáca quéguequi bönachi queē',  
en náquiē' ca' Nu run chí'i Bönni' na' bubéajé' quez queē' para inná bē'ë.

<sup>9</sup> Busölá bönachi quiu', Dios, en ben ga gaca dxi'a quéguequi nupa néquiguequi quiu'.  
Ben chí'i léguequi ca run tu nu ruyú bö'cu' zxila', en guché'tica'sö léguequi.

## 29

<sup>1</sup> ¡Guli'cu'ë yöl-la' ba Xanru', libí'ili', nácali' zxi'inigaquiē' bönni' nayépisēgaquiē'!  
¡Guli'cu'ë yöl-la' ba Xanru', en guli'guié': "Napu' yöl-la' huáca idú'!"

<sup>2</sup> ¡Guli'cu'ë yöl-la' ba Xanru' le ral-la' gata' que Lē' tu' náquiē' lá'ayi!  
¡Guli'gún bal Xanru', tu' naca lachi le naca lá'ayi queē'!

<sup>3</sup> Riyón chí'ë Xanru' lu nísado'.  
Riyón chí'ë Xanru' nayépisē' ca riyón guziú' rinnē.  
Riyón chí'ë Xanru' lu nísado'.

<sup>4</sup> Nál-latërö naca chí'ë Xanru'.  
Nayépisētërö chí'ë Xanru'.

<sup>5</sup> Chí'ë Xanru' rilá'a yugu' yaga zxön.  
Ön, chí'ë Xanru' riguitsaj yugu' yaga lu guí'a Líbano.

<sup>6</sup> Runē' Xanru' ga ta'xiti' guí'a ca tunba' bēdxido'.  
Ta'xiti' guí'a Líbano, en guí'a Sirión ca tunba' bēdx guí'a.

<sup>7</sup> Chí'ë Xanru' run ga rēpi yösa.

<sup>8</sup> Ruxizi chí'ë Xanru' la' guixi' ga dē lataj.  
Ruxizi chí'ë Xanru' la' guixi' nazí'i le Cades.

<sup>9</sup> Chí'ë Xanru' run ga ta'béquiba' bidxina' guixi' böa' hué'ënido' quégacaba',  
en run ga ta'guínnaj yúgu'tē laga' dxíagaca yugu' yaga.

Lu yudo' queē' tuí'i didza' yúgu'tē le nacuá', ta'nná: "¡Yöl-la' ba Lē'!"

<sup>10</sup> Gurö'ë gunná bē'ë Xanru' cate' gurö'ö nisa lu idútē yödzölió.

Ön, rö'ë rinná bē'tica'sē' Xanru'.

<sup>11</sup> Rutipē' Xanru' ládxi'do'gaca bönachi queē'.  
Gunē' Xanru' ga gaca dxi'a quégaca bönachi queē',  
en gunē' ga ila'böza dxi'a tsáhui'do'.

## 30

<sup>1</sup> Guna' Li' zxön, Xan, tu' buchisu' Li' neda',  
en bití' bē'u lataj bi ilún quia' nupa bití' ta'lé'e neda' dxi'a.

<sup>2</sup> Rigu'a Li' yöl-la' ba, Xana' Dios,  
tu' bulidza' Li' gácalenu' neda', ate' bunu' neda'.

<sup>3</sup> Bubéaju' yöl-la' na'bán quia' lu yeru ba, Xan.  
Runu' ga zoa' nabana', para cabí tsu'a lataj chul-la ga dzö'ö nupa nátigaca.

<sup>4</sup> ¿Guli'gul-la yöl-la' ba queë' Xanru', libí'ili' néquili' quez queë'!  
¿Guli'guié': "Xclenu" ca naca Lë' le naca lá'ayi!

<sup>5</sup> Tu chí'isö rilenë',  
pero ruzá' ládxi'tica'së' queëru'.  
Channö cödxiru' tu yëla,  
lu yöl-la' rudzeja queëru' cödxí'aru' itö yu.

<sup>6</sup> Cate' guca dxi'a quia', ní'irö gunniá':  
"Gatga bi utsá' neda'."

<sup>7</sup> Tu' buzá' ládxi'u quia', Xan, buzú' neda' ga zoa' tsutsu,  
en cate' bucachi' lo', gurö'a böniga.

<sup>8</sup> Bulidza' Li', Xan,  
en gúta'yua' lo'.

<sup>9</sup> ¿Bizxi xibé uzi'tso' channö gátia', en tsöjtsázia'  
lataj chul-la ga dzö'ö nupa nátigaca?  
¿Naru' huácatsö cu'a Li' yöl-la' ba channö huóáca' bëchtö yu?  
¿Naru' huácatsö ulu'a lo le naca idú quiu'?

<sup>10</sup> Ruzé nagu', Xan, en ruzá' ládxi'u quia'.  
Gúcalen neda', Xan.

<sup>11</sup> Buí'inida', ate' benu' ga buyá'a lu yöl-la' rudzeja quia'.  
Bugú' lari' cá'asö gúcuá', en bugacu' neda' le ruzi'a xibé.

<sup>12</sup> Bil-la bö' naca caza' yöl-la' ba quiu', en biti' soa dxisö.  
Guiética'sa' Li': "Xclenu", Xana' Dios.

## 31

<sup>1</sup> Ruzxöni ládxa'a Li', Xan.

Biti' gu'u lataj utuí'ida'.  
Tu' nacu' tsahui', busölá neda'.

<sup>2</sup> Ruzé nagu' quia', en rusöló' neda'.  
Gacu' ca tu guiöjto'o ga soa' tsutsu,  
en ca tu ga soa' dxi'a tsáhuí'do' lu gudil-la.

<sup>3</sup> Nacu' Li' guiöjto'o ga zoa' tsutsu, en le run chi'i neda'.  
Para gaca yöl-la' ba que Lo' guché' neda', en buluí'i neda' le dxi'a guna'.

<sup>4</sup> Ubéaju' neda' lu du yalaj nucáchi'gaquié' bönni' tu'ë dö',  
tu' nacu' Li' yöl-la' nál-la quia'.

<sup>5</sup> Rigu'a lu no'ö bö' naca caza'.  
Böá'au' neda', Xan, Dios idú.

<sup>6</sup> Biti' rilé'eda' dxi'a nupa tun zxön budó' guiöj budó' yaga,  
pero neda' ruzxöni ládxa'a Li', Xan.

<sup>7</sup> Udzejada', en uzi'a xibé yöl-la' dxi'i ladxi' quiu',  
tu' bilé'e quézinu' le gudí'i guzxáca'a.

Nöz quézinu' yugu' le raca quia'.

<sup>8</sup> Biti' bucá'anu' neda' lu na' nu biti' rilé'e neda' dxi'a,  
pero nuzú' neda' tu lataj ga zoa' tsutsu.

<sup>9</sup> Buzá' ladxi' quia', Xan, tu' zoa tu le raca quia'.  
Lu yöl-la' ruhuí'ini quia' ribödxa', en rudú ládxa'a.

<sup>10</sup> Riyechi' dza quia' tu' ruhuí'inide'eda',



en tu' rinné ládxa'a, en riyechi' iz quia'.

Rudú ládxa'a tu' nözi dö' nu'a,

ate' nadxita idútë le naca'.

<sup>11</sup>Tu' nözi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa núnbë'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

<sup>12</sup>Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

<sup>13</sup>Biyönda' didza' zi' ta'nnë bönachi zián quia' bagáchi'sö.

Gátitës zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

<sup>14</sup>pero neda' ruzxöni ládxa'a Li', Xan.

Rnnía' nacu' Dios quia'.

<sup>15</sup>Yú'ugaca lu no'o yúgu'të dza soa' ibana'.

Busölä neda' lu ná'agaca nupa biti' ta'lé'e neda' dxi'a,

en lu ná'agaca nupa ta'zóa regu' neda'.

<sup>16</sup>Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busölä neda'.

<sup>17</sup>Biti' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

<sup>18</sup>Ben ga biti' gaca bi inná nu rizí' yë',

nu na' rinné zi' queë' bönni' tsahui',

en run ba zxön cuini, en rulidza ditaj luzë'e.

<sup>19</sup>¡Bica' zxön yöl-la' dxi'i ladxi' quiu',

lë na' napu' para gácalenu' nupa tadxi Li'!

Runu' caní quégaca nupa tu'zxöni ladxi' Li'

lógaca nupa tun ba zxön cuíniguequi.

<sup>20</sup>Rucáchu'u légaquië' ga na' zu' bagáchi'sö,

ga biti' gaca idxín nu bönni' xihui'.

Run chi'u légaquië' bagáchi'sö ga biti' gaca idxín didza' bizxaj.

<sup>21</sup>¡Yöl-la' ba Xanru' Dios,

tu' buluí'inë' neda' ca nadxi'inë' neda' cate' ni' zoa' tu yödzo

ga nagú'ugaquië' lë'ajlö bönni' tu'tíl-lalenë' neda'!

<sup>22</sup>Lu yöl-la' radxi ridzöbi quia' gunnía': "Ilútië' neda' lo' Li', Xan",

pero biyönnu' le gunábida' Li', cate' ni' bulidza' Li'.

<sup>23</sup>¡Guli'dxí'i-në' Xanru', libí'ili' néquili' queë'!

Rapa chi'ë Xanru' nupa ta'yéajlë' Lë',

en rubi'ë ca sa'yéaj queë' bönni' run ba zxön cuinë'.

<sup>24</sup>¡Guli'gaca tsutsu, en buli'tipa ládxi'li',

yúgu'tëli' na' runli' löza Xanru' Dios!

## 32

<sup>1</sup>¡Bica' ba bönni' na' Dios buniti lahuë' lë' ca naca dö' bi'ë,

en bugüë' dul-la' queë'!

<sup>2</sup>¡Bica' ba bönni' na' Dios rnnë' biti' nabáguë'ë xiguia',

en biti' zóalen lë' yöl-la' rizí' yë'!

<sup>3</sup> Cate' guzóa' dxisö ca naca dul-la' quia',  
budú ládxa'a tu' gunnética'sö ládxa'a.  
<sup>4</sup> Rëla, en te dza buquí'i busácu'u neda', Dios.  
Budú ládxa'a ca raca cate' rö' böchila.  
<sup>5</sup> Ní'irö guxóalëpa' dul-la' nabága'a lo' Li',  
en biti' bucácha'a le xihui' bena'.  
Gunnía': "Ixóalëpa' dö' bi'a lahuë' Xana'",  
ate' buniti lo' neda' ca naca xiguia' gubága'a.  
<sup>6</sup> Que lë ni na', núti'tës nu nunbë' Li', Dios, ral-la' ulidza Li'  
cate' dë lataj gü'ilen Li' didza'.  
Cate' rö' nisa bach luyú ni, biti' ca' ideli' idxín ga zoa nu na'.  
<sup>7</sup> Li' nacu' ga gaca ucachi' cuina' cate' zoa bönadxi quia'.  
Li' caz gun chi'u neda' para cabí bi gaca quia'.  
<sup>8</sup> Li' gunu' ga gúl-latica'sa' quiu' Li' tu' rusöló' neda'.  
Rnnë' Dios: "Neda' uzéajni'ida' li', en uluí'ida' li' le ral-la' gunu'.  
Usédida' li', en uyútica'sa' li'.  
<sup>9</sup> Biti' gacu' ca tu böa' o tu mula cabí ta'yéajni'iba'.  
Ral-la' cu'u guié en du rú'ugacaba' para inná bé'enu' lézacaba'."  
Channö cabí gunu' caní, biti' ca' ilunba' ca ré'ënu'.  
<sup>10</sup> Zián le tun ga tu'huí'iniguequi nupa tuá' dö',  
pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.  
<sup>11</sup> Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.  
Lu yöl-la' rudzeja queëli' guli'cödxí'a, libí'ili' nácali' idú dxi'a.

### 33

<sup>1</sup> Lu yöl-la' rudzeja queëli' guli'gul-la lahuë' Xanru',  
libí'ili' nácali' tsahui' lahuë' Lë'.  
Nupa nácgaca tsahui' ral-la' ila'gú'u Lë' yöl-la' ba.  
<sup>2</sup> Guli'guié' Lë': "Xclenu'", quínnili' lë'e bihuél-la.  
Guli'gul-la yöl-la' ba queë', quínnili' le zë chi du que.  
<sup>3</sup> Guli'gul-la queë' tu le rul-la cubi.  
Guli'quinnaj dxí'ado', en lu yöl-la' rudzeja queëli' guli'cödxí'a.  
<sup>4</sup> Xtídzë'ë Xanru' naca idú tsahui',  
ate' idú ládxe'ë runë' yúgu'të bi runë'.  
<sup>5</sup> Nadxí'inë' le naca dxí'a, en le naca tsahui'.  
Nalá' lahui yöl-la' dxi'i ladxi' queë' Xanru' idútë yödzölió.  
<sup>6</sup> Len didza' bë'ësë' Xanru', benë' lúzxiba,  
en benë' yúgu'të böljaj bení' len bö' rirúaj ru'ë.  
<sup>7</sup> Rutubë' nisa rö'ö nísado' para gaca ca tu guí'a.  
Napa chi'ë nisa rö'ö zili ga na' nupë'ë xilataj.  
<sup>8</sup> Yúgu'të bönachi ral-la' ila'dxí'i Xanru'.  
Bönachi idútë yödzölió ral-la' ila'cuá' nöxaj lahuë' Lë'.  
<sup>9</sup> Bë'ësë' didza' Xanru', ate' la' gúcatë ca na' gunné'.  
<sup>10</sup> Gunná bë'ë, ate' guca tsutsu le nunë'.  
Runë' Xanru' ga tu'huöáca cá'asö didza' túngaca bönachi yugu' yödzö.  
Runë' ga biti' ilaca le té'ëni ilúngaca bönachi.  
<sup>11</sup> Sóatica'sö tsutsu didza' nunë' Xanru'.  
Le rizá' ládxe'ë ulu'gá'anatica'sö quéguequi zxí'ini xi'sóaru'.  
<sup>12</sup> Bica' bágaca bönachi yödzö na' náquië' Xanru' cazë' Dios quéguequi,

bönachi na' nabõ cazë' Dios para ilaca quez queë'.

<sup>13</sup> Zoa cazë' Xanru' yehua' yubá, ruyúë' ga zóaru'.

Rilé'enë' le tun yúgu'të bönachi nacuá' idútë yödzölió.

<sup>14</sup> Ga na' zoa cazë' ruyúë' idú gásibi'ilö,

en rilé'enë' yúgu'të nupa nacuá' idútë yödzölió ni.

<sup>15</sup> Nun cazë' Lë' ládxi'do'gaca yúgu'tëguequi.

Réajni'i quézinë' ca naca yúgu'të le túngaca.

<sup>16</sup> Biti' ca' ulé' bönni' unná bë' nacuá' queë' bönni' guizxi yu röjáquië' gudil-la.

Biti' ulé' bönni' zoë' gudil-la tu' nál-latërë'.

<sup>17</sup> Biti' nazaca' gunru' löza böa' para idéli'ru' lu gudil-la,

tu' cabí gaca usólaba' nu bönni' tu' nál-latëröba'.

<sup>18</sup> Buli'yú, ruyútica'së' Xanru' nupa tadxi Lë',

nupa na' tun löza yöl-la' dxi'i ladxi' queë',

<sup>19</sup> para usölë' léguequi lu yöl-la' guti,

en para ugahuë' léguequi cate' tsu'u gubín.

<sup>20</sup> Idú ládxi'ru' runru' löza Lë' Xanru'.

Rácalen cazë' rë'u, en rapa chi'ë rë'u.

<sup>21</sup> Rudzeja ládxi'lenru' Lë',

en uzxöni ládxi'ru' Lë', tu' náquië' lá'ayi.

<sup>22</sup> Lu yöl-la' dxi'i ladxi' quiu' gúcalen netu', Xan,

tu' runtu' löza Li'.

## 34

<sup>1</sup> ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

<sup>2</sup> Bö' naca caza' gun zxön Xanru'.

Nupa nátagaca nöxaj ladxi' ila'yöni lë ni, en ulu'dzeja.

<sup>3</sup> Guli'güí' zxönë' Xanru' tsözxön len neda',

en tsözxön usiyönru' bönachi ca naca Lë' La'ayi.

<sup>4</sup> Bulidza'-në' Xanru', ate' bubí'ë didza' quia',

en busölë' neda' lu yugu' le gúdxida'.

<sup>5</sup> Nupa nátagaca queë' bila'dxín lahuë', en bulu'zí' xibë'.

Bítirö caz ulu'tuí'i nupa na'.

<sup>6</sup> Bulidza'-në' Xanru', ate' biyönnë' quia' neda', bönni' yechi',

en busölë' neda' lu yúgu'të le guca quia'.

<sup>7</sup> Gubáz lá'ayi que ya'abá queë' Xanru' tapa chi'ë nupa tadxi Lë',

en tu'sölë' léguequi lu yúgu'të le raca quéguequi.

<sup>8</sup> Guli'sí' bë'ë, ate' inözili' náquië' Xanru' dxi'a.

¡Bica' ba bönni' ruzxöni ládxi'ë Lë'!

<sup>9</sup> Guli'gadxi Xanru', libí'ili' nácali' quez queë',

tu' cabí bi ila'yadzaj nupa tadxi Lë'.

<sup>10</sup> Ta'yadzaj ta'yúdxiba' bëdxi guixi', en ta'dunba',

pero nupa tu'lidza Xanru' bití' ca' ta'yadzaj le naca dxi'a.

<sup>11</sup> Guli'dá libí'ili', bí'ido', en buli'zé nágali' xtídza'a.

Uzéajni'ida' libí'ili' para gádxili'-në' Xanru'.

<sup>12</sup> ¿Nuzxi caz bönni' rë'ënë' soë' ibanë',

en rë'ënë' soë' iz zían para uzi'ë xibé le naca dxi'a?

- 13 Ben chí'i lúdxu'u para cabí gu'u didza' xihui',  
en para cabí si' ye'enu' luzó'o.
- 14 Bucá'ana le cabí naca tsahui', en ben le naca dxi'a.  
Bë' ladxi' cözu' dxi'a tsáhui'do',  
en ben bayudxi gunu' yugu' lë ni.
- 15 Ruyútica'së' Xanru' nupa nácagaca tsahui',  
en riyón quézinë' cate' tu'lidza Lë'.
- 16 Uzáguë'ë Xanru' xinözgaca nupa tuá' dö',  
en gunë' ga cuntu nu tsöjné léguequi.
- 17 Nupa nácagaca tsahui' tu'lidza Xanru', ate' riyönnë' quéguequi,  
en rusölë' léguequi lu yugu' le raca quéguequi.
- 18 Xanru' zóalen cazë' nupa tu'huí'ini ladxi',  
en rusölë' nupa nácagaca nõxaj ladxi'.
- 19 Zián le riguí'i rizáque'ë bönni' tsahui',  
pero Xanru' rusölë' lë' lu yúgu'të lë na'.
- 20 Xanru' rapa chí'ë yúgu'të dxita yu'ë,  
ate' biti' gatsaj nitú dxita queë'.
- 21 Le xihui' run nu ruá' dö' gun ga gati nu na',  
ate' ila'baga' xigua' nupa biti' ta'lé'e dxi'a le naca tsahui'.
- 22 Xanru' caz ruhuöá'uë' bö' nácagaca caz huen dxin queë',  
ate' biti' irugu que nitú nupa na' tu'zxöni ladxi' Lë'.

## 35

### *Tu le bil-lë' David*

- 1 Xana' Dios, gudá'baga' nupa biti' ta'lé'e neda' dxi'a.  
Butíl-lalen nupa ta'díl-lalen neda'.
- 2 Guzxön le gun chí'i neda' lu gudil-la,  
en gudá gácalenu' neda'.
- 3 Guzxön yaga tuchi' quiu' para uzagu'u xinözguequi nupa ta'zóa regu' neda'.  
Gudxi bö' naca caza' nacu' Li' Nu rusölá neda'.
- 4 Ben ga ulu'tuí'i, en ulu'gá'ana cá'asö nupa té'ëni iluti neda'.  
Ben ga ulu'huécaj, en ulu'gá'ana cá'asö nupa té'ëni iluí'i dö' quia'.
- 5 Ben ga ilaca ca bëbu zxe café zeaj lu bö'ös,  
en ben ga ulaguë' gubáz lá'ayi que ya'abá quiu' léguequi.
- 6 Ben ga gaca chul-la nõza yú'ugaca, en ga cuílagaca,  
ate' soa régu'ë gubáz lá'ayi quiu' léguequi.
- 7 Bulu'cáchi' du yalaj le sön neda', en biti' bi nuna' quéguequi.  
Gula'chö'öna yeru ga tsöjbixa', en biti' bi nuna' quéguequi.
- 8 Ben ga idxín quéguequi tsárido'os le usuniti léguequi,  
en ben ga du yalaj na' bulu'cáchi' sön la' cuínguequi quez.  
Ben ga ila'bixi lu yeru na' gula'chö'öna.
- 9 Udzeja ládxi'lëna'-në' Xanru',  
en uzi'a xibé yöl-la' rusölá queë'.
- 10 Ila'nná dxita néquinida': "Xan, ¿nuzxi caz naca ca nacu' Li'?"  
Rusöló' nu riguí'i rizáca' lu na' nu nál-latërö ca le.  
Rusöló' nu riguí'i rizáca', en riyadzaj riyudxi lu na' bönni' ribanë' le nequi que."
- 11 Ta'dá'baguë'ë bönni' xihui' neda', en ta'nnë' quia'.  
Ta'nabi yúdxinë' neda' ca naca yugu' le cabí nõzda'.

12 Tu'bi'ë quia' le naca dö' cate' runa' le naca dxi'a,  
ate' ruhuí'inide'e ládxa'a.

13 Pero neda' gúcuá' lari' cá'asö cate' guláquië' huë'.

Bena' gubasa, en busaca' zi' bö' naca caza',  
en uláz quéguequi bulidza'-në' Dios zían luzuí.

14 Buí'inide'eda' tsca guca luzá'a o bi'i böchi' caza' nu na' guca huë'.

Gurödxí yecha'a ca huí'inide'eda' channö gátinu xiná' caza',

15 pero cate' guchixi guníguida' neda', bulu'dzéjade'e, en bulu'dubi tsözxön.

Yugu' bönni' na' bulu'cá'anë' neda' cá'asö bulu'dubë' para ilunë' ga cö'a baguí'i.

Yugu' bönni' na' biti' núnbë'a gulúnnatica'së' neda'.

16 Bulu'saca' zi'ë neda', en bulu'titjë' quia'.

Lu yöl-la' rilé quégaquië' neda' gulagu zxea láyi'gaquië'.

17 Xan, ¿gáca'xte caz uyú iná'asu' le tunë'?

Busölá neda' lu dö' tu'ë quia'.

Busölá neda' lu ná'agaquië' bönni' na' ná'cagaquië' ca yugu' bëdxi guixi'.

18 Guía' Li': "Xclenu" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

19 Biti' gu'u lataj ulu'dzeja nupa ta'dá'baga' neda', en ta'zí' yë',

en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.

20 Catu caz tuí'i didza' le gun ga soa dxisö didza' bizxaj.

Lu yöl-la' rizí' yë' quéguequi ta'nnë quégaca nupa ta'bö' dxi'a tsáhui'do' yödzölió ni.

21 Bulu'salaj ruí'iguequi, en gula'nnë quia', gula'nná:

"¡Ön, bilé'e quézitu' le nunë'!"

22 ¡Bilé'e quézinu' Li' lë ni, Xan! ¡Biti' su' dxisö!

¡Biti' ucá'anu' neda', Xan!

23 ¡Guyasa, Xan! ¡Busubán ládxi'u, Xan, para uchi'a usöröu' quia'!

¡Gúcalen neda', Xana' Dios!

24 ¡Tu' nacu' tsahui', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

25 ¡Biti' gu'u léguequi lataj ila'nná:

"Ön, bidéli'ru' le guzë ládxi'ru'!"

¡Biti' gu'u lataj ila'nná: "Chibucúl-laru' lë"!"

26 ¡Ben ga ulu'tuí'i, en ulu'gá'ana cá'asö nupa tu'dzeja cate' ruhuí'inida'!

¡Ben ga ulu'tuí'i, en ulu'gá'ana cá'asö nupa ta'dá'baga' neda'!

27 ¡Ben ga ila'bödxí'a lu yöl-la' rudzeja quéguequi,

en ulu'zí' xibé nupa tuí'i ládxi'gaca urúaja' tsahui'!

¡Bë' lataj ila'nnática'sö: "Nayëpisëtëre' Xanru' Dios,

tu' raza ládxi'ë gunë' ga gaca dxi'a quégaca huen dxin queë"!"

28 Ní'irö guna' ba nalí quiu', innía': "¡Nacu' tsahui'!"

en cu'a Li' yöl-la' ba idú dza.

## 36

1 Le naca xihui' ruí'ilen bönni' nucá'anë' Dios lu icja ládxi'da'ahuë'.

Biti' ca' rádxi'në' Dios.

2 Tu' run ba zxön cuinë'

réquinë' biti' nözinë' Dios nabáguë'ë lë' dul-la', en biti' ichúguië' Dios queë'.

3 Ru'ë didza' xihui', en rizí' yë'ë.

Biti' réajni'inë', en biti' runë' le naca dxi'a.

4 Cate' ni' dë' lu le ráti'në' rizá' ládxi'ë ca naca le xihui' gunë'.

Ruí'i ládxi'ë gunë' le cabí naca dxi'a,

en biti' rusanë' runë' le naca xihui'.

<sup>5</sup> Zxöntëro ca yehua' yubá naca yöl-la' dxi'i ladxi' quiu', Xan, ate' gúntica'su' ca rnna xtídz'u, tsca zoa yehua' yubá.

<sup>6</sup> Naca tsutsu le tsahui' nacu' ca nácgaca tsutsu yugu' guí'a zxön quiu'. Ca ruchi'a rusöröu' naca ca naca nísado', tu' cabí gaca nu gúnbë'e le.

Run chi'i cazu' bönachi, en yugu böa' guixi', Xan.

<sup>7</sup> Nazáca'tëro yöl-la' dxi'i ladxi' quiu', Dios.

Run chi'u yúgu'të bönachi ca runba' yøjede, run chí'iba' yugu' bórado' znan xílabá'.

<sup>8</sup> Tu'huölaj tu'dzë'e bönachi quiu' le nayánda' lu yu'u lidxu', ate' ruguí'ju' léguequi le naca yöl-la' dxi'i ladxi' quiu'.

<sup>9</sup> Yúgu'të le nacué' nabánigaca Li'.

Tu' naca cazu' bení' rilé'etu' bení'.

<sup>10</sup> Bidxí'ítica'sö nupa núnbë'gaca Li',

en ben le naca dxi'a quégaca nupa nácgaca tsahui'.

<sup>11</sup> Biti' gu'u lataj bi ilún quia' nupa tun ba zxön cuínguequi, en biti' gu'u nupa tuá' dö' lataj ulu'laga' neda'.

<sup>12</sup> Nadzö'ögaca nupa tuá' dö'.

Déguequi luyú, en biti' ca' gaca ulu'huöása.

## 37

<sup>1</sup> Biti' ubi uguí'i ládxi'do'oli' tu' tu'zí'gaca xibé nupa tuá' dö'.

Biti' uzxé'eli' nupa biti' tun le naca dxi'a.

<sup>2</sup> Huadóditë quéguequi ca raca que guixi' nacuadi, en udxí quéguequi ca raca quégaca guíxi'do' narúgugaca.

<sup>3</sup> Buli'zxöni ládxi'ë Xanru', en guli'gún le naca dxi'a.

Buli'gá'ana luyú queë', en guli'cöz dxi'a tsáhui'do'.

<sup>4</sup> Buli'sí' xibë' Xanru', ate' gunnë' queëli' le rizë ládxi'li'.

<sup>5</sup> Buli'dödi cuinli' lu në'ë Xanru'.

Buli'zxöni ládxi'ë Lë', ate' gunë' le gácalen libí'ili'.

<sup>6</sup> Gun cazë' Lë' ga urúajli' tsahui', en gácali' ca bení', en cate' uchi'a usöröë' queëli', gaca queëli' ca lahui' dza.

<sup>7</sup> Guli'sóa dxisö lahuë' Xanru', en guli'cöza le gunë'.

Biti' cuéqui ícjali' tu' nözi bönni' ruzi'ë xibé, bönni' na' ru'ë dö'.

<sup>8</sup> Bítirö leli', en buli'sán yöl-la' ridzá'a.

Biti' ubi uguí'i ládxi'do'oli' tu' gun lë ni ga guá'ali' dö'.

<sup>9</sup> Dios caz uzáguë'ë xinözguequi nupa tuá' dö', pero nupa tu'zxöni ladxi' Xanru', guequi quéguequi luyú.

<sup>10</sup> Ia'láti'sö xidzé, en bítirö soë' bönni' na' ru'ë dö'.

Uguíjali' xilatjé', pero bítirö soë' ni'.

<sup>11</sup> Nupa nácgaca nöxaj ladxi', guequi quéguequi luyú, ate' ulu'zí' xibé yöl-la' tsahui' que.

<sup>12</sup> Tun didza' nupa tuá' dö' bi ilúngaca quégaca nupa nácgaca tsahui', en lu yöl-la' rilé quéguequi tagu zxea láyi'guequi.

<sup>13</sup> Ruzxidxi cazë' Xanru' quéguequi, tu' rilé'enë' dza udxí quéguequi.

<sup>14</sup> Nupa tuá' dö' chigula'béaj guíë tuchi' quéguequi,

en nuá'gaca uxiti' yaga quéguequi

para ulu'xicja nupa ta'zaca' zi', en ta'yadzaj ta'yudxi,

en para iluti nupa tun le naca dxi'a.

15 Guíë tuchi' quéguequi ila'chiza la' ládxi'do'guequisö, ate' ila'guítsaj uxiti' yaga quéguequi.

16 Dxi'atërö le do' dësö queë' bönni' tsahui' ca le zían dë queë' bönni' ru'ë dö'.

17 Huayúzxxjagaca ná'agaca nupa tuá' dö', pero Xanru' caz rácalenë' nupa nácagaca tsahui'.

18 Ruí'i ladxi' cazë' Xanru' nupa biti' bi xiguia' nabága'gaca, ate' guéquitica'sö xiyúgaca quéguequi.

19 Biti' ca' ulu'tuí'i cate' idxín dza biti' gaca dxi'a, en cate' tsu'u gubín, gáta'dëra le ilágugaca.

20 Ulu'niti tsaz nupa tuá' dö',

ate' nupa biti' ta'lé'e dxi'a Xanru' ilaca ca yöl-la' lachi que guixi'. La' töditë quéguequi, en ilaca ca dzön le rinítitë.

21 Ta'nábini nu bi gunna quéguequi tu chí'isö, pero biti' ca' ulu'bí'i lë na'. Nu naca tsahui' ruzá ladxi' quéguequi, en runödzej quéguequi.

22 Gaca luyú quégaca nupa run lá'ayë' Xanru', pero ila'niti tsaz nupa rudxië' Lë' dö'.

23 Le runë' bönni' dxi'a naca le nulu'inë' Xanru' lë', ate' raza ládxië' Lë' le runë' bönni' na'.

24 Cate' röjtsö'ë, biti' ca' röjtsö'ë tsaz, tu' röjzönë' Xanru' caz bönni' na'.

25 Guca' ra'bando', pero na'a nagula', en catu caz bilé'eda' nusán në'ë Dios bönni' tsahui', en catu caz bilé'eda' riyadzaj le ilágubi' zxi'inë'.

26 Yugu' dza ruzá ládxië' bönni' tsahui' quéguequi luzë'ë en runödzjë' le ta'nábini lë' unödzjë' tu chí'isö, Nácagacabi' zxi'ini xi'söë' tu le run ga raca dxi'a queëru'.

27 Buli' cá'ana le cabí nácatë, en guli'gún le naca dxi'a. Channö caní gunli', sóali' tsaz,

28 tu' nadxi'inë' Xanru' nu run le naca tsahui', en catu caz usán në'ë nupa néquiguequi quez queë'.

Gun chí'ítica'së' léguequi, pero usunítie' zxi'ini xi'sóagaca nupa tuá' dö'.

29 Guequi luyú quégaca nupa nácagaca tsahui', ate' ila'cuá'tica'sö luyú na'.

30 Ru'ë bönni' tsahui' didza' le napa yöl-la' réajni'i, ate' raca yöl-la' ruchi'a rusörö ni'a que didza' na' ru'ë.

31 Yu'u icja ládxi'da'ahuë' le gunná bë'ë Dios. Que lë ni na' catu caz ichixi iníguinë'.

32 Ruyuda' nu ruá' dö' le runë' bönni' tsahui', en riguila'j nacxi gaca guti lë'.

33 Xanru' biti' gu'ë nu na' lataj bi gun queë' bönni' tsahui' na', en biti' gu'ë lataj irugu queë' cate' nu uchi'a usörö queë'.

34 Buli'zxöni ládxië' Xanru', en guli'gún ca ré'ënë' gunli', ate' uchisë' libí'ili' para guequi queéli' luyú.

Cate' udxi quégaca nupa tuá' dö', hualé'e quézili' le.

35 Bilé'eda'-në' bönni' huía' dö'.

Gúquië' ca tu yaga zxön, en buzí'de'enë' xibé.

36 Ní'irö gudödi queë', en bíti'rö zoë'.

Yöjdilja' lë', pero biti' ca' guca udzövida' lë'.  
<sup>37</sup> Buli'yú ca náquië' bönni' tsahui'.  
 Cuntu nu gaca bi innë queë',  
 tu' ila'cuá'abi' xzí'ini xi'sóë' bönni' zxön ladxi'.  
<sup>38</sup> Ulu'niti tsaz nupa tu'cá'ana le gunná bē'ē Dios.  
 Usiúdxë' Xanru' yugu' xzí'ini xi'sóagaca nupa tuá' dö',  
<sup>39</sup> pero rusölá cazë' nupa nácgaca tsahui'.  
 Rutipë' ládxi'guequi cate' bi raca quéguequi.  
<sup>40</sup> Rácalenë' léguequi, en rusölë' léguequi.  
 Rubéajë' léguequi lu ná'agaca nupa tuá' dö', en rusölë' léguequi,  
 tu' tu'zxöni ládxi'guequi Lë'.

### 38

<sup>1</sup> Biti' ilenu' neda', Xan, en biti' uzenu' neda' bach.  
 Biti' gunu' neda' xiguia' lu yöl-la' rilé quiu'.  
<sup>2</sup> Ben zi'u neda', en budxíu' neda' huë'.  
 Nuzötju' neda' len no'o.  
<sup>3</sup> Yu'a yödzöhuë' zxön tu' rilenu' neda'.  
 Dxía huë' idütë le naca' tu' nözi dul-la' nabága'a.  
<sup>4</sup> Xiguia' nabága'a naca ca tu nísado' ga ruchicja' nisa.  
 Naca ca tu yua' zi'i nabága'a neda'.  
<sup>5</sup> Tu' bena' yugu' le cabí naca dxi'a,  
 dxía' huë' le rilá' siguti, en rudzu'.  
<sup>6</sup> Narecji' cúdza'a, en nagá'ana' cá'asö.  
 Idú dza ruhuí'inide'eda'.  
<sup>7</sup> Idütë le naca' yú'uda'a xilá,  
 ate' nazxí xipéla'a.  
<sup>8</sup> Rudú ládxa'a, en ricuídi'da'.  
 Rinnëda' ládxa'a tu' ruúbi ruguí'i ládxi'da'ahua'.  
<sup>9</sup> Nöz quézinu' Li', Xan, le rizé ládxa'a,  
 en riyönnu' le rinnética'sö ládxa'a.  
<sup>10</sup> Richunchu ládxi'da'ahua', en ricuidi' ládxa'a,  
 ga ridxintë richul-la guiöj lahua'.  
<sup>11</sup> Bítirö ta'dzaga neda' yugu' luzá'a, en yugu' böcha'a, tu' nözi xihuë'a,  
 ate' tu'biga' di'a dza quia' ga zoa'.  
<sup>12</sup> Nupa té'ëni iluti neda' ta'bequi le ila'zön neda',  
 ate' nupa té'ëni ulu'cul-la neda' tun xtídza'guequi nacxi ulu'suniti neda'.  
 Idú dza ta'bequi ícjaguequi bi ilún quia'.  
<sup>13</sup> Naca' ca tu bönni' nacödzuë', en bítirö riyönda'.  
 Naca' ca tu bönni' narugu lúdxë'ë, en biti' risaljë' ru'ë.  
<sup>14</sup> Naca' ca tu bönni' bítirö riyönnë',  
 en que lë ni na' biti' bi didza' rubi'ë.  
<sup>15</sup> Tuzu' Li' ruzxöni ládxa'a, Xan.  
 Ubí'i casu' didza', Xana' Dios.  
<sup>16</sup> Biti' gu'u lataj ulu'dzeja ní'a que le raca quia'.  
 Biti' gu'u lataj ilún ba zxön cuínguequi tu' nagá'ana' cá'asö.  
<sup>17</sup> Chizóa' tsöjbixa',  
 en zóaléntica'sö xihuë'a neda'.  
<sup>18</sup> Que lë ni na' rixóalëpa' xiguia' nabága'a,  
 en risëbida' ládxa'a tu' nözi dul-la' nabága'a.  
<sup>19</sup> Nacuá' dxi'a, en nál-lagaca nupa téqui neda' zi'.



Nayánda' nupa tu'dí'i neda', en bití' bi nuna' quéguequi.

<sup>20</sup> Ta'dá'baga' neda' nupa tu'bí'i le cabí naca dxi'a que nu run le naca dxi'a.  
Caní tun tu' ruí'i ládxa'a guna' le naca dxi'a.

<sup>21</sup> Bití' usán no'o neda', Xan.

Bití' ubigu' ga zoa', Dios quia'.

<sup>22</sup> Gudáchi gácalenu' neda', Xan,  
tu' naca cazu' Li' Nu rusölá neda'.

## 39

<sup>1</sup> Gunnía': Gun chí'i cuina' ca naca le runa',  
en bití' guna' dul-la' ca naca didza' ruá'a.

Bití' bi didza' gu'a

cate' nacuá' nupa tuá' dö' gal-la' ga zoa'.

<sup>2</sup> Guzóa' dxisö, en bití' bē'a didza' ga bidxintē  
bití' gunnía' le naca dxi'a, pero biyali' xihuē'a.

<sup>3</sup> Bubi buguí'i ládxi'da'ahua',  
en cate' guzá' ládxa'a que, guyegui gulá ládxi'da'ahua'.  
Que lē ni na' gunábida'-nē' Xanru', gunnía':

<sup>4</sup> Xan, ¿gáca'xte caz soa' ibana'?

Buluí'i neda' tsca iz soa' ibana'.

Ben ga inözda' channö chizóa caz gátia'.

<sup>5</sup> Nabábasö dza nuzú' quia' soa' ibana'.

Yugu' iz soa' ibana' bití' bi zeaj naca lo' Li'.

Le nácatē bití' bi nácacaca yúgu'tē bönachi nacuá' luyú ni.

<sup>6</sup> Nácacacasö ca tu zxl-la rigú'u böaj.

Nítisö tu'úbi tu'guí'i ládxi'do'guequi, en tun dxin.

Tu'tubi yöl-la' tsahui', pero bití' nözguequi nuzxi guequi que.

<sup>7</sup> ¿Bizxi caz gaca guna' löza, Xan?

Ruzxöni ládxa'a Li'.

<sup>8</sup> Busölá neda' lu xiguia' nabága'a,

en bití' gu'u lataj ulu'titaj quia' nupa nácacaca canöz.

<sup>9</sup> Soa' dxisö, en bití' bi didza' gu'a,  
tu' ben cazu' Li' ga riguí'i rizáca'a lē ni.

<sup>10</sup> Bítirö gunu' neda' xiguia'.

Chizóa gátia' tu' rusaca' zi'u neda'.

<sup>11</sup> Runu'-nē' xiguia' bönni' dul-la', en ruzenu' lē' bach.

Ca tu'töba' bēlado' que le yú'uba', rusunítu' le ruí'i ládxe'ē bönni' na'.

Bití' bi naca cazē' bönni' dul-la' na'.

<sup>12</sup> Buzē nagu' le rulidza' Li', Xan, en le rinábida' Li'.

Bití' su' dxisö cate' ribödxa' lo' Li',

en bití' gaca' ca tu bönni' zi'tu' lo' Li',

en ca tu bönni' ridasē' ca guláquiē' xuz xtó'otu'.

<sup>13</sup> Benna neda' lataj idipa ládxa'a

zí'alö ca uzá'a yödzölió ni, en bítirö soa'.

## 40

<sup>1</sup> Lu yöl-la' riböza zxon ladxi' quia' gulöza' gácalenē' Xanru' neda'.

Ní'irö buzē nagu' quia', en biyönnē' le bulidza'-nē'.

<sup>2</sup> Bubéajë' neda' ca tu lu yeru ga rë', en lu guna' zili.

Buzöë' neda' tu lu guiöjto'o, en gulëquië' neda' tsutsu.

<sup>3</sup> Busëdinë' neda' tu le cubi le rul-la' le naca yöl-la' ba queë' Dios queëru'.

Zián nupa ila'lé'eni lë ni, en ilún Lë' zxön,

ate' ulu'zxöni ladxi'-në' Xanru'.

<sup>4</sup> Bica' ba bönni' ruzxöni lãdxë'ë Xanru'.

Biti' runë' tsözxön nu run ba zxön cuini, nu na' run zxön yugu' dios núngaca bönachi.

<sup>5</sup> Ziántërö naca le nunu' queëtu', Xana' Dios, yugu' le tun ga rubánitu'.

Ziántërö le yu'u icja lãdxi'do'o ca naca le gunu' queëtu'.

Biti' ca' gaca nu ulaba lo' Li' tsca náçagaca.

Channö guë'ënda' nu usiyönda' tsca náçagaca,

nayántërö tsca le gaca ulaba'.

<sup>6</sup> Biti' ré'ënu' gútigaca'-ba' böa' guixi' lo', en calëga bi cu'a lo'.

Biti' rinabu' uzëgui'gaca'-ba' böa' bëdxi lo',

en calëga tu le guna' lo' para ugúa dul-la',

pero gusalju' naga' para yönda' le guío' neda'.

<sup>7</sup> Que lë ni na' gunniá': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

<sup>8</sup> Raza lãdxa'a runa' ca ré'ënu' Li', Dios quia'.

Nagu'a icja lãdxi'da'ahua' xibá naguixju' Li'.

<sup>9</sup> Ga tu'dubi bönachi guizxi yu quiu', Xan,

busiyönda' léguequi nacu' tsahui'.

Biti' ca' guzóa' dxisö.

Nöz quézinu' lë ni, Xan.

<sup>10</sup> Biti' bucáchi'za' icja lãdxi'da'ahua' ca ruúnu' tsahui' bönachi.

Bulu'a lahui ca runu' ca rnno', en ca rusöló' bönachi.

Ga nudúbigaca bönachi quiu' biti' guzóa' dxisö,

pero bë'a didza' ca nacu' dxi'i ladxi', en ca ru'u didza' le nácatë.

<sup>11</sup> Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'ítica'sö neda'.

<sup>12</sup> Zián le raca quia' nagú'ugaca neda' lë'ajlö, le cabí gaca nu ulaba.

Nabága'a yugu' dö' bi'a, en bíti'rö gaca ilé'eda'.

Nayanrö ca guitsa' icja', ate' rudú lãdxa'a.

<sup>13</sup> ¡Busölá neda', Xan!

¡Gudáchi gácalenu' neda', Xan!

<sup>14</sup> Ben ga ulu'tuí'i, en ila'bö' baguí'i

nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö

nupa na' té'ëni gaca quia' le cabí naca dxi'a.

<sup>15</sup> Ben ga ulu'dú lãdxi'gaca tu' nabíxigaca

nupa na' tu'titaj neda', ta'nná: "¡Buyútsöca' le raca queë'!"

<sup>16</sup> Ben ga ulu'dzeja, en ulu'zi' xibó' yúgu'të nupa tu'guilaj Li'.

Ben ga ila'nnática'sö nupa ta'dxí'i yöl-la' rusölá quiu',

ila'nná: "Nayëpsëtërë' Xanru'."

<sup>17</sup> Nacuídi'da', en biti' bi gaca guna',

pero ruí'i ladxi' casu' Li' neda', Xan.

Naca casu' Nu rácalen neda', en Nu rusölá neda'.

Biti' tsenu' guídu' quia', Dios quia'.

## 41

<sup>1</sup> Bica' ba bönni' ru'i ládxe'ë nupa náagaca yechi'.  
Xanru' gácalen cazë' bönni' na' cate' bi gaca queë'.  
<sup>2</sup> Xanru' Dios gun chi'ë lë', en gunë' ga soë' ibanë'.  
Gunë' ca' ga uzi'ë xibé xiyú cazë'.  
Biti' usán në'ë lë' lu ná'agaca nupa biti' ta'lé'e lë' dxi'a.

<sup>3</sup> Xanru' utipë' ládxe'ë bönni' na' cate' ré'enë'.  
Uchisë' lë' lu da'a le ráti'në', en gunë' ga soë' dxi'a.

<sup>4</sup> Gunnía': Bena' dul-la' lo' Li', Xan.  
Buéchi' ladxí' neda', en bun neda'.

<sup>5</sup> Nupa biti' ta'lé'e neda' dxi'a ta'nnë' quia', ta'nná:  
“¿Bátaxi gátië', en huáca gal-la ládxi'gaca bönachi lë'?”

<sup>6</sup> Channö uduyúgaquië' neda', ta'zí' yë'ë.

Ta'güë' didza' ca naca le raca quia',  
en cate' ta'rúajë', tu'siyönnë' bönachi.

<sup>7</sup> Tu'dubi nupa biti' ta'lé'e neda' dxi'a, en ta'nnë' quia'.  
Ta'zá' ládxi'gaca zían le naca dö' le ilún quia'.

<sup>8</sup> Ta'nnë' quia', ta'nná: “Yu'ë yödzöhuë' le guti lë'.  
Bíti'rö caz huóásë' ga na' dë' lu le denë'.”

<sup>9</sup> Lësca' caní benë' böchi' luzá'a ruzxöni ládxa'a-në'.  
Bönni' gudágulenë' neda' tsözxón ridá'bagué'ë neda'.

<sup>10</sup> Buéchi' ladxí' neda', Xan, en bun neda',  
ate' ubí'i caza' quégaca nupa na' biti' ta'lé'e neda' dxi'a.

<sup>11</sup> Gácabe'eda' raza ládxi'u neda',  
tu' cabí ulu'xicja neda' nupa biti' ta'lé'e neda' dxi'a.

<sup>12</sup> Gáclen cazu' neda' tu' runa' le naca dxi'a.  
Gunu' ga sóatica'sa' lo' Li'.

<sup>13</sup> ¡Yöl-la' ba Xanru', Dios quégaca bönachi Israel!  
¡Guli'cu'ë yöl-la' ba na'a dza, en yugu' dza si' zaca!  
¡Ca' gaca!  
¡Ön, ca' gaca!

## 42

<sup>1</sup> Ca rizë' ládxi'ba' bidxina' guixi' nisa yégudo',  
lësca' caní rizë' ládxa'a Li', Dios.

<sup>2</sup> Ribidxi ládxa'a Li' cazu', Dios.  
¿Bátaxi udxina' ga dë' quia', en tsu'a le yúbölö yudo' lá'ayi quiu'?

<sup>3</sup> Rëla, en te dza ribödxá', en biti' bi rahua'.  
Yugu' dza nacué' nupa ta'nábini neda', ta'nná: “¿Gazxi caz zoa Dios quiu'?”

<sup>4</sup> Risëbi ládxa'a cate' röjneda' ca guca zí'alö,  
cate' guzá'léna' bönachi guixxi yu, en yöjnórúa' láhuilöguequi ra' yu'u queë' Dios.  
Lu yöl-la' rudzeja queëtu' bíl-latu', en guyéaj ládxi'tu'-në' Xanru', en bentu' laní.

<sup>5</sup> ¿Bizx que risëbida' ládxa'a, en bizx que rö'a böniga?  
Uzxöni ládxa'a-në' Xanru' Dios, tu' huadxín dza cu'a-në' yöl-la' ba le yúbölö.  
Náquië' Nu rusölá neda', en náquië' Dios quia'.

<sup>6</sup> Risëbida' ládxa'a, Dios quia'.

Que lë ni na' tsöjneda' Li' tsanni ni zoa', ridá' rixúnna' ra' yegu Jordán,  
en tsanni ni ridá' lu guí'a Hermón, en lu guí'a Mizar.

<sup>7</sup> Ca tu guziú' rinné lu nísado', en ca bö ruí'i tu budoá' nísado' queë' Dios,  
caní rinné ladxi' bö' naca caza' lu yöl-la' risëbi ladxi'.

<sup>8</sup> Rinábida'-në' Xanru' huéchi' ládxë'ë neda' yugu' dza.

Yugu' dzö' rul-la' yöl-la' ba queë' Lë',  
en rulidza' Dios, ruí'lëna'-në' didza', Nu na' runna quia' yöl-la' na'bán.

<sup>9</sup> Guí'a-në' Dios, Nu ruzóa neda' tsutsu, inní'a: ¿Bizx que nál-la lãdxu'u neda'?  
¿Bizx que run bayúdx quí'i sãca'tica'sa' lu ná'agaca nupa bití' ta'lé'e neda' dxi'a?

<sup>10</sup> Rutsaba yúgu'të dxi'ta yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

<sup>11</sup> ¿Bizx que risëbida' lãdxa'a, en bizx que rö'a böniga?

Uzxöni lãdxa'a-në' Xanru' Dios,  
tu' huadxín dza cu'a-në' yöl-la' ba le yúbölö,  
tu' náquië' Nu rusölá neda', en náquië' Dios quia'.

## 43

<sup>1</sup> Guléaj neda' tsahui', Dios, en bë' didza' uláz quia' lógaca bönachi tuá' dö' quia'.  
Busölá neda' lu na' nu rizí' yë', en bití' naca tsahui'.

<sup>2</sup> Li' cazu' nacu' Dios, Nu rutipa lãdxa'a. ¿Bizx que nusán no'o neda'?  
¿Bizx que ruhuí'inida' tu' ta'bía no neda' nupa tu'dí'i neda'?

<sup>3</sup> Gusól-la' quia' bení' quiu', en le naca idútë li quiu' para ulu'luí'i neda' nöza.  
Ben ga ila'ché' neda' ga naca lá'ayi quiu', ga na' zoa cazu' Li'.

<sup>4</sup> Tsu'a ra' bucugu queë' Dios.

Ibíg'a lahuë' Dios, Nu run ga rudzëjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

<sup>5</sup> ¿Bizx que risëbida' lãdxa'a, en bizx que rö'a böniga?

Uzxöni lãdxa'a-në' Xanru' Dios,  
tu' huadxín dza cu'a-në' yöl-la' ba le yúbölö,  
tu' náquië' Nu rusölá neda', en náquië' Dios quia'.

## 44

<sup>1</sup> Biyön quézitu' le, Dios.

Bulu'siyönnë' netu' xuz xtó'otu'  
ca naca yugu' le zxön benu' dza ni'te,  
cate' ni' gula'cu'ë légaquië' luyú ni.

<sup>2</sup> Bulaga cazu' Li' bönachi yugu' yödzö izá'a,  
en bucuásu' légaquië' luyú ni.

Busaca' zí'u bönachi izá'a na', en gurú'unu' léguequi.

<sup>3</sup> Bití' gula'déli'në' xuz xtó'otu' luyú ni rácasö quégaquië',  
en bití' bulu'sölá la' cuíngacasë',

pero ben cazu' Li' lë na' len yöl-la' huáca zxön quiu',  
en lu yöl-la' zxön que le naca cazu',

ate' bulú'u lahui ca nadxí'inu' légaquië'.

<sup>4</sup> Naca cazu' Li' Dios quia', en Nu rinná be'e neda'.

Busölá bönachi quiu', yugu' xzí'ini xí'sóe' Jacob.

5 Uguntu' dxin yöl-la' huáca quiu', uxícjatu' nupa ta'dá'baga' netu',  
 ate' tu' zóalen cazu' netu', ucúl-latu' nupa biti' ta'lé'e netu' dxi'a.  
 6 Biti' uzzöni ládxa'a uxiti' yaga quia',  
 en biti' uzzöni ládxa'a guië tuchi' quia' para ilácalen neda',  
 7 tu' rusölá cazu' Li' netu' lu ná'agaca nupa biti' ta'lé'e netu' dxi'a,  
 en ruzötju' nupa tu'dí'i netu'.  
 8 Cú'utica'stu' Li' yöl-la' ba,  
 en guiética'stu' Li': "Xclenu'."  
 9 Pero na'a nusán no'o netu', Dios, en bē'u lataj nu buxicja netu'.  
 Bítirö réajlenu' bönni' queëtu' rójáquië' gudil-la.  
 10 Benu' ga buzxúnnajtu' lógaca nupa ta'díl-lalen netu',  
 ate' gula'güë' yugu' le nequi queëtu'.  
 11 Bē'u lataj gulútië' ziantu' ca nu rúti-gacaba' bö'cu' zxila'.  
 Bësilásiu' netu' ládjagaca yödzö izá'a.  
 12 Naca tsca bëti'u netu', en láti'do'os guzxi'u.  
 Biti' ca' buzi'u xibé tsca guzxi'u.  
 13 Bönachi yugu' dzaga yödzö queëtu' bila'lé'e lē na' benu' queëtu',  
 ate' tu' cá'ana netu' cá'asö, en tu'titaj netu'.  
 14 Benu' ga tu'didza' yudxi bönachi yugu' yödzö netu'.  
 Tu'tá ícjaguequi lu yöl-la' rucá'ana netu' cá'asö.  
 15 Yugu' dza rutuí'ida' ca raca queëtu',  
 en rö'a böniga lu yöl-la' rutuí'i quia',  
 16 tu' riyönda' nupa tu'didza' yudxi neda', en tu' cá'ana neda' cá'asö,  
 nupa na' biti' ta'lé'e neda' dxi'a, en tu'dí'i neda'.  
 17 Guca queëtu' yúgu'tē lē ni sal-la' biti' nál-la ládxi'tu' Li',  
 en biti' nucá'anatu' didza' dzaga bēnlenu' netu'.  
 18 Biti' ca' böaj ládxi'tu' ca réajlë'ëtu' Li',  
 en biti' gudá'baga'tu' le buluí'inu' netu' guntu'.  
 19 pero nusán na' cazu' netu' ladaj nupa ná'agaca ca yugu' böa' gui'a sínia',  
 en nucá'anu' netu' ga chizóa tseajtsázatu' lataj chul-la.  
 20 La'tu' gul-la ládxi'tu' Li', Dios queëtu',  
 o la'tu' guyéaj ládxi'tu' tu dios izá'a,  
 21 la' gáquibe'etēnu' lē ni, Dios,  
 tu' nöz quézinu' le rizá' ládxi'tu'.  
 22 Tu' néquitu' quiu' Li' zóatica'sö nu guti netu'.  
 Nactu' ca yugu' bö'cu' zxíla'do' lo nu guti lé'gacaba'.  
 23 ¡Bubán, Xan! ¿Bizx que rásitso' Li'?  
 ¡Guyasa! ¡Biti' usán no'o netu' chadía chacanna!  
 24 ¿Bizx que nucachi' lo' lotu' netu'?  
 ¿Naru' nál-la ládxi'u ca raca queëtu', en ca riguí'i rizáca'tu'?  
 25 Naguíngaquië' netu' luyú.  
 Nadínitu' lu bëchtö yu.  
 26 ¡Gudáchi gácalenu' netu',  
 en lu yöl-la' dxi'i ladxi' quiu' busölá netu'!

## 45

1 Rizá' ládxa'a tu le naca dxi'a.  
 Ru'a didza' que le runē' bönni' rinná bē'ë.  
 Naca lúdxa'a ca le ruzúajlenē' bönni' nabé'ede'enē' ru'ë didza'.

<sup>2</sup> Nácateru' Li' lachi ca yúgu'të bönachi.

Nabé'ede'enu' ru'u didza'.

Que læ ni na' nunë' Dios gaca dxi'a quiu' chadía chacanna.

<sup>3</sup> Bega' læ'u guié tuchi' quiu', bönni' nayëpisë',  
lu yöl-la' lachi quiu', en lu yöl-la' unná bë' quiu'.

<sup>4</sup> Lu yöl-la' unná bë' quiu' idéli'nu' lu gudil-la,  
ugunu' dxin le naca idútë li, en yöl-la' nöxaj ladxi', en le naca tsahui'.  
Yöl-la' huáca zxön quiu' gun ga ilá' lahui yugu' le zxöntëro.

<sup>5</sup> Natúchi'gacada' yaga lahui tuchi' quiu'.

Bönachi yugu' yödzo zi'tu' ta'dzö'ö lo', nupa na' ta'díl-lalen li'.

Yugu' yaga lahui tuchi' quiu' nachöza'gaca ládxi'do'guequi.

<sup>6</sup> ¡Chadía chacanna naguixju' ga rö'u rinná bë'u, Dios!

¡Ca naca le naca tsahui' rinná bë'enu' bönachi quiu'!

<sup>7</sup> Nadxí'inu' le naca tsahui', en biti' rilé'enu' dxi'a le biti' nácate.

Que læ ni na' Dios quiu' nabö cazë' li'.

Nachízirë' icja ládxi'do'o yöl-la' rudzeja ca le nápagaca ia'zica'rö bönachi.

<sup>8</sup> Rilá' zxixi lari' nacu' len zi' mirra, en zi' áloe, en zi' casia.

Tunë' bönni' huil-la ga rudzéjanu' lu yu'u lidxu' zxön.

<sup>9</sup> Yugu' nigula zxí'inigaquië' bönni' ta'nná bë'ë

nútsa'gacabi' bi'i nigula nacuá'abi' lidxu'.

Nigula quiu' rinná bë'enu' zuínu' cuitu' ibëla,

en nácunu le nazí'i biquitaj oro nazaca'.

<sup>10</sup> Bë' ladxi' neda', nigúlado'.

Bë' ladxi' neda', en biyön xtídza'a.

Gul-la ladxi' bönachi yödzo quiu', en yugu' di'a dza quiu'.

<sup>11</sup> Ní'irö së ládxe'ë bönni' rinná bë'ë yöl-la' lachi quiu'.

Buzóa zxibu' lahuë' tu' náquië' xanu'.

<sup>12</sup> Ní'irö bönachi yödzo Tiro ila'dxín lo' nuá'gaca le nazáca'da' le ilunna quiu'.

Yugu' bönni' ta'lé'enë' yöl-la' tsahui' ila'nábinë' li' bi unödzju' quégaquië'.

<sup>13</sup> Yugu' bi'i nigula queë' bönni' rinná bë'ë zóagacabi' lidxë', en nácaterögacabi' lachi.

Lari' nácubi' nadíalen du oro.

<sup>14</sup> Ila'ché'ë-bi' lahuë' bönni' rinná bë'ë, nácubi' lari' nazáca'da'.

Ila'dabi' yugu' bi'i nigula ra'bando' cúde'löbi',

ate' ila'ché'ë lé'gacabi' lahuë' bönni' na' rinná bë'ë.

<sup>15</sup> Lu yöl-la' rudzeja, en lu yöl-la' ruzí' xibé quégacabi' ila'dxinbi',

en ila'yázabi' yu'u lidxë' bönni' na' rinná bë'ë.

<sup>16</sup> Ila'cuá'abi' bi'i bönni' quiu' uláz quégaquië' xuz xto'o.

Gunu' ga ila'nná bë'ëbi' idútë yödzölió.

<sup>17</sup> Gunu' ga tsöjné'gacatica'sö bönachi ca nacu' Li'.

Que læ ni na' yúgu'të bönachi ilë li' "Xclenu'" yugu' dza si' zaca.

## 46

<sup>1</sup> ¡Náquië' Dios Nu run chi'i rë'u, en Nu ruzóa rë'u tsutsu!

¡Zóatica'së' gácalenë' rë'u cate' bi raca queëru'!

<sup>2</sup> Que læ ni na' biti' gádxiru' sal-la' izxizi idútë yödzölió,  
en ila'niti yugu' guí'a lu nísado',

<sup>3</sup> en sal-la' chasa idxía, en tsu'u bö nísado' na',

en ila'zxizi guí'ado' tu' nözi le raca.

<sup>4</sup> Zoa tu yegu le run ga tu'dzeja nupa nacuá' ladzë' Dios,  
ga na' rö'ö yudo' lá'ayi ga zoë' Dios nayëpisëtë'rë'.

<sup>5</sup> Zoa cazë' Dios yödzö na', le catu caz initi.  
Cate' ni' soa itö yu gácalenë' nupa nacuá' ni'.

<sup>6</sup> Tadxi ta'dzöbi bönachi yugu' yödzö,  
ate' ta'bö' baguí'i nupa ta'nná bë',  
tu' ru'ë didza' Dios, ate' riniti luyú ni.

<sup>7</sup> Xanru' nayëpisëtë'rë' zóalen cazë' rë'u.  
Dios quégaca zxí'ini xi'sóë' Jacob rapa chi'ë rë'u.

<sup>8</sup> Guli'dá ilé'eli' le nunë' Xanru'.  
Bulí'yú ca nusunítie' luyú ni.

<sup>9</sup> Ruzóa dxië' gudil-la rácagaca idútë yödzölió.  
Riguitsjë' yugu' uxiti' yaga,  
en rusunítie' yugu' yaga lahui tuchi' que gudil-la.  
Ruzégui'ë yugu' carreta que gudil-la tu lu guí' zxön.

<sup>10</sup> Rnnë': "Guli'sóa dxisö, ate' guéquibe'eli' naca caza' Dios.  
Nayëpisëtë'ra' yugu' lu yödzö, en lu idútë yödzölió."

<sup>11</sup> Xanru' nayëpisëtë'rë' zóalen cazë' rë'u.  
Dios quégaca zxí'ini xi'sóë' Jacob rapa chi'ë rë'u.

## 47

<sup>1</sup> ¡Lu yöl-la' rudzeja queëli' guli'capa' ná'ali', bönachi yúgu'të yödzö!  
¡Guli'cu'ë yöl-la' ba Dios, len yugu' le rúl-lalenli'!

<sup>2</sup> Ral-la' gunru' bal Xanru' Dios nayëpisëtë'rë'.  
Náquië' Nu rinná bë' idútë yödzölió.

<sup>3</sup> Benë' ga bidéli'ru' yugu' lu bönachi izá'a.  
Benë' ga rinná be'eru' yugu' yödzö.

<sup>4</sup> Guró cazë' luyú ga ni nuzóë' rë'u.  
Naca tu luyú lachi quégaca zxí'ini xi'sóë' Jacob, nupa na' nadxí'i quézinë'.

<sup>5</sup> Len yöl-la' ba zxön ribenë' Dios ga rö'ë rinná bë'ë.  
Le zían le tu'cödxë' cate' ribenë' Xanru' ni'.

<sup>6</sup> ¡Guli'gul-la yöl-la' ba queë' Dios! ¡Guli'gul-la!  
¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

<sup>7</sup> ¡Rinná bë'ë Dios idútë yödzölió ni!  
¡Idú láchxi'li' guli'gul-la yöl-la' ba queë'!

<sup>8</sup> ¡Zoa cazë' Dios lataj lá'ayi queë' ga rö'ë rinná bë'ë!  
¡Rinná bé'enë' bönachi yúgu'të yödzö!

<sup>9</sup> Tu'dubi nupa ta'nná be'e yugu' yödzö  
tsözxön len bönachi queë' Dios queë' Abraham.

<sup>10</sup> ¡Nequi queë' Dios yöl-la' zxön quégaca yúgu'të yödzö nacuá' yödzölió!

¡Nayëpisëtë'rë' Lë'!

## 48

<sup>1</sup> Nayëpisëtë'rë' Xanru', ate' run bayudxi cú'uru'-në' yöl-la' ba idú láchxi'ru'  
ga zoa lu yödzö queë' Dios queë'ru' le zoa lu guí'a lá'ayi queë'.

<sup>2</sup> Lachi, en sibi naca guí'a lá'ayi na',  
 ate' raza ládxi'gaca bönachi idútë yödzölió ca naca.  
 Caní naca guí'a Sión le rö'ö tsölá'alö ga za' bö' ziaga.  
 Lu yödzö na' dë ga zoa Bönni' Unná Bë' nayépisë'.  
<sup>3</sup> Rulu'ë lahui Dios sóaru' tsutsu cuitë' Lë'  
 ga zoa lu yu'u lidxë'.  
<sup>4</sup> Gula'dá'baga' nupa ta'nná bë' lu yu ni,  
 en gula'bígui'ë ra' yödzö lá'ayi na'.  
<sup>5</sup> Cate' bila'lé'enë' yödzö na' bulu'bánninë'.  
 Gula'bö'ë böniga, en la' bulu'zxúnnajtë'.  
<sup>6</sup> Ra' yödzö na' gula'zxízië'.  
 Gula'zaca' zi'ë ca raca queënu nigula chizóa uzóanu-bi' bí'ido'.  
<sup>7</sup> Risöl-lë'ë Dios tu bö' budunu',  
 le rusuniti yugu' barco zxön que yödzö Tarsis.  
<sup>8</sup> Biyönru' ca náragaca le zxön benë' Dios,  
 ate' na'a rilé'e quéziru' le runë',  
 lu yödzö lá'ayi queë' Dios quégaca ni'a në'ë guizxi yu,  
 en náquië' ca' Dios queëru'.  
 Tsaz naguixjë' yödzö na'.

<sup>9</sup> Ga zoa lu yudo' quiu', Dios,  
 röjnetu' ca naca yöl-la' dxi'i ladxi' quiu'.  
<sup>10</sup> Ca nayépisëtëro' Lo', Dios,  
 ca' ta'gú'u Li' yöl-la' ba bönachi idútë yödzölió.  
 Ca naca le naca tsahui' rinná bë'u.  
<sup>11</sup> Ulu'dzeja bönachi nacuá' yödzö Sión.  
 Ulu'zí'ínu xibé nigula zxí'ini xi'sóe' Judá  
 tu' ruchí'a rusöröu' netu' ca naca le naca tsahui'.  
<sup>12</sup> Guli'dá idú gásibi'ilö ga dë yödzö Sión,  
 en buli'laba yugu' yu'u sibi tun chí'i yödzö na'.  
<sup>13</sup> Buli'yú ca naca zö'ö run chí'i yödzö na',  
 en buli'yú ca' le nuzóagaca le tsutsu,  
 para gaca quíxjöi'ili' zxí'ini xi'sóali' ca náquië' Dios zxön ni.  
<sup>14</sup> Tsaz náquië' Dios queëru', na'a dza, en dza si' zaca.  
 Uluí'inë' ré'u nöza tödi gátiru'.

## 49

<sup>1</sup> Guli'yöni lë ni, libí'ili', bönachi yúgu'të yödzö.  
 Buli'zé nágali', libí'ili', zóali' idútë yödzölió.  
<sup>2</sup> Libí'ili', nayépsëtëroli', en libí'ili', nácali' cá'asö.  
 Libí'ili', dë yöl-la' tsahui' queëli', en libí'ili', nácali' yechi'.  
<sup>3</sup> Tsöjsá' ládxa'a ca naca le nápagaca yöl-la' réajni'i,  
 en gu'a didza' le nápagaca yöl-la' raca yenni'.  
<sup>4</sup> Güi'i ládxa'a ca naca tu le rucudzu' didza',  
 en quíxjö'a ca náragaca tsanni quinnia' lë'e bihuël-la.  
<sup>5</sup> Biti' bi rádxida' cate' ridxín bi raca quia',  
 cate' ta'gu'ë neda' lé'ajlö bönni' tuá' dö' biti' ta'lé'enë' neda' dxi'a.  
<sup>6</sup> Tu'zxöni ládxe'ë bönni' na' yöl-la' tsahui' quégaquië',  
 en tun ba zxön cuíngaquië' ca náragaca le dë quégaquië'.  
<sup>7</sup> Biti' gaca huóá'uë' la' cuinsë' nitúë' bönni' na'.



Biti' gaca bi unödzejë' queë' Dios le gun ga usölë' lë',  
 8 tu' naca zxönterö le huóá'u yöl-la' na'bán que nu bönni',  
 ate' catu caz gaca nu bönni' quixjé' ca naca,  
 9 para idéli'në' sóatica'së' ibanë',  
 en cabí tsázië' yeru ba ga yú'ugaquië' bönni' nati.  
 10 Rilé'enë' tatië' ca' bönni' ta'yéajni'inë',  
 en ta'nitië' tuz ca tati nupa bití' bi nözigaca, en nupa bití' ta'yéajni'i,  
 ate' tu'cá'anë' yöl-la' tsahui' quégaquië' le ulu'z'í' xibé bönachi yúbölö.  
 11 Téquinë' ila'cuá'tica'sö lídxigaquië' bönni' na',  
 ate' tsaz ila'cu'ë ni',  
 ate' ta'gu'ë lágaca xiyúgaquië' ca naca la' lágacasë'.  
 12 Pero yöl-la' ba zxön napë' bönni' na' bití' gun ga sóatica'së'.  
 Gati cazë' ca tátiba' böa' guixi'.  
 13 Caní naca le gaca quégaquië' bönni' tu'zxöni ládxe'ë yöl-la' tsahui' quégaquië',  
 enca' quégaca zxí'ini xi'sóagaquië',  
 yugu' bi'i na' ta'yaza ládxi'gacabi' didza' gulu'ë xúzgacabi' na'.  
 14 Ilátië' ca tátiba' bö'cu' zxila',  
 ate' yöl-la' guti gaca quégaquië' ca tu nu uyú bö'cu' zxila'.  
 Yugu' bönni' tsahui' ila'nná bé'enë' légaquië' cate' itö yu zila.  
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa nátigaca.  
 15 Huóá'u cazë' Dios yöl-la' na'bán quia' lu yöl-la' guti,  
 tu' ichë'ë neda' ga tsöjsóalena' Lë'.  
 16 Bití' gádxinu' cate' idéli'në' nu bönni' yöl-la' tsahui' zxön,  
 en cate' xön yöl-la' lachi que yu'u lidxë',  
 17 tu' cabí bi u'ë cate' gátië',  
 en bití' tséajlen lë' yöl-la' lachi que le guta' queë'.  
 18 Sal-la' cate' ni' zoë' nabanë' buzí' xibé bö' naca cazë',  
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.  
 19 Tsázië' ga na' dzö'ë xuz xtá'ahuë',  
 en bití'rö ilé'enë' bení'.  
 20 Náquië' bönni' napë' yöl-la' zxön, pero riyádzjanë' yöl-la' réajni'i,  
 ca böa' guixi' tati cázaba'.

## 50

1 Ru'ë didza' Xanru' Dios nayëpisëtërë'.  
 Nutubë' dërö nupa nacuá' yödzölió ga naguéla'të ga rilén gubidza ga ridxintë ga ribía.  
 2 Lu yödzö Sión rigu'ë Dios bení'.  
 Napa yödzö na' yöl-la' lachi idú.  
 3 Zë'ë Dios queéru', en bití' soë' dxisö.  
 Tsöjnöru lahuë' tu guí' zxön,  
 ate' tsecja tu bö' budunu' idú gasibí'ilë'.  
 4 Ulidzë' lúzxiba xitsá', enca' luyú  
 cate' uchi'a usöröë' quégaca bönachi queë'.  
 5 Rnnë' Dios: "Guli'túbi nupa néquiquequi quez quia',  
 nupa na' gulunlen neda' didza' dzaga,  
 en bulu'lalaj rön lahua' le ben tsutsu didza' dzaga na'."  
 6 Naca bë' náquië' tsahui' Dios lúzxiba xitsá',  
 tu' uchi'a usöröë' Dios bönachi queë'.  
 7 Rnnë': "Buli'zë nágali', bönachi quia', ate' gu'a didza'.  
 Buli'zë nágali', bönachi Israel, ate' uzéguia' libí'ili' didza'.

Naca caza' Dios.

Ön, naca' Dios queëli'.

<sup>8</sup> Biti' uzéguia' libí'ili' didza' ca naca le rúnнали' quia',  
en calëga ca nácagacaba' böa' bëdxi ruzégui'li'-ba' lahua'.

<sup>9</sup> Biti' riquinda'-ba' bëdxi queëli',  
en calëga chivo biguiú' nacuá'aba' queëli',

<sup>10</sup> tu' néquigacaba' quia' yúgu'tëba' böa' guixi',  
enca' böa'-bëdxi nacuá'aba' lu gayuá' gayuá' guí'ado'.

<sup>11</sup> Néquigacaba' ca' quia' yúgu'tëba' böa' zoa xíligacaba',  
enca' yúgu'të le zoa nabán la' guixi'.

<sup>12</sup> La'tu' riduna' biti' guía' ca' libí'ili',  
tu' nequi quia' yödzölió, enca' yúgu'të le nacuá' ni'.

<sup>13</sup> ¿Naru' gágutsa' xipëla'gacaba' bëdxi,  
o guí'jatsa' xichöngacaba' chivo?"

<sup>14</sup> Le ral-la' unödzejali' queë' Dios naca yöl-la' rë Lë': "Xclenu"  
ate' ral-la' gunli' lahuë' Dios nayëpisëtëre' ca naca le guzxí' lu ná'ali' gunli'.

<sup>15</sup> Rnnë' ca': "Ral-la' ulídzali' neda' cate' bi gaca queëli'.  
Gácalen caza' libí'ili', ate' gunli' neda' bal."

<sup>16</sup> Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlëna' bönachi?

<sup>17</sup> Biti' runnu' lataj usédida' li',  
pero rucá'anu' cá'asö didza' ruá'a.

<sup>18</sup> Cate' rilé'enu'-në' bönni' gubán rácalenu' lë',  
en runu' tsözxön nupa ta'guitsaj xibá que yöl-la' nutsaga na'.

<sup>19</sup> Zóatica'su' gu'u didza' xihui',  
en ruí'tica'su' didza' biti' nácatë.

<sup>20</sup> Zóatica'su' uzéguii'-në' böchi' cazu',  
en rudidza' yudxu' böchi'-zan cazu'.

<sup>21</sup> Caní benu', ate' biti' bi gunnía',  
ate' gúquinu' naca' ca naca cazu' li',  
pero na'a uzéguia' li' didza', en ulu'a lahui le nunu'.

<sup>22</sup> Buli'zë nágali' didza' ni, núlöli' ruzóali' neda' tsölá'alö.  
Channö cabí, usunítia' libí'ili', ate' cuntu nu gaca usölá libí'ili'.

<sup>23</sup> Nu rë neda': Xclenu', runna quia' le run neda' bal,  
ate' nu run ca rnna xtídza'a, usölá caza' nu na'."

## 51

<sup>1</sup> Dios quia', buzá' ladxi' quia' tsca naca yöl-la' dxi'i ladxi' zxön quiu',  
en tsca naca le zián le ruzá' ládxi'u quia', bugúa yugu' le gudá'baga'a lo' Li'.

<sup>2</sup> Buguíbitica'sö neda' tsca naca dö' bi'a.

Buchi'a neda' lu dul-la' nuna'.

<sup>3</sup> Nöz quézida' le gudá'baga'a,  
en röjnétiqi'sida' yugu' dul-la' nuna'.

<sup>4</sup> Lo' Li' cazu' bena' dul-la',  
en lo' Li' ca' bi'a dö'.

Naca bë' nacu' tsahui' cate' ru'u didza',  
en idú dxi'a, en tsahui' nacu' cate' ruchi'a rusöröu' queëtu'.

<sup>5</sup> Buyútsöca', nabága'a dö' cate' gusí lotë gulja',  
 en lu dul-la' zoa caza' cate' buzóanu xiná'a neda'.  
<sup>6</sup> Rë'ënu' soa le naca idútë li icja ládxi'do'otu'.  
 Guchiza icja ládxi'da'ahua' yöl-la' réajni'i.  
<sup>7</sup> Buchi'a neda' len le ruchí'aninu', ate' gaca' dxi'a.  
 Buguibi neda', ate' huöáca' zxíla'do'os.  
<sup>8</sup> Ben ga yönda' le naché' yöl-la' ruzí' xibé, en yöl-la' rudzeja,  
 para huöáca ládxa'a lu le raca quia' tu' benu' ga réquibe'eda' nabága'a dul-la'.  
<sup>9</sup> Biti' uyú' yugu' dul-la' nuna',  
 en busulu yúgu'të le naca dö' nabága'a.  
<sup>10</sup> Dios quia', bun dxi'a ládxi'da'ahua',  
 en guchiza neda' tu bö' cubi le nuzú' tsutsu.  
<sup>11</sup> Biti' ucuítu' neda' ga zoa' lo' Li',  
 en bití' ugú' Dios Bö' Lá'ayi quiu' Nu zóalen neda'.  
<sup>12</sup> Bunna quia' yöl-la' rudzeja que yöl-la' rusölá quiu',  
 en ben ga guna' ca rnna xtídz'u idú ládxa'a.  
<sup>13</sup> Ní'irö usédida' nupa ta'guitsaj xibá quiu' ca nácgaca le rë'ënu' ilúngaca,  
 ate' yugu' bönni' dul-la' ulu'huécja quiu'.  
<sup>14</sup> Dios quia', benna neda' lataj cabí ibága'a xiguia'.  
 Naca cazu' Dios, Nu rusölá neda'.  
 Lu yöl-la' rudzeja quia' gul-la' ca naca cazu' tsahui'.  
<sup>15</sup> Xana' Dios, gusalaj ruá'a,  
 ate' usiyönda' bönachi yöl-la' ba quiu'.  
<sup>16</sup> La'tu' raza ládxi'u-ba' böa'-bëdxi gútitu'-ba' lo', la' gúntea' caní.  
 Biti' raza ládxi'u-ba' nu böa' uzégui'tu'-ba' lo'.  
<sup>17</sup> Le rë'ënë' Dios le naca ca tu le cú'uru' lahuë'  
 naca bö' naca cáziru' le nõtaj nagula ládxi'.

Dios quia', bití' ucá'anu' cá'asö ládxi'do'otu'  
 le ruhu'ini ládxi', en le naca nöxaj ládxi'.

<sup>18</sup> Lu yöl-la' ruzá' ládxi' quiu' ben le naca dxi'a  
 quégaca bönachi yödzö Sión.  
 Buchisa zö'ö le run chi'i yödzö Jerusalén.  
<sup>19</sup> Ní'irö tsaza ládxi'u yugu' le cú'utu' lo' le naca idú dxi'a,  
 yugu' böa' guíxi'do' gútitu'-ba' lo',  
 en yugu' böa'-bëdxido' uzégui'tu'-ba' lo'.  
 Ní'irö ilútië'-ba' yugu' bëdxi biguiú'do',  
 en ila'gu'ë-ba' lu bucugu quiu'.

## 52

<sup>1</sup> ¿Bizx que run ba zxön cuinu' ni'a que dö' ru'u, bönni' nál-la?  
 Zóatica'sö yöl-la' dxi'i ládxi' queë' Dios.  
<sup>2</sup> Len lúdxu'u rúnlenú' luzó'o didza' para usunítu' bönachi.  
 Naca lúdxu'u, bönni' rizí' yë', ca tu guíë tuchi'.  
<sup>3</sup> Nadxí'irönu' le naca dö' ca nadxí'ínu' le naca dxi'a,  
 en nadxí'irönu' le cabí nácatë ca nadxí'ínu' le naca idútë li.  
<sup>4</sup> Nadxí'ínu' yúgu'të didza' tun ditaj bönachi,  
 li' na', bönni' rizí' yë'ë.  
<sup>5</sup> Tsaz uzötaj cazë' Dios li'.  
 Sönë' li', en ubéajë' li' lu yu'u lidxu',

en ucuítë' li' ga nacuá' nupa nabángaca.

<sup>6</sup>Yugu' bönni' tsahui' ila'lé'enë' lë ni, en iládxinë' Dios.

Ulu'zixidxë' queë' bönni' na' rizí' yë'ë, ila'në':

<sup>7</sup>“¡Buli'yútsöca! Bönni' ni biti' gú'unnë' uzxöni ládxe'ë Dios, pero buzxöni ládxe'ë yöl-la' tsahui' queë',

en le zían le guzé ládxe'ë le cabí bi nazaca'.”

<sup>8</sup>Naca' neda' ca tu yaga olivo ya'a le rö' ra' yu'u lidxe' Dios.

Uzxöni ládxa'a yöl-la' dxi'i ladxi' queë' Dios yugu' iz si' zaca.

<sup>9</sup>Guíética'sa' Li': “Xclenu” tu' ben cazu' Li' ga naca caní,

ate' guna' löza Lo' le naca dxi'a lógaca nupa néquiquequi quez quiu'.

## 53

<sup>1</sup>Ta'zá' ládxe'ë bönni' canöz, ta'nnë':

“Biti' ca' zoë' Dios.”

Nácagaquië' xihui' bönni' caní, en núngaquië' le nácatërö xihui'.

Cuntu nu bönni' zoë' runë' le naca dxi'a.

<sup>2</sup>Ga na' zoë' Dios yehua' yubá ruyúë' gátí'tës,

en rilé'enë' bönachi nacuá' idútë yödzölió,

para inözinë' channö zoa nu réajni'i,

o channö zoë' nu bönni' ruí' ládxe'ë Dios.

<sup>3</sup>Yúgu'të bönachi söjáquië' ga yúbölö.

Yúgu'të' nácagaquië' xihui'.

Cuntu nu zoa run le naca dxi'a, nitúë' bönni'.

<sup>4</sup>¿Naru' cabí nápagaquië' yöl-la' réajni'i bönni' na' tu'ë dö'?

Tu'sunítië' bönachi quia' ca tu nu ragu yöta,

en biti' ca' tu'lidzë' neda'.

<sup>5</sup>Tadxi ta'dzöbinë' bönni' caní, en biti' bi nuna' quégaquië'.

Caní raca tu' rusunítië' Dios caz nupa ta'díl-lalen libí'ili'.

Gunli' ga ulu'tuí'inë' tu' chigurú'unë' Dios légaquië'.

<sup>6</sup>Raca ládxi'ru' irúaj Sión Nu usöla bönachi Israel.

Cate' uchisa cazë' Dios bönachi queë' nadzúngaca,

ulu'dzeja zxí'ini xi'sóë' Jacob, en ulu'zí' xibé bönachi Israel.

## 54

<sup>1</sup>Busöla neda', Dios, para gaca yöl-la' ba que Lo'.

Len yöl-la' huáca quiu' guléaj neda' tsahui'.

<sup>2</sup>Ruzë' nagu' le rulidza' Li', Dios.

Ruzë' nagu' didza' ruá'a.

<sup>3</sup>Ta'díl-lalen bönni' zi'tu' neda',

tu' té'ënë' bönni' zidzaj ilútië' neda'.

Biti' ca' tádxinë' Dios.

<sup>4</sup>Buli'yútsöca', naca cazë' Dios Nu rácalen neda'.

Ruzöë' tsutsu Xanru' yöl-la' na'bán quia'.

<sup>5</sup>Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

<sup>6</sup>Idú ládxa'a gútia'-ba' böa'-bëdxi lo'.

Guía' Li': “Xclenu” Xan, tu' naca dxi'a Lo'.

<sup>7</sup>Busöla cazu' Li' neda' lu yugu' le guca quia',

ate' rilé'eda' zeaj nanítitica'sö nupa ta'díl-lalen neda'.

## 55

<sup>1</sup> Ruzé nagu' le rulidza' Li', Dios,  
en bití' tá'bagu' le rinábida' Li'.

<sup>2</sup> Ruzé nagu' neda', en rubí'u didza'.

Rulidza yúdxida' Li', en rō'a bōniga

<sup>3</sup> ni'a que chí'ë bōnni' bití' rilé'enē' neda' dxi'a,  
en tu' tu'tsá' neda' nupa tuá' dō', en tu'saca' zì' neda',  
en lu yöl-la' rilé' quéguequi ta'bía no neda'.

<sup>4</sup> Réqui zì' ládxi'da'ahua',  
ate' yöl-la' radxi que yöl-la' guti rōjtsaza ládxi'da'ahua'.

<sup>5</sup> Chigula'yaza yöl-la' radxi, en yöl-la' rizxizi neda',  
ate' nabaga' yöl-la' radxi ridzōbi neda'.

<sup>6</sup> Gunnía': "Gaca ládxa'a gata' quia' xílaba' gu'dōdo',  
para gaca tōda' lu bō'ōs, en idxina' tu lataj ga gaca uzí' ládxa'a.

<sup>7</sup> Raca ládxa'a tseja' zì'tu',  
en tsōjsóa' la' guixi' ga dē lataj.

<sup>8</sup> Uyija' carelō tu lataj ga tsōjsóa' tsutsu,  
para cabí' bi gun quia' le naca ca bō' budunu'."

<sup>9</sup> Busuniti légaquiē', Xan, en buxí' ruá'agaquiē',  
tu' bilé'eda' ta'díl-lē', en tu'tsatsē' lu yōdzō.

<sup>10</sup> Rēla, en te dza ta'dōdē' nōza lu yōdzō.  
Tu'ē dō', en tunē' le xihui' idú gásibi'ilō yōdzō.

<sup>11</sup> Tu'sunítiē' le nacuá' nì'.  
Tu'saca' zì'ē bōnachi, en ta'zì' yē'ē la' nōza que yōdz.

<sup>12</sup> Calēga bōnni' bití' rilé'enē' neda' dxi'a nu rudidza' yudxi neda',  
tu' huáca guá' ilena' le gunē',

en calēga bōnni' rudí'inē' neda' nu ridíl-lalen neda',  
tu' huáca ucachi' cuina' lahuē',

<sup>13</sup> pero nacu' li', tu bōnni' ca neda'.

Nacu' bōchi' luzá'a, en nacu' tuz len neda'.

<sup>14</sup> Lu yöl-la' dxi'i ládxi' queéru' gúcaru' tuz.

Lada'j bōnachi zían gudarú', en bidxinru' lidxē' Dios.

<sup>15</sup> Xana' Dios, bē' yöl-la' guti lataj idxín quéguaquiē' bagáchi'sö.

Ben ga tsōjtsázagaquiē' nabángaquiē' lataj chul-la ga nacuá' nupa nátigaca,  
tu' yu'u le xihui' lídxigaquiē', en lu yu'u ca' gapa tu'dubē'.

<sup>16</sup> Pero neda' ulidza'-nē' Dios,

ate' usölá' cazē' Xanru' neda'.

<sup>17</sup> Chí'i dzō'ölō, en zílado', en gatsaj dza ulidza yúdxida' Lē',  
en innē' ládxa'a lahuē', ate' yōn cazē' chí'a.

<sup>18</sup> Huóá'uē' yöl-la' na'bán quia' lu na' nupa ta'díl-lalen neda'  
en uzōé' neda' lataj ga cōza' dxi'a tsáhui'do',  
tu' nayánda' nupa ta'díl-lalen neda'.

<sup>19</sup> Huayōn quézínē' Dios, en ubi'ē quéguaquiē'.

Rō'ē rinná' bē'tica'sē' Lē'.

Caní' gunē' Dios tu' cabí' tu'sanē' ca tunē',

en bití' tádxinē' Dios.

<sup>20</sup> Bōnni' ru'ē dō' ribía nahuē' nu ribōza dxi'a tsáhui'do',

en rucá'anë' cá'asö didza' dzaga nunë'.

<sup>21</sup> Bë'ë didza' yúlado',  
pero yu'u icja ládxi'da'ahuë' yöl-la' ridzá'a.  
Bë'ë didza' zxi'ido',  
pero didza' na' bë'ë gulaca ca guié tuchi'.

<sup>22</sup> Gulú'u le nabágu'u lu në'ë Xanru', ate' utipa cazë' ládxi'u.

Biti' gu'ë lataj iguinnaj tsaz nu naca tsahui'.

<sup>23</sup> Chú'unë' bönni' tu'ë dö' na' lataj chul-la  
ga nacuá' nupa nátigaca ga na' ila'nítigaquië'.  
Biti' ila'cuá' gatsaj tsca ral-la' ila'cu'ë nabángaquië' bönni' tutië' bönachi,  
en bönni' ta'zì yë'ë.

Pero neda' uzxöni ládxa'a Li'.

## 56

<sup>1</sup> Buéchi' ladxi' neda', Dios, tu' ta'dá'baga' bönachi neda'.

Yugu' dza nupa tu'dí'i neda' ta'bía no neda'.

<sup>2</sup> Yugu' dza nupa biti' ta'lé'e neda' dxi'a tuá' dö' quia'.  
Zián nupa ta'díl-lalen neda' lu yöl-la' run ba zxon cuínguequi.

<sup>3</sup> Cate' radxi ridzöbida', uzxöni ládxa'a Xanru'.

<sup>4</sup> Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në', en biti' bi gádxida'.

¿Bizxi caz gaca ilún quia' bönachi?

<sup>5</sup> Yugu' dza tun nigui neda' nupa biti' ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

<sup>6</sup> Tu'dubë' ga nagáchi'sö, en tu'yúlanë' yúgu'të le runa',  
para gata' quégaquië' lataj ilútië' neda'.

<sup>7</sup> Bubi'ë quégaquië', Dios, ca naca dö' tu'ë,  
en lu yöl-la' rilé quiu' busuniti légaquië'.

<sup>8</sup> Nöz quézinu' Li' ca rö'a böniga.

Nurixu' Li' nisa ribödxu' quia'.

¿Naru' cabí nuzú' léguequi lu guichi quiu'?

<sup>9</sup> Cate' ulidza' Li', la' dza ná'asö ulu'hué'ca gúz cúdzu'lö nupa tu'dí'i neda'.

Nöz quézida' rácalen cazu' neda', Dios.

<sup>10</sup> Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

<sup>11</sup> Ruzxöni ládxa'a-në', en biti' bi gádxida'.

¿Bizxi caz gaca ilún bönachi quia'?

<sup>12</sup> ¿Gunna' quiu', Dios yugu' le guzxi' lu na'a!

¿Cu'a Li' yöl-la' ba!

<sup>13</sup> Busóló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

## 57

<sup>1</sup> ¿Buéchi' ladxi' neda', Dios!

¿Buéchi' ladxi' neda' tu' ruzxöni ládxa'a Li' gun chi'u neda'!

Guxóa no'o neda' ca runba' böra run chí'igacaba' börado' zxa' xílaba',

ga idxinrö tödi bönadxi raca quia'.

<sup>2</sup> Rulidza'-në' Dios nayëpisëtërë'.

Náquië' Dios Nu run ga raca dxi'a quia'.

<sup>3</sup> Ga zoa cazë' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

<sup>4</sup> Naca quia' tsca zoa' ladjagacaba' bëdxi guixi'.

Yugu' bönni' zidzaj nagú'ugaquië' neda' lë'ajlö.

Nácagaca láyi'gaquië' ca yugu' yaga tuchi' que gudil-la,

ate' nácagaca lúdxí'gaquië' ca yugu' guié' tuchi'.

<sup>5</sup> Dios quia', buluí'i lahui lúzxiba yöl-la' zxön quiu',

en yödzölió ni buluí'i lahui yöl-la' bení' quiu'.

<sup>6</sup> Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rö'a böniga.

Gula'chö'önë' yeru ga tsöjbixa' neda',

pero gula'bixë' la' légacasë' lu yeru na'.

<sup>7</sup> ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

<sup>8</sup> ¡Bubán, bö' naca caza'!

¡Guli'bán arpa, en bihuél-la!

¡Zílado' ubana',

<sup>9</sup> en gul-la' quiu' Li', Xan, ladaj bönachi yugu' yödzö!

¡Cu'a Li' yöl-la' ba lógaca yúgu'të bönachi!

<sup>10</sup> Zxöntërö naca yöl-la' ruhuéchi' ladxi' quiu', le ridxintë yehua' yubá,

ate' ridxintë yöl-la' idú ladxi' quiu' lúzxiba xitsá'.

<sup>11</sup> Dios quia', buluí'i lahui lúzxiba yöl-la' zxön quiu',

en yödzölió ni buluí'i lahui yöl-la' bení' quiu'.

## 58

<sup>1</sup> ¿Naru' ruí'ili' didza' idútë li, libí'ili' na', rinná bé'ëli'?

¿Naru' ruchí'a rusöröli' ca naca le naca tsahui'?

<sup>2</sup> ¡Biti' ca'! Rizá' ládxi'li' yugu' le xihui',

en rusaca' zí'ili' bönachi len yugu' le cabí nácátë runli'.

<sup>3</sup> Ta'dödi tsölá'alö nupa tuá' dö' ga gudéla'të gúl'jagaca.

Ta'zí' yë' ga gudéla'të bulu'cuá'anu xiná'aguequi léguequi.

<sup>4</sup> Yu'u ruí'iguequi le nachë' yöl-la' guti ca le dxía láyi'gacaba' bëla sínia'.

Nácagaca ca tuba' bëla sínia' nacödzuba',

<sup>5</sup> bëla na' biti' riyönba' chi'ë bönni' gudzá',

o le rul-lë' bönni' runë' gudzá'.

<sup>6</sup> ¡Dios quia'! ¡Buzxuzxaj láyi'gaquië'!

¡Guladzu' yugu' layi' tuchi' quégaquië'

nácagaca ca layi' tuchi' quégacaba' bëdxi guixi'!

<sup>7</sup> ¡Ben ga ila'nítië' ca raca que nisa yegu gubó'o cate' ruhuí'i!

¡Ben ga ila'cuádië' ca raca que guixi' rö'ö la' nöza!

<sup>8</sup> ¡Ben ga ila'nítië' ca yugu' böruhinna tu'únaba' lu gubidza,  
o ca tubi' bí'ido' nuzóanu-bi' nigula zí'alö ca ral-la' gáljabi', en chinátitëbi'!

<sup>9</sup> Zí'alö ca gaca utsë'e yusu' tu guí' zxön,  
ugúë' Dios légaquië' lu yöl-la' ridzá'a queë',  
bönni' nabángaquië', en bönni' chizóa ilátië'.

<sup>10</sup> Ulu'dzeja nupa nácgaca tsahui' cate' ila'lé'e  
uzí' lëbë' Dios bönni' tu'ë dö' na'.  
Ulu'zxiné' len ná'agaquië' xichóngaca nupa na' tuá' dö'.

<sup>11</sup> Ila'nná bönachi: "Le nácatë zoa le rubi'ë Dios quégaca nupa nácgaca tsahui'.  
Le nácatë zoë' Dios Nu ruchi'a rusörö quégaca nupa nacuá' yödzölió."

## 59

<sup>1</sup> Busölá neda', Dios, lu ná'agaca nupa ta'zóa regu' neda'.  
Buzóa neda' tsutsu ga biti' gaca ila'dxín nupa ta'díl-lalen neda'.

<sup>2</sup> Busölá neda' lu ná'agaca nupa tuá' dö',  
en guléaj neda' lu ná'agaca nupa tuti bönachi.

<sup>3</sup> Buyútsöca', ta'bö' nísie' neda' para ilútië' neda'.  
Ta'zóa régu'ë bönni' zidzaj neda',

calëga tu' gudá'baga'a légaquië', o tu' ben zi'a légaquië', Xan,

<sup>4</sup> en calëga tu' bëtia' bönachi, pero ta'zë'ë carelö para tíl-lalenë' neda'.  
Gudá gácalenu' neda', ate' ilé'enu' naca caní.

<sup>5</sup> Xantu' Dios quégaca ni'a no'o guizxi yu,  
en Dios quégaca bönachi Israel,  
gudá dujenu' xiguia' bönachi yúgu'të yödzö.  
Biti' uzá' ládxi'u quégaca nupa tuá' dö' lu yöl-la' rizí' yë' quéguequi.

<sup>6</sup> Tu'dxinë' chi'i dzö'ölö, ta'bödxi yechë'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzö.

<sup>7</sup> Buyútsöca', didza' tu'ë nácgaca ca le rëbigaquië'.  
Nácgaca didza' tu'ë ca yugu' guie' tuchi'.  
Ta'nnë': "¿Nuzxi caz yöni?"

<sup>8</sup> Ruzxidxu' ca naca le tunë', Xan.  
Rutitju' ca naca le tun bönachi yúgu'të yödzö.

<sup>9</sup> Tu' nal-la cazu' Li' guna' löza Li'.  
Nacu' Dios Nu run chi'i neda'.

<sup>10</sup> Tu' náquië' Dios quia' dxi'i ladxi', dutságuië' neda'.  
Uxicja cazë' Dios nupa ta'díl-lalen neda'.

<sup>11</sup> Biti' gútiu' nupa na' tuá' dö' para cabí ilal-la ladxi' bönachi ladza'.  
Lu yöl-la' huáca zxön quiu' bësilasi nupa tuá' dö', en buzötaj léguequi luyú.  
Naca cazu' Xantu', Nu run chi'i netu'.

<sup>12</sup> Ben ga sön légaquië' yöl-la' run ba zxön cuíngaquië'  
tu' nözi dul-la' tunë' ca tu'isë' didza',  
enca' tu' tu'dxië' dö' luzá'agaquië', en ta'zí' yë'ë.

<sup>13</sup> Lu yöl-la' rilé quiu' busuniti légaquië'.  
Busuniti légaquië' tsaz para cabí ila'cuá'arë',  
en para iléquibe'e bönachi Dios caz rinná bé'enë' zxi'ini xi'sóë' Jacob,  
ga ridxintë idútë yödzölió.



14 Tu' dxinë' chi'i dzö'ölö, ta'bödxi yechë'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzo.

15 Ta'dë' ta'guiljé' le ilahuë',  
ate' ta'bödxi'ë channö cabí ulu'huölaj ulu'dzé'enë'.

16 Gul-la' neda' ca naca yöl-la' huáca zxön quiu'.  
Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',  
tu' naca cazu' Li' Nu run chi'i neda',  
en nacu' Nu rácalen neda' cate' bi raca quia'.

17 ¡Naca cazu' Li' Nu rutipa ládxa'a!  
¡Gul-la' quiu' yöl-la' ba,  
tu' nacu' Li' Nu run chi'i neda', Dios, en Nu nadxí'i neda'!

## 60

1 Nusán no'o netu', Dios, en nuzötju' netu'.

Buécja queétu' na'a, en gúcalen netu'.

2 Ben cazu' ga gudödi budó' zxu', en gyalaj luyú.

Bun luyú ni tu' chizóa iguinnaj.

3 Sizxöni busaca' zi'u bönachi quiu'.

Le guca queétu' guca tsca bugui'ju' netu' xis uva nal-la  
le ben ga yöjchégu'tu' ca tu bönni' nazúdxinë'.

4 Bunödzu' quégaca nupa tadxi Li' tu lari' ulu'chisa,  
le söjácálen cate' bi raca quéguequi,

5 para ulu'lágaca nupa na' nadxí'i quézinu'.

Len yöl-la' huáca zxön quiu' busölá netu', en bubí'i didza' cate' rulidztu' Li'.

6 Lu le naca lá'ayi queë' bë'ë didza' Dios, gunné':

“Uzi'a xibé, en quísia' xiyúgaca bönachi Siquem, en urixa' luyú dë cuita yegu Sucot.

7 Nequi quia' xiyúgaca bönachi Galaad, enca' xiyúgaca zxi'ini xi'sóë' Manasés.

Naca ca tu le rusubín icja' xiyúgaca zxi'ini xi'sóë' Efraín.

Xiyúgaca zxi'ini xi'sóë' Judá naca ga rinná bë'a.

8 Xiyúgaca bönachi Moab naca ca tu ga riguibi na'a,

ate' cu'a löla' uléaja' xiyúgaca bönachi Edom.

Cödxi'a tu' uxicja' bönachi Filistea.”

9 ¿Nuzxi caz gaca ichë' neda' lu yödzo zoa zö'ö idú gásibi'ilö le run chi'i yödzo na'?

¿Nuzxi caz ichë' neda' lu xiyúgaca bönachi Edom?

10 ¿Naru' cabí nusán ládxi'u netu', Dios?

¿Naru' cabí tséajlenu' bönni' queétu' röjáquië' gudil-la?

11 Gúcalen netu' cate' tíl-lalentu' nupa ridíl-lalen netu',

tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru'

tu' uxicja' cazë' Lë' nupa ta'díl-lalen netu'.

## 61

1 Ruzé nagu' le rulidza' Li', Dios.

Ruí'i ládxi'u le rinábida' Li'.

2 Ga ni zoa' zi'tu' ga dë ladza' rulidza' Li' tu' rudú ládxa'a.

Guchë' neda' ga zoa Nu na' naca ca tu guiöjto'o, Nu na' nál-latërö ca neda'.

3 Nacu' Li' Nu run chi'i neda'.

Nacu' Nu rácalen neda' cate' zoa nu ribía no neda'.

<sup>4</sup>Bè' lataj sóatica'sa' ga zoa cazu' Li'.

Bè' lataj sóalena' Li', guna' neda' ca tunba' bõrado' ta'yázaba' zخان xílaba' yõjede.

<sup>5</sup>Biyõn quézinu' Li' le guzxí' lu na'a guna' quiu' Li', Dios.

Benu' ga nequi quia' le runõdzju' quégaca nupa tadxi Li'.

<sup>6</sup>Gunu' ga soë' xidzé bõnni' na' rinná bè'è uláz quiu'.

Zián iz soë' ibanë'.

<sup>7</sup>Sóatica'sè' lo' Li', Dios.

Bè' queë' yõl-la' dxi'i ladxi', en le naca idútë li, yugu' le ilún chi'i lè'.

<sup>8</sup>¡Gúl-latica'sa' yõl-la' ba que Lo',

para gaca guna' tu tu dza le guzxí' lu na'a!

## 62

<sup>1</sup>¡Tuzë' Dios ruzxõni ládxa'a, en rizë ládxa'a Lë'!

¡Lë cazë' rusölë' neda'!

<sup>2</sup>¡Tuzë' Lë' rapa chi'ë neda', en rusölë' neda'!

¡Ruzóë' neda' tsutsu, ate' biti' gaca nu uzõtaj neda'!

<sup>3</sup>¿Gáca'xte caz güi' ládxi'li' ucúl-lali' neda'?

Rë'ënisili' uzõtjali' neda' ca tu zõ'õ chizóa iguúnnaj,

o ca tu lë'aj yaga le chinatëbi.

<sup>4</sup>Rë'ënisili' uzõtjali' neda' ga ni tunë' neda' bal.

Ruzí'ili' xibé yugu' didza' biti' nácatë.

Ruí'ili' dxi'a didza' láchui'sõ,

pero lu icja ládxi'do'oli' rudidza' yúdxili' neda'.

<sup>5</sup>¡Tuzë' Dios ruzxõni ládxa'a,

en runa' löza Lë'!

<sup>6</sup>¡Tuzë' Lë' rapa chi'ë neda', en rusölë' neda'!

¡Ruzóë' neda' tsutsu, ate' biti' gaca nu uzõtaj neda'!

<sup>7</sup>¡Tuzë' Dios rusölë' neda', en runë' ga naca' bica' ba!

¡Dios nuzóë' neda' tsutsu, en rapa chi'ë neda'!

<sup>8</sup>Libí'ili', bõnachi, buli'zxõni ládxe'ë Dios yúgu'të dza.

Buli'siyõnnë' yugu' le raca queëli', tu' run chi'i cazë' rë'u.

<sup>9</sup>Le nácatë nácacaca yúgutë bõnachi ca tu bö' ridõdisõ,

en biti' bi nazáca'gaca nupa na' nadéli'gaca lataj lo.

Tu lu zxigóns biti' bi nál-lí'guequinë'.

Nácacagarë' dzá'asõ ca tu bö' riguéla'siru'.

<sup>10</sup>Biti' uzxõni ládxi'li' bi idéli'li' len yõl-la' nál-la queëzili'.

Biti' uzí'ili' xibé le cuanli'.

Channõ gata' queëli' yõl-la' tsahui', biti' güi' ládxi'li' le.

<sup>11</sup>Tu luzuísõ bè'è didza' Dios.

Chopa luzuí biyõnda' ca naca lë ni rnna:

“Nápatërë' Dios yõl-la' huáca,

<sup>12</sup>ate' zóatica'sõ yõl-la' dxi'i ladxi' queë'.”

Ubí'i cazu', Xan, quégaca bõnachi tsca naca le núngaca.

## 63

<sup>1</sup>Dios, nacu' Dios quia', ate' idú ládxa'a ruguilja' Li'.

Ribidxi ládxa'a Li', ate' idútë le naca' rizé ladxi' Li'.  
 Zoa' tu luyú bidxi ga ni rudú ládxa'a, ate' biti' bi dë nisa.  
<sup>2</sup> Ben ga ilé'eda' Li' lu lataj ga na' zoa cazu',  
 para ilé'eda' yöl-la' huáca quiu', en yöl-la' bení' quiu'.  
<sup>3</sup> Tu' nácatërö dxi'a yöl-la' dxi'i ladxi' quiu' ca yöl-la' na'bán caz.  
 Que lë ni na' cu'a Li' yöl-la' ba.  
<sup>4</sup> Guía' Li': "Xclenu" tsanni ni zoa' nabana'.  
 Uchisa' na'a, en ulidza' Lo'.  
<sup>5</sup> Ruhüölaj rudzé'e icja ládxi'da'ahua' le nácatërö dxi'a,  
 ate' lu yöl-la' rudzeja quia' rigu'a Li' yöl-la' ba.  
<sup>6</sup> Røjneda' Li' cate' déa' lu le ráti'da'.  
<sup>7</sup> Rizá' ládxa'a ca nacu' cate' rina'sa' yëla.  
 Rácalen cazu' neda',  
 en tu' run chi'u neda', lu yöl-la' rudzeja quia' rul-la' quiu'.  
<sup>8</sup> Nazõn cazu' Li' bö' naca caza'.  
 Rizõn cazu' Li' neda',  
<sup>9</sup> pero ila'yaza lataj chul-la  
 nupa tē'ëni iluti neda'.  
<sup>10</sup> Ilátigaca lu guié tuchi'.  
 Ilágugaca bö'cu' zuga' léguequi.

<sup>11</sup> Nu rinná bē' uláz queë' Xanru' udzeja ladxi' lahuë' Dios.  
 Ulu'zì' xibé yúgu'të nupa tu'zxõni ladxi' Lë',  
 tu' usayaj cazë' Lë' ru'igaca nupa ta'zì' yë'.

## 64

<sup>1</sup> Dios, buzé nagu' chi'a le rinabi yúdxida' Li',  
 para gun chi'u yöl-la' na'bán quia' tu' rádxida' bi gun nu ridíl-lalen neda'.  
<sup>2</sup> Bucachi' neda' para cabí bi ilún quia' bagáchi'sö nupa tuá' dö',  
 en para cabí ila'bía di'ë neda' bönni' tutië' bönachi.  
<sup>3</sup> Náçagaca lúdxigaquië' ca yugu' guié tuchi',  
 ate' náçagaca didza' zì' tu'ë ca yugu' yaga lahui tuchi'.  
<sup>4</sup> Bagáchi'sö tu'zë yugu' yaga lahui tuchi' na'  
 para ilunë' huë' nupa biti' bi nabága'gaca.  
 Tsárido'os tu'zë léguequi, en biti' bi tádxinë'.  
<sup>5</sup> Biti' ca' tu'cá'anë' le naca dö' tē'ënë' ilunë'.  
 Tu'ë didza' ca gaca ulu'cáché'ë yugu' du yalaj quégaquië', ta'nnë':  
 "¿Nuzxi caz gaca ilé'e yugu' du na'?"  
<sup>6</sup> Tunë' didza' ca naca le naca dö' ilunë', ta'nnë': "Chinabá'a le gunru'."  
 Tu'cáchi'gaquië' le ta'zá' ládxi'ë, en le ta'bequi icjë'.

<sup>7</sup> Uzal-lë' Dios tu yaga lahui tuchi' le ideli' légaquië'.  
 Tsárido'os gunë' légaquië' huë'.  
<sup>8</sup> La' didza' tu'isë' ilún ga tseajchégu'gaquië'.  
 Lu yöl-la' rubani quéguequi ulu'tá ícjaguequi nupa ila'lé'e légaquië'.  
<sup>9</sup> Ní'irö yúgu'të bönachi iladxi Dios,  
 en ulu'siyõn luzé'eguequi ca naca le nunë' Dios,  
 en ila'zá' ládxi'gaca ca naca lë na' nunë'.  
<sup>10</sup> Nu bönni' tsahui' uzi'ë xibë' Xanru', en gunë' löza Lë'.  
 Yúgu'të nupa náçagaca idú ladxi' ulu'zì' xibë'.

## 65

<sup>1</sup> Dios, nupa nacuá' yödzö Sión ila'gú'u Li' yöl-la' ba,  
 en ilunna quiu' le gula'zì lu nē'eguequi,  
<sup>2</sup> tu' riyõn quézinu' Li' cate' tu'lidza Li',  
 ate' yúgu'tē bõnachi ila'dxín lo'.  
<sup>3</sup> Tun nigui neda' dul-la' nuna',  
 pero runiti lo cazu' netu' ca naca le ridá'baga'tu' Li'.  
<sup>4</sup> Bica' ba nupa nabõ cazu' quiu', en nulidzu' quiu',  
 para ila'cuá' yugu' lataj lá'ayi quiu'.  
 Huõlaj udz'éetu' le nácagaca dxí'a yú'ugaca lidxu',  
 enca' le yú'ugaca yudo' lá'ayi quiu'.  
<sup>5</sup> Tu' nacu' tsahui' rubi'u didza', en runu' yugu' le zxõn le tácalen netu'.  
 Naca cazu' Dios Nu rusölá netu'.  
 Nupa nacuá' idútē yödzölió ulu'zxõni ladxi' Li',  
 enca' nupa nacuá' zi'tu' ia'tsölá'alõ nísado'.  
<sup>6</sup> Len yöl-la' huáca quiu' nucu'u yugu' guí'a zxõn,  
 le naca bē'gaca nál-latērõ cazu' Li'.  
<sup>7</sup> Ruzóa dxíu' le riyasa ridxía lu nísado', en le ru'u bö que.  
 Ruzóa dxíu' bõnachi cate' tu'tsatsa.  
<sup>8</sup> Bõnachi idútē yödzölió tadxi Li' ni'a quégaca le zxõn nunu'.  
 Le run cazu' Li' tun ga tu'dzeja bõnachi idapa la'a yödzölió.  
<sup>9</sup> Ruí'i ládXu'u luyú, en risõl-lu'u nisa guiõj.  
 Runu' ga ruhuõaca yu ya'a.  
 Nucu'u luyú na' yugu' yegu yúdzugaca nisa zila,  
 le run ga dētica'sõ zxa'-za, tu' caní raza ládXu'u Li'.  
<sup>10</sup> Risõl-lu'u nisa guiõj gapa dēgaca na, en rusubisu' gapa chinadúz.  
 Ruúnu' yúludo' luyú zidzaj, en runu' ga ta'gula guixi' cuando'.  
<sup>11</sup> Runu' ga rulá' yõdx yana' le nadúz luyú ni tu iz tu iz,  
 en ga zóatica'sõ le ilē'aj ilágugaca bõnachi.  
<sup>12</sup> Nacuá'aba' böa'-bēdxi la' guixi',  
 ate' tu'dzeja bõnachi yugu' lu guí'ado'.  
<sup>13</sup> Gapa naca lachi' nacuá'aba' bö'cu' zxila',  
 ate' dxíada' zxa' xtila la' yēla.  
 Lu yöl-la' rudzeja quéguequi ta'bõdxi'a,  
 en tul-la bõnachi quiu'.

## 66

<sup>1</sup> ¡Guli'güi' zidzaj didza' lahuë' Dios  
 lu yöl-la' rudzeja queëli' yúgu'tēli' zóali' yödzölió!  
<sup>2</sup> ¡Guli'gul-la ca naca yöl-la' ba que Lē!  
 ¡Guli'cu'ē yöl-la' ba!  
<sup>3</sup> Guli'guié' Dios: "¡Zxõntērõ nácagaca le nunu'  
 tu' naca zxõntērõ yöl-la' huáca quiu'!"  
 Nupa biti' ta'lé'e Li' dxí'a ulu'lu'i cuini  
 ca nupa tun ca rnna xtídzu'u.  
<sup>4</sup> Yúgu'tē nupa nacuá' yödzölió ilún Li' zxõn,  
 en ilúl-la yöl-la' ba quiu'.  
 Ilúl-la yöl-la' ba que Lo'.  
<sup>5</sup> Guli'dá ilé'eli' yugu' le nunē' Dios.  
 Nayēpisētērē' Dios lu le runē' quégaca bõnachi.

6 Benë' ga böäca ca luyú bidxi ga dë nísado'.  
 Gula'dödë' gatsaj lähui'lö yegu, ta'zë'esö ní'agaquië'.  
 Ní' udzëjade'eru' ca náquië' Lë'.  
 7 Len yöl-la' unná bë' queë' rinná bë'tica'së'.  
 Ruyútica'së' bönachi yúgu'të yödzö.  
 Biti' ral-la' ilún ba zxon cuínguequi nupa ta'dá'baga' xtídzë'ë.

8 ¡Guli'gún zxonë' Dios queëtu', libí'ili' bönachi yúgu'të yödzö,  
 en guli'cu'ë yöl-la' ba gáti'tës!  
 9 ¡Run cazë' Lë' ga zóaru' nabanru',  
 en biti' ru'ë lataj cuila ní'atu'!

10 Guzxí' bë' casu' netu', Dios.  
 Buchi'u netu' ca run nu ruchi'a guíë plata lu guí'.  
 11 Bë'u lataj bidzuntu' lu du yalaj.  
 Busubágu'u netu' tu yua' zi'i.  
 12 Benu' ga gula'libë' icjtu' bönni' dxíagaquië'-ba' böa'.  
 Gudóditu' lu guí', en lu nisa,  
 pero guchë' casu' netu' tu lataj ga bölj budzé'etu'.  
 13 Tsu'a lidxu', en cu'a-ba' lo' böa'do' uzéguí'a-ba' lo'.  
 Guna' lo' Li' le guzxí' lu na'a guna',  
 14 lë na' bë'a didza' que,  
 le gunniá' cate' ni' riguí'i rizáca'a.  
 15 Cu'a-ba' lo' Li' böa'-bëdxi renni' uzéguí'a-ba' lo',  
 tsözxön len dzön quégacaba' chivo biguiú'.  
 Gútia'-ba' lo' yugu' bëdxi, en yugu' chivo biguiú'.

16 Guli'dá uzë nágali', yúgu'tëli' rádxili'-në' Dios,  
 ate' usiyönda' libí'ili' yugu' le benë' le gulácalen neda'.  
 17 Len ruá' cuinsa' bulidza' Lë',  
 en bena' Lë' zxon len lúdxá'a.  
 18 Channö rucácha'a le naca dö' lu ládxi'da'ahua',  
 biti' yönnë' Xanru' Dios didza' gu'a,  
 19 pero le nácatë biyönnë' Dios didza' bë'a.  
 Buzë naguë' cate' bulidza' Lë'.

20 ¡Yöl-la' ba Dios!  
 ¡Biti' gudá'baguë'ë neda' cate' bulidza'-në',  
 en biti' bugúë' yöl-la' nadxí'i queë' neda'!

## 67

1 Xantu' Dios, buzá' ladxi' queëtu', en ben ga gaca dxi'a queëtu'.  
 Lu yöl-la' dxi'i ladxi' quiu' buyú netu',  
 2 para gaca bë' le ré'ënu' guntu' yödzölió ni,  
 en para ila'nözi bönachi yúgu'të yödzö ca naca yöl-la' rusölá quiu'.

3 Ral-la' ila'gú'u bönachi Li' yöl-la' ba, Dios.  
 Yúgu'të bönachi ral-la' ila'gú'u Li' yöl-la' ba.  
 4 Ral-la' ulu'dzeja bönachi yúgu'të yödzö,  
 en ilúl-la' lu yöl-la' rudzeja quéguequi.  
 Tu' uchi'a usöröu' bönachi ca naca le naca tsahui',

<sup>5</sup>ral-la' ila'gú'u Li' yöl-la' ba bönachi, Dios.  
Yúgu'tè bönachi ral-la' ila'gú'u Li' yöl-la' ba.

<sup>6</sup>Yödxí yana' runödzej luyú ni.  
Dios queëru' runë' ga raca dxi'a queëru'.  
<sup>7</sup>Runë' Dios ga raca dxi'a queëru',  
para iladxi Lë' yúgu'tè nupa nacua' yödzölió.

## 68

<sup>1</sup>Raca ládxi'ru' chasë' Dios, en usulásië' nupa ta'díl-lalen Lë',  
en gunë' ga ulu'zxunnaj nupa bití' ta'lé'e Lë' dxi'a.

<sup>2</sup>Ca rulaga tu bö' recja dzön, ca' bulaga léguequi.

Ca na' ruúna' lu guí' quízxi'ba' buz,  
ca' ila'niti nupa tuá' dö' lahuë' Dios.  
<sup>3</sup>Ulu'dzeja nupa nácgaca tsahuí', en ulu'z'í' xibë' Dios.  
Lu yöl-la' rudzeja quéguequi ulu'z'í' xibë'.

<sup>4</sup>¡Guli'gul-la queë' Dios!  
¡Guli'gul-la yöl-la' ba que Lë'!  
Buli'pá'a nōza ga tödë' gapa dë lataj.  
¡Nazí'i lë' Xanru'!  
¡Buli'dzeja lahuë' Lë'!

<sup>5</sup>Náquië' ca xúzgacabi' bi'i uzëbido',  
enca' Nu ruchi'a rusörö quégacanu nigula uzëbi.  
Caní náquië' Dios ga na' zoë' lataj lá'ayi queë'.  
<sup>6</sup>Rucu'ë Dios nupa nagá'anagaca bayechi' tu yu'u.  
Rubéajë' nupa nadzúngaca, en runë' ga raca dxi'a quéguequi,  
pero ulu'gá'ana tu luyú bidxi nupa ta'dá'baga' Lë'.

<sup>7</sup>Yöjnöru cazu' lógaca bönachi quiu', Dios,  
cate' guchë'u léguequi la' guixi' ga na' dë lataj.  
<sup>8</sup>Gudödi budó' zxu' dza ni'.  
Lësca' gula guiöjsiu' lahuë' Dios.  
Guzxizi guí'a Sinaí lahuë' Dios quégaca bönachi Israel.  
<sup>9</sup>Benu' ga gulaj guiöjsiu', Dios.  
Benu' ga böaca ya'a xiyú' ga ni' guca yu bidxi.  
<sup>10</sup>Yöjcuá' nupa néquiguequi quiu' luyú na'.  
Lu yöl-la' dxi'i ladxi' quiu', Dios,  
bucözu' le gácalen nupa nácgaca yechi' luyú na'.

<sup>11</sup>Bë' cazë' didza' Xanru' Dios.  
Ta'guísinu nigula zían didza' dxi'a queë', ta'nnanu:  
<sup>12</sup>“¡Ta'zxúnnajë'! ¡Ta'zxúnnajë' bönni' ta'nná bë'ë,  
enca' bönni' röjáquië' gudil-la guizxi yu quégaquië'!”  
Nigula gula'bózanu lídxigacanu bulu'z'ínu xibé le gutá' quégaquië'.

<sup>13</sup>Sal-la' bucachi' loli' gapa tun chí'ili' bö'cu' zxila',  
gáculi' le naca lachi ca nácgacaba' gu'dödo' néquiguequiniba' guié plata,  
en xitúbigacaba' néquiguequini guié oro.

<sup>14</sup>Cate' bësilásië' Dios bönni' na' gula'nná bë'ë lu guí'a Salmón,  
benë' ga gula guiöj bögui' lu guí'a na'.

15 Nequi queë' Dios guí'a Basán.  
Naca guí'a Basán na' tu guí'a zxön.

16 ¿Bizx que ruzxé'eli', yugu' guí'a zxön?  
¿Bizx que ruzxé'eli' guí'a na' guzé ládxe'ë Dios tsöjsóë' ga na'?  
Le nácatë tsaz soë' Dios ni'.

17 Gayuá', en gayuá' nácgaca carreta que gudil-la queë' Dios.  
Rizé'ë Xanru' lu guí'a Sinaí ga na' tseajtsazië' lataj lá'ayi queë'.

18 Buëpu' yehua' yubá richë'u bönachi zían gula'dzúngaca.  
Nu'u yugu' le bulu'nödzej bönachi quiu',  
en le gulunna quiu' nupa ta'dá'baga' Li',  
para tsöjsóë' Dios ni' tsaz.

19 ¡Yöl-la' ba Dios, Nu ruá' sua'ru' tu dza tu dza!  
¡Náquië' Dios Nu rusölá rë'u!

20 ¡Dios queëru' rusölë' rë'u!  
¡Rusölë' Xanru' Dios rë'u lu yöl-la' guti!

21 Le nácatë Dios udxíë' huë' ícjagaca nupa ta'dá'baga' Lë'.  
Udxíë' huë' icjë' bönni' bití' gusanë' ca naca dö' ru'ë.

22 Ru'ë didza' Xanru', rnnë': "Ubéaja' léguequi lu guí'a Basán,  
en ubéaja' léguequi lu nísado',

23 ate' ulíbili' léguequi ga idxintë irúaj rön quéguequi,  
ate' ilé'ajba' zxiculi' xichöngaca nupa ta'díl-lalen libí'ili'."

24 Ta'lé'e yúgu'të bönachi nupa ta'dalen Li', Dios.  
Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

25 Nupa tul-la, en nupa ta'guínnaj lé'egaca bihuël-la, ta'dá ni',  
ate' bí'i nigula ra'bando' tunbi' léguequi tsözxön, ta'gápabi' lé'egaca guídido'.

26 Buli'lidzë' Dios dxi'a tsáhui'do' gapa na' rudúbili' queë',  
tu' náquië' Xanru', libí'ili' zxi'ini xi'sóë' Israel.

27 Nacu'ë zxi'ini xi'sóë' Benjamín ga na', bönni' gúcarë' cuidi', ate' ta'nná bë'ë.  
Bönni' lo quégaquië' zxi'ini xi'sóë' Judá nútsa'gaquië' ladjagaquië',  
enca' ladjagaquië' bönni' lo quégaquië' zxi'ini xi'sóë' Zabulón, en Neftalí.

28 Buluí'i lahui yöl-la' huáca quiu', Dios.  
Buluí'i lahui yöl-la' huáca quiu', Dios, tu' chibenu' zían le gulácalen netu'.

29 Tu' dë yudo' quiu' lu yödzo Jerusalén,  
bönni' ta'nná bë'ë ila'ché'ë ni' le ilunnë' quiu'.

30 Buzé le bach bönachi yödzo na' nácgaca ca böa' guixi',  
enca' bönachi yugu' yödzo nácgaca ca yugu' bëdxi tsözxön len zxi'iniguequi.  
Tu'libi bönachi yechi' tu' ta'zë ládxi'gaca dumí.  
Bësilási nupa na' ta'yaza ladxi' rójaca gudil-la.

31 Bönni' gubáz quégaca bönachi Egipto ila'dxinë' lo'.  
Bönni' Etiopía ila'chisa ná'agaquië' lo', Dios.

32 ¡Guli'gul-la queë' Dios, bönachi yúgu'të yödzo!  
¡Guli'gul-la yöl-la' ba queë' Xanru'!

<sup>33</sup> Rō'ë yehua' yubá xitsá'tërö, le zoa caz dza ni'te.  
Buli'yútsöca', ru'ë zidzaj didza', en naca chi'ë ca guziú' rinnë.

<sup>34</sup> ¡Guli'gún zxönë' Dios!  
Yöl-la' nayëpisë queë' rusubaga' bönachi Israel.  
Yöl-la' huáca zxön queë' nalá' lúzxiba xitsá'.

<sup>35</sup> Rubániru' ca nacu' Li', Dios, lu lataj lá'ayi quiu'.  
Runnu' quégaca bönachi quiu' yöl-la' nal-la, en yöl-la' huáca.

Náquië' Dios quégaca bönachi Israel.  
¡Yöl-la' ba Lë' Xanru' Dios!

## 69

<sup>1</sup> Busölá neda', Xana' Dios,  
tu' raca quia' tsca nabága'a nisa ga ridxintë ruchicja' nisa.  
<sup>2</sup> Raca quia' tsca ruhuötja' ga rë' lu guna', en biti' zoa ga gaca uliba'.  
Zoa' ca tu lu nisa zila, en chizóa uchicja' nisa.

<sup>3</sup> Rudú ládxa'a tu' rulidza' nu gácalen neda', ate' da' lubá'a.  
Chirichul-la guiöj lahua' tu' ruyúa' ga guídu' dusöló' neda'.

<sup>4</sup> Nayántërö ca guitsa' icja' nupa biti' ta'lé'e neda' dxi'a,  
en biti' bi nuna' quéguequi.  
Nál-lagaca nupa ta'díl-lalen neda', en tē'ëni iluti neda',  
en biti' bi nuna' quéguequi.  
Tunë' bayúdx ubí'a dumí le cabí gulana'.

<sup>5</sup> Nöz quézinu' Li', Dios, yöl-la' canöz quia',  
en biti' nagachi' lo' Li' dul-la' nuna'.

<sup>6</sup> Biti' gu'u lataj nupa tu'zxöni ladxi' Li' ulu'tuí'i ni'a quia' neda',  
Xana' Dios nayëpisëtëru'.

Biti' gu'u lataj nupa tun Li' zxön ila'gá'ana cá'asö ni'a quia',  
Dios quégaca bönachi Israel.

<sup>7</sup> Tu' nadxí'ida' Li' tu'lidza ditjë' neda',  
en que lë ni na' rutuí'ida'.

<sup>8</sup> Naca' ca tu bönni' zi'tu' lógacabi' bi'i böcha'a,  
en ca tu bönni' zi'tu' lógaquië' di'a dza quia'.

<sup>9</sup> Tu' ruí'i ládxa'a yudo' quiu' régui rilá ládxi'da'ahua'.  
Naca ca tu'lidza ditaj neda' nupa tu'lidza ditaj Li'.

<sup>10</sup> Ruzötaj cuina', en runa' gubasa,  
en que lë ni na' tu'didza' yudxi neda'.

<sup>11</sup> Rácua' lari' cá'asö ca run nu ribödx yechi',  
ate' tu'titaj neda'.

<sup>12</sup> Ta'nnë' quia' yugu' la' nöza,  
ate' nupa nazúdxigaca tul-la ca naca quia',

<sup>13</sup> pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'  
tu' nadxí'ide'enu' neda',  
en tu' guzxí' lu no'o usöló' neda'.

<sup>14</sup> Guléaj neda' para cabí huötja' lu le naca ca guna'.  
Ben ga ulá' lu ná'agaca nupa ta'díl-lalen neda',



en lu le naca ca nisa zila le chizóa ibaga' neda'.

15 Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',  
enca' cabí huötja' tu lu yeru ba.

16 Bubi'i didza', Xan, tu' nacu' dxi'i ladxi',  
en tu' ruhuéchi' ládXu'u neda', gudá quia'.

17 Biti' ucachi' cuinu' lahua' neda', huen dxin quiu'.

¡RÖ'a böniga! ¡Gudáchi gúcalen neda'!

18 ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

19 Nöz quézinu' Li' ca tu'didza' yudxi neda',

en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'të nupa biti' ta'lé'e neda' dxi'a.

20 Rudú ládxa'a tu' tu'didza' yudxi neda', en biti' bi gaca guna'.

Gulöza' nu huéchi' ladxi' neda', pero cuntú nu guzóa.

Gú'unida' nu huë tsahui' neda', pero cuntú nu bidzöli.

21 Cate' guduna' bulu'gahuë' neda' tu le silá',  
en cate' gubidxa' nisa, bulu'gui'jë' neda' nupe zi.

22 Ben ga huöáca laní quégaquië' ca tu le sön légaquië',  
en ben ga huöáca le tu'zi'ë xibé ca tu le gun ga ila'chixi ila'níguinë'.

23 Ben ga ichul-la guiöj lógaquië' para cabirö ila'lé'enë'.

Ben ga ila'zéchutica'sö cúdzu'gaquië' zXan yua' nuá'gaquië'.

24 Busubaga' légaquië' lu yöl-la' rilé quiu',

en bë' quégaquië' yöl-la' ridzá'a quiu'.

25 Ben ga cuntú nu soa ládZagaquië',  
en ga bíti'rö nu soa lu yu'u lídxigaquië'.

26 Ta'zóa régu'ë nupa na' benu' léguequi xiguia'.

Tu'siyönnë' ca ta'guí'i ta'zaca' nupa na' nunu' léguequi huë'.

27 Buzúaj lu guichi yugu' dul-la' tunë',

en biti' gu'u légaquië' lataj ila'déli'në' yöl-la' rusölá quiu'.

28 Busulu lágaquië' nazúajgaca lu guichi quégaca nupa nabángaca.

Biti' gu'u légaquië' lataj ila'bábalenë' nupa náCagaca tsahui'.

29 Neda' riguí'i rizáca'a, en rudú ládxa'a.

Guchisa neda', Dios, en busölá neda'.

30 ¡Cu'a-në' yöl-la' ba Dios len tu le gul-la'!

¡Guna' Lë' zXön, en guía'-në': "Xclenu"!

31 Chaza ládXë'ë Xanru' Dios lë ni

ca raza ládXë'ë-ba' böa'-bëdxi rútia'-ba' lahuë',

o ca raza ládXë'ë-ba' tuba' bëdxi zXön chinagúlaba'.

32 Nupa ta'guí'i ta'zaca' ila'lé'eni lë ni, en ulu'dzeja.

Ila'dipa ládxi'gaca nupa tu'guilaj Dios.

33 Ruzë naguë' Xanru' Dios nupa ta'yadzaj ta'yudxi,

en biti' ral-la ládXë'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni,

enca' nísado', en yúgu'të le nacuá' tu tu lataj na'!

<sup>35</sup> Usölä cazë' Dios bönachi Sión,  
en uchisë' yugu' yödzo quégaca zxi'ini xi'sóë' Judá.  
Ila'cuá' bönachi queë' ga na', ate' guequi quéguequi luyú na'.  
<sup>36</sup> Zxi'ini xi'sóagaquië' huen xichinë' ila'z'ibi' luyú na',  
ate' ila'cuá'tica'sö ni' nupa nadxi'igaca Lë'.

## 70

<sup>1</sup> ¡Busölä neda', Dios!  
¡Gudáchi gácalenu' neda', Xan!  
<sup>2</sup> Ben ga ulu'tuí'i, en ila'bö' böniga nupa na' tē'ëni iluti neda'.  
Ben ga ulu'huécja, en ulu'gá'ana cá'asö nupa na' tē'ëni gaca bi gaca quia'.  
<sup>3</sup> Ben ga ulu'huécja lu yöl-la' rutuí'i quéguequi  
nupa na' tu'titaj neda', ta'nná: "Ja, ja."  
<sup>4</sup> Ben ga ulu'dzeja, en ulu'z'í' xibó' yúgu'të nupa tu'guilaj Li'.  
Ben ga iluí'tica'sö didza' nupa ta'dxi'i yöl-la' rusölä quiu', ila'nná:  
"¡Zxöntëro náquië' Dios!"  
  
<sup>5</sup> Neda' nacuí'da', en biti' bi gaca guna'.  
¡Gudáchi gácalenu' neda', Dios!  
Nacu' Nu rácalen neda', en Nu rusölä neda'.  
¡Biti' ca' tsenu' guídu' quia', Xan!

## 71

<sup>1</sup> Nuzóa cazu' neda' dxi'a tsáhui'do' ga na' zu', Xan.  
¡Biti' gu'u lataj utuí'ida'!  
<sup>2</sup> ¡Tu' nacu' tsahui' gúcalen neda', en busölä neda'!  
¡Buzë' nagu' neda', en busölä neda'!  
<sup>3</sup> Nacu' le uzóa neda' tsutsu,  
en le gun chi'i neda' ga gaca ucachi' cuina'.  
Chigunná bé'enu' nu usölä neda' tu' nacu' Nu ruzóa neda' tsutsu,  
en Nu run chi'i neda'.  
<sup>4</sup> Dios quia', busölä neda' lu na' nu ruá' dö',  
en lu na' nu ridá'baga' Li', en run dzatsa.  
<sup>5</sup> Tuzu' Li' runa' löza, Xan.  
Ruzxöni ládxa'a Li' ga gudéla'të naca' bí'ido'.  
<sup>6</sup> Ruzxöni ládxa'a Li' ga gudéla'të gulja',  
tu' guzóalen cazu' neda' cate' ni' buzóanu xiná'a neda'.  
¡Cú'utica'sa' Li' yöl-la' ba!  
<sup>7</sup> Zián nupa tu'bani ca naca quia',  
tu' run chi'i cazu' Li' neda'.  
<sup>8</sup> ¡Rigú'utica'sa' Li' yöl-la' ba,  
en tu dza tu dza rulu'a lahui yöl-la' ba quiu'!  
<sup>9</sup> ¡Biti' usán no'o neda' na'a, ni naca' bönni' gula!  
¡Biti' ucá'anu' neda' na'a cate' ni rudú ládxa'a!  
<sup>10</sup> Tuí'i didza' nupa biti' ta'lé'e neda' dxi'a ca gaca bi ilún quia',  
ate' tun tuz xtídza'gaca nupa tē'ëni iluti neda'.  
<sup>11</sup> Ta'nná: "¡Nusán në'ë Dios lë'!  
¡Gulí'dá sönru'-në' tu' cuntu nu zoa gácalen lë'!"  
<sup>12</sup> ¡Dios, biti' su' zi'tu' ga ni zoa'!  
¡Dios quia', gudáchi gácalenu' neda'!

13 Ben ga ulu'tuí'i, en ila'niti nupa tē'ēni iluti neda'.  
Ben ga ulu'tuí'inē', en ila'bō'ē bōniga bōnni' tē'ēnē' ilu'ē dō' quia'.

14 ¡Neda' gúntica'sa' löza Li',  
en cú'utica'sa' Li' yöl-la' ba!

15 Idú dza usiyōnda' bōnachi nacu' tsahui',  
en rusöló' yúgu'tē bōnachi.  
Biti' nōzda' bal-laxi luzuí busöló' neda'.

16 ¡Gu'a didza' ca nácagaca le zxön benu' Li', Xana' Dios!  
¡Usiyōnda' bōnachi tuzu' Li' nacu' tsahui'!

17 Dios, rusédinu' neda' ga gudéla'tē ni' naca' bí'ido',  
ate' ga ridxintē na'a dza ruá'a didza' ca nácagaca le zxön nunu'.

18 Na'a naca' bōnni' gula, en chinagucha'.

¡Biti' usán no'o neda', Dios!  
Benna neda' lataj usiyōnda' yugu' zxí'ini xsoa' ca naca yöl-la' huáca quiu',  
ate' quíxjōi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxintē lúzxiba!  
¡Nunu' Li' yugu' le zxöntērō!  
¡Cúnturō nu zoa nu naca ca nacu' Li', Dios!

20 Gusöl-la' cazu' quia' yugu' le guca quia' le gulún neda' zi',  
pero ruúnu' neda' tsutsu,  
en le yúbölö uchisu' neda' para cabí gátia'.

21 Gunu' ga tsépisea',  
en huē tsahú'u neda' le yúbölö.

22 ¡Le nácate cu'a Li' yöl-la' ba, en gul-la' tu bihuël-la, Dios!  
¡Gul-la' ca runu' ca rnno', en nacu' Nu naca lá'ayi lógaca bōnachi Israel!

23 ¡Lu yöl-la' rudzeja quia' cōdxi'a cate' gul-la' quiu',  
en idú lādxa'a gul-la' tu' busöló' neda'!

24 ¡Idú dza gu'a didza' ca nacu' tsahui'!  
¡Tu'tuí'i, en ta'bō' baguí'i nupa gulé'ēni iluá' dō' quia'!

## 72

1 Dios, buzéajni'inē' bōnni' rinná bē'ē  
para gaca uchi'a usörōē' ca ruchi'a rusörōu' Li'.

Ben ga ilácagacabi' tsahui' zxí'inē' ca nacu' Li' tsahui'.

2 Bē'ē lataj uchi'a usörōē' quégaca bōnachi quiu' ca naca le naca tsahui',  
enca' quégaca bōnachi quiu' ta'guí'i ta'zaca'.

3 Ben ga ila'cuá' dxi'a tsáhui'do' bōnachi quiu' yugu' lu guí'a,  
en ilácagaca tsahui' yugu' lu guí'ado'.

4 Bē'ē lataj ubéajē' tsahui' nupa ta'guí'i ta'zaca' ladaj bōnachi quiu',  
en usölē' yugu' zxí'inigaca nupa ta'yadzaj ta'yudxi,  
en ucul-lē' nu ribía no léguequi.

5 Ben ga iladxi bōnachi quiu' Li' tsanni ni' soa gubidza,  
enca' tsanni ni' soa beo' ga idxintē dza udxi.

6 Ben ga gáquiē' bōnni' rinná bē'ē ca nisa guiōj ribixi lu guíxi'do',  
en ca yugu' guiōj gúpa'do' tu'subisa luyú.

7 Ben ga gaca dxi'a quégaca nupa nácagaca dxi'a yugu' dza inná bē'ē lē', en ila'cuá' dxi'a tsáhui'do' ga idxintē bítì'rō soa beo'.

8 Ben ga inná bē'ē idapa la'a yōdzōlió, ga naguela' ra' yegu Eufrates ga idxintē idútē luyú.

9 Ben ga ulu'zechu zxíbigaca lahuē' lē' nupa nacuá' luyú bidxi, en iladxi lē' nupa ta'díl-lalen lē'.

10 Ben ga ila'dxinē' lahuē' bōnni' ta'nná bē'ē luyú Tarsis en yugu' lu yōdzō, nuá'gaquiē' yugu' le ulu'nōdzjē' queē'.

Bōnni' ta'nná bē'ē luyú Sabá, en luyú Seba ilá'dxinē' bi ulu'nōdzjē' queē'.

11 Ben ga ulu'zechu zxíbigaquiē' lahuē' yúgu'tē bōnni' ta'nná bē'ē, en ilúngaca xichinē' bōnachi yúgu'tē yōdzō.

12 Usölē' nu riyadzaj riyudxi cate' ulidza lē', enca' nu riguí'i rizaca', en nu bitì' zoa nu gácalen nu na'.

13 Huéchi' ládxi'ē nupa nácagaca yechi', en nupa ta'yadzaj ta'yudxi, en gun chi'ē yöl-la' na'bán quégaca nupa nácagaca yechi'.

14 Usölē' léguequi lu ná'agaca nupa tun léguequi zi', en lu ná'agaca nupa tuá' dö',

en güi'i ládxi'ē léguequi cate' nu guē'ēni guti léguequi.

15 Soē' ibanē', ate' iluá'gaca bōnachi queē' oro que lu xiyúgaca bōnachi Sabá.

Ben ga ulu'lidza Dios bōnachi, ila'nábitica'sō Li' gácalenu' lē'.

Ben ga ulu'lidza lē' dxi'a tsáhui'do' idú dza.

16 Ben ga unōdzjada' zxoá' luyú queē', enca' yugu' lu guí'ado', le unōdzaj yōdxi yana' xiyúē' ca run guí'a Líbano.

Ben ga ila'yán nupa nacuá' ladzē' ca rō'ō guíxi'do' lu xiyúē'.

17 Ben ga tsōjnégaca le lē' ga idxintē dza udxi.

Ben ga gaca yöl-la' ba que lē' tsanni ni' soa gubidza.

Ben ga ila'nabi bōnachi Li' yúgu'tē yōdzō

gunu' ga gaca dxi'a quéguequi ca benu' queē' lē'.

Ben ga ila'gú'u lē' yöl-la' ba bōnachi yúgu'tē yōdzō.

18 ¡Yöl-la' ba Xanru' Dios, Dios quégaca bōnachi Israel!

¡Tuzē' Lē' runē' le túngaca ga rubániru'!

19 ¡Yöl-la' ba Lē' le naca lachi ga idxintē dza udxi!

¡Rizē ládxi'ru' ilí idútē yōdzōlió le naca bení' queē'!

¡Ca' gaca! ¡Ön, ca' gaca!

20 Chibudxi le rinábida'-nē' Dios neda', David, zxí'inē' Isaí.

## 73

1 Le nácatē runē' Dios ga raca dxi'a quégaca bōnachi Israel, nupa na' naca dxi'a tsahui' ládxi'do' guequi.

2 Ia'láti'sō guchixi guníguida'.

Ia'láti'sō tsōjdōda' tsölá'alö,

3 tu' buzzé'eda' nupa tun ba zxön cuínguequi, en tu' dēda' yöl-la' tsahui' quégaca nupa tuá' dö'.

4 Bitì' ca' téquinē' zi' bōnni' tu'è dö' na'.

Nácagaquiē' tsutsu, en nacu'ē dxi'a.

5 Bitì' ta'guí'i ta'záquē'ē ca ta'guí'i ta'zaca' ia'zica'rō bōnachi.

Bitì' ca' raca quégaequi' ca raca quégaca bōnachi yúbölö.

6 Naca yöl-la' run ba zxön cuini quégaquië'  
 ca tu le néquini oro dxía ícjagaquië'.  
 Yöl-la' rutsatsa quégaquië' naca ca zxágaquië' nácugaquië'.  
 7 Tu'zi'ë xibé le ta'dödi bë'ë të'aj tahuë',  
 en ta'zá' ládxi'gaquië' quégaca le zían le ila'déli'në'.  
 8 Tu'titjë' ia'zíca'rö bönachi,  
 en tu'ë didza' lu yöl-la' run ba zxön cuini quégaquië'.  
 Tun ba zxön cúngaquië',  
 en të'ënë' ila'bía nahuë' ia'zíca'rö bönachi.  
 9 Ta'nnë' queë' Dios zoë' yehua' yubá,  
 en tu'didza' yudxë' nupa nacuá' yödzölió.  
 10 Que lë ni na' ta'dá' bönachi queë' Dios légaquië',  
 en ta'yéajlë' didza' tu'ë.  
 11 Ta'nnë': "Biti' ca' nözinë' Dios,  
 en biti' ilé'e lë ni Nu na' zoa xitsá'alö."  
 12 Caní nácagaca nupa tuá' dö'.  
 Dëda' yöl-la' tsahui' quéguequi, en ta'zítica'sö ia'lati'.  
 13 ¿Naru' nítisö ben chi'i cuina' para gaca' dxi'a  
 en para cabí ibága'a dul-la'?

14 Dios, benu' ga gudí'i guzxáca'a idú dza.  
 Yugu' zila benu' neda' zí'.  
 15 La'tu' bë'a didza' ca nácagaca lë ni  
 guzxí' yé'eda' bönachi quiu'.  
 16 Que lë ni na' bë' ládxa'a tséajni'ida' lë ni,  
 sal-la' gúcada' böniga  
 17 ga bidxintë dza guyu'a yudo' quiu'  
 en guyéajni'ida' ca gaca quégaca nupa tuá' dö'.  
 18 Le nácate nuzú' léguequi ga ta'chixi ta'nigui,  
 en runu' ga ila'niti tsaz.  
 19 La' ila'nítitë,  
 en ila'yaza ga udxi quéguequi.  
 20 Nácagaca ca tu le rinetu' yëla le ridödi que cate' ritö yu.  
 Cate' chasu', Xan, la' udöditeu' léguequi tsölá'alö.  
 21 Cate' yöjdín icja' le nácagaca ca tu le silá',  
 en guzá' ládxa'a yugu' le gúquida' zí',  
 22 guca' tu' canöz, en biti' bi guyéajni'ida'.  
 Guca' ca tuba' böa' guixi' lo' Li'.  
 23 Zóatica'sa' lo' Li',  
 ate' rizón cazu' neda'.  
 24 Rigú'u yöl-lu'u neda' le rugú'u neda' nöza quiu',  
 en ga údxitë uzi'u neda', en gunu' neda' bal.

25 ¿Núzxirö zoa yehua' yubá nu gácalen neda'?  
 ¡Tuzu' Li'!

Tu' rácalenu' neda' cúnturö nu zoa yödzölió nu riquinda'.  
 26 Ricuidi' le naca', en rudú ládxa'a.  
 Le ruzóa tsutsu ládxi'da'ahua',  
 en le ruzí'tica'sa' xibé naca cazu' Li', Xan.  
 27 Le nácate ila'niti nupa tu'cá'ana Li'.

Usunítu' yúgu'tè nupa tu'zóa Li' tsölá'alö.  
 28 Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'  
 para ulu'a lahui yúgu'tè le nun cazu'!

## 74

- 1 Dios, ¿naru' tsaz nusán ládxi'u netu'?  
 ¿Riléde'enu' netu', bö'cu' zxila' queë cazu'?
- 2 Yöjné netu', bönachi tu'dubi quiu', nupa böá'u cazu' dza ni'te,  
 nupa böá'u cazu' para gácatu' bönachi queë cazu'.  
 Yöjné guí'a Sión, ga ni guzóa cazu' Li'.
- 3 Gudá tödu' ga ni naguínnajdërö yödzö lá'ayi quiu'.  
 Bulu'sunítidërö nupa gula'dá'baga' Li'  
 yúgu'tè le gula'cuá' lataj lá'ayi quiu'.
- 4 Tu'tsatsa nupa na' gula'dá'baga' Li'  
 idú gásibi'ilö ga ni budúbitu' quiu'.  
 Nucuá'gaquië' ni le naca bé'gaca  
 nuxícjagaquië' yödzö lá'ayi quiu'.
- 5 Nalá' lahui yödzö ni ca nalá' tu guí'a cate' nu gulú'u le bidín,  
 en nurixi nu na' yugu' yaga gula'cuá' lu guí'a na'.
- 6 Bulu'zxuzxjé' le nácgaca lachi lu yödzö ni  
 len yugu' guíë huága quégaquië', en yugu' yaga zidzaj.
- 7 Bulu'zégui'ë idútè lataj lá'ayi quiu'.  
 Nucá'anagaquië' cá'asö lataj ga benru' bal Lo'.
- 8 Lu ícja ládxi'do'gaquië' gula'né': "Nuxícjadërötu' bönachi ni."  
 Idútè lu xiyutu' bulu'zégui'ë yúgu'tè yu'u ga na' budúbitu' lo'.
- 9 Bítirö caz rilé'etu' yugu' le bulu'subán ládxi'tu' gulísatu' lu xiyutu'.  
 Bítirö zoa nu bönni' ru'ë didza' uláz quiu'.  
 Bítirö zóalen netu' nu bönni' nözínë' gáca'xte caz gaca caní queëtu'.
- 10 Dios, ¿gáca'xte caz ulu'lidza ditaj netu' nupa ta'díl-lalen netu'?  
 ¿Gáca'xte caz ulu'cá'ana ditaj Lo' nupa ta'dá'baga' Li'?
- 11 ¿Naru' cabí gácalenu' netu'?  
 ¿Bizx que nucáchu'u yöl-la' huáca zxön quiu'?
- 12 Rinná be'e quézinu' netu' Li', Dios, dza ni'te quez,  
 en rusölá cazu' bönachi idútè yödzölió.
- 13 Len yöl-la' huáca zxön quiu' bubéaj cazu' choplö nísado'.  
 Gulá'a cazu' ícjagacaba' böa' zxön nucuá'aba' nísado'.
- 14 Bzxuzxja cazu' ícjagacaba' böa' sínia' lëba' Leviatán.  
 Ben cazu' ga guláguba' yugu' böa' guixi' xipëla'ba' böa' sínia' na'.
- 15 Gusalaj cazu' yugu' beaj nisa, en gapa rálajda' nisa.  
 Busubidxi cazu' yugu' yegu nisa gula'yúdzutíca'sö nisa.
- 16 Nequi queë cazu' lahui' dza, en nequi ca' quiu' chi'i dzö'ölö.  
 Ben cazu' Li' bení', enca' gubidza.
- 17 Naguixaj cazu' Li' yúgu'tè buzá' nucuá' yödzölió.  
 Nun cazu' Li' beo' la, en beo' ziaga.
- 18 Yöjné lë ni, Dios. Nupa ta'dá'baga' Li' nucá'anagaca ditaj Lo',  
 ate' nupa nácgaca canöz nucá'anagaca cá'asö Lo'.
- 19 Bítirö usán no'o nupa nadxí'ínu' lu ná'agaca nupa nácgaca ca yugu' böa' guixi' sínia'.  
 Bítirö gal-la ládxi'u tsaz nupa néquiguequi quiu', en ta'guí'i ta'zaca'.

20 Yöjné didza' dzaga na' núnlenu' netu',  
tu' nacuá' nupa tuti bönachi gapa naca chul-la lu xiyutu'.  
21 Biti' gu'u lataj ulu'gá'ana cá'asö nupa nácagaca bayechi'.  
Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.

22 ¡Guyasa, Dios, en ben ca rnna xtídzu'u!  
¡Ruzě nagnu' ca rulidza ditjě' Li' bönni' canöz idú dza!  
23 Biti' gal-la ládXu'u didza' zì tuí'i nupa ta'dá'baga' Li'.  
Yöl-la' dzatsa tun nupa tu'cá'ana Li' cá'asö riyöntica'sö.

## 75

1 ¡Rětu' Li': "Xclenu', Dios!"  
¡Rětu' Li': "Xclenu'",  
tu' zóatica'su' gal-la' ga zóatu'!  
¡Tuí'i didza' bönachi ca nácagaca le zxön nunu'!

2 Rnně' Dios: "Nuzóa' dza cate' uchi'a usöröa' bönachi.  
Uchi'a usörö caza' léguequi ca naca le nácate.  
3 Tu'suniti yödzölió, en nupa nacuá' ni',  
pero tsaz nuzóa caza' le."  
4 Gudxa' nupa tun ba zxön cuínguequi, gunnía': "Biti' gun ba zxön cuinli'",  
en gudxa' nupa tuá' dö': "Biti' huě tsahui' cuinli'.  
5 Biti' huě tsahui' cuinli',  
en biti' güí'ili' didza' lu yöl-la' run ba zxön cuinli'."

6 Calěga ga rilén gubidza, en calěga ga ribía gubidza,  
en calěga la' guixi' ga dē lataj irúaj le huě tsahui' bönachi,  
7 pero uchi'a usörö cazě' Dios bönachi.  
Uzötjě' tuě bönni', en uchisě' ia'túě'.  
8 Nuá' cazě' Xanru' lu nē'ē tu zxiga' yudzu xisa le ribía lubá uva le ribixi rilěbi.  
Chinugútsi'dērě' le, ate' rigu'ě le para ilě'aj le nupa tuá' dö' yödzölió ni,  
ate' ilě'jadērö le silá' que.  
9 Neda' usiyöntica'sa' bönachi lě ni,  
en gul-la' yöl-la' ba queě' Dios queě' Jacob.  
10 Ugúě' yöl-la' unná bē' quégaca nupa tuá' dö'.  
Quíxjě' tsaz yöl-la' unná bē' quégaca nupa nácagaca tsahui'.

## 76

1 Zxí'ini xi'sóě' Judá núnbě'gaquiě' Dios.  
Nayépisě le lě' ladaj bönachi Israel.  
2 Zoa caz lataj lá'ayi queě' lu yödzö Jerusalem,  
ate' nazí'i le Sión lataj ga na' zoa cazě'.  
3 Ni' guditsjě' yugu' yaga lahui tuchi' zoa guí' láhuiguequi,  
enca' yugu' guíě la, en yugu' le ta'díl-lalen bönachi lu gudil-la.

4 ¡Yöl-la' ba Li', Dios!  
¡Nayépisětěru' ca yugu' guí'a zxön!

5 Buxicju' bönni' nál-lagaquiě'.  
Gudödi yěla guiöj lógaquiě' bönni' röjáquiě' gudil-la,  
en biti' guca ila'chisa ná'agaquiě'.  
6 Cate' Li', Dios queě' Jacob, gudíl-lalen cazu' légaquiě'

gulátiba' böa', ate' gulati ca' nupa dxíagaca légacaba'.

<sup>7</sup>Li' caz ral-la' gádxitu',  
tu' cabí gaca nu soa lo' cate' ilenu'.

<sup>8</sup>Ga zu' Li' yehua' yubá gunnó' uchi'a usöröu' bönachi.

Ní'irö guladxi nupa nacuá' lu yu, en gula'cuá' dxisö,

<sup>9</sup>cate' guzuínë' Dios para uchi'a usöröë' quégaca bönachi,  
para usölë' nupa nácgaca nöxaj ladxi' yödzölió ni.

<sup>10</sup>Sal-la' ta'léde'e bönachi, gaca yöl-la' ba queë' Lë'.

Uzi'ë xibégaca nupa ulu'gá'ana ladjaguequi.

<sup>11</sup>Guli'sí' lu ná'ali' bi gunli' lahuë' Xanru' Dios,  
en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nödzaj queë',  
tu' náquië' Nu ral-la' gádxiru'.

<sup>12</sup>Ubéaj cazë' bö' nácgaca caz nupa nadéli'gaca lataj lo.  
Bönni' ta'nná bë'ë luyú ni tádxinë' Lë'.

## 77

<sup>1</sup>Rulidza'-në' Dios, en ruá'a zidzaj didza'.

Rulidza'-në' Dios, ate' riyönnë' chí'a.

<sup>2</sup>Cate' bi guca quia' bulidza'-në' Dios.

Chí'i dzö'ölö guchisa na'a lahuë', en biti' busana' rulidza'-në'.

Biti' guca nu huë tsahui' neda'.

<sup>3</sup>Cate' röjneda'-në' Dios, rö'a böniga.

Cate' rinnë ládxa'a, ní'irö rudú ládxa'a.

<sup>4</sup>Bubéaj cazu' yëla guiöj lahua'.

Tu' ribö'a böniga biti' gaca gu'a didza'.

<sup>5</sup>Chiguzá' ládxa'a ca guca dza ni'te,

ca guca yugu' iz chigula'dödi.

<sup>6</sup>Tsöjneda' le bulá' chí'i dzö'ölö,

en tsöjsá' ládxa'a ca naca que, ate' rinábini cuina':

<sup>7</sup>¿Naru' tsaz nusán Xanru' neda'?

¿Naru' cabirö uzá' ládxe'ë quia'?

<sup>8</sup>¿Naru' cabirö gáquië' dxi'i ladxi'?

¿Naru' cabirö tsöjnenë' le guzxí' lu në'ë gunë'?

<sup>9</sup>¿Naru' nál-la ládxe'ë Dios tu' cabirö ruzá' ládxe'ë queëru'?

¿Naru' bíti'rö huéchi' ládxe'ë rë'u tu' rilenë'?

<sup>10</sup>Ní'irö gudxi cuina': Raca caní quia' tu' risëbida' ládxa'a,

en que lé ni na' réquida' nadzá' yöl-la' unná bë' queë' Dios nayëpisë'.

<sup>11</sup>Tsöjneda' yugu' le nun cazu' Li', Xantu'.

Tsöjneda' yugu' yöl-la' huáca benu' dza ni'te.

<sup>12</sup>Sa' ládxa'a ca nácgaca le nunu',

en cuéqui icja' ca nácgaca le runu'.

<sup>13</sup>Naca lá'ayi ca run cazu' Li', Dios.

Cúnturö nu zoa naca dios ca nacu' Li', Dios queëtu'.

<sup>14</sup>Naca cazu' Li' Dios, runu' yugu' yöl-la' huáca zxön.

Bulú'u lahui yöl-la' huáca quiu' lógaca bönachi yúgu'të yödzö.

<sup>15</sup>Len yöl-la' huáca zxön quiu' busöló' bönachi quiu',



nupa nácagaca zxi'ini xi'sóagaquië' Jacob, en José.

<sup>16</sup> Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilë'e yugu' nísado'.

<sup>17</sup> Bulu'lalaj böaj lúzxiba nisa.

Lúzxiba xitsá' gunnëda' guziú'.

Guyëpi yösa ca yugu' yaga lahui tuchi'.

<sup>18</sup> Lu bö' budunu' biyön guziú' quiu' gunnëda'.

Yösa gula'yëpi bulu'zeni' luyú.

Gudódida' budó' zxu', en guzxizi luyú.

<sup>19</sup> Bilá' lahui nöza quiu' gatsaj láhui'lö nísado',

ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

<sup>20</sup> Guchë' cazu' bönachi quiu' ca runë' bönni' richë'ë-ba' bö'cu' zxila' huë'ënido'.

Guchë'u léguequi lu ná'agaquië' Moisés, en Aarón.

## 78

<sup>1</sup> Buli'zë nágali' le uzéajni'ida' libí'ili', bönachi quia'.

Buli'zë nágali' didza' gu'a.

<sup>2</sup> Usalja' ruá'a, en ucúdzu'a didza'.

Gu'a didza' tu le nagachi' dza ni'te quez,

<sup>3</sup> tu didza' chibiyönru', en núnbë'ëru',

le gulë' xuz xtó'oru' rë'u.

<sup>4</sup> Biti' ucáchi'ru' didza' na' lógacabi' zxi'iniru'.

Usiyönru' yugu' zxi'ini xi'sóaru' yöl-la' ba queë' Xanru',

ca naca yöl-la' huáca queë', en yugu' le zxön benë'.

<sup>5</sup> Gudixjë' tu didza' naca bë' queë' Jacob,

en nuzöë' le rinná bë'ë quégaca bönachi Israel,

le gunná bé'enë' yugu' xuz xtó'oru'.

Ulu'zéajni'inë' zxi'inigaquië' ca naca,

<sup>6</sup> para ilúnbë'gacabi' le, bi'i si' zá'gacabi', enca' bi'i si' iláljabi',

para ulu'luí'ibi' ca' zxi'inigacabi' ca naca lë na' gunná bë'ë Dios.

<sup>7</sup> Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácagaca le gunná bë'ë,

<sup>8</sup> en biti' ilácagacabi' ca guláquië' xuz xtó'ogacabi'.

Guláquië' zidzaj ladxi' tu' gula'dá'baguë'ë xtídzë'ë Dios,

en biti' guláquië' nöxaj ladxi',

ate' lu icja ládxi'do'gaquië' biti' gula'yéajlë'ë Dios.

<sup>9</sup> Yugu' zxi'ini xi'sóë' Efraín guluá'gaquië' yaga uxiti',

pero bulu'zxúnnajë' lu gudil-la.

<sup>10</sup> Biti' gula'dá'gaquië' didza' dzaga Dios bénlenë' légaquië',

en biti' gulunë' ca naca le gunná bé'enë' légaquië'.

<sup>11</sup> Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

<sup>12</sup> Benë' Dios le gulún ga bulu'bánnë' xuz xtó'ogaquië'

luyú Egipto, en luyú Zoán.

<sup>13</sup> Gusaljë' nísado', en benë' ga gula'dödë' gatsaj láhui'lö nísado' na'.

Benë' ga guca nísado' na' ca yugu' gu'ado' tsólá'a huéaj.

<sup>14</sup> Buluí'inë' légaquië' nöza lahui' dza, bugunë' dxin tu böaj,

ate' chi'i dzö'ölö bugunë' dxin tu böaj ruzení' ca guí'.

15 Bulë'ë tu guiøj ga naca la' guixi' ga dë lataj,  
en bë'ë le gulë'ajë' le guca ca tu nísado'.

16 Gulë'ajë' nisa yegu le gulén lu guiøjto'o.

Benë' ga birúaj nisa ca tu yegu zxön lu guiøjto'o na'.

17 La' ní'isö gulunë' dul-la' lahuë' Lë',  
en gula'dá'baguë'ë Dios nayëpisëtërë' la' guixi' na'.

18 Lu icja ládxi'do'gaquië' gula'zí' bë'ë Dios quégaquië',  
cate' gula'nábinë' Lë' ugahuë' légaquië' ca gula'zësö ládxi'gaquië'.

19 Ní'irö gula'nnë' queë' Dios, gula'nnë':

“¿Naru' huáca cu'ë Dios le gáguru' la' guixi' ni ga dë lataj?

20 Buli'yútsöca', bë'ë guiøjto'o, ate' birúajda' nisa,  
le guca ca nisa yegu gubó'o zxön.

¿Naru' huáca gunnë' ca' queëru' yöta gáguru'?

¿Naru' gaca ugahuë' bönachi queë' le naca bëla'?”

21 Biyönnë' Xanru' Dios didza' ni, en guléde'enë',  
ate' gulén tu guí' le buzegui zían zxi'ini xi'sóë' Jacob,  
tu' guléde'enë' bönachi Israel,

22 tu' cabí gula'yéajlë'ë Dios,  
en biti' bulu'zxöni ládxi'gaquië' Lë' usölë' légaquië'.

23 Gunná bé'enë' Lë' yugu' böaj lúzxiba,  
en gusaljë' yehua' yubá.

24 Gusöl-lë'ë yöta maná le ilahuë',  
en bugahuë' légaquië' la' huagu que yehua' yubá.

25 Gulahuë' bönni' ni' yöta tahuë' gubáz que yehua' yubá.  
Gusöl-lë'ë guizxi yu le ilahuë'.

26 Benë' ga guyecja bö' birúaj ga rilén gubidza,  
ate' len yöl-la' huáca queë' gunná bé'enë' bö' recja  
le birúaj tsölá'alö ga ridödi gubidza beo' ziaga.

27 Benë' ga böxaj bëla' ca bëchtö yu ládjalö ga na' nacu'ë,  
le naca böa' zoa xíligacaba' gurö'öba' ca yuzxi dë tu ra' yegu zxön.

28 Benë' ga böxjagacaba' gatsaj láchui'lö ga na' nacu'ë,  
en ládjagaca yugu' yu'u guídido' quégaquië'.

29 Ca' guca, gulahuë', en bulu'huöläj gula'dzé'enë',  
tu' bë'ë quégaquië' le gula'zësö ládxi'gaquië'.

30 Zí'alö ca budxi bulu'huöläj gula'dzé'enë',  
tsanni ni' yu'u ruá'agaquië' le tahuë',

31 gulénë' Dios légaquië',  
en bëtië' bál-lagaquië', bönni' nál-latërögaquië' ládjagaquië',  
en bucul-lë' bönni' Israel nayëpisëtërögaquië'.

32 Sal-la' guca caní, gulunrë' dul-la',  
en biti' gula'yéajlë'ë Lë' ni'a quégaca le zxön benë'.

33 Que lë ni na' benë' ga böáca nítisö dxin gulunë',  
ate' lu yöl-la' radxi gula'zóë' yugu' lu iz quégaquië'.

34 Cate' bëtië' zíangaquië', ní'irö bulu'lidzë' Lë'.

Bulu'bí'i ládxi'gaquië', en yöjtá'gaquië' Dios.

35 Ní'irö yöjnéguequinë' náquië' Dios Nu run chi'i légaquië',  
en náquië' Dios nayëpisëtërë' Nu böá'uö légaquië'.

36 Gula'zí' yé'enë' Lë' len didza' gulu'ë,  
tu' gulu'ë diza' biti' nácatë lahuë' Lë' len ruá'agaquië'.

- 37 Biti' gudá'gaquië' Lë' idú ládxi'gaquië',  
en biti' gulunë' ca rna didza' dzaga na' bënlenë' légaquië'.
- 38 Tu' buéchi' ládxi'ë Dios légaquië',  
buniti lahuë' ca naca xigua' gulunë', en biti' busunítië' légaquië'.  
Bubequi lahuë' quégaquië', en bítí'rö gulénë' légaquië',  
en biti' benë' ca sa'yéaj yöl-la' ridzá'a queë'.
- 39 Ca' guca, yöjnenë' nácagaquië' bönáchisö.  
Nácagaquië' ca tu bö' recja le ridödisö, en biti' rudxín.
- 40 Zián luzuí gula'dá'baguë'ë Lë' ga na' naca la' guixi',  
en bulu'suhuí'inë' Lë' lu yu bidxi na'.
- 41 Zián luzuí gula'zì' bē'ë Dios,  
en gulunë' zi' Dios Lá'ayi quégaca bönachi Israel.
- 42 Biti' yöjnéquequinë' yöl-la' huáca zxön queë',  
le bulu'e lahui dza ni' böá'uë' légaquië'  
lu ná'agaca nupa biti' bila'lé'e légaquië' dxi'a,
- 43 cate' ni' benë' le gulaca bē' luyú Egipto,  
en benë' yugu' yöl-la' huáca queë' luyú Zoán,
- 44 cate' benë' ga böáca nisa rön yugu' lu yegu luyú Egipto,  
enca' nisa yugu' lu beaj quégaquië' para cabí guca ilé'ajë' le.
- 45 Gusöl-lë'ë ládjagaquië' bótsugayu guizxi yu,  
böa' gula'guídxiba' légaquië'.  
Gusöl-lë'ë ca' riu bulu'sunítiba' le nequi quégaquië'.
- 46 Budödë' le naz nuzóagaquië' lu ruá'agacaba' böchi' zu,  
ate' guláguba' böchi' zu na' le rö'ö yugu' la' yëla quégaquië'.
- 47 Busunítië' yugu' lubá uva quégaquië' len nisa guió'j yöla sunna na',  
en busunítië' yugu' yaga higo quégaquië' len bögui'.
- 48 Bëtië'-ba' böa'-bëdxi quégaquië' len nisa guió'j yöla sunna na',  
en lu yösa gula'yëpi.
- 49 Lu yöl-la' rilé queë' gusöl-lë'ë quégaquië' yugu' lë ni,  
en lu yöl-la' ridzá'a queë' busaca' zì'ë légaquië',  
en gusöl-lë'ë quégaquië' gubáz que yehua' yubá para bulu'sunítië' légaquië'.
- 50 Biti' bubequi lahuë' quégaquië' para cabirö lenë' légaquië',  
en biti' buniti lahuë' légaquië' para cabí ilátië'.  
Budödë' légaquië' lu yöl-la' guti,
- 51 en bëtië' yúgu'tëbi' bi'i bönni' lo quégaquië' bönni' Egipto,  
yugu' bi'i bönni' lo quégaquië' zxí'ini xí'sóë' Ham.
- 52 Guchë'ë bönachi queë' ca yugu' bö'cu' zxíla'do',  
en buluí'inë' légaquië' nöza la' guixi' ga dë lataj.
- 53 Guchë'ë légaquië' lu nē'ë para cabí bi iládxinë',  
pero gubaga' nísado' nupa biti' bila'lé'e légaquië' dxi'a.
- 54 Ca' guca, guchë'ë légaquië' ga zoa luyú lá'ayi queë',  
luyú ni bidéli'në' uláz quégaquië' len yöl-la' huáca queë'.
- 55 Bulágui'ë bönachi izá'a luyú ni lógaca bönachi queë',  
en burixë' que queégaquië' xiyúgaquië' ga ila'cu'ë,  
en benë' ga gula'cu'ë bönachi Israel yugu' lu yu'u guídido'.
- 56 Le yúbölö gula'zì' bē'ë Lë', en gula'dá'baguë'ë Dios nayëpisëtërë',  
en biti' gulunë' yugu' le gunná bé'enë' légaquië'.
- 57 Bulu'huöa ládxi'gaquië', en bulu'cá'anë' Lë' ca gulunë' xuz xtó'gaquië'.  
Gula'dödë' tsölá'alö ca run tu yaga lahui tuchi' biti' nácatë li.
- 58 Gulún lenë' Lë' tu' gulunë' xilátjagaca budó' guió'j budó' yaga yugu' lu guí'a,

en gulunë' ga budúli'në' légaquië' ni'a quégaca budó' na'.

<sup>59</sup> Cate' bilé'enë' lë ni Dios, guléde'enë',

en budí'inë' bönachi Israel.

<sup>60</sup> Ní'irö bucá'anë' xilatjë' lu yödzö Siló,

ga na' guzóa yu'u lá'ayi queë' ladjagaquië' bönni' ni'.

<sup>61</sup> Bë'ë lataj gula'ché'ë bönni' zi'tu' guí'ina lá'ayi queë',

guí'ina na' buluí'i lahui yöl-la' zxön queë'.

<sup>62</sup> Budödë' bönachi queë' lu ná'agaca nupa bëtigaca léguequi,

<sup>63</sup> en gúquinë' zi' nupa nácagaca quez queë'.

Buzegui tu guí' zxön yugu' bi'i bönni' quégaquië',

ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

<sup>64</sup> Yugu' bixúz quégaquië' gulatië' lu guíë tuchi',

ate' biti' guca ila'bódxinu nigula uzëbi quégaquië'.

<sup>65</sup> Ní'irö gúquië' Xanru' ca tu bönni' rubanë' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

<sup>66</sup> Bulágui'ë yugu' bönni' gula'díl-lalenë' bönachi queë',

en tsárido'os burixë' légaquië'.

<sup>67</sup> Lësca' budödë' tsölá'alö yugu' zxí'ini xi'sóë' José,

en biti' guröë' yugu' zxí'ini xi'sóë' Efraín.

<sup>68</sup> Guröë' yugu' zxí'ini xi'sóë' Judá,

en yödzö Sión le nadxí'i quézinë' Lë'.

<sup>69</sup> Ni' benë' tu lataj lá'ayi queë' le naca ca tu guí'a zxön,

le zoa tsutsu ca yödzölió ni nuzóë' tsaz.

<sup>70</sup> Guröë' ca' David, huen dxin queë',

en bubéajë' lë' ga na' zoë' ruyúë'-ba' yugu' bö'cu' zxíla'do'.

<sup>71</sup> Bubéajë' lë' ga na' rapa chi'ë-ba' yugu' bö'cu' zxíla' guná',

nacuá'aba' böa' huë'ënido' quégacaba',

para gáquië' nu uyú bönachi queë', yugu' zxí'ini xi'sóë' Jacob,

en bönachi Israel, nupa na' nácagaca quez queë'.

<sup>72</sup> Ca' guca, idú ládxe'ë buyúë' David bönachi na',

en lu yöl-la' rácada' queë' guchë'ë légaquië' lu në'ë.

## 79

<sup>1</sup> Dios, nacué' bönachi izá'a lu xiyúgaca bönachi quiu'.

Nucá'anagaca cá'asö yudo' lá'ayi quiu',

en nusunitigaca yödzö Jerusalén.

<sup>2</sup> Bulu'cá'anë' bönachi quiu' nátigaca luyú para iláguba' bíchulab léguequi,

en bëla' rön quégaca huen xichinu' ga iláguba' böa' guixi' le.

<sup>3</sup> Bulu'laljë' xichöngaca bönachi quiu' ca nisa idútë lu yödzö Jerusalén,

ate' cuntu nu bugá'ana nu ucache' léguequi.

<sup>4</sup> Bönachi yugu' dzaga luyú queëtu' tu'titaj netu'.

Tu'zxidxë', en tu'didza' yudxi netu'.

<sup>5</sup> ¿Naru' tsaz ilenu' netu', Xan?

¿Naru' sóatica'sö yöl-la' rilé quiu' ca tu guí' ruzegui netu'?

<sup>6</sup> Gulégaca bönachi yugu' yödzö zi'tu' biti' tun Li' bal,

enca' bönachi biti' tu'lidza Li'.

<sup>7</sup> Bëtigaca bönachi quiu' nácagaca zxí'ini xi'sóë' Jacob,

en nusunitigaca xiyutu' ga zoa cazu' Li'.

<sup>8</sup> Biti' gunu' netu' xiguia' tu' nözi dul-la' gulunë' xuz xtó'otu'.

Buéchi' ladxi' netu' na'a, tu' rudú ládxi'tu'.

<sup>9</sup> Gúcalen netu', Dios, Nu rusölá netu', para guntu' bal Lo'.

Busölá netu', en buniti lo netu' ca naca dul-la' nabága'tu' para idxí'itu' Lo'.

<sup>10</sup> ¿Bizx que ta'nabi bönachi yugu' yödzö izá'a netu',

ta'nná: "Gázxité zoa Dios queéli"?"

Bë' lataj ilé'etu', en ben ga gaca bë' lógaca yúgu'të bönachi rizi' lo' nupa tu'lalaj xichöngaca huen xichinu'.

<sup>11</sup> Buzé nagu' ca ta'nné ládxi'gaca nupa nadzúngaca.

Len yöl-la' huáca zxön quiu' busölá nupa na' narugu quéguequi ilátigaca,

<sup>12</sup> en bubí'i quégaca bönachi yugu' dzaga yödzö queétu'

ia'gadxi cö'lö ca' tsca naca didza' zi' gula'nné quiu' Li', Xan.

<sup>13</sup> Netu', bönachi quiu', enca' bö'cu' zxila' ruyú cazu' Li',

guíética'stu' Li': "Xclenu",

en cú'utica'stu' Li' yöl-la' ba na'a dza, en dza si' zaca.

## 80

<sup>1</sup> Ruzé nagu' netu', Dios, Nu rapa chi'i bönachi Israel.

Nacu' Nu ruyú yugu' xzí'ini xi'sóë' José ca nu ruyú yugu' bö'cu' zxila'.

Buzení' queétu', Li' na' rö'u rinná bë'u ga nacué'

nupa nál-lágacatërö quiu' légaca querubín.

<sup>2</sup> Buluí'i yöl-la' huáca quiu' lógaca xzí'ini xi'sóagaquië' Efraín, en Benjamín, en Manasés.

Gudá queétu', en busölá netu'.

<sup>3</sup> Ben ga huécjatu' quiu' Li', Dios.

Buluí'i netu' nadxí'inu' netu', ate' ulatu'.

<sup>4</sup> Xantu' Dios quéguequi ni'a no'o guizxi yu,

¿gáca'xte caz ilenu' netu', en biti' yönnu' le rulidztu' Li'?

<sup>5</sup> Rugagu' netu' nisa ribödxí' queétu',

en rugui'ju' netu' sizxöni nisa ribödxí.

<sup>6</sup> Nunu' ga bönachi dzaga yödzö queétu' tu'zxidxi queétu',

ate' nupa biti' ta'lé'e netu' dxi'a tu'titaj netu'.

<sup>7</sup> Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí'inu' netu', ate' ulatu'.

<sup>8</sup> Guléaju' tu lubá uva le nácatu' netu' luyú Egipto.

Bulagu' bönachi izá'a yugu' lu yödzö luyú ni, en budó'o lubá na' ni.

<sup>9</sup> Buchi'u lataj ga guzxön lubá na'.

Benu' ga ben luí ga rë', ate' bulí idútë luyú ni.

<sup>10</sup> Gulú'u zxul-la lubá na' yúgu'të lu guí'ado',

ate' ni'a në'e gula'baga' yugu' guí'a zxön.

<sup>11</sup> Gula'tunna ni'a në'e ga bidxintë ra' nísado',

enca' ga bidxintë ra' yegu Eufates.

<sup>12</sup> ¿Bizx que buquínnaju' yugu' lë'aj gulún chi'i lubá na',

en ru'u lataj nupa ta'dödisö ta'bán le ribía lubá uva na'?

<sup>13</sup> Tu'líbigacaba' cuchi guixi' le,

ate' táguba' böa' guixi' le.

<sup>14</sup> Buécja queétu', Dios quégaca ni'a no'o guizxi yu.

Ga ni' zu' yehua' yubá buyú ca raca que lubá quiu', en busölá netu'.

15 Gudá dusöló' lubá ni budá' cazu',  
le naca ca tu lubá hué'ëni buxón cazu' Li'.

16 Nupa biti' ta'lé'e netu' dxi'a gula'chugu ni'a në'e lubá na', en bulu'quela' le guí'.  
Buyú ca tun, en lu yöl-la' rilé quiu' busuniti léguequi.

17 Gúcalen bönni' na' gurö cazu' quiu',  
netu', bönachi na' nuzóa cazu' tsaz quiu'.

18 Caní gaca, bíti'rö ucá'anatu' Li'.  
Bunna queëtu' yöl-la' na'bán, ate' uzxöni ládxi'tu' Lo'.

19 Ben ga huécjatu' quiu' Li', Dios quégaca ni'a no'o guizxi yu.  
Bulu'í netu' nadxí'ínu' netu', ate' ulatu'.

## 81

1 Lu yöl-la' rudzeja queëli' guli'gul-la queë' Dios.

Lë' náquië' yöl-la' nál-la queëli'.

Lu yöl-la' rudzeja queëli' guli'cödxí'a lahuë' Dios queë' Jacob.

2 Guli'gul-la tu le gúl-lali', cápa'li' lë'e guídido'.

Guli'quinnaj lë'egaca bihuël-la.

3 Guli'cödxí luzu chivo cate' zoa beo' hué'ëni,  
en cate' zoa beo' nál-la, en cate' raca laní.

4 Lë ni naca tu xibá quégaca bönachi Israel,  
le naca tu le gunná bé'enë' Xanru' Dios zxi'ini xi'sóë' Jacob.

5 Gudixjë' le para gaca tu le gun ba nalí queë' lógaca zxi'ini xi'sóë' José,  
le gudixjë' cate' gudödë' luyú Egipto,  
ga ni' biyönda' didza' izá'a biti' guyéajni'ida'.

6 Rnnë' Dios: "Gudúa' yua' zxoá ya'zxicjagaquië',  
en bucuíta' le nuá'gaquië' le bulu'subaga' légaquië'  
nupa biti' bila'lé'e légaquië' dxi'a.

7 Bulídzali' neda' cate' bi guca queëli', ate' busölá' libí'ili'.

Bubi'a didza' cate' bi gunábili' neda', ni' nucachi' cuína' tu lu böaj gasaj.  
Guzxí' bë'a libí'ili' ga zoa nisa na' lë Meriba.

8 Buli'zé nágali', libí'ili', bönachi quia', ate' uxösa' libí'ili'.

Raca ládxa'a uzé nágali' neda', bönachi Israel.

9 Biti' ral-la' soa tu díos izá'a ga na' zóali',  
en biti' gunli' zxon tu díos quégaca bönachi zi'tu'.

10 Neda', Xanli', naca' Dios queëli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

11 Biti' bulu'zé nágagaca bönachi quia' chi'a.

Biti' gulún bönachi Israel ca rnna xtídza'a.

12 Que lë ni na' busán ládxa'a léguequi  
para gulún ca sa'yéaj yöl-la' ridá'baga' quéguequi,  
en para gulún ca gula'za'sö ládxi'gaca.

13 Guzá' ládxa'a ulu'zé nágagaca bönachi quia' xtídza'a,  
para ilún bönachi Israel ca ré'ënda' neda'.

14 La'tu' ilún caní, uxicja caza' nupa biti' ta'lé'e léguequi dxi'a,  
en tíl-lalena' nupa ta'díl-lalen léguequi.

15 Ulu'lú'í cuínguequi nupa biti' ta'lé'e neda' dxi'a,  
ca nupa tun ca rnna xtídza'a,  
pero tsaz guna' léguequi xigua'.

<sup>16</sup> Lësca' ugahua' libí'ili', bönachi quia', zxoá' xtila dxí'ado',  
en guna' ga huölaj idzé'eli' le zxixi que buz, le irúaj lë'e guiöj."

## 82

<sup>1</sup> Zuínë' Dios ladaj nupa tu'dubi queë' ni' yehua' yubá.

Ruchi'a rusöröë' nupa ta'nná bë'.

<sup>2</sup> Rnnë': "¿Gáca'xte caz uchi'a usöröli' quégaca bönachi  
lu yöl-la' biti' naca tsahui' queëli'?"

Caní naca tu' rubéajli' tsahui' nupa tuá' dö'.

<sup>3</sup> Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'guí'i ta'zaca',  
en quégaca nupa ta'yadzaj ta'yudxi.

<sup>4</sup> Buli'sölá nupa ta'cuidi', en nupa nácgaca yechi'.

Buli'sölá léguequi lu ná'agaca nupa tuá' dö'.

<sup>5</sup> Biti' nöziguequi, en biti' ta'yéajni'i.

Ta'dá ga chul-la.

Rixizi xilibi yödzölió."

<sup>6</sup> Rnna caza' neda': "Nácali' ca yugu' dios.

Nácali' yúgu'tëli' zxí'inë' Dios nayëpisëtërë',

<sup>7</sup> pero gátili' ca tati bönachi,

en ibíxili' lu gudil-la ca ta'bixi zxí'inë' bönni' lo."

<sup>8</sup> Guyasa, Dios, en buchi'a busörö quégaca bönachi yödzölió ni,

tu' nácgaca queë' cazu' yúgu'të yödzö bönachi.

## 83

<sup>1</sup> Biti' ugá'anu' dxisö, Dios.

Biti' su' dxisö, Dios, en biti' usayaj ru'u,

<sup>2</sup> tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxön cuínguequi.

<sup>3</sup> Tun tuz xtídza'guequi bi ilún quégaca bönachi queë' cazu',

en tu'pá yugu' le ilún quégaca nupa nadxí'i quézinu', ta'nná:

<sup>4</sup> "Guli'dá, usunítiru' léguequi para cabirö ilaca tu yödzö bönachi,

en para cünturö nu tsöjné bönachi Israel."

<sup>5</sup> Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

<sup>6</sup> Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

<sup>7</sup> en yugu' bönni' Gebal, en yugu' bönni' Amón, en yugu' bönni' Amalec,

en yugu' bönni' Filisteo, en yugu' bönni' Tiro,

<sup>8</sup> enca' yugu' bönni' Asiria núngaquië' légaquië' tsözxön.

Rácalengaquië' yugu' bönni' zxí'ini xi'sóë' Lot.

<sup>9</sup> Ben quégaquië' ca benu' quégaca bönachi Madián, nupa na' busunítu' dërö,

en ca na' benu' queë' Sísara, en ca na' benu' queë' Jabín ra' yegu Cisón,

<sup>10</sup> nupa na' busunítu' lu yödzö Endor,

ate' gulaca ca xiqué'ëba' bëdxi luyú ni'.

<sup>11</sup> Ben quégaquië' bönni' lo quéguequi

ca benu' quégaquië' Oreb, en Zeb,

en ben quégaquië' bönni' ta'nná bé'enë' léguequi

ca benu' quégaquië' Zeba, en Zalmuna,

12 nupa na' gula'nná: "Ilequi queëru' yugu' lataj gapa na' gulequi queë' Dios."  
 13 Dios quia', ben ga ilácagaquië' ca bëchtö yu le richë' bö', en ca bëbu zxe café le ruá' bö' budunu'.  
 14 Ca run tu guí' zxön, ruzegui' yugu' yaga zxön, o ca run tu guí', ruzegui' tu guí'a zxön,  
 15 gusí regu' léguequi tu lu bö' budunu', en ben gadxi léguequi tu lu nisa guiöjsiu' zili.  
 16 Ben ga ulu'tuí'i para ulu'guilaj Li', Xan.  
 17 Ben ga ulu'tuí'i, en ila'bö' tsaz böniga. Ben ga ulu'gá'ana cá'asö, en tsaz ila'niti,  
 18 para iléquibe'e nayëpisëtëru' tuzu' Li' idútë yödzölió en ulu'zóa zxíbiguequi lo', Xantu' Dios.

## 84

1 ¡Bica' lachi gapa zoa cazu' Li', Dios!  
 ¡Nacu' Xángaca ni'a no'o guizxi yu!

2 Rizë ládxa'a soa' lu yu'u lidxu', Xana' Dios.  
 Lu yöl-la' rudzeja quia' idú ládxa'a rul-la' quiu' Li', Dios ban.  
 3 Bidzöliba' biguínni chulí' lataj ga nuzóaba' lídxiba', en bidzöliba' xiguichi guziú' ga budxíaba' xicá'aba', ga na' rigú'uba' biguínido' queëba', gala' ga dë lu bucugu quiu' Li', Xángaca ni'a no'o guizxi yu. Nacu' Nu rinná be'e neda', en nacu' ca' Dios quia'.

4 ¡Bica' ba nupa ta'yaza lu yu'u lidxu'!  
 ¡Ta'gú'utica'sö Li' yöl-la' ba!  
 5 ¡Bica' ba bönni' nápagaquië' yöl-la' nál-la le nequi queë cazu', en ta'zë ládxi'gaquië' ila'yu'ë nöza le ridxín yödzö Sión!

6 Cate' ta'dödë' lu yu bidxi tunë' ga ruhuöáca gapa ralaj nisa beaj. Tun ga rizí' xibé yu bidxi na' yugu' nisa guiöj ta'dxín bayön.  
 7 Lu yöl-la' huáca quégaquië' röjáquië', en tu'zí'rönë' yöl-la' huáca. Ta'dxinë' yúgu'tëgaquië' lo' Li', Dios, lu yödzö Sión.

8 Ruzë nagu' le rulidza' Li', Dios, Xángaca ni'a no'o guizxi yu. Ruzë nagu' neda', Dios queë' Jacob.

9 Buyüë' bönni' rinná bé'enë' netu', Dios. Buyüë' bönni' na' nabö cazu'.

10 Nácarö dxi'a soa' tu dza lu yu'u lidxu' ca le soa' idú chi gayuá' dza ga yúbölö. Cöa' zí'alö gaca' huen dxin ga nu riyaza yu'u lidxë' Dios ca le soa' caza' tu yu'u zxön ga bití' zoa Dios.

11 Náquië' Xanru' Dios ca gubidza, en le rusubín rë'u. Xanru' caz runnë' queëru' yöl-la' ruzá' ladxi' queë', en yöl-la' zxön queë'. Bití' ugüë' nitú le naca dxi'a gapa nacuá' nupa tun le naca tsahuí'.

12 ¡Li', Xángaca ni'a no'o guizxi yu,



bica' ba bönni' ruzxöni ládxë'ë Li'!

## 85

<sup>1</sup> Buzá' ládxu'u quégaca bönachi quiu', Xantu' Dios.  
Buchë'u Li' xzí'ini xi'sóë' Jacob gula'dzunë'.

<sup>2</sup> Buniti lo' bönachi quiu' ca naca xiguia' gula'baga'.  
Bucáchu'u yugu' dul-la' gulúngaca.

<sup>3</sup> Buzóa dxíu' yöl-la' rilé quiu'.  
Bugú' yöl-la' ridzá'a quiu'.

<sup>4</sup> Buzóa netu' xilátjatu' le yúbölö, Dios, Nu rusölá netu',  
en bíti'rö lenu' netu'.

<sup>5</sup> ¿Naru' tsaz ilenu' netu'?

¿Naru' tsaz ilenu' yugu' xzí'ini xsoatu'?

<sup>6</sup> ¿Naru' cabí usubanu' ládxi'tu' le yúbölö,  
para udzeja ládxi'lentu' Li' netu', bönachi quiu'?

<sup>7</sup> Lu yöl-la' dxi'i ladxi' quiu' gúcalen netu',  
en busölá netu', Xan.

<sup>8</sup> Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a quéguequi,  
nupa na' nácagaca quez queë',  
pero run bayúdx bití' ulu'huõa ládxi'gaca.

<sup>9</sup> Le nácate chizóë' usölë' nupa tun Lë' bal,  
para soa yöl-la' ba queë' luyú queëtu'.

<sup>10</sup> Dzágagaca yöl-la' dxi'i ladxi', en le naca idútë li.

Tagu zxixi luzé'eguequi nu naca tsahui', en nu riböza dxi'a tsáhuí'do'.

<sup>11</sup> Luyú caz rilén le naca idútë li,  
ate' yehua' yubá rirúaj le naca tsahui'.

<sup>12</sup> Le nácate Xanru' unödzejë' queëru' le naca dxi'a,  
ate' xiyuru' unödzaj le uláparu'.

<sup>13</sup> Le naca tsahui' röjnöru lahuë' Xanru',  
en gun ga soa nöza gátí'tës ga ulibë'.

## 86

<sup>1</sup> Ruzé nagu', Xana' Dios, en rubí'u didza',  
tu' zoa nu rusaca' zí' neda', ate' riyadzaj riyúdxida'.

<sup>2</sup> Ben chí'i bö' naca caza', Dios, tu' naca' quiu' Li'.  
Busölá neda', huen dxin quiu', Dios quia', tu' ruzxöni ládxa'a Li'.

<sup>3</sup> Buzá' ladxi' quia', Xan,  
tu' rulidza' Li' idú dza.

<sup>4</sup> Ben ga udzeja ládxa'a neda', huen dxin quiu',  
tu' rigu'a lu no'o bö' naca caza', Xan.

<sup>5</sup> Nacu' dxi'a, Xan, en chizú' uniti lo' bönachi quiu'.  
Nadxí'itica'su' yúgu'të nupa tu'lidza Li'.

<sup>6</sup> Ruzé nagu' le rulidza' Li', Xan,  
en ruí'i ládxu'u gunu' yugu' le inábida' lo'.

<sup>7</sup> Cate' bi gaca quia' ulidza' Li',  
tu' ubí'i cazu' didza' bi gunu' quia'.

<sup>8</sup> Cúnturö nu zoa ládjagaca dios nu naca ca nacu' Li', Xan,  
en bití' zoa ia'tú nu run ca nácagaca le runu' Li'.

<sup>9</sup> Ila'dxín bönachi yúgu'të yödzö naguixju' Li', Xana' Dios,

en ila'yéaj ládxi'gaca Li', en ilún zxön Lo'.

<sup>10</sup> Nayépisëtërosu' Li', en tuzu' Li' runu' yugu' yöl-la' huáca zxön.

Tuzu' Li' nacu' Dios.

<sup>11</sup> Busédi neda' ca naca le ré'ënu' guna', Xan.

Guna' ca naca le naca idútë li naguixju' Li'.

Ben ga gádxida' Lo' idú ládxa'a.

<sup>12</sup> Idú ládxa'a guía' Li': "Xclenu", Xana' Dios,

en guna' zxön Lo' yugu' iz si' zaca.

<sup>13</sup> Nadxí'ide'enu' neda',

en chibusöló' bö' naca caza' lu lataj chul-la ga nacuá' nupa chinátigaca.

<sup>14</sup> Dios quia', nupa ta'dá'baga' neda' ta'díl-lalen neda',

ate' yugu' bönni' zidzaj ladxi' té'ënë' ilútië' neda',

yugu' bönni' na' biti' tunë' Li' bal.

<sup>15</sup> Nacu' Dios ruhuéchi' ládxi'u netu', Xan, en ruzá' ládxi'u queëtu'.

Ridzenu' para ilenu' netu', en nadxí'ide'enu' netu', en runu' ca rnna xtídz'u.

<sup>16</sup> Buyú neda', en buzá' ladxi' quia'.

Butipa ládxa'a neda', huen dxin quiu',

en busölá neda', zxi'ininu nigula huen dxin quiu'.

<sup>17</sup> Bulú'i neda' tu le gaca bë' gaca dxi'a quia',

para ila'lé'e le nupa biti' ta'lé'e neda' dxi'a.

Ulu'tuí'i, tu' gúcalenu' neda',

en buë tsahú'u neda', Xan.

## 87

<sup>1</sup> Nuzóë' Dios xilibi zö'ö que yödzö queë' lu guí'a lá'ayi.

<sup>2</sup> Nadxí'irönë' Xanru' lataj ga na' tu'chi'a tu'sörö bönachi Sión

ca nadxí'inë' ia'zica'rö lataj gapa nacuá' bönachi Israel.

<sup>3</sup> Zián le lachi ta'nná bönachi ca naca

yödz na' nequi queë' Dios.

<sup>4</sup> Cate' ulidza' bönachi núnbë'gaca neda', Dios,

ulidza' bönachi nníta'gaca Egipto, en Babilonia.

Ca naca quégaca bönachi Filístea, en Tiro, en Etiopía

innía' nabábagaca yödzö lá'ayi na'.

<sup>5</sup> Cate' gu'a didza' que yödzö Sión innía':

Bönachi ni, en bönachi izá'a ni nabábagaca le,

ate' neda', Dios nayépisëtëre', uzóa' tsutsu yödzö na'.

<sup>6</sup> Cate' ulabë' Xanru' nupa nácagaca queë' innë':

"Bönni' ni nababë' yödzö quia'."

<sup>7</sup> Ní'irö iluí'i didza' nupa tul-la, en nupa tu'cödxí gui, ila'ná:

"Ruzí'itu' xibé tuzi yödzö ni."

## 88

<sup>1</sup> Xana' Dios, Nu rusölá neda',

rulidza' Li' rëla, en te dza.

<sup>2</sup> Bë' lataj idxín lo' le rulidza' Li'.

Ruzë nagu' le rinaba yúdxida' Li'.

<sup>3</sup> Ruúbi ruguí'i ládxi'da'ahua',

en chizóa tsöjtsázia' lataj chul-la.

<sup>4</sup> Chinabábalena' nupa chinátigaca.

Naca' ca tu bönni' nudú dërö láchxë'ë,  
 5 en nagá'anë' cá'asö ladaj nupa chinátigaca,  
 en ca nupa dëgaca yeru ba,  
 nupa na' bítirö röjnenu',  
 en nusán no'o léguequi.

6 Nuzú' neda' tu lu yeru zila,  
 ga naca chul-la, en le nácada' zila.

7 Rilenu' neda',  
 en rusaca' zi'u neda' tu lu nísado' quiu'.

8 Nucúasu' yúgu'të nupa núnbë'a.  
 Nunu' neda' ca tu le ta'guti bönachi.  
 Nadzuna', en bití' gaca irúaja'.

9 Tu' riguí'i rizáca'a nudú guiój lahua'.  
 Tu dza tu dza rulidza' Li', Xan.  
 Richisa na'a zaca' ga na' zu'.

10 ¿Naru' guntso' yugu' yöl-la' huáca zxön  
 para gácalenu' nupa chinátigaca?  
 ¿Naru' ulu'yasa nupa yú'ugaca lataj chul-la,  
 en ila'gú'u Li' yöl-la' ba?

11 ¿Naru' ulu'luí'i lahui yöl-la' dxi'i ladxi' quiu'  
 nupa nagáchi'gaca yeru ba?  
 ¿Naru' ulu'luí'i lahui nupa yú'ugaca lataj chul-la  
 ca runu' ca rnna xtídz'u?

12 ¿Naru' gaca bë' le zxön runu' ga na' naca chul-la?  
 ¿Naru' gaca bë' nacu' tsahui' ga na' cuntu nu bi röjné?

13 Rulidza' Li' neda' para gácalenu' neda',  
 ate' yugu' zila ridxín lo' le rinábida' Li'.

14 ¿Bízx que nusán láchxu'u neda', Xan?  
 ¿Bízx que rucachi' lo' lahua' neda'?

15 Riguí'i rizáca'a, en chizóa gátia' ga gudela' naca' bí'ido'.  
 Réquida' zi' tu' ruxösu' neda', en rudú láchxa'a.

16 Nabága'a neda' yöl-la' rilé quiu',  
 ate' chizóa usuniti neda' le ruxösu' neda'.

17 Idú dza naca quia' ca nabaga' neda' nisa.  
 Nagú'ugaca neda' lë'ajlö yugu' nisa.

18 Nucúasu' ga zoa' nu nadxí'i neda', enca' luzá'a.  
 Zóalensö le naca chul-la neda'.

## 89

1 Gúl-latica'sa' ca naca yöl-la' dxi'i ladxi' quiu', Xan.  
 Usiyönda' zxí'ini xsoatu' ca runu' ca rnna xtídz'u.

2 Gunnía': "Sóatica'sö yöl-la' dxi'i ladxi' quiu'.  
 Tsaz naca bë' yehua' yubá ca runu' ca rnna xtídz'u."

3 Rnnë' Dios: "Naguixja' tsaz didza' dzaga núnlena' nupa nabö caza' quia'.  
 Bena' tsutsu xtídz'a ca guna' queë' David, huen dxin quia'.

4 Gunnía': Ucuá'a tsaz zxí'ini xi'sú'.  
 Guna' ga sóatica'sö nu inná bë' uláz quiu'."

5 Nupa nacuá' yehua' yubá quiu' ila'gú'u yöl-la' ba le nunu' le tun ga rubánitu', Xan.

Ga nudúbigaca nupa nácagaca quez quiu' ila'gú'u yöl-la' ba ca runu' ca rnna xtídzu'u.

<sup>6</sup> ¿Nuzxi caz zoa ni' yehua' yubá naca ca nacu' Li', Xan?

¿Nuzxi caz zoa ladaj nupa nayépisëgaca naca ca nacu' Li', Xan?

<sup>7</sup> Nupa nácagaca lá'ayi tun Li' bal, Dios.

Ral-la' gúnröru' Li' bal ca tun nupa nacua'len Li'.

<sup>8</sup> Dios, Xángaca ni'a no'o guizxi yu, ¿nuzxi caz naca ca nacu' Li', Xantu' nayépisëtërou'?

Naca bë' rúntica'su' ca rnna xtídzu'u.

<sup>9</sup> Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

<sup>10</sup> Busuniti cazu' bönachi Egipto, ate' gulaca ca nupa chinátigaca.

Bësilásiu' léguequi len no'o nál-la.

<sup>11</sup> Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

<sup>12</sup> Naguixaj cazu' le dë tsölá'a ga za' bö' ziaga,

en le dë tsölá'a ga ridödi gubidza beo' ziaga.

Lu yöl-la' rudzeja quéguequi ta'bödxi'a guí'a Tabor,

en guí'a Hermón cate' ta'yöni Lo'.

<sup>13</sup> ¡Nál-latëro naca no'o!

¡Nápatëro no'o yöl-la' huáca!

¡Nayépisëtëro no'o ibëla!

<sup>14</sup> Le naca dxi'a, en le naca tsahui' tun tsutsu le rinná bë'u.

Nacua'len Li' yöl-la' dxi'i ladxi', en le naca idútë li.

<sup>15</sup> Bica' bágaca nupa ta'yöni didza' que yöl-la' rudzeja.

Ta'dá lu bení' que lo', Xantu' Dios.

<sup>16</sup> Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayépisëtëro.

<sup>17</sup> Naca cazu' Li' yöl-la' zxön que yöl-la' huáca quéguequi,

en tu' ruzá' ladxu'u queëtu' nazxönda' yöl-la' nál-la queëtu'.

<sup>18</sup> Nequi queë' Xanru' le run chi'i rë'u,

ate' néquinë' queë' Dios bönni' rinná bé'enë' rë'u.

Dios na' náquië' lá'ayi ladaj bönachi Israel.

<sup>19</sup> Dza ni'te bë'lenu' nupa néquiguequi quiu' didza'

lu yugu' le bulufínu' léguequi,

gunnó': "Gúcalena' tu nu nayépisëtëro.

Nuchisa' tu nu guró caza' quia' ladaj bönachi.

<sup>20</sup> Budzöllida'-në' David, huen dxin quia'.

Gulu'a-në' le za le naca lá'ayi quia'.

<sup>21</sup> Len na' caza' naguixja' lë',

ate' len na'a ca' utipa' ladxë'ë.

<sup>22</sup> Biti' si' ye'e lë' nu rilé lë',

en biti' usaca' zi' lë' nu ruá' dö'.

<sup>23</sup> Uquínnaja' lahuë' nupa ta'díl-lalen lë',

en gu'a nupa biti' ta'lé'e lë' dxi'a.

<sup>24</sup> Sóalena' lë' lu yöl-la' run ca rnna xtídzá'a,

en lu yöl-la' dxi'i ladxi' quia',

ate' tu' ulidzë' La', uxöna' yöl-la' nál-la queë'.

<sup>25</sup> Guna' ga inná bë'ë ga naguela' ra' nísado',

ga idxintë ra' yegu Eufrates.

<sup>26</sup> Ulidzë' neda', innë': Li' nacu' Xuza', en Dios quia', enca' Nu run chi'i neda', en Nu rusölá neda'.

<sup>27</sup> Gun caza' neda' ga gáquië' ca bi'i lo queë caza', ate' tsëpisëtërë' ca yugu' bönni' ta'nná bë'ë yödzölió.

<sup>28</sup> Lu yöl-la' dxi'i ladxi' quia' gun chí'ítica'sa' lë', en uzóa' tsaz queë' didza' dzaga quia'.

<sup>29</sup> Ucuá'a tsaz zxí'ini xi'sóë', ate' sóatica'sö lataj ga inná bë'ë, tsca soa yehua' yubá.

<sup>30</sup> Channö ulu'cá'anë' zxí'ini xi'sóë' xibá quia', en cabí ilunë' ca naca le buchi'a busöröa',

<sup>31</sup> en channö ila'guitsjë' xibá que le gunná bë'a,

en cabí ilunë' ca nácagaca le gunná bé'eda' légaquië',

<sup>32</sup> ní'irö guna' légaquië' xiguia' ca sa'yéaj le ta'dödi bë' tunë', en gu'a léguequi ca naca xiguia' nabága'gaquië'.

<sup>33</sup> Pero biti' ugúa' queë' yöl-la' dxi'i ladxi' quia', en biti' usana' guna' ca rnna le guzxí' lu na'a guna'.

<sup>34</sup> Biti' ucá'ana' cá'asö didza' dzaga nuna', en biti' utsá'a didza' bë'a.

<sup>35</sup> Tu le nuzóa' tsutsu, en nuna' ba nalí que le naca lá'ayi quia'. Biti' ca' si' yé'eda' David.

<sup>36</sup> Gunnía' ila'cuá'tica'së' zxí'ini xi'sóë', en ga rö'ë rinná bë'ë sóatica'sö lahua' ca gubidza.

<sup>37</sup> Naguixja' le tsaz ca nuzóa' tsaz beo', ate' nacua'tica'sö lúzxiba le tun ba nalí."

<sup>38</sup> Pero nuzú' tsölá'alö, en nusán ládXu'u, en riléde'enu' nupa na' gurö cazu' quiu'.

<sup>39</sup> Nuzú' tsölá'alö didza' dzaga bénlenu' huen dxin quiu'. Nuzötju' luyú yöl-la' unná bë' queë'.

<sup>40</sup> Nuquínnaju' zö'ö gulún chi'i lë', en nusunítu' yugu' lataj tsutsu queë'.

<sup>41</sup> Yúgu'të nupa ta'dödisö ta'bán le nequi queë', ate' bönni' dzaga yu'u queë' tu'cá'ana lë' cá'asö.

<sup>42</sup> Nuchisu' nupa ta'dá'baga' lë', en runu' ga tu'dzeja nupa biti' ta'lé'e lë' dxi'a.

<sup>43</sup> Runu' ga biti' sequi' idéli'në' lu gudil-la, ate' cuntu nu sequi' ucul-lë' lu gudil-la na'.

<sup>44</sup> Bugú' yöl-la' lachi queë', en nuzötju' yöl-la' unná bë' queë' lu yu.

<sup>45</sup> Benu' ga chinagulë' sal-la' ni zoë' iz cuidi', en nunu' ga rutuí'inë'.

<sup>46</sup> ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sö yöl-la' rilé quiu' ca tu guí' réguide'e?

<sup>47</sup> Yöjné nabábasö iz soa' ibana', en tu chí'isö nacua' bönnachi yödzölió ni.

<sup>48</sup> ¿Nuzxi caz bönni' gaca sóatica'së' ibanë', en cabí gátíë'?

¿Naru' huáca usölá cuin cazë' lu yöl-la' unná bë' que lataj chul-la?

<sup>49</sup> ¿Gázxitë zoa yöl-la' dxi'i ladxi' quiu' guzóa zí'alö, Xan,

lë na' buzú' tsutsu xtídzu'u gunu' queë' David,  
len yöl-la' run ca rnna xtídzu'u?

<sup>50</sup> Yöjné ca tu' cá'ana cá'asö netu', huen dxin quiu', Xan,  
enca' ca tu' cá'ana neda' cá'asö bönachi zían yödzö izá'a.

<sup>51</sup> Tu' cá'ana neda' cá'asö nupa biti' ta' lé'e Li' dxi'a, Xan.  
Tu' cá'ana cá'asö yugu' le runa' neda', bönni' gurö cazu' quiu'.

<sup>52</sup> ¡Yöl-la' ba Xanru' Dios iz si' zaca!  
¡Ca' gaca! ¡Ön, ca' gaca!

## 90

<sup>1</sup> Naca cazu' Li', Xan, ca yu'u lidxa'.

<sup>2</sup> Zí'atëlö ca gulata' yugu' guí'a, o ca guta' yödzölió,  
ga naguela' cate' gusí lo ga idxintë dza udxi, tsaz naca cazu' Dios.

<sup>3</sup> Runu' ga tu' huóaca bönachi bëchtö yu cate' rnno':  
"Guli' huóaca le néquinili', bönachi."

<sup>4</sup> Quiu' Li' chi gayuá' iz nácagaca  
ca dza neje le chigudödi que,  
o ca tu chí'isö chi' i dzö'ölö.

<sup>5</sup> Bugacu' bönachi ca tu lu yegu gubó'o, ate' gúcagaca ca tu yëla rineru'.  
Cate' naca zila zéaj naca ca tu guíxi'do' rilentë luyú.

<sup>6</sup> Cate' naca lahui' dza rizxön, en rö' ni'a nē'e,  
pero cate' chiral-la, ricuadi', en ridödi que.

<sup>7</sup> Rinítitu' tu' rilenu' netu',  
ate' tu' ridzó'o ruúbi ruguí'itu'.

<sup>8</sup> Nuzú' lo' xigua' nabága'tu',  
en nubéaju' lu bení' quiu' dul-la' yu'u ládxi'do'otu'.

<sup>9</sup> Tu' riléde'enu' netu' ridödi quégaca dza queëtu',  
ate' chibú'u iz queëtu' ca tu le rinnë ládxi'tu'.

<sup>10</sup> Tsónnalalaj yu' chi ízisö zóatu' nabantu',  
o channö nál-latu', huazóatu' idú tápalalaj iz,  
pero runtu' dxin bayudxi, en ruhuí'initu' yugu' iz na',  
tu' ridödité quéguequi iz na', ate' uzá'atu'.

<sup>11</sup> ¿Nuzxi caz réajni'i tsca naca yöl-la' rilé quiu'?  
¿Nuzxi caz nözi ca naca tsöbi yu'u nu na' rilenu'?

<sup>12</sup> Que lë ni na' busëdi netu' para guéquibe'etu' tsca gácagaca iz zóatu',  
para gácatu' bönachi ta'yéajni'i lo' Li'.

<sup>13</sup> ¿Gáca'xte caz biti' huéchi' ládxi'u netu', Xan?  
Buéchi' ladxi' netu', yugu' huen dxin quiu'.

<sup>14</sup> Tu zila tu zila buluí'i netu' ca naca yöl-la' dxi'i ladxi' quiu',  
para gúl-latu' lu yöl-la' rudzeja queëtu', en uzí'itu' xibé yugu' dza na'.

<sup>15</sup> Ben ga udzëjatu' tsca chigulaca dza busaca' zi'u netu',  
en tsca gulaca iz biti' guca dxi'a queëtu'.

<sup>16</sup> Buluí'i netu', yugu' huen dxin quiu', ca naca le nunu',  
en buluí'i zxi'initu' ca naca yöl-la' zxön quiu'.

<sup>17</sup> ¡Buzá' ladxi' queëtu', Xantu' Dios,  
en ben ga irúaj dxi'a dxin runtu'!  
¡Ön, ben ga gaca dxi'a lo' dxin runtu'!

## 91

- <sup>1</sup> Nu bönni' ruzxöni láchxë'ë Dios para gun chi'ë lë',  
en rizi'ë Dios Nu napa idútë yöl-la' huáca, para gácalenë' lë',  
<sup>2</sup> gaca guië' Xanru': "Nacu' Nu run chi'i neda', en Nu ruzóa neda' tsutsu.  
Nacu' Dios quia', ate' ruzxöni láchxa'a Li'."  
<sup>3</sup> Usölä cazë' Dios Li' lu du yalaj que nu rizön bönachi,  
en lu yödzöhuë' le rusuniti.  
<sup>4</sup> Usubáguë'ë li' ca rusubága'ba' böra yugu' bórado' queëba',  
ate' gaca chi'u lu në'ë ca raca quégacaba' bórado' znan xílaba' yöjede.  
Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.  
<sup>5</sup> Biti' gádxinu' le run gadxi bönachi chi'i dzö'ölö,  
en bití' gádxinu' yaga lahui tuchi' tu'së bönachi lahui' dza,  
<sup>6</sup> en bití' gádxinu' yödzöhuë' le rilén ga naca chul-la,  
en bití' gádxinu' le naca xihui' le ruti bönachi lahui' dza.  
<sup>7</sup> Ilátigaca chi gayuá' bönachi cuitu' li',  
en ia'chí cö' chi gayuá' cuitu' ibëla,  
pero bití' bi gaca quiu' li'.  
<sup>8</sup> Le nácatë uyú iná'asu',  
en ilé'enu' le rubí'i quégaca nupa tuá' dö'.  
<sup>9</sup> Tu' nuzú'-në' Xanru' Nu run chi'i li',  
nuzú'-në' Dios nayépisëtërë' Nu gácalen li',  
<sup>10</sup> bití' bi gaca quiu' le cabí naca dxi'a,  
en nitú le nachë' yödzöhuë' bití' tsu'u lidxu',  
<sup>11</sup> tu' cu'u cazë' Dios li' lu ná'agaquië' gubáz lá'ayi queë',  
para ilún chi'ë li' gátitës ga ridó'.  
<sup>12</sup> Lu ná'agaquië' ila'ché'ë li',  
para cabí tsöjchégu'u guiöj.  
<sup>13</sup> Uléaj ulibu' bédxi guixi', en bëla sínia'.  
Usunu' lë'e labu' bédxi guíxi'do', en bëla xitsiní'.  
<sup>14</sup> Rnnë' Dios: "Nadxi'inë' neda', ate' que lë ni na' usölä' lë'.  
Uzóa'-në' tsaz xitsá'tërö tu' núnbë'ë La'.  
<sup>15</sup> Ulidzë' neda', ate' ubi'a didza'.  
Sóalena' lë' cate' bi gaca queë'.  
Usölä' lë', en guna' lë' bal.  
<sup>16</sup> Uzánda'a dza soë' ibanë',  
en uluí'ida'-në' ca gaca usölä' lë'."

## 92

- <sup>1</sup> ¡Bica' tsahui' naca rigú'utu' Li' yöl-la' ba, Xan,  
en rúl-latu' le tun Li' bal, Dios nayépisëtërë',  
<sup>2</sup> en rusiyöntu' bönachi yugu' zila ca ruhuéchi' láchxu'u netu',  
en ruluí'itu' lahui yugu' dzö' ca runu' ca rnna xtídzu'u!  
<sup>3</sup> Rúl-latu' len yugu' bihuël-la,  
en rúl-latu' yugu' le lachi ca tul-la.  
<sup>4</sup> Le zxön nunu' Li', Xan, run ga rudzëjatu',  
ate' ruzi'tu' xibé le núngaca lu no'o.  
<sup>5</sup> Bica' zxön nácgaca le nunu' Li', Xan.  
Zxöntërö le rizá' láchxu'u gunu'.  
<sup>6</sup> Zoa tu le cabí gaca inözinë' bönni' nazxí icjë',  
en bití' gaca tséjni'inë' bönni' canöz le.  
<sup>7</sup> Nupa nucá'anagaca Dios ila'yán ca ta'yán guíxi'do',

en ulu'zí' xibé le tun nupa tuá' dö', pero ila'niti tsaz,  
 8 tu' nayépsëtëru' Li' tsaz, Xan.  
 9 Naca bë' le gaca quégaca nupa biti' ta'lé'e Li' dxi'a, Xan.  
 Naca bë' ila'niti nupa biti' ta'lé'e Li' dxi'a.  
 Ulu'gá'ana cá'asö yúgu'të nupa tuá' dö'.  
 10 Nunu' ga nácatëra' nal-la ca nácaba' bëdxi.  
 Nagú'u neda' le za le run ga rudzëjada'.  
 11 Ilé'e quézida' cate' uxicju' nupa biti' ta'lé'e Li' dxi'a,  
 en yönda' cate' ila'bödxi yechi' nupa tuá' dö', nupa na' ta'díl-lalen neda'.  
 12 Ila'yán nupa nácagaca tsahui' ca ta'yán yaga zina' ca'.  
 Ila'zxön ca ta'zxön yaga rö'gaca lu guí'a Líbano.  
 13 Nácagaca ca yaga nudá'gacu' ra' yu'u lidxu', Xan,  
 le ta'zxön lu lö'a lataj quiu', Dios queëtu'.  
 14 Cate' ni' yú'ugaca iz zían ila'bía le zxixi quéguequi.  
 Ilácagaca tsutsu, en ila'cuá'tica'sö ya'a.  
 15 Caní gaca para gaca bë' náquië' tsahui' Xanru', Nu run chi'i neda'.  
 Biti' bi zóalen Lë' le cabí naca tsahui'.

## 93

1 ¡Rinná bë'ë Xanru'!  
 ¡Nácuë' yöl-la' ba zxön queë'!  
 ¡Nácuë' zxë' Xanru', en núguië' lë'ë yöl-la' unná bë'!  
 ¡Nuzóë' tsutsu yödzölió, ate' biti' utá cuini!

2 ¡Tsaz nuzú' tsutsu ga rö'u rinná bë'u, Xan,  
 en zóatica'su' Li'!  
 3 Riyasa ridxía nisa yugu' lu nísado', Xan.  
 Riyasa ridxía nisa, en ru'u bö que.  
 Riyasa ridxía nisa yugu' lu nísado', en yugu' lu yegu.

4 Xanru' Dios yehua' yubá nápatëre' yöl-la' unná bë'  
 ca bö ru'u lu nísado' le riyön ca guziú' rinnë,  
 enca' ca le riyasa ridxía nisa lu nísado'.

5 Tsaz naguixju' xibá quiu', Xan,  
 ate' idú lá'ayi naca ga zoa cazu' Li'.  
 Caní zóatica'sö na'a dza, en dza si' zaca.

## 94

1 Nacu' Dios, Xan, Nu ruzí' lëbi bönachi.  
 Buluí' cuinu', Dios, Nu ruzí' lëbi.  
 2 Ruchi'a rusörö cazu' yúgu'të bönachi.  
 Guzë, ate' len yöl-la' huáca zxön quiu' bubí'i quégaca nupa tun ba zxön cuínguequi.  
 3 ¿Gáca'xte caz ulu'zí' xibé nupa tu'cá'ana Li', Xan?  
 ¿Gáca'xte caz ulu'zí' xibé?  
 4 ¿Gáca'xte caz ilún ba zxön cuínguequi, en iluí' didza' zi'?  
 ¿Gáca'xte caz ilún ba zxön cuínguequi ni'a que dö' tuá'gaca?  
 5 Tu'sunítie' nupa néquiguequi quiu', Xan.  
 Tu'saca' zi'ë nupa néquiguequi quez quiu'.  
 6 Tútigaquië' nigula uzëbi, enca' yugu' bi'i uzëbido',  
 en tunë' le naca xihui' ladaj bönachi zi'tu'.  
 7 Ta'nnë': "Biti' ilé'enë' Xángaqueië' rë'u,



en biti' ruí'i ládxe'ë Dios queë' Jacob læ ni."

<sup>8</sup> Guli'tséajni'i, bönachi biti' nõzguequi,  
ate' libí'ili', bönachi catún bal, ¿bátaxi tséajni'ili'?

<sup>9</sup> Benë' Dios guiði nágaru'. ¿Naru' cabí riyõn quézinë'?

Benë' Dios guiõj loru'. ¿Naru' cabí rilé'e quézinë'?

<sup>10</sup> Ruzéajni'i quézinë' Dios bönachi yúgu'të yödzo.

¿Naru' cabí gunë' léguequi xiguia'?

Ruchiza cazë' icja ládxi'do'oru' yöl-la' réajni'i.

¿Naru' cabí réquibe'enë' bi runli'?

<sup>11</sup> Nöz quézinë' Xanru' yugu' le ta'zá' ládxi'gaca bönachi.

Nözinë' canöz naca le ta'zá' ládxi'gaca.

<sup>12</sup> Bica' ba bönni' na' ruzéajni'i quézinu'-në', Xan,  
en rusedi quézinu'-në' ca naca xibá naguixju' Li'.

<sup>13</sup> Gunu' ga uzí' ládxe'ë cate' bi gaca queë',  
ga idxinrö dza tsú'ugaca yeru ba nupa tuá' dö'.

<sup>14</sup> Biti' usán në'ë Xanru' bönachi queë',  
en biti' ucá'anë' nupa néquiguequi quez queë'.

<sup>15</sup> Ca naca le naca tsahui' uchi'a usöröë' rë'u le yúbölö,  
ate' ulu'zí' xibé nupa nácgaca tsahui'.

<sup>16</sup> ¿Nuzxi caz tíl-lalen nupa tuti bönachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

<sup>17</sup> La'tu' cabí gúcalenë' Xanru' neda',  
la' yõjtsú'utea' lataj chul-la que yöl-la' guti.

<sup>18</sup> Gunnía': "Chizóa' ibixa",  
ate' lu yöl-la' dxi'i ladxi' quiu' guzxönu' neda', Xan.

<sup>19</sup> Cate' ruúbi ruguí'i ládxi'da'ahua',  
ruhuë tsahú'u neda', en runu' ga rudzėjada'.

<sup>20</sup> Biti' ca' gunu' tsözxõn nupa tu'chi'a tu'sörö netu' ca naca le cabí naca tsahui',  
nupa na' tu'béaj tsahui' le cabí naca tsahui'.

<sup>21</sup> Tu'dubë' tsözxõn para ilútië' nupa nácgaca tsahui',  
en ta'chúguië' quégaca nupa biti' bi nabága'gaca ilátigaca,

<sup>22</sup> pero run chi'i cazë' Xanru' Dios neda'.

Nuzóë' neda' tsutsu, ate' ruzxõni ládxa'a læ'.

<sup>23</sup> Ubi'ë quégaquië' ca naca dö' tu'ë,  
en usunítië' légaquië' tu' nõzi xiguia' nabága'gaquië'.

Usunítië' dërö Xanru' Dios légaquië'.

## 95

<sup>1</sup> Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cõdxi'aru' que Nu na' naca ca tu guiõjto'o ga nuláru'.

<sup>2</sup> Uyéajru' lahuë', en guiëru'-në': "Xclenu'."

Lu yöl-la' rudzeja queëru' cõdxi'aru' lahuë', gúl-laru' yugu' salmo.

<sup>3</sup> Xanru' Dios náquië' Dios nayépisëtërë'.

Nápatërë' yöl-la' unná bë' ca yúgu'të dios izá'a.

<sup>4</sup> Lu na' cazë' yu'u le dë ga rë' znan luyú,

ate' néquiguequi ca' queë' guí'a sibi.

<sup>5</sup> Nequi queë' nísado', tu' nun cazë' le,  
en len ná'asë' benë' luyú bidxi.

<sup>6</sup> Guli'dá, gunru'-në' zxön, en uzóa zxíbiru' lahuë'.

Uzóa zxíbiru' lahuë' Xanru' Nu ben rë'u.

<sup>7</sup> Naca cazë' Lë' Dios queéru',

ate' nácaru' bönachi rugagu cazë', en ca bö'cu' zxila' richë' cazë'-ba' lu në'ë.

Rnna cazë' Dios: "Na'a, channö rë'ënili' yönili' chi'a,

<sup>8</sup> bití' gunli' zidzaj icja ládxi'do'oli' ca gulunë' xuz xtó'oli' lataj na' lë Meriba,  
en calëga ca gulunë' la' guixi' ga dë lataj lë Masa,

<sup>9</sup> cate' ni' gula'zì' bë'ë xuz xtó'oli' neda'.

Gula'zì' bë'ë neda' sal-la' bila'lé'enë' yugu' le bena'."

<sup>10</sup> Idú choá' iz gúquida' zì' bönachi gula'cuá' dza ni',

ate' gunniá': "Ta'chixi ta'níguinë' lu icja ládxi'do'gaquië',

en bití' nözguequinë' le rë'ënda' ilunë'."

<sup>11</sup> Que lë ni na' lu yöl-la' rilé quia' bena' tsutsu xtídza'a,

gunniá': "Bití' ca' ila'yázië' ga ulu'zì' ládxi'ë' tsözxön len neda'."

## 96

<sup>1</sup> ¡Guli'gul-la queë' Xanru' tu le cubi!

¡Guli'gul-la queë' Xanru', yúgu'tëli' zóali' yödzölió!

<sup>2</sup> ¡Guli'gul-la queë' Xanru'! ¡Guli'gún zxön lë'!

Tu dza tu dza buli'siyön bönachi didza' dxi'a ca rusölë' rë'u.

<sup>3</sup> Buli'siyön bönachi yúgu'të yödzö yöl-la' ba queë'.

Buli'siyön yúgu'të bönachi le nácagaca zxön nunë'.

<sup>4</sup> Zxöntërö náquië' Xanru', ate' runda' bayúdx cú'uru'-në' yöl-la' ba.

Ral-la' gádxitëru' Lë' ca tadxi bönachi izá'a dios quéguequi.

<sup>5</sup> Yugu' dios quégaca bönachi izá'a nácagacasö budó' guiöj budó' yaga,  
pero Xanru' Dios nunë' lúzxiba xitsá'.

<sup>6</sup> Nacuá' yöl-la' bení', en yöl-la' ba lahuë' Lë'.

Nacuá' yöl-la' huáca, en yöl-la' lachi ga zoa cazë'.

<sup>7</sup> ¡Guli'cu'ë Xanru' yöl-la' ba, bönachi yúgu'të yödzö!

¡Guli'cu'ë yöl-la' ba, en yöl-la' huáca!

<sup>8</sup> ¡Guli'cu'ë Xanru' yöl-la' ba ni'a que Lë'!

¡Guli'guá' le unödzejali', en guli'dá lahuë'!

<sup>9</sup> ¡Guli'gún Lë' zxön, náculi' le naca ba'a!

¡Guli'zxizi lahuë', bönachi idútë yödzölió!

<sup>10</sup> Guli'nná lógaca bönachi yúgu'të yödzö: "Rinná bë'ë Xanru'.

Naguixjë' tsaz luyú, ate' bití' utá cuini.

Ca naca le naca tsahui' uchi'a usöröë' quégaca yúgu'të bönachi."

<sup>11</sup> Ral-la' udzeja lúzxiba, en ulu'zì' xibé luyú.

Ral-la' cödxí'a nísado', en ila'bödxí yúgu'të le nacué' lu nísado'.

<sup>12</sup> Ral-la' udzeja guixi' caz, en yúgu'të le nacué' la' guixi'.

Lu yöl-la' rudzeja quéguequi ilúl-la yaga

<sup>13</sup> lahuë' Xanru', tu' si' ulé'.

Guídë' duchi'a dusöröë' nupa nacué' yödzölió.

Ca naca le naca tsahui' uchi'a usöröë' quégaca yúgu'të bönachi,

enca' quégaca bönachi yúgu'tè yödzo para ilunè' ca rnna xtídzè'è.

## 97

<sup>1</sup> ¡Rinná bē' cazē' Xanru' Dios!

¡Ral-la' ulu'dzeja bönachi idútè yödzölió!

Buli'sí' xibé', libí'ili' zóali' yúgu'tè yödzo izá'a.

<sup>2</sup> Ró'gaca böaj, en le chul-la idú gásibi'ilö ga na' zoè'.

Le naca dxi'a, en le naca tsahui' tu'zóa tsutsu le rinná bē'è.

<sup>3</sup> Rinöru tu guí' zxön lahué',

le uzegui' nupa ta'dá'baga' Lē'.

<sup>4</sup> Tu'zení' le ta'yēpi yōsa yödzölió.

Rilé'e luyú lē ni, en rixxizi.

<sup>5</sup> Tu'úna' guí'ado' ca ruún bidxina' buz lahué' Xanru'.

Náquiē' Xani idútè yödzölió.

<sup>6</sup> Lúzxiba xitsá' naca bē' náquiē' tsahui',

ate' ta'lé'e bönachi yúgu'tè yödzo yöl-la' zxön queē'.

<sup>7</sup> Tu'tuí'i yúgu'tè nupa tun zxön budó' guiöj budó' yaga,

nupa na' tun ba zxön cuínguequi ni'a quégaca budó' quéguequi na'.

Ulu'gá'ana cá'asö yúgu'tè dios quégaca bönachi izá'a lahué' Xanru'.

<sup>8</sup> Bila'yöni bönachi Sión, en bulu'dzeja,

enca' yugu' xxi'ini xi'sóè' Judá.

Tu'dzéjanē' ca ruchi'a rusöröu' netu', Xan.

<sup>9</sup> Nayēpisētērö cazu' Li', Xan, ca yúgu'tè nupa nacuá' yödzölió.

Nayēpisētērö cazu' Li' ca yúgu'tè dios quégaca bönachi izá'a.

<sup>10</sup> Núlöli' nadxi'ili'-nē' Xanru', guli'guequi zi' le naca dö'.

Run chi'i cazē' bö' nácagaca caz nupa néquiguequi queē'.

Rusölé' léguequi lu ná'agaca nupa tuá' dö'.

<sup>11</sup> Ruzení'tica'sö beni' queē' nupa nácagaca tsahui',

ate' tu'zí' xibé' nupa nácagaca dxi'a.

<sup>12</sup> ¡Buli'sí' xibé' Xanru' núlöli' nácali' tsahui'!

¡Buli'subán ládxi'li' ca nunē' Dios Lá'ayi, en guli'cu'è yöl-la' ba!

## 98

<sup>1</sup> ¡Guli'gul-la queē' Xanru' tu le cubi,

tu' nunē' le tun ga rubániru'!

Len yöl-la' unná bē' zxön queē', en yöl-la' huáca lá'ayi queē' nadéli'nē' lu gudil-la.

<sup>2</sup> Nunē' Xanru' ga naca bē' le nadéli'nē'.

Nuluí'inē' bönachi yúgu'tè yödzo náquiē' tsahui'.

<sup>3</sup> Len yöl-la' dxi'i ládxi' queē', en yöl-la' li ládxi' queē'

benē' ca rnna xtídzè'è le guzxí' lu nē'è gunē' quégaca bönachi Israel.

Bila'lé'e bönachi idútè yödzölió ca busölé' rē'u Dios queēru'.

<sup>4</sup> ¡Lu yöl-la' rudzeja queēli' guli'gul-la queē' Xanru', yúgu'téli' zóali' yödzölió!

¡Idú ládxi'li' guli'cu'è yöl-la' ba, en guli'gul-la queē' le naca lá'ayi!

<sup>5</sup> ¡Guli'gul-la queē' Xanru' yugu' salmo, en guli'quinnaj yugu' bihuél-la!

¡Guli'quinnaj lé'egaca arpa, en guli'gul-la yöl-la' ba queē'!

<sup>6</sup> ¡Guli'cödxí lúzugacaba' chivo, en lúzugacaba' bēdxi

lahuē' Xanru' Dios, Nu rinná bē'!

7 ¡Buli'lidza zidzaj, nísado', en yúgu'tè le nacuá' nisa na'!  
 ¡Guli'gul-la yödzölió, en yúgu'tè nupa nacuá' ni'!  
 8 ¡Guli'capa' ná'ali', yugu' yegu,  
 ate' lu yöl-la' rudzeja queëli' guli'gul-la lahuë' Xanru', libí'ili', guí'ado',  
 9 tu' zë'ë duchi'a dusöröë' quégaca bönachi yödzölió!

Ca naca le naca tsahui' uchi'a usöröë' quéguequi,  
 en ca naca le naca dxi'a tsahui' inná bé'enë' yúgu'tè bönachi.

## 99

1 ¡Rinná bë'ë Xanru' Dios! Ta'zxizi yúgu'tè bönachi.

Rö'ë rinná bë'ë ladaj nupa nápagacatëro yöl-la' huáca,  
 légaca Querubín, ate' rizxizi luyú.

2 Nayëpisëtëre' Xanru' lu yödzö Sión,  
 ate' rinná bé'enë' bönachi yúgu'tè yödzö izá'a.

3 Ral-la' ila'gú'u Lë' yöl-la' ba yúgu'tè bönachi,  
 tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxí'i quézinu' le naca tsahui', Li', Bönni' unná bë' nayëpisë.  
 Tsaz naguixju' le naca dxi'a tsáhui'do',  
 en nuzú' quégaquië' zxi'ini xi'sóë' Jacob le naca tsahui', en le naca idútë li.

5 ¡Guli'gún zxönë' Xanru' Dios!  
 Buli'zechu zxíbili' lahuë' Lë' ga rö'ë rinná bë'ë.  
 ¡Lá'ayi náquië' Lë'!

6 Guláquië' Moisés, en Aarón bixúz queë',  
 ate' benë' Samuel tsözxön nupa gula'yéaj ladxí'gaca Lë'.  
 Bulu'lidzë' Xanru', ate' bubí'i cazë' didza'.

7 Tu lu böaj bë'lenë' légaquië' didza'.  
 Gulunë' ca ta'nná bë' xibá queë', en yugu' le gunná bé'enë' légaquië'.

8 Bubi'u didza' lógaca bönachi quiu', Xantu' Dios.  
 Buluí'inu' légaquië' nacu' Dios, en runiti lo' bönachi,  
 pero rubi'u quégaquië' ca sa'yéaj dö' tu'ë.

9 ¡Guli'gún zxönë' Xanru' Dios!  
 ¡Buli'zechu zxíbili' lahui' lo guí'a lá'ayi ga zoa cazë',  
 tu' náquië' lá'ayi Xanru' Dios!

## 100

1 ¡Lu yöl-la' rudzeja queëli' guli'gul-la queë' Xanru',  
 libí'ili' zóali' idútë yödzölió!

2 ¡Lu yöl-la' rudzeja queëli' guli'cu'ë yöl-la' ba Xanru'!  
 ¡Guli'dá lahuë' Lë', en lu yöl-la' rudzeja queëli' guli'gul-la queë'!

3 ¡Guli'tsöjné Xanru', náquië' Dios!

Buzá' cazë' rë'u, en calëga rácasö queëru' zóaru'.  
 Nácaru' bönachi queë', en nácaru' ca bö'cu' zxila' queë'.

<sup>4</sup> Guli'tsaza zaca' ra' yu'u queë', guiëli'-në': "Xclenu'."  
 Guli'tsaza gapa naca lö'a queë', cú'uli'-në' yöl-la' ba.  
 Guli'guié': "Xclenu'", en guli'gunë' zxön.

<sup>5</sup> ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!  
 ¡Zóatica'sö yöl-la' run ca rnna xtídzë'ë queë'!

## 101

<sup>1</sup> ¡Gul-la' ca runu' ca rnna xtídzü'u, en ca nacu' tsahui'!  
 ¡Gul-la' yöl-la' ba quiu' Li', Xan!

<sup>2</sup> Güi'i ládxa'a guna' le naca idú dxi'a.  
 ¿Bátaxi huécju' quia' neda?  
 Lu yu'u lidxa' guna' le naca idú ladxi'.

<sup>3</sup> Biti' gu'a lataj sóalen neda' nitú le naca xihui'.  
 Biti' rilé'eda' dxi'a le tun nupa tu'cá'ana Li'.  
 Biti' ca' guna' léguequi tsözxön.

<sup>4</sup> Biti' ca' gaca' chopá ladxi'.  
 Biti' ca' guna' le naca dö'.

<sup>5</sup> Usunítia' dërö nu bönni' rinnë' que luzë'ë balándo'os.  
 Biti' ca' guá' ilena' nu run ba zxön cuini.

<sup>6</sup> Uyúa' dxi'a tsáhui'do' nupa tun ca rnna xtídzá'guequi luyú ni, para ila'cuá'len neda'.  
 Nu bití' bi xiguia' nabaga' huáca gun xichina'.

<sup>7</sup> Biti' ca' tsöjsóá lidxa' nu rizi' yë'.  
 Biti' gu'a lataj ugá'ana lahua' nu ruí' didza' le cabí naca.

<sup>8</sup> Yugu' zila usunítia' yúgu'të nupa tuá' dö' luyú ni,  
 para ucuíta' lu yödzo queë' Xanru' yúgu'të nupa tuti bönachi.

## 102

<sup>1</sup> ¡Buzé nagu' le rulidza' Li', Xan!  
 ¡Bë' lataj idxín lo' le rinaba yúdxida' Li'!  
<sup>2</sup> Biti' ucache' cuinu' lahua' cate' bi rusaca' zi' neda'.  
 Buzé nagu' neda', en gudáchi ubi'u didza' cate' rulidza' Li'.

<sup>3</sup> Yöl-la' na'bán quia' ruúlu ca dzön,  
 ate' régui rilá lu dxita lu bin quia' ca tu guí'.

<sup>4</sup> Rudú ládxa'a ca raca que guixi' nabidxi,  
 en bíti'rö rizé ládxa'a bi gahua'.

<sup>5</sup> Tu' rinnëda' ládxa'a nadxítalë'a.  
<sup>6</sup> Naca' ca tuba' biguínmi zóaba' luyú bidxi,  
 o ca tuba' cuturú dxíaba' tu lu yu'u nadachi.

<sup>7</sup> Nabéaj yëla guiój lahua',  
 ate' naca' ca tuba' biguínido' dxíaba' túziba' ícjo'o yu'u.

<sup>8</sup> Yugu' dza nupa bití' ta'lé'e neda' dxi'a tu'didza' yudxi neda'.  
 Nupa tu'titaj neda' tu'gún dxin la' cate' nu tu'dxía dö'.

<sup>9</sup> Naca le rahua' ca dödo'sö,  
 en nutsi' nisa ribödxá' le rë'ja'.

<sup>10</sup> Caní raca quia' tu' rilenu' neda', en réquinu' neda' zi'.  
 Gulisu' neda', en gurú'unu' neda' tsölá'alö.

<sup>11</sup> Naca yöl-la' na'bán quia' ca tu zxul-la rilá' cate' ribía gubidza,  
 en rudú quia' ca raca que guixi' ricuádi.

12 ¡Li', Xan, zóatica'su',  
 en zóaléntica'sö Lo' bönachi!  
 13 ¡Chasu', en huéchi' ládxi'u bönachi yödzö Sión!  
 ¡Chibidxín dza güi'i ládxi'u léguequi!  
 ¡Ön, chibidxín dza na'!

14 Netu', huen dxin quiu', nadxí'itu' yugu' guiöj nacuá' lu zö'ö run chi'i yödzö Sión,  
 en ruí'i ládxi'tu' ga ridxintë bëchtö rö'ö la' nöza que.

15 Bönachi yugu' yödzö izá'a iladxi Lë' Xanru',  
 ate' nupa ta'nná'bë' yödzölió iladxi yöl-la' zxön queë'.

16 ¡Nuchisë' Xanru' caz yödzö Sión,  
 ate' ulu'i lahuë' ni' lu yöl-la' zxön queë'!

17 Riyönnë' le tu'lidza Lë' nupa ta'yadzaj ta'yudxi.  
 Biti' ca' uzöë' tsölá'alö le tu'lidza yudxi Lë'.

18 Buli'zúaj lë ni lu guichi para ulu'laba zxí'ini xi'sóali' le,  
 ate' nupa si' ilalaj ila'gú'u Xanru' yöl-la' ba.

19 Ga ni' ribözë' Xanru' xitsá' lu lataj lá'ayi queë',  
 ga ni' zoë' Xanru' yehua' yubá, ruzé' naguë'.

20 Riyönnë' le ta'nnë' ladxi' nupa nadzúngaca,  
 en usané' nupa narugu quéguequi ilátigaca.

21 Soa nu usiyöni bönachi yödzö Sión ca naca Lë' Xanru',  
 ate' ila'gú'u Lë' yöl-la' ba lu yödzö Jerusalén,

22 cate' ulu'dubi tsözxön bönachi yugu' yödzö izá'a,  
 en bönachi yugu' luyú,  
 ate' tsözxön ila'gú'u yöl-la' ba Xanru'.

23 Benë' Xanru' ga gucuí'da' la' nöza,  
 en nunë' ga soa' nabábasö dza.

24 Gunnía': Dios quia', biti' gútiu' neda'  
 cate' ni zoa' gatsaj iza ral-la' soa' ibana'.  
 Zóatica'sö casu' Li'.

25 Dza ni'te gudixju' yödzölió,  
 ate' len na' casu' benu' lúzxiba.

26 Huadödi quéguequi, pero Li', tsaz idi'u.  
 Ilexu' yúgu'tëguequi ca riyexu' lari',  
 en ca tu lari' utubu' léguequi, en utsó'o léguequi.

27 Li', biti' ca' utsá' cuinu', en biti' ca' guexu'.

28 Zxí'inigaca huen dxin quiu' ila'böza dxi'a tsáhui'do',  
 ate' ucú'u tsutsu zxí'ini xi'sóagaquië' lo'.

## 103

1 ¡Bil-la yöl-la' ba queë' Xanru', li', bö' naca caza',  
 ate' idútë le naca', bil-la yöl-la' ba que Lë' lá'ayi!

2 ¡Bil-la yöl-la' ba queë' Xanru', li', bö' naca caza',  
 en biti' gal-la ládxi'u yúgu'të le ruzi'u xibë'!

3 Runiti lo cazë' neda' ca naca yúgu'të dul-la' nabága'a,  
 en rugúë' yúgu'të xihuë'a.

4 Ruhuöá'uë' neda' lu lataj chul-la,

en ruzá' ládxë'ë quia' yöl-la' dxi'i ladxi', en yöl-la' ruhuéchi' ladxi'.

<sup>5</sup> Rigu'ë xinöza' yugu' le naca dxi'a,  
lë na' run ga ruhuóaca' ca tu bönni' zoë' iz cuidi' queë',  
ca na' raca queéba' bisia'.

<sup>6</sup> Runë' yugu' le naca dxi'a,  
en ruchi'a rusöröë' quégaca yúgu'të nupa zoa nu rusaca' léguequi zi'.

<sup>7</sup> Buzéajni'inë' Moisés yugu' le gun cazë' Lë',  
en buluí'inë' bönachi Israel yugu' le zxön runë'.

<sup>8</sup> Xanru' ruhuéchi' ladxi' cazë' bönachi, en ruzá' ládxë'ë quéguequi.  
Biti' rilétenë', pero nadxí'itiqui'sinë' léguequi.

<sup>9</sup> Biti' ruzétiqui'sinë' rë'u le bach,  
en biti' rilétiqui'sinë'.

<sup>10</sup> Biti' runë' rë'u xiguia' ca sa'yéaj dö' nuá'aru',  
en biti' rubi'ë queëru' ca naca le xihui' nabága'ru'.

<sup>11</sup> Naca caní tu' ca na' naca xitsá'tërö lúzxiba ca luyú ni,  
la' canísö naca zxön ca nadxí'inë' Xanru' nupa tadxi Lë'.

<sup>12</sup> Tsca nácatërö zi'tu' ga rilén gubidza ga ridxintë ga ribía,  
la' canísö rucuitë' yugu' le ta'bága'ru' Lë'.

<sup>13</sup> Ca na' ruhuéchi' ládxë'ë xúzgaca cázabi' yugu' zxí'inë',  
la' canísö ruhuéchi' ládxë'ë Xanru' nupa tadxi Lë'.

<sup>14</sup> Caní runë' tu' nözinë' le nácaru'.  
Röjnenë' néquiniru' bëchtö yu.

<sup>15</sup> Tsca nácacagaca dza zóaru' nabanru',  
nácagaca ca raca que xiyija guíxi'do'.

<sup>16</sup> Cate' recaj bö', ruúlu runítisö xiyija na',  
en biti' naca bë' ga na' guzóa.

<sup>17</sup> Xanru', tsaz nadxí'inë' nupa tadxi Lë',  
en runë' quégaca zxí'iniguequi le naca dxi'a.

<sup>18</sup> Caní runë' quégaca nupa tun ca rnna xtídzë'ë,  
en quégaca nupa tun ca rinná bë' xibá queë'.

<sup>19</sup> Naguixjë' Xanru' xilatjë' yehua' yubá ga na' rö'ë rinná bë'ë.  
Rinná bé'enë' yúgu'të le dë.

<sup>20</sup> ¡Guli'cu'ë yöl-la' ba Xanru', libí'ili', gubáz lá'ayi queë',  
nápatëröli' yöl-la' huáca zxön, en runli' ca rnna xtídzë'ë,  
libí'ili' na' runli' ca rnna didza' ru'ë!

<sup>21</sup> ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,  
libí'ili', huen dxin queë' na', runli' ca rë'ëni quézinë' Lë'!

<sup>22</sup> ¡Guli'cu'ë yöl-la' ba Xanru', yúgu'tëli' na' nucu'ë libí'ili',  
libí'ili' zóali' yúgu'të lataj ga na' rinná bë'ë Lë'!  
¡Bil-la yöl-la' ba queë' Xanru', li', bö' naca caza'!

## 104

<sup>1</sup> ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

<sup>2</sup> ¡Nusubaga' cuinu' bení' ca zxo' nacu' cazu',  
ate' naguixaj cazu' lúzxiba ca tu lari' zxön!

<sup>3</sup> Naguixju' xilataj lidxu' lahui nisa dë xitsá'alö.

Dxía cazu' lu böaj ca tu lu carreta, en ridó' lu bö'ös.

4 Rugunu' dxin bö' raca ca tu gubáz quiu',  
 enca' yugu' guí' ca huen dxin quiu'.  
 5 Nuzú' tsutsu luyú ni lu xilibi,  
 en biti' ca' gaca nu utsá' xilataj.  
 6 Gudixju' nisa zxön luyú ni ca tu lari' nabaga' le,  
 ate' yöjbaga' nísado' na' yugu' guí'a.  
 7 Buzenu' le bach nisa na', ate' burúaj,  
 en cate' biyön chi'u, bayúdx buzunnaj nisa na'.  
 8 Gurén yugu' lu guí'a, en bötaj ga naca ra' yegu,  
 ga bidxintè yöjsóa ga nupó'o que nisa na'.  
 9 Gudixju' buzá' que nísado' ga biti' gaca tödi.  
 Bítirö' caz tseajbaga' nisa na' luyú bidxi.  
 10 Runu' ga ralaj beaj yugu' lè'e guí'ado',  
 enca' ga ta'dödi yegu ga rö'ögaca röga'.  
 11 Yudzu yugu' yegu na' nisa té'ajba' böa' guixi',  
 le rugúa yöl-la' ribídx quégacaba' burro ta'dásiba' la' guixi'.  
 12 Yugu' ra' yegu rö'ögaca yaga ga tu'dxiaba' biguínido' xcá'agacaba',  
 en túl-laba' yugu' lu ni'a ně'eguequi.  
 13 Rigú'u nisa guiöj quiu' yugu' lu guí'a,  
 en runu' ga tu'huöla tu'dzé'e yugu' le dzö'ö luyú.  
 14 Runu' ga rizxön yö le táguba' böa' bēdx,  
 en yugu' cuan guixi' tu'gún dxin bönachi,  
 le ilagu ni'a que le nudó'o luyú,  
 15 en xisi uva le run ga tudzeja lādxi'guequi,  
 en za olivo le ta'gú'u láhuiguequi lu yöl-la' ruzí' xibé quéguequi,  
 en yöta le nabániguequi.  
 16 Tu'zú' xibé nisa guiöj yaga cedro dzö'ö lu guí'a Líbano,  
 yugu' yaga na' budó'o, Xantu'.  
 17 Ni' tu'dxiaba' biguínni xcá'agacaba',  
 ate' tunba' biyúz lídxigacaba' ni'.  
 18 Nunu' Li' yugu' guí'a sibi ga dzö'öba' bdxina' guixi',  
 enca' yugu' znan bulóaj gapa tapa chi'i cuíngacaba' bizxidxu'.  
 19 Benu' beo' le naca bē' yugu' beo' que iz,  
 ate' ribía gubidza ga ral-la' cuía.  
 20 Benu' chi'i dzö'ölö, en cate' naca chul-la  
 ta'rúajba' ta'daba' böa' guixi'.  
 21 Ta'bödxi'aba' bēdx guixi'do', ta'zóa régu'ba' le ila'zönba'.  
 Tu'guílajba' le nuzóè' Dios iláguba'.  
 22 Cate' rilén gubidza tu'dxinba' lídxigacaba',  
 en röjoxagacaba' yugu' lu znan bulóaj quégacaba'.  
 23 Ní'irö ta'rúaj bönachi sōjaca huen dxin,  
 en tun caz dxin ga ridxintè ribía gubidza.  
 24 Xan, ziónterö yugu' le nunu' Li'.  
 Len yöl-la' réajni'i zxön quiu' nunu' yúgu'tē.  
 Nalí luyú yödzólió ni yugu' le dxi'a nunu'.  
 25 Ni' zoa nisa nácatērö zxön,  
 ga na' nacuá'aba' böa' guizxi yu,  
 böa' cuidi', enca' böa' zxön.  
 26 Ni' ta'dödi barco zxön,  
 enca' böa' zxön lēba' leviatán, böa' na' nuzóa casu'.



27 Yúgu'tëba' ta'bözaba' Li',  
cate' idxinrö ugagu' légacaba'.  
28 Rugagu' légacaba', ate' táguba'.  
Runödzu' le iláguba', ate' tu'huölej ta'dzé'eba'.  
29 Cate' ruhuecju' quiu', tádxiba',  
en cate' ruzi'u bö' quiu', tátiba',  
en ruhuöáca yu le néquinigacaba'.  
30 Cate' rigú'u légacaba' bö', nabángacaba'.  
Rucubu' yúgu'të le nacuá' yödzölió.

31 ¡Ral-la' gácatíca'sö yöl-la' ba queë' Xanru'!  
¡Ral-la' ila'yaza ládxi'tíca'sö bönachi le nun cazë' Lë'!

32 Ruyúë' Xanru' luyú, ate' rizxizi.  
Riganë' yugu' guí'a, ate' rirúaj dzön.

33 ¡Gul-la' queë' Xanru' yúgu'të dza soa' ibana'!  
¡Gul-la' yöl-la' ba queë' Dios tsanni ni zoa' nabana'!  
34 ¡Zxixi naca le rizá' ládxa'a ca naca queë'!  
¡Udzéjalenda'-në' Xanru'!

35 Ila'nítië' bönni' dul-la' nacu'ë yödzölió ni,  
en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!  
¡Yöl-la' ba Lë' Xanru'!

## 105

1 ¡Guli'guíë' Xanru' Dios: "Xclenu"!  
¡Buli'lidzë' Lë'!  
¡Buli'siyön bönachi ca nácacaca le benë'!  
2 ¡Guli'gul-la queë'! ¡Guli'gul-la yöl-la' ba queë'!  
¡Guli'guí' didza' ca nácacaca le zxön nunë'!  
3 ¡Buli'sí' xibé Lë' lá'ayi!  
Ral-la' ulu'dzeja ladxi' yúgu'të nupa ta'guilaj Xanru'.  
4 Guli'guiljë' Xanru', enca' yöl-la' huáca queë'.  
Guli'guí' ládxi'tíca'sö idxinli' lahuë'.

5 Guli'tsöjné le nácacaca zxön benë' Lë',  
lë na' tun ga rubániru', enca' ca nácacaca didza' bë'ë cate' buchi'a busöröë' bönachi,  
6 libí'ili', zxí'ini xi'sóë' Abraham, huen dxin queë' Dios,  
en libí'ili', zxí'ini xi'sóë' Jacob, nácali' nupa gurö cazë' queë'.  
7 Lë' náquië' Xanru' Dios.  
Idútë yödzölió naca bë' ca buchi'a busöröë' bönachi.  
8 Röjnétiqúi'sinë' didza' dzaga nunë',  
didza' na' gunná bë'ë ila'zí' lu ná'agaquië' chi gayuá' cö' zxí'ini xi'sóë' Abraham,  
9 didza' dzaga na' bénlenë' Abraham,  
le naca didza' na' benë' tsutsu Dios ca gunë' queë' Isaac.  
10 Ní'irö benë' tsutsu didza' na' lahuë' Jacob,  
le naca tu le rinná bë'enë' lë' gunë',  
para gaca quégaca bönachi Israel tu didza' dzaga le zoa tsaz.

- 11 Gunnë': "Gunna' queëli' xiyúgaca bönachi Canaán, le guequi tsaz queëli', en quégaca zxí'ini xi'sóali'."
- 12 Caní gunné' Dios cate' ni' gula'cu'ë nabábagaquië' bönni' Israel. Tu chópasë' guláquië', en guláquië' bönni' zi'tu' luyú.
- 13 Gula'dé' tu ia'tú yödzö izá'a. Bulu'zë'ë tu ga nu gunná bë', en bila'dxínë' ga nacuá' bönachi izá'a,
- 14 pero biti' bë'ë lataj Dios nu usaca' zi' bönachi queë' na', en buzenë' le bach bönni' gula'nná bë'ë para gulácalenë' bönachi queë'.
- 15 Gunnë': "Biti' bi gunli' quégaca bönachi nabö caza' quia', en biti' bi dö' guá'ali' quégaquië' bönni' tu'ë didza' uláz quia'."
- 16 Benë' ga guyú'u gubín yödzölió, en benë' ga biyadzaj yöta ilahuë'.
- 17 Gusöl-lë'ë tubi' bi'i bönni', bi'i bidxinbi' ni' zí'alö ca légaquië', tu' gulúti'ë-bi' José para gácabi' bi'i nadó'o.
- 18 Gulúgui'ë bönni' Egipto ní'abi' len du guíë, en bulu'dé'ë yen ná'abi' bregui' guíë,
- 19 ga bidxintë dza budxín xtídzë'ë Xanru', tu' guzxí' bë'ë Xanru' Dios José na'.
- 20 Ní'irö gusöl-lë'ë bönni' gunná bë'ë luyú Egipto nu busán-bi'. Bönni' na' gunná bé'enë' yödzö izá'a zían busölë'-bi'.
- 21 Benë' ga gúcabi' xan yu'u queë', ate' guta' lu ná'abi' yúgu'të le dë queë' bönni' na' rinná bë'ë.
- 22 Guta' lu ná'abi' gulú'ubi' lidxi guíë bönni' ta'nná bë'ë tsca ré'ëni quézibi', para busédibi' bönni' gula queë' yöl-la' réajni'i.
- 23 Ní'irö bila'dxín ca' bönachi Israel luyú Egipto. Caní guca, guzóë' Jacob lu xiyúgaca zxí'ini xi'sóë' Ham.
- 24 Benë' Dios ga gula'yántërö bönachi queë' luyú ni', ate' guláquië' zióntërë' ca nupa gula'díl-lalen légaquië'.
- 25 Benë' Dios ga gulunë' zi' bönni' Egipto bönachi queë'. Lu yöl-la' banís quégaquië' gula'z'í yé'enë' nupa na' nácagaca huen dxin queë' Lë'.
- 26 Ní'irö gusöl-lë'ë Moisés, huen dxin queë', lógaquië', enca' Aarón, bönni' na' nabö cazë' Lë'.
- 27 Gulunë' chopë' ni zían yöl-la' huáca zxön queë' Dios lógaca bönachi Egipto na'. Gulunë' zían yöl-la' huáca que yehua' yubá lu xiyúgaca zxí'ini xi'sóë' Ham.
- 28 Gusöl-lë'ë Dios le naca chul-la, ate' böáca chul-la lahui' dza, en biti' guca ila'dá'baguë'ë xtídzë'ë.
- 29 Benë' ga nisa yegu nacuá' lu yegu quégaquië' böáca rön, en benë' ga gulátiba' böla dzö'öba' yugu' yegu na'.
- 30 Gula'yanba' riu lu xiyúgaquië', ga bidxintë gula'yázaba' yu'u lidxë' bönni' rinná bé'enë' légaquië'.
- 31 Bë'ë didza' Dios, ate' gulátsjaba' bötsugayu guizxi yu, en gulátsjaba' ca' bö'iyudo' idútë lu xiyúgaquië'.
- 32 Benë' ga gurö'ö guiöj bögui' yöla sunna uláz que nisa guiöj, ate' böxaj ca' guí' lu xiyúgaquië'.
- 33 Guditsjë' yugu' lubá uva quégaquië', en yugu' yaga higo, en busunítië' yaga rö'gaca lu xiyúgaquië'.
- 34 Bë'ë didza', ate' bila'dxinba' böchi'zu guizxi yu, enca' böchi'zu huë'ënido', cuntú nu gaca ulaba légacaba',
- 35 ate' guláguba' idútë guixi' cuan rö'ö lu xiyúgaquië', en guláguba' ca' idútë le naz nudá'agaquië' lu xiyúgaquië'.

36 Benë' ga gulátibi' yúgu'tëbi' bi'i bönni' lo idütë lu xiyúgaquië'.

Bi'i lo na' quégaquië' bönni' nál-la.

37 Ní'irö bubéajë' Dios yugu' bönni' Israel luyú na', nuá'agaquië' dumí plata, en oro, ate' cuntú nu yöjchegu' nu nutsa' légaquië'.

38 Bulu'dzeja bönachi Egipto cate' bulu'zë'ë bönni' Israel lu xiyúgaquië', ate' guladxi gula'dzöbi tu' nöziguequinë' bönni' Israel na'.

39 Gusöl-lë'ë Dios tu böaj le gulú'u bönachi queë' zxul-la, ate' chi'i dzö'ölö gusöl-lë'ë guí' le buzení' quégaquië'.

40 Gula'nábinë' Lë', ate' gusöl-lë'ë böra guíxi'do' zían le ilahuë', en benë' ga bulu'huöla'j gula'dzé'enë' yöta que yehua' yubá.

41 Bulu'ë lahui tu guiöjto'o, ate' gulalaj nisa yégudo'.

Gudödi nisa na' luyú bidxi ni' ca tu nisa yegu gubó'o.

42 Caní benë' Dios tu' yöjnenë' didza' lá'ayi queë', le guzxi' lu në'ë gunë' queë' Abraham, huen dxin queë'.

43 Bubéajë' bönachi queë' lu yöl-la' rudzeja quéguequi, ate' lu yöl-la' rudzeja quéguequi gula'bödxí'a bönachi gurö cazë' queë'.

44 Bunödzejë' xiyúgaca bönachi yugu' yödzö izá'a quégaquië'.

Bulu'zi'ë xibé le ilá' luyú ni'a que dxin gulún bönachi izá'a na'.

45 Caní benë' Dios para ilunë' ca rnna le gunná bé'enë' légaquië' ilunë', en ilunë' ca rinná bë' xibá gudixjë' Lë'.

¡Guli'cu'ë yöl-la' ba Xanru'!

## 106

1 ¡Guli'cu'ë yöl-la' ba Xanru'!

¡Guli'guíë' Xanru': "Xclenu" tu' náquië' idú dxi'a!

¡Zóatica'sö yöl-la' dxi'i ladxi' queë'!

2 ¿Nuzxi caz gaca quixjö' ca nácagaca le zxön nunë' Xanru', en ulu'i lahui ca naca yöl-la' ba queë'?

3 ¡Bica' ba nupa tun le naca tsahuí', nupa na' túntica'sö le naca dxi'a!

4 Yöjné neda', Xan, cate' ruzá' ládxi'u quégaca bönachi quiu'.

Buzá' ladxi' quia' yöl-la' rusölá quiu',

5 para gaca ilé'eda' gata' yöl-la' tsahuí' quégaca nupa narö cazu' quiu',

en para gaca udzéalenda' bönachi quiu' cate' tu'dzeja,

en para gaca uzí'léna' xibé nupa néquiguequi quiu'.

6 Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihuí'.

7 Cate' gula'cu'ë xuz xtó'otu' luyú Egipto, bití' gula'yéajni'inë' le nácagaca zxön benu'.

Bití' yöjnéguequinë' yugu' le benu' quégaquië' lu yöl-la' dxi'i ladxi' quiu',

pero gula'dá'baguë'ë xtídzú'u cate' gula'cu'ë ra' nísado' lé Nísado' Xíná.

8 Busölë' Xanru' Dios légaquië' para gaca bë' runë' ca rnna xtídzë'ë, en para ulu'e lahui yöl-la' huáca zxön queë'.

9 Caní guca, buzenë' le bach Nísado' Xíná na', ate' la' gubídxitë.

Guchë'ë légaquië' ga rë'do' lu nísado' na',

ate' gula'dë' lu yu bidxi ga na' gurö'ö nisa.

10 Caní guca, busölë' légaquië' lu na' nu na' benë' légaquië' zi',

en buá'uë' légaquië' lu na' nu na' gudíl-lalen légaquië'.

11 Ní'irö gubaga' nísado' na' nupa gula'sí regu' légaquië'.

Cuntu nu bugá'ana nu bidzaga léguequi.

12 Ní'irö gula'yéajlë' bönachi queë' xtídzë'ë,  
ate' gulul-la yöl-la' ba queë'.

13 Pero la' gulál-latë ládxi'gaquië' yugu' le benë'.

Biti' gula'nábinë' Lë' uluí'në' légaquië' le ral-la' ilunë'.

14 Zián le gula'zë ládxië'ë cate' ni' gula'cu'ë la' guixi' ga dë lataj,  
en gula'zí' bë'ë Dios la' guixi' na'.

15 Ní'irö bë'ë Dios quégaquië' le gula'nábinë' Lë',  
pero gusöl-lë'ë quégaquië' tu yödzöhuë' le bëti ziánagaquië'.

16 Cate' bulu'zxé'enë' Moisés ga ni' gula'cu'ë tsözxön,  
en bulu'zxé'enë' ca' Aarón, bönni' nubéajë' Xanru' quez queë',

17 la' ná'asö guyalaj luyú, en bucachi' Datán.

Bucachi' ca' nupa gulún tsözxön Abiram.

18 Gulaj tu guí' zxön ga na' nudúbigaquië',  
en buzegui' nupa na' guluá' dö'.

19 Lu guí'a Horeb gulunë' tu bédxido' néquiniba' oro,  
en gula'yéaj ládxië'ë budó' oro na'.

20 Caní guca bulu'cá'anë' Dios nayépisëtë'rë',  
para gula'yéaj ládxië'ë budó' oro le naca ca tu bédxi ráguba' guixi'.

21 Gulal-la ládxië'ë Dios Nu busölá légaquië'.

Lë' benë' zián le zxön le gulácalen légaquië' luyú Egipto.

22 Benë' zián le tun ga rubániru' lu xiyúgaca zxí'ini xi'sóë' Ham,  
en zián le tun ga rádxi'ru' Lë' le benë' ra' Nísado' Xiná.

23 Que lë ni na' gunné' Dios usunítië' légaquië', ate' la' cá'asö gunë'  
la'tu' cabí guzuínë' Moisés, bönni' rö queë', lahuë' Lë',

en buzóa dxíë' yöl-la' rilé queë' para cabí usunítië' légaquië'.

24 Ní'irö biti' gulë'ënë' ila'yázië' luyú dxi'a na' dë lógaquië'  
tu' cabí gula'yéajlë'ë xtídzë'ë Dios.

25 Gula'nnë' zí'ë queë' Dios gapa naca lu yu'u guídi quégaquië',  
en biti' bulu'zë náguië' chi'ë Xanru'.

26 Que lë ni na' benë' tsutsu Dios xtídzë'ë le bë'lenë' légaquië',  
gunné' gunë' ga ilátië' ga na' naca la' guixi' ga dë lataj.

27 Gunnë' gunë' ga ilasi lásië' zxí'ini xi'sóagaquië' ladaj zián yödzö izá'a,  
en gúsië' légaquië' gapa nacuá' bönachi zí'tu'.

28 Ní'irö bulu'dödi cuíngaquië' lu na' budó' guíë lë Baal-peor,  
en gulahuë' xipëla'gacaba' böa' guixi' gulútië'-ba'

para gulunë' zxön yugu' dios nati.

29 Ca' guca, gulún lenë' Dios ni'a que le gulunë',  
ate' gulén tu yödzöhuë' zxön ladjagaquië'.

30 Ní'irö guzuínë' Finees, en benë' le raza ládxië'ë Dios,  
ate' guzóa dxi yödzöhuë' zxön na'.

31 Buzóë' Dios queë' Finees na' náquië' tsahui' ni'a que  
lë na' benë' le nuzóë' tsaz ca naca queë'.

32 Lësca' gulún lenë' Dios ga na' zoa nisa lë Meriba,  
ate' Dios gulénë' Moisés tu' nözi lë na' gulunë'

33 tu' gula'dá'baguë'ë xtídxë'ë Bö' Lá'ayi queë',  
ate' Moisés, lu yöl-la' ridzá'a queë', gunné' lizë'.

34 Biti' bulu'sunítië' bönachi tuá' dö' gula'cuá' lu yu ni,

ca na' gunná bé'enë' Xanru' légaquië' ilunë'.

<sup>35</sup> Gulunë' léguequi tsözxön

en bila'zédë' ilunë' ca gulún bönachi na',

<sup>36</sup> ate' gula'yéaj ládxe'ë budó' guiöj budó' yaga quéguequi,  
le guca quégaquië' ca tu du yalaj le guzxön légaquië'.

<sup>37</sup> Gulútië'-bi' zxi'inigaquië' lógaca bö' xihui',  
yugu' bi'i bönni', en nigúlado',

<sup>38</sup> en bulu'laljë' xichöngaca nupa biti' bi nabága'gaca  
tu' bulu'laljë' xichöngacabi' bi'i bönni' quégaquië', en bi'i nigula quégaquië',  
yugu' bi'i na' gulútië'-bi' lógaca budó' guiöj budó' yaga nacúa' luyú Canaán,  
ate' gúcada' xihui' luyú ni tu' nözi rön na' bulu'laljë'.

<sup>39</sup> Ca' guca, guláquië' xihui' ni'a que le gulunë'.

Guláquië' ca tu nigula udá dzaga tu' bulu'cá'anë' Dios quégaquië'.

<sup>40</sup> Que lë ni na' guléde'enë' Xanru' Dios bönachi queë',  
en biti' bilé'enë' dxi'a nupa na' néquiguequi queë'.

<sup>41</sup> Ní'irö budödë' légaquië' lu ná'agaca bönachi zían yödzö izá'a,  
ate' nupa bulu'dí'i légaquië' gula'nná be'e légaquië'.

<sup>42</sup> Nupa na' biti' bila'lé'e légaquië' dxi'a gulunda' légaquië' dxin,  
en bulu'zxicaj légaquië' lu yöl-la' unná bë' quéguequi.

<sup>43</sup> Zían luzuí gú'unë' Dios usölë' légaquië',  
pero gula'dá'baguë'ë le rë'enë' ilunë',  
ate' guzxöntë'rö xiguia' nabága'gaquië'.

<sup>44</sup> Bilé'enë' Dios yöl-la' bayechi' quégaquië'  
en biyönnë' ta'bödxi yechë'ë.

<sup>45</sup> Yöjnenë' didza' dzaga núnlenë' légaquië',  
ate' bubequi lahuë' quégaquië' tu' nazxöntë'rö yöl-la' dxi'i ladxi' queë'.

<sup>46</sup> Benë' Dios ga bulu'huéchi' ladxi' légaquië'  
nupa na' gula'ché' légaquië' nadzúngaquië'.

<sup>47</sup> ¡Busölá netu', Xantu' Dios!

Guléaj netu' ladjagaca yödzö izá'a

para guiëtu' Li': "Xclenu" ni'a que Lo' lá'ayi,  
en lu yöl-la' rudzeja zxon queëtu' cú'utu' Li' yöl-la' ba.

<sup>48</sup> ¡Yöl-la' ba Lë' Xanru', Dios quégaca bönachi Israel  
na'a dza, en yúgu'të dza si' zaca!

Ral-la' ila'nná yúgu'të bönachi: "¡Ca' gaca!

¡Guli'cu'ë yöl-la' ba Xanru' Dios!"

## 107

<sup>1</sup> ¡Guli'guíë' Xanru': "Xclenu" tu' náquië' dxi'a,  
en tu' zóatica'sö yöl-la' dxi'i ladxi' queë'!

<sup>2</sup> Ral-la' ila'nná caní nupa na' buá'uë' Xanru',  
nupa na' buá'uë' lu ná'agaca nupa gulún léguequi zi',

<sup>3</sup> en nubéajë' léguequi zían lu yödzö izá'a,  
saca' ga rilén gubidza, en saca' ga ribía,  
saca' ga za' bö' ziaga, en saca' ga ridödi gubidza beo' ziaga.

<sup>4</sup> Bal-lë' gula'dë' nanítigaquië' la' guixi' ga dë lataj,  
en ga ni' biti' zoa nöza.

Biti' guca ulu'dzölinë' tu yödzö ga gaca tsöjcu'ë.

<sup>5</sup> Gula'dunë', en gula'bidxë' nisa,  
en gudú ládxi'gaquië'.

<sup>6</sup> Ní'irö lu lë na' raca quégaquië' bulu'lidzë' Xanru',  
ate' busölë' légaquië' lu zián le gula'guí'i gula'záquë'ë.

<sup>7</sup> Guchë'ë légaquië' tu la' nöza tsahui',  
en guchë'ë légaquië' tu lu yödzö ga tsöjcu'ë.

<sup>8</sup> Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

<sup>9</sup> Rugui'jë' nupa ta'bidxi ladxi',  
en rugahuë' nupa ta'dún le nácagaca dxi'a queë'.

<sup>10</sup> Bal-lë' gula'cu'ë ga chul-la, en ga zoa bönadxi ilátië'.  
Gula'dzunë' yugu' lu du guíë, en gula'guí'i gula'záquë'ë

<sup>11</sup> tu' gula'dá'baguë'ë xtídzë'ë Xanru' Dios,  
en bulu'zóë' tsólá'alö le rigu'ë icja ládxi'do'gaquië'.

<sup>12</sup> Tu' gulunë' bayúdx dxin, gudú ládxi'gaquië'.  
Gula'dzö'ë lu yu zxan yua' nuá'agaquië',  
ate' cuntu nu zoa gácalen légaquië'.

<sup>13</sup> Ní'irö lu lë na' raca quégaquië' bulu'lidzë' Xanru',  
ate' busölë' légaquië' lu zián le gula'guí'i gula'záquë'ë.

<sup>14</sup> Bubéajë' légaquië' ga na' gula'cu'ë ga chul-la,  
en ga guzóa bönadxi ilátië',  
ate' guditsjë' yugu' du guíë núga'gaquië'.

<sup>15</sup> Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

<sup>16</sup> Ruquínnejë' le tá'baga' gapa nu riyaza lidxi guíë le néquiniguequi guíë bronze,  
en ruzxuzxjë' yugu' vara néquiniguequi guíë.

<sup>17</sup> Bal-lë' gula'guí'i gula'záquë'ë tu' gula'dá'baguë'ë Dios,  
en tu' nözi dö' gulu'ë.

<sup>18</sup> Gula'gúti'në' bíti'tës la' huagu,  
en gula'zóa ilátië'.

<sup>19</sup> Ní'irö lu lë na' raca quégaquië' bulu'lidzë' Xanru',  
ate' busölë' légaquië' lu zián le gula'guí'i gula'záquë'ë.

<sup>20</sup> Gusöl-lë'ë quégaquië' xtídzë'ë, en bunë' légaquië',  
en busölë' légaquië' lu yöl-la' guti.

<sup>21</sup> Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

<sup>22</sup> Ral-la' ilë' Dios: "Xclenu", en bi ulu'nödzjë' queë',  
en lu yöl-la' rudzeja quégaquië' ilul-lë' ca nácagaca le nunë'.

23 Bal-lë' gula'dödë' lahui nísado' yugu' lu barco zxön,  
en gulunë' dxin yugu' lu nísado'.

24 Bila'lé'enë' yugu' le nunë' Xanru',  
en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',  
ate' guyasa gudxía nísado'.

26 Gula'yasa barco ca tu lu guí'ado' nisa,  
en la' bótjatë ga rö'ö röga' lu nisa na'.

Tu' guzóale'e bönadxi ilátië' gudú ládxi'gaquië'.

27 Gula'zxízië', en yöjchëgu'gaquië' ca bönni' ta'zúdxinë',  
ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',  
ate' busölë' légaquië' lu zián le gula'guí'i gula'záquë'ë.

29 Benë' Dios ga guzóa dxisö bö' budunu' na' recja,  
ate' guzóa dxi le rasa ridxía lu nísado'.

30 Bulu'dzéjanë' tu' guzóa dxi lu nísado',  
en tu' guchë'ë Dios légaquië' dxi'a tsáhui'do' ga na' sōjáquië'.

31 Ral-la' ilë' Xanru': "Xclenu" tu' nadxí'inë' légaquië',  
en tu' benë' yugu' le zxön, gúcalenë' légaquië'.

32 Ral-la' ulu'lu'ë lahui yöl-la' zxön queë' ga nudúbigaca bönachi queë',  
en ila'gu'ë Lë' yöl-la' ba ga nudúbigaquië' bönni' gula tu'chi'a tu'söröë'.

33 Runë' Xanru' Dios ga tu'huí'i dërö yugu' yegu,  
enca' yugu' beaj nisa.

34 Ga naca yu ya'a runë' ga ruhuöáca yu bidxi,  
ni'a que le xihui' nabága'gaca nupa nacuá' ni'.

35 Ga naca yu bidxi runë' ga ruhuöáca yu nabisa,  
ate' ralaj nisa ga biti' bi nisa guzóa.

36 Ni' ru'ë lataj ila'cuá' nupa ta'dún  
para ilunë' ni' yödzö ga ila'cu'ë.

37 Tazë' yugu' le tazë', en tu'dë'ë yugu' lubá uva,  
yugu' le ta'bía yödxí yana'.

38 Runë' Xanru' ga raca dxi'a quégaquië',  
en ga ta'cuá'bi' ziánbi' bi'i quégaquië',  
en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjë' bönachi queë',  
en tu'zötjë' léguequi,

en tu'saca' zi'ë léguequi, en tu'ë dö' quéguequi,

40 rucá'anë' Dios bönni' na' dë lu ná'agaquië' cá'asö,  
en runë' ga ta'dë' la' guixi' ga dë lataj, en tu luyú bidxi.

41 Rusölë' yugu' bönni' yechi' lu le ta'guí'i ta'záquë'ë,  
en runë' ga ta'yanbi' zxí'inigaquië' ca ta'yánba' bö'cu' zxíla'do'.

42 Ta'lé'e lë ni nupa nácgaca tsahui', en tu'dzeja,  
pero biti' bi ta'nná nupa tuá' dö'.

43 Nupa ta'yéajni'i ral-la' sa' ládxi'gaca ca nácgaca lë ni,  
ate' iléquibe'e náquië' Xanru' Dios dxi'i ládxi'.

## 108

<sup>1</sup> ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

<sup>2</sup> ¡Guli'bán, libí'ili' riguínna' bihuél-la!

¡Gúl-laru' cate' ni' ritó yu!

<sup>3</sup> ¡Guía' Li': "Xclenu" Xan, ládjagaca bönachi yugu' yödzo izá'a!

¡Gul-la' yöl-la' ba quiu' lógaca yúgu'të bönachi!

<sup>4</sup> ¡Zxöntëro naca yöl-la' dxi'i ladxi' quiu', le ridxintë lúzxiba xitsá'!

<sup>5</sup> Buluí'i lahui lúzxiba yöl-la' zxön quiu', Dios,  
ate' lahui yödzo'lió ni buluí'i lahui yöl-la' bení' quiu',

<sup>6</sup> para usöló' netu', bönachi quiu', nupa nadxí'inu'.

Len yöl-la' huáca zxön quiu' busölá netu', en bubí'i didza'.

<sup>7</sup> Lu lataj lá'ayi queë' bë'e didza' Dios, gunné':

"Uzi'a xibé, en quísia' xiyúgaca bönachi Siquem,  
en urixa' luyú dë cuiti yegu Sucot.

<sup>8</sup> Nequi quia' xiyúgaca bönachi Galaad,  
enca' xiyúgaca xzí'ini xi'sóë' Manasés.

Naca ca tu le rusubín icja' xiyúgaca xzí'ini xi'sóë' Efraín.

Naca ga rinná bë'a xiyúgaca xzí'ini xi'sóë' Judá.

<sup>9</sup> Naca ca tu ga riguibi na'a xiyúgaca bönachi Moab,

ate' lu xiyúgaca bönachi Edom chú'una' löla'.

Cödxí'a tu' uxicja' bönachi Filistea."

<sup>10</sup> ¿Nuzxi caz gaca ichë' neda' lu yödzo

dë zö'ö idú gásibi'ilö le run chí'i yödzo na'?

¿Nuzxi caz gaca ichë' neda' lu xiyúgaca bönachi Edom?

<sup>11</sup> ¿Naru' cabí nusán ládxi'u netu', Dios?

¿Naru' cabí tséajlenu' bönni' queëtu' röjáquië' gudil-la?

<sup>12</sup> Gúcalen netu' cate' tíl-lalentu' nupa dutíl-lalen netu',  
tu' naca dádusö gácalen netu' nu naca bönáchisö.

<sup>13</sup> Len yöl-la' huáca queë' Dios idéli'ru'

tu' uxicja' cazë' Lë' nupa ta'díl-lalen rë'u.

## 109

<sup>1</sup> Rigu'a Li' yöl-la' ba, Xana' Dios.

Biti' su' dxisö,

<sup>2</sup> tu' ta'nná quia' nupa tuá' dö', en ta'zí' yë'.

Lu yöl-la' rizí' yë' quéguequi tuí'i didza' le tu'zegui' neda'.

<sup>3</sup> Nagú'ugaca neda' lé'ajlö,

en lu yöl-la' bití' rilé'e neda' dxi'a tu'ítica'sö didza'.

<sup>4</sup> Sal-la' nadxí'ida' léguequi, tu'zegui' neda' didza',

pero neda' rulidza' Li'.

<sup>5</sup> Bena' quéguequi le naca dxi'a, pero bulu'bí'i quia' le naca dö'.

Nadxí'ida' léguequi, pero bití' ta'lé'e neda' dxi'a.

<sup>6</sup> Buzóa tu bönni' huía' dö'

para uchi'a usöröë' que nu na' bití' rilé'e neda' dxi'a.

Ben ga soa gagu nu uzegui' nu na' didza'.

<sup>7</sup> Cate' nu uchi'a usörö bönni' na', bití' gu'u lataj urúajë' dxi'a.



Buyú le rinábinë' Li' tsca naca dul-la' nabáguë'ë.

<sup>8</sup> Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

<sup>9</sup> Ben ga ilácabi' zxi'inë' bi'i uzëbi,  
en ga gácanu nigula queë' nigula uzëbi.

<sup>10</sup> Ben ga ila'dásöbi' zxi'inë' ila'nábibi' nu bi unödzej quégacabi'.

Ben ga ila'guíjabi' le ilágubi' zi'tu' ga zoa lídxigacabi' le nadachi.

<sup>11</sup> Ben ga ugúa nu bi benna lë' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

<sup>12</sup> Ben ga biti' soa nu huéchi' ladxi' lë',

en biti' soa nu uzá' ladxi' quégacabi' zxi'inë' nácagacabi' bi'i uzëbi.

<sup>13</sup> Ben ga udxi quégaca zxi'ini xi'sóë',

en ga idxín dza bití'rö soa nu si' la ca guzxi'i lë'.

<sup>14</sup> Yöjnética'sö le xihui' gula'báguë'ë xuz xtá'ahuë', Xan,

en biti' gal-la ládxi'u dul-la' bennu xinë'ë.

<sup>15</sup> Ben ga ila'cuá'tica'sö dul-la' na' lo' Li', Xan,

para cabirö nu soa yödzölió nu tsöjné lë'.

<sup>16</sup> Biti' buéchi' ládxi'ë luzë'ë,

pero gudxía nahuë' nupa gula'guí' gula'zaca',

en nupa gula'yadzaj gula'yudxi,

enca' nupa gula'sëbi ladxi', ate' bëtië' léguequi.

<sup>17</sup> Bidxi'inë' le rudxía luzë'ë dö'.

Ben ga ulu'bí'i ca' queë'.

Biti' raza ládxi'ë gaca dxi'a que luzë'ë.

Ben ga biti' gaca dxi'a queë'.

<sup>18</sup> Gulaca ca zxë' nácuë' didza' xihui' bë'ë,

ate' gula'yaza le nayá' nabanë' ca nisa,

en gula'yú'u ca' dxita queë' ca le za.

<sup>19</sup> Ben ga ilaca queë' ca tu lari' rixóa cúdzë'ë,

en ca xipanë' rúgui'ë lë'ë.

<sup>20</sup> Bubi'i caní quégaca nupa tu'zegui' neda' didza', Xan,

enca' quégaca nupa tuí'i didza' zi' que bö' naca caza'.

<sup>21</sup> Li', Xana' Dios, ben quia' le naca dxi'a

para gaca bë' runu' ca rnna xtídzu'u.

Tu' naca dxi'a yöl-la' dxi'i ladxi' quiu', busölá neda'.

<sup>22</sup> Riguí'i rizáca'a, en riyadzaj riyúdxida',

en raca zi' ládxi'da'ahua'.

<sup>23</sup> Ridödi quia' ca raca que tu zxul-la cate' ribía gubidza.

Naca' ca tuba' böchi'zu, richë' bö' recja lëba'.

<sup>24</sup> Ta'cuidi' zxiba' tu' runa' gubasa.

Nadxita', en bití'rö rö'ö za lu bëla' rön quia'.

<sup>25</sup> Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

<sup>26</sup> Gúcalen neda', Xana' Dios.

Lu yöl-la' dxi'i ladxi' quiu' busölá neda'.

<sup>27</sup> Ben ga iléquibe'e rácalen cazu' neda'.

Nun cazu' Li' lë ni, Xan.

<sup>28</sup> Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',

pero udzëjada' neda', huen dxin quiu'.

<sup>29</sup> Ben ga ulu'gá'ana cá'asö nupa tu'zegui' neda' didza',  
en ben ga gaca yöl-la' rutuí'i quéguequi ca tu lari' nabaga' léguequi.

<sup>30</sup> Len ruá' cuina', zían luzuí guía'-në' Xanru': "Xclenu",  
en ladaj bönachi zían cu'a Lë' yöl-la' ba,

<sup>31</sup> tu' zuinë' cuita lë'e ibëla nu riyadzaj riyudxi  
para usölë' nu na' lu ná'agaca nupa tu'siúdxí bö' naca caz nu na'.

## 110

<sup>1</sup> Xanru' Dios gudxë' Xana': "Gurö'i cuita lë'a ibëla  
cate' gunra' ga ulu'zechu zxíbigaca lo'  
nupa biti' ta'lé'e Li' dxi'a."

<sup>2</sup> Ga zoë' yödzö Siön gusöl-lë'ë Xanru' yöl-la' unná bë' quiu',  
gunné': "Gunná be'e nupa biti' ta'lé'e Li' dxi'a."

<sup>3</sup> Ulu'dödi cúnguequi lu no'o bönachi quiu'  
cate' si'u yöl-la' unná bë' quiu'  
tu' napu' yöl-la' lachi que le naca lá'ayi."

Ila'cuá' bí'i bönni' ga zu' ca ribö'ö buzén zílado'.

<sup>4</sup> Runë' tsutsu xtídzë'ë Xanru', en biti' utsë'ë le, rnnë':  
"Tsaz nacu' bixúz ca na' gúquië' Melquisedec bixúz."

<sup>5</sup> Zoa cazë' Xanru' cuita lë'u ibëla.  
Ucul-lë' bönni' ta'nná bë'ë cate' idxín dza usiúdxë' luyú.

<sup>6</sup> Uchi'a usöröë' quégaca bönachi yúgu'të yödzö izá'a,  
ate' ilí yödzölió len bëla' rön quéguequi.

Uzötjë' nupa ta'nná bë' zían lu yödzö izá'a.

<sup>7</sup> Guí'jë' nisa beaj ra' nöza,  
en ni'a que lë ni huóaca ládxë'ë.

## 111

<sup>1</sup> ¡Gulí'cu'ë yöl-la' ba Xanru'!

Idú ládxa'a rea'-në' Xanru': "Xclenu'."

Runa' caní tsazxön len bönni' tsahui' zían ga na' nudúbigaca bönachi queë'.

<sup>2</sup> Zxön náagaca le nunë' Xanru'.

Yúgu'të nupa ta'yaza ládxi'gaca lë na' benë' tu'sëda ca náagaca.

<sup>3</sup> Idütë dxi'a náagaca, en nayëpisëtërögaca le nunë' Lë',  
ate' idiá'tica'sö le naca tsahui' queë'.

<sup>4</sup> Chinunë' ga tsöjneru' yugu' le benë', le tun ga rubániru'.

Náquië' Xanru' dxi'i ladxi', en ruí'i ládxë'ë rë'u.

<sup>5</sup> Rugahuë' nupa tadxi Lë'.

Röjné'tica'së' didza' dzaga núnlënë' bönachi queë'.

<sup>6</sup> Buzéajni'inë' bönachi queë' ca naca yöl-la' huáca quégaca le nunë',  
le benë' ga gula'déli'në' xiyúgaca bönachi izá'a.

<sup>7</sup> Tsahui', en idütë li náagaca le núngaca lu në'ë.

Náagaca tsutsu yúgu'të xibá gunná bë'ë.

<sup>8</sup> Rucúa'tica'së' tsutsu xibá queë',

en rusudxinë' léguequi lu le naca idütë li, en le naca tsahui'.

<sup>9</sup> Gusöl-lë'ë Nu buá'uö bönachi queë'.

Tsaz nuzóë' didza' dzaga nunë'.

Lá'ayi, en ba'a ladxi' naca Lë'.

<sup>10</sup> Lu yöl-la' radxi queëru' Lë' risí loru' ridéli'ru' yöl-la' réajni'i.

Yúgu'tè nupa tun ca ta'nná bē' xibá queē' nápagaca yöl-la' réajni'i.  
Ila'cuá'tica'sō nupa ila'gú'u Lē' yöl-la' ba.

## 112

<sup>1</sup> ¡Gulí'cu'ē yöl-la' ba Xanru'!  
¡Bica' ba bönni' na' rádxinē' Xanru',  
bönni' na' raza ládxe'ē runē' ca gunná bē'ē Dios!

<sup>2</sup> Tsépisēgaca xzí'ini xi'sóē' bönni' na' yödzölió ni.  
Gáquiē' bica' ba bönni' na' runē' le naca dxi'a.

<sup>3</sup> Lu yu'u lidxe' gata' yöl-la' tsahui',  
ate' idía'tica'sō le naca tsahui' runē'.

<sup>4</sup> Gulén bení' ga ridē' bönni' tsahui' ga na' naca chul-la.  
Ruzá' ládxe'ē que luzē'ē, en ruí'i ládxe'ē lē', en runē' le naca dxi'a.

<sup>5</sup> Gaca dxi'a queē' bönni' ruzá' ládxe'ē que luzē'ē,  
en runnē' que tu chí'isō le riyadzaj que.  
Urúajē' dxi'a cate' nu uchi'a usörö queē'.

<sup>6</sup> Catu caz gaca nu utsá' bönni' na',  
ate' sóatica'sō nu tsöjné lē'.

<sup>7</sup> Biti' gádxinē' cate' nu usiyöni lē' le cabí' raca dxi'a.  
Ridipa ládxe'ē tu' ruzxöni ládxe'ē Xanru' Dios.

<sup>8</sup> Dios rutipē' ládxe'ē, ate' bití' gádxinē'  
cate' idxinrö dza ilé'enē' nuhuótjagaca nupa ta'díl-lalen lē'.

<sup>9</sup> Idú ládxe'ē runödzejē' quégaca bönachi yechi'.  
Idía'tica'sō le naca dxi'a runē'.  
Dios uchisé' lē' ga tsépisē'.

<sup>10</sup> Ila'lé'e lē' ni nupa tuá' dö', en ila'bö' baguí'isō.  
Ilagu zxe láyi'gaca, en ila'niti cuínguequi.  
Tsaz initi le ta'zé ládxi'gaca nupa tuá' dö'.

## 113

<sup>1</sup> ¡Gulí'cu'ē yöl-la' ba Xanru'!  
¡Gulí'cu'ē yöl-la' ba, libí'ili' huen dxin queē' Xanru'!  
¡Gulí'cú'u yöl-la' ba Lē' Xanru'!

<sup>2</sup> ¡Cú'uru' yöl-la' ba Lē' Xanru',  
cate' risí'lo na'a, en yugu' iz sí' zaca!

<sup>3</sup> ¡Ga naguela' ga rilén gubidza ga ridxintē' ga ribía,  
cú'uru' yöl-la' ba Lē' Xanru'!

<sup>4</sup> ¡Nayépisētērē' Xanru' Dios ca yúgu'tē yödzö izá'a!  
¡Nazxöntērö yöl-la' zxön queē' ca naca lúzxiba!

<sup>5</sup> ¿Nuzxi caz zoa naca ca náquiē' Xanru' Dios?  
Rö'ē rinná bē'ē ga na' nayépisētērē'.

<sup>6</sup> Ruzötaj cuinē' para uyüē'  
le dē lúzxiba, en le dē luyú ni.

<sup>7</sup> Ruchisé' nupa nácgaca yechi', rubéajē' léguequi lu bëchtö yu.  
Ruchisé' nupa ta'yadzaj, rubéajē' léguequi lu dö bëbu.

<sup>8</sup> Runē' ga ta'bö'len nupa ta'nná bē'.  
Ta'bö'len nupa ta'nná be'e bönachi queē'.

<sup>9</sup> Runē' ga zóanu nigula huödx yu'u lídxinu.  
Rudzeja ládxi'nu tu' runē' ga nacué'abi' xzí'ininu.

¡Guli'cu'ë yöl-la' ba Xanru'!

## 114

<sup>1</sup> Cate' bila' rúaj bönachi Israel luyú Egipto

bila' rúajë' xzí'ini xi'sóë' Judá ladaj nupa tuí'i didza' izá'a.

<sup>2</sup> Xzí'ini xi'sóë' Judá guláquië' ca lidxë' Xanru' Dios, ate' gulaca bönachi Israel nupa rinná bé'enë' Dios.

<sup>3</sup> Lahuë' Dios bubiga' nísado', ate' bubí'i nisa yegu Jordán.

<sup>4</sup> Gula'xiti' guí'a xzön ca yugu' bö'cu' zxila' biguiú', ate' gula'xiti' ca' guí'ado' ca yugu' bö'cu' zxíla'do'.

<sup>5</sup> ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

<sup>6</sup> ¿Bi raca queëli', guí'a xzön, tu' rixítí'li' ca yugu' bö'cu' zxila' biguiú'?

¿Bi raca queëli', guí'ado', tu' rixítí'li' ca yugu' bö'cu' zxíla'do'?

<sup>7</sup> Guzxizi lahuë' Xanru', yödzölió.

Guxxizi lahuë' Dios queë' Jacob.

<sup>8</sup> Benë' Dios ga gulaj nisa tu' lë'e guiöjto'o, en benë' ga böáca le guca guiöj jara tu' ga rilén nisa.

## 115

<sup>1</sup> Calëga queëtu', Xan, calëga queëtu',

pero que lo' gaca yöl-la' ba

tu' nacu' dxi'i ladxi', en le naca idútë li.

<sup>2</sup> ¿Bizx que ta'nná bönachi yugu' yödzö izá'a:

“Gazxi caz zoë' Dios quégaquië”?

<sup>3</sup> Zoë' Dios queëru' yehua' yubá.

Runë' le raza ládxë'ë gunë'.

<sup>4</sup> Néquiguequini plata, en oro budó' quégaca bönachi izá'a na', yugu' le núngaca lu ni'a lu na' bönachi.

<sup>5</sup> Nacuá' ruí'iguequi, pero bití' gaca iluí'i didza'.

Nacuá' guiöj lógaca, pero bití' gaca ila'lë'e.

<sup>6</sup> Nacuá' náagaca, pero bití' gaca ila'yöni.

Nacuá' xzíniguequi, pero bití' gaca ila'lë'e.

<sup>7</sup> Nacuá' ná'agaca, pero bití' bi gaca ila'gán.

Nacuá' ní'agaca, pero bití' gaca ila'zá'.

Bití' gaca ilún bö lubá'agaca.

<sup>8</sup> Nupa tun budó' guiöj budó' yaga ilaca ca nácagaca budó' na', nútí'tës nu ruzxöni ladxi' budó' guiöj budó' yaga.

<sup>9</sup> Libí'ili', bönachi Israel, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

<sup>10</sup> Libí'ili', xzí'ini xi'sóë' Aarón, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

<sup>11</sup> Libí'ili' na' rádxili'-në' Dios, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

<sup>12</sup> Xanru' Dios ruí'i ládxë'ë rë'u, en gunë' ga gaca dxi'a queëru'. Gunë' ga gaca dxi'a quégaca bönachi Israel.

Gunë' ga gaca dxi'a quégaca zxi'ini xi'sóè' Aarón.

<sup>13</sup> Gunë' ga gaca dxi'a quégaca nupa tadxi Lë',  
nupa na' nácagaca cá'asö, en nupa na' nayépisëgaca.

<sup>14</sup> Gunë' Xanru' Dios ga tsan le nequi queëli',  
lë na' nequi queëli', en le nequi quégaca zxi'inili'.

<sup>15</sup> Raca ládxa'a gunë' Xanru' ga gaca dxi'a queëli'.  
Náquië' Nu ben lúzxiba, en luyú ni.

<sup>16</sup> Nequi queë' Xanru' Dios lúzxiba xitsá',  
pero nudödë' lu ná'agaca bönachi luyú ni.

<sup>17</sup> Nupa chinátigaca biti' gaca ila'gú'u Xanru' yöl-la' ba,  
en calëga nupa nacuá' dxisö lataj chul-la que yöl-la' guti.

<sup>18</sup> ¡Cú'uru' yöl-la' ba Xanru' Dios  
na'a dza, en yúgu'të dza si' zaca!

¡Guli'cu'ë Xanru' yöl-la' ba!

## 116

<sup>1</sup> Nadxí'ida'-në' Xanru' Dios, tu' riyönnë'  
le rulidza' Lë', en le rinábida'-në'.

<sup>2</sup> Ruzë naguë' chi'a.

Que lë ni na' ulidza' Lë' tsanni ni zoa' nabana'.

<sup>3</sup> Guzóa bönadxi quia' gátia',  
en guyu'a tsöbi que lataj chul-la que yöl-la' guti,  
ate' gusëbi ládxa'a, en buí'inide'eda' ládxa'a.

<sup>4</sup> Ní'irö bulidza'-në' Xanru' Dios, gunnía':  
"Ráta'yua' lo', Xan, usöló' neda'."

<sup>5</sup> Xanru' Dios ruzá' ládxe'ë queëru', en náquië' tsahui'.  
Dios queëru' ruí'i ládxe'ë rë'u.

<sup>6</sup> Rapa chi'ë Xanru' nupa nácagaca do' ladxi'.  
Bulu'xicja bönachi neda', ate' busölë' neda'.

<sup>7</sup> Buzí' ladxi' bö' naca caza',  
tu' runë' Xanru' Dios ga raca dxi'a quia'.

<sup>8</sup> Busöló' bö' naca caza', Xan, lu yöl-la' guti.  
Benu' ga buí'i nisa ribödxi guiöj lahua',  
en ga bítirö cuílagaca ni'a.

<sup>9</sup> Ta'a lahuë' Xanru' Dios  
ga nacuá' nupa nabángaca.

<sup>10</sup> Guyéajlë'a Lë' cate' gunnía':  
"Zoa le rusaca' neda' zi'."

<sup>11</sup> Lu yöl-la' rö' böniga quia' gunnía':  
"Ta'zì' yë' yúgu'të bönachi."

<sup>12</sup> ¿Bizxi caz gu'a-në' Xanru' Dios  
ni'a que yugu' le runë' le ruzi'a xibé?

<sup>13</sup> Si' lu na'a yöl-la' rusölá queë' Xanru',  
en ulidza'-në' Xanru' Dios.

<sup>14</sup> Unödza' queë' Xanru' le guzxí' lu na'a unödza'.  
Raca ládxa'a gaca guna' caní lógaca yúgu'të bönachi queë'.

15 Rúndë'ë Xanru' bal  
yöl-la' guti quégaca nupa néquiguequi quez queë'.

16 Le nácatë naca' huen dxin quiu', Xan.  
Naca' huen dxin quiu', enca' zxi'ininu nigula huen dxin quiu'.  
Busedxu' le biröli neda'.

17 Cu'a lo' le unödza' quiu', en guía' Li': "Xclenu",  
en ulidza' Li', Xan.

18 Unödza' queë' Xanru' le guzxí' lu na'a unödza'.  
Raca ládxa'a gaca guna' caní lógaca yúgu'të bönachi queë'.

19 Ga zoa lö'a que yu'u lidxë' Xanru',  
lu yödzo Jerusalén guna' caní.

¡Guli'cu'ë yöl-la' ba Xanru' Dios!

## 117

1 ¡Guli'cu'ë yöl-la' ba Xanru' Dios, libí'ili', bönachi yúgu'të yödzo izá'a!

¡Guli'cu'ë yöl-la' ba yúgu'tëli',

2 tu' buxönë' queëru' yöl-la' dxi'i ladxi' queë',  
en zóatica'sö le naca idú ladxi' queë'!

¡Yöl-la' ba Lë'!

## 118

1 ¡Guli'guíë' Xanru': "Xclenu", tu' náquië' dxi'a!

¡Zóatica'sö yöl-la' dxi'i ladxi' queë'!

2 Ral-la' ila'nná bönachi Israel:  
"¡Zóatica'sö yöl-la' dxi'i ladxi' queë'!"

3 Ral-la' ila'nná zxi'ini xi'sóë' Aarón:  
"¡Zóatica'sö yöl-la' dxi'i ladxi' queë'!"

4 Ral-la' ila'nná nupa tadxi Xanru' Dios:  
"¡Zóatica'sö yöl-la' dxi'i ladxi' queë'!"

5 Cate' gudí'i guzxáca'a bulidza'-në' Xanru',  
ate' bubí'ë didza', en busölé' neda'.

6 Zoë' Xanru' cuita' neda', ate' bití' bi gádxida'.

¿Bizxi caz gaca ilún bönachi quia'?

7 Zoë' Xanru' cuita' neda' ladaj nupa tácalen neda'.  
Que lë ni na' idéli'da' láhuigaca nupa bití' ta'lé'e neda' dxi'a.

8 Nácarö dxi'a uzxöni ládxa'a-në' Xanru',  
en bití' uzxöni ládxa'a nu naca bönáchisö.

9 Nácarö dxi'a uzxöni ládxa'a-në' Xanru',  
en bití' uzxöni ládxa'a nupa ta'nná bë'.

10 Bönachi yúgu'të yödzo izá'a gula'gú'u neda' lë'ajlö.

Len yöl-la' huáca queë' Xanru' buxicja' léguequi.

11 Gula'gu'ë neda' lë'ajlö. Òn, gula'gu'ë neda' lë'ajlö,  
pero len yöl-la' huáca queë' Xanru' buxicja' léguequi.

12 Gula'gu'ë neda' lë'ajlö ca yugu' buzú' rön,  
pero gula'nítië' ca tu lu guí' guixi' yötsi' bidx.  
Len yöl-la' huáca queë' Xanru' buxicja' léguequi.

13 Bulu'dxíguë'ë neda' ga bidxintë guzóa tsöjtsö'a,  
pero gúcalenë' Xanru' neda'.

14 Naca cazë' Xanru' yöl-la' huáca quia', en le rul-la'.  
Naca cazë' yöl-la' rusölá quia'.

15 Lu yu'u lídxigaca nupa nácagaca tsahui'  
ru'u bö que nupa ta'bödxi'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!

16 ¡Nayëpisëtë'rö në'ë ibëla Xanru'!

¡Runda' dxin në'ë ibëla Xanru'!

17 Biti' ca' gátia', pero soa' ibana',  
ate' usiyönda' bönachi le nunë' Xanru'.

18 Xanru' bëndë'ë neda' xiguia',  
pero biti' budödë' neda' lu yöl-la' guti.

19 Guli'salaj quia' ga ta'yazë' bönni' tsahui'.  
Tsu'a ni', en guía'-në' Xanru': "Xclenu'."

20 Naca lataj ni ga riyaza cazë' Xanru' Dios.  
Ila'yazë' ni bönni' tsahui'.

21 ¡Guía' Li': "Xclenu'" Xan, tu' bubu'u didza' quia',  
en tu' nacu' Nu rusölá neda'!

22 Zoa tu guiöj bulu'zöë' tsölá'alö bönni' tu'cu'ë zö'ö.  
Na'a naca guiöj na' guiöj len squin zö'ö.

23 Benë' Xanru' Dios ga naca caní.  
Naca tu le run ga rubániru'.

24 Dza ni naca dza nunë' Xanru' Dios.  
Udzéjaru', en uzí'iru' xibé.

25 Ráta'yutu' lo', Xan, usöló' netu'.  
Ráta'yutu' lo', Xan, gunu' ga gaca dxi'a queëtu'.

26 Bica' ba bönni' na' zë'ë uláz queë' Xanru'.  
Guntu' Li' zxön lu yu'u lidxë' Xanru'.

27 Dios náquië' Xanru', ate' bennë' queëru' bení'.  
Buli'nödzej queë' Dios yugu' bédxi renni' uzégu'ru'-ba' lahuë' lu bucugu queë'.

28 Naca cazu' Li' Dios quia', ate' guía' Li': "Xclenu'."  
Naca cazu' Li' Dios quia', ate' guna' Li' zxön.

29 ¡Guli'-guië' Xanru' Dios: "Xclenu'" tu' náquië' dxi'a!  
¡Zóatica'sö yöl-la' dxi'i ladxi' queë'!

## 119

*Le run le gunná bé'enë' Xanru' rë'u*

- <sup>1</sup> ¡Bica' ba nupa nácgaca idú dxi'a tsáhui'do',  
nupa na' tun ca rnna xibá naguixjë' Xanru'!
- <sup>2</sup> ¡Bica' ba nupa tun ca nácgaca le benë' ba nalí,  
en idú ládxi'gaca ta'zë ladxi' Lë'!
- <sup>3</sup> Biti' bi le cabí naca tsahui' tun,  
pero tun ca nácgaca le nulu'ë lahui.
- <sup>4</sup> Nuzú' queëtu' xibá quiu', Xan,  
para idú ládxi'tu' guntu' ca ta'nná.
- <sup>5</sup> Raca ládxa'a gúntica'sa' ca ral-la' guna',  
en guna' yugu' le gunná bë'u.
- <sup>6</sup> Ní'irö bití' ca' utuí'ida'  
channö gapa chí'a yugu' le gunná bë'u.
- <sup>7</sup> Lu yöl-la' ba'a ladxi' quia' guía' Li': "Xclenu"  
cate' chinazi'a le buchí'a busöröu' le naca tsahui'.
- <sup>8</sup> Guna' ca ta'nná le gunná bë'u.  
Biti' usán no'o neda' tsaz.

*Ral-la' gunru' ca gunné' Dios*

- <sup>9</sup> ¿Nacxi gaca gunbi' tu bi'i bönni' ga ugá'ana tsahui' ládxi'do'obi'?  
Ral-la' gunbi' ca rnna xtídz'u.
- <sup>10</sup> Idú ládxa'a rizë ládxa'a Li', Xan.  
Biti' gu'u lataj ucá'ana' yugu' le gunná bë'u.
- <sup>11</sup> Lu icja ládxi'da'ahua' runa' ca rnna xtídz'u,  
para cabí guna' dul-la' lo' Li'.
- <sup>12</sup> ¡Bica' xibó', Xan!  
Busedi neda' yugu' le gunná bë'u.
- <sup>13</sup> Len ruá' cuina' ru'a didza'  
ca nácgaca yúgu'të le rusedi quézinu' netu'.
- <sup>14</sup> Rudzëjada' ca nácgaca le nunu' ba nalí  
ca nu rudzeja tu' dë yöl-la' tsahui' que.
- <sup>15</sup> Sa' ládxa'a ca nácgaca xibá quiu'  
en güi'i ládxa'a yugu' le nulú'u lahui.
- <sup>16</sup> Udzëjada' ca nácgaca le gunná bë'u.  
Biti' gal-la ládxa'a xtídz'u.

*Rudzëjade' eru' runru' le rnna cazë' Dios*

- <sup>17</sup> Ben ga gaca dxi'a quia' neda', huen dxin quiu', Xan,  
para soa' ibana', en guna' ca rnna xtídz'u.
- <sup>18</sup> Gusalaj guiöj lahua' para gaca ilé'eda'  
le tun ga rubánitu' nazúajgaca lu xibá naguixju' Li'.
- <sup>19</sup> Zoa' yödzülió ca tu bönni' ridasö.  
Biti' ucachu'u yugu' xibá nunu' ga bití' gaca ilé'eda' léguequi.
- <sup>20</sup> Yúgu'të dza ruhu'ini ládxa'a tu' rizë ládxa'a  
yugu' le nusédinu' netu' ca ral-la' guntu'.
- <sup>21</sup> Ruzenu' le bach nupa tun ba zxön cuínguequi, en nupa nudxíagaca dö',  
nupa na' tu'zóa tsölá'alö yugu' xibá gunná bë'u.
- <sup>22</sup> Biti' gu'u lataj nu guequi neda' zi' o nu ucá'ana neda' cá'asö,  
tu' runa' ca ta'nná le nunu' ba nalí.
- <sup>23</sup> Sal-la' ta'bö' nupa ta'nná bë', en ta'nnë quia',  
rizá' ládxa'a neda', huen dxin quiu', ca nácgaca le gunná bë'u.



24 Raza ládxa'a yugu' le nunu' ba nalí.  
Nácagaca le tu'zéajni'i neda'.

*Idú ládxi'ru' gunru' ca gunná cazë' Dios*

25 Nadinni lu yu bö' naca caza'.

Busubán ládxa'a, ugunu' dxin xtídz'u.

26 Buluí'ida' Li' yugu' le nuna', ate' bubí'u didza'.

Busedi neda' yugu' le gunná bë'u.

27 Buzéajni'i neda' ca nácagaca xibá quiu',  
ate' sa' ládxa'a ca nácagaca le nunu', le tun ga rubánitu'.

28 Ribödxi bö' naca caza' tu' risëbida' ládxa'a.

Butipa ládxa'a, ugunu' dxin xtídz'u.

29 Ben ga bití' guna' le cabí sa'yéaj,  
en buzá' ladxi' quia' xibá naguixju' Li'.

30 Gurõa' le naca idútë li para guna' ca rnna.

Nuzóa' lahua' yugu' le nusédinu' netu'.

31 Nazí' lu na'a yugu' le nunu' liná' lo.

Bití' gu'u lataj bi gun ga utuí'ida', Xan.

32 Guna' ca ta'nná xibá gunná bë'u,  
tu' rutipa cazu' ládxa'a.

*Rë'ëniru' tséajni'iru' xtídzë'ë Dios*

33 Busedi neda', Xan, ca ta'nná le gunná bë'u,  
ate' gun chí'a léguequi ga idxinrö dza udxi.

34 Benna quia' yöl-la' réajni'i para gun chí'a xibá quiu',  
en para idú ládxa'a guna' ca ta'nná.

35 Ben ga guna' ca ta'nná le gunná bë'u,  
tu' raza ládxa'a guna' ca ta'nná xibá na'.

36 Ben ga güi'i ládxa'a yugu' le nunu' ba nalí,  
para cabí güi'i ládxa'a yöl-la' ruhuidi'.

37 Buchi'a guiöj lahua' para cabí uyúa' le cabí nazaca'.  
Butipa ládxa'a para guna' le uluí'inu' netu'.

38 Ben tsutsu didza' bë'lenu' neda', huen dxin quiu',  
para gádxida' Li'.

39 Bucuíta ga zoa' nu rudidza' yudxi neda', lë na' rádxida'  
tu' nácagaca dxi'a tsahui' le nusédinu' netu' ca guntu'.

40 Buyútsöca', rizë ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

*Ruzxöni ládxi'ru' xtídzë'ë Dios*

41 Lu yöl-la' dxi'i ladxi' quiu' buyú neda', Xan,  
en busölá neda' ca rnna xtídz'u gunu'.

42 Ubi'a didza' bi guía' nu run ga rutuí'ida', innía':  
"Ruzxöni ládxa'a xtídz'u", Xan.

43 Bití' ucuítu' tsaz didza' idútë li lu ru'a  
tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li'  
yúgu'të dza, en yúgu'të iz si' zaca.

45 Lu yöl-la' rusölá quiu' soa' ibana'  
tu' bë' ládxa'a guna' ca ta'nná bë' xibá quiu'.

46 Gu'a didza' que le nunu' ba nalí lógaquië' bönni' ta'nná bë'ë  
en bití' ca' utuí'ida'.

47 Tsaza ládxa'a yugu' xibá gunná bē'u,  
yugu' lē na' nadxí'ida'.

48 Guna' ca' ca ta'nná xibá nunu', lē na' sē ládxa'a,  
en sa' ládxa'a ca nácagaca le gunná bē'u.

*Zóatica'sō xtídzē'ē Dios*

49 Yójné didza' na' bē'lenu' neda', huen dxin quiu',  
tu' benu' ga runa' lōza le.

50 Didza' na' ruhué tsahui' neda' cate' riguí'i rizáca'a,  
tu' tu' subán ládxa'a didza' bē'u.

51 Tu'títjalē'e neda' nupa tun ba zxön cuínguequi,  
pero biti' ca' usana' xibá naguixju' Li'.

52 Rójneda' yugu' le busédinu' netu' dza ni'te, Xan,  
ate' lē na' ruhué tsahui' neda'.

53 Lu yöl-la' ridzá'a quia' rō'a böniga ni'a quégaca nupa tuá' dö',  
nupa na' tu'cá'ana xibá naguixju' Li'.

54 Rul-la' ca nácagaca le gunná bē'u.

Zoa' ni ca tu bönni' ridé' zi'tu'.

55 Chi'i dzó'ölö rójneda' Lo', Xan,  
en run chi'a xibá naguixju' Li'.

56 Nacuá'len neda' le ruzi'a xibé  
ate' runa' ca rnna yugu' xibá quiu'.

*Raza ládxi'ru' xtídzē'ē Dios*

57 Nacu' Li', Xan, le ruzi'a xibé.

Chigunnía' guna' ca rnna xtídzú'u.

58 Idú ládxa'a inábida' Li' sóalenu' neda'.  
Buéchi' ladxi' neda' ca rnna xtídzú'u gunu'.

59 Guzá' ládxa'a ca nácagaca le runa',  
ate' bubí'i ládxa'a para guna' ca rnna le nunu' liná' lo.

60 Bénda'a bayúdx, en biti' gudzedá'  
para guna' ca rinná bē' xibá quiu'.

61 Bönachi zián bönachi tuá' dö' gula'gú'u neda' lē'ajlö,  
pero biti' gul-la ládxa'a xibá naguixju' Li'.

62 Gulahuéla riyasa', en rigú'a Li' yöl-la' ba  
tu' nácagaca tsahui' yugu' le nusédinu' netu'.

63 Runa' tsözxön nupa tadxi Li',  
enca' nupa tun ca rnna xibá quiu'.

64 Ridxín idútē yödzölió yöl-la' dxi'i ladxi' quiu', Xan.  
Busedi neda' yugu' le gunná bē'u.

*Naca le saca' le gunná cazē' Dios*

65 Benu' quia' neda', huen dxin quiu', le naca dxi'a,  
ca rnna xtídzú'u gunu', Xan.

66 Busedi neda' yöl-la' réajni'i idú, en yöl-la' raca yenni',  
tu' réajlé'a yugu' xibá gunná bē'u.

67 Zí'alö cate' buzötju' neda' gudá' nanitia',  
pero na'a runa' ca rnna xtídzú'u.

68 Idú dxi'a tsahui' nacu', en runu' le naca dxi'a.  
Busedi neda' yugu' le gunná bē'u.

69 Nupa tun ba zxön cuínguequi ta'z'í' yē' ca naca quia',  
pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi,

pero raza ládxa'a neda' xibá naguixju' Li'.

<sup>71</sup> Naca dxi'a buzötju' neda'  
para bizédida' yugu' le gunná bë'u.

<sup>72</sup> Nácagacarö dxi'a quia' xibá rinná bë'u  
ca nácagaca gayuá' gayuá'sö dumí oro, en plata.

*Naca tsahui' le gunná cazë' Dios*

<sup>73</sup> Len no'o benu' neda', en buzú' neda'.  
Buzéajni'i neda' para gúnbë'a xibá gunná bë'u.

<sup>74</sup> Nupa tadxi Li' ila'lé'e neda', en ulu'dzeja ládxi'guequi,  
tu' runa' löza xtídz'u.

<sup>75</sup> Nözda' naca tsahui' ca ruchi'a rusöröu' quia' neda', Xan,  
ate' lu yöl-la' li ladxi' quiu' busaca' zi'u neda'.

<sup>76</sup> Na'a, lu yöl-la' dxi'i ladxi' quiu' buë tsahui' neda',  
ca rnna didza' chibë'lenu' neda', huen dxin quiu'.

<sup>77</sup> Gudá duhuechi' ládxi'u neda' para soa' ibana',  
tu' raza ládxa'a xibá naguixju' Li'.

<sup>78</sup> Ben ga ulu'tuí'i nupa tun ba zxön cuínguequi,  
tu' gula'nnë quia', en biti' bi bena' quéguequi,  
pero neda' sa' ládxa'a ca naca xibá quiu'.

<sup>79</sup> Ral-la' udxín quia' nupa tadxi Li',  
nupa na' núnbë'gaca le nunu' ba nalí.

<sup>80</sup> Ben ga udxín ca rnna le gunná bë'u,  
para cabí utuí'ida'.

*Runë' Dios ca rnna xtídzë'ë*

<sup>81</sup> Rudú ládxa'a tu' riböza' yöl-la' rusölá quiu',  
pero runa' löza xtídz'u.

<sup>82</sup> Chirequi ichul-la lahua' tu' rizëda' ládxa'a xtídz'u,  
rnnía': "¿Bátaxi huë tsaú'u neda'?"

<sup>83</sup> Caní raza tu' naxú'unida' ca tu buzudi guídi nal-la' lahui guí',  
pero catu caz gal-la ládxa'a yugu' le gunná bë'u.

<sup>84</sup> ¿Bál-laxi dza soa' ibana' neda', huen dxin quiu'?  
¿Bátaxi usiúdxu' nupa ta'bía no neda'?

<sup>85</sup> Nupa tun ba zxön cuínguequi gula'chö'öna tu yeru ga tsöjbixa',  
nupa na' biti' tun ca rnna xibá naguixju' Li'.

<sup>86</sup> Idütë li nácagaca yúgu'të xibá gunná bë'u.  
Lu yöl-la' rizí' yë' quéguequi ta'bía no neda'.  
¡Gúcalen neda'!

<sup>87</sup> Gula'zóa ulu'sunítië' neda' lu yödzölió ni,  
pero biti' busán na'a xibá quiu'.

<sup>88</sup> Lu yöl-la' dxi'i ladxi' quiu' busubán ládxa'a,  
para gapa chí'a le nunu' ba nalí len ruá' cuinu'.

*Réajlë'ëru' xtídzë'ë Xanru'*

<sup>89</sup> Rulidza' Li', Xan.  
Tsaz naguixju' xtídz'u yehua' yubá.

<sup>90</sup> Gunu' ca rnna xtídz'u quégaca bönachi na'a dza, en yúgu'të dza si' zaca.  
Gudixaj cazu' yödzölió, ate' idía'tica'sö.

<sup>91</sup> Ní'a que le gunná bë'u nacuá' caz yúgu'të ga ridxintë na'a dza,  
tu' tun xichinu' yúgu'të lë na'.

<sup>92</sup> La'tu' cabí raza ládxa'a xibá naguixju' Li',

chigunítia' lu le busaca' zi' neda'.

<sup>93</sup> Catu caz gal-la ládxa'a yugu' xibá quiu',  
tu' busubanu' ládxa'a ni'a quéguequi.

<sup>94</sup> Néquida' quiu'.

¡Busölá neda', tu' ruí'i ládxa'a xibá quiu'!

<sup>95</sup> Nupa tuá' dö' ta'bö' nisi neda' para ulu'suniti neda',  
pero neda' güi'i ládxa'a le nunu' ba nalí.

<sup>96</sup> Chibilé'eda' ruúdxí que yúgu'tè le naca idútè yödzölió ni,  
pero catu caz udxi que le gunná bë'u guntu'.

*Nadxi'iru' xtídzë'ë Xanru'*

<sup>97</sup> Nadxi'ide'eda' xibá naguixju' Li'.

Idú dza rizá' ládxa'a ca naca que.

<sup>98</sup> Réajni'iröda' ca nupa ta'dá'baga' neda'  
tu' ruí'i ládxa'a yugu' le gunná bë'u, en tu' dá'tica'sa' léguequi.

<sup>99</sup> Réquibe'eröda' ca yúgu'tè nupa tu'sedi neda',

tu' rizá' ládxa'a le nunu' ba nalí.

<sup>100</sup> Réajni'iröda' ca yugu' bönni' gula,

tu' rapa chi'a xibá quiu'.

<sup>101</sup> Gudapa chi'i cuina' para cabí guna' le cabí naca tsahui',  
en para guna' ca rnna xtídzü'u.

<sup>102</sup> Biti' ca' nucá'ana' yugu' le nusédinu' netu',  
le nusedi quézínu' neda'.

<sup>103</sup> Bica' zxixi nácgaca xtídzü'u.

Ön, nácgacarö zxixi ca le zxixi que buz.

<sup>104</sup> Tu'zéajni'i xibá quiu' neda'.

Que læ ni na' réquida' zi' yúgu'tè le cabí naca.

*Xtídzë'ë Dios ruzení' lu icja ládximo'oru'*

<sup>105</sup> Ca tu bení' naca xtídzü'u ga ridá',

en le ruzení' nöza ga ral-la' töda'.

<sup>106</sup> Guzxí' lu na'a bi guna', en nuna' tsutsu xtídzä'a.

Gapa chi'a le nusédinu' netu' le naca tsahui'.

<sup>107</sup> Zoa le rusaca' zi' neda'.

Busubán ládxa'a, Xan, ugunu' dxin xtídzü'u.

<sup>108</sup> Guzxí' yöl-la' ba rigu'a Li' len ru'a, Xan,

en buzéajni'i neda' yugu' le nusédinu' netu'.

<sup>109</sup> Zóatica'sö bönadxi gátia',

pero biti' ral-la ládxa'a xibá naguixju' Li'.

<sup>110</sup> Nupa tuá' dö' bulu'zé tu du yalaj le sön neda',

pero biti' bucá'ana' xibá quiu'.

<sup>111</sup> Tsaz nazi' lu na'a le nunu' ba nalí,

ate' run ga rudzeja ládxa'a.

<sup>112</sup> Ruí'i ládxa'a gúntica'sa' ca ta'nná le gunná bë'u.

Guna' caní ga idxintè dza udxi.

*Nagá'anaru' dxi'a ni'a que xtídzë'ë Dios*

<sup>113</sup> Réquida' zi' nupa nácgaca chopa ladxi',

pero nadxi'ida' xibá naguixju' Li'.

<sup>114</sup> Nacu' ca tu ga rucachi' cuina', en le run chi'i neda'.

Runa' löza xtídzü'u.

<sup>115</sup> Guli' cuíta ga zoa', libí'ili' ruá'ali' dö',

tu' guna' ca ta'nná le gunná bē'ë Xana' Dios.

116 Buzóa neda' tsutsu, ugunu' dxin xtídz'u, ate' soa' ibana'.

Biti' gu'u lataj utuí'ida' ca naca le runa' löza.

117 Buzóa neda' tsutsu, ate' ulá',  
en güí'tica'sa' ládxa'a le gunná bē'u.

118 Nusán no'o yúgu'të nupa nusángaca le gunná bē'u,  
tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bëbu.

Que lë ni na' nadxí'ida' le nunu' ba nalí.

120 Rizzizi idútë le nayá' nabana' tu' rádxida' Li',  
en rádxida' le gaca cate' usiúdxu' bönachi.

*Ral-la' gunru' ca rnna xtídzë'ë Dios*

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bē' gaca dxi'a quia'.

Biti' gu'u lataj ulu'saca' zi' neda' nupa tun ba zxön cuínguequi.

123 Richí guiöj lahua' tu' riböza' yöl-la' rusölá quiu',  
enca' didza' tsahui' quiu'.

124 Lu yöl-la' dxi'i ladxi' quiu' ben quia' neda', huen dxin quiu',  
ca ré'ëni quézinu' gunu'.

Busedi neda' yugu' le gunná bē'u.

125 Naca' huen dxin quiu'.

Benna quia' yöl-la' réajni'i para gaca gúnbē'a le nunu' ba nalí.

126 Chibídxín dza bi gunu', Xan,  
tu' gula'guítsjë' xibá naguixju' Li'.

127 Que lë ni na' nadxí'iröda' xibá naguixju' Li' ca nadxí'ida' oro.  
jÖn, ca oro banéquini,

128 en réquida' nácagacarö dxi'a xibá quiu' ca yúgu'të le dë!

Biti' rilé'eda' dxi'a yúgu'të le cabí naca.

*Raca ládxi'ru' gunru' ca rnna xtídzë'ë Dios*

129 Run ga rubánida' le nunu' ba nalí.

Que lë ni na' bö' naca caza' nazí' lu nē'e le.

130 Cate' nalá' lahui xtídz'u, ruzení' queëtu'.

Run ga ta'yéajni'i nupa nácagaca nōxaj ladxi'.

131 Gusalja' ru'a, en gunné ládxa'a,  
tu' guzé ládxa'a xibá gunná bē'u.

132 Buyú neda', en buzá' ladxi' quia',  
ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídz'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',  
para gaca guna' ca naca xibá quiu'.

135 Ben ga gaca bē' nazí' lu no'o neda', huen dxin quiu',  
en busedi neda' yugu' le gunná bē'u.

136 Raca nisa ribödxí guiöj lahua' ca tu yegu gubó'o,  
tu' cabí tun bönachi ca rinná bē' xibá quiu'.

*Idutë li naca le rnna cazë' Xanru'*

137 Nacu' Li' tsahui', Xan.

Dxi'a tsahui' naca le ruchi'a rusöröu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' riböza' le naca quiu' run ga régui rilá ládxi'da'ahua',  
ate' gulal-la ladxi' xtídz'u nupa ta'dá'baga' neda'.

140 Idú dxi'a tsahui' naca xtídz'u.

Que læ ni na' neda', huen dxin quiu', nadxí'ida' le.

141 Nöxaj ladxi' naca', ate' tu'cá'ana bönachi neda' cá'asö,  
pero biti' ral-la ládxa'a le gunná bë'u.

142 Zóatica'sö le naca tsahui' quiu',  
en idútë li naca xibá naguixju' Li'.

143 Ba bidxín le raca quia', en le rusaca' zi' neda',  
pero raza ládxa'a xibá gunná bë'u.

144 Nácatica'sö tsahui' le nunu' ba nalí.

Buzéajni'i neda' para soa' ibana'.

*Ral-la' ulaba ládxi'ru' le gunná cazë' Dios*

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bë'u.

146 Rulídzatica'sa' Li'.

Busólá neda', ate' guna' ca naca le nunu' ba nalí.

147 Riyasa' zí'alö ca ritö yu zila, en rulidza' Li' para gácalenu' neda'.

Riböza' yugu' didza' gu'u.

148 Chi'i dzö'ölö rubéaja' yëla guiöj lahua',  
para ulaba ládxa'a ca naca xtídz'u.

149 Lu yöl-la' dxi'i ladxi' quiu' buzé nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idútë li naca le gunná bë'u.

152 Dza ni'te quez núnbë'a le nunu' ba nalí,

en nözda' tsaz nuzú' le.

*Le gunná cazë' Dios run rë'u tsahui'*

153 Buyú le rusaca' zi' neda', en busólá neda',

tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídz'u.

155 Zí'tu' zoa yöl-la' rusólá ga nacué' nupa tuá' dö',

tu' cabí tuí'i ládxi'gaca le gunná bë'u.

156 Zxöntëro naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bía no neda', en ta'dá'baga' neda',

pero biti' nucá'ana' le nunu' ba nalí.

158 Biti' rilé'eda' dxi'a nupa nucá'anagaca Li',

en biti' tun ca rnna xtídz'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútë li nácagaca yúgu'të xtídz'u,

en tsaz nacué' yúgu'të le nusédinu' netu' le nácagaca tsahui'.

*Ral-la' udödi cuinru' lu në'ë Dios*

161 Ta'bía no neda' nupa ta'nná bë', en biti' bi bena' quéguequi,

pero runa' bal xtídz'u lu icja ládxi'da'ahua'.

<sup>162</sup> Rudzéjalenda' xtídz'u,

ca rudzeja nu rudzöli tu yöl-la' tsahui' zxön.

<sup>163</sup> Réquida' zi', en bití' rilé'eda' dxi'a le cabí nácatë,

pero nadxí'ida' xibá naguixju' Li'.

<sup>164</sup> Gadxi luzuí tu dza rigu'a Li' yöl-la' ba,

ni'a que le nusédinu' netu', le naca tsahui'.

<sup>165</sup> Ta'böza dxi'a tsáhui'do' nupa nadxí'igaca xibá naguixju' Li',

en bití' bi run ga rójchégu'gaca.

<sup>166</sup> Runa' löza yöl-la' rusölá quiu', Xan,

en runa' ca rnna xibá nunu'.

<sup>167</sup> Yugu' le nunu' ba nalí tun chi'i bö' naca caza',

ate' nadxí'ide'eda' léguequi.

<sup>168</sup> Runa' ca ta'nná xibá quiu', en yugu' le nunu' ba nalí

tu' rilé'e quézinu' yúgu'të le runa'.

### *Rudzéjalenu' xtídzë'ë Dios*

<sup>169</sup> Ruzë nagu' le rulidza' Li', Xan.

Ruzéajni'i neda' ca rnna xtídz'u.

<sup>170</sup> Ruzë nagu' le rinábida' Li',

en busölá neda' ca rnna xtídz'u gunu'.

<sup>171</sup> Bë' neda' lataj cu'a Li' yöl-la' ba,

tu' rusédinu' neda' le gunná bë'u.

<sup>172</sup> Bë' lataj gul-la lúdx'a ca naca xtídz'u,

tu' nácgaca tsahui' yúgu'të xibá nunu'.

<sup>173</sup> Guzóatë gácalenu' neda',

tu' naböa' xibá quiu'.

<sup>174</sup> Rizë ládxa'a yöl-la' rusölá quiu', Xan,

en raza ládxa'a xibá naguixju' Li'.

<sup>175</sup> Bë' lataj soa ibán bö' naca caza' para cu'a Li' yöl-la' ba,

en ben ga gácalen neda' le nusédinu' netu'.

<sup>176</sup> Ridöda' tsölá'alö ca tuba' bö'cu' zxila' nanítiba'.

Gudá dudilju' neda', huen dxin quiu', tu' cabí ral-la ládxa'a xibá nunu'.

## 120

<sup>1</sup> Cate' gudí'i guzxáca'a bulidza'-në' Xanru',  
ate' Lë' bubi'ë didza'.

<sup>2</sup> Busölá bö' naca caza', Xan, lu na' nu rizí' yë',  
en lu na' nu bití' run ca gunná caz.

<sup>3</sup> ¿Bizxi gunë' quiu' Dios, en bizxi ubi'ë quiu', li' na' rizí' yë'u?

<sup>4</sup> Ichizë' li' yugu' yaga lahui tuchi' que nu reaj gudil-la,  
en cu'ë icju' bo' yalaj que ya' yörido'.

<sup>5</sup> Bica' bayechi' neda' tu' zóasa' yödzö Mesec,  
en zoa' tu lu yu'u guídi quégaca bönachi Cedar.

<sup>6</sup> Xidzélë'ë chiguzóa bö' naca caza'  
len nupa tu' suniti yöl-la' riböza dxi'a tsáhui'do'.

<sup>7</sup> Rë'ënda' cöza' dxi'a tsáhui'do', pero cate' ruá'a didza'  
té'ënnë' ila'díl-lalen neda'.

## 121

<sup>1</sup> Uchisa icja' uyúa' le raca yugu' lu guí'a.

¿Gazxi za' le gácalen neda'?

<sup>2</sup> Le gácalen neda' za' lu nē'ē Xanru'.  
 Lē' benē' lúxiba, en luyú.  
<sup>3</sup> Biti' gu'ē lataj cuilu' ga ridó'.  
 Biti' ca' gasi Nu na' run chi'i li'.  
<sup>4</sup> Buyútsöca', biti' ridödi yēla guiöj lahuē',  
 en biti' rásiē', Lē' na' rapa chi'ē bönachi Israel.  
<sup>5</sup> Run chi'ē Xanru' Dios li'.  
 Zoē' Xanru' Dios cuitu' ibēla, rigu'ē li' zxul-la.  
<sup>6</sup> Biti' uzegui' gubidza li' lahui' dza,  
 en biti' bi gun beo' quiu' chi'i dzö'ölö.  
<sup>7</sup> Gun chi'ē Xanru' Dios li' ga rizó'o, en ga rudxinu',  
 dza ni zóaru' na'a, en yugu' dza si' zaca.  
<sup>8</sup> Xanru' Dios gun chi'ē li' ga rizó'o, en ga rudxinu',  
 dza ni zóaru' na'a, en yugu' dza si' zaca.

## 122

<sup>1</sup> Budzėjada' cate' gulē bönachi neda', gula'nná:  
 "Uyeajru' yu'u lidxē' Xanru' Dios."  
<sup>2</sup> Na'a zuíru' ni  
 ga nu riyaza yödzö Jerusalén.  
<sup>3</sup> Dxi'ado' gulunē' yödzö Jerusalén,  
 ate' naca lachi, en tuz ca röjölözgaca yu'u zxön que.  
<sup>4</sup> Ta'yaza yugu' cö' bönachi queē' Xanru' ga ni  
 ca na' nusédinē' Dios bönachi Israel,  
 para ila'gú'u yöl-la' ba Xanru' Dios.  
<sup>5</sup> Ta'bö' nupa tu'chi'a tu'sörö queēru' ga ni,  
 ga ta'bö' ta'nná bē' xzi'ini xi'sóē' David.  
<sup>6</sup> Guli'nábinē' Dios gunē' ga gaca dxi'a que Jerusalén,  
 en ga ulu'z'í xibé nupa ta'dxi'i yödzö ni yöl-la' tsahui'.  
<sup>7</sup> Dios gunē' ga ila'böza dxi'a tsáhui'do' nupa nacué' yödzö ni,  
 en ga ulu'z'í xibé nupa ta'nná bē' yöl-la' tsahui'.  
<sup>8</sup> Tu' nadxí'ida' yugu' böcha'a, en yugu' böchi' luzá'a,  
 rnnía': "Gaca yöl-la' riböza dxi ladxi' lu yödzö ni."  
<sup>9</sup> Tu' nadxí'ida' lidxē' Xanru' Dios,  
 rinábida'-nē' gunē' ga gaca dxi'a que yödzö ni.

## 123

<sup>1</sup> Uchisa lahua' uyúa' ga zu' Li',  
 rö'u rinná bē'u yehua' yubá ni'.  
<sup>2</sup> Ca runē' bönni' nadó'o, ruyúē' bi ulu'ē xanē',  
 ate' ruyubi' bi'i nigula nadó'o bi ulú'unu nigula xanbi',  
 lēasca' caní ruyuru' rē'u bi ulu'ē Xanru' Dios,  
 ga idxinrö dza uzá' ladxē'ē queēru'.  
<sup>3</sup> Buzá' ladxi' queētu', Xan. Buzá' ladxi' queētu',  
 tu' nacué' nupa tu'cá'ana netu' cá'asö.  
<sup>4</sup> Rudú ladxí'tu' tu' tu'titaj netu' nupa tu'z'í xibé yúgu'tē le dē,  
 en tu' tu'cá'ana netu' cá'asö nupa tun ba zxön cuínguequi.

## 124

<sup>1</sup> "La'tu' cabí gúcalenē' Xanru' rē'u",  
 ral-la' ila'nná bönachi Israel:



2 “La’ tu’ cabí gúcalenë’ Xanru’ rë’u  
cate’ nupa bití’ ta’ lé’ e rë’u dxi’ a gula’ dí’ lalen rë’u,  
3 la’ gulútitë rë’u  
tu’ gula’ lé’ de’ e rë’u.  
4 Guca queëru’ ca la’ usubága’ tē rë’u nisa,  
en la’ uchícjatëru’ lu nisa na’.  
5 La’ uchícjatëru’ tu lu nisa zila.”

6 ¡Bica’ lá’ ayi Xanru’ Dios  
tu’ cabí bi’ è lataj nupa bití’ ta’ lé’ e rë’u dxi’ a ulu’ suniti rë’u!

7 Bularu’ ca rulaba’ biguínido’ tu lu le zön lëba’.  
Naröza’ du yalaj, ate’ nuláru’.  
8 Le rácalen rë’u za’ lu nē’ è Xanru’ Dios.  
Lē’ benē’ lúzxiba, en lu yu.

## 125

1 Nupa tu’ zxöni ládxi’ gaca Xanru’ Dios ná’cagaca ca guí’ a Sión,  
tu’ cabí bi’ gaca utá guí’ a na’, pero tsaz zoa caz.  
2 Ca rō’ gaca guí’ a idú gásibi’ ilō yōdzō Jerusalén,  
la’ canisō zoē’ Xanru’ Dios idú gásibi’ ilō bönachi queë’,  
na’ a dza, en yúgu’ tē dza si’ zaca.  
3 Bití’ ral-la’ ila’ nná’ bē’ nupa tuá’ dō’ lu xiyúgaca bönachi tsahui’,  
para cabí iún ga ilu’ è dō’ bönni’ tsahui’ na’.  
4 Xan, ben ga gaca dxi’ a quégaca nupa ná’cagaca dxi’ a,  
en quégaca nupa idú ládxi’ gaca tun ca rnna xtídzu’ u.  
5 Nupa tu’ dōdi cúinguequi lu le cabí nácatē,  
ben léguequi xiguia’ tsōzxön len nupa tuá’ dō’.  
Ben ga ila’ cuá’ bönachi Israel dxi’ a tsáhui’ do’.

## 126

1 Cate’ Xanru’ Dios buchē’ è bönachi yōdzō Sión  
nupa gula’ dzún zi’ tu’, gúquiru’ yélasō rineru’.  
2 Ní’ irō idú ládxi’ ru’ buzxidxiru’,  
en lu yöl-la’ rudzeja queëru’ gurōdxi’ aru’.  
Ní’ irō gulu’ i didza’ bönachi yugu’ yōdzō izá’ a, gula’ nná:  
“Dios, Xángaquie’, benē’ le ná’cagaca zxön, gúcalenē’ légaquie’.”  
3 Xanru’ Dios benē’ le ná’cagaca zxön, gúcalenē’ rë’u,  
ate’ ruzí’ iru’ xibē’.  
4 Buchē’ netu’, irúajtu’ ga ni nadzuntu’, Xan,  
para gácatu’ ca nisa rudxín lu yegu nuhuí’ igaca.  
5 Lu yöl-la’ rudzeja ila’ bōdxi’ a cate’ ila’ lapa  
nupa lu yöl-la’ ribōdxi’ quéguequi rōjōzagaca.  
6 Nu bönni’ lu yöl-la’ ribōdxi’ rizē’ è, nu’ è bínedo’ rōjōzē’,  
lu yöl-la’ rudzeja cōdxi’ è cate’ udxinē’, nu’ è le nulapē’.

## 127

1 Channō cabí runē’ tsutsu Xanru’ Dios tu yu’ u,  
nítisō tunē’ dxin bönni’ tunē’ yu’ u na’.  
Channō cabí run chí’ è Xanru’ Dios tu yōdzō,  
nítisō ruyúé’ bönni’ na’ yu’ u lu nē’ è yōdzō na’.

<sup>2</sup> Nítisö naca rubanu' zílado', en rjõxu' cate' chigúl-lada',  
 en ragu' le guzzi'u ni'a que le busaca' zi' cuinu',  
 tu' runnë Xanru' Dios que nu nadxí'inë' cate' ni' rasi nu na'.  
<sup>3</sup> Buli'yú, nácagacabi' zxi'iniru' le runnë Xanru' Dios queéru',  
 ate' bí'ido' tu'cuá'anu nigula queéru'  
 nácagacabi' le rubi'ë Xanru' Dios queéru'.  
<sup>4</sup> Ca nácagaca yaga lahui' tuchi' lu na' nu bönni' rejë' gudil-la  
 nácagacabi' zxi'inë' bönni' zoë' iz cuidi' queë'.  
<sup>5</sup> Bica' ba bönni' nacuá'abi' queë' ziantërobi'.  
 Biti' ca' utuí'inë' cate' ru'ë didza' láhui'gaquië'  
 bönni' tu'chi'a tu'söröë' queë', en lógaca nupa ta'díl-lalen lë'.

## 128

<sup>1</sup> Bica' ba yúgu'të nupa tadxi Xanru' Dios,  
 nupa na' tun ca rë'ëni quëzinë' Lë'.  
<sup>2</sup> Cate' gagu' le gata' quiu' ni'a que dxin nun cazu',  
 uzi'u xibé lë na', en gaca dxi'a quiu'.  
<sup>3</sup> Gácanu nigula quiu' ca tu lubá uva dxía ga naca lö'a lidxu',  
 ate' ilácabi' zxi'inu' ca yugu' yaga olívodo' ta'bõ'öbi' ga ni' ráguli'.  
<sup>4</sup> Buli'yútsöca', caní gáquië' bica' ba  
 bönni' na' rádxi'në' Xanru' Dios.  
<sup>5</sup> Xanru' Dios zoë' Sión gunë' ga gaca dxi'a quiu',  
 en gu'ë li' lataj ilé'enu' le dxi'a gaca que yödzo Jerusalén  
 yúgu'të dza su' ibanu'.  
<sup>6</sup> Dios gu'ë li' lataj ilé'enu' yugu' zxi'ini xi'sú',  
 en gunë' ga ila'bõza dxi'a tsáhui'do' bönachi Israel.

## 129

<sup>1</sup> “Zian luzuí gula'bía no netu' ga gudela' nácatu' ra'bando”,  
 huáca ila'nná bönachi Israel:  
<sup>2</sup> “Zian luzuí gula'bía no netu' ga gudela' nácatu' ra'bando',  
 pero biti' gula'deli' ulu'xicja netu'.  
<sup>3</sup> Guca tsca bulu'gá'ana-ba' bëdxi lu bëla' cúdzu'tu',  
 en gulún tunna ga gudödi xiyágaba' bëdxi quëgaquië'.”  
<sup>4</sup> Tsahui' náquië' Xanru' Dios.  
 Chinachúguë' du quégaca nupa tuá' dö' le gulúgui'ni netu'.  
<sup>5</sup> Ben ga ulu'tuí'i, en ulu'huécja guz cúdzu'lö  
 yúgu'të nupa biti' ta'lé'e dxi'a netu', bönachi Sión.  
<sup>6</sup> Ben ga ilácagaca ca guíxi'do' da' ícjo'olö yu'u,  
 le ribídxitë cate' ni' naca huë'ënido'.  
<sup>7</sup> Biti' gaca ulí në'e nu tsöjchugu le,  
 en biti' gaca nu gachi tsölén guizxi que,  
<sup>8</sup> en biti' ta'nná nupa ta'dödi ni':  
 “Rinábitu'-në' Xanru' Dios gunë' ga gaca dxi'a quiu'.  
 Lu Lë' Xanru' rinábitu' Lë' gunë' ga gaca dxi'a quiu'.”

## 130

<sup>1</sup> Ga ni nõtjada' rulidza' Li', Xan.  
<sup>2</sup> Ruzë nagu' chi'a, Xana' Dios.  
 Ruzëda' nagu' le rinábida' Li'.

<sup>3</sup> La' nnaru' tsöjnenu' xigua' nabága' gaca bönachi,  
¿nuzxi caz urúaj tsahui' lo', Xan?

<sup>4</sup> Runiti lo cazu' netu', Xan,  
para guntu' Li' bal.

<sup>5</sup> Runa' löza Li', Xana' Dios. Run löza bö' naca caza' Li',  
ate' runa' löza gaca ca rna xtídz'u.

<sup>6</sup> Bö' naca caza' runrö löza Li', Xan,  
ca tunë' bönni' tapa chi'ë yödzö chí'i dzö'ölö ta'bözë' itö yu zila,  
ca tunë' löza itö yu zila yugu' bönni' na'.

<sup>7</sup> Guli'gún löza Xanru' Dios, libí'ili', bönachi Israel,  
tu' náquië' dxi'i ladxi' Xanru',  
en ruhuá'uë' bönachi Israel.

<sup>8</sup> Xanru' Dios huóá'uë' bönachi Israel  
lu yúgu'të xigua' nabága' gaca.

## 131

<sup>1</sup> Biti' run ba zxön cuina', Xan, en bití' rigú'u cuina' yöl-la' ba,  
en bití' ulapa' na'a le náca gaca zxön, en le náca gaca böniga.

<sup>2</sup> Idú ládxa'a nuzóa cuina' nōxaj, en zoa' dxisö.  
Ca runbi' bi'i huë'ëni ruzí' ládxi'bi' cuítanu xiná'abi',  
ca' riböza bö' naca caza' lu icja ládxi'da'ahua'.

<sup>3</sup> ¡Libí'ili', bönachi Israel, guli'gunë' löza Xanru' Dios  
ga naguela' na'a dza, en yúgu'të dza si' zaca!

## 132

<sup>1</sup> Rinábida' Li', Xan, uláz queë' David tsöjnenu'  
yúgu'të le gudí'i guzxáque'ë,

<sup>2</sup> en ca benë' tsutsu xtídzë'ë, Xan, en guzxí' lu në'ë bi gunë' lo',  
nacu' Nu nál-latërö láhuigaquië' xzí'ini xi'sóë' Jacob, gunné':

<sup>3</sup> "Biti' ca' tsu'a lidxa',  
en bití' gáta'a le ráti'da',

<sup>4</sup> en bití' gu'a lataj tödi yëla guiöj lahua',  
en bití' utsudi' lahua',

<sup>5</sup> ga idxinrö dza ucöza' tu lataj ga soë' Xanru' Dios,  
le gaca yu'u lidxi Nu na' nál-latërö láhuigaquië' xzí'ini xi'sóë' Jacob."

<sup>6</sup> Biyönitu' didza' que guí'ina lá'ayi queë' Dios cate' ni' zóatu' Efrata,  
ate' budzölitu' le lu xiyúë' Jaar.

<sup>7</sup> Uyéajru' ga na' zoa cazë' Xanru' Dios.  
Tseaj ládxi'ru'-në' ga naca xilibi ni'ë.

<sup>8</sup> Gudödi, Xan, ga na' soa cazu' Li'.  
Gudá tsözxön len guí'ina lá'ayi que yöl-la' zxön quiu'.

<sup>9</sup> Ben ga sóalen le naca tsahui' yugu' bixúz quiu'  
ca tu lari' ta'xóë' cúdzu'gaquië'.  
Ben ga ilúl-la bönachi quiu' lu yöl-la' rudzeja quéguequi.

<sup>10</sup> Uláz queë' David, huen dxin quiu', rinábida' Li'  
cabí ucá'anu' bönni' na' gurö cazu' Li'.

<sup>11</sup> Xanru' Dios benë' tsutsu xtídzë'ë bi gunë' queë' David,  
le naca idútë li, ate' Lë' bití' unítie' xtídzë'ë na', gunné':

“Uzóa’ tuë’ zxi’ini xi’sú’ xilatju’ ga inná bē’ēbi’.

<sup>12</sup> Channō ilunbi’ zxi’ini xi’sú’ ca rna didza’ dzaga quia’,  
en le nuna’ ba nalí para uzéajni’ida’ légacabi’,  
ila’nná bē’ēbi’ ga rō’u rinná bē’u yúgu’tē dza si’ zaca.”

<sup>13</sup> Xanru’ Dios nabō cazē’ queē’ yōdzō Sión.

Raca lādxe’ē gaca Sión ga soa cazē’ Lē’.

<sup>14</sup> Rnnē’: “Nácatica’sō lataj ni ga soa caza’ neda’.

Soa’ ni tu’ raca lādxa’a soa’ ni.

<sup>15</sup> Guna’ ga gátada’ le ilágugaca bōnachi ni,  
en guna’ ga ulu’huōlaj ila’dzé’e yōta xtila  
nupa ta’yadzaj ta’yudxi lu yōdzō ni.

<sup>16</sup> Guna’ ga sóalen yōl-la’ rusölá yugu’ bixúz quia’  
ca tu lari’ ila’xóa cūdzu’gaquiē’,

ate’ ilúl-la bōnachi quia’ lu yōl-la’ rudzeja quéguequi.

<sup>17</sup> Guna’ ni ga ilá’ lahui yōl-la’ unná bē’ queē’ David.

Guna’ ga sóatica’sō nu inná bē’ xilatjē’ bōnni’ na’ nabō caza’.

<sup>18</sup> Guna’ ga sóalen nupa biti’ ta’lé’e lē’ dxi’a yōl-la’ rutuí’i  
ca tu lari’ ilácuguequi, pero tsēpi yōsa bení’ le dxía icjē’.”

## 133

<sup>1</sup> Buli’yútsōca’: ¡Bica’ dxi’a tsahui’ naca

cate’ nupa nácgaca bōchi’ luzē’e

ta’bōza lu yōl-la’ tuz quéguequi!

<sup>2</sup> Naca ca le za ta’gú’u ícjaguequi bōnachi,

le ridzún lu guitsa’ láhuiguequi,

en bidzún lu guitsa’ lúzxuē’ Aarón,

le bidzún ga ridxintē lu yeni zxē’.

<sup>3</sup> Naca ca buzén le ridinni lu guí’a Hermón,

en ca le ribō’a lu guí’a Sión,

tu’ gunná bē’ē Xanru’ gaca dxi’a queēru’ lu guí’a na’,

en gata’ yōl-la’ na’bán idú queēru’.

## 134

<sup>1</sup> ¡Buli’yútsōca’!

¡Guli’cu’ē Xanru’ Dios yōl-la’ ba, yúgu’tēli’ runli’ xichinē’ Xanru’,

yúgu’tēli’ na’ zóali’ yu’u lidxē’ Xanru’ chi’i dzō’ölö!

<sup>2</sup> ¡Guli’chisa ná’ali’ ga zóali’ lataj lá’ayi queē’,

en guli’nná dxi’a queē’!

<sup>3</sup> Xanru’ Dios, zoa cazē’ yōdzō Sión, gunē’ ga gaca dxi’a queēli’.

Naca cazē’ Nu ben yehua’ yubá, en yōdzölió ni.

## 135

<sup>1</sup> ¡Guli’cu’ē yōl-la’ ba Xanru’ Dios!

¡Guli’cu’u yōl-la’ ba La la’ayi queē’ Xanru’ Dios!

¡Guli’cu’ē yōl-la’ ba, libí’ili’ runli’ xichinē’ Xanru’,

<sup>2</sup> libí’ili’ na’ zuí’li’ yu’u lidxē’ Xanru’,

ga na’ zóali’ lö’a que yu’u lidxē’ Dios queēru’!

<sup>3</sup> ¡Guli’cu’ē yōl-la’ ba Xanru’ Dios tu’ náquiē’ dxi’a!

¡Guli’gul-la yōl-la’ ba que La la’ayi queē’, tu’ naca lachi!

<sup>4</sup> Nabō cazē’ Xanru’ zxi’ini xi’sóe’ Jacob para ilaca quez queē’.

Guröë' bönachi Israel para ilequi queë'.

<sup>5</sup> Nözda' nayëpisë' Xanru' Dios.

Nayëpisëtërë' ca yugu' dios quégaca bönachi izá'a.

<sup>6</sup> Run cazë' Xanru' ca riyaza ladxi' cazë' yehua' yubá ni', en luyú ni, en lu nísado', en znan lu yu.

<sup>7</sup> Runë' ga rö' böaj gáti'tës luyú ni, en runë' ga rëpi yösa cate' ralaj guiöj.

Rubéajë' bö' recja ga rapa chi'ë le nequi queë'.

<sup>8</sup> Bëtië' yugu' bi'i bönni' zí'alö quégaca bönachi Egipto, zxi'inigaca bönachi, en böa' huë'ënido' quégacaba' böa' guixi'.

<sup>9</sup> Benë' yugu' yöl-la' huáca zxon le gulaca bë' luyú Egipto, yugu' lë na' gulaca queë' Faraón, en quégaca huen xichinë'.

<sup>10</sup> Busunítië' Dios bönachi zían yödzö izá'a, en bëtië' bönni' lo ta'nná bë'ë.

<sup>11</sup> Bëtië' Sehón, bönni' gunná bé'enë' bönachi Amorreo, en Og, bönni' gunná bé'enë' bönachi Basán,

en bönni' gula'nná bé'enë' bönachi yödzö nacuá' luyú Canaán.

<sup>12</sup> Budödë' xiyúgaquië' bönni' na'

lu ná'agaquië' bönni' Israel, bönachi queë' cazë'.

<sup>13</sup> Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

<sup>14</sup> tu' uchi'a usöróu' bönachi queu', Xantu' Dios, en huéchi' ladxu'u nupa tun xichinu'.

<sup>15</sup> Budó' quégaca bönachi yugu' yödzö izá'a néquiniguequi plata, en oro, yugu' le núngaca lu ni'a lu ná'agaca bönachi.

<sup>16</sup> Zóagaca ruí'iguequi, pero biti' bi didza' tuí'i.

Zóagaca guiöj lóguequi, pero biti' bi ta'lé'e.

<sup>17</sup> Zóagaca náagaca, pero biti' bi ta'yöni, en biti' ta'guela' bö' ruí'igaca.

<sup>18</sup> Nupa tun léguequi ilaca ca náagaca budó' na', en caní ilaca yúgu'të nupa tu'zxöni ladxi' léguequi.

<sup>19</sup> Libí'ili', bönachi Israel, guli'guié' Xanru' náquië' dxi'a.

Libí'ili', zxi'ini xi'sóë' Aarón, guli'guié' Xanru' náquië' dxi'a.

<sup>20</sup> Libí'ili', zxi'ini xi'sóë' Leví, guli'guié' Xanru' náquië' dxi'a.

Libí'ili', núlöli' rádxili'-në' Xanru', guli'guié' Xanru' náquië' dxi'a.

<sup>21</sup> Núlöli' zóali' yödzö Sión ral-la' guiéli'-në' Xanru' náquië' dxi'a, tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

## 136

<sup>1</sup> ¡Xclenë' Xanru' Dios tu' náquië' dxi'a!

Zóatica'sö yöl-la' dxi'i ladxi' queë'.

<sup>2</sup> ¡Xclenë' Dios nayëpisëtërë' ca yugu' dios izá'a!

Zóatica'sö yöl-la' dxi'i ladxi' queë'.

<sup>3</sup> ¡Xclenë' Xanru', nayëpisëtërë' ca yugu' xángaca bönachi!

Zóatica'sö yöl-la' dxi'i ladxi' queë'.

<sup>4</sup> ¡Xclenë' Dios, tuzë' Lë' runë' yugu' yöl-la' huáca zxon!

Zóatica'sö yöl-la' dxi'i ladxi' queë'.  
<sup>5</sup> ¡Xclenë' Dios, len yöl-la' rácada' queë' benë' lúzxiba!  
 Zóatica'sö yöl-la' dxi'i ladxi' queë'.  
<sup>6</sup> ¡Xclenë' Dios, gudixjé' luyú láhuilö nísado'!  
 Zóatica'sö yöl-la' dxi'i ladxi' queë'.  
<sup>7</sup> ¡Xclenë' Dios, benë' gubidza, en beo'!  
 Zóatica'sö yöl-la' dxi'i ladxi' queë'.  
<sup>8</sup> ¡Benë' Dios gubidza para tsení' lahui' dza!  
 Zóatica'sö yöl-la' dxi'i ladxi' queë'.  
<sup>9</sup> ¡Benë' Dios beo', en yugu' böljaj para ulu'zení' chi'i dzö'ölö!  
 Zóatica'sö yöl-la' dxi'i ladxi' queë'.  
<sup>10</sup> ¡Xclenë' Dios, bëtië' yugu' bi'i bönni' lo quégaca bönachi Egipto!  
 Zóatica'sö yöl-la' dxi'i ladxi' queë'.  
<sup>11</sup> ¡Bubéajé' bönachi Israel ladaj bönachi Egipto na'!  
 Zóatica'sö yöl-la' dxi'i ladxi' queë'.  
<sup>12</sup> ¡Len yöl-la' huáca zxön queë', en lu yöl-la' nadxí'i queë' benë' caní!  
 Zóatica'sö yöl-la' dxi'i ladxi' queë'.  
<sup>13</sup> ¡Xclenë' Dios, bubéajé' choplö Nísado' Xiná!  
 Zóatica'sö yöl-la' dxi'i ladxi' queë'.  
<sup>14</sup> ¡Benë' ga gula'dödi bönachi Israel gatsaj láhui'lö nísado' na'!  
 Zóatica'sö yöl-la' dxi'i ladxi' queë'.  
<sup>15</sup> ¡Lu nísado' na' busunítië' Faraón, en bönni' queë' röjáquië' gudil-la!  
 Zóatica'sö yöl-la' dxi'i ladxi' queë'.  
<sup>16</sup> ¡Xclenë' Dios, guchë'ë bönachi queë' la' guixi' ga ni' naca yu bidxi!  
 Zóatica'sö yöl-la' dxi'i ladxi' queë'.  
<sup>17</sup> ¡Xclenë' Dios, bëtië' bönni' gula'nná bë'ë, guláquië' nal-la!  
 Zóatica'sö yöl-la' dxi'i ladxi' queë'.  
<sup>18</sup> ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!  
 Zóatica'sö yöl-la' dxi'i ladxi' queë'.  
<sup>19</sup> ¡Bëtië' Sehón, bönni' gunná bé'enë' bönachi Amorreo!  
 Zóatica'sö yöl-la' dxi'i ladxi' queë'.  
<sup>20</sup> ¡Bëtië' Og, bönni' gunná bé'enë' bönachi Basán!  
 Zóatica'sö yöl-la' dxi'i ladxi' queë'.  
<sup>21</sup> ¡Budödë' xiyúgaquië' lu ná'agaca bönachi queë'!  
 Zóatica'sö yöl-la' dxi'i ladxi' queë'.  
<sup>22</sup> ¡Budödë' le lu ná'agaca bönachi Israel, bönachi tun xichinë'!  
 Zóatica'sö yöl-la' dxi'i ladxi' queë'.  
<sup>23</sup> ¡Yöjnenë' rë'u cate' ni' bugá'anaru' cá'asö!  
 Zóatica'sö yöl-la' dxi'i ladxi' queë'.  
<sup>24</sup> ¡Busölë' rë'u lu ná'agaca nupa gula'díl-lalen rë'u!  
 Zóatica'sö yöl-la' dxi'i ladxi' queë'.  
<sup>25</sup> ¡Rugahuë' yúgu'të bönachi!  
 Zóatica'sö yöl-la' dxi'i ladxi' queë'.  
<sup>26</sup> ¡Xclenë' Dios, zoa cazë' yehua' yubá!  
 Zóatica'sö yöl-la' dxi'i ladxi' queë'.

## 137

<sup>1</sup> Ra' yegu nacúa' lu yu Babilonia gurö'ötu',  
 en gurödxí yéchi'tu', cate' yöjnetu' yödzö Sión.

<sup>2</sup> Lu yaga rö'gaca yugu' ra' yegu ni'

bugála'tu' yugu' le rúl-lalentu'.

<sup>3</sup> Caní bentu' tu' gula'nabi yudxi nupa gulaché' netu' nadzuntu' ni' gúl-latu'.

Nupa bulu'saca' zi' netu' gula'naba queétu' yöl-la' ruzxidxi, gula'nná:

“Gulí gul-la queétu' tu le rul-la que yödzö Sión.”

<sup>4</sup> ¿Nacxi caz gaca gúl-latu' le rul-la queé' Xanru'

ga ni nadzuntu' tu lu yödzö izá'a?

<sup>5</sup> Channö gal-la ládxa'a yödzö Jerusalén,

rinábida'-nē' Dios ugüē' yöl-la' raca que na'a ibēla.

<sup>6</sup> Rinábida'-nē' gunē' ga ta' lúdxa'a chichja'

channö cabí tsöjneda' ladza',

en channö cabí huí' zxönra' yödzö Jerusalén ca ia'tú le ruzí'ida' xibé.

<sup>7</sup> Yöjné le gulunē' zxí'ini xi'sóē' Edom, Xan,

le gulunē' dza busiúdxu' yödzö Jerusalén,

ca na' gula'nné': “Gulí'quinnaj dēra.

Gulí'quinnaj dēra ga idxintē xilibi zö'ö yödzö na'.”

<sup>8</sup> Libí'ili', bönachi Babilonia, libí'ili' rusunítli',

bica' ba nu ubí'i queéli' ca na' benli' queétu'.

<sup>9</sup> Bica' ba nu quela' yugu' bí'ido' queéli'

en uzxuzxaj légacabi' yugu' lu guió'j.

## 138

<sup>1</sup> Idú ládxa'a guía' Li', “Xclenu” Xan.

Gul-la' yöl-la' ba quiu' lógaca le tun zxön bönachi yugu' yödzö izá'a.

<sup>2</sup> Uzóa zxiba' saca' yudo' lá'ayi quiu', en guía' Li', “Xclenu”

ni'a que Lo', tu' nacu' dxi'i ladxi', en runu' ca rnna didza' bē'u,

tu' benu' ca naca lu xtídzu'u, en lu le naca ca nazí'i lo.

<sup>3</sup> La' dza ná'asö cate' bulidza' Li', bubi'u didza'.

Tu' butipu' ládxa'a, guca' rugu ladxi'.

<sup>4</sup> Yúgu'tē bönni' ta'nná bē'ē ilé' Li': “Xclenu” Xan,

cate' ila'yönnē' didza' ru'u.

<sup>5</sup> Ilul-lē' ca nácagaca le runē' Xanru' Dios,

tu' nácaterö zxön yöl-la' ba queé' Xanru'.

<sup>6</sup> Sal-la' nayépisētērē' Xanru' Dios

ruí'i ládxe'ē nupa nácagaca cá'asö,

pero zi'tu' zí'tu'sö ruyúē' nupa tun ba zxön cuínguequi.

<sup>7</sup> Sal-la' ridá' ga zoa bönadxi quia', Li' utipa cazu' ládxa'a.

Tíl-lalen cazu' nupa ta'díl-lalen neda',

ate' len yöl-la' huáca quiu' usöló' neda'.

<sup>8</sup> Xanru' gun cazē' quia' ca chinuzóa cazē' gunē'.

Zóatica'sö yöl-la' dxi'i ladxi' quiu', Xan.

Biti' usán no'ö le nun cazu' len na' cuinu'.

## 139

<sup>1</sup> Ruyú cazu' le yu'u icja ládxi'da'ahua', Xan, en nunbē' cazu' neda'.

<sup>2</sup> Nöz quézinu' cate' ribö'a, en cate' riyasa'.

Nözinu' le rizá' ládxa'a ni' zu' zi'tu'.

<sup>3</sup> Ruyú cazu' neda' cate' bi runa', en cate' rasia',  
en nözinu' yúgu'të le runa'.

<sup>4</sup> Zí'atëlö ca bi didza' ru'a,  
chi nöz quézinu' bi innía', Xan.

<sup>5</sup> Röjnöru cazu' lahua', en za' cazu' cúdza'a,  
en naxóatica'sö no'o neda'.

<sup>6</sup> Run ga rubánida' tu' nöz quézinu' Li'.  
Biti' séqui'da' tséajni'ida' ca naca.

<sup>7</sup> ¿Naru' huáca tseja' ga bití' idxín Bö' quiu'?  
¿Naru' huáca izxúnnaja' ga bití' zoa cazu' Li'?

<sup>8</sup> La'tu' huabena' lúzxiba, ni' soa cazu' Li',  
en la'tu' huötja' lataj chul-la, ni' zoa cazu' ca'.

<sup>9</sup> La'tu' uyija' ga rilén gubidza,  
o la'tu' huadöda' ia'tsölá'alö nísado',

<sup>10</sup> ni' caz ichë'u neda',  
ate' len no'o ibëla sön cazu' neda'.

<sup>11</sup> La'tu' innía': "Ucachi' neda' le naca chul-la",  
en la'tu' huóaca chul-la bení' zóalen neda',

<sup>12</sup> bití' gaca chul-la lo' Li' lë na' naca chul-la quia',  
pero chí'i dzö'ölö gaca quiu' ca lahui' dza.

Tuz ca nácagaca lo' Li' le naca chul-la, en le naca lahui' dza.

<sup>13</sup> Nun cazu' Li' le zoa icja ládxi'da'ahua'.  
Benu' ga guyá' lë'ënu xiná'a le naca caza'.

<sup>14</sup> Guía' Li': "Xclenu'" tu' run ga rubánida' ca nun cazu' neda',  
ate' rádxida' Li' tu' tun le nunu' ga rubánida',

ate' bö' naca caza' nözi caz naca caní.

<sup>15</sup> Biti' bigachi' lo' le naca caza' cate' ni' si' galja',  
cate' ni' yu'a lë'ënu xiná'a.

<sup>16</sup> Bilé'e quézinu' neda' cate' ni' si' galja',  
tu' chinuzúajgaca lu guichi quiu'

yugu' dza ral-la' soa' ibana',  
sal-la' bití' ridxini nitú dza na'.

<sup>17</sup> Nazáca'tërögaca quia' le rizá' ládxi'u, Dios.  
Ziántërö nácagaca lë na' rizá' ládxi'u.

<sup>18</sup> La'tu' huáca nu ulaba léguequi,  
ilácagaca ziántërö ca nácagaca guiöj yuzxi.

Cate' rubana', ni' zóalena' Li'.

<sup>19</sup> Raca ládxa'a usunítu' nupa tuá' dö', Dios.

Que lë ni na', guli'cuíta ga zoa', nülöli' rútili' bönachi.

<sup>20</sup> Tuí' didza' zi' ca nacu' Li', Dios,  
ate' nupa ta'dá'baga' Li' ta'nnë liz que Lo'.

<sup>21</sup> ¿Naru' cabí rileda' nupa ta'lé Li', Xan?  
¿Naru' cabí ruzóa' tsölá'alö nupa ta'dá'baga' Li'?

<sup>22</sup> Idú ládxa'a bití' rilé'eda' léguequi dxi'a'.  
Nuzóa' léguequi ca nupa ta'díl-lalen neda'.

<sup>23</sup> Buyú neda', Dios, en gúquibe'e le zoa icja ládxi'da'ahua'.  
Guzxí' bë' neda', en gúquibe'e le rizá' ládxa'a.

<sup>24</sup> Buyú channö zóalen neda' le naca dö',



en buluí'i neda' nöza tsahui' quiu' zóatica'sö.

## 140

<sup>1</sup> Busölá neda', Xan, lu ná'agaca nupa tuá' dö'.

Ben chí'i neda' para cabí bi ilunë' bönni' zi' quia'.

<sup>2</sup> Ta'zá' ládxë'ë le nácgaca xihui' ilunë',  
en tunë' ga ila'díl-lalen bönachi luzë'eguequi.

<sup>3</sup> Didza' tu'ë tun ga nácgaca lúdxí'gaquië' ca yugu' bëla sínia'.

Yu'u ruá'agaquië' le nachë' yöl-la' guti ca le dxía lu láyi'ba' bëla na'.

<sup>4</sup> Ben chí'i neda', Xan, para cabí bi ilunë' bönni' tu'ë dö' quia'.

Ben chí'i neda' para cabí bi ilunë' bönni' zidzaj quia',  
bönni' na' té'ënë' ilunë' ga ichixi iníguida'.

<sup>5</sup> Nupa tun ba zxon cuínguequi nucáchi'gaca le sön neda',  
enca' du yalaj iröli neda'.

Nucáchi'gaca du yalaj ga ral-la' töda'.

Nucözagaca le ila'zön neda'.

<sup>6</sup> Gudxa'-në' Xanru': "Nacu' Dios quia'.

Ruzë' nagu', Xan, yugu' le rinábida' Li'.

<sup>7</sup> Xana' Dios, naca cazu' Nu rusölá neda' len yöl-la' huáca quiu'.

Ben chí'i cazu' icja' cate' ni' zoa' lu gudil-la.

<sup>8</sup> Biti' gu'u lataj, Xan, gaca quia' le ré'ënë' gunë' bönni' ru'ë dö'.

Biti' gu'u lë' lataj idéli'në' le rizá' ládxë'ë, para cabí tsëpisë'.

<sup>9</sup> Nacuá' nupa nagú'ugaca neda' lë'ajlö.

Busubaga' ícjagaquië' dö' té'ënë' ilu'ë quia'.

<sup>10</sup> Ben ga ila'bixaj bo' yalaj lahui ícjagaquië'.

Bë' lataj tsöjtsázagaquië' tu lu guí' zxon,  
en yugu' lu yeru zila ga bití' ila'zéqui'në' ulu'rúajë'.

<sup>11</sup> Biti' gu'u lataj soë' bönni' rizi' yë'ë luyú ni.

Ben ga udxín queë' bönni' zidzaj dö' ru'ë."

<sup>12</sup> Nözda' gunë' Xanru' ga ulu'rúaj tsahui' nupa ta'guí'i ta'zaca',  
en uchi'a usöröë' quégaca bönachi yechi'.

<sup>13</sup> Le nácatë ilë Li': "Xclenu" nupa nácgaca tsahui' tu' tu'lidza Lo'.

Ila'cuá' ga zoa cazu' Li' nupa nácgaca dxí'a.

## 141

<sup>1</sup> Rulidza' Li', Xan. Gudáchi ga zoa'.

Ruzë' nagu' chí'a cate' rulidza' Li'.

<sup>2</sup> Buyú le rulidza' Li' ca dzön yalaj le ridxín lo',  
en cate' richisa na'a, buzí' le ca tu böa'do' uzégui'a-ba' lo'.

<sup>3</sup> Ben chí'i ruá'a, Xan,  
en gudapa chí'i guídi ruá'a para cabí gu'a didza' zi'.

<sup>4</sup> Biti' gu'u lataj gaca ládxa'a le cabí nácatë,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxön.

<sup>5</sup> Bë' lataj gu'ë neda' bönni' tsahui' lu yöl-la' nadxí'i queë'  
para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.  
 Rinábida' Li' uzagu' xinözguequi.  
 6 Ila'ládzu'gaquië' bönni' lo quéguequi lë'e guí'a guiöj,  
 ate' iléqui'be'e gulaca dxi'a didza' bë'a.  
 7 Ca raca cate' nu rugá'ana-ba' bëdxi, en rulá'a yu,  
 ca' gaca que dxita yú'ugaquië',  
 le gulásilasi ra' ba que xilátjagaca nupa nátigaca.  
 8 Richisa lahua' ruyúa' ga zu' Li', Xantu' Dios.  
 Rucachi' cuina' ga na' zu'. Biti' usán no'o neda'.  
 9 Ben ga bití' tsöjbixa' lu le sön neda', lë na' nucáchi'gaca,  
 en ga bití' tsöjtsaza' lu du yalaj nucözagaca nupa tuá' dö'.  
 10 Bë' lataj ila'yaza la' cuíngacasö lu du yalaj bulu'cachi' nupa tuá' dö',  
 pero benna lataj tódisa' neda' ga na' nagachi' du yalaj na'.

## 142

1 Rulidza'-në' Xanru', ru'a zidzaj didza'.  
 Ráta'yua' lahuë' Xanru' uzá' ládxë'ë quia'.  
 2 Rudöda' lahuë' yöl-la' rinaba yudxi quia',  
 en rusiyönda' Lë' le rácagaca quia'.  
 3 Cate' budú ládxa'a,  
 gunözi quézinu' Li' le guca quia'.  
 La' nöza ga ridá' neda'  
 bulu'cachi' le sön neda'.  
 4 Buyú cuita' ibëla  
 tu' cuntú nu zoa nu ruí'i ladxi' neda'.  
 Biti' bi zoa le gácalen neda'.  
 Cuntu nu run chi'i bö' naca caza'.  
 5 Gurödxí'a lo' Li', Xan, gunnía':  
 Run chi'i cazu' neda' Li',  
 en naca cazu' Nu rácalen neda' ladaj nupa nabángaca.  
 6 Ruzé nagu' le rulidza' Li',  
 tu' nagá'ana' cá'asö.  
 Busöla' neda' lu ná'agaca nupa ta'zóa regu' neda',  
 tu' nácatërögaca nál-la ca neda'.  
 7 Guléaj bö' naca caza' lu yu'u lidxi guíë,  
 para gaca guía' Li': "Xclenu" tu' rulidza' Lo'.  
 Nupa náragaca tsahui' ulu'dubi idú gásibi'ilö ga zoa',  
 tu' gunnu' sizxöni quia' le riquinda'.

## 143

1 Ruzé nagu' le rulidza' Li', Xan.  
 Ruzé nagu' le rinabi yúdxida' Li'.  
 Tu' runu' ca rnna didza' bë'u, en nacu' tsahui' gunnú'  
 2 bití' ichë'u neda' lo' ga uchi'a usöröu' quia', huen dxin quiu'.  
 Cuntu nu zoa naca tsahui' lo' Li'.  
 3 Nu bití' rilé'e neda' dxi'a zoa regu' bö' naca caza'.  
 Nuzötjë' yöl-la' na'bán quia' lu yu.  
 Benë' ga zoa' lataj naca chul-la ca raca quégaca nupa gulati dza ni'te.  
 4 Que lë ni na' rudú ládxa'a, en rö'a böniga.  
 5 Röjneda' dza chigula'dödi.

Rizá' ládxa'a ca nácagaca le benu' Li'.  
 Ribequi icja' ca nácagaca le nun no'o.  
 6 Richisa na'a zaca' ga zu' Li'.  
 Rizé ládxa'a Li' ca tu luyú bidxi rizé ladxi' nisa guiój.  
 7 Bubi'itè didza', Xan, tu' rudú ládxa'a.  
 Biti' ucachi' lo' lahua' neda',  
 para cabí gaca' ca tu bönni' ru'ë lataj chul-la ga nacuá' nupa nátigaca.  
 8 Ben ga yönda' yugu' zila ca naca yöl-la' dxi'i ladxi' quiu',  
 tu' ruzxöni ládxa'a Li'.  
 Busèdi neda' ca ral-la' guna',  
 tu' ruchisa' lo' Li' bö' naca caza'.  
 9 Busölá neda', Xan, lu ná'agaca nupa bití' ta'lé'e neda' dxi'a.  
 Nacu' Nu ruzóa neda' tsutsu.  
 10 Busedi neda' para guna' ca rë'ënu' Li',  
 tu' naca cazu' Li' Dios quia'.  
 Bë' lataj iché' Bö' Lá'ayi quiu' neda' lu nöza tsahui'.  
 11 Butipa ládxa'a, Xan, para gaca yöl-la' ba que Lo'.  
 Tu' nacu' tsahui' busölá neda' lu le raca quia'.  
 12 Lu yöl-la' dxi'i ladxi' quiu' guchugu quégaca nupa bití' ta'lé'e neda' dxi'a.  
 Busuniti yúgu'tè nupa tu'saca' zi' bö' naca caza',  
 tu' naca' huen dxin quiu'.

## 144

1 ¡Yöl-la' ba Lë', Xanru' Dios!  
 ¡Náquië' ca tu guiój ga zoa' tsutsu!  
 Rutipë' na'a para gaca tseja' gudil-la,  
 en rutipë' ca' xibón na'a para gaca tíl-lalena' bönni' nácagaquië' nál-la.  
 2 Naca cazë' Xanru' yöl-la' dxi'i ladxi' quia',  
 enca' ca tu ga zoa' tsutsu lu gudil-la.  
 Rusölë' neda', en náquië' ca tu ga zoa' tsaz.  
 Náquië' ca tu le run chí'i neda' lu gudil-la, ate' rucachi' cuina' ga na' zoë'.  
 Runë' ga tun nupa rinná bé'eda' ca rnna didza' ru'a.  
 3 ¿Bíxatë caz náquië' bönni' tu' runu' lë' ba lá'ana, Xan?  
 ¿Bíxatë caz náquië' bönni' tu' ru'i ladxi' cazu' lë'?  
 4 Naca cazë' bönni' na' ca tu bö'do' recja,  
 ate' yugu' dza zoë' nabanë' nácagacasö ca tu zxul-la le rigú'u tu böaj ridödisö.  
 5 Buzötaj lúzxiba, en bdinne ni, Xan.  
 Gudán yugu' guí'a, ate' irúaj dzön lë'eguequi.  
 6 Ben ga tsëpi yösa quiu', en bësilasi léguequi.  
 Busé yugu' yaga lahui tuchi', en ben ga ila'bö' baguí'isö.  
 7 Bulí no'o ga na' zu' xitsá'alö.  
 Busölá neda', en guléaj neda' lu ná'agaca bönachi zi'tu',  
 le gaca ca rubéaju' neda' lu nisa zila.  
 8 Ta'zí' yë' bönachi na',  
 ate' le cabí nácatë naca yöl-la' unná bë' quéguequi.  
 9 ¡Gul-la' quiu' Li', Dios, tu le cubi!  
 ¡Gul-la' quiu' yöl-la' ba, en quínnia' bihuël-la nuá' chi du que!  
 10 Rusölá cazu' bönni' ta'nná bë'ë.

Busöló' David, huen dxin quiu', lu guié tuchi' queë' bönni' ru'ë dö'.

<sup>11</sup> Gúcalen neda', en busölá neda' lu ná'agaca bönachi zi'tu'.

Ta'zí' yë' bönachi na',  
ate' le cabí nácatë naca yöl-la' unná bë' quéguequi.

<sup>12</sup> Ben ga ilácabi' bi'i bönni' queëtu' ni yu'ugacabi' iz cuidi'  
ca yugu' yaga nazxöngaca,  
en ben ga ilácabi' bi'i nigula queëtu'  
ca nácgaca ya'zxén que tu yu'u nazaca'.

<sup>13</sup> Ben ga ilígaca yu'u queëtu' zxoá' za utúbitu',  
en ben ga iláljaba' gayuá' gayuá'aba' chíbodo',  
en bö'cu' zxíla'do' ga nucuá'atu'-ba'.

<sup>14</sup> Ben ga ulu'cuá'aba' böa' huë'ënido' quégaca böa' guixi' queëtu',  
en ga biti' bi gaca quégacaba' bëdxi zxön, en bëdxido' ca'.  
Biti' gu'u lataj soa nu cödxí yechi' la' nöza que ládztatu'.

<sup>15</sup> ¡Bica' bágaca bönachi raca caní quéguequi!  
¡Bica' bágaca bönachi na' Xanru' Dios náquië' Dios quéguequi!

## 145

<sup>1</sup> ¡Guna' Li' zxön, Dios!

¡Nacu' Nu rinná be'e neda'!  
¡Gádxítica'sa' Lo', Xana' Dios!

<sup>2</sup> ¡Tu dza tu dza cu'a Li' yöl-la' zxön,  
en cú'utíca'sa' Lo' yöl-la' ba!

<sup>3</sup> ¡Nayëpisëtë'rë' Xanru' Dios, ate' cú'uru'-në' yöl-la' ba!  
¡Biti' ca' gaca gúnbë'ëru' ca naca yöl-la' zxön queë'!

<sup>4</sup> Yúgu'të bönachi ila'gú'u yöl-la' ba le nun cazu' Li',  
para ulu'siyön zxí'inígaca,  
en ulu'luí'i lahui le nácgaca zxön benu'.

<sup>5</sup> Sa' ládxa'a ca naca yöl-la' zxön que yöl-la' unná bë' quiu',  
en ca nácgaca yöl-la' huáca zxön runu'.

<sup>6</sup> Ilu'i didza' yúgu'të bönachi ca naca yöl-la' zxön  
quégaca yöl-la' huáca runu'.

Úsiyönda' bönachi ca naca yöl-la' zxön quiu'.

<sup>7</sup> Idú ládxi'gaca ilu'i didza' cate' tsöjnégaca yöl-la' dxi'i ladxi' zxön quiu'.  
Lu yöl-la' rudzeja quéguequi ila'bödxí'a tu' nacu' tsahui'.

<sup>8</sup> Xanru' Dios ruzá' ládxe'ë queëru', en ruhuéchi' ládxe'ë rë'u.  
Biti' ilética'së', ate' zxöntë'rö naca yöl-la' dxi'i ladxi' queë'.

<sup>9</sup> Runë' Xanru' Dios le naca dxi'a quégaca yúgu'të bönachi,  
en ruhuéchi' ládxe'ë yúgu'të le nunë'.

<sup>10</sup> Yúgu'të le nunu' ilë Li': "Xclenu'" Xan,  
ate' nupa néquiguequi quez quiu' ilún Li' zxön.

<sup>11</sup> Ilu'i didza' ca naca yöl-la' zxön que le rinná bë'u,  
en ulu'luí'i lahui yöl-la' zxön quiu',

<sup>12</sup> para ulu'siyön bönachi ca nácgaca le zxön runu',  
en ca naca yöl-la' zxön que le rinná bë'u le nayëpisëtë'rö.

13 ¡Zóatica'sö le rinná bë'u,  
ate' idía'tica'sö yöl-la' unná bë' quiu'!  
¡Lu le naca idú ladxi' queë' runë' Dios ca rnnágaca yúgu'të didza' ru'ë,  
en lu yöl-la' dxi'i ladxi' queë' runë' yúgu'të le runë'!  
14 ¡Röjzönë' Xanru' yúgu'të nupa röjtsö'ögaca,  
en ruchisë' yúgu'të nupa ndínnegaca!  
15 ¡Yúgu'të bönachi tu'yú Li', Xan,  
ate' runödzu' le ilágugaca cate' ridxín dza que!  
16 ¡Rusalaj cazu' no'o  
en rugagu' yúgu'të le nacuá' nabángaca!  
17 Náquië' tsahui' Xanru' Dios ca naca yúgu'të le runë'  
en náquië' ca' dxi'i ladxi'.  
18 Zoë' Xanru' gala' ga nacuá' yúgu'të nupa tu'lidza Lë',  
nupa na' tu'lidza Lë' idú ládxi'guequi.  
19 Gunnë' le ta'zë ládxi'gaca quégaca nupa tadxi Lë'.  
Riyönnë' cate' tu'lidza Lë', en rusölë' léguequi.  
20 Run chí'i cazë' Xanru' yúgu'të nupa nadxí'igaca Lë',  
pero usunítië' nupa tuá' dö'.  
21 Len ru'a cuina' cu'a-në' Xanru' yöl-la' ba,  
ate' yúgu'të bönachi ilúntica'sö Lë' zxön.

## 146

1 ¡Gulí'cu'ë yöl-la' ba Xanru'!  
¡Li', bö' naca caza', gulu'ë yöl-la' ba Xanru'!  
2 ¡Cu'a-në' Xana' yöl-la' ba tsanni ni zoa' nabana'!  
¡Gul-la' yöl-la' ba queë' Dios quia' tsanni ni zoa bö' naca caza'!  
3 Biti' uzxöni ládxi'li' bönni' ta'nná bë'ë,  
en calëga bönni' tati cazë', bönni' biti' ca' gaca ulu'sölë' rë'u.  
4 Rurúaj bö' yu'ë nu bönni', ate' ruhuóáquië' yu.  
La' dza ná'asö riniti le rizá' ládxi'ë gunë'.  
5 Bica' ba bönni' rácalenë' Dios queë' Jacob lë',  
bönni' na' runë' löza Xanru' Dios.  
6 Nunë' Xanru' Dios lúzxiba, en luyú ni,  
enca' nísado', en yúgu'të le nacuá' yugu' lataj na'.  
Rúntica'së' Lë' ca rnna didza' bë'ë,  
7 en ruchí'a rusöröë' nupa zoa nu rusaca' zi' léguequi.  
Rugagu' cazë' nupa ta'dún.  
Rusanë' Xanru' Dios nupa nadzúngaca.  
8 Rusaljë' Xanru' Dios guiöj lógaca nupa nácgaca lo chul-la.  
Ruchisë' Xanru' Dios nupa nadzö'ögaca.  
Nadxí'inë' Xanru' Dios nupa nácgaca tsahui'.  
9 Rapa chí'ë Xanru' Dios yugu' bönni' zi'tu'.  
Rácalenë'-bi' yugu' bi'i uzëbi, enca' yugu' nigula uzëbi,  
pero ruzaguë' xinözguequi nupa tuá' dö'.  
10 Inná bë'tica'së' Xanru' Dios.

Náquië' Dios queëli', bönachi Sión.

¡Guli'cu'ë yöl-la' ba Xanru'!

## 147

<sup>1</sup> ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queëru'!

¡Naca lachi, en le ral-la' gunru', cú'uru'-në' yöl-la' ba!

<sup>2</sup> Runë' Xanru' Dios ga rizxón yödzo Jerusalén.

Rutubë' bönni' Israel násilasigaquië'.

<sup>3</sup> Ruúnë' bönni' nácagaquië' yechi' ladxi',  
en rudë'ë lari' ga dxíagaquië' huë'.

<sup>4</sup> Rulabë' tsca nacua' bölj lúzxiba.

Nucu'ë lágacaba' tu tuba' yúgu'të bölj na'.

<sup>5</sup> Nayëpisëtëre' Xanru' Dios, en nál-latëre'.

Ga rë'ë dzu réajni'inë' yúgu'të.

<sup>6</sup> Xanru' Dios rácalenë' nupa ta'guí'i ta'zaca'.

Ruzötjë' nupa tuá' dö' lu yu.

<sup>7</sup> ¡Guli'gul-la queë' Xanru' Dios, guiëli'-në': "Xclenu"!

¡Guli'gul-la yöl-la' ba queë' Xanru', quínnili' lë'egaca bihuél-lado'!

<sup>8</sup> Riguísië' yugu' böaj lúzxiba,

en risöl-lë'ë nisa guiøj luyú.

Runë' ga rilén yö yugu' lu guí'ado'.

<sup>9</sup> Rugahuë' yugu' böa' guíxi'do',

enca' bóiquiajdo' ta'bödxi'aba'.

<sup>10</sup> Biti' raza ládxë'ë yöl-la' nál-la queëba' böa',

en biti' ruzi'ë xibé yöl-la' nál-la queë' bönni'.

<sup>11</sup> Raza ládxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

<sup>12</sup> ¡Guli'cu'ë yöl-la' ba Xanru', libí'ili' zóali' Jerusalén!

¡Guli'cu'ë yöl-la' ba Dios queëli', libí'ili' zóali' Sión!

<sup>13</sup> Bucu'ë tsutsu le tu'baga' gapa nu riyaza yödzo queëli',

en runë' ga raca dxi'a quégaca zxí'inili' ga na' zóali'.

<sup>14</sup> Runë' ga ribözali' dxi'a tsáhui'do',

en runë' ga ruhuölaj ridzé'eli' zxoá' xtila dxi'atëro.

<sup>15</sup> Rinná bé'enë' yödzo'lió ni,

ate' xtídzë'ë ridödité gáti'tës.

<sup>16</sup> Risöl-lë'ë guiøj bögui' ca zxila',

en riguísië' buzén ca dö.

<sup>17</sup> Riguísië' bögui' ca yugu' guiøj ruaj.

¿Nuzxi caz gaca guá' ilén le naca ziaga queë'?

<sup>18</sup> Risöl-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóaca nisa.

<sup>19</sup> Ruíilenë' zxí'ini xi'sóë' Jacob didza',

en riguíxjë' xibá queë' para ilún bönachi Israel ca rnna.

<sup>20</sup> Biti' benë' caní ni'a quégaca bönachi ia'tú yödzo izá'a,

ate' biti' nözigaca ca nácagaca le gunná bë'ë.

¡Guli'cu'ë yöl-la' ba Xanru'!

## 148

<sup>1</sup> ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'alö!

<sup>2</sup> ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscali' dá'ali' Lë'!

<sup>3</sup> ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' böljaj bení'!

<sup>4</sup> ¡Guli'cu'ë yöl-la' ba, libí'ili' zóali' zxon lúzxiba!

¡Guli'cu'ë yöl-la' ba, libí'ili' nisa, zxóali' láhuilö lúzxiba!

<sup>5</sup> ¡Guli'cu'ë yöl-la' ba La la'ayi queë' Xanru', yúgu'tëli',  
tu' bë'ësë' didza', en canísö benë' libí'ili'!

<sup>6</sup> Naguixjë' tsaz libí'ili'.

Naguixjë' xtídzë'ë le catu caz tödi que.

<sup>7</sup> ¡Guli'cu'ë yöl-la' ba Xanru' idütë yödzölió,

en libí'ili' böa' ridali' lu nísado', en nísado' caz,

<sup>8</sup> en libí'ili' guí', en guió'j bögui' yöla sunna, bögui', en böaj,

enca' li', bö' budunu', runu' ca rna xtídzë'ë,

<sup>9</sup> en libí'ili' yugu' guí'a, en yúgu'të guí'ado',

en libí'ili' yaga dxíagaca le ta'bía, en yugu' yaga dxi'a,

<sup>10</sup> en libí'ili' böa' guixi', en böa' bëdxi,

böa' tá'ayöj lë'ëba' lu yu, en böa' zoa xíligacaba',

<sup>11</sup> enca' libí'ili' rinná bë'ëli' yödzölió, en bönachi yugu' yödzö izá'a,

yugu' zxi'inigaquië' bönni' ta'nná bë'ë, en bönni' ruchi'a rusöröli' yödzölió,

<sup>12</sup> enca' libí'ili' bi'i bönni', en bi'i nigúlado',

yugu' bönni' zxon, en yugu' bí'ido'!

<sup>13</sup> ¡Guli'cu'ë yöl-la' ba La la'ayi queë' Xanru'

tu' nayépisëtëro tuzë' Lë'!

¡Nayépisëtëro yöl-la' ba queë' ca luyú ni, en ca lúzxiba xitsá'!

<sup>14</sup> Nuchisë' tu le nuzóa tsutsu bönachi queë',

le naca yöl-la' ba ta'gú'u Lë' nupa néquiquequi queë',

yugu' zxi'ini xi'sóë' Israel, nupa na' nadxi'inë'.

¡Guli'cu'ë yöl-la' ba Xanru'!

## 149

<sup>1</sup> ¡Guli'cu'ë yöl-la' ba Xanru'!

¡Guli'gul-la queë' Xanru' Dios tu le cubi,

en guli'gul-la yöl-la' ba queë' ga nudúbigaca nupa néquiquequi quez queë'!

<sup>2</sup> Ral-la' ulu'zí' xibë' Xanru' Dios bönachi Israel,  
tu' náquië' Nu ben léguequi.

Ral-la' ulu'dzéjalen Dios nupa nacué' Sión,

tu' náquië' Nu rinná be'e léguequi.

<sup>3</sup> Ral-la' ila'gú'u yöl-la' ba La la'ayi queë',

en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queë', ila'capa' lë'e guídi,

en ila'quinni lë'egaca bihuël-lado',  
<sup>4</sup>tu' raza lãdxë'ë Xanru' Dios bönachi queë'.  
 Uchisë' nupa ta'guí'i ta'zaca', en usölë' léguequi.  
<sup>5</sup>Nupa néquiguequi quez queë' ral-la' ulu'dzeja lãdxi'gaca lu bení' queë'.  
 Lu yöl-la' rudzeja quéguequi ral-la' ilúl-la queë' cate' ni' dëgaca lu le ráti'gaca.  
<sup>6</sup>Yöl-la' ba queë' Xanru' Dios ral-la' sóatica'sö ruí'iguequi,  
 en tu guíë tuchi' natuchi' iropa la'a lu ná'agaca,  
<sup>7</sup>para ulu'zí' lëbi bönachi yugu' yödzö izá'a,  
 en ilún xigua' bönachi izá'a na',  
<sup>8</sup>para ilúguë'ë bregui' guíë ná'agaquië' bönni' ta'ná bé'enë' bönachi yödzö izá'a na',  
 en ulu'cu'ë bregui' guíë yen ná'agaquië' bönni' lo quégaquië',  
<sup>9</sup>para ilunë' quéguequi ca nachuguë' Dios gaca quéguequi.  
 Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

## 150

<sup>1</sup> ¡Guli'cu'ë yöl-la' ba Xanru'!  
 ¡Guli'cu'ë yöl-la' ba Dios lu lataj lá'ayi queë'!  
 ¡Guli'cu'ë yöl-la' ba ga dëda' lataj queë'!  
<sup>2</sup> ¡Guli'cu'ë yöl-la' ba ca nãcagaca le zxön nunë'!  
 ¡Guli'cu'ë yöl-la' ba ca naca yöl-la' zxön queë'!  
<sup>3</sup> ¡Guli'cu'ë yöl-la' ba, ucödxili' lúzugacaba' chivo!  
 ¡Guli'cu'ë yöl-la' ba, quínnili' lë'egaca bihuël-la ca'!  
<sup>4</sup> ¡Guli'cu'ë yöl-la' ba, cápa'li' lë'e guídi, en uya'ali'!  
 ¡Guli'cu'ë yöl-la' ba, quínnili' lë'egaca bihuël-la, en ucödxili' gui!  
<sup>5</sup> ¡Guli'cu'ë yöl-la' ba, utíl-lali' guíë lë'e luzë'e!  
 ¡Guli'cu'ë yöl-la' ba, utíl-lali' guíë zxön lë'e luzë'e!  
<sup>6</sup> ¡Guli'cu'ë yöl-la' ba Xanru', tscali' rizí'ili' bö'!  
 ¡Guli'cu'ë yöl-la' ba Xanru'!



## DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús  
(Lc. 3:23-38)*

<sup>1</sup> Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

<sup>2</sup> Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

<sup>3</sup> Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

<sup>4</sup> Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

<sup>5</sup> Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

<sup>6</sup> Isaí gúquië' xuzë' David.

David na' gunná bé'enë' bönachi Israel, ate' butsaga ná'alënë'-nu nigula na' gúcanu zí'aló nigula queë' Urías, ate' David, en nigula ni guláquië' xuz xinë'ë Salomón.

<sup>7</sup> Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

<sup>8</sup> Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

<sup>9</sup> Uzías gúquië' xuzë' Jotam.

Jotam gúquië' xuzë' Acáz.

Acáz gúquië' xuzë' Ezequías.

<sup>10</sup> Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

<sup>11</sup> Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönachi Israel nadzúngaca lu xiyúgaquië'.

<sup>12</sup> Jeconías gúquië' xuzë' Salatiel.

Salatiel gúquië' xuzë' Zorobabel.

<sup>13</sup> Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

<sup>14</sup> Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

<sup>15</sup> Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

<sup>16</sup> Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guidé' idinná bé'enë' légaquië'.

<sup>17</sup> Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

### *Yugu' le guca cate' guljë' Jesucristo*

*(Lc. 2:1-7)*

<sup>18</sup> Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. <sup>19</sup> Náquië' José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'aleni'-bi' bagáchi'sö. <sup>20</sup> Tsanni ni' rizá' ládxe'ë José ca na' gunë', bulufi' lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxi'ini zxi'söë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. <sup>21</sup> Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

<sup>22</sup> Caní guca yúgu'të lë' ni para gaca lë' na' gunnë' Xanru' lu ru'ë bönni' bë'ë didza' uláz queë' Dios, gunnë':

<sup>23</sup> Buli'yútsöca', tu nigula ra'bando',  
tsú'ubi' bí'ido' lë'ëbi',  
ate' gáljabi' tubi' bi'i bönni'do',  
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

<sup>24</sup> Cate' hubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. <sup>25</sup> Biti' guzóaleni'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

## 2

### *Bönni' ta'yéajni'inë' ridiyúgaquië' bí'ido' Jesús*

<sup>1</sup> Cate' gúljabi' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza.

<sup>2</sup> Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' bölaj bení' naca bë' chigúlajbi', ate' za'tu' ni para tseaj ládxi'tu'-bi'.

<sup>3</sup> Cate' gúquibe'enë' Herodes, bönni' rinná bë'ë, lë' ni, gurö'ödë' böniga, en lësca' caní gula'bö' böniga yúgu'të bönachi nacuá' Jerusalén. <sup>4</sup> Ní'irö Herodes na' bulidzë' yúgu'të bixúz unná bë', len bönni' yudo' tu'sedinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'. <sup>5</sup> Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

<sup>6</sup> Biti' nácarö cá'asö yödzo Belén luyú Judá lahuë' Dios ca nácgaca yödzo gapa nacuá' nupa ta'nná bë' luyú ni, tu' irúajë' tu bönni' yödzo Belén, en gáquië' lo, bönni' na' gun chi'ë bönachi Israel quia'.

<sup>7</sup> Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca'xte chiguca bulufi' lahui bölaj na' bila'lë'enë'. <sup>8</sup> Ní'irö gusöl-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queëbi' bí'ido' na'. Cate' chibidzölili'-bi', ididíxjöi'ili' neda', para tseja' ca' neda', tseaj ládxa'a-bi'.

<sup>9</sup> Gudödi bila'yönnë' didza' bë'ë Herodes na', söjáquië' bönni' ta'yéajni'inë' na', ate' böläj na' bila'lé'enë' cate' ni' nacu'ë ládzagaquië' söjnöruba' lógaquië' ga bidxintë yöjsóa ga na' dëbi' bí'ido' na'. <sup>10</sup> Cate' bila'lé'enë' böläj na', bulu'dzëjade'enë'. <sup>11</sup> Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládxi'gaquië'-bi'. Gudödi na' gula'saljë' yugu' yöxaj quégaquië', ate' bulu'nödzejë' queëbi' oro, en yalaj, en nörido' rilá' zxixi que yaga mirra. <sup>12</sup> Tu' chibuzéajni'inë' Dios légaquië' lu yëla bëchigal para cabi' tsöjhuöjquië' ga zoë' Herodes na', que lë ni na' yöjhuöjquië' ládzagaquië' nöza yúbölö.

### *José, en María, ta'chë'ë-bi' Jesús luyú Egipto*

<sup>13</sup> Gudödi bulu'zë'ë yugu' bönni' ta'yéajni'inë' ni', buluí'i lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzxunnaj ni. Guyéaj luyú Egipto, ate' ugá'anu' ni' cate' guiëra' li' ia'tú. Caní gunu' tu' uguiljë' Herodes bí'ido' ni para gútië'-bi'.

<sup>14</sup> Ní'irö guyasë' José, en ni' naca chi'i dzö'ölö, guchë'ë-bi' bí'ido' na', enca' xiná'abi', ate' yöjáquië' luyú Egipto. <sup>15</sup> Bulu'gá'anë' ni' cate' gútirë' Herodes. Caní guca para gaca lë na' gunnë' Xanru' Dios lu ru'ë tu bönni' bë'ë didza' uláz queë', gunnë': "Ga naca luyú Egipto bulidza' Zxí'ina'."

### *Risöl-lë'ë Herodes bönni' ilútië'-bi' bi'i huë'ënido' nacua'abi' yödzö Belén*

<sup>16</sup> Cate' gúquibe'enë' Herodes biti' gulunë' bönni' ta'yéajni'inë' ca rnnë', gulënë', ate' gunná bé'enë' bönni' tsöjáquië' ni' para ilútië'-bi' yúgu'tëbi' bi'i bönni'do' nacua'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahuë'ë'nigacaröbi'. Caní benë' ca busáquië' queë' Herodes na', tsca chiguca dza buluí'i lahui böläj na', dza na' bulu'zéajni'inë' bönni' ta'yéajni'inë' na' lë'. <sup>17</sup> Caní guca, bidxín lë na' gunnë' Jeremías, bönni' bë'ë didza' uláz queë' Dios, gunnë':

<sup>18</sup> Lu yödzö Ramá riyön chí'igaca

nupa ta'bödxi, en nupa ta'bödxi yechi'.

Raquel ribödxi nu ní'a quégacabi' zxi'ininu.

Biti' gaca nu huë tsahui' lënu, tu' chinátigacabi'.

<sup>19</sup> Gudödi gútië' Herodes na', ní'irö buluí'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

<sup>20</sup> —Guyasa. Guchë'-bi' bi'i bönni'do' ni, enca' xiná'abi', ate' böaj luyú Israel, tu' chigulátië' bönni' ni' gulë'ënnë' ilútië'-bi' bi'i bönni'do' ni.

<sup>21</sup> Ní'irö guyasë' José, ate' guchë'ë-bi' bi'i bönni'do' na', enca' xiná'abi', ate' yöhuöjquië' luyú Israel. <sup>22</sup> Cate' gúquibe'enë' José rinná bë'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea. <sup>23</sup> Cate' bidxinë' ni', yöjsóë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

## 3

### *Juan, bönni' ruquilë' bönachi nisa runë' libán lu lataj cá'asö*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea. <sup>2</sup> Juan na' rnnë':

—Buli'bi'i ládxi'li', tu' chizóa idxín dza idinná bë' Nu na' zoa yehua' yubá luyú ni.

<sup>3</sup> Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyõn chi'ë bönni' rulidzë' lu lataj cá'asö, rnnë':

“Buli'pá'a nõza para idxín Xanru' ga zóali'.

Guli'béaj li yugu' nõza lasi tödë' lu icja láchido'oli'.”

<sup>4</sup> Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'. <sup>5</sup> Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. <sup>6</sup> Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

<sup>7</sup> Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libí'ili', di'a dza quégacaba' bëla sínia'. ¿Zoa nu buzéajni'i libí'ili' para izxúnnajli' yöl-la' rusiúdxí na' si' gaca quégaca bönachi? <sup>8</sup> Guli'gún le gaca bë' chibubí'i láchí'li'. <sup>9</sup> Biti' cuéqui ícjali', bití' innali' nácali' tsahui' tu' naca Abraham xuz gudödi queëli'. Rea' libí'ili', huáca gunë' Dios ga ulu'huóaca yugu' guiõj nacua' ni di'a dza queë' Abraham. <sup>10</sup> Chizóa riböza guië huága para ichugu yugu' yaga le rulu'i ca gaca queëli'. Yúgu'të yaga bití' ta'bía le naca dxi'a, irúgugaca, ate' ila'gu'ë léguequi lu guí'. <sup>11</sup> Le nácatë neda' ruquila' libí'ili' nisa lu nisa, nálöli' chibubí'i láchí'li', pero Bönni' na' ral-la' guidé' cate' tödi quia' neda', Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi len guí' queë'. Bönni' ni nácatëre' lo ca neda', ate' neda' bití' naca' lesaca' ilecja' xiráchuë' nudë'ë. <sup>12</sup> Zönë' lu në'ë böcõ' queë', le ulúbinë' ga ridxi'a zxoá' xtila queë'. Cu'ë zxoá' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' bití' ca' ulu.

### *Ridile' nisa Jesús*

*(Mr. 1:9-11; Lc. 3:21-22)*

<sup>13</sup> Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. <sup>14</sup> Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

<sup>15</sup> Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj. <sup>16</sup> Cate' chinadilë' Jesús nisa, la' burúajtë' lu nisa. Ní'irö gualaj lúzxiba lahuë' Jesús, ate' bilé'enë' ruhuõtjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dödo'. <sup>17</sup> Ní'irö biyõn chi'i nu ruí' didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza láchxa'a Lë'.

## 4

### *Rë'ëni Satanás tu' xihui' ibaga' Jesús dul-la'*

*(Mr. 1:12-13; Lc. 4:1-13)*

<sup>1</sup> Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

<sup>2</sup> Idú choá' dza choá' yëla bití' bi gudahuë' Jesús, ate' gudödi ni' ridunë'. <sup>3</sup> Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë' Lë':

—Channö nacu' idú Zxí'inë' Dios, gunná na'a ulu'huóaca guiõj nacua' ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

<sup>5</sup> Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. <sup>6</sup> Ní'irö tu' xihui' rë' Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',  
ate' ulu'chisë' Li' lu ná'agaquië',  
para cabí tsöjchégu'u guiöj, en cabí gunu' zi' ni'u.

<sup>7</sup> Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rna: “Biti' ugunu' dxin Xanu' Dios.”

<sup>8</sup> Ní'irö tu' xihui' guchë' Jesús ga naca tu lu gu'a sibi, ate' ni' bulu'i Lë' yúgu'të yödzö nacuá' yödzölió ni, en yúgu'të yöl-la' tsahui' quéguequi. <sup>9</sup> Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

<sup>10</sup> Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rna: “Xanu' Dios tseaj ládxu'u, en udödi cuinu' lu na' tuzë' Lë'.”

<sup>11</sup> Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

*Risí lahuë' Jesús runë' libán luyú Galilea*

*(Mr. 1:14-15; Lc. 4:14-15)*

<sup>12</sup> Cate' biyönnë' Jesús nadzunë' Juan lidxi guíë, guyijë' luyú Galilea. <sup>13</sup> Buzë'ë yödzö Nazaret, ate' yöjsöë' lu yödzö Capernaum ga naca ra' nísado', lu buzá' quégaca bönachi Zabulón, en bönachi Neftalí. <sup>14</sup> Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

<sup>15</sup> Luyú Zabulón, en luyú Neftalí,

la' nöza ra' nísado' ia'tsolá'a yegu Jordán saca' ga rilén gubidza.

Luyú Galilea, ga nacuá' bönachi biti' nácagaca judío.

<sup>16</sup> Bönachi chul-la niti ni' bila'lé'e bení,

ate' bönni' ni' nácagaquië' ca nupa chinátigaca, gulén quégauquië' bení'.

<sup>17</sup> Cate' ní'irö gusí lahuë' Jesús runë' libán, en rë' bönachi ni':

—Buli'bí'i ládxí'li', tu' chizóa idxín dza idinná bë' Nu na' zoa yehua' yubá luyú ni.

*Jesús rulidzë' tapë' bönni' uzxön böla para tsöjtá'gaquië' Lë'*

*(Mr. 1:16-20; Lc. 5:1-11)*

<sup>18</sup> Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yöxaj böla quégauquië' lu nísado' na' tu' nácagaquië' uzxön böla. <sup>19</sup> Jesús rë' légaquië':

—Guli'dutá' neda', ate' guna' ga ichë'ëli' bönachi quia', gunli' ca runli' rizönli'-ba' böla.

<sup>20</sup> Chopë' ni la' bulu'cá' anatë' yugu' yöxaj böla quégauquië', ate' söjácalenë' Jesús.

<sup>21</sup> Cate' gudödë' Jesús ia'lati' ní'ilo, bilé'enë' ia' chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' zxf'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégauquië'. Ní'irö Jesús bulidzë' chopë' ni para tsöjtá'gaquië' Lë'. <sup>22</sup> La' bulu'cá' anatë' bárcodo' na', enca' xúzgaquië', ate' söjácalenë' Jesús.

*Jesús rusédinë' bönachi zían*

*(Lc. 6:17-19)*

<sup>23</sup> Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sedë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' té'eguequi. <sup>24</sup> Guzë' didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queégaquië', en ta'gu'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacu'unigaquië' bin ni'a ná'agaquië', ate' Jesús bunë' yúgu'të bönni' na'. <sup>25</sup> Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacuá' ia'tsolá'alö yegu Jordán saca' ga rilén gubidza, ate' röjácalen Jesús.

## 5

*Libán benë' Jesús ga naca lu guí'ado'**(Lc. 6:20-23)*

<sup>1</sup> Cate' bilé'enë' Jesús bönachi zían söjácálen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. <sup>2</sup> Gusí lahuë' rusédinë' légaquië', rnnë':

<sup>3</sup> —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

<sup>4</sup> 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

<sup>5</sup> 'Bica' ba yugu' bönni' nácagaquië' nöxaj ladxí' lahuë' Dios, tu' gata' quégaquië' luyú ni.

<sup>6</sup> 'Bica' ba yugu' bönni' ta'zë ládxi'gaquië' le naca tsahuí' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zë ládxi'gaquië'.

<sup>7</sup> 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

<sup>8</sup> 'Bica' ba yugu' bönni' naca tsahuí' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

<sup>9</sup> 'Bica' ba yugu' bönni' ta'bequi dxíë' didza' bizxaj, tu' ila'zí' lágachië' xzí'ini cazë' Dios.

<sup>10</sup> 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahuí', tu' dë lataj quégaquië' ga rinná bë'ë Bönni' na' zoë' yehua' yubá.

<sup>11</sup> 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nnë' queëli' le xihuí' tu' dá'ali' neda'. <sup>12</sup> Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queëli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'**(Mr. 9:50; Lc. 14:34-35)*

<sup>13</sup> Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóaca siná'a. Bítirö naca lesaca', pero chinaca tu le chú'unaru', ate' ulu'libi bönachi le.

<sup>14</sup> 'Libí'ili' nácali' ca bení' yödzülió ni para uluí'ili' lahui le naca queë' Dios. Ral-la' gácali' ca tu yödzo rö'ö tu lu guí'a, tu' cabí gaca igachi' yödzo na'. <sup>15</sup> Cate' ruquéla'ru' guí', biti' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacua' lu yu'u. <sup>16</sup> Ca na' run bení', ral-la' gunli' ca' libí'ili', gú'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahuí' runli', ila'gú'u-në' Xúzili' Dios zoë' yehua' yubá yöl-la' ba.

*Rusédinë' Jesús que le gunná bë'ë Dios lu në'ë Moisés*

<sup>17</sup> Gunnë' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'. <sup>18</sup> Le nácatë rea' libí'ili'. Tsanni nacua' lúzxiba, en yödzülió ni, biti' tódi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. <sup>19</sup> Que lë ni na', núti'tës bönni' quítsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. <sup>20</sup> Rea' ca' libí'ili': Channö cabí gunli' le nácatërö tsahuí' ca le tunë' bönni' yudo' usedi, enca' ca tunë' bönni' yudo' fariseo, biti' ca' tsú'uli' ga rinná bë'ë Dios yehua' yubá.

*Rusédinë' Jesús ca naca que nu rilé luzë'e*  
(Lc. 12:57-59)

<sup>21</sup> Gunnë' ca' Jesús:

—Chibiyönili' ca gula'nnë' bönni' guta' lu ná'agaquië' le gulë' xuz xtó'oli': "Biti' gútili' bönachi. Nu bönni' gútië' bönachi, nabáguë'ë xíguia', ate' huadxiné' ga uchi'a usöröë' Dios lë'." <sup>22</sup> Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxiné' ga uchi'a usöröë' Dios lë'. Lësca' caní, nu bönni' innë' zi'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guië' luzë'ë: "¡Böa' canöz!" nabáguë'ë xíguia' tsöjtsu'ë lu guí' gabila.

<sup>23</sup> 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li', <sup>24</sup> bucá'ana lë na' unödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

<sup>25</sup> 'Channö zoa nu bönni' rinábinë' li' bi ubi'u queë', en ichë'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nöza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guië, ate' lë' cu'ë li' lidxi guië na'. <sup>26</sup> Le nácatë rea' li', biti' ca' uruju' ni' cate' idxinrö dza quizzxu' ga buitë le ral-lu'u.

*Rusédinë' Jesús ca naca que nu riguitsaj xibá que yöl-la' nutsaga na'*

<sup>27</sup> Gunnë' ca' Jesús:

—Chibiyönili' ca na' gula'nnë': "Biti' gunu' dul-la' le riguitsaj xibá que yöl-la' nutsaga na'." <sup>28</sup> Na'a, neda' rea' libí'ili': Núti'tës bönni' ruyúë' tu nigula len yöl-la' rizë'ladxi' le ruá' dö', chibenë' dul-la' len lënu lu icja ládxi'da'ahuë'.

<sup>29</sup> 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítiiu' tu guiöj lo', en calëga idúteo' tsöjtsú'u lu guí' gabila. <sup>30</sup> Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítiiu' tu no'o, en calëga idúteo' tsöjtsú'u lu guí' gabila.

*Rusédinë' Jesús ca naca que nu bönni' rulá'alenë' nigula queë'*  
(Mt. 19:9; Mr. 10:11-12; Lc. 16:18)

<sup>31</sup> Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." <sup>32</sup> Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

*Rusédinë' Jesús ca naca que nu ruzötaj La la'ayi queë' Dios*

<sup>33</sup> Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios iduté lë na' run tsutsu xtídzu'u ni'a queë' Lë'." <sup>34</sup> Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná bë'ë Dios. <sup>35</sup> Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bë'ë. <sup>36</sup> Biti' gun tsutsu xtídzu'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. <sup>37</sup> Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácagaca didza' ni.

*Rusédinë' Jesús ca naca que nu ruzí' lëbi luzë'e*  
(Lc. 6:29-30)

<sup>38</sup> Gunnë' ca' Jesús:

—Chibiyónili' ca naca le gunná bē'ē Moisés, gunnē': "Nu bi run que guiōj lahui luzē'e, ubí'i ca' que, enca' nu bi run que layi' luzē'e, ubí'i ca' que." <sup>39</sup> Na'a, neda' rea' libí'ili': Biti' tá'baga'li' nu guá' dō' queēli', ate' channō nu capa' xagu' ibēla, bē' lataj capa' ca' ia'tú xagu' yōgōla. <sup>40</sup> Channō zoa nu gun ga uchi'a usōrōē' tu bōnni' li', en cuē' zxo', bē' ca' queē' lari' rixóa cúdzu'u. <sup>41</sup> Channō zoa nu gun bayudxi gu'u yua' que tu chi'i, guyéajlen nu na' chopa chi'i. <sup>42</sup> Nu bi rinábini li', bunōdzaj que, en nu bi guē'ēni gunnu' que tu chi'i, bití' tá'bagu'u lē na' inabi li'.

*Rusédinē' Jesús ca ral-la' idxí'iru' nupa bití' ta'lé'e rē'u dxi'a*  
(Lc. 6:27-28, 32-36)

<sup>43</sup> Gunnē' ca' Jesús:

—Lēasca' caní biyónili' lē na' gula'nnē': "Ral-la' idxí'inu' nu nadxí'i li', en udí'inu' nu bití' rilé'e li' dxi'a." <sup>44</sup> Na'a, neda' rea' libí'ili', guli'dxí'i nupa bití' ta'lé'e libí'ili' dxi'a. Guli'nábinē' Dios gácalenē' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzē' Dios inábili'-nē' gunē' ga gaca dxi'a quégaca nupa ta'nnē' queēli', en tuá' dō' queēli'. <sup>45</sup> Channō gunli' caní, gácali' zxi'ini cazē' Xúziru' Dios, zoē' yehua' yubá, tu' runē' Lē' ga ruzení' gubidza queē' ga nacua' bōnachi tuá' dō', enca' ga nacua' bōnachi tsahui'. Risōl-lē'ē tu nisa guiōj lu yu quégaca bōnachi tsahui', enca' lu yu quégaca bōnachi bití' nácacaga tsahui'. <sup>46</sup> Channō nadxí'isili' bōnni' nadxí'iguequinē' libí'ili', ¿nuzxi caz cu'u libí'ili' yōl-la' ba? Lēasca' caní tunē' bōnni' bití' nácacaga tsahui' na', bōnni' tu'quizxjē' uláz que yōdzō zi'tu', nadxí'iguequinē' luzá'agaquiē'. <sup>47</sup> Channō rugápali' Dios tuzē' bōchi' luzá'ali', ¿bizxi caz runli' le nácatērō dxi'a? Lēasca' caní tunē' bōnni' bití' núnbē'gaquiē' Dios. <sup>48</sup> Pero libí'ili', guli'gaca idú tsahui', ca na' náquiē' Xúziru' Dios, zoē' yehua' yubá, náquiē' idú tsahui'.

## 6

*Rusédinē' Jesús ca ral-la' gácalenru' bōnachi*

<sup>1</sup> Gunnē' ca' Jesús:

—Guli'gú' lādxi'li' gaca idú ca reaj lādxi'li'-nē' Dios. Bití' gúnsili' lē ni lógaca bōnachi para ila'lé'e ca na' runli'. Channō runli' caní, bití' bi gunnē' Xúziru' Dios zoē' yehua' yubá queēli'. <sup>2</sup> Cate' bi unōdzju' que nu bi riyadzaj, bití' gunu' ga ilá' lahui lē na' runu' ca tunē' bōnni' tu'lu'isō tsahui' cuíngaquiē' ga naca lu yu'u ga tu'dubē' bōnni' judío, en tu'sédē' queē' Dios, enca' ga naca lu yē'ēyi. Caní tunē' para ila'gú'u bōnachi légaquiē' yōl-la' ba. Le nácatē' rea' libí'ili', cá'asō naca yōl-la' ba gata' quégaquiē'. <sup>3</sup> Pero li', cate' bi unōdzju' que nu bi riyadzaj, bití' ca' gu'u lataj nu inōzi. <sup>4</sup> Na'a, lē na' unōdzju', bagáchi'sō ral-la' unōdzju', ate' Xúziru' Dios, Nu rilé'e ca na' runu' bagáchi'sō, Lē' ubi'ē quiu'.

*Rusédinē' Jesús ca ral-la' ulídzaru'-nē' Dios*  
(Lc. 11:2-4)

<sup>5</sup> Gunnē' ca' Jesús:

—Cate' ulídzali'-nē' Dios, bití' gunli' ca tunē' bōnni' tu'lu'isō tsahui' cuíngaquiē', tu' ta'yaza lādxi'gaquiē' ta'zuínē' tu'lidzē' Dios gapa naca lu yu'u ga tu'dubē' tu'sédē' bōnni' judío queē' Dios, en gapa naca lu yē'ēyi para ila'lé'e bōnachi légaquiē'. Le nácatē' rea' libí'ili', cá'asō naca yōl-la' ba gata' quégaquiē'. <sup>6</sup> Pero libí'ili', cate' ulídzali'-nē' Dios guli'tsaza lídxili', en buli'sayaj yu'u. Buli'lidzē' Dios inábili'-nē' Xúziru' Dios, zóalenē' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sō, Lē' ubi'ē queēli'.

<sup>7</sup> Cate' ulídzali'-nē' Dios bití' gunli' la' yē'ēyi la' lez ca na' tunē' bōnni' bití' núnbē'gaquiē' Dios, tu' téquinē' huayōnnē' Dios légaquiē' tu' tu'lidzē' la' yē'ēyi la' lez. <sup>8</sup> Bití' gunli' ca na' tunē' légaquiē'. Xúziru' Dios, zí'atēlō cate' si' inábali'-nē', chinōz quézine' le riyadzaj queēli'. <sup>9</sup> Que lē ni na', ral-la' ulídzali'-nē' Dios innali' caní:



Xuz netu', zu' yehua' yubá, gaca zxön Lo'.

<sup>10</sup> Gudá inná bē'u luyú ni.

Ben ga gaca luyú ni ca raza ládxi'u Li' ca na' raca yehua' yubá.

<sup>11</sup> Benna le gágutu' na'a dza.

<sup>12</sup> Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queētu'.

<sup>13</sup> Biti' gu'u lataj si' bē' tu' xihui' netu', pero busölá netu' lu na' nu ruá' dö'.

Nequi quiu' ga rinná bē'u, en yöl-la' unná bē', en yöl-la' ba.

Caní ré'ēnitu' gácatica'sö. ¡Ca' gaca!

<sup>14</sup> Channö uniti loli' luzá'ali', nupa tuá' dö' queēli', uniti lahuē' Xúziru' Dios, zoē' yehua' yubá, libí'ili'. <sup>15</sup> Channö cabí uniti loli' luzá'ali', bití' uniti lahuē' Xúziru' Dios libí'ili' ca naca dul-la' nabága'li'.

*Rusédinē' Jesús ca ral-la' gunru' gubasa*

<sup>16</sup> Gunnē' ca' Jesús:

—Cate' gunli' gubasa, bití' gunli' bayechi' loli' ca tunē' bönni' tu'luí'isö tsahui' cuíngaquiē', tu' tunē' bayechi' lógaquiē' para iléquibe'e bönachi tunē' gubasa. Le nácatē rea' libí'ili', cá'asö naca yöl-la' ba gata' quégaquiē'. <sup>17</sup> Libí'ili', cate' gunli' gubasa, buli'pá'a ícjali', en guli'quibi loli', <sup>18</sup> para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenē' libí'ili' ga na' zóali' queézili', Lē' ubi'ē' queēli'.

*Yehua' yubá ral-la' utúbiru' yöl-la' tsahui' queēru'*

*(Lc. 12:33-34)*

<sup>19</sup> Gunnē' ca' Jesús:

—Biti' utúbili' yöl-la' tsahui' luyú ni, ga ni bēlado' que tu'töba' le, ate' raca ditaj, en ga ni ta'yaza gubán, ta'banē'. <sup>20</sup> Buli'tubi yöl-la' tsahui' yehua' yubá, ga ni bēlado' que bití' ulu'töba' le, en bití' gaca ditaj, en ga ni bití' ila'yáziē' bönni' gubán, en bití' ila'banē'. <sup>21</sup> Ga ni' dē yöl-la' tsahui' queēli', ni' güí'i ládxi'li' idxinli'.

*Le rigú'u bení' icja ládxi'do'oru'*

*(Lc. 11:34-36)*

<sup>22</sup> Gunnē' ca' Jesús:

—Guiöj loru' naca ca tu le rigú'u bení' icja ládxi'do'oru'. Que lē ni na', channö guiöj loli' naca tsahui', idútēli' tsépili' yösa bení'. <sup>23</sup> Channö guiöj loli' bití' naca tsahui', idútēli' nachúl-lali'. Que lē ni na', channö bení' zóalen libí'ili' nuhuóaca le naca chul-la, yénni'tērö nachúl-lali'.

*Dios, en dumí*

*(Lc. 16:13)*

<sup>24</sup> Gunnē' ca' Jesús:

—Cuntu nu bönni' gaca gunē' xichíngaquiē' chopa xanē', tu' uzóē' tuē' tsölá'alö, ate' ia'túē' na' idxi'inē', o ugá'analē' tuē', ate' ia'túē' na' usán ládxi'ē. Bití' gaca gunli' xichinē' Dios, enca' dumí.

*Dios rapa chi'ē nupa néquiquequi queē'*

*(Lc. 12:22-31)*

<sup>25</sup> Gunnē' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tērö yöl-la' na'bán queēli' ca le gáguli', ate' nácatērö lesaca' le nácali' ca lari' gáculi'. <sup>26</sup> Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en bití' tu'lápaba', en bití' tu'túbiba' ga bi ila'gú'uba' quégacaba', pero Xúziru' Dios zoē' yehua' yubá, rugagu cazē' légacaba'. Nazáca'tēröli' libí'ili' ca yugu'

biguinnido' na'. <sup>27</sup> ¿Nuzxi caz bönni' nútsë'ë ladjali' gaca gunë' ga soë' ibanë' ia'túz dza tu ruúbi ruguí'në' para gaca caní queë'?

<sup>28</sup> '¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rő'gaca la' guixi' ca ta'zxön. Biti' tun dxin, en bití' tun du lari'. <sup>29</sup> Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'. <sup>30</sup> Dios caz runë' lachi yöj guíxi'do', le rő'gaca la' guixi', le nacua' na'a dza, ate' cuxö huidzaj ila'yegui lu guí. Channö caní ruí'i lădxë'ë yöj guíxi'do', runë' léguequi lachi, gúnda'arë' ca' queëli', sal-la' bití' réajlë'ëli'-në' idú lădxi'li'. <sup>31</sup> Que lë ni na', bití' ubi uguí'ili', en bití' innali': "¿Bizxi gágutsatu?" o "¿Bizxi guíjatsatu?" o "¿Bizxi lari' gáčutsatu?" <sup>32</sup> Bönachi yödzölió ni tu'úbi tu'guí'ni'a que yúgu'të lë ni, pero zoë' Xúziru' yehua' yubá, ate' Lë' nözinë' naquínili' yúgu'të lë ni. <sup>33</sup> Na'a, guli'güí'irö lădxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. <sup>34</sup> Que lë ni na', bití' ubi uguí'ili' ni'a que le ral-la' gaca cuxö huidzaj, tu' huáca güí'ili' lădxi'li' cuxö huidzaj le gaca queëli' dza na'. Tu tu dza ilaca le ral-la' güí'ili' lădxi'li' dza na'.

## 7

*Biti' ral-la' ichugu bē'ëru' böchi' luzá'aru'*  
(Lc. 6:37-38, 41-42)

<sup>1</sup> Gunnë' ca' Jesús:

—Biti' ichugu bē'ëli' böchi' luzá'ali', para cabí ichugu bē'ë Dios queëli', <sup>2</sup> tu' ichugu bē'ë Lë' queëli' la' leze ca na' richugu bē'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queëli'. <sup>3</sup> ¿Bizx que ruyú' bēbudo' yu'u guiöj lahuë' böchi' luzó'o, en bití' réquibe'enu' yu'u le zxöntërö guiöj lo' li'? <sup>4</sup> ¿Guiétso' böchi' luzó'o: "Gulöz, cueja' bēbudo' yu'u guiöj lo'", ate' li', le zxöntërö ca' yu'u guiöj lo' li'? <sup>5</sup> Li', bönni' rulu'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsahui'do' para gaca cueju' bēbudo' yu'u guiöj lahuë' böchi' luzó'o.

<sup>6</sup> 'Biti' güí'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

*Guli'naba, guli'guilaj, en buli'lidza ra' yu'u*  
(Lc. 11:9-13; 6:31)

<sup>7</sup> Gunnë' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idzöli queëli'. Buli'lidza ra' yu'u, ate' Lë' isaljë' queëli'. <sup>8</sup> Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

<sup>9</sup> 'Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzejë'-bi' guiöj? <sup>10</sup> Channö inábibi' lë' tuba' böla, ¿naru' unödzejë'-bi' bëla?

<sup>11</sup> Libí'ili' nácali' huiá' dö', pero nözili' unödzejali' zxi'inili' le naca tsahui'. Nácatërö löza, Xúzili' zoë' yehua' yubá unödzejë' nupa ta'nábini Lë' le naca dxi'a.

<sup>12</sup> 'Que lë ni na', ca na' ré'ënili' ilún bönachi queëli', lësca' caní guli'gún quégaquië'. Lë ni naca le rinná bē' xibá queë' Moisés, enca' le gula'nnë' bönni' gulu'ë didza' uláz queë' Dios.

*Tu ga ral-la' tsú'uru' le naca tsúpi'do'*  
(Lc. 13:24)

<sup>13</sup> Gunnë' ca' Jesús:

—Guli'tsáz ga nu riyaza le naca tsúpi'do'. Bлага' naca ga nu riyaza, en yalaj naca nöza le rőjácalenë' bönni' ga ni' ila'nítië', ate' ta'yazië' bönni' zían ni'. <sup>14</sup> Tsúpi'do' naca ga nu riyaza, en lásido'os naca nöza le rőjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

*Le runru' naca bë' le nácaru'*  
(Lc. 6:43-45)

<sup>15</sup> Gunnë' ca' Jesús:

—Guli'gún chí'i cuinli' para cabí ila'z'í yé'enë' bönni' ta'z'í yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'luí'i cuíngaquië' nōxaj lādxi'do' ca nácagacaba' bö'cu' zxíla'do', pero lu icja lādxi'do'gaquië' nácagaquië' ca bö'cu' guí'a sínia'.  
<sup>16</sup> Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yōtsi', en bití' ruchíbiru' le ribía yaga higo lu guixi' legui lásido'.  
<sup>17</sup> Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a.  
<sup>18</sup> Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a.  
<sup>19</sup> Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'.  
<sup>20</sup> Caní naca, yugu' le tunë' bönni' na' ilaca bë' le nácagaquië'.

*Nupa bití' ila'yázië' ga rinná bë'ë Dios*  
(Lc. 13:25-27)

<sup>21</sup> Gunnë' ca' Jesús:

—Zian nupa të neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá.  
<sup>22</sup> Cate' idxín dza údxi que yōdzölió ni, bönni' zían ilë' neda', ila'nnë': "Xan, Xan, bentu' libán que xtídze'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön."  
<sup>23</sup> Ní'irö neda' guía' légaquië': "Bití' ca' núnbë'a libí'ili'. Guli'cuíta ga zoa', libí'ili' ruá'ali' dö'."

*Chopa ca gaca udxíaru' xilibi zö'ö*  
(Lc. 6:47-49; Mr. 1:22)

<sup>24</sup> Gunnë' ca' Jesús:

—Ia'stú ca', nu bönni' riyönnë' xtídza'a ni, en gunë' ca rnna, bönni' ni náquië' ca tu bönni' réajni'inë', budxië' lidxë' ga naca lu guiöj.  
<sup>25</sup> Cate' gulaj guiöjsiu', en guzxón yegu gubó'o, en guyecja bö', gudibi nisa cuita yu'u na', pero bití' gubixi, tu' dxía xilibi lu guiöj.  
<sup>26</sup> Na'a, nu bönni' riyönnë' xtídza'a ni, en bití' runë' ca rnna, bönni' ni náquië' ca tu bönni' bití' réajni'inë', budxië' lidxë' lu yu dzöbi.  
<sup>27</sup> Cate' gulaj guiöjsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxitë, en tsaz biguinnaj.

<sup>28</sup> Cate' Jesús budxi bë'lenë' légaquië' didza' ni, bulu'bani bönachi zían nacuá' ni' ca naca le rusédinë',  
<sup>29</sup> tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

## 8

*Ruhuöáquië' tu bönni' ré'enë' huë' nudzu' ruzödi*  
(Mr. 1:40-45; Lc. 5:12-16)

<sup>1</sup> Cate' böjtjë' Jesús lu guí'a na', söjácálen bönachi zían Lë'.  
<sup>2</sup> Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö rë'ënu', huáca unu' neda'.

<sup>3</sup> Ní'irö Jesús la' bulitë në'ë, en gudanë' lë'. Rë' lë':

—Rë'ënda'. Huöácu' dxi'a.

La' bunítitë xihuë'ë bönni' huë' na'.  
<sup>4</sup> Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnödzej le gunná bë'ë Moisés le ulu'í'i bönachi chiböácu'.

*Jesús ruúnë' bi'i huen dxin queë' tu bönni' rinná bë'ë lu gudil-la*  
(Lc. 7:1-10)

<sup>5</sup> Cate' guyázië' Jesús yōdzö Capernaum, bidxinë' tu bönni' ga zoë', bönni' rinná bë'ënë' tu gáyu'ë bönni' röjáquië' gudil-la, ate' gúta'yuë' lahuë' Jesús,  
<sup>6</sup> en rë' Lë':

—Xan, bi'i huen dxin quia' dēbi' yu'u, ré'ebi' huē' nacú'unibi' bin, ate' riguí'i rizáca'da'abi'.

<sup>7</sup> Jesús rē' lē':

—Neda' guída' una'-bi'.

<sup>8</sup> Bubi'ē didza' bōnni' na' rinná bé'enē' bōnni' rōjáquiē' gudil-la, en rē' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'. <sup>9</sup> Lē'sca' neda', zoa nu rinná be'e neda', en nacu'ē ca' bōnni' rōjáquiē' gudil-la rinná bé'egacada'-nē'. Cate' rea'-nē' tuē': "Guyéaj ni", rejē'. Cate' rea'-nē' ia'túē': "Gudá ni", ridē'. Cate' rea'-nē' bōnni' huen dxin quia': "Ben dxin ni", la' runtē' dxin na'.

<sup>10</sup> Cate' biyōnnē' Jesús didza' ni, bubáninē', ate' gudxē' bōnni' sōjácalenē' Lē', rnnē':

—Le nácatē' rea' libí'ili', ga nacuá' bōnachi Israel, cuntu nu bōnni' rōjxéqui'da'-nē' réajlē'ē neda' ca runē' bōnni' ni. <sup>11</sup> Ia'stú' rea' libí'ili': Ila'rúaj bōnachi zían saca' ga rilén gubidza, en saca' ga ribía gubidza, ate' ila'bō'len tsōzxōn Abraham, en Isaac, en Jacob, yehua' yubá ni' ga rinná bē'ē Dios, <sup>12</sup> pero yugu' bōnni' na' gurō cazē' Dios para ila'yáziē' ga na' rinná bē'ē Lē', chú'unē' légaquiē' ní'ilō ga na' naca chul-la, ate' ni' ila'bōdxē', en ulu'til-la láyē'ē lu yōl-la' ruhu'ini quégaquiē'.

<sup>13</sup> Ní'irō Jesús gudxē' bōnni' na' rinná bé'enē' bōnni' rōjáquiē' gudil-la, rnnē':

—Bōaj lidxu'. Ca na' réajlē'u, ca' gaca quiu'.

La' ná'asō bōacatēbi' bi'i huen dxin queē' na'.

*Jesús ruúnē' xiná'anu nigula queē' Pedro*

(Mr. 1:29-31; Lc. 4:38-39)

<sup>14</sup> Bidxinē' Jesús lidxē' Pedro, ate' ni' bilé'enē'-nu xiná'anu nigula queē', dēnu lu da'a, en yú'unu tu xilá. <sup>15</sup> Gudanē' Jesús ná'anu, ate' la' burúajtē xilá na' yú'unu. Ní'irō bōásanu, en bunōdzjanu le gulahuē'.

*Jesús ruúnē' zían nupa te'e*

(Mr. 1:32-34; Lc. 4:40-41)

<sup>16</sup> Cate' chiridzō' dza na', dujuá'agaquiē' zían bōnni' yú'ugaca bō' xihui' légaquiē' ga zoē' Jesús, ate' len yōl-la' rinnēsō queē' bubéajē' yugu' bō' xihui' na', en bunē' ca' yúgu'tē nupa te'e. <sup>17</sup> Caní guca para gaca ca na' gunnē' Isaías, bōnni' bē'ē didza' uláz queē' Dios, gunnē': "Lē' bu'ē yugu' le rizáca'ru', en bu'ē ca' yugu' yōdzōhuē' queēru'."

*Nupa gulē'ēni tsōjácalen Jesús*

(Lc. 9:57-62)

<sup>18</sup> Cate' bilé'enē' Jesús nacuá' bōnachi zían gásibi'ilē', gunná bé'enē' yugu' bōnni' usēda queē' ila'dōdē' ia'tsólá'a nísado' ni'. <sup>19</sup> Bidxinē' tu bōnni' yudo' usedi ga na' zoē' Jesús, en rē' Lē':

—Bōnni' Usedi, sá'lēna' Li' gáti'tēs ga tseju'.

<sup>20</sup> Jesús rē' lē':

—Yugu' bōza' nacuá' zxan guiōj quégacaba', ate' yugu' biguínido', nudxíagacaba' xicá'agacaba', pero neda', Bōnni' Guljē' Bōnachi, biti' dē ga quíxaj icja'.

<sup>21</sup> Ia'túē' bōnni', náquiē' bōnni' usēda queē' Jesús, gudxē' Lē':

—Xan, bēna neda' lataj huōja' ga idxinrō dza chibucácha'a-nē' xuza'.

<sup>22</sup> Jesús gudxē' lē':

—Gudá' neda'. Bē' lataj yugu' bōnni' tati cazē' ulu'cáché'ē nupa ilátigaca quégaquiē'.

*Jesús ribequi dxíē' bō' budunu'*

(Mr. 4:35-41; Lc. 8:22-25)

<sup>23</sup> Gurenē' Jesús lē'e bārcodo', ate' dzágagaquiē' Lē' bōnni' usēda queē'. <sup>24</sup> Ní'irō guyecja bō' budunu' lu nísado' na', ate' riyasa ridxíada' nísado' na' ga bidxintē riyaza nisa lē'e bārcodo' na'. Dē' rásíē' Jesús lē'e barco na'. <sup>25</sup> Ní'irō bila'dxinē' bōnni' usēda queē' Jesús ga na' zoē', ate' bulu'subanē' Lē', en tē' Lē':

—Xan, busölá netu'. Chirigáchi'ru' lu nisa.

<sup>26</sup> Bubi'ë didza' Jesús, en rë légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi.

<sup>27</sup> Bulu'bánninë' bönni' na', ta'nnë':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

*Yugu' bönni' Gadara yú'ugaca bö' xihui' légaquië'*

(Mr. 5:1-20; Lc. 8:26-39)

<sup>28</sup> Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacua' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'. <sup>29</sup> La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxi'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

<sup>30</sup> Ga ni' nacua' nacua'aba' cuchí zían ta'daba' táguba', nacua'aba' láti'do' ga naca zi'tu'.

<sup>31</sup> Gula'naba yechi' bö' xihui' na' Jesús, en të Lë':

—Channö ubéaju' netu', benna lataj tsöjtsú'ugacatu'-ba' cuchí zían ni'.

<sup>32</sup> Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchí zían ni'.

Ní'irö yúgu'tëba' cuchí zían na' yöjbíxitëgacaba' ga naca lë'e guiöj, en yöjcházagacaba' lu nísado', ga ni' gula'yëpiba' nisa, en gulátiba'.

<sup>33</sup> Guládxinë' bönni' tu'yúë'-ba' cuchí na', ate' bulu'zxúnnajë'. Cate' bila'dxinë' lu yödzö, gula'guíxjö'ë yúgu'të lë na' guca quégagaquië' bönni' ni' gula'yú'u bö' xihui' légaquië'. <sup>34</sup> Ní'irö bila'rúaj bönachi lu yödzö ni', yöjtságagaquië' Jesús. Cate' bila'lë'enë' Lë', guláta'yue' lahuë' uzë'ë lu xiyúgaquië' na'.

## 9

*Jesús ruünë' tu bönni' nacú'unië' bin*

(Mr. 2:1-12; Lc. 5:17-26)

<sup>1</sup> Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. <sup>2</sup> Ni' dujuá'gaquië' tu bönni' nacú'unië' bin ga zoë' Jesús, xzoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxu'u, zxi'ina'do'. Chibuníti lahua' dul-la' nabágu'u.

<sup>3</sup> Nacu'ë ca' bönni' yudo' tu'sédinë' ni', ate' ta'nnë' lu icja ládxí'do'gaquië', ta'nnë': "Didza' ru'ë bönni' ni ruzóa Dios tsölá'alö."

<sup>4</sup> Cate' réquibe'enë' Jesús le ta'zá' ládxí'gaquië', rë légaquië':

—¿Bizx que rizá' ládxí'li' caní le cabí naca tsahui'? <sup>5</sup> Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga huöásë', en uzé'enë'. <sup>6</sup> Na'a, ulu'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

<sup>7</sup> Ní'irö la' guyásatë' bönni' na' nacú'unië' bin, en böajë' lidxë'. <sup>8</sup> Cate' bila'lë'enë' bönni' nacua'ë ni' lë ni, bulu'bánninë', ate' gula'gu'ë Dios yöl-la' ba tu' bunödzejë' yöl-la' huáca caní quégaca bönachi.

*Jesús rulidzë' Mateo*

(Mr. 2:13-17; Lc. 5:27-32)

<sup>9</sup> Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjé' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

<sup>10</sup> Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni' cá'asö bila'dxinë' ga zoë', ate' gula'bö'lenë' Jesús tsözxön len yugu' bönni' usëda queë'. <sup>11</sup> Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxön bönni' tu'quíxjë', en iá'zica'rë' bönni' dul-la'?

<sup>12</sup> Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. <sup>13</sup> Gulí'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquië'.

*Rusédinë' Jesús ca ral-la' gunru' gubasa*

*(Mr. 2:18-22; Lc. 5:33-39)*

<sup>14</sup> Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití' tunë' gubasa?

<sup>15</sup> Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacué' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idüë' bönni' na' rutsaga në'ë ga nacué'. Dza ní'irö ilunë' gubasa.

<sup>16</sup> Bucúdzü'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichöza'rö lari' tëbi na'. <sup>17</sup> Lë'sca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë' taca chí'i.

*Rubanbi' bi'i nigula queë' Jairo, en ruhuöácanu tu nigula gudannu lari' nácuë' Jesús*

*(Mr. 5:21-43; Lc. 8:40-56)*

<sup>18</sup> Tsanni ni' Jesús ruí'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxbë' lahuë' Jesús, en rë' Lë':

—Bi'i nigúlado' quia' la' gútitëbi'. Gudá ixóa no'o lëbi', ate' ubanbi'.

<sup>19</sup> La' guzuítenë' Jesús, en sa'yéajlenë' lë'. Dzágagaquië' bönni' usëda queë' Lë'.

<sup>20</sup> Ní'irö bidxinu tu nigula zaca' cúdzü'lë' Jesús, chiguca chinu iz ré'enu, bití' ruhuí'i rön queënu que huë' quégaca cázanu nigula, ate' gudannu lari' nácuë' Jesús. <sup>21</sup> Caní bennu tu' rizá' ládxi'nu, rnnanu: Channö cansa' zxë', huóaca'. <sup>22</sup> Ní'irö buécjë' Jesús, en ruyúë' lënu, ate' rë'ë-nu:

—Butipa ládxi'u, xzí'ina'do'. Chiböácateu' tu' réajlë'u neda'.

La' ná'asö böácatënu.

<sup>23</sup> Cate' bidxinë' Jesús lidxë' bönni' unná bë' na', bilé'enë' nacué'ë ni' bönni' tu'cödxë' gui, en nupa ta'bödxí yechi'. <sup>24</sup> Jesús rë' légaquië':

—Gulí'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacué' ni' bulu'titaj Lë'.

<sup>25</sup> Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. <sup>26</sup> Guzë didza' ca guca lë ni, ate' bila'yöni bönachi nacué' idütë luyú na'.

*Jesús ruúnë' bönni' nachul-la guiöj lógaquië'*

<sup>27</sup> Cate' Jesús burúajë' ni', chopë' bönni' nachul-la guiöj lógaquië' sôjácalenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

<sup>28</sup> Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

<sup>29</sup> Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queëli'.

<sup>30</sup> La' böáljatë' guiöj lógaquië'. Ní'irö Jesús buzenë' bach légaquië', rnnë':

—Guli'gú'ítica'sö ládxi'li' cuntu nu inözi lë ni.

<sup>31</sup> Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

### *Jesús ruínë' tu bönni' bití' ru'ë didza'*

<sup>32</sup> Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' bití' ru'ë didza', tu' yu'u lë' bö' xihui'. <sup>33</sup> Cate' bubéajë' Jesús bö' xihui' na', la' gunnëtë' bönni' na' bití' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

<sup>34</sup> Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

### *Jesús ruhuéchi' ládxe'ë bönachi zían*

<sup>35</sup> Gudë' Jesús idú gásibi'ilö gapa nacuá' yödzö zxon, en gapa nacuá' yödzödo', ate' gapa naca lu yu'u ga tu'dubë' tu'sedë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí' ta'zaca' yugu' lu yödzö na'. <sup>36</sup> Cate' Jesús bilé'enë' bönni' zían ni', buéchi' ládxe'ë légaquië', tu' ta'guí' ta'záquië', en nudú ládxi'gaquië' ca raca quégacaba' bö'cu' zxila' bití' zoa nu ruyú légaacaba'. <sup>37</sup> Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. <sup>38</sup> Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

## 10

### *Jesús riböë' bönni' ilácagaquië' gubáz queë'*

(Mr. 3:13-19; Lc. 6:12-16)

<sup>1</sup> Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí' ta'zaca'.

<sup>2</sup> Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),

Andrés, (böchë'ë Simón na'),

Jacobo, (zxí'inë' Zebedeo),

Juan, (böchë'ë Jacobo na'),

<sup>3</sup> Felipe, Bartolomé, Tomás,

Mateo, (bönni' uquízaj),

Jacobo, (zxí'inë' Alfeo),

Lebeo, (lë' ca' Tadeo),

<sup>4</sup> Simón, (bönni' ruí' ládxe'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

*Jesús risöl-lë'ë gubáz queë' tsöjéngaquië' libán*

*(Mr. 6:7-13; Lc. 9:1-6)*

<sup>5</sup> Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacua' bönachi biti' nacagaca judío, en biti' tsú'uli' ládzagaca bönachi nacua' luyú Samaria. <sup>6</sup> Guli'tséaj ga nacua' bönachi Israel, nacagaquië' ca bö'cu' zxíla'do' nanítigacaba'. <sup>7</sup> Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." <sup>8</sup> Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queéli' yöl-la' unná bë' ni. Buli'gún dxin le, en biti' bi uquízxjali'.

<sup>9</sup> 'Biti' bi guá'ali' lu buzudi queéli', calëga dumí oro, en calëga dumí plata, en calëga dumí lásido'. <sup>10</sup> Biti' guá'ali' yöxaj yöta queéli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queéli', tu' idzöli quézínë' bönni' huen dxin le gahuë'.

<sup>11</sup> 'Gáti'tës yödzö zxön o yödzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'. <sup>12</sup> Cate' tsú'uli' tu lu yu'u, buli'gapa Dios bönachi nacua' lu yu'u na', inábili'-në' Dios unödzjë' quégaquië' le cuéqui dxi icja ládizido'gaquië'. <sup>13</sup> Channö bönachi nacua' lu yu'u ni' nacagaca lesaca', ugá'analen le ribequi dxi ladxi' na' léguequi, pero channö bönachi na' cabí nacagaca lesaca', inábali' cabí ugá'ana lë na' ribequi dxi ladxi' len léguequi. <sup>14</sup> Gáti'tës ga idxinli' ga bönachi ni' biti' ilún libí'ili' bal, en biti' ulu'zë nagui xtízda'li', buli'rúaj lu yu'u ni' o yödzö ni', ate' guli'cuíbi bëchtö da' lë'e lábali', le uluí' léguequi nabága'gaca xíguia'. <sup>15</sup> Le nácatë rea' libí'ili', cate' idxín dza ichúguië' Dios quégaca bönachi, ila'guí'ila'zaca'rö bönachi yödzö na' ca ila'guí'ila'zaca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

*Nupa biti' ta'yéajlë' ulu'saca' zi' nupa dá'gaca Cristo*

<sup>16</sup> Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' guí'a sínia'. Guli'gaca sina' ca nacagacaba' sina' bëla sínia', pero guli'gaca ca' nöxaj ladxi' ca nacagacaba' gu'dödo'. <sup>17</sup> Guli'gún chi'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios. <sup>18</sup> Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bë'ë, tu' dá'ali' neda'. Caní gaca para gaca gunli' ba nali' quia' lógaquië' bönni' ni', en lógaquië' bönni' biti' nacagaquië' judío. <sup>19</sup> Ní'irö cate' ulu'dödë' libí'ili' lu ná'agaquië' bönni' unná bë' na', biti' cö'öli' böniga nacxi innali', tu' ichizë' Dios icja ládizido'oli' didza' güí'ili', en ca innali' la' dza ná'asö. <sup>20</sup> Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queéli', Lë cazë' sóalenë' libí'ili', en gu'ë didza'.

<sup>21</sup> 'Ila'cuá' bönachi ulu'dödi böchi'guequi lu ná'agaquië' bönni' ilútië' légaquië', en lësca' caní, bönni' nacagaquië' xuz ulu'dödë' xí'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. <sup>22</sup> Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. <sup>23</sup> Cate' ulu'saca' zi' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacua' yugu' yödzö quégaca bönachi Israel.

<sup>24</sup> 'Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'. <sup>25</sup> Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

*Nu ral-la' gádxiru'*

*(Lc. 12:2-9)*



<sup>26</sup> Gunně' ca' Jesús:

—Que lē ni na', bití' gádxili' bönachi. Hualá' lahui yúgu'tē le raca bēdxi lándos, ate' huáca bē' yúgu'tē le nagachi'. <sup>27</sup> Yugu' didza' ruí'lena' libí'ili' ga naca chul-la, guli'quixjō' ga naca lu bení', ate' le rea' libí'ili' ga nagachi', guli'nně zidzaj ga naca lahui' lógaca bönachi. <sup>28</sup> Bití' gádxili' nupa tuti le nácagaca caz bönachi, pero bití' gaca ulu'suniti bō' naca cázaru'. Guli'gadxi Dios, Bönni' na' gaca gútiē' idútē le nácali', en chú'unē' bō' naca cázali' lu guí' gabila.

<sup>29</sup> 'Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channō cabí ru'ē Xúziru' Dios lataj gaca caní. <sup>30</sup> Lēasca' caní, nabábagaca yúgu'tē guitsa' ícjali' lahuē' Dios. <sup>31</sup> Que lē ni na', bití' gádxili'. Ruí'tērō ládxiē' Dios libí'ili' ca ruí' ládxiē'-ba' zianba' biguínido'.

*Yugu' bönni' ta'zí' lu ná'agaquiē' Cristo lógaca bönachi*  
(Lc. 12:8-9)

<sup>32</sup> Gunně' ca' Jesús:

—Nu bönni' sí' lu nē'ē neda' lógaca bönachi, neda' sí' lu na'a bönni' na' lahuē' Xuza' zoē' yehua' yubá. <sup>33</sup> Bönni' ta'dá'baguē'ē lógaca bönachi, ila'nnē' bití' ta'dē'ē neda', lēasca' caní neda' tá'bagá'a légaquiē' lahuē' Xuza' zoē' yehua' yubá.

*Jesús náquiē' le run ga ila'rúaj choplō bönachi*  
(Lc. 12:51-53; 14:26-27)

<sup>34</sup> Gunně' ca' Jesús:

—Bití' guéquili' za'a idigu'a le ribequi dxi bönachi yōdzōlió ni. Bití' za'a idigu'a le ribequi dxi, pero za'a idigu'a le gun ga ila'rúaj choplō bönachi. <sup>35</sup> Za'a ni, ate' guna' ga ila'dá'bagá' bönachi xúzguequi, ate' yugu' nigula ila'dá'bagá'nu ca' xiná'agacanu. Lēasca' caní, yugu' nigula zxoá' lídxigacanu ila'dá'bagá'nu xto' zxi'ininu. <sup>36</sup> Caní gaca, la' dí'a dzasō quégaca bönachi ulu'saca' zí' luzē'eguequi.

<sup>37</sup> 'Nu nadxí'irō xuz xinē'e ca nadxí'i neda', bití' naca bachi nu na' ta' neda', ate' nu nadxí'irō bí'i bönni' que o bí'i nigula que ca nadxí'i neda', bití' naca bachi nu na' ta' neda'. <sup>38</sup> Nu bití' sí' lu nē'e gaca ca tu bönni' sōjtē'ē lē'e yaga cruz, en ta' neda', bití' naca bachi guequi quia' neda'. <sup>39</sup> Nu ruí' ladxi' gun chí'i yól-la' na'bán que, uniti le, pero nu uniti yól-la' na'bán que tu' da' neda', ulá nu na'.

*Yugu' le ubi'ē Dios queēru'*  
(Mr. 9:41)

<sup>40</sup> Gunně' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lē'ē neda'. <sup>41</sup> Nu gun bal tu bönni' ru'ē didza' uláz queē' Dios tu' ru'ē didza' uláz queē' Dios, huadeli' nu na' lu nē'ē Dios la' leze na' idéli'nē' bönni' ru'ē didza' uláz queē' Dios. Lēasca' caní, nu gun bal tu bönni' tsahui' tu' náquiē' bönni' tsahui', huadeli' nu na' lu nē'ē Dios la' leze na' idéli'nē' bönni' tsahui'. <sup>42</sup> Núti'tēs nu unōdzaj queē' tu bönni'do' ni tu zxibíndo'os nisa tu' náquiē' bönni' usēda quia' neda', le nácatē rea' libí'ili', bití' uniti nu na' le ral-la' sí' lu nē'ē Dios.

## 11

*Ta'dxinē' bönni' nasöl-lē'ē Juan ga zoē' Jesús*  
(Lc. 7:18-35)

<sup>1</sup> Cate' Jesús budxi buzéajni'inē' yugu' bönni' usēda queē', buzē'ē ni', sa'yéajē' röjsédinē' bönachi, en röjenē' libán yugu' lu lādzagaca bönachi na'.

<sup>2</sup> Juan, bönni' buquile' bönachi nisa, ní' yu'ē lidxi guíē, ate' biyönnē' ca nácagaca le runē' Jesús. Ní'irō Juan na' gusöl-lē'ē chopē' bönni' dá'gaquiē' lē', ate' bila'dxinē' ga na' zoē' Jesús. <sup>3</sup> Chopē' ni gula'nábinē' Jesús, tē' Lē':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'tué' bönni'?

<sup>4</sup>Bubi'ë didza' Jesús, rë' légaquië':

—Guli'tsëaj tsöjtíxjöi'ili-në' Juan lë ni riyönili', en rilé'eli'. <sup>5</sup>Guli'tsöjdxë' ca raca, tu'lé'enë' bönni' guchul-la guiöj lógaquië', ate' tu'zë'ë bönni' biti' guca ila'dë'. Nuhuöácagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'cödzüë'. Nnita' nabángaquië' bönni' gulátië', ate' raca libán que didza' dxi'a lógaca bönachi yechi'. <sup>6</sup>Bica' ba nu bönni' biti' gáquië' chopa ládxë'ë, biti' ubéaj ládxë'ë neda'.

<sup>7</sup>Cate' yugu' bönni' na' dá'gaquië' Juan bulu'zë'ë söjhuöjgaquië', ní'irö gusí lahuë' Jesús ru'ilenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? <sup>8</sup>Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácuagaquië' lari' dxí'ado' nacué'ë lídxigaquië' bönni' ta'nná bë'ë. <sup>9</sup>Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatërë' lo ca ia'zica'rë' bönni' gulu'ë didza' uláz queë' Dios. <sup>10</sup>Caní naca, tu' náquië' Juan bönni' na' ru'i didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inöruë' ca Li'.

Lë' upë'ë nöza ga tödu'.

<sup>11</sup>Le nácatë rea' libí'ili'. Idütë yödzölió ni, cuntú nu zoa nácarö lo ca Juan, bönni' ni' buquilë' bönachi nisa, pero nu naca cuí'do'os ga rinná bë' Nu na' zoa yehua' yubá nácatërö lo ca Juan na'.

<sup>12</sup>Cate' ni' gusí lahuë' buquilë' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. <sup>13</sup>Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulu'í didza' ca rinná bë'ë Bönni' na' zoë' yehua' yubá. <sup>14</sup>Channö rë'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunné' ral-la' ilá' lahuë' leyúbölö dza ni zóaru' na'a. <sup>15</sup>Nu zoa nagui, en riyöni ral-la' uzë' nagui.

<sup>16</sup>¿Bizxi ubéqui'tseda' ca nácgaca bönachi nacua' dza ni zóaru' na'a? Nácgagaquië' ca yugu' bí'ido' ta'bö'öbi' lu yë'ëyi. Zidzaj tu'lídzabi' luzá'agacabi', <sup>17</sup>ta'nnabi': "Rucódxitu' queë'li' gui. ¿Bizx que biti' ruyá'ali'? Rul-la yéchi'tu' queë'li'. ¿Bizx que biti' ribödxí yéchi'li'?" <sup>18</sup>Caní nácali', tu' bidë' Juan, ate' tu' cabí gü'i gudahuë' ca ráguli' libí'ili', gunné'li' queë', gunnali': "Tu' xihu' dzágui lë'." <sup>19</sup>Ní'irö bidxina' neda', Bönni' Guljé' Bönachi, ate' re'aj rahua', ate' rnnë'li' quia', rnnali': "Náquië' bönni' huágulë'ë, en bönni' re'jé'. Náquië' luzá'agaquië' bönni' uquízaj, en ia'zica'rö huen dul-la'." Yöl-la' réajni'i queë' Dios naca bë' ni'a que le tun nupa ta'zí' lu në'eguequi le.

### *Le gaca que nu biti' run ca rnna xtídzë'ë Dios*

*(Lc. 10:13-15)*

<sup>20</sup>Ní'irö gusí lahuë' Jesús ruzenë' bach bönachi nacua' yugu' yödzö gapa ni' benë' zían yöl-la' huáca, tu' cabí tu'bí'ini ládxí'guequi. <sup>21</sup>Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'bí'i ládxí'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'lu'í' tu'bí'i ládxí'gaca bönachi na'. <sup>22</sup>Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'gu'í' ila'zaca' bönachi yödzö Tiro, en yödzö Sidón, nupa na' busunítië' Dios. <sup>23</sup>Libí'ili', bönachi Capernaum, guca queë'li' ca bidxíntëli' ga nu riyaza yehua' yubá. Huötjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintë

na'a dza. <sup>24</sup> Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi Sodoma na'.

*Rnnë' Jesús: "Guli'dá ga zoa', uzí' ládxi'li'"*

*(Lc. 10:21-22)*

<sup>25</sup> Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero buluí'inu' nupa nácgaca ca yugu' bí'ido' le. <sup>26</sup> Ca' gaca, Xuza', tu' caní guyaza ládxi'u Li'. <sup>27</sup> Yúgu'të nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' ré'ënda' uluí'ida' léguequi Dios Xuz. <sup>28</sup> Guli'dá ga zoa' yúgu'tëli' röjxéqui'li' tu' rúntica'sili' dxin que yöl-la' yudo', en nuá'ali' yua' zi'iquégaca xibá que, ate' neda' guna' ga uzí' ládxi'li'. <sup>29</sup> Lu yöl-la' nöxaj ladxi' queëli' guli'gún xichina', gácali' ca bédxi ta'zí'iba' yugu' quégacaba'. Guli'sëda lu na'a neda', tu' naca' nöxaj ladxi', en do' ladxi', ate' idzöli yöl-la' ruzí' ladxi' queëli', le cuéqui dxi ládxi'li'. <sup>30</sup> Yugu' na' ugu'a libí'ili', le naca le inná bé'eda' libí'ili', biti' naca böniga, ate' yua' ugu'a libí'ili' le naca le rusédida', dzá'do'os naca.

## 12

*Ta'lecjë' do bönni' usëda queë' Jesús dza lá'ayi*

*(Mr. 2:23-28; Lc. 6:1-5)*

<sup>1</sup> Dza ni', le naca dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' ta'dunë' bönni' usëda queë', en gusí lógaquië' ta'lecjë' do ga dxía zxoá' xtila, en tahuë' zxoá' xtila na'. <sup>2</sup> Cate' bila'lé'enë' bönni' yudo' fariseo lë ni, të' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

<sup>3</sup> Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'? <sup>4</sup> Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le. <sup>5</sup> ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en biti' ta'báguë'ë xíguia'. <sup>6</sup> Na'a, neda' rea' libí'ili', zoa' neda' ni, en naca' bönni' nácarë' lo ca yudo'. <sup>7</sup> Biti' réajni'ili' lë na' nazúaj lu guichi lá'ayi, le rnna: "Ré'ënda' huéchi' ládxi'li' luzá'ali', en calëga gütigacali'-ba' böa' bédxido' ruzégu'gacali'-ba' lu bucugu lá'ayi quia'." La'tu' réajni'ili' lë ni, biti' ichúguli' quégaca nupa biti' nabága'gaca xíguia'. <sup>8</sup> Ca' naca, tu' naca' neda', Bönni' Guljë' Bönachi, Xani dza lá'ayi.

*Jesús ruúnë' tu bönni' narequi' në'ë*

*(Mr. 3:1-6; Lc. 6:6-11)*

<sup>9</sup> Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sëdë' queë' Dios. <sup>10</sup> Lu yu'u na' zoë' tu bönni' narequi' në'ë, ate' tu' té'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

<sup>11</sup> Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? <sup>12</sup> Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

<sup>13</sup> Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsölá'a në'ë.

14 Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

*Le gunné' tu bönni' bë'ë didza' uláz queë' Dios ca ral-la' gaca queë' Jesús*

15 Cate' réquibe'enë' Jesús lë ni, buzë'ë ni', ate' sôjácálen bönachi zían Lë'. Jesús bunë' yúgu'të nupa te'e ladaj bönachi na', 16 en gunná bé'enë' léguequi biti' usiyönguequi bönachi Nu náquië'. 17 Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

18 Buli'yútsöca', Bönni' ni náquië' Huen Dxin quia', na' guró caza' neda' Lë'.

Nadxi'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna',

uchi'a usöröa' quéguequi.

19 Cuntu nu tíl-lalenë' didza', en biti' ulidzë' zidzaj.

Cuntu nu yöni chi'ë ga naca zi'tu'.

20 Tu guído' zoa bö biti' quitsjë' le, ate' guí' chizóa ulu, biti' usúluë' le,

cate' uzóarë' le naca tsahui' queë'.

21 Yúgu'të bönachi ilún löza Lë'.

*Ta'nnë' bönni' judío unná bë': "Dzaga Jesús tu xihui'"*

*(Mr. 3:19-30; Lc. 11:14-23; 12:10)*

22 Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'. 23 Que lë ni na' bulu'bani yúgu'të bönachi nacua' ni', ta'nná:

—¿Naru' nácatsë' bönni' ni Zxi'ini Xi'sóë' David, Bönni' na' ral-la' guídë'?

24 Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

25 Réquibe'enë' Jesús lë na' ta'zá' ládxi'gaquië', ate' rë' légaquië':

—Gáti'tës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë' quéguequi. Lësca' caní, channö ila'rúaj choplö bönachi nacua' tu yödzö o tu yu'u, en ila'díl-la, biti' gaca ila'día' bönachi nacua' yödzö na' o yu'u na'. 26 Lësca' caní, channö ubéaj Satanás tu' xihui' la' luzë'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'? 27 Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu' béaj yugu' bö' xihui'? Que lë ni na' le túngaca caz naca bë' nachíxili'. 28 Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidxín le rinná bë'ë Dios ga zóali'.

29 '¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

30 'Nu biti' run neda' tsözxön, ridá'baga' neda', en nu biti' rutubi tsözxön len neda', rusilasi nu na'.

31 'Que lë ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë' zi'ë queë' Dios Bö' Lá'ayi, biti' ca' uniti lahuë' Dios lë'. 32 Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

*Le runru' naca bē' le nácaru'*  
(Mt. 7:15-20; Lc. 6:43-45)

<sup>33</sup> Gunně' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bē' yaga na'. <sup>34</sup> Libí'ili' nácali' di'a dza quégacaba' bëla sínia'. ¿Nacxi gaca güf'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'i didza'. <sup>35</sup> Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' bití' naca tsahui' tu' yu'u le cabí naca tsahui' icja ládxi'da'ahuë'. <sup>36</sup> Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'. <sup>37</sup> Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

*Ta'nábinë' Jesús gunë' le gaca bē' nu náquië'*  
(Mr. 8:12; Lc. 11:29-32)

<sup>38</sup> Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en tē' Jesús:

—Bönni' Usedi, rë'ënitú' ilé'etu' tu le gunu' le gaca bē' dë lu no'o yöl-la' unná bē'.

<sup>39</sup> Bubi'ë didza' Jesús, en rë' légaquië':

—Yugu' bönni' tuá' dö' ni, bití' zoa idú ládxi'do'gaquië', ta'nábinë' neda' guna' tu le gaca bē' nu naca'. Bití' bi le gaca bē' ila'lé'enë', pero le naca bē'sö na' ca guca queë' Jonás, bönni' bē'ë didza' uláz queë' Dios. <sup>40</sup> Ca na' guca queë' Jonás na', bugá'anë' lë'ëba' tu böla zxon idú tsonna dza tsonna yëla, lësca' caní gaca quia' neda', Bönni' Guljë' Bönachi, tsonna dza tsonna yëla ugá'ana' zcan yu. <sup>41</sup> Ila'yasë' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le gulunë' usubaga' bönachi ni xíguia' tu' bulu'bí'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'. <sup>42</sup> Lësca' caní, nigula ni' gunná bé'enu yödzö dë saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëro' zi'tu' para yóninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

*Cate' rudxín tu bö' xihui' xilataj*  
(Lc. 11:24-26)

<sup>43</sup> Gunně' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzí' ladxi'. Channö cabí idzöli ga na' uzí' ladxi', <sup>44</sup> ní'irö inná: "Huöja' xilataj' ga ni' birúaja'." Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. <sup>45</sup> Ní'irö tseaj, tsöjxzí' ia'gadxi bö' xihui' nacagacatëro' xihui' ca le, ate' ila'yaza yúgu'të, en ila'cuá' icja ládxi'da'ahuë' bönni' na', ate' ga údxi huayáli'tëro' ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

*Xinë'ë Jesús, en yugu' bönni' böchë'ë*  
(Mr. 3:31-35; Lc. 8:19-21)

<sup>46</sup> Cate' ni' ruí'ilenë' Jesús bönachi didza' ni, xinë'ë, en yugu' bönni' böchë'ë bila'dxinë' ni'. Gula'cu'ë lö'alö, en gulë'ëniagueuinë' ilu'ilenë' Jesús didza'. <sup>47</sup> Ní'irö tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' böchu'u lö'alö, en tē'ënnë' ilu'ilenë' Li' didza'.

<sup>48</sup> Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nözili' nuzxi caz xiná'a, en nupxi caz bönni' böcha'a?

<sup>49</sup> Ní'irö bulí nē'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácagaquië' ca xiná' caza', en yugu' böchi' caza'. <sup>50</sup> Núti'tës nu run ca ré'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

## 13

*Rucúdzu'ë didza' Jesús ca naca queë' tu bönni' guz*

(Mr. 4:1-9; Lc. 8:4-8)

<sup>1</sup> La' dza ní'sö birúajë' Jesús niu' yu'u, ate' yöjchö'ë ra' nísado'. <sup>2</sup> Tu' bila'dxín bönachi zían ga zoë' Jesús, gurenë' tu lë'e bárcodo', en gurö'ë ní', ate' bönachi zían na' gula'cuá' luyú bidxi ra' nísado' na'. <sup>3</sup> Ní'irö Jesús bé'lenë' légaquië' didza', zían le busédinë' légaquië'. Bucúdzu'ë didza', rnnë':

—Buli'yútsöca', birúajë' tu bönni' guz, söjësië' xisedo'. <sup>4</sup> Tsanni ni' söjësië', bal-la xisedo' na' gulasi ra' nöza, ate' bila'dxinba' biguínido', en gulé'ajba' xisedo' na'. <sup>5</sup> Gulasi ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí r'öda' yu ní'. <sup>6</sup> Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. <sup>7</sup> Gula'lén ia'zica'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lë na' bësië', en gulún ditaj le. <sup>8</sup> Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia' tú gayuá'tërö ca'. Ia'zica'rö bulu'nödzej ia'tsónnalaj ca', ate' ia'zica'rö bulu'nödzej ia'chí uruá' ca'. <sup>9</sup> Nu zoa nagui, en riyöni, ral-la' uzë nagui.

*Le té'ëni ilún le bucúdzu'ë Jesús didza'*

(Mr. 4:10-12; Lc. 8:9-10)

<sup>10</sup> Ní'irö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ru'ilenu' bönachi didza' yugu' le rucúdzu'u didza'?

<sup>11</sup> Bubi'ë didza' Jesús, en ré' légaquië':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' té'ëni ila'yéajni'i. <sup>12</sup> Nu si' xtídzë'ë, Dios unödzejë' que ia'lati', ate' gáta'da'arö que, pero nu bití' si' le, la's dui le dë que udúa. <sup>13</sup> Que lë ni na' ru'ilena' légaquië' didza' yugu' le rucúdzu'a didza', tu' tu'yúë' pero bití' ta'lé'enë'. Ta'yönnë' pero bití' tu'zë nágagaquië', en bití' ta'yéajni'inë'. <sup>14</sup> Caní raca quégaquië' para gaca ca na' gunné' Isaías, bönni' bë'ë didza' uláz queë' Dios, gunné':

Le nácate yönili' pero bití' tséajni'ili'.

Uyuli' iná'ali' pero bití' ilé'eli'.

<sup>15</sup> Caní raca tu' nazidi ládxi'do'gaca bönni' ni,

en bití' bi riyaza icja nágagaquië'.

Nadzudi' guiöj lógaquië',

para cabí ila'lé'enë' len guiöj lógaquië' na'.

Bití' ulu'zë nágagaquië',

en bití' ulu'zéajni'i ládxi'gaquië',

en bití' ulu'huóáquië' quia' neda'

para gaca una' légaquië'.

<sup>16</sup> Na'a, bica' ba libí'ili', tu' rilé'e guiöj loli', en riyöni nágali'. <sup>17</sup> Le nácate rea' libí'ili', zían bönni' gulu'ë didza' uláz queë' Dios en yugu' bönni' tsahui' gulé'ënnë' ila'lé'enë' le rilé'eli' libí'ili' pero bití' bila'lé'enë' le. Gulé'ënnë' ila'yönnë' le riyönili' libí'ili' pero bití' bila'yönnë' le.

*Riguíxjö'ë Jesús le bucúdzu'ë didza'*

(Mr. 4:13-20; Lc. 8:11-15)

<sup>18</sup> Gunnë' ca' Jesús:

—Buli'zë nágali' ca naca le bucúdz'u'a didza' que bönni' guz. <sup>19</sup> Núti'tës nu riyöni didza' ca rinná bë'ë Dios yehua' yubá, en bití' réajni'i le, raca que didza' riyöni nu na' ca guca que xisedo' na' gulasi ra' nōza. La' za'të tu' xihui', en rugúa didza' na' guyú'u icja ládxi'da'ahuë' bönni' na'. <sup>20</sup> Xisedo' na' gulasi luyú ga rö'ö guiöj rulu'i ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë', <sup>21</sup> pero ca na' bití' ridía' xisedo' na' tu' cabí' dë ga gun luí, lësca' caní' raca queë' bönni' ni. Cate' idxín tu le usaca' zi' lë', ate' ila'bía ná'gaca bönachi lë' tu' nazí' lu në'ë didza' na', la' gácatë chopa ládxi'ë. <sup>22</sup> Xisedo' na' gulasi ga na' bulu'lén lubá yötsi' rulu'i ca raca queë' bönni' na' riyönnë' didza' na', pero ru'i ládxi'ë yugu' le dë yödzölió ni, ate' nazí' yë'ë bönni' na', tu' ru'i ládxi'ë yugu' yöl-la' tsahui' que. Yugu' lë ni ta'röli didza' na', en tun ga bití' gun dxin lu icja ládxi'da'ahuë'. <sup>23</sup> Xisedo' na' gulasi luyú bëbu rulu'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzaj ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzaj ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzaj ia'chí uruá' ca'.

*Tu guíxi'do' cané le nalá' ca rilá' yöla xzoa' xtila*

<sup>24</sup> Ia'tú le bucúdz'u'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyüë'. <sup>25</sup> Tsanni na' tasië' bönni' nacu'ë lidxë', bidxín tu nu bití' rilé'e xan yu'u na' dxi'a, ate' yöjōza lu xiyüë' xisedo' guíxi'do' cané le nalá' ca naca yöla xzoa' xtila, ate' böaj xilataj. <sup>26</sup> Cate' gulén xzoa' xtila na', en guró'ö do que, ga na' dxía xui'i, ní'irö gulaca bë' guíxi'do' cané na'. <sup>27</sup> Ní'irö bila'dxinë' bönni' huen dxin ga zoë' bönni' xan la' yëla na', en tē' lë': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?" <sup>28</sup> Xan yu na' gudxë' légaquië', rnnë': "Tu bönni' bití' rilé'enë' neda' dxi'a benë' caní." Ní'irö gula'nábinë' huen dxin queë' lë', ta'nnë': "¿Ba rë'ënu' tséajtu' tsöjölajtu' guíxi'do' cané na'?" <sup>29</sup> Xángaquië' rë' légaquië': "¡Bití' ca'! Nadx ca' cate' iládzu'li' guíxi'do' cané na', iládzu'lentëli' ca' yöla xzoa' xtila. <sup>30</sup> Gácarö dxi'a güf'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Bulí'tubi zí'aló guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' xzoa' xtila lu yu'u quia'."

*Rucúdz'u'ë didza' Jesús ca naca que xisé mostaza*

*(Mr. 4:30-32; Lc. 13:18-19)*

<sup>31</sup> Ia'tú le bucúdz'u'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyüë'. <sup>32</sup> Le nácatë xisé mostaza na' nácatërö cuidi' ca yúgu'të xisedo' ia'zica'rö, pero cate' chinadúz, rizxöntërö ca yúgu'të guixi' cuan, en rizxón ca naca tu yaga, ate' ta'dxinba' biguínido', en tunba' xicá'agacaba' lu ni'a në'e.

*Rucúdz'u'ë didza' Jesús que cúa zi que yöta xtila*

*(Lc. 13:20-21)*

<sup>33</sup> Ia'tú le bucúdz'u'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza xzoa' xtila, ate' guyazxa idütë cúa na'.

*Le rë'ëni gun le rucúdz'u'ë didza' Jesús*

*(Mr. 4:33-34)*

<sup>34</sup> Yúgu'të lë ni bucúdz'u'ë didza' Jesús, le bë'lenë' bönachi nacua' ni' didza', en bití' bi didza' bë'lenë' légaquië' le cabí' bucúdz'u'ë didza'. <sup>35</sup> Caní benë' para gaca lë na' buzúajë' lu guichi tu bönni' bë'ë didza' uláz queë' Dios, gunné': Gu'a didza' yugu' le ucúdz'u'a didza'.

Innía' yugu' le nagachi' cate' ni' gusí lo si' guta' yödzölió.

*Rigúixjō'ë Jesús le bucúdzu'ë didza' que guíxi'do' cané*

<sup>36</sup> Ní'irö buzenë' Jesús bönachi nacuá' ni' didza', en gusöl-lë'ë légaquië', ate' guyu'ë yu'u. Ní'irö bila'dxinë' bönni' usëda queë' ga zoë', en tē' Lē':

—Gudíxjōi'i netu' le rē'ëni inná lë na' bucúdzu'u didza' que guíxi'do' cané le nalá' ca naca yöla zxoa' xtila.

<sup>37</sup> Bubi'ë didza' Jesús, ate' rē' légaquië':

—Bönni' razë' xisedo' dxi'a naca' neda', Bönni' Guljē' Bönachi. <sup>38</sup> La' yëla na' naca yödzölió ni, ate' xisedo' dxi'a na' tu'luí' ca nácagaca nupa nabábagaca ga rinná bē'ë Dios. Guíxi'do' cané na' le nalá' ca naca yöla zxoa' xtila tu'luí' ca nácagaca nupa néquiguequi que tu' xihui'. <sup>39</sup> Nu na' biti' rilé'e dxi'a xan la' yëla na', en yöjōza guíxi'do' cané na', tu' xihui' caz naca. Dza ulu'tubë' na' rulu'i ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. <sup>40</sup> Ca na' guca, bulu'tubë' guíxi'do' cané na', en bulu'zégui'ë le lu guí', lësca' caní gaca cate' údxi que yödzölió ni. <sup>41</sup> Neda', Bönni' Guljē' Bönachi, isöl-la'gaca'-në' gubáz lá'ayi quia', ate' ulu'béajë' ga rinná bē'ë Dios yúgu'të nupa tun ga tun dul-la' luzë'eguequi, enca' nupa tuá' dö'. <sup>42</sup> Yugu' gubáz lá'ayi na' ila'gu'ë bönni' tuá' dö' na' lu guí' gabila. Ni' ila'bödxë', en ulu'tíl-la láyi'gaquië'. <sup>43</sup> Ní'irö ila'yëpi yösa bení' bönachi tsahui', en ilácagaquië' ca gubidza ga ni' rinná bē'ë Dios yehua' yubá. Nu zoa nagui, en riyöni ral-la' uzë' nagui.

*Rucúdzu'ë didza' Jesús que tu yöl-la' tsahui' nagachi'*

<sup>44</sup> Lësca' caní bucúdzu'ë didza' Jesús, rnnë':

—Le rinná bē'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucáchë'ë le leyúbölö ga na' bigachi', ate' lu yöl-la' rudzeja queë' guyijë', yöjéti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

*Rucúdzu'ë didza' Jesús que tu bugá le nazáca'da'*

<sup>45</sup> Gunnë' ca' Jesús:

—Ca ral-la' së ládxi'li' le rinná bē'ë Dios yehua' yubá naca ca benë' tu bönni' rá'uë', en ruúti'ë, en riguiljē' bugá nazáca'gaca. <sup>46</sup> Cate' bidzölinë' tu bugá le nazáca'da', guyijë', yöjéti'ë yúgu'të le dë queë', ate' gú'uë' bugá na'.

*Rucúdzu'ë didza' Jesús que tu yöxaj böla*

<sup>47</sup> Lësca' caní gunnë' Jesús:

—Ca gaca ga ridxín le rinná bē'ë Dios yehua' yubá, gaca ca run tu yöxaj böla le ta'chiljē' bönni' lu nísado', le röjxi' zían böla izá'a. <sup>48</sup> Cate' chibidzá' yöxaj na', bulu'béajë' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'ru'unë'-ba' yugu' böla cá'asö. <sup>49</sup> Lësca' caní gaca cate' údxi que yödzölió ni. Ila'rúajë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuítië' légaquië' ladaj bönachi tuá' dö'.

<sup>50</sup> Ní'irö ila'gu'ë bönachi tuá' dö' na' lu guí' gabila. Ni' ila'bödxë', en ulu'tíl-la láyë'ë.

*Yöl-la' tsahui' le naca gula, en le naca cubi*

<sup>51</sup> Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', tē' Lē':

—Ön, Xan.

<sup>52</sup> Jesús gudxë' légaquië':

—Cate' tu bönni' yudo' usedi chinazí' lu nē'ë le rinná bē'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.



*Le benë' Jesús lu yödzo Nazaret**(Mr. 6:1-6; Lc. 4:16-30)*

<sup>53</sup> Cate' budxi bucúdzu'ë Jesús yugu' didza' ni, buzé'ë ni'. <sup>54</sup> Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sedë' queë' Dios, ate' bulu'bánninë, ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? <sup>55</sup> Náquië' bönni' ni zxí'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas. <sup>56</sup> Lësca' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

<sup>57</sup> Que lë ni na' gulaca chopa lãdxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacua' lidxë' biti' tun lë' bal.

<sup>58</sup> Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

**14***Ca bëtgaquie' Juan, bönni' buquilé' bönachi nisa**(Mr. 6:14-29; Lc. 9:7-9)*

<sup>1</sup> Lu dza ni', biyönnë' Herodes, bönni' rinná bë'ë luyú Galilea, ca nãcagaca yugu' yöl-la' huáca runë' Jesús. <sup>2</sup> Herodes na' gudxë' yugu' ni'a në'ë, rnnë':

—Bönni' na' Juan, bönni' buquilé' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

<sup>3</sup> Caní gunnë' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guíë, ate' gula'gu'ë lë' lidxi guíë tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'. <sup>4</sup> Caní benë' Herodes, tu' gudxë' Juan na' lë': "Biti' ral-la' sóalenu'-nu."

<sup>5</sup> Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiquequi bönachi náquië' Juan na' tu bönni' ru'ë didza' uláz queë' Dios. <sup>6</sup> Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza lãdxë'ë Herodes le benbi'. <sup>7</sup> Guzxí' lu në'ë Herodes, en benë' tsutsu xtídzë'ë unödzejë' queëbi' bítitës bi inábibi' lë'. <sup>8</sup> Tu' chibusédinu-bi' zí'alö xiná'abi', gúdxibi' lë':

—Benna quia' na'a icjë' Juan, bönni' buquilé' bönachi nisa. Gulú'u le tu lu zxiga' zxön.

<sup>9</sup> Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjnödzej icjë' Juan na' queëbi'. <sup>10</sup> Caní guca, gusöl-lë'ë nu tsöjrixí yenë' Juan ga ni' yu'ë lidxi guíë. <sup>11</sup> Bönni' na' nasöl-lë'ë bu'ë icjë' Juan na', zxoá lu zxiga' zxön, ate' bunödzejë' le queëbi' bi'i nigula na', ate' lëbi' buá'abi' le queënu xiná'abi'.

<sup>12</sup> Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

*Jesús rugahuë' zíanrö ca chi-un gayuá' bönachi**(Mr. 6:30-44; Lc. 9:10-17; Jn. 6:1-14)*

<sup>13</sup> Cate' réquibe'enë' Jesús lë ni, buzé'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzo ni', en yójaca ga ni' idxinë' Jesús, ta'zë'e ní'aguequi. <sup>14</sup> Cate' burúajë' Jesús lë'e barco, bilé'enë' nacua' bönachi zían ni', ate' buéchi' lãdxë'ë léguequi, en bunë' nupa te'e, nútsa'gaca lãdjaguequi. <sup>15</sup> Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzo'do' para gá'ugaca bi ilagu.

<sup>16</sup> Ní'irö Jesús gudxë' légaquië':

—Biti' run bayudxi tsöjácië'. Buli'nödzej libí'ili' le ilahuë'.

<sup>17</sup> Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

<sup>18</sup> Jesús rë' légaquië':

—Buli'dödi le lu na'a.

<sup>19</sup> Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélé'ë gayu' yöta xtila na', en chópaba' böla na', ate' guchisa lahuë', ruyüë' zaca' yehua' yubá. Gudxë' Dios: "Xclenu'." Ní'irö buzzuxjé' yöta xtila na', en budödë' le lu ná'agaquië' bönni' usëda queë', ate' légaquië' gula'guísië' le lógaca bönachi zían na'. <sup>20</sup> Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. <sup>21</sup> Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

*Jesús rizë'e ni'ë lu nísado'*

*(Mr. 6:45-52; Jn. 6:16-21)*

<sup>22</sup> Ní'irö la' bentë' Jesús ga gula'benë' bönni' usëda queë' lë'e bárcodo', en tsöjácië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. <sup>23</sup> Cate' chibusöl-lë'ë Jesús bönachi na', gurenë' tu lu guí'ado' ga ni' yöjsöë' tuzë'. Ni' bulidzë' Dios. Cate' chigul-la, tuzë' zoë' ni'. <sup>24</sup> Bárcodo' ga na' nacu'ë bönni' usëda queë' ridödi gatsaj láchui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. <sup>25</sup> Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. <sup>26</sup> Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bödxí'ë, ta'nnë':

—Tu' ridasö na'.

<sup>27</sup> Ní'irö Jesús la' bulidztë' légaquië', rnnë':

—Buli'zxöni láchí'li'. Neda' ni. Biti' gádxili'.

<sup>28</sup> Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

<sup>29</sup> Jesús gudxë' lë':

—Gudá.

Ní'irö bö'tjé' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. <sup>30</sup> Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjé' lu nisa, ate' gurödxí'ë. Bulidzë' Jesús, rnnë':

—Xan, busöla neda'.

<sup>31</sup> Jesús la' bulitë në'ë. Buguélé'ë lë', en rë' lë':

—Láti'sö réajlë'u neda'. ¿Bizx que guca chopá láchu'u?

<sup>32</sup> Cate' bulu'benë' lë'e bárcodo' na', gurö'ö dxi bö' na' recja. <sup>33</sup> Ní'irö bönni' nacu'ë lë'e bárcodo' na' gula'yéaj láchí'gaquië' Jesús, ta'nnë':

—Le nácatë, Zxí'inë' Dios nacu'.

*Jesús ruúnë' yugu' bönni' huë' nacu'ë yödzö Genesaret*

*(Mr. 6:53-56)*

<sup>34</sup> Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. <sup>35</sup> Cate' bulu'únbë'ë bönni' yödzö ni' Jesús, gula'söl-lë'ë didza' idütë luyú ni', ate' du-juá'gaquië' yúgu'të nupa te'e ga na' zoë' Jesús. <sup>36</sup> Guláta'yüë' lahuë' Jesús gu'ë légaquië' lataj ila'gansë' ruí' lari' nácuë', ate' la' bulu'huöácatë yúgu'të nupa na' bila'gán lari' na'.

## 15

*Le tun ga bití' nácaru' tsahui' lahuë' Dios*

*(Mr. 7:1-23)*

<sup>1</sup> Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

<sup>2</sup> —¿Bixx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guibi në'ë ca naca que yudo' cate' si' ilahuë'.

<sup>3</sup> Bubi'ë didza' Jesús, en gunábinë' légaquië', rnnë':

—¿Bixx que libí'ili' ca' rucá'anali' cá'asö xibá queë' Dios para gunli' le nulaga loli' runli'?

<sup>4</sup> Caní' raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu innë' zí' que xuz xinë'e, tsaz gati nu na'." <sup>5</sup> Pero libí'ili' rnnali': "Channö nu guíë xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios, <sup>6</sup> bítí'rö bi run bayudxi gun nu na' que xuz xinë'e." Caní' runli', rucá'anali' cá'asö le gunná bë'ë Dios, para gunli' le nulaga loli' runli'. <sup>7</sup> Libí'ili', bönni' rulu'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

<sup>8</sup> Bönni' ni, len rú'agacsë' tunë' neda' bal, en calëga idú ládxi'gaquië'.

<sup>9</sup> Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

<sup>10</sup> Ní'irö bulidzë' Jesús bönachi nacuá' ni', en rë' léguequi:

—Buli'zë' nágali' le guía' libí'ili', en guli'tséajni'i. <sup>11</sup> Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

<sup>12</sup> Ní'irö yugu' bönni' usëda queë' Jesús gula'bígui'ë ga zoë', en të' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

<sup>13</sup> Ní'irö bubí'ë didza' Jesús, en rë' légaquië':

—Yúgu'të le nadúz, le cabí' guzë' Xuza' zoë' yehua' yubá, huadúl' jagaca idú luí.

<sup>14</sup> Buli' cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'túë' bönni' lo chul-la, iropë' ila'bixë' tu lu yeru.

<sup>15</sup> Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdz'u didza'.

<sup>16</sup> Jesús rë' légaquië':

—¿Naru' cabí' réajni'itseli' ca' libí'ili'? <sup>17</sup> ¿Naru' cabí' réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'? <sup>18</sup> Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. <sup>19</sup> Caní' raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizë' ládxi'li' cuanli', en yugu' le rinnëli' que luzá'ali' le cabí' nácate, en yugu' le rinnë' xihui'li'. <sup>20</sup> Yugu' le caní' tun ga bití' náquië' tu bönni' tsahui' lahuë' Dios, pero channö cabí' nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

### *Tu nigula izá'a réajlë'ënu Jesús*

*(Mr. 7:24-30)*

<sup>21</sup> Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón. <sup>22</sup> Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, zxí'ini xi'sóë' David, buéchi' ladxí' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

<sup>23</sup> Bití' bi didza' bubí'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anu cúdzuru' ribödxi'anu.

<sup>24</sup> Ní'irö bubí'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa nácagaca ca bö'cu' zxíla'do' nanítigacaba'.

<sup>25</sup> Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

<sup>26</sup> Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

<sup>27</sup> Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

<sup>28</sup> Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

### *Jesús ruúnë' zían nupa te'e*

<sup>29</sup> Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. <sup>30</sup> Bönachi zían dujuá'gaquië' nupa biti' guca ila'zá', en nupa nachul-la guió'j lógaca, en nupa biti' guca ila'nnë', en nupa narugu ni'a në'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi. <sup>31</sup> Bulu'bani bönachi ni' ca naca le benë' Jesús, tu' bila'lé'e tu'nnë' nupa biti' guca ila'nnë', ate' nuhuóacagaca nupa gurugu ni'a në'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

### *Jesús rugahuë' zíanrö ca choá' gayuá' bönachi*

*(Mr: 8:1-10)*

<sup>32</sup> Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usöl-la'gaca-në' tsöjhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

<sup>33</sup> Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zían lu lataj cá'asö ni, le ugágotu' bönachi zían ni?

<sup>34</sup> Gunábinë' Jesús légaquië', rnnë':

—¿Bal-laxi yöta xtila dë queéli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

<sup>35</sup> Ní'irö Jesús gunná bé'enë' bönachi zían na' ila'bö' lu yu. <sup>36</sup> Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzzuxjé' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zían na'. <sup>37</sup> Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra. <sup>38</sup> Yugu' bönni' na' gulahuë' nácagaquië' choá' gáyü'ë, pero cuntunu bulaba yugu' nigula, en bí'ido'. <sup>39</sup> Ní'irö busöl-lë'ë Jesús bönachi na' tsöjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

## 16

### *Ta'nábinë' Jesús gunë' tu le gaca bë' nuzxi náquië'*

*(Mr: 8:11-13; Lc: 12:54-56)*

<sup>1</sup> Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zì' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. <sup>2</sup> Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba." <sup>3</sup> Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë' ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. <sup>4</sup> Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús buca'anë' légaquië', söhuójë'.

### *Le tu'sédinë' bönni' yudo' naca ca cúa zi que yöta xtila*

*(Mr: 8:14-21)*

<sup>5</sup> Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. <sup>6</sup> Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>7</sup> Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

<sup>8</sup> Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'. <sup>9</sup> ¿Naru' cabí réajni'itseli', en bití' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? <sup>10</sup> ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? <sup>11</sup> ¿Naru' cabí réajni'ili'? Bití' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>12</sup> Ní'irö gula'yéajni'inë' bití' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

### *Pedro rnnë' Jesús náquië' Cristo*

*(Mr. 8:27-30; Lc. 9:18-21)*

<sup>13</sup> Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

<sup>14</sup> Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilé' bönachi nisa." Ia'zícá'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zícá'rë' ta'nnë': "Jeremías nacu', o ia'tué' bönni' bë'ë didza' uláz queë' Dios."

<sup>15</sup> Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

<sup>16</sup> Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

<sup>17</sup> Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí buluí'inë' nu bönni' li' lë ni. Xuza' zoë' yehua' yubá buluí'inë' li' lë ni. <sup>18</sup> Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bë' que tu' xihui' bití' sequi' uzaga' xinözgaquië'. <sup>19</sup> Gunna' quiu' yugu' zxí'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë na' Nu na' zoa yehua' yubá ni'.

<sup>20</sup> Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

### *Jesús riguúxjö'ë ca si' ilútië' Lë'*

*(Mr. 8:31-9:1; Lc. 9:22-27)*

<sup>21</sup> La' dza ní'isö gusí lahuë' Jesús riguúxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. <sup>22</sup> Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rnno'.

<sup>23</sup> Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za'sö ládxi'gaca bönachi.

<sup>24</sup> Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'ënë' tē'ë neda', ral-la' uzóë' tsölá'alö yugu' le rë'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca tē'ë neda'. <sup>25</sup> Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'. <sup>26</sup> ¿Naru' uzi'tsë' xibé tu bönni' channö utubë' yúgu'të le dë yödzölió ni pero unítië' yöl-la' na'bán idú queë'? Biti' bi gaca unödzejë' tu bönni' para gata' yöl-la' na'bán idú queë'. <sup>27</sup> Caní rnníá', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsa naca le núngaca. <sup>28</sup> Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi."

## 17

### *Ridzá' ca nalá' lahuë' Jesús* (Mr. 9:2-13; Lc. 9:28-36)

<sup>1</sup> Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yöjáquië' quez tu lu guí'a sibi. <sup>2</sup> Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. <sup>3</sup> Ní'irö bila'lé'enë' bönni' usëda queë' bulu'í' lógaquië' Moisés, en Elías, ate' tu'ilenë' Jesús didza'. <sup>4</sup> Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>5</sup> Tsanni ni' ru'ë Pedro didza' ni, la' gurö'ötë tu böaj bení' le guzxóá légaquië', ate' lu böaj na' biyön chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

<sup>6</sup> Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'. <sup>7</sup> Ní'irö gubígui'ë Jesús ga na' nacu'ë, ate' gudanë' légaquië', rnnë':

—Guli'chasa. Biti' gádxili'.

<sup>8</sup> Cate' gula'chisa lógaquië', en bulu'yüë', cúnturö nu bila'lé'enë', pero tuzë' Jesús.

<sup>9</sup> Cate' ni' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guiëli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

<sup>10</sup> Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi ulu'í' lahuë' Elías zí'alö ca ulu'í' lahuë' Cristo?

<sup>11</sup> Bubi'ë didza' Jesús, rë' légaquië':

—Le nácatë ulu'í' lo cazë' zí'alö Elías, en ucá'anë' tsahui' yúgu'të. <sup>12</sup> Neda' rea' libí'ili': "Chibulu'í' lahuë' Elías na', pero biti' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zi'ë neda'.

<sup>13</sup> Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilë' bönachi nisa.

### *Ruúnë'-bi' Jesús tubi' bi' bönni' ré'ebi' xjote* (Mr. 9:14-29; Lc. 9:37-43)

<sup>14</sup> Cate' bila'dxinë' ga na' nacuá' bönachi zián, gubígui'ë tu bönni' ga zoë' Jesús, ate' buzóá zxibë' lahuë' Lë', <sup>15</sup> en rë' Lë':

—Xan, buéchi' ladxi'-bi' bi' bönni' do' quia', tu' ré'ebi' xjote', en riguí' rizáca'da'abi', ate' zián luzuí' ridzö'öbi' lu guí' o lu nisa. <sup>16</sup> Chidiguá'a-bi' lógaquië' bönni' usëda quiu' pero biti' guca ulu'únë'-bi'.

<sup>17</sup> Bubi'ë didza' Jesús, rnnë':

—Libí'ili', bönachi cabí réajlë'ëli', en bití' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

<sup>18</sup> Ní'irö Jesús buzenë' le bachbö' xihui' na' yu'u lëbi', ate' la' burúajtë lëbi', ate' la' ná'asö böácätëbi' bi'i bönni'do' na'.

<sup>19</sup> Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' bití' guca ubéajtu' netu' bö' xihui' na'?

<sup>20</sup> Jesús rë' légaquië':

—Bití' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queéli' Dios, nácatë ca tu xisedo' mostaza, huáca guiéli' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Bití' bi' zoa le cabí gaca gunli' channö réajlë'ëli' Dios idú ládxi'li'. <sup>21</sup> Tu bö' xihui' caní gácasö ubéajli' channö uládzali'-në' Dios, en gunli' gubasa.

*Riguíxjö'ë Jesús leyúbölö ca si' ilútië' Lë'*

*(Mr. 9:30-32; Lc. 9:43-45)*

<sup>22</sup> Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi. <sup>23</sup> Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

*Jesús riguizxaj lazë' que yudo'*

<sup>24</sup> Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quizxjë' bönachi lázagaca que yudo' ga zoë' Pedro, ate' tē' lë':

—¿Naru' cabí quizxaj lazë' que yudo' bönni' rusédinë' libí'ili'?

<sup>25</sup> Bubi'ë didza' Pedro, rnnë':

—Ön, huaguizxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná' bē'ë luyú ni, ¿nupxi tu'quizxjë' le riguizxaj laz, en lazxaj que yu? ¿Naru' tu'quizxjë' bönachi uládz quégaquië' o bönachi izá'a?

<sup>26</sup> Bubi'ë didza' Pedro, rë' Lë':

—Bönachi izá'a tu'quizxjë'.

Ní'irö Jesús rë' lë':

—Que lë' ni na', bití' run bayudxi quizxaj laza' que yudo' tu' naca' Zxí'inë' Dios ca na' bití' bi' ta'guíxaj nupa nácacaca bönachi uládz queë' bönni' na' ruquíxjë'. <sup>27</sup> Na'a, para cuntú nu gun leri', guyéaj ra' nísado', yöjzalaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu' dumí lásido'. Guzxí'i le, ate' gudizxaj laza', en lazu'.

## 18

*¿Núzxilö gaca lo?*

*(Mr. 9:33-37; Lc. 9:46-48)*

<sup>1</sup> La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná' bē'ë Dios yehua' yubá?

<sup>2</sup> Bulidzë'-bi' Jesús tubi' bi'i bönni'do', ate' buzóë'-bi' gatsaj láchui'lö ga na' nacu'ë.

<sup>3</sup> Ní'irö rë' légaquië':

—Le nácatë rea' libí'ili', channö cabí huóacali' ca zeaj nácabí' bí'ido', bití' ca' tsú'uli' ga ni' rinná' bē'ë Dios yehua' yubá. <sup>4</sup> Que lë' ni na', núti'tës nu gaca nöxaj ladxi', en huóaca ca nácabí' bí'ido' ni, nu ni gaca lo ga ni' rinná' bē'ë Dios yehua' yubá. <sup>5</sup> Núti'tës nu gun bal tubi' bí'ido' caní tu' néquibi' quia', neda' caz gun bal.

*Le tun ga nu gun dul-la'**(Mr. 9:42-48; Lc. 17:1-2)*<sup>6</sup> Gunnë' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guiöj riyëtuni yaga yenë', ate' tsöjsuladzu' cuinë' lu nísado'. <sup>7</sup> Bica' bayechi' bönachi yödzölió ni tun ga gun dul-la' luzë'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

<sup>8</sup> Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' bití' rizó'o o narugu ni'a no'o, en calëga nacua' chopá no'o, en chopá ni'u ate' tsöjtsáziu' lu guí' gabila le catu caz ulu. <sup>9</sup> Channö gun guiöj lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiöj lo', en calëga nacua' chopá guiöj lo', ate' tsöjtsáziu' lu guí' gabila.

*Jesús rucúdzu'ë didza' que tu bö'cu' zxila' nanítiba'**(Lc. 15:3-7)*<sup>10</sup> Gunnë' ca' Jesús:

—Guli'gún chí'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chí'ë légacabi' nacua'tica'së' lahuë' Xuzá' zoë' yehua' yubá. <sup>11</sup> Bida' ni neda', Bönni' Guljë' Bönachi, para usölá' nu ni naniti.

<sup>12</sup> ¿Nacxi rusáca'li' queëli'? Tu bönni', nacua'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chënnaba' na', ate' tsejë' gapa naca lu guí'a, para tsöjtiljë'-ba' bö'cu' zxíla'do' na' nanítiba'? <sup>13</sup> Channö udzölinë'-ba', le nácatë rea' libí'ili', udzëjarönë' ni'a queëba' bö'cu' zxíla'do' na' ca gunë' quëgacaba' ia'tápalalaj yu' chënnaba' ni' bití' gula'nítiba'. <sup>14</sup> Lësca' caní, Xúziru' Dios, zoë' yehua' yubá, bití' rë'ënë' nítibi' tubi' bí'ido' caní.

*Ca ral-la' uniti loru' böchi' luzá'aru'**(Lc. 17:3)*<sup>15</sup> Gunnë' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tsahui' la' libí'isili'. Channö uzë' náguië' li', chibuguélu'u böchi' luzó'o. <sup>16</sup> Channö cabí uzë' náguië' xtídzu'u, guchë'ë ia'túë' o ia' chopë' bönni' para urúaj li xtídzu'u lógaquië' chopá tsonnë' bönni', nupa gaca ilún ba nalí que xtídza'li'. <sup>17</sup> Channö cabí uzë' náguië' xtídza'gaquië', gudxi ca' bönachi tu'dubi tu'sëdi queë' Dios, en channö cabí uzë' náguië' xtídza'gaca bönachi na', ní'irö bönni' na' gáquië' quiu' ca tu bönni' bití' réajlë'ë Dios, en ca tu bönni' ruquíxjë' uláz que yödzö zi'tu'.

<sup>18</sup> Le nácatë rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le güi'ili' lataj lu yödzölió ni, naca le chibë'ë lataj Dios yehua' yubá.

<sup>19</sup> Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. <sup>20</sup> Ga nacua' chopá tsonna nupa ni nudúbigaca quia' neda', zoa caza' neda' gatsaj láhui'lö ga na' nacua'ë.

<sup>21</sup> Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

<sup>22</sup> Jesús rë' lë':

—Neda' rea' li', calëgasö gadxi luzuí, pero idú tsónnalalaj yu' chí'cuía le naca gadxi luzuí.

*Jesús rucúdzu'ë didza' que tu bönni' huen dxin bití' buniti lahuë' luzë'ë*<sup>23</sup> Gunnë' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unnë' ucá'analenë' tsahui' yugu' bönni' huen dxin queë'. <sup>24</sup> Cate' gusí lahuë'



rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zían gayuá' dumí. <sup>25</sup> Tu' cabí guca quizxjé', gunná bē'ë xanë' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazxaj le ral-lë'ë queë' xanë' na'. <sup>26</sup> Ní'irö bönni' huen dxin na' buzóa zxi bē' lahuë' xanë', en gunábinë' lë', rnnë': "Xan, ben zxön ládxi'u neda'. Huaguixxaj caza' li' idutë." <sup>27</sup> Ní'irö xanë' na' buéchi' ládxi'ë bönni' huen dxin queë' na', en buniti lahuë' lë' lë' na' ral-lë'ë queë', ate' busanë' lë'. <sup>28</sup> Cate' burúajë' bönni' huen dxin na', la' yöjtsá gatë' tu bönni' rúnlenë' lë' tsözxön dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guzxínnajë' yenë', ate' rë' lë': "Gudíxjatë lë' na' ral-lu'u quia'." <sup>29</sup> Ní'irö luzë'ë na' buzóa zxi bē' lahuë', en gunaba yechë'ë lahuë', rnnë': "Ben zxön ládxi'u neda'. Huaguixxaj caza' li' idutë." <sup>30</sup> Biti' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë' na' ral-lë'ë queë'. <sup>31</sup> Cate' bila'lé'enë' lë' ni ia'zica'rë' huen dxin, bulu'huí'inide'enë' ni'a queë', ate' yöjtíxjöi'iguequinë' xángaquië' yúgu'të lë' na' guca. <sup>32</sup> Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë' na' gúl-lu'u quia' tu' gunaba yechu'u lahua'. <sup>33</sup> ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxi'a li'?" <sup>34</sup> Ní'irö guléde'enë' xanë', en budödë' lë' lu ná'agaca nupa ulu'saca' zi' lë' dza quíxjarë' idútë le ral-lë'ë queë'.

<sup>35</sup> Ní'irö rnnë' Jesús:

—Lësca' caní gunë' Xuza' zoë' yehua' yubá queëli' channö cabí uniti loli' idú ládxi'li' yugu' böchi' luzá'ali'.

## 19

*Nupa tu'lá'a yöl-la' nutsaga na'*

*(Mr. 10:1-12; Lc. 16:18)*

<sup>1</sup> Cate' budxi bē'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza. <sup>2</sup> Bönachi zían söjácálen Jesús, ate' bunë' léguequi ni'.

<sup>3</sup> Ní'irö bila'dxinë' bal-lë' bönni' yudo' fariseo ga zoë' Jesús para ila'zí' bē'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga nē'ë usanë' nigula queë' tu' nözi bíti'tës bi' raca?

<sup>4</sup> Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'. <sup>5</sup> Caní gunné' Dios: "Que lë' ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huóáquië' tuz bönachi." <sup>6</sup> Caní naca, bíti'rö nácagaquië' chopë' pero tuz bönachi chinuhuóáquië'. Que lë' ni na', bití' ral-la' ulu'lë'ë bönni' nupa na' benë' Dios tuz.

<sup>7</sup> Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bē'enë' Moisés légaquië' le ruí'i lataj nu bönni' unödzejë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

<sup>8</sup> Jesús rë' légaquië':

—Caní benë' Moisés tu' nazidi icja ládxi'do'oli'. Bennë' libí'ili' lataj usanli'-nu nigula queëli', pero cate' gusí lo guta' gurö'ö yödzölió, bití' guca caní. <sup>9</sup> Neda' rea' libí'ili', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alënë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

<sup>10</sup> Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz nē'ë, ugá'anë' tuzë'.

<sup>11</sup> Bubi'ë didza' Jesús, rë' légaquië':

—Biti' gaca ila'zì lu ná'agaca yúgu'tè bönachi didza' ni, pero núpasö na' Dios ruzéajni'inè léguequi. <sup>12</sup> Nacu'ë bönni' biti' tu'tsaga ná'alengaquië' nigula tu' cabí nácagaquië' idú bönni' biguiú', tu' gulaljè' ca', ate' ia'zìca'rè' bönni' biti' tu'tsaga ná'alengaquië' nigula tu' bulu'zaga' bönachi xinözgaquië', ate' ia'zìca'rè' bönni' biti' tu'tsaga ná'alengaquië' nigula para gaca ilunè' xichinè' Dios, Nu rinná bè' yehua' yubá. Nu sequi' si' lu nè'e didza' ni ral-la' si' lu nè'e le.

*Jesús rulidza tsáhuë'ë-bi' yugu' bí'ido'*

*(Mr. 10:13-16; Lc. 18:15-17)*

<sup>13</sup> Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa nè'ë légacabi', en ulidzè' Dios ni'a quégacabi', ate' bönni' usèda queë' bulu'zágui'ë xinözgaquië'.

<sup>14</sup> Ní'irö Jesús rë' légaquië', rnnë':

—Guli'gü'i-bi' yugu' bí'ido' lataj ila'dxinbi' ga zoa', en biti' uzága'li' xinözgacabi', tu' ila'zì lataj nupa nácagaca ca yugu' bí'ido' caní ga ni' rinná bè'ë Dios yehua' yubá.

<sup>15</sup> Jesús guxóa nè'ë légacabi', ate' ní'irö buzè'ë ni'.

*Tu bönni' unná bè' cuidi' dë'yöl-la' tsahui' queë'*

*(Mr. 10:17-31; Lc. 18:18-30)*

<sup>16</sup> Tu bönni' ni zoë' iz cuidi' queë' buduyüë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

<sup>17</sup> Bubi'ë didza' Jesús, rë' lë':

—¿Naru' nöztsenu' lë na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzè' Dios náquië' idú tsahui'. Channö rë'ënu' gata' yöl-la' na'bán idú quiu', ben ca rinná bè' xibá queë' Dios.

<sup>18</sup> Ní'irö bönni' na' rë' Jesús, rnnë':

—¿Bíxzilö xibá na'?

Jesús rë' lë':

—Xibá na' gunná bè'ë Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' inníó' que böchi' luzó'o le cabí nácate.

<sup>19</sup> Ben bal xuz xinó'o.

Bidxí'i böchi' luzó'o ca nadxí'i cuinu'.

<sup>20</sup> Bönni' na' ni zoë' iz cuidi' queë' gudxë' Jesús, rnnë':

—Yúgu'tè lë ni runa' ga gudela' naca' bí'ido'. ¿Naru' zoa ia'tú le ral-la' guna'?

<sup>21</sup> Jesús rë' lë':

—Channö rë'ënu' gacu' tsahui', guyéaj, yöjëti' le dë quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

<sup>22</sup> Cate' bönni' na' ni zoë' iz cuidi' queë' biyönnë' didza' ni, söhuöjë' ruhuí'innë' tu' dëda' yöl-la' tsahui' queë'.

<sup>23</sup> Ní'irö Jesús gudxë' yugu' bönni' usèda queë', rnnë':

—Le nácate' rea' libí'ili', böniga naca tsázië' nu bönni' dë yöl-la' tsahui' queë' ga rinná bè'ë Dios yehua' yubá. <sup>24</sup> Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bè'ë Dios ca tódiba' böa' lu nagui yötsi'.

<sup>25</sup> Cate' bila'yönnë' yugu' bönni' usèda queë' didza' ni, bulu'báninë, ta'nnë':

—¿Nuzxi caz gaca ulá, channö?

<sup>26</sup> Jesús buyüë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'tè.

<sup>27</sup> Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'leentu' Li'. ¿Bízxirö gata' queëtu'?

<sup>28</sup> Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljé' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bë'ëli', en uchi'a usöröli' quégaca idxinnu cö'të yödzö quégaca xzí'ini xi'sóë' Israel. <sup>29</sup> Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' xzí'inë', o yugu' xiyúë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idú queë'. <sup>30</sup> Zían nupa nácatëra' lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

## 20

### *Rucúdzu'ë didza' Jesús ca tunë' bönni' huen dxin*

<sup>1</sup> Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljé' yugu' bönni' ilunë' dxin ga naca lu xiyúë' ga na' nadúzgaca lubá uva. <sup>2</sup> Cate' chibugá'analenë' tsahui' yugu' bönni' huen dxin na', quíxjé' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyúë'. <sup>3</sup> Cate' burúajë' idú xsila, bilé'enë' ia'zícá'rë' bönni' nacué'asë' ca' ga naca lu yë'ëyi. <sup>4</sup> Rë' légaquië': "Guli'tséaj ca' libí'ili' ga naca lu xiyúá', ate' quíxjaja' libí'ili' le naca tsahui'." La' yöjácate' ca' légaquië'. <sup>5</sup> Burúajë' bönni' xan yu'u na' leyúbölö idú huagubidza, enca' idú xihuö udzö', en la' tuz ca benë', gusöl-lë'ë yugu' bönni' yöjxáquië' lu xiyúë'. <sup>6</sup> Burúajë' ca' cate' ni' zoa ia'látí'do'os gubidza, en yöjxáquië' ia'zícá'rë' bönni' nacué'asë' ca' ni', ate' rë' légaquië': "¿Bíx que zóatsali' ni cá'asö idú dza, bití' bi dxin runli'?" <sup>7</sup> Yugu' bönni' na' të' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúá', ate' quíxjaja' libí'ili' le naca tsahui'." <sup>8</sup> Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u lázxjagaquië'. Quíxjaju' zí'alö yugu' bönni' na' bila'dxinë' yöjsetë. Udxin na' quíxjaju' yugu' bönni' na' bila'dxinë' zí'atëlö." <sup>9</sup> Ní'irö bila'dxinë' bönni' yöjéngaquië' dxin cate' ni' zoa ia'látí'do'os gubidza, en gula'zi'ë tu tuhuéajë' dumí lazxaj que tu dza. <sup>10</sup> Cate' bila'dxinë' bönni' yöjéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza. <sup>11</sup> Cate' gula'zi'ë le, gula'nnëdë'ë queë' bönni' xan yu'u na', <sup>12</sup> ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudíxjatso' légaquië' ca netu', ate' netu' ni bentu' dxin idú dza, en gúguida'atu' gubidza." <sup>13</sup> Bubi'ë didza' xan yu na', en rë' tuë': "Böcha'a, bití' bi runa' quiu' le cabí naca tsahui'. ¿Naru' cabí bugá'ana tsáhuiru' si'u tu dumí lazxaj que tu dza? <sup>14</sup> Guzí' lazxaju', en böaj lidxu'. Neda' rë'ënda' quíxjaja' bönni' ni yöjenë' dxin ga yöjsetë la' leze ca na' riguíxjaja' li'. <sup>15</sup> ¿Naru' cabí dë lu na'a guna' ca rë'ënda' len le nequi quia? ¿Naru' ruzxé'etsenu'-në' luzó'o tu' rúnnada'a queë'?" <sup>16</sup> Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zícá'rë' bönni', nácatëra' lo na'a, ulu'gá'anë' cá'asö. Zían nupa nulidza', pero nabábasö nupa narögaca.

### *Rigúxjö'ë Jesús leyúbölö ca si' ilútië' Lë'*

(Mr. 10:32-34; Lc. 18:31-34)

<sup>17</sup> Cate' ni' yu'ë Jesús nöza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

<sup>18</sup> —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljé' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. <sup>19</sup> Ulu'dödë' neda' lu ná'agaquië' bönni' zí'tu' para ulu'titjé' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Díos usubanë' neda' lu yöl-la' guti.

*Le gunábanu xiná'agaquië' Jacobo, en Juan**(Mr. 10:35-45)*

<sup>20</sup> Ní'irö bidxinu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxë'ë queënu. <sup>21</sup> Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cõ'öbi' tubi' xzí'ina' ni cuita lë'u ibëla, en ia'tubi' cõ'öbi' cuita lë'u yögöla ga ni' inná bë'u.

<sup>22</sup> Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílalí' nisa ca idila' neda' nisa, gátia'?

Të' Lë':

—Huácatu'.

<sup>23</sup> Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílalí' ca' nisa libí'ili', pero que cõ'öli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupé'ë Xuza' quéguequi.

<sup>24</sup> Cate' ia'chië' bönni' usëda queë' Jesús bila'yönnë' lë ni, gula'lenë'. <sup>25</sup> Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité bë' ta'nná bé'enë' légaquië', ate' nupa ni' nácagacarö lo ta'nná be'e la' luz'ë'eguequisö. <sup>26</sup> Biti' gaca caní queëli'. Núti'tëslöli' libí'ili' nu rë'ëni gaca zxön ga zóali', nu ni ral-la' gun dxin que ia'zica'röli'. <sup>27</sup> Lësca' caní, núti'tëslöli' libí'ili' nu guë'ëni gaca lo, ral-la' gaca ca tu bönni' nadó'o que ia'zica'röli'. <sup>28</sup> Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quíxjada' ni'a quégaca bönachi zían para ulu'lágaca.

*Ruúnë' Jesús chopë' bönni' nachul-la lógaquië'**(Mr. 10:46-52; Lc. 18:35-43)*

<sup>29</sup> Cate' ni' tu'rúajë' yödzo Jericó, bönachi zían sójácalen Jesús. <sup>30</sup> Nacu'ë chopë' bönni' nachul-la lógaquië' ni', röggaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

<sup>31</sup> Bönachi zían nacuá' ni' gulë légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

<sup>32</sup> Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënili' guna' queëli'?

<sup>33</sup> Të' Jesús:

—Xan, rë'ënitü' gunu' ga huöálaj guiöj lotu'.

<sup>34</sup> Ní'irö Jesús buéchi' ládxë'ë légaquië', ate' gudanë' guiöj lógaquië'. La' böáljatëgaca guiöj lógaquië', ate' yójácalenë' Jesús.

**21***Ridxinë' Jesús yödzo Jerusalén len yöl-la' ba zxön**(Mr. 11:1-11; Lc. 19:28-40; Jn. 12:12-19)*

<sup>1</sup> Cate' bila'dxíngalë' yödzo Jerusalén, en ni' nacu'ë ga dë yödzo Betfagé ga na' zoa Guí'a Yaga Olivo, ní'irö gusól-lë'ë Jesús chopë' bönni' usëda queë', <sup>2</sup> ate' rë' légaquië':

—Guli'tséajtsöca' yödzo do' ni' ca dódilö ga ni zóaru', ate' la' tsöjxáca'tëli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjxedxi-ba', en ichë'ëli'-ba'

quia' ni. <sup>3</sup> Channö nu bi guié libí'ili', guli'guié nu na': "Xanru' riquinné'-ba'." Ní'irö isól-lè'è légacaba' quia'.

<sup>4</sup> Caní guca para gaca lè na' buzúajè' lu guichi bönni' bē'è didza' uláz queè' Dios, gunné':

<sup>5</sup> Guli'guié nupa nacuá' yödzö Sión,  
Buli'yútsöca', zē'è Bönni' inná bē'enē' libí'ili'.

Lu yöl-la' nöxaj ladxi' queè' dxíe'-ba' tuba' burro.

Dxíe' cúdzu'ba' búrrodo' nácaba' zxi'iniba' böa' ruá'aba' yua'.

<sup>6</sup> Ní'irö bönni' usēda queè' yójáquiē' ni', ate' gulunē' ca na' gunná bē'enē' Jesús légaquiē'.

<sup>7</sup> Gula'chē'è-ba' burro guná' na', en burro biguiú'do' na', ate' bulu'dxíe' cúdzu'gacaba' yugu' lari' guitsa' quégaquiē', ate' gudxíe' Jesús lahui' lari' na'. <sup>8</sup> Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zícá'rē' bulu'chibē' zin le bulu'zxöē' ga naca la' nöza. <sup>9</sup> Gulu'i' zidzaj didza' bönachi na' nanörugaca, en nupa na' sójácalen Jesús, ta'nná:

—¡Yöl-la' ba Lē', zxi'ini xi'sóē' David! ¡Bica' ba nu ni za' ni'a que Lē' Xanru'! ¡Yöl-la' ba Dios!

<sup>10</sup> Cate' guyáziē' Jesús yödzö Jerusalén, bulu'dzatsa yúgu'tē bönachi lu yödzö na', ate' zían nupa gulē luzé'eguequi, ta'nná:

—¿Nuzxi caz bönni' ni?

<sup>11</sup> Ia'bal-la bönachi ni' ta'nná:

—Nu ni Jesús, bönni' ru'è didza' uláz queè' Dios, ate' naca ladzē' Nazaret luyú Galilea.

### *Jesús rulatjē' lö'a yudo'*

(Mr. 11:15-19; Lc. 19:45-48; Jn. 2:13-22)

<sup>12</sup> Cate' guyáziē' Jesús lö'a yudo' queè' Dios, bulágui'è ní'ilö yúgu'tē nupa tuti' to'o ga naca lö'a yudo' na'. Burixē' ca' yugu' blaga quégaquiē' bönni' tu'tsē'è dumí yödzö zi'tu', en yugu' le ta'bö'i nupa tuti' gu'dödo'. <sup>13</sup> Rē' légaquiē':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

<sup>14</sup> Cate' ni' zoē' Jesús chila yudo', bal-lē' bönni' nachul-la lógaquiē', en bönni' biti' raca ila'zē'è bila'dxinē' ga na' zoē', ate' Lē' bunē' légaquiē'. <sup>15</sup> Gula'lenē' yugu' bixúz unná bē', en bönni' yudo' tu'sédinē' cate' bila'lē'enē' yugu' yöl-la' huáca ni runē' Jesús, en bila'yönnē' tu'ibi' bí'ido' zidzaj didza' ga naca chila yudo', ta'nnabi':

—¡Bica' ba Lē', zxi'ini xi'sóē' David!

<sup>16</sup> Ní'irö tē' Jesús:

—¿Naru' cabí riyönnu' ca ta'nnabi' bi'i ni?

Bubi'è didza' Jesús, rnnē':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú."

<sup>17</sup> Ní'irö Jesús bucá'anē' légaquiē', ate' burúajē' Jerusalén. Guyijē' yödzö Betania ga ni' bugá'anē' idú yēla.

### *Jesús rulidza zi'è yaga higo*

(Mr. 11:12-14, 20-26)

<sup>18</sup> Cate' za' rení', ate' ni' söhuöjē' Jesús Jerusalén, ridunē'. <sup>19</sup> Bilé'enē' tu yaga higo rö' gal-la' cuite nöza, ate' gubígui'è ga na' rö', pero biti' bi bidzölinē' lu yaga na'. Xilágui'sö dxía. Ní'irö Jesús gudxē' le:

—Bíti'rö cuía le ribía quiu'.

La' gubídxitē yaga higo na'. <sup>20</sup> Cate' bila'lē'enē' bönni' usēda queè' lē ni, bulu'bábinē', ate' gula'nábinē' Jesús, ta'nnē':

—¿Nacxi caz guca, gubídxitē yaga ni?

<sup>21</sup> Bubi'è didza' Jesús, rē' légaquiē':

—Le nácatë rea' libí'ili', channö tséajlë'ëli' Dios, en bití' gaca chopa ládxi'li', calégasö huáca gunli' ca na' bena' que yaga ni, pero channö guiëli' guí'a ni: Gucuíta, en yöjsóa lu nísado', gaca ca na' innali'. <sup>22</sup> Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunnë' Dios queëli', huazí'ili' lë na' inábali'.

*Yöl-la' unná bë' dë lu në'ë Jesús*

*(Mr. 11:27-33; Lc. 20:1-8)*

<sup>23</sup> Ní'irö guyázië' Jesús chila yudo', ate' tsanni ni' rusédinë' bönachi nacua' ni', bila'dxinë' yugu' bixúz unná bë' len bönni' gula tu'zëajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

<sup>24</sup> Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guí'a libí'ili' bizxi yöl-la' unná bë' dë lu na'a runa' caní. <sup>25</sup> ¿Nuzxi caz gusöl-la' Juan para buquilé' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: “¿Bizx que bití' guyéajlë'ëli' lë'?”

<sup>26</sup> Na'a, channö innaru': Gula'söl-lë'ë yugu' bönni' lë', rádxi'ru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

<sup>27</sup> Que lë ni na' bulu'bi'ë didza', të' Jesús:

—Bití' nöztu'.

Jesús rë' légaquië':

—Neda' ca', bití' guí'a libí'ili' bizxi yöl-la' unná bë' dë lu na'a runa' lë ni.

*Rucúdzu'ë didza' Jesús ca gulunbi' chópabi' zxí'inë' tu bönni'*

<sup>28</sup> Ní'irö Jesús gudxë' yugu' bönni' yudo' na':

—¿Nacxi rusáca'li' queëli'? Guzöë' tu bönni' nacua'abi' chópabi' bi'i bönni' queë', ate' yöjödxe'-bi' tubi' bi'i queë' na', gunnë': “Zxí'ina', guyéaj na'a tsöjenu' dxin ga naca luyú quia' ga rő'gaca lubá uva.” <sup>29</sup> Bubi'ibi' didza' bi'i na', gúdxibi'-në': “Bití' rë'ënda' tseja'.” Gudödi ni' bubí'i ládxi'bi', ate' yöjenbi' dxin. <sup>30</sup> Ní'irö bönni' na' yöjödxe'-bi' ia'tubi' bi'i queë' na', en la' tuz ca gunnë', ate' bubí'ibi' didza' bi'i ni, gúdxibi'-në': “Huaca, Dad. Uyéaja'.” Bití' guyéajbi' bi'i ni. <sup>31</sup> ¿Núzxilöbi' bi'i chopa ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'i zí'alö na'.

Ní'irö Jesús rë' légaquië':

—Le nácatë rea' libí'ili', ila'nöruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni' rinná bë'ë Dios. <sup>32</sup> Caní gaca, tu' bidë' Juan, bönni' buquilé' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' bití' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, bití' bubí'i ládxi'li' para tséajlë'ëli' lë'.

*Rucúdzu'ë didza' Jesús ca béngaquië' bönni' huen dxin bití' nácaquië' tsahui'*

*(Mr. 12:1-12; Lc. 20:9-19)*

<sup>33</sup> Gunnë' ca' Jesús:

—Buli'zë nágali' ia'tú le ucúdzu'a didza'. Guzöë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiöj ga isíë' xisi uva na'. Benë' ca' tu yu'u xitsá' ga gaca nu uyú idütë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzö zi'tu'.

<sup>34</sup> Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'.

<sup>35</sup> Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'tué'

bétigaquië' lë', en ia'túë' bulu'ladxë' lë' guiöj. <sup>36</sup> Leyúbölö bönni' xan luyú na' gusöl-lë'ë ca' ia'zícá'rë' ní'a në'ë, ate' guláquië' zióntërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

<sup>37</sup> 'Ga yöjsete, gusöl-lë'ë ca' zxi'inë' ga na' nacu'ë. Guz'á l'ádxë'ë, rnnë': Hualunë' bal bi'i quia'. <sup>38</sup> Cate' yugu' bönni' huen dxin na' bila'lé'enë'-bi' zxi'inë', la' gula'nnatë' la' légacasë': "Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'." <sup>39</sup> Ní'irö gula'zönë'-bi', ate' bulu'béajë'-bi' ní'ilö luyú ga na' ró'gaca lubá uva, ate' bétigaquië'-bi' ni'.

<sup>40</sup> Ní'irö Jesús gunábinë' légaquië', gunné':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

<sup>41</sup> Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zícá'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

<sup>42</sup> Ní'irö Jesús gudxë' légaquië':

—¿Naru' catu caz nulábanili' lë' na' nazúaj lu guichi lá'ayi ca naca lë' ni? Caní' rna:

Guiöj na' gula'ru'unë' bönni' tu'cu'ë zö'ö, la' guiöj ná'asö chinaca guiöj len zö'ö.

Lë' cazë' Xanru' benë' ga naca caní, ate' naca tu le run ga rubániru'.

<sup>43</sup> 'Que lë' ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadelí' lataj ni'. <sup>44</sup> Nu tsöjchegu' lu guiöj ni, la' cuinsi quitsaj, ate' channö guiöj ni tseajbaga' bönni' na', uzuzxaj lë'.

<sup>45</sup> Cate' yugu' bixúz unná bë', en yugu' bönni' yudo' fariseo bila'yönnë' lë' na' bucúdzü'ë didza' Jesús, téquibe'enë' bë'ë Jesús didza' ca naca quégaquië'. <sup>46</sup> Gula'zóa gula'bö'ë ila'zönë' Jesús, pero guládxinë' bi ilún bönachi zión nacua' ni' tu' ta'yéajlë' náquië' Jesús bönni' ru'ë didza' uláz queë' Dios.

## 22

### *Rucúdzü'ë didza' Jesús ca naca que laní que yöl-la' rutsaga na'*

<sup>1</sup> Jesús bë'lenë' légaquië' didza' leyúbölö, ate' bucúdzü'ë didza', rnnë':

<sup>2</sup> —Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza utsaga ná'abi' bi'i bönni' queë'. <sup>3</sup> Gusöl-lë'ë ní'a në'ë tsöjxí'gaquië' yugu' bönni' chinulidzë' para guídagaquië' laní queëbi', pero bití' gulé'ënë' guídagaquië'. <sup>4</sup> Ní'irö gusöl-lë'ë ia'zícá'rë' ní'a në'ë, en gudxë' légaquië': "Guli'tsöjödixitsöca' nupa na' chinulidza', na' guiëli' légaquië': Buli'yútsöca', chinupá'a la' huagu. Chibétia'-ba' yugu' xpédxa', en yugu' böa' bédxi renni' quia'. Yúgu'të chinupá'a. Guli'dá, sóaru' laní queëbi' bi'i bönni' quia' utsaga ná'abi'." <sup>5</sup> Yugu' bönni' na' yöjlídzagaquië' bití' gulunë' légaquië' bal, ate' yöjáquië' que queégaquië'. Tuë' yöjenë' dxin, en ia'túë' guyijë' tsöjö'u tsöjéti'ë. <sup>6</sup> Ia'zícá'rë' gula'zönë' yugu' ní'a në'ë na', ate' gulu'ë dö' quégaquië', en bétgaquië' légaquië'. <sup>7</sup> Cate' bönni' na' rinná bë'ë biyönnë' lë' ni, gulénë', en gusöl-lë'ë yugu' bönni' queë' röjáquië' gudil-la, ate' bétigaquië' yugu' bönni' hueti bönachi na', en bulu'quelë'ë guí' l'ádzagaquië'. <sup>8</sup> Ní'irö bönni' na' rinná bë'ë gudxë' yugu' ní'a në'ë, gunné': "Le nácatë chinupá'a que laní na', pero yugu' bönni' bulidza' bití' guláquië' lesaca' guídagaquië' laní quia'. <sup>9</sup> Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queëbi' bi'i bönni' quia' utsaga ná'abi'."

<sup>10</sup> Ní'irö bila'ruájë' ní'a në'ë na', söjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

<sup>11</sup> 'Cate' guyázië' bönni' na' rinná bë'ë para uyüë' nupa ni' nudúbigaca, bilé'enë' tu bönni' bití' nácuë' lari' tsahui' le bunödzejë' quégaquië' bönni' nacu'ë laní na'. <sup>12</sup> Ní'irö gudxë'

bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacuá' laní?" Bönni' na' busayaj ru'ë. <sup>13</sup> Ní'irö bönni' na' rinná' bë'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsöjchú'un-në' ní'ilo ga na' rö'ö chul-la. Ní' cödxë', en utíl-la láyë'ë, lu yöl-la' ruhu'ini queë'."

<sup>14</sup> Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

*Jesús ru'ë didza' ca naca le riguixaj lázaru'*

(Mr. 12:13-17; Lc. 20:20-26)

<sup>15</sup> Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'. <sup>16</sup> Para ilunë' caní, gula'sól-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulë' Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' ru'í'í ládxi'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. <sup>17</sup> Gudíxjöi'í netu'. ¿Nacxi runi li? ¿Naru' run bayudxi, o biti' run bayudxi quixaj laztu' queë' César, bönni' yödzo zi'tu' na' rinná bé'enë' rë'u?

<sup>18</sup> Réquibe'enë' Jesús tē'ennë' ulu'béajë' Lë' didza', ate' gudxë' légaquië':

—Libí'ili', bönni' rulu'isö tsahui' cuinli', ¿bizx que ru'í'ili' didza' le ruzóa neda' ra' gu'a?

<sup>19</sup> Buli'lu'í' neda' dumí le riguixaj lázali'.

Ní'irö bulu'lu'ínë' Lë' tu' dumí que yödzo Roma. <sup>20</sup> Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

<sup>21</sup> Të' Lë':

—Queë' César na'.

Ní'irö Jesús gudxë' légaquië':

—Guli'guixjë' César le nequi queë' César, ate' Dios le nequi queë' Dios.

<sup>22</sup> Cate' bila'yönnë' lë ni, bulu'bánninë' ca naca didza' tsahui' bubi'ë Jesús, ate' bulu'cá'anë' Lë', söhuöajtëgaquië'.

*Ta'nabi yúdxinë' Jesús ca ulu'bán nupa chinátigaca*

(Mr. 12:18-27; Lc. 20:27-40)

<sup>23</sup> La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', <sup>24</sup> ta'nnë':

—Bönni' Usedi, Moisés gunné': "Channö gátië' tu bönni' zóanu nigula queë', en cuntu nu bi'í zóabi' queë', ní'irö bi'í böchë'ë bönni' na' ral-la' utsaga ná'alénbi'-nu nigula uzëbi queë', para cabí initi di'a dza queë' bönni' böchi'bi' na'." <sup>25</sup> Gula'cuá'abi' gadxi bi'í bönni' ga zóatu', naca böchi'gacabi'. Bi'í zí'alö na' butsaga ná'alénbi'-nu nigula, ate' gútitëbi'. Tu' cuntu nu bi'í queëbi' zóabi', bi'í buropi na' butsaga ná'alénbi'-nu nigula uzëbi queëbi' bi'í böchi'bi' na'. <sup>26</sup> Lësca' caní guca queëbi' bi'í buropi na', enca' queëbi' bi'í bunny, en la' tuz ca guca quégacabi' igádxitëbi', gulátibi' yúgu'tëbi'. <sup>27</sup> Ga búdxitë gútinu ca' nigula na'.

<sup>28</sup> Cate' idxín dza ulu'bán nupa chinátigaca, ¿núzxilögacabi' bi'í gadxi ni' guéquinu nigula na' queëbi', tu' bulu'tsaga ná'alénbi'-nu yúgu'tëbi' nigula na'?

<sup>29</sup> Ní'irö bubi'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios. <sup>30</sup> Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en biti' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacu'ë yehua' yubá. <sup>31</sup> Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'? <sup>32</sup> Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' biti' náquië' Dios quégaca nupa nátigaca tsaz, pero náquië' Dios quégagaquië' bönni' ni nabángaquië' sal-la' gulátie'.

<sup>33</sup> Cate' bila'yöni bönachi nacuá' ni' didza' ni, bulu'bani ca naca lë na' rusédinë' Jesús léguequi.



*Xibá queë' Dios le naca lo**(Mr. 12:28-34)*

<sup>34</sup> Cate' guléquiibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. <sup>35</sup> Tuë' bönni' nútsë'ë ladjagaquië', en nazëdë' xibá queë' Moisés, gú'unnë' si' bë'ë Jesús. <sup>36</sup> Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

<sup>37</sup> Jesús rë' lë':

—Ídxi'ínu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'. <sup>38</sup> Xibá ni naca lo, en nazáca'tërö. <sup>39</sup> Xibá na' naca buropi, la' ca nácatë, en caní rna: "Ídxi'ínu' böchi'luzó'o ca nadxí'i cuinu'." <sup>40</sup> Chopa xibá ni nácgaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

*¿Nuzxi zxi'ini náquië' Cristo?**(Mr. 12:35-37; Lc. 20:41-44)*

<sup>41</sup> Tsanni ni' nacu'ë tsözxön bönni' yudo' fariseo na', Jesús gunábinë' légaquië', <sup>42</sup> rnnë':

—¿Nacxi rusáca'li' queë'li' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

<sup>43</sup> Ní'irö Jesús rë' légaquië':

—¿Bizx que na' lë' cazë' David bulidzë' Lë', gunné': "Xana"? Caní gunné' cate' ni' bë'ë didza' uláz queë' Dios Bö' Lá'ayi, gunné':

<sup>44</sup> Xanru' Dios gudxë' Xana':

"Gurö'ö cuita lë'a ibëla,

cate' gunra' ga ulu'zechu zxi'bigaca Lo' nupa tequi Li' zi'."

<sup>45</sup> Channö David na' gunné' queë' náquië' Xanë', ¿nacxi caz naca, rnnali' náquië' zxi'ini xi'sóë' David na'?

<sup>46</sup> Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

**23***Jesús ruzéqui'ë yugu' bönni' yudo' didza'**(Mr. 12:38-40; Lc. 11:37-54; 20:45-47)*

<sup>1</sup> Ní'irö Jesús bë'lenë' bönachi nacua' ni' len yugu' bönni' usëdi queë' didza'. <sup>2</sup> Rë' légaquië':

—Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sédinë' bönachi. <sup>3</sup> Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'. <sup>4</sup> Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönachi, pero légaquië' biti' té'ennë' ulu'tenë' le, calëga len tuze xibön ná'agaquië'. <sup>5</sup> Yúgu'të le tunë', tunë' para ila'lé'e bönachi légaquië', tu' tunë' zxon le túgui'ë yen ná'agaquië', en ra' xigágaquië' ga na' nuzúajagaquië' tu le nazúaj lu guichi lá'ayi, en tu'tunnë' luzxi lari' nácugaquië'. <sup>6</sup> Té'ennë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios. <sup>7</sup> Lë'sca' caní, té'ennë' ulu'gapa bönachi légaquië' didza' ba zxon gapa naca lógaca bönachi, en té'ennë' ilë' bönachi légaquië': "Padiux, bönni' usedi."

<sup>8</sup> 'Pero libí'ili', biti' ral-la' gunli' ga nu guië' libí'ili': Bönni' Usedi, tu' zoa tuz Nu naca Bönni' Usedi queë'li', neda', Cristo, ate' yúgu'tëli' nácali' böchi'li' tuli' ia'tuli'. <sup>9</sup> Cuntu nu guië'li' luyú ni, biti' innali': Xuz, tu' zoa tuz Nu naca Xúzili', zoë' yehua' yubá. <sup>10</sup> Biti' gunli' ga nu guië' libí'ili': Xan, tu' zoa tuz Nu naca Xanli', neda', Cristo. <sup>11</sup> Nu nutsa' ladjali' nu run xichinli' ia'zica'röli', nu ni na' gácarö lo ga zóali'. <sup>12</sup> Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

<sup>13</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza söjácálen bönachi para ila'dxín ga ni' rinná bë'ë

Dios yehua' yubá. La' libí'isili' biti' sequi' tsú'uli', en biti' ru'ili' lataj ila'yú'u nupa té'ëni ila'yú'u.

<sup>14</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzé'bido', en para ulu'isö tsahui' cuinli', xidzé rulídzali'-në' Dios. Que lë ni na', zítërö irugu queéli' qui'í sáca'li'.

<sup>15</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzölió ni para gunli' ga tseaj ládxë'ë tu bönni' Dios tsözxön len libí'ili', en cate' chiguzxéqui'li'-në', runli' ga nabága'rë' xíguia' ca libí'ili', ate' tsöjtsu'ë lu guí' gabila.

<sup>16</sup> 'Bica' bayechi' libí'ili'. Nachul-la loli', ate' ré'ënili' ulu'ili' nöza bönachi. Caní naca queéli' tu' rnnali': "Channö bi rizi' lu në'ë tu bönni' ni'a que yudo', biti' run bayudxi, pero channö runë' le ni'a que oro dzö'ö yudo', bayudxi gun." <sup>17</sup> Libí'ili', bönni' lo chul-la, en tu' caréajni'i. ¿Bízxilö nácarö lo? ¿Naru' oro na', o yudo' le run lá'ayi oro na'? <sup>18</sup> Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoa lahui, bayudxi gun." <sup>19</sup> Libí'ili', nazídili', en nachul-la loli'. ¿Bízxilö nácarö lo? ¿Naru' gun zxoa láhüisö, o bucugu lá'ayi na' run lá'ayi gun na'? <sup>20</sup> Que lë ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhüisö. <sup>21</sup> Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjë' ni'. <sup>22</sup> Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

<sup>23</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' riguízxjali' que yudo' tu cö' huéaj tu' chi cö' le rizi'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxi'li' luzá'ali', en biti' réajlë'ëli'-në' Dios. Yugu' lë ni run bayudxi gunli', en lës biti' ucá'anali' ia'zica'rö lë na' runli', le riguízxjali' que yudo'. <sup>24</sup> Libí'ili', nachul-la loli', en ré'ënili' ulu'ili' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bíë'-ba' bönni'.

<sup>25</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Nácali' ca zxíga'do' ré'jali', en yö'öna ráhuili'. Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'. <sup>26</sup> Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

<sup>27</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácaté chiguíchido'os cuita lë'e, en le nácaté lachi nalá'gaca, pero nalígaca dxita quégaca nupa chinátigaca, enca' yúgu'të le siguti. <sup>28</sup> Lësca' caní nácali' libí'ili'. Le nácaté láhüisö rulu'í' cuinli' tsahui' lógaca bönachi, pero lu icja ládxi'do'oli' nalili' yugu' le rulu'isö tsahui' cuini, en le ruá' dö' runli'.

<sup>29</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'ili' biquitaj gapa nagáchi'gaca bönachi tsahui'. <sup>30</sup> Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios." <sup>31</sup> Tu' rnnali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. <sup>32</sup> Caní naca, rusubaga' cuinli' xíguia' na' gula'báguië' xuz xtó'oli'.

<sup>33</sup> 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? <sup>34</sup> Que lë ni na', neda' isöl-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi.

Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. <sup>35</sup> Caní gaca, ibága'li' libí'ili' xíguia' que idútë rön quegaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bëtigaca Zacarías, zxí'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios. <sup>36</sup> Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

*Jesús ribödxë' ni'a que yödzö Jerusalén*  
(Lc. 13:34-35)

<sup>37</sup> Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruláxigacali' guiöj nupa nasöl-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' bórado' queëba' zcan xíliba', pero biti' gú'unili'. <sup>38</sup> Buli'yútsöca', cá'asö ugá'ana yu'u lídxili'. <sup>39</sup> Caní gaca, tu' rea' libí'ili', na'a isí lo biti' ulé'eli' neda' cate' innárolí: "Lá'ayi náquië' Bönni' na' zë'ë uláz queë' Xanru'."

## 24

*Rigúxjö'ë Jesús ca si' ulu'quínnajë' yudo'*  
(Mr. 13:1-2; Lc. 21:5-6)

<sup>1</sup> Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca nácgaca zö'ö nagú'ugaca lë'a yudo'. <sup>2</sup> Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiöj nabaga' luzë'e ni, le cabí iguínnaj.

*Le ilaca bë' chizóa idxín dza údxi que yödzölió*  
(Mr. 13:3-23; Lc. 21:7-24; 17:22-24)

<sup>3</sup> Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queézë', en të' Lë':

—Gudíxjö'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

<sup>4</sup> Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', <sup>5</sup> tu' zá'gaquië' zían bönni' légaquië' ca lea' neda'. Ila'nnë' nácgacquië' Cristo, en ila'zí' yé'enë' bönachi zían. <sup>6</sup> Huayönili' raca gudil-la, en le ruí'i didza' que gudil-la, pero biti' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. <sup>7</sup> Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zían lataj tödi budó' zxu'. <sup>8</sup> Yúgu'të lë ni nácgaca le isí lógaca yugu' le ila'guí'ila'zaca' bönachi.

<sup>9</sup> Ní'irö ulu'dödi bönachi libí'ili' lu na' nu usaca' zí' libí'ili'. Yúgu'të bönachi ulu'dí'ili' libí'ili' tu' dá'ali' neda', en ilútië' bál-lali' libí'ili'. <sup>10</sup> Cate' gaca caní, gaca chopa ládxi'gaca zían bönachi, en ulu'cá'ana neda', ate' udödi tu ia'tú luzë'e, en tu ia'tú udí'ili' luzë'e. <sup>11</sup> Ní'irö ulu'luí'í lógacquië' zían bönni' ta'zí' yë'ë. Ulu'luí'í cuíngacquië' ca yugu' bönni' tu'ë didza' uláz queë' Dios, en ila'zí' yé'enë' bönachi zían. <sup>12</sup> Iluá'ada' dö' bönachi, ate' que lë ni na' bítirö ila'dxí'í böchi' luzé'eguequi. <sup>13</sup> Nu guequi tsaz queë' Dios ga idxintë dza údxi, nu ni ulá. <sup>14</sup> Idú yödzölió gaca libán que didza' dxí'a ca rinná bë'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

<sup>15-16</sup> Nu ulaba lë ni ral-la' uzéajni'í ladxi'. Gunnë' Daniel, bönni' bë'ë didza' uláz queë' Dios, gunné': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnnajli' saca' guí'ado'. <sup>17</sup> Nu dxía'ícjo'olö biti' gal-la' huötaj tsöjzxí' bi dë que lu yu'u, pero ral-la' izxúnnajtë. <sup>18</sup> Nu zoa la' guixi', biti'

gal-la' huőaj tsőjzxi' lari' que. <sup>19</sup> Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'. <sup>20</sup> Buli'lidzē' Dios inábili'-nē' cabí idxín dza ni' izxúnajli' cate' raca beo' ziaga o cate' naca dza lá'ayi, <sup>21</sup> tu' ila'guí'i ila'záca'tērō bönachi dza ni' ca gula'guí'i gula'záca' bönachi dza ni'te cate' si' guta' gurō'ō yōdzōlió, ga ridxintē na'a dza, en calēga dza zá'gaca biti' ila'guí'i ila'záca' caní. <sup>22</sup> Cate' idxín dza ni', channō Dios biti' cuéqui lahuē' quégaquiē', cuntu nu ulá, pero cuéqui lahuē' quégaquiē' dza ni', en gácalenē' nupa gurō cazē' Lē'.

<sup>23</sup> 'Ní'irō biti' tséajlē'ēli' channō nu idxín queēli', en guíē libí'ili': "Buli'yútsōca', ni zoē' Cristo", o inná: "Ní' zoē'." <sup>24</sup> Ulu'luí'i lógaquiē' zían bönni' ta'z'í' yē'ē, en ila'nnē' nácagaquiē' Cristo, o ila'nnē' tu'ē didza' uláz queē' Dios. Ilunē' le ilaca bē', en le ilún ga ulu'bani bönachi, ate' ila'z'í' yé'enē' nupa gurō cazē' Dios channō huala'zéqui'nē'. <sup>25</sup> Buli'yútsōca', chigudxi caza' libí'ili' yúgu'tē lē ni z'í'atēlō ca si' ilaca. <sup>26</sup> Que lē ni na', biti' irúajli' channō ila'dxín queēli' nupa ilē libí'ili': "Buli'yútsōca', ni' zoē' Cristo lu lataj cá'asō." Lēasca' caní, biti' tséajlē'ēli' channō ila'nná: "Buli'yútsōca', lu yu'u zoē'." <sup>27</sup> Ca na' raca cate' rēpi yōsa ga rilén gubidza, en ruzení' ga ribía gubidza, lēasca' caní gaca cate' huōda' neda', Bönni' Guljē' Bönachi. <sup>28</sup> Ilácatē caní, ca na' ta'nná bönachi: "Gátí'tēs ga dē tu le nati, ni' ulu'dubi cázaba' bíchulab."

*Ca gaca cate' huödē' Bönni' Guljē' Bönachi*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Gunnē' ca' Jesús:

–Tōdi yugu' dza ni' cate' ila'guí'i ila'záca' bönachi caní, ichul-la gubidza, ate' beo' biti' gunna bení' que. Ila'guínnajba' bōlaj lúzxiba, ate' ila'zxi' le nalá'gaca naca tsutsu lúzxiba. <sup>30</sup> Ní'irō ilá' lahui lúzxiba le gaca bē' huōda' neda', Bönni' Guljē' Bönachi, ate' ila'bōdxi yechi' yúgu'tē bönachi yōdzōlió ni, cate' ila'lé'e neda', Bönni' Guljē' Bönachi, suzá'a lu bōaj lúzxiba, dē lu na'a yōl-la' unná bē', en yōl-la' huáca zxōn. <sup>31</sup> Ní'irō isōl-la'gaca'-nē' gubáz lá'ayi quia'. Ulu'cōdxē' zidzaj lúzuba' bōa' guixi', ate' ulu'tubē' nupa nabōa' quia', nacua' idapa la'atē yōdzōlió, en yúgu'tē lataj zxan lúzxiba.

<sup>32</sup> 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inözili' chizóa idxín cusubá. <sup>33</sup> Lēasca' caní, cate' ilé'eli' taca yúgu'tē lē ni, inözili' chizóa idxín dza údxi na', en chiridzaga lahui. <sup>34</sup> Le nácate' rea' libí'ili', yúgu'tē lē ni ilaca z'í'atēlō ca ilátigaca bönachi nacua' dza ni'. <sup>35</sup> Huadōdi quégaca lúzxiba, en luyú ni, pero yugu' xtídza'a biti' ila'dōdi cá'asō.

<sup>36</sup> 'Cate' idxín dza ni' cuntu nu nōzi. Biti' nōzguequinē' gubáz lá'ayi queē' Dios nacu'ē yehua' yubá, en biti' nōzda' neda', Zxi'inē' Dios, pero tuzē' Dios Xuz nōzinē'.

<sup>37</sup> 'Ca na' guca dza cate' ni' zoē' Noé, lēasca' caní gaca cate' huōda' neda', Bönni' Guljē' Bönachi. <sup>38</sup> Yugu' dza ni' z'í'atēlō ca si' idxín nisa guiōj le busuniti yōdzōlió, gulē'aj gulahuē', bulu'tsaga ná'agaquiē', en bulu'dōdē' zxi'inigaquiē' lu yōl-la' rutsaga na' ga bidxintē dza guyáziē' Noé lē'e barco zxōn ni' benē', <sup>39</sup> en biti' guléquibe'enē' cate' bidxintē nisa guiōj le busuniti yōdzōlió, ate' gula'nítiē' yúgu'tē'. Lēasca' caní gaca cate' si' huōda' neda', Bönni' Guljē' Bönachi, cuntu nu guéquibe'e. <sup>40</sup> Dza huōda' ila'cu'ē chopē' bönni' la' guixi'. Tuē' uchē'a-nē' quia', ate' ia'túē' ucá'ana'-nē'. <sup>41</sup> Ila'cuá'anu chópanu nigula nacua' anu huētu. Tunu uchē'a-nu quia', ate' ia'tunu ucá'ana'-nu.

<sup>42</sup> 'Buli'subán ládxi'li' tu' cabí nōzili' bizxi dza huōda' neda', Xanli'. <sup>43</sup> Na'a, guli'tséajni'i lē ni. La'tu' nōzinē' xan yu'u bizxi dza guídē' gubán, huanē'ē yēla, en biti' gu'ē lataj nu quidaj zō'ō para cuan le dzō'ō lidxē'. <sup>44</sup> Que lē ni na', buli'subán ládxi'li' ca' libí'ili', tu' huōda' neda', Bönni' Guljē' Bönachi, tu dza biti' nuzóa icjali'.

*Bönni' huen dxin tsahui', en bönni' huen dxin biti' náquiē' tsahui'*

*(Lc. 12:41-48)*

<sup>45</sup> Gunnē' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacua' lidxë' para gu'ë le ilágugaca cate' idxín dza? <sup>46</sup> Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë. <sup>47</sup> Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní. <sup>48</sup> Channö huóáquië' bönni' huen dxin queë' huiá' dö', en sa' ládxe'ë, innë': "Huadzenë' xana', en bití' huódatië'", <sup>49</sup> en channö isí lahuë' gundë' zì bönni' túnlenë' lë' tsözxön dxin, en isí lahuë' ca' guí'aj gágulenë' nupa ta'zudxi, <sup>50</sup> ní'irö huödë' xanë' bönni' huen dxin na' tu dza cate' bití' zoë' ribözë', o tu yëla bití' réquinë'. <sup>51</sup> Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'luí'sö tsahui' cuínguequi. Ní'irö cödxí yechë'ë, en gagu zxea láyë'ë.

## 25

### *Rucúdu'ë didza' Jesús ca naca quégacabi' chibi' bi'i nigula ra'bando'*

<sup>1</sup> Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuágaca guí' quégacabi', ate' bila'rúajbi' tsöjtságagacabi' bönni' utsaga në'ë. <sup>2</sup> Gáyu'bi' nacagacabi' bi'i bití' ta'yéajni'ibi' ate' ia'gáyu'bi' nasína'gacabi'. <sup>3</sup> Yugu' bi'i nigula bití' ta'yéajni'ibi' na' gula'zí'ibi' le nuágaca guí' quégacabi' pero bití' guluá'abi' ia'lati' za régui. <sup>4</sup> Yugu' bi'i sina' na' guluá'abi' za régui lu böga'do' quégacabi' len le nuágaca guí' quégacabi'. <sup>5</sup> Tu' gudzenë' bönni' utsaga në'ë, gudödi yëla lógacabi', en gulásitëbi'. <sup>6</sup> Cate' bidxín idú guluhuëla, biyön chi'i nu rinnë zidzaj, rna: "¡Chizë'ë bönni' utsaga në'ë! ¡Guli'rúaj tsöjtságali'-në'!" <sup>7</sup> Ní'irö gula'yásabi' yúgu'tëbi' bi'i nigula na', ate' bulu'pá'abi' le nuágaca guí' quégacabi'. <sup>8</sup> Gulu'í'ibi' didza' bi'i bití' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queëli' tu' tu'ulu le nuágaca guí' queëtu' ni." <sup>9</sup> Bulu'bí'ibi' didza' bi'i sina' na', gula'nnabi': "Bití' gaca, tu' cabí bi ugá'ana queëtu', en queëli'. Guli'tsájtsöca' ga ridó'o za régui, tsöj'ö'uli' queëli'." <sup>10</sup> Tsanni ni' söjácabi' söjxí'gacabi' le, bidxinë' bönni' utsaga në'ë. Yugu' bi'i na' nacua'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. <sup>11</sup> Gudödi ni' ia'zícá'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." <sup>12</sup> Lë' bubi'ë didza', rnnë': "Le nácatë rea' libí'ili', bití' nözda' gazxi libí'ili'."

<sup>13</sup> Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljé' Bönachi.

### *Rucúdu'ë didza' Jesús ca naca que dumí zaca'*

<sup>14</sup> Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejé' zì'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

<sup>15</sup> Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopa dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' gúzátë' ga naca zì'tu'. <sup>16</sup> Guyijé' bönni' huen dxin na' guzxi'ë gayu' dumí nazaca' na', en yöjtíljalenë' le ia'gayu' dumí nazaca'. <sup>17</sup> Lë'sca' caní, bönni' na' guzxi'ë chopa dumí na', yöjtíljalenë' le ia'chopa ca'. <sup>18</sup> Bönni' na' guzxi'ë tu dumí guyijé', en yöjchö'önë' lu yu, ate' bucáchë'ë dumí queë' xanë' lu yu ni'.

<sup>19</sup> Cate' chigudzé, budxinë' xángaqüië' bönni' huen dxin na', ate' bucá'analenë' légaquië' tsahui'. <sup>20</sup> Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíljalena' le." <sup>21</sup> Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzëjalenu'

neda'." 22 Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yöjtíjalena' le." 23 Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yënni'tërö cu'a lu no'o. Guyaza ga zoa', udzëjalenu' neda'." 24 Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga biti' guzu', en rutubu' ga biti' guchilju'. 25 Que lë ni na' gúdxida' li', ate' guyija', yöjchá'a dumí quiu' lu yu. Ni dë na'a le nequi quiu'." 26 Ní'irö bubi'ë didza' xanë', en rë' lë': "Nacu' huen dxin biti' naca tsahui', en xöhuëdi. Nöz quëzinu' rulapa' ga biti' guza', en rutuba' ga biti' guchilja'. 27 Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guiljalënë' le ia'lati', para cate' huöda' neda', uzi'a le nequi quia' len icja ca'." 28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí." 29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' biti' rugún tsahui' dxin le dë lu në'e, la's dui le dë queë' idúa. 30 Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

### *Cristo uchi'a usöröë' quégaca bönachi*

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. 32 Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. 33 Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla. 34 Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió. 35 Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. 36 Biyadzaj le gácu'a, ate' bugáculi' neda' le ráculi'. Güí'ida', ate' buduyúli' neda'. Guyu'a lidxi guíë, ate' buduyúli' neda'." 37 Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? 38 ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? 39 ¿Bátaxi bilé'etu' Li' güí'inu', o guyú'u lidxi guíë, ate' buduyútu' Li'?" 40 Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

41 Ní'irö guía' nupa nacuá' cuita lë'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupë'ë Dios ni'a que tu' xihui', en quéguequi gubáz dá'gaca le. 42 Caní gaca queëli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. 43 Guca' ca bönni' ridë' zi'tu', ate' biti' gulú'uli' neda' lídxili'. Biyadzaj le gácu'a, ate' biti' bugáculi' neda' le ráculi'. Güí'ida', enca' guyu'a lidxi guíë, ate' biti' buduyúli' neda'." 44 Ní'irö ila'nná ca' nupa na', ilë' neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridë' zi'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" 45 Ní'irö ubi'a didza' neda', bönni' unná bë', guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', biti' bi benli' quia' neda'." 46 Ní'irö bönachi tuá' dö' na' la' tsöjtsázagacatë ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

## 26

*Tun xtídza'gaquië' bönni' yudo' ila'zönë' Jesús*  
(Mr. 14:1-2; Lc. 22:1-2; Jn. 11:45-53)

<sup>1</sup> Cate' budxi bē'ë Jesús yugu' didza' ni, gudxë' yugu' bönni' usëda queë', <sup>2</sup> rnnë':  
—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lē'e yaga cruz.

<sup>3</sup> Ní'irö bila'dxinë' yugu' bixúz unná bē' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lē' Caifás. <sup>4</sup> Ni' gulún xtídza'gaquië' ila'zönë' Jesús, lu yöl-la' rizí' yē' quégaquië', para ilútië' Lē'. <sup>5</sup> Ta'nnë':  
—Biti' gunru' lē ni dza laní, para cabí ila'dzatsa bönachi.

*Tu nigula rigú'unu le rilá' zxixi icjë' Jesús*  
(Mr. 14:3-9; Jn. 12:1-8)

<sup>6</sup> Cate' ni' zoë' Jesús lu yödzo Betania lu yu'u lidxë' Simón, bönni' na' güi'inë' huë' nudzu' ruzödi, <sup>7</sup> bidxinnu cúdzu'lē' Jesús tu nigula, nuá'anu tu böga'do' néquini guiój nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rō'ë rahuë'. <sup>8</sup> Cate' bila'lē'enë' bönni' usëda queë' Jesús lē ni, gula'lenë', ta'nnë':

—¿Bizx que réqui ditaj lē ni? <sup>9</sup> Guca nu guti' lē ni, en si' dumí zían para gácalenru' yugu' bönachi yechi'.

<sup>10</sup> Cate' biyönnë' Jesús lē ni, rē' légaquië':

—¿Bizx que rnnëli' queënu nigula ni? Tsahui' naca le bennu quia'. <sup>11</sup> Yugu' bönachi yechi' ila'cuá'lentica'sö libí'ili', pero neda' bití' ugá'analentica'sa' libí'ili'. <sup>12</sup> Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. <sup>13</sup> Le nácatë rea' libí'ili', gátí'tës luyú yödzülió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

*Rizí' lu nē'ë Judas udödë' Jesús lu ná'agaquië' bönni' unná bē'*  
(Mr. 14:10-11; Lc. 22:3-6)

<sup>14</sup> Ní'irö guyijë' Judas Iscariote ga na' nacu'ë bixúz unná bē'. Náquië' bönni' dzáguië' chínnuë' na' dá'gaquië' Jesús, <sup>15</sup> ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analënë' lē' tsahui' ilu'ë lē' chi uruá' dumí plata. <sup>16</sup> Ní'irö gusí lahuë' Judas na' risí ribö'ë udödë' Jesús lu ná'agaquië'.

*Le ráguru' le rusá' ládxi'ru' ca gútië' Xanru'*  
(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígüi'ë bönni' usëda queë' Jesús ga zoë', en tē' Lē':

—¿Gazxi rē'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

<sup>18</sup> Jesús rē' légaquië':

—Guli'tséajtsöca' yödzo ni' ga na' zoë' tu bönni', en guli'guíë': “Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua.”

<sup>19</sup> Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

<sup>20</sup> Cate' chigudzö' dza na', Jesús gurö'lenë' idxínnutë' bönni' usëda queë' tahuë'.

<sup>21</sup> Tsanni ni' tahuë', Jesús rē' légaquië':

—Le nácatë rea' libí'ili', tu nu nutsa' ladjali' ni udödi neda'.

<sup>22</sup> Ní'irö bulu'hu'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

<sup>23</sup> Bubi'ë didza' Jesús, rnnë':

—Bönni' ni runé' në'ë tsözxön len na'a lu yö'öna, bönni' ni udödë' neda'. <sup>24</sup> Le nácatë neda', Bönni' Guljé' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljé'.

<sup>25</sup> Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

<sup>26</sup> Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzzuxjé' le, en bunödzejë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni rulu'í ca gaca que le naca caza'.

<sup>27</sup> Gudélë'ë ca' tu zxíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Guli'gui'aj yúgu'tëli'. <sup>28</sup> Lë ni rulu'í ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'. <sup>29</sup> Rea' ca' libí'ili', bíti'rö guí'ja' xisi le ribía lubá uva ni cate' idxinró dza ni' guí'jalena' libí'ili' tu le cubi ga ni' rinná bë'ë Xuza'.

*Jesús rnnë' innë' Pedro biti' núnbë'ë Lë'*

*(Mr. 14:26-31; Lc. 22:31-34; Jn. 13:36-38)*

<sup>30</sup> Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo. <sup>31</sup> Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'." <sup>32</sup> Cate' ubana' lu yöl-la' guti, ní'irö tséaja' tsöjnörúa' loli' saca' luyú Galilea.

<sup>33</sup> Ní'irö bubi'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

<sup>34</sup> Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí biti' núnbë'u neda'.

<sup>35</sup> Ní'irö Pedro gudxë' Jesús:

—Sal-la' gátientea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

*Jesús rulidzë' Dios la' yëla Getsemaní*

*(Mr. 14:32-42; Lc. 22:39-46)*

<sup>36</sup> Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

<sup>37</sup> Jesús guchë'ë Pedro len iropë' xzí'inë' Zebedeo, ate' gusí lahuë' ruhu'innë', en risëbi ládxe'ë. <sup>38</sup> Ní'irö Jesús gudxë' légaquië':

—Ruhu'ini ládxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

<sup>39</sup> Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga biti' gun bayudxi qui'í saca'a lë ni, calëga ca rë'ënda' neda', pero ca rë'ënu' Li' gunu'.

<sup>40</sup> Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:



—¿Naru' cabí gúcatsö iná'alenu' neda' tsözxön yëla tu chí'ido'? <sup>41</sup> Guli'ná' yëla, en buli'lidzë' Dios inábili'-në' gácalenë' libí'ili', para cabí güi'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuídi'li'.

<sup>42</sup> Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga bití' qui'i saca'a lë ni, ben ca raza ládxi'u Li'.

<sup>43</sup> Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'.

<sup>44</sup> Ní'irö buca'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunné' zí'alö rnnë'. <sup>45</sup> Leyúbölö böajë' ga na' nacué bönni' usëda queë', en ré' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljé' Bönachi, chinadóda' lu ná'agaquië' bönni' dul-la'. <sup>46</sup> ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

### *Ta'chë'ë Jesús nadzunë'*

*(Mr. 14:43-50; Lc. 22:47-53; Jn. 18:2-11)*

<sup>47</sup> Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guië tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasöl-la'gaquië' légaquië'. <sup>48</sup> Judas, bönni' na' rudödë' Jesús, chibuluf'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

<sup>49</sup> Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. <sup>50</sup> Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. <sup>51</sup> Tuë' bönni' dzáguië' Jesús gulecjë' guië tuchi' queë', en benë' huë', guchúguië' guídi náguië' bönni' huen dxin queë' bixúz lo.

<sup>52</sup> Jesús gudxë' lë':

—Bugú' guië tuchi' quiu' lidxi. Yúgu'të nupa tu'dí'ini guië tuchi', lu guië tuchi' ilátigaca.

<sup>53</sup> ¿Naru' cabí nõzinu' huáca ulidza' Xuza', ate' Lë' la' isöl-la'të' ziantërö ca chinnu cö' gubáz lá'ayi le naca zían gáyu'ë tu cö' huéaj? <sup>54</sup> Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

<sup>55</sup> Ní'irö Jesús gudxë' yugu' bönni' ni':

—¿Birúajtsali' nuá'ali' guië tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero bití' guzxonli' neda'. <sup>56</sup> Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

### *Ridxinë' Jesús lógaquië' bönni' yudo'*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Ní'irö yugu' bönni' na' zöngaquië' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

<sup>58</sup> Pedro söjnhuë' Jesús zi'tu' zítu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

<sup>59</sup> Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gatië'. <sup>60</sup> Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë'. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nnë' queë', <sup>61</sup> ta'nnë':

—Bönni' ni gunné': “Huaca uquínnaja' yudo' queë' Dios, ate' uchisa' le ia'tsonna dzasö.”

<sup>62</sup> Ní'irö guzuínë' bixúz lo na', en rë' Jesús:

—¿Naru' cabí rubí'itso' didza'? ¿Bizxi caz lë ni ta'nnë' bönni' ni quiu'?

<sup>63</sup> Jesús bití' bi gunné'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjöi'i netu' channö nacu' Li' Cristo, Zxí'inë' Dios.

<sup>64</sup> Jesús rë' lë':

—Ca na' rno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúzxiba, en idxina' ga zóali'.

<sup>65</sup> Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zì'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zì' bë'ë queë' Dios. <sup>66</sup> ¿Nacxi rusáca'li' queëli'?

Bulu'bi'ë didza', gula'nnë':

—Nabáguë'ë xíguia' gátië'.

<sup>67</sup> Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zíca'rë', <sup>68</sup> en të' Lë':

—¿Nácatso' Li' Cristo? Gunnëya'atsöca' na'a, ¿nuzxi na' gudapa' Li'?

*Pedro rnnë': "Bití' núnbë'a-në' Jesús"*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

<sup>70</sup> Gudá'baguë'ë Pedro lógaca bönachi nacuá' ni', rnnë':

—Bití' nözda' nuzxi que na' ru'u didza'.

<sup>71</sup> Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

<sup>72</sup> Leyúbölö gudá'baguë'ë Pedro, en buzötjë' Dios, rnnë':

—Bití' ca' núnbë'a-në' bönni' ni.

<sup>73</sup> Iá'látí'do'os gudzé, gula'biga' nupa nacuá' ni' ga na' zoë' Pedro, en të' lë':

—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

<sup>74</sup> Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Bití' ca' núnbë'a-në' bönni' ni.

La' ná'asö guródxitëba' böra. <sup>75</sup> Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en guródxí yéchi'dë'ë.

## 27

*Tu'dödë' Jesús lu në'ë Pilato*

*(Mr. 15:1; Lc. 23:1-2; Jn. 18:28-32)*

<sup>1</sup> Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús. <sup>2</sup> Gula'ché'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

*Ratië' Judas*

<sup>3</sup> Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. <sup>4</sup> Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Bití' gun lë ni ga cö'ötu' böniga. Le ben cazu' li' na'.

<sup>5</sup> Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

<sup>6</sup> Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxi'ë tu bönni' ratië' bönachi.

<sup>7</sup> Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. <sup>8</sup> Que lë ni na', ga ridxintë na'a dza nazí'i le lataj na', La' Yëla Rön. <sup>9</sup> Caní guca ca na' gunnë' Jeremías, bönni' bë'ë didza' uláz queë' Dios, gunnë': "Gula'guélé'ë chi uruá' dumí plata na', tsca le gula'zéqui'në' bönni' Israel Lë', <sup>10</sup> ate' dumí na' gulá'uinë' la' yëla queë' tu bönni' huen rö'ö. Lë ni bulu'inë' Xana' neda'."

### *Ridxinë' Jesús lahuë' Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Cate' bulu'sudxinë' Jesús lahuë' Pilato, bönni' na' rinná bë'ë uláz que yödz Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rno'.

<sup>12</sup> Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', biti' bi didza' bubí'ë Jesús. <sup>13</sup> Ní'irö Pilato rë' Jesús:

—¿Naru' cabí riyöntsenu' cate' xö le ta'nnë' quiu'?

<sup>14</sup> Jesús biti' bi didza' bubí'ë. Caní guca, bubáninë' bönni' unná bë' na'.

### *Rirugu queë' Jesús gatië'*

(Mr. 15:6-20; Lc. 23:13-25; Jn. 18:38-19:16)

<sup>15</sup> Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guié, nütitës nu té'ëni usanë'. <sup>16</sup> Dza na' tu bönni' nabáguë'ë xíguia', lë' Barrabás, yu'ë lidxi guié ni'. <sup>17</sup> Cate' bulu'dubi bönachi zían ni', Pilato gunábinë' légaquië', rnnë': —¿Nuzxi rë'ënili' usana' queëli'? ¿Naru' Barrabás o Jesús, Bönni' na' lë' Cristo?

<sup>18</sup> Caní gunnë' Pilato tu' réquibe'enë' bulu'dödë' bönni' yudo' Jesús lu në'ë tu' tu'zxe'enë' Lë'.

<sup>19</sup> Tsanni ni' rö'ë Pilato ga na' ruchi'a rusöröë', nigula queë' gusól-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nözinë' Lë'.

<sup>20</sup> Yugu' bixúz unná bë' len bönni' gula tu'zéajni'inë' gula'gú'u yöl-lë'ë bönachi zían na' para ila'nabi Pilato usanë' Barrabás na', ate' gútië' Jesús. <sup>21</sup> Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni rë'ënili' usana'-në' queëli'?

Gula'nnë':

—Barrabás.

<sup>22</sup> Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

<sup>23</sup> Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

<sup>24</sup> Cate' réquibe'enë' Pilato biti' birúaj xtídzë'ë, pero gula'dzâtsarö bönachi, ní'irö gudélé'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

<sup>25</sup> Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' zxí'initu'!

<sup>26</sup> Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' rójáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dë'e Lë' lë'e yaga cruz.

<sup>27</sup> Yugu' bönni' rójáquië' gudil-la nacu'ë lu në'ë bönni' unná bë' na' gula'ché'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' rójáquië' gudil-la nacu'ë ni' ga na' zoë' Jesús. <sup>28</sup> Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácu'gaca nupa ta'nná bë'. <sup>29</sup> Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zöë' tu guído' lu në'ë ibëla le rulu'i ca tu yaga que bönni' yúlahui'. Ní'irö bulu'zóa zxbë' lahuë', en bulu'titjë' Lë', ta'nnë':

—¡Bica' ba Li', rinná bé'enu' bönachi judío!

<sup>30</sup> Ní'irö bulu'chejë' Lë' zxöna', ate' bulu'guélé'ë gui na', en gula'guinë' icjë'. <sup>31</sup> Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'ché'ë Lë' para tsöjdá'agaquië' Lë' lë'e yaga cruz.

### *Tu'dë'ë Jesús lë'e yaga cruz*

*(Mr. 15:21-32; Lc. 23:26-43; Jn. 19:17-27)*

<sup>32</sup> Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

<sup>33</sup> Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', <sup>34</sup> bulu'gui'jë' Jesús nupi zi nutsí'i zxí'gala'aba' böa' guixi'. Cate' buxí'i ru'ë Jesús, biti' gú'unnë' guí'jë'.

<sup>35</sup> Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guísië' lari' nácuë', en bulu'quitjë' lahui le gaca bë'."

<sup>36</sup> Ní'irö gula'bö'ë ni', tu'yúë' Jesús. <sup>37</sup> Lësca' bulu'zöë' lë'e yaga cruz ícjalë' Jesús tu didza' le riguixjö' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

<sup>38</sup> Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'tué' na' cuita lë'ë yögöla. <sup>39</sup> Gula'dödë' ni' yugu' bönni' bulu'lidza zi'ë Jesús, en bulu'tá íc'jagaquië', tu'titjë' Lë', <sup>40</sup> ta'nnë':

—¡Ön, Li' na' uquín'aju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inë' Dios! ¡Bötjatsöca' lë'e yaga cruz na'!

<sup>41</sup> Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

<sup>42</sup> —Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'. <sup>43</sup> Lë' buzxöni lédxë'ë Dios. Dios usölá cazë' Lë' na'a channö raza lédxë'ë Lë', tu' gunné': "Zxí'inë' Dios naca'."

<sup>44</sup> Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

### *Ratië' Jesús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Cate' bidxín huagubidza, guchul-la idútë yödzölió ga bidxintë idú ridödi xihuó. <sup>46</sup> Idú ridödi xihuó na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bizx que nubéaj lédxu'u neda'?"

<sup>47</sup> Cate' nupa nacua' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

<sup>48</sup> La' guxítì'të' tuë' bönni' nùtsë'ë ládjagaquië', en gudélë'ë tu le bululu rizxupi nisa, ate' buxúpinë' le nupi zi, en buzóë' le tu lu gui, ate' butságuië' le ru'ë Jesús para xupë'. <sup>49</sup> Ní'irö ia'zícá'rë' bönni' ni' ta'nnë':

—¡Gulözagarö! ¡Uyútsöca'ru' channö huidë' Elías usölë' Lë'!

<sup>50</sup> Leyúbölö gurödxi'ë zidzaj Jesús, ate' burúajtë bö' naca cazë', gútité'. <sup>51</sup> La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' zxu', en gula'lá'a guiöj. <sup>52</sup> Gula'yajaj yeru ba quégaca nupa chinátigaca, nupa ni' gula'yéajlë' Dios, ate' bulu'bán bönachi na'. <sup>53</sup> Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

<sup>54</sup> Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunné':

—Le nácatë bönni' ni' gúquië' Zxí'inë' Dios.

<sup>55</sup> Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. <sup>56</sup> Lësca' María Magdalena, en María, xiná'agaquië' Jacobo, en José, nùtsa'gacanu ládjagacanu, ate' zóanu ca' ni' xiná'agaquië' yugu' zxi'inë' Zebedeo.

*Ta'gu'ë Jesús yeru ba le nadaj lë'e guí'a guiöj*  
(Mr. 15:42-47; Lc. 23:50-56; Jn. 19:38-42)

<sup>57</sup> Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. <sup>58</sup> Bönni' ni' yöjyúë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús. <sup>59</sup> Guzxi'ë José Lë', en buchölinë' Lë' tu lari' nazaca'. <sup>60</sup> Ní'irö gulu'ë Lë' lu yeru ba cubi queë' le naguidjë' lë'e guí'a guiöj. Budë'ë tu guiöj blaga zxon ga nu riyaza yeru ba na', ate' söhuöjë'. <sup>61</sup> Gula'cuá'anu María Magdalena, en ia'tunu María ni', rö'gacanu ra' yeru ba na'.

*Yugu' bönni' röjáquië' gudil-la tapa chi'ë ba queë' Jesús*

<sup>62</sup> Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. <sup>63</sup> Të' Pilato: —Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': “Cate' gaca tsonna dza ubana' lu yöl-la' guti.” <sup>64</sup> Que lë' ni na' gunná be'e nupa ilún chi'i ba ni' ga idxintë dza bunny, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: “Bubanë' Jesús lu yöl-la' guti.” Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

<sup>65</sup> Pilato gudxë' légaquië':

—Ni nacu'ë bönni' röjáquië' gudil-la. Guli'ché'ë queëli'. Guli'tséaj, guli'gún chi'i yeru ba na' tsca séqui'li' gunli'.

<sup>66</sup> Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

## 28

*Rubanë' Jesús lu yöl-la' guti*  
(Mr. 16:1-8; Lc. 24:1-12; Jn. 20:1-10)

<sup>1</sup> Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. <sup>2</sup> Tsárido'os gudödi budó' zxu'. Caní guca, tu' böjtjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudúë' guiöj blaga zxon na', en gurö'ë lu guiöj na'. <sup>3</sup> Nalá' lahui gubáz lá'ayi na' ca yösa bení', ate' zxíla'do'os naca lari' nácuë'. <sup>4</sup> Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'.

Gula'dzö'ë lu yu, en guláquië' ca bönni' nati caz. <sup>5</sup> Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguíjali'-në' Jesús, bönni' na' bulu'dë'ë lë'e yaga cruz. <sup>6</sup> Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. <sup>7</sup> Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

<sup>8</sup> Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelò söjácunu söjtíxjöi'iguequinu yugu' bönni' usëda queë'. <sup>9</sup> Tsanni ni' söjácunu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'. <sup>10</sup> Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi' yugu' böcha'a tsöjáquië' saca' luyú Galilea, ate' ni' ulu'lé'enë' neda'.

*Le gula'guíxjö'ë yugu' bönni' röjáquië' gudil-la*

<sup>11</sup> Tsanni ni' söjácunu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca. <sup>12</sup> Cate' chibulu'tübë' yugu' bönni' gula tu'zëajni'inë', gulún xtídza'gaquië'. Ní'irö bulu'nödzjë' dumí zían quégaquië' bönni' na' röjáquië' gudil-la. <sup>13</sup> Të' légaquië':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'." <sup>14</sup> Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queëli'.

<sup>15</sup> Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

*Jesús risöl-lë'ë yugu' bönni' gubáz queë'*

*(Mr. 16:14-18; Lc. 24:36-49; Jn. 20:19-23)*

<sup>16</sup> Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu guí'ado' na' chibulu'ínë' Jesús légaquië'. <sup>17</sup> Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'. <sup>18</sup> Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. <sup>19</sup> Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. <sup>20</sup> Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

## DIDZA' DXI'A BUZÚAJË' MARCOS

*Libán benë' Juan, bönni' buquile' bönachi nisa*

*(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Caní gusí lo didza' dxi'a ca guca queë' Jesucristo, Zxí'inë' Dios.

<sup>2</sup> Budxín læ na' buzúajë' lu guichi Isaías, bönni' bë'ë didza' uláz queë' Dios, le gunnë'

Dios:

Buyútsöca', risöl-la'a bönni' gubáz quia', inöruë' Lo'.

Lë' upë'ë nöza ga tödu'.

<sup>3</sup> Yön chi'ë tu bönni' ulidzë' zidzaj lu lataj cá'asö, innë':

"Buli'pá'a nöza para idxín Xanru' yichaj lázxdó'oli'.

Buli'béaj li yugu' nöza lasi ga tödë'."

<sup>4</sup> Caní budxín, tu' ruquile' Juan bönachi nisa lu lataj cá'asö, en runë' libán para ila'dila bönachi nisa, bönni' na' bulu'bí'i ládxi'gaquië' para uniti lahuë' Dios dul-la' nabága'gaquië'. <sup>5</sup> Bila'rúaj bönachi zían yúgu'të yödzo luyú Judea, enca' yödzo Jerusalén, en yöjáquië' ga na' zoë' Juan, ate' Juan na' buquile' légaquië' nisa lu yegu Jordán, bönni' na' gula'xóalëpë' dul-la' nabága'gaquië'.

<sup>6</sup> Nácüë' Juan lari' néquini lítsa'ba' böa', en núguë'ë lë'ë tu guídi. Rahuë'-ba' böchi'zu, en re'jë' le zxixi que buzdo'. <sup>7</sup> Runë' Juan libán, rnnë':

—Si' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéhua', para ilecja' xiráchuë' nudë'ë. <sup>8</sup> Neda' ruquila' libí'ili' nisa, pero Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi.

*Ridilë' Jesús nisa*

*(Mt. 3:13-17; Lc. 3:21-22)*

<sup>9</sup> Tu dza ni' birúajë' Jesús yödzo Nazaret luyú Galilea, ate' Juan na' buquile' Lë' nisa lu yegu Jordán. <sup>10</sup> Cate' burúajë' Jesús lu nisa, la' ná'asö bilé'enë' gualaj lúzxiba, en ruhuötjë' Dios Bö' Lá'ayi, rulu'í cuinë' ca tuba' gu'dódo', en bidisóalenë' Lë'. <sup>11</sup> Biyön chi'í nu ru'í didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Rë'ëni tu' xihui' gun ga ibáguë'ë Jesús dul-la'*

*(Mt. 4:1-11; Lc. 4:1-13)*

<sup>12</sup> Ní'irö Dios Bö' Lá'ayi guchë'ë Jesús bayudxi lu lataj cá'asö. <sup>13</sup> Guzóë' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguë'ë Jesús dul-la'. Guzóë' Jesús ga ni' ta'daba' böa' guixi' dzö'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

*Rusédinë' Jesús bönachi luyú Galilea*

*(Mt. 4:12-17; Lc. 4:14-15)*

<sup>14</sup> Gudödi gula'gu'ë Juan na' lidxi guie', sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios. <sup>15</sup> Caní rnnë':

—Chibidxín dza. Chizóa idinná bë'ë Dios. Buli'bí'i ládxi'li', en guli'tséajlë' didza' dxi'a ni.

*Rulidzë' Jesús tapë' bönni' uzxön böla*

*(Mt. 4:18-22; Lc. 5:1-11)*

<sup>16</sup> Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácagaquië' uzxön böla, en ta'chiljë' yöxaj böla quégaquië' lu nisa na'.

<sup>17</sup> Jesús gudxë' légaquië', rnnë':

—Guli'dutá' neda', ate' guna' ga iché'ëli' bönachi quia' neda', gunli' ca runli' rizönlí'-ba' böla.

<sup>18</sup> La' bulu'cá' anatë' yöxaj quégaquië', en söjácalenë' Jesús.

<sup>19</sup> Gudödë' Jesús ia'látí'do' ní'ilö, ate' bilé'enë' Jacobo, en Juan, yugu' xzí'inë' Zebedeo, nacué' lë'e bárcodo' quégaquië', tu'únë' yöxaj böla quégaquië'. <sup>20</sup> Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' söjácalenë' Jesús.

*Tu bönni' yu'u lë' bö' xihui'*

*(Lc. 4:31-37)*

<sup>21</sup> Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'. <sup>22</sup> Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. <sup>23</sup> Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

<sup>24</sup> —¿Bizxi rál-la'tu' quiu', Jesús, bönni' Nazaret? ¿Za'tsu' usunítíu' netu'? Núnbë'a Li', nacué' Bönni' Lá'ayi queë' Dios.

<sup>25</sup> Jesús buzenë' le bach, rnnë':

—Busayaj ru'u, en burúaj lu bönni' ni.

<sup>26</sup> Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë.

<sup>27</sup> Bulu'bánninë' yúgu'të bönni' nacué' ni', ate' gula'nabi luzé'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

<sup>28</sup> La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

*Ruúnë' Jesús xiná'anú nigula queë' Pedro*

*(Mt. 8:14-15; Lc. 4:38-39)*

<sup>29</sup> Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. <sup>30</sup> Ní' dënu xiná'anú nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. <sup>31</sup> Ní'irö gubígui'ë Jesús, ate' gudélë'ë ná'anú, en guchisë'-nu. La' burúajtë tu xilá na' yú'unu, ate' bupá'anú le gulahuë'.

*Ruúnë' Jesús zían nupa te'e*

*(Mt. 8:16-17; Lc. 4:40-41)*

<sup>32</sup> Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. <sup>33</sup> Yúgu'të bönachi lu yödzö bila'guíró ga nu riyaza yu'u ga na' zoë' Jesús. <sup>34</sup> Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

*Runë' libán Jesús luyú Galilea*

*(Lc. 4:42-44)*

<sup>35</sup> Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. <sup>36</sup> Simón, en nupa nacué'len lë' söjdíljagaquië' Jesús. <sup>37</sup> Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

<sup>38</sup> Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

<sup>39</sup> Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.



*Tu bönni' ré'enë' huë' nudzu' ruzödi*  
(Mt. 8:1-4; Lc. 5:12-16)

<sup>40</sup> Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxi'bë', en gúta'yuë' lahuë', rnnë':

—Channö rë'ënu', huáca unu' neda'.

<sup>41</sup> Jesús buéchi' láchxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóacu'.

<sup>42</sup> Ca gunné' ca', la' bunítitë huë' ré'enë', en böáquië' dxí'ado'. <sup>43</sup> Ní'irö Jesús buzenë' bach bönni' na', en la' busól-la'të' lë'. <sup>44</sup> Caní gudxë' lë':

—Cuntu nu guío' ca bena' quiu', pero guyéaj, yöjluí'i cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë na' uluí'i bönachi chinuhuóacu'.

<sup>45</sup> Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, bítirö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të yödzö bila'dxín ga na' zoë' Jesús.

## 2

*Bönni' ré'enë' huë' nacú'unië' bin*  
(Mt. 9:1-8; Lc. 5:17-26)

<sup>1</sup> Cate' chigudödi chopa tsonna dza, buázië' Jesús yödzö Capernaum, ate' guzé didza' zoë' yu'u. <sup>2</sup> La' bulu'dúbitë bönachi zían ga na' zoë' Jesús, ga bidxintë bítirö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. <sup>3</sup> Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. <sup>4</sup> Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxíë' yeru na', ni' bulu'zötjë' le denë' bönni' huë' na'. <sup>5</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

<sup>6</sup> Ró'ögaquië' bal-lë' bönni' yudo' usedi ni'. Ta'zá' láchxi'gaquië', ta'nnë': <sup>7</sup> ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. <sup>8</sup> La' gúquibe'etenë' Jesús le ta'zá' láchxi'gaquië', ate' gudxë' légaquië':

—¿Bizx que rizá' láchxi'li' caní? <sup>9</sup> Biti' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ni'ë. <sup>10</sup> Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

<sup>11</sup> —Li' rea': Guyasa. Buá' le denu', en böaj lidxu'.

<sup>12</sup> La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bájinë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

*Jesús rulidzë' Leví*

(Mt. 9:9-13; Lc. 5:27-32)

<sup>13</sup> Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. <sup>14</sup> Cate' ridödë' Jesús ni', bilé'enë' Leví, xzí'inë' Alfeo, rö'ë ga ruquíxjé' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

<sup>15</sup> Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö ró'ölengaquië' tsözxön Jesús, en yugu' bönni' usëda queë'. Caní guca, tu' röjaca bönachi zían len Jesús. <sup>16</sup> Cate' yugu' bönni' yudo' usedi, en yugu' bönni' yudo'

fariseo, bila'lé'enë' Lë' rō'ë rágulenë' tsözxön yugu' bönni' uquízxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

<sup>17</sup> Biyönnë' Jesús didza' ni tu'ë, en gudxë' légaquië':

—Nupa nacué' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i ládxi'gaca.

*Ru'ë Jesús didza' que yöl-la' run gubasa*

*(Mt. 9:14-17; Lc. 5:33-39)*

<sup>18</sup> Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

<sup>19</sup> Bubi'ë didza' Jesús, rë' légaquië':

—¿Naru' réquitseli' ilún gubasa nupa nacué' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa. <sup>20</sup> Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

<sup>21</sup> 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachöza' lari' tëbi na', ate' huaröza'rö lari' tëbi na'. <sup>22</sup> Lëasca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi*

*(Mt. 12:1-8; Lc. 6:1-5)*

<sup>23</sup> Tu dza lá'ayi quégaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí lógaquië' ta'lecjë' do ga dxía xzoa' xtila. <sup>24</sup> Ní'irö bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

<sup>25</sup> Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacué'len lë' <sup>26</sup> ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' biti' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacué'lenë' lë'.

<sup>27</sup> Ní'irö Jesús gudxë' légaquië':

—Dios benë' dza lá'ayi le ulu'zí' xibé bönachi, calëga benë' bönachi para ilún chí'i dza lá'ayi. <sup>28</sup> Que lë ni na', neda', Bönni' Guljë' Bönachi, naca' Xani dza lá'ayi.

### 3

*Ruúnë' Jesús tu bönni' narequi' në'ë*

*(Mt. 12:9-14; Lc. 6:6-11)*

<sup>1</sup> Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. <sup>2</sup> Bönni' yudo' nacué'ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'. <sup>3</sup> Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

<sup>4</sup> Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. <sup>5</sup> Ní'irö len yöl-la' rilé queë', buyüë' Jesús bönachi na' nacua' gásibi'ilé'. Ruhuí'innë' tu' nácagaquië' zidi ladxí'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. <sup>6</sup> Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

*Tu'dubi bönachi zían ra' nísado'*

<sup>7</sup> Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sójácalen Lë' bönachi zían narúajgaca luyú Galilea, en luyú Judea. <sup>8</sup> Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. <sup>9</sup> Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zían na' Lë'. <sup>10</sup> Caní guca tu' chibunë' zían nupa te'e, ate' bila'guírö bönachi zían na' ga zoë' para ila'gán Lë'. <sup>11</sup> Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

<sup>12</sup> Jesús buzenë' le bach bö' xihui' na', cabí ila'guixjö' nu náquië' Lë'.

*Riböë' Jesús chinnu bönni' ilácagaquië' gubáz queë'*

*(Mt. 10:1-4; Lc. 6:12-16)*

<sup>13</sup> Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilé'. <sup>14</sup> Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán. <sup>15</sup> Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi. <sup>16</sup> Caní nácagaca lágaquië':

Simón, (buzóë' Jesús ia'tú lë', Pedro),

<sup>17</sup> Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzóë' ia'tú lágaquië', Boanerges, le rRNA lu didza' xidza': Bönni' sínia' ca guziú'),

<sup>18</sup> Andrés, Felipe, Bartolomé, Mateo, Tomás,

Jacobo, (zxí'inë' Alfeo),

Tadeo,

Simón, (bönni' ruí'i ládxë'ë yödzö queë'),

<sup>19</sup> Judas Iscariote, (bönni' udödë' Jesús lu ná'agaquië' bönni' ilútië' Lë').

*Yugu' bönni' yudo' ta'nnë': "Tu' xihui' dzaga Jesús"*

*(Mt. 12:22-32; Lc. 11:14-23; 12:10)*

Gudödi ni' Jesús len bönni' dá'gaquië' Lë' bulu'dxinë' tu lu yu'u. <sup>20</sup> Leyúbölö bila'guírö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. <sup>21</sup> Cate' dí'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

<sup>22</sup> Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

<sup>23</sup> Ní'irö Jesús bulidzë' yugu' bönni' yudo' usedi na', en bucúdzü'ë didza', rnnë':

—¿Naru' ubéaj la' cuinsi Satanás tu' xihui'? <sup>24</sup> Channö ila'ruáj choplö bönachi tu yödzö, en ila'díl-lalen luzë'eguequi, bití' gaca idía' yödzö na'. <sup>25</sup> Lësca' caní channö ila'ruáj choplö bönachi nacua' tu yu'u, en ila'díl-lalen luzë'eguequi, bití' gaca ila'día' bönachi nacua' yu'u na'. <sup>26</sup> Que lë ni na', channö Satanás tu' xihui' tá'baga' luzë'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

<sup>27</sup> Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

<sup>28</sup> 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanni' ta'nná, <sup>29</sup> pero núti'tës nu innë schanni' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

<sup>30</sup> Caní gunné' Jesús tu' ta'nnë' queë' bönni' yudo' usedi na', ta'nnë':  
—Tu' xihui' dzaga Lë'.

*Nu naca xinë'ë Jesús, en bönni' böchë'ë*  
(Mt. 12:46-50; Lc. 8:19-21)

<sup>31</sup> Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús. <sup>32</sup> Bönachi zían na' rögaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Lí'.

<sup>33</sup> Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

<sup>34</sup> Ní'irö buyüë' nupa na' rögaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' böcha'a. <sup>35</sup> Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

## 4

*Rucúdzu'ë didza' Jesús ca naca queë' bönni' guz*  
(Mt. 13:1-9; Lc. 8:4-8)

<sup>1</sup> Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. <sup>2</sup> Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

<sup>3</sup> —Guli'zé nágali' didza' ni. Birúajë' tu bönni' guz, söjësië' xisedo'. <sup>4</sup> Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulë'ajba' le. <sup>5</sup> Gulasi ia'bal-la xisedo' na' ga rö'ö guiój ga biti' rö'ö yenni' yu. Bayön gula'lén xisedo' na' tu' cabí rö'ö yenni' yu. <sup>6</sup> Ní'irö cate' gulén gubidza, buquexu' le, ate' gubidxi, tu' cabí nun luí ga rë'. <sup>7</sup> Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzej. <sup>8</sup> Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

<sup>9</sup> Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

*Riguíxjö'ë Jesús bizx que rucúdzu'ë didza'*  
(Mt. 13:10-17; Lc. 8:9-10)

<sup>10</sup> Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxön idxínmutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'.

<sup>11</sup> Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácgaca tuz len rë'u, ru'ilena' légaquië' didza' yugu' le rucúdzu'a didza'. <sup>12</sup> Caní runa' para gaca lë na' nazúaj lu guichi lá'ayi, rnna:

Ulu'yüë', en biti' ila'lë'enë'.

Ulu'zé nágagaquië', en biti' ila'yéajni'inë'.

Biti' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

*Riguíxjö'ë Jesús le bucúdzu'ë didza'*  
(Mt. 13:18-23; Lc. 8:11-15)

13 Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zica'rö le ucúdzu'a didza'? 14 Bönni' guz na' náquië' nu ruzë xtídzë'ë Dios.

15 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

16 'Nácagaca ia'bal-la bönachi ca xisedo' na' gulasi ga rö'ö guiöj. Ta'yönnë' didza' na', ate' len yöl-la' rudzeja quégaquië' ta'zi'ë le. 17 Biti' riyaza icja ládxi'do'gaquië', ate' tu chí'isö ta'dë'ë le. Cate' bi raca quégaquië', o zoa nu ribía ládxi' légaquië' tu' ta'dë'ë didza' na', la' tu'huöatë ládxi'gaquië'.

18 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', 19 pero tu'i ládxi'gaquië' le nácagaca que yödzülió ni. Nazí' yé'eguequinë' tu' nadxí'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

20 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zi' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzej ia'chí uruá' huéaj. Nácagaca ia'bal-lë' ca xisedo' na' bulu'nödzej ia'tsónnalalaj ca', ate' nácagaca ia'bal-la bönachi ca xisedo' na' bulu'nödzej ia'tú gayuá' ca'.

#### *Rucúdzu'ë didza' Jesús que tu le rigú'u bení*

*(Lc. 8:16-18)*

21 Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. 22 Yúgu'të le nagachi' ilá' lahui, ate' yúgu'të le raca balándo'os ila'ruáj ga liná'. 23 Nu zoa nagui, en riyöni ral-la' uzë nagui.

24 Gudxë' ca' légaquië':

—Guli'güi' ládxi'li' le riyönili'. Ca naca le ruríxili', la' leze urixë' Dios queëli', ate' gunnë' queëli' ia'lati'. 25 Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

#### *Rucúdzu'ë didza' Jesús ca rizxön zxoá' xtila*

26 Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxoá' xtila lu yu. 27 Chi'i dzö'ölö rásië', en riyasë' cate' za' rení'. Ta'lén zxoá' xtila na', en ta'zxön, pero bití' nözinë' lë' nacxi raca ta'zxön. 28 La' cuinsi luyú na' ruxön le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. 29 Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

#### *Rucúdzu'ë didza' Jesús ca raca que xisé mostaza*

*(Mt. 13:31-32; Lc. 13:18-19)*

30 Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? 31 Raca ca raca que tu xisedo' mostaza. Cate' riyaza luyú naca tu xisedo' nácatërö cuidí' ca yúgu'të xisedo' dzö'ö luyú, 32 pero cate' chinadúz, rilén, en rizxöntërö ca yúgu'të guixi' cuan rö'gaca luyú. Tsca run yana' ni'a në'e, gaca ila'dxinba' biguínido', en ulu'dxíaba' xicá'agacaba' lu zxul-la que.

#### *Ca rugunë' dxin Jesús le rucúdzu'ë didza'*

*(Mt. 13:34-35)*

<sup>33</sup> Caní guca, busédinë' Jesús légaquië', en zíanrö ca' le bucúdzu'ë didza' tsca guca ila'yéajni'inë'. <sup>34</sup> Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

*Jesús ribequi dxíë' bö' budunu'*

(Mt. 8:23-27; Lc. 8:22-25)

<sup>35</sup> La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsölá'a nísado' ni.

<sup>36</sup> Ní'irö bulu'lá'alënë' bönachi zían nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sójacalen légaquië'. <sup>37</sup> Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.

<sup>38</sup> Dë' rásië' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxi'tso' netu'? ¡Huáti caztu' lu nisa ni!

<sup>39</sup> Ní'irö guyasë' Jesús, en gunná bé'enë' bö' na' recja, gunné':

—Gurö'ö dxi.

Gudxë' ca' nisa na', gunné':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'. <sup>40</sup> Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

<sup>41</sup> Ni' tádxinë' gulë' luzë'ë tuë' ia'tué':

—¿Nuzxi caz bönni' ni? ¡Tun bö' recja, en nísado' ca rnna xtídzë'ë!

## 5

*Bönni' Gadara yu'u bö' xihui' lë'*

(Mt. 8:28-34; Lc. 8:26-39)

<sup>1</sup> Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. <sup>2</sup> Cate' burúajë' Jesús lë'e bárcodo' na', tu bönni' rirúajë' znan bulóaj ga nacuá' yeru ba la' dutságatë' Lë'. Bönni' ni yu'u bö' xihui' lë', <sup>3</sup> ate' nun xilatjë' ga na' nacuá' yeru ba. Cuntu nu guca guga' bönni' na', calëga len du guíë. <sup>4</sup> Zían luzuí bulu'zóë' bregui' guíë yen në'ë, en ni'ë, en gulúgui'ë lë' du guíë. Yugu' du guíë na' bulë'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. <sup>5</sup> Ridática'së' ribödxi'ë rëla, en të dza ga na' nacuá' yeru ba, en gapa naca lu guí'ado', run huë' cuinë' yugu' lu guíöj dzö'ö ni'. <sup>6</sup> Cate' bilé'enë' zë'ë zí'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. <sup>7</sup> Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtë'rë'? Ni'a queë' Xanru' Dios ráta'yua' lo', bití' usaca' zí'u neda'.

<sup>8</sup> Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

<sup>9</sup> Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zían, tu' rö'ö ziantu'.

<sup>10</sup> Gula'nabi yechi' yugu' bö' xihui' na' Jesús para cabí isöl-lë'ë léguequi zí'tu' luyú ni'.

<sup>11</sup> Nacuá'aba' cuchi zían lu guí'ado' ní'isö, ta'daba' táguba' ni'. <sup>12</sup> Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zían. Bë' netu' lataj tsöjtsú'ugacatu'-ba'.

<sup>13</sup> La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zían na', ate' gula'xíti'ba' cuchi zían na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yëpiba' nisa, gulátiba', en nácagacaba' ca galaj gayuá'aba'.

14 Ní'irö bulu'zxunnaj nupa ni' gulún chi'i cuchi zián na'. Yöjtíxjöi'iguequiné' bönachi lu yödzö ni', enca' bönachi nacua' la' guixi' ni'. Bila'rúaj bönachi lu yödzö, söjyúgaquié' bizxi na' guca ni'. 15 Cate' bila'dxiné' ga ni' zoé' Jesús, bila'lé'ené' bönni' na' zí'alö yú'ugaca bö' xihui' lé'. Bönni' ni rö'ë ni', nácué' lari', en zoé' dxí'ado', ate' guladxi bönachi na'. 16 Nupa na' bila'lé'e le bené' Jesús gula'guíxjöi'i bönachi na' bila'rúaj lu yödzö ca na' guca queé' bönni' na' zí'alö yú'ugaca bö' xihui' lé', enca' ca guca quégacaba' cuchi na'. 17 Ní'irö gula'sí lógaca bönachi zián na' ta'ta'yu lahué' Jesús urúajé' lu xiyúguequi.

18 Cate' bubené' Jesús lé'e bárcodo', bönni' na' zí'alö yú'ugaca bö' xihui' zián lé', gúta'yué' lahué' Jesús gu'ë lé' lataj tséajlené' Lë'. 19 Jesús biti' bë'ë lé' lataj, pero gudxé' lé':

—Böaj lidxu'. Yöjtíxjöi' di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a li'.

20 Söhuöjé' bönni' na', en ruzé' didza' yugu' yödzö Decápolis ca nácgaca le zxön bené' Jesús queé', ate' bulu'bani yúgu'té bönachi nacua' yugu' yödzö ni'.

*Bi'i nigula queé' Jairo, en nigula na' gudannu lari' nácué' Jesús  
(Mt. 9:18-26; Lc. 8:40-56)*

21 Cate' budxiné' Jesús ia'tsolá'a nísado' na', ní'irö bulu'dubi bönachi zián ga na' zoé' ra' nísado'. 22 Bönni' lé' Jairo, bönni' rinná bë'ë lu yu'u ga tu'dubé' bönni' judío, en nazédé' queé' Dios, bidé' ga zoé' Jesús. Cate' bilé'ené' Jesús, buzóa zxibé' lahué', 23 en gúta'yué' lahué', rnné':

—Chiraqui gátibi' bi'i nigúlado' quia'. Gudá ixóa no'o lëbi' para huöácabi', en biti' gátibi'.

24 Sa'yéajlené' Jesús lé', ate' bönachi zián söjácalen Jesús, tu'quirö Lë'. 25 Tu nigula, chinaca chinnu iz ré'enu, zóanu ca' ni'. Biti' ruhuí'i rön queénu que hué' quégaca cázanu nigula. 26 Yenni' chigudí'i guzxáca'nu lu ná'agaquié' zián bönni' tu'úné' bönachi. Nítisö chibutönu dëra le dë queénu, tu' cabí bi gúcalen lënu, pero riyali' queénu. 27 Cate' biyöninu tu'í' didza' bönachi ca naca queé' Jesús, gudödinu ládjalö bönachi zián na', en bidxinu zaca' cúdzulé' Jesús, en gudannu lari' nácué'. 28 Caní bennu tu' rnnanu: "Channö cansa' le nácué', huöáca'." 29 La' buí'té rön queénu, ate' réquibe'enu chiböácanu que le guca queénu.

30 La' gúquibe'etené' Jesús ben dxin yöl-la' huáca queé', ate' buécjé', ruyúé' bönachi zián na'. Rnné':

—¿Nuzxi na' gudán neda'?

31 Ní'irö bönni' dá'gaquié' Lë' tē' Lë', ta'nné':

—Rilé'e quézinu' bönachi zián ni tu'quirö Li', en rnnatso': "¿Nuzxi na' gudán neda'?"

32 Ruyúé' Jesús gásibi'ilé' para ilé'ené' nuzxi na' gudán Lë'. 33 Ní'irö nigula na' gubíga'nu lahué'. Rádxinu, en rixxízinu tu' chinózinu bi na' guca queénu, ate' buzóa zxíbinu lahué' Jesús, en gúdxinu Lë' idúté le nácaté. 34 Jesús rē'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládXu'u. Tsaz nuhuöácu' que le guca quiu'.

35 Tsanni ni' ru'ë caní didza' Jesús, bönni' narúajgaquié' lidxé' bönni' na' rinná bë'ë lu yu'u ga tu'dubé' tu'sédé' queé' Dios bila'dxné' ni', en tē' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

36 Biti' bë'ë ládXé' Jesús lé' na' ta'nné', ate' gudxé' bönni' unná bë' na', rnné':

—Biti' gádxinu'. Guyéajlë'ësé' Dios.

37 Biti' bë'ë lataj Jesús tsöjácalen Lë' ia'zíca'rö bönachi, pero légacasé' Pedro, en Jacobo, en Juan, böché'ë Jacobo na'. 38 Cate' bidxiné' lidxé' bönni' na' rinná bë'ë ga tu'dubé' tu'sédé' queé' Dios, bilé'ené' raca dzatsa, enca' nupa ni' ta'bödxi, en nupa ta'bödxi yechi'.

39 Guyázié' Jesús, en gudxé' légaquié':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

<sup>40</sup> Ní'irö bulu'titjè' Jesús, pero Lè' bubéajè' yúgu'tè bönachi na' ní'ilö, ate' guchè'è xuz xiná'abi' bi'i nigúlado' na', enca' nupa nacuá'len Lè', ate' guyáziè' ga na' dèbi'. <sup>41</sup> Gudélè'è ná'abi' bi'i nigúlado' na', en gudxè'-bi':

–Talita, cumi.

Didza' hebreo ni rna lu didza' xidza': Bi'i nigúlado', guyasa. <sup>42</sup> La' guyásatèbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. <sup>43</sup> Ní'irö Jesús gunná bé'enè' légaquiè' cuntu nu ulu'siyönnè' lè na' guca. Gudxè' légaquiè':

–Guli'güí' le gágubi' bi'i nigúlado' ni.

## 6

### *Ridxinè' Jesús Nazaret, le naca ladzè'*

(Mt. 13:53-58; Lc. 4:16-30)

<sup>1</sup> Buzé'è Jesús ni', budxinè' ladzè', ate' yugu' bönni' dá'gaquiè' Lè' sōjácalenè' Lè'. <sup>2</sup> Cate' bidxín dza lá'ayi quégaquiè' bönni' judío, gusí lahuè' Jesús rusédinè' bönachi ga na' tu'dubè' tu'sédè' queè' Dios. Gula'cuá' bönachi zían ni' ta'yöni Lè'. Bulu'bani, ta'nná:

–¿Gazxi caz bizédè' bönni' ni yugu' lè ni? ¿Bizxi caz yöl-la' réajni'i ni nadéli'nè'? ¿Nacxi caz runè' le náca gaca bè' na' zá'gaca yehua' yubá? <sup>3</sup> Náquiè' bönni' ni gubèdxi yaga na', en zxí'ininu María. Náquiè' böchi'gaquiè' Jacobo, en José, en Judas, en Simón. Nigula zanè' nacuá'lennu ca' rë'u.

Que lè ni na' bulu'cá'anè' Lè' cá'asö. <sup>4</sup> Ní'irö Jesús gudxè' légaquiè', rnnè':

–Gáti'tès tunè' bal nu bönni' ru'è didza' uláz queè' Dios, pero bönachi uládz queè', en bönachi di'a dza queè', en bönachi nacuá' lidxè' biti' tun lè' bal.

<sup>5</sup> Que lè ni na' biti' guca gunè' Jesús nitú yöl-la' huáca zxön ni'. Bunsè' nabábasö bönachi te'e cate' guxóa nè'è léguequi. <sup>6</sup> Bubáninè' Jesús tu' cabí ta'yéajlè' Lè'. Gudödi na' gudödè' yugu' yödzödo' nacuá' gásibi'ilö, rusédinè' bönachi ni'.

### *Risöl-lè'è Jesús bönni' dá'gaquiè' Lè' tsōjéngaquiè' libán*

(Mt. 10:5-15; Lc. 9:1-6)

<sup>7</sup> Ní'irö bulidzè' Jesús idxínnutè' bönni' dá'gaquiè' Lè', en gusí lahuè' risöl-lè'è légaquiè' chopa huéajgaquiè'. Budödè' lu ná'agaquiè' yöl-la' unná bè' ulu'béajè' yugu' bö' xihui' yú'ugaca bönachi. <sup>8</sup> Gunná bé'enè' légaquiè' biti' bi ilu'è la' nöza, calèga yōxaj, calèga yōta, en calèga dumí biti' ila'gu'è lu buzudí quégaquiè', pero iluá'asè' xiyágado'. <sup>9</sup> Ral-la' ulu'dé'è xiráchugaquiè', pero calèga chopa lari' ulu'xóa yéngaquiè'. <sup>10</sup> Gudxè' ca' légaquiè':

–Gáti'tès ga tsú'uli' tu yu'u, guli'sóa yu'u na' cate' uzá'aröli' yödzö na'. <sup>11</sup> Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zé ná'agaquiè' xtídza'li', buli'rúaj ni', en buli'quínaj bëchtö da' lè'e lábali'. Lè ni gaca bè' nabága'gaquiè' xíguia'. Le nácatè rea' libí'ili', cate' idxín dza ichúguiè' Dios quégaca bönachi, ila'guí' ila'záca'rö bönachi lu yödzö na' ca ila'guí' ila'záca' bönachi Sodoma, en Gomorra, yugu' yödzö na' busunítiè' Dios.

<sup>12</sup> Ní'irö bila'rúajè' bönni' dá'gaquiè' Lè', yōjéngaquiè' libán ca ral-la' ulu'bí'i ládxi'gaca bönachi. <sup>13</sup> Bulu'béajè' zían bö' xihui' yú'ugaca bönachi. Gula'gu'è le za zían nupa te'e, ate' bulu'huóáquiè'.

### *Ca bëtigaquiè' Juan, bönni' buquilè' bönachi nisa*

(Mt. 14:1-12; Lc. 9:7-9)

<sup>14</sup> Biyönnè' Herodes, bönni' unná bè', ca naca le runè' Jesús, tu' rizé didza' gáti'tès que yöl-la' huáca queè'. Bal-la bönachi ta'nná:

–Chibubanè' Juan, bönni' ni' buquilè' bönachi nisa, lu yöl-la' guti. Que lè ni na' napè' yöl-la' huáca runè' yugu' lè ni.

<sup>15</sup> Ia'bal-la bönachi ta'nná:

–Naquiè' Elías, bönni' bè'è didza' uláz queè' Dios dza ni'te.

Ia'bal-la bönachi ta'nná:



—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

<sup>16</sup> Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöl-la' guti.

<sup>17</sup> Caní gunnë' Herodes tu' gusól-lë'ë lë cazë' bönni' yöjxongaquië' Juan na', ate' gulúgui'ë lë' du guië' lu yu'u lidxi guië'. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudúë'-nu Herodías na', en butsa ná'alënë'-nu. <sup>18</sup> Juan na' gudxë' Herodes:

—Biti' ral-la' sóalenu'-nu nigula queë' bóchu'u.

<sup>19</sup> Que lë ni na' gusí guró'önu Herodías. Gú'uninu bi gunnu queë' Juan, tu' gú'uninu gútinu lë', pero bití' bi guzxéqui'nu <sup>20</sup> tu' rádxi'ë Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú láchë'ë sal-la' lë na' rnnë' Juan ben ga guró'ë böniga Herodes na'. <sup>21</sup> Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea. <sup>22</sup> Guyázabi' bi' i nigula queënu Herodías ga na' t'ë'aj tahuë', en buyá'abi' lógaquië'. Guyaza láchë'ë Herodes ca runbi', en gula'yaza láchxi'gaca ca' nupa t'ë'aj tágulen lë'. Ní'irö Herodes gudxë'-bi' bi' i nigula na', gunnë':

—Gunaba bi rë'ënu' gunna' quiu', ate' guna' ca'.

<sup>23</sup> Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

<sup>24</sup> Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

<sup>25</sup> La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

<sup>26</sup> Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', bití' gú'unnë' iníti xtídzë'ë na' guxzí' lu në'ë queëbi'. <sup>27</sup> Herodes la' gusól-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. <sup>28</sup> Bönni' na' rejë' gudil-la guyijë' lidxi guië', yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi' i nigula na', ate' lëbi' bunödzejabi' le queënu xiná'abi'.

<sup>29</sup> Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcháchi'gaquië' lë' yeru ba.

*Rugahuë' Jesús zianró ca chi-un gayuá' bönachi*

*(Mt. 14:13-21; Lc. 9:10-17; Jn. 6:1-14)*

<sup>30</sup> Gudödi ni' bulu'dübë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sëdinë' bönachi. <sup>31</sup> Nacuá' bönachi zian ni', nupa zá'gaca, en nupa söjaca, ga bidxintë bíti'rö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyéaj cázaru' ga naca lataj cá'asö, en uzí' láchxi'ru' tu chi'i.

<sup>32</sup> La' légacasë' yöjáquië' tu lë'e bárcodo', ate' bila'dxinë' tu lataj cá'asö. <sup>33</sup> Bila'lé'e bönachi zian légaquië' söjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. <sup>34</sup> Cate' burúajë' Jesús lë'e bárcodo' na', bilé'enë' bönachi zian na', ate' buéchi' láchë'ë légaquië' tu' nácagaquië' ca bö'cu' zxíla'do' bití' zoa nu gapa chi'i légacaba'. Gusí lahuë' rusëdinë' légaquië' le zian. <sup>35</sup> Cate' chiridzö' dza na', yugu' bönni' dá'gaquië' Jesús bila'dxinë' ga zoë', en t'ë' Lë':

—Chiridzö', ate' lataj cá'asö naca ni. <sup>36</sup> Busöl-la' bönachi zian ni para tsöjaca yugu' yú'udo', en yugu' yödzödo' nacuá' gásibi'ilö, tsöjögugaca yöta, tu' cabí bi dë ni le ilagu.

<sup>37</sup> Bubi'ë didza' Jesús, gudxë' légaquië':

—Guli'güi' lib'i cázali' le ilahuë'.

Gulë' Lë':

—¿Naru' tsöj'ö'utsatu' yöta xtila len lázxjatu' que idú xunu' beo', ate' güf'itu' le ilahuë'?

<sup>38</sup> Jesús gudxë' légaquië':

—¿Bal-laxi yöta xtila dë queëli'? Guli'tsöjyútsöca'.

Cate' chinóziguequinë', të' Lë':

—Gáyu'sö yöta xtila dë, en chópasöba' böla dëba'.

<sup>39</sup> Ní'irö gunná bë'ë Jesús ilunë' ga ila'bö' bönachi zián na', ila'cuá' tu cö' huéajguequi ga naca lachi' lu daca'. <sup>40</sup> Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. <sup>41</sup> Ní'irö gudélë'ë Jesús igáyu'të yöta xtila na', en irópaba' böla na'. Buyúë' zaca' lúxriba, en gudxë' Dios: "Xclenu'." Ní'irö buzuzxjë' yöta xtila na', en bë'ë quégaquië' bönni' usëda queë' para ila'guisië' quégaca bönachi zián na'. Gudísië' ca' irópatëba' böla na' quégaca yúgu'të bönachi na'. <sup>42</sup> Gulahuë' yúgu'të, en bulu'huöljanë'. <sup>43</sup> Ní'irö bulu'tubë' le bizxaj que yöta xtila na', en quégacaba' böla, ate' chinnu ga'böra bulu'lié'. <sup>44</sup> Guláquië' ca chi-un gáyu'ë bönni' na' gulahuë'.

*Rizë'e ni'ë Jesús lu nísado'*

*(Mt. 14:22-27; Jn. 6:16-21)*

<sup>45</sup> La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzö Betsaida, tsanni ni' Lë' rusöl-lë' bönachi zián na' lídxiguequi. <sup>46</sup> Cate' chibudxi busöl-lë' légaquië', guyijë' tu lu gu'ado', ate' ni' ru'ilenë' Dios didza'. <sup>47</sup> Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. <sup>48</sup> Bilé'enë' Jesús légaquië', böniga tu'së'ë bárcodo' na' tu recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tödisë' ga na' nacu'ë. <sup>49</sup> Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë <sup>50</sup> tu' bila'lé'enë' yúgu'të Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

<sup>51</sup> Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'bánninë'. <sup>52</sup> Biti' ta'yéajni'ininë' le rulu'í lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruúnë' Jesús nupa te'e lu yödzö Genesaret*

*(Mt. 14:34-36)*

<sup>53</sup> Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. <sup>54</sup> Cate' bulu'rúajë' lë'e bárcodo' na', la' bulu'únbë'të bönachi ni' Jesús. <sup>55</sup> Gula'xiti' bönachi na', yöjaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. <sup>56</sup> Gáti'tës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yue' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacatë dxí'ado'.

## 7

*Le tun ga bití' nácaqaca bönachi tsahui' lahuë' Dios*

*(Mt. 15:1-20)*

<sup>1</sup> Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. <sup>2</sup> Bönni' yudo' ni bila'lé'enë' bönni' usëda queë' Jesús tahuë' yöta, bití' nuchí'agaquië' ná'agaquië', lë na' rnna: Bití' nayárigaca ca nalëbiguequinë' tunë'

bönni' yudo' na'. Que lë ni na' gula'nnë' quégaquië'. <sup>3</sup> Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', bití' ca' tahuë'. <sup>4</sup> Cate' tu'dxinë' röjõ'ugaquië' lu yë'ëyi, channö cabí ta'guibë' lë na' ca nalëbiguequinë' tunë', bití' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yõ'öna, en yugu' zxiga' guié, en yugu' le tati'në'. <sup>5</sup> Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yõta bití' nuchí'agaquië' ná'agaquië'?

<sup>6</sup> Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné':  
Yugu' bönni' ni, len rú'agacasë' tunë' neda' bal,  
calëga idú ládxi'gaquië'.

<sup>7</sup> Níti'sö naca yöl-la' ba ta'gu'ë neda'  
tu' tu'sëdinë' le ta'nná bë' bönachi,  
calëga xibá quia'.

<sup>8</sup> Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönachi.

<sup>9</sup> Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. <sup>10</sup> Moisés gunné' caní: “Ben bal xuz xinó'o.” Gunnë' ca': “Nu ulidza zi' xuzi o xinë'e, guli'gútité nu na'.” <sup>11-12</sup> Libi'ili' rnnali' caní: “Channö nu bönni' guié' xuzë' o xinë'ë: Bití' gaca bi gunna' queëli', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Bití' run bayudxi bi gunë' bönni' na' quégaquië' xuz xinë'ë.” <sup>13</sup> Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudödili' lu ná'agaca zxi'ini xi'sóali'. Zíanrö ca' le caní runli'.

<sup>14</sup> Ní'irö Jesús bulidzë' bönni' zían na' nacu'ë ni', en rë' légaquië':

—Guli'zé nágali' didza' gu'a, yúgu'tëli', en guli'tséajni'i. <sup>15</sup> Bití' bi dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios. <sup>16</sup> Channö zoa nágali', en riyönili', buli'zé nágali'.

<sup>17</sup> Cate' Jesús bulá'alenë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'. <sup>18</sup> Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', bití' gaca gun ga bití' náquië' tsahui' lahuë' Dios? <sup>19</sup> Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunné' caní Jesús, buluí'inë' rë'u naca dxi'a yúgu'të le rë'aj ráguru'. <sup>20</sup> Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios. <sup>21</sup> Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, <sup>22</sup> en ta'banë', en ta'zé ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná zi'ë que luzá'agaquië', en tun ba zxön cúngaquië', en tunë' le canöz. <sup>23</sup> Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

*Tu nigula izá'a réajlë'ënu Jesús  
(Mt. 15:21-28)*

<sup>24</sup> Buzë'ë Jesús ni', ate' bidxinë' gala' ga nacuá' yödzö Tiro, en yödzö Sidón. Guyázië' tu yu'u ni', en gú'unnë' cuntu nu inözi, pero bití' ca' guca ucachi' cuinë'. <sup>25</sup> Tu nigula zóabi' bi'i nigúlado' queënu, yu'u bö' xihui' lëbi', biyöninu didza' rizë ca naca queë' Jesús,

ate' la' bídatënu ga zoë' Jesús, en buzóa zxíbinu xini'ë. <sup>26</sup> Nígula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. <sup>27</sup> Ní'irö Jesús gudxë'-nu, rnnë':

—Bë' lataj ulu'huöläj zí'alö nupa nácgaca ca zxí'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bö'cu'do'.

<sup>28</sup> Bubi'inu didza' nigula na', gúdxinu Jesús:

—Ön, Xan, pero yugu' bö'cu'do' nacúa'aba' zxani ga tágubi', táguba' le bizxaj tu'huöxaj ga na' tágubi'.

<sup>29</sup> Ní'irö Jesús gudxë'-nu, rnnë':

—Tu' gunnó' caní, huáca huöaju'. Chiburúaj bö' xihui' na' g uyú'u-bi' bi'i nigúlado' quiu'.

<sup>30</sup> Cate' budxinu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' g uyú'u lëbi'.

### *Jesús ruúnë' tu bönni' nacödzue', en biti' gaca innë'*

<sup>31</sup> Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. <sup>32</sup> Bönachi ni' dujuá'gaca tuë' bönni' nacödzue', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'. <sup>33</sup> Jesús bubéajë' lë' tsölá'alö ladjagaca bönachi na', ate' bunë'ë xibön në'ë yeru náguië' bönni' na'. Gurú'unë' zxöna'do', en gudanë' lúdxë'ë. <sup>34</sup> Ní'irö buyüë' lúzxibälö, en gunné lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

<sup>35</sup> La' böáljatë náguië', en la' bugúitjatë lúdxë'ë, en gunnëtë' dxí'ado'. <sup>36</sup> Jesús gunná bé'enë' légaquië' cuntu nu ilé' ca', pero tsca gunná bé'enë' légaquië', bulu'zëtë're' ca' didza' que lë na' benë'. <sup>37</sup> Bulu'bánninë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tu'i didza' nupa biti' guca ila'nnë'.

## 8

### *Rugahuë' Jesús zíanrö ca choá' gayuá' bönachi (Mt. 15:32-39)*

<sup>1</sup> Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. <sup>2</sup> Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacúa'len neda' ni, en biti' dë le ilágugaca. <sup>3</sup> Channö usöl-la'a léguequi lídxigaca ta'dunsö ca', huala'cuídi' la' nöza, tu' zá'gaca zí'tu' bál-lagaca.

<sup>4</sup> Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

<sup>5</sup> Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

<sup>6</sup> Ní'irö Jesús gunná bé'enë' bönachi zían na' ila'bö' lu yu. Gudélë'ë gadxi yöta xtila na', ate' gudxë' Dios: "Xclenu." Ní'irö buzzuxjë' léguequi, en bë'ë quégaquië' bönni' usëda queë' para ila'guísië' lógaca bönachi zían na'. <sup>7</sup> Guta' ca' quégaquië' tu chópaba' böla cuidi'. Jesús gudxë' Dios: "Xclenu", ate' gunná bé'enë' légaquië' ila'guísië' ca' légacaba' lógaca bönachi. <sup>8</sup> Gulagu yúgu'të bönachi na', en bulu'huöläj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. <sup>9</sup> Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, <sup>10</sup> ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

*Ta'nábinë' Jesús gunë' tu le gaca bë' nuzxi náquië'*  
(Mt. 16:1-4; Lc. 12:54-56)

<sup>11</sup> Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulé'ennë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. <sup>12</sup> Gunnëda' ládxi'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', biti' ca' ilé'eli' tu le naca bë' za' yehua' yubá.

<sup>13</sup> Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsölá'a nísado'.

*Le tu'sëdinë' bönni' yudo' naca ca cúa zi que yöta xtila*  
(Mt. 16:5-12)

<sup>14</sup> Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. <sup>15</sup> Ní'irö Jesús buzéajni'inë' légaquië', rnnë':

—Buli'yútsöca' queëli'. Guli'gún chi'i cuinli' para cabí sí'ili' le naca ca cúa zi que yöta xtila quegaquië' bönni' yudo' fariseo, en queë' Herodes.

<sup>16</sup> Gula'sí lógaquië' tu'ë didza' bönni' usëda queë' la' légasasë', ta'nnë':

—Gunnë' caní tu' cabí dë yöta xtila gáguru'.

<sup>17</sup> Réquibe'enë' Jesús le ta'nnë', ate' rë' légaquië':

—¿Bizx que ru'ili' caní didza' tu' cabí dë yöta xtila gáguru'? ¿Naru' cabí réajni'itseli', en biti' réquibe'itseli'? ¿Ni nácatsö zidi icja ládxi'do'oli'? <sup>18</sup> ¿Zóatsö guiöj loli', en biti' rilé'eli', en zóatsö guídi nágali', en biti' riyönili'? ¿Naru' cabí röjnétseli'? <sup>19</sup> Cate' ni' buzuxzja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

<sup>20</sup> Gunnë' ca' Jesús:

—Cate' ni' buzuxzja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

<sup>21</sup> Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sëdinë' bönni' na'?

*Jesús ruinë' bönni' Betsaida nachul-la lahuë'*

<sup>22</sup> Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'.

<sup>23</sup> Jesús gudélë'ë në'ë bönni' na' nachul-la lahuë', ate' guchë'ë lë' ní'ilo ra' yödzö. Ní' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

<sup>24</sup> Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

<sup>25</sup> Leyúbölö guxóa në'ë Jesús guiöj lahuë', ate' buyúdë'ë bönni' na' nachul-la lahuë', ate' böacaté dxí'ado' guiöj lahuë'. Na'a rilé'enë' dxí'ado' yúgu'të. <sup>26</sup> Ní'irö Jesús gusöl-lë'ë lë' lidxë', rnnë':

—Biti' tsöjdo' lahui' yödzö, en cuntu nu guío' le bena' nu zoa lu yödzö ni.

*Rnnë' Pedro: "Jesús náquië' Cristo"*

(Mt. 16:13-20; Lc. 9:18-21)

<sup>27</sup> Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

<sup>28</sup> Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

<sup>29</sup> Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

<sup>30</sup> Ní'irö Jesús gunná bé'enë' légaquië' cuntú nu ulu'siyönnë' Nu náquië'.

*Rigúxjö'ë Jesús ca si' ilútië' Lë'*

*(Mt. 16:21-28; Lc. 9:22-27)*

<sup>31</sup> Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sëdinë' ulu'zóë' neda' tsölá'alö. Ilútië' neda', pero cate' gaca tsonna dza ubana'.

<sup>32</sup> Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. <sup>33</sup> Buécjë' Jesús, en buyúë' ia'zícá'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' lãdxu'u biti' za' lu në'ë Dios, pero ca ta'zá' lãdxi'gaca bönachi naca.

<sup>34</sup> Ní'irö Jesús bulidzë' yugu' bönni' usëda queë', enca' bönachi nacuá' ni', en gudxë' légaquië':

—Channö rë'enë' nu bönni' të'ë neda', ral-la' uzóë' tsölá'alö le rë'ëni quëzinë', en gáquië' ca tu bönni' sa'yéajë' sôjtë'ë lë'e yaga cruz, ate' ní'irö huáca të'ë neda'. <sup>35</sup> Nu bönni' ruí'ida' lãdxë'ë yöl-la' na'bán queë', unítie' le, pero nu bönni' unítie' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. <sup>36</sup> ¿Naru' uzí'tsë' xibé tu bönni' channö utubë' yúgu'të le dë' yödzölió ni, pero uniti cuinë'? <sup>37</sup> Biti' bi gaca unödzejë' tu bönni' le huóá'ui cuinë'. <sup>38</sup> Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxon queë' Xuza', ate' dzágagaquië' gubáz lá'ayí neda'.

## 9

<sup>1</sup> Jesús gudxë' ca' légaquië', rnnë':

—Le nácatë rea' libí'ili', nacuá' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxon queë'.

*Ridzá'a ca riná' lahuë' Jesús*

*(Mt. 17:1-13; Lc. 9:28-36)*

<sup>2</sup> Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu guí'a sibi. Ni' bidzá'a ca riná' lahuë' Jesús lógaquië' yonnë' na'. <sup>3</sup> Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'. <sup>4</sup> Bulu'luí'i lógaquië' Elías, en Moisés, tu'ílenë' Jesús didza'. <sup>5</sup> Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

<sup>6</sup> Caní gunné' Pedro tu' cabí nözinë' bi na' rnnë', tu' tádxinë' bönni' usëda queë' Jesús na'. <sup>7</sup> Ní'irö gurö'ö böaj le gulú'u zzul-la légaquië', ate' biyön chi'i nu ruí'ida' lu böaj na', rna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

<sup>8</sup> La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

<sup>9</sup> Tsanni ni' yú'ugaquië' nöza, tu'dínnië' lu guí'a sibi na', Jesús gunná bé'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. <sup>10</sup> Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunnë' ubanë' lu yöl-la' guti. <sup>11</sup> Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

<sup>12</sup> Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquë'ë Bönni' Guljë' Bönachi, ate' cá'asö ulu'cá'ana bönachi Lë'? <sup>13</sup> Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

*Jesús ruünë'-bi' bi'i bönni' yu'u lëbi' bö' xihui'*

(Mt. 17:14-21; Lc. 9:37-43)

<sup>14</sup> Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacua' bönachi zían ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'. <sup>15</sup> Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijödxi gaca Lë': "Padiux."

<sup>16</sup> Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

<sup>17</sup> Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'. <sup>18</sup> Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

<sup>19</sup> Bubi'ë didza' Jesús, rnnë':

—Libí'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

<sup>20</sup> Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. <sup>21</sup> Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ní' nácatëbi' bí'ido' ré'ebi' caní. <sup>22</sup> Zían luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

<sup>23</sup> Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

<sup>24</sup> La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

<sup>25</sup> Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bí'ti'rö tsu'u lëbi'.

<sup>26</sup> Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, guluí' didza' bönachi zían ni', ta'nná:

—Chinátibi'.

<sup>27</sup> Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

<sup>28</sup> Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

<sup>29</sup> Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

*Jesús riguúxjö'ë leyúbölö ca si' ilútië' Lë'*  
(Mt. 17:22-23; Lc. 9:43-45)

<sup>30</sup> Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesús nu inözi ga na' zoë' <sup>31</sup> tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

<sup>32</sup> Biti' gula'yéajni'inë' didza' ni rë' légaquië', ate' tu' tádxinë', bití' bi gula'nábinë' Lë'.

*Nu naca lo*  
(Mt. 18:1-5; Lc. 9:46-48)

<sup>33</sup> Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

<sup>34</sup> Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. <sup>35</sup> Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

<sup>36</sup> Ní'irö Jesús gudélé'ë-bi' tubi' bí'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':

<sup>37</sup> —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasól-lë'ë neda'.

*Nu bití' ridá'baga' rë'u, rácalen rë'u*  
(Mt. 10:42; Lc. 9:49-50)

<sup>38</sup> Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bití'rö gunë' ca', tu' cabí dë'ë rë'u.

<sup>39</sup> Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' innë' zí'ë quia'. <sup>40</sup> Caní naca, nu bití' ridá'baga' rë'u, rácalen nu na' rë'u. <sup>41</sup> Núti'tës nu gunna queëli' tu zxíga'do' nisa guí'jali' tu' dá'ali' neda', Cristo, si' i caz nu na' le ral-la' gata' que.

*Zoa bönadxi queëru' gunru' ga nu gun dul-la'*  
(Mt. 18:6-9; Lc. 17:1-2)

<sup>42</sup> Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. <sup>43</sup> Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guí' gabíla, ga ni' bití' ulu guí' que. <sup>44</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. <sup>45</sup> Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guí' gabíla, ga ni' bití' ulu guí' que. <sup>46</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. <sup>47</sup> Lësca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bë'ë Dios zoa tuz guiöj lo', calëga zoa chopá guiöj lo', ate' tsöjtsáziu' lu guí' gabíla. <sup>48</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

<sup>49</sup> Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huóca dxi'a yúgu'të bönachi. Lësca' caní, rë'ënë' Dios izxí'i zödi' yúgu'të böa' bëdxido'



tu'zégui'gaquië'-ba' lu bucugu lá'ayi queë'. <sup>50</sup> Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxi'ado' tuli' len ia'tuli'.

## 10

*Rusëdinë' Jesús que nu rulá' yöl-la' nutsaga na'*  
(Mt. 19:1-12; Lc. 16:18)

<sup>1</sup> Buzë'ë Jesús yödzo Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. <sup>2</sup> Ní'irö bila'dxinë' bönni' yudo' fariseo ga zoë' Jesús, ate' tē'ennë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga nē'ë usanë'-nu nigula queë'?

<sup>3</sup> Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

<sup>4</sup> Gula'nnë':

—Moisés bë'ë lataj nu bönni' uzúajë' lu guichi le rnna rulá'alënë'-nu nigula queë' na', ate' ní'irö usanë'-nu.

<sup>5</sup> Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli', <sup>6</sup> pero cate' gusí lo rata' yödzölió, Dios benë' légaquië' bönni', en nigula. <sup>7</sup> Gunnë': “Que lë ni na' ucá'anë' bönni' xuz xinë'ë, en tsöjsóalënë'-nu nigula queë', <sup>8</sup> ate' chopë' ni ulu'huóáquië' ca tuz bönachi.” Que lë ni na' bí'ti'rö nácaquië' chopë' pero tuz chinácagaquië'. <sup>9</sup> Que lë ni na' ca', nu naca bönachi biti' ral-la' ulá'a nupa na' chinutságuië' Dios.

<sup>10</sup> Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. <sup>11</sup> Jesús gudxë' légaquië':

—Núti'tës bönni' ulá'alënë'-nu nigula queë', en utsaga ná'alënë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalënë'-nu zí'alö. <sup>12</sup> Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

*Jesús rulidza tsáhuë'ë-bi' yugu' bí'ido'*  
(Mt. 19:13-15; Lc. 18:15-17)

<sup>13</sup> Ní'irö bila'dxín bönachi ga zoë' Jesús dujuá'gaquië' bí'ido' quéguequi. Të'ëni ixóa nē'ë légacabi', ate' gula'sí lógaquië' bönni' usëda queë' Jesús ta'dil-la' dídza'gaquië' nupa na' dujuá'agaca légacabi'. <sup>14</sup> Cate' bilé'enë' Jesús lë ni, gulënë' légaquië', en gunné':

—Guli'güi'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa náca'gaca ca bí'ido' ni, lataj ga rinná bë'ë Dios. <sup>15</sup> Le nácatë rea' libí'ili': Nu cabí si' lu nē'ë le rinná bë'ë Dios ca runbí' tu bí'ido', biti' ca' tsaza ga ni' rinná bë'ë.

<sup>16</sup> Ní'irö Jesús bunidë'-bi' yugu' bí'ido' na'. Guxóa nē'ë légacabi', en bulidza tsáhuë'ë-bi'.

*Bönni' cuidi' napë' yöl-la' tsahui'*  
(Mt. 19:16-30; Lc. 18:18-30)

<sup>17</sup> Cate' bu'ë Jesús nöza, carelö bidë' tu bönni', en buzóa zxi'bë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

<sup>18</sup> Jesús gudxë' lë':

—¿Bizx que ru'u neda' didza', rnno': “Idú dxi'a”? Cuntu nu bönni' náquië' idú dxi'a. Tuzë' Dios náquië' idú dxi'a. <sup>19</sup> Chinöz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácatë.

Biti' ucáchi'lanu'.  
Ben bal xuz xinó'o.

<sup>20</sup> Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

<sup>21</sup> Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

<sup>22</sup> Cate' biyönnë' didza' ni, buí'innë', ate' söhuöjë' risëbi ládxe'ë tu' dëda' yöl-la' tsahui' queë'.

<sup>23</sup> Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

<sup>24</sup> Bulu'báinë' bönni' usëda queë' ca naca xtídzë'ë, ate' leyúbölö Jesús gudxë' légaquië':  
—Libi'ili', xzí'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná bë'ë Dios. <sup>25</sup> Nácáro böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

<sup>26</sup> Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

<sup>27</sup> Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

<sup>28</sup> Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

<sup>29</sup> Bubi'ë didza' Jesús, rnnë':

—Le nácate' rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyúë', tu' runë' xichina' o tu' runë' libán que didza' dxi'a quia', <sup>30</sup> bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyúë', enca' yugu' le ila'bía ládxi'gaca bönachi lë', ate' lu yödzölió si' za', gata' yöl-la' na'bán idú queë'. <sup>31</sup> Zían nupa nácagaca lo na'a, ilaca cuídi'sö ni', ate' nupa nácagaca cuídi'sö na'a, ilaca lo ni'.

### *Leyúbölö riguíxjö'ë Jesús ca si' ilútië' Lë'*

*(Mt. 20:17-19; Lc. 18:31-34)*

<sup>32</sup> Cate' ni' yú'ugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'.

<sup>33</sup> Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zì'tu'. <sup>34</sup> Bönni' na' ulu'titjë' neda', en ilúndë'ë neda' zì. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

### *Jacobo en Juan ta'nábinë' Jesús bi gunë' quégaquië'*

*(Mt. 20:20-28)*

<sup>35</sup> Ní'irö gula'biguë'ë Jacobo, en Juan, xzí'inë' Zebedeo, lahuë' Jesús, en të' Lë':

—Bönni' Usedi, ré'ënitú' gunu' queëtu' le inábatu'.

<sup>36</sup> Jesús gudxë' légaquië':

—¿Bizxi ré'ënili' guna' queëli'?

<sup>37</sup> Gulë' Lë':

—Cate' idxín dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

<sup>38</sup> Ní'irö Jesús gudxë' légaquië':

—Biti' nözili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

<sup>39</sup> Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, <sup>40</sup> pero bití' dë lu na'a cõa' nu cuía cuita' ibëla, en nu cuía cuita' yögöla. Dios unödzejë' quégaquië' bönni' chinupë'ë quégaquië' yugu' lataj na'.

<sup>41</sup> Cate' bila'yönnë' ia'chië' bönni' usëda queë' Jesús didza' ni, gula'lenë' Jacobo, en Juan na'. <sup>42</sup> Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácatë lo ladjagaquië' ta'nná be'e luzë'eguequi. <sup>43</sup> Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zica'röli', <sup>44</sup> ate' núti'tëslöli' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. <sup>45</sup> Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichingaca bönachi, en udöda' yöl-la' na'bán quia' le huöá'uida' bönachi zián.

*Jesús ruúnë' Bartimeo, bönni' lo chul-la*

(Mt. 20:29-34; Lc. 18:35-43)

<sup>46</sup> Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' ruruje' Jesús yödzö ni, dzágagaquië' Lë' yugu' bönni' usëda queë', enca' bönachi zián. Ra' nöza ni' rö'ë tu bönni' nachul-la lahuë', lë' Bartimeo, zxí'inë' Timeo. Rinabë' nu bi gúnna'sö queë'. <sup>47</sup> Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, zxí'ini xi'sóë' David! ¡Buéchi' ladxi' neda'!

<sup>48</sup> Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zidzajrö bulidzë', rnnë':

—¡Zxí'ini xi'sóë' David! ¡Buéchi' ladxi' neda'!

<sup>49</sup> Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ladxu'u! ¡Guyaschi! ¡Rulidzë' li'!

<sup>50</sup> Ní'irö gurú'unë' tsölá'alö lari' naxóa yenë'. La' guyásatë', en bidë' ga na' zoë' Jesús. <sup>51</sup> Jesús gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huöálaj guiöj lahua'.

<sup>52</sup> Jesús gudxë' lë':

—Böaj lidxu'. Chinuhuöácu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

## 11

*Riyazië' Jesús yödzö Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' naca' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusól-lë'ë chopë' bönni' usëda queë', <sup>2</sup> en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lëba'. Guli'sedxi-ba', en guli'ché'-ba' quia' ni. <sup>3</sup> Channö nu

bi guié libí'ili' tu' runli' lë ni, guli'guié nu na': "Xanru' riquinnë'-ba', ate' la' usöl-la'të'-ba' quiu'."

<sup>4</sup> Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. <sup>5</sup> Nupa nacuá' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

<sup>6</sup> Bulu'bi'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. <sup>7</sup> Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. <sup>8</sup> Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

<sup>9</sup> Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nne':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'! <sup>10</sup> ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

<sup>11</sup> Caní guca, bidxinë' Jesús Jerusalén, ate' guyázië' lö'a yudo'. Cate' budxi buyúë' yúgu'të le nacuá' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

### *Jesús rulidza zi'ë tu yaga higo*

*(Mt. 21:18-19)*

<sup>12</sup> Cate' za' rení ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús. <sup>13</sup> Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxía tu' cabí ridxini dza cuía. <sup>14</sup> Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

### *Jesús rulatjë' lö'a yudo'*

*(Mt. 21:12-17; Lc. 19:45-48; Jn. 2:13-22)*

<sup>15</sup> Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusílahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dödo'. <sup>16</sup> Biti' ca' bë'ë lataj nu bi guá', uzóa nöza ga naca lö'a yudo'. <sup>17</sup> Busëdinë' nupa nacuá' ni', rnnë':

—Nazúaj lu guichi lá'ayi, rna: "Lidxa' si'i le, yu'u ga bönachi idütë yödzölió ulu'lidza Dios." Libí'ili' chinunli' le ca naca lídxigaca gubán.

<sup>18</sup> Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, biti' bi gulunë' queë', tu' tu'bani yúgu'të bönachi ca naca le rusëdinë' Jesús. <sup>19</sup> Cate' chiridzö' burúajë' Jesús lu yödzö na'.

### *Ribidxi yaga bulidza zi'ë Jesús*

*(Mt. 21:20-22)*

<sup>20</sup> Cate' za' rení ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. <sup>21</sup> Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

<sup>22</sup> Bubi'ë didza' Jesús, rë' légaquië':

—Guli'tseajlë' Dios. <sup>23</sup> Le nácatë rea' libí'ili', channö nu bönni' guié' guí'ado' ni: "Gucuíta ni, yöjsóa lu nísado'", en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. <sup>24</sup> Que lë ni na' rea' libí'ili': Yúgu'të le inábali' cate' ulídzali'në' Dios, guli'tseajlë' chibennë' Dios queëli' lë na' rinábali', ate' gunnë' queëli'. <sup>25</sup> Cate' ni'

rulídzali'-nē' Dios, channö zoa nu rileli' nu bi ben queēli', buli'niti lo nu na', para uniti lahuē' ca' libí'ili' Xúzili' na' zoē' yehua' yubá ca naca dul-la' nabága'li'. <sup>26</sup> Channö cabí uniti loli' bönachi, bití' uniti lahuē' Xúzili' zoē' yehua' yubá libí'ili' dul-la' nabága'li'.

*Yöl-la' unná bē' dē lu nē'ē Jesús*

*(Mt. 21:23-27; Lc. 20:1-8)*

<sup>27</sup> Ní'irö Jesús, en yugu' bönni' dá'gaquiē' Lē' yöjhuöjgaquiē' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bönni' yudo' usedi, en bönni' gula tu'zéajni'inē', ga zoē'. <sup>28</sup> Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

<sup>29</sup> Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni. <sup>30</sup> ¿Nuzxi budödi lu nē'ē Juan uquilē' bönachi nisa? ¿Naru' Dios o bönachi? Guli'nnátsöca'.

<sup>31</sup> Gula'sí lógaquiē' tun xtídzagaquiē' la' légacasē', ta'nnē':

—Channö innaru' Dios gusöl-lē'ē lē', guiē' rē'u: “¿Bizx que bití' guyéajlē'ēli' lē'?” <sup>32</sup> ¿Naru' guiétsaru'-nē': Gula'söl-lē'ē bönni' lē'?

Caní ta'zá' lādxi'gaquiē' tu' tádxinē' le ilún bönachi zían nacua' ni' tu' téquiguequi yúgu'tē bönachi na' bē'ē didza' Juan na' uláz queē' Dios. <sup>33</sup> Que lē ni na' gulé' Jesús:

—Bití' nōztu'.

Ní'irö Jesús gudxē' légaquiē':

—Neda' ca' bití' quíxjōi'ida' libí'ili' bi yöl-la' unná bē' dē lu na'a rúnida' yugu' lē ni.

## 12

*Rucúdzu'ē didza' Jesús ca gaca quégaca huen dxin bití' nácagaca tsahui'*

*(Mt. 21:33-46; Lc. 20:9-19)*

<sup>1</sup> Ní'irö gusí lahuē' Jesús ruí'ilenē' yugu' bönni' dá'gaquiē' Lē' didza' yugu' le rucúdzu'ē didza', rnnē':

—Guzóē' tu bönni', budē'ē lubá uva zían ga naca lu xiyúē'. Guléquiē' lē'a que, en guchō'önē' tu röga' guiöj ga isiē' xisi uva na'. Budxiē' tu yu'u gupa ga naca xitsá' ga nu uyú xiyúē' na'.

'Ní'irö budödē' xiyúē' na' lu ná'agaquiē' huen dxin, ila'zi'ē gatsaj huéaj le unödzej, ate' guyijē' yödzö zi'tu'. <sup>2</sup> Cate' bidxín dza ulu'chibē' le ribía, gusöl-lē'ē-bi' bi'i huen dxin tsöjxí'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'.

<sup>3</sup> Ní'irö yugu' huen dxin na' gula'guélé'ē-bi' bi'i na', en gulundē'-bi' zi', ate' bulu'söl-lē'ē-bi' cá'asöbi'. <sup>4</sup> Ní'irö bönni' xan luyú na' gusöl-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guiöj. Bulu'lē'ē ícjabi'. Gulu'ē dö' queēbi'. <sup>5</sup> Ní'irö bönni' xan luyú na' gusöl-lē'ē-bi' ca' ia'tubi' bi'i huen dxin queē', ate' bi'i ni gulútiē'-bi'. Gusöl-lē'ē-bi' ca' zíanröbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

<sup>6</sup> Cúnturö nu nagá'ana queē' xan luyú na'. Nagá'anasibi' zxi'inē', ate' nadxí'ide'enē'-bi'. Ga yöjsetē, gusöl-lē'ē-bi' zxi'inē', rnnē': “Ilunē' bal zxi'ina'.” <sup>7</sup> Ní'irö yugu' bönni' huen dxin na' gula'nnē' la' légacasē', ta'nnē': “Bi'i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni.” <sup>8</sup> Que lē ni na' gula'zönē'-bi', en gulútiē'-bi'. Gula'ru'unē'-bi' ní'ilö ga dá'gaca lubá uva na'.

<sup>9</sup> Ní'irö Jesús gunábinē' bönni' nacu'ē ni', rnnē':

—¿Nacxi gunē' bönni' xan luyú na', channö? Huidē', en gútigaquiē' bönni' huen dxin na', ate' udödē' luyú na' lu ná'agaquiē' bönni' yúbölö.

<sup>10</sup> ¿Naru' cabí nulábanili' lē na' nazúaj lu guichi lá'ayi? Caní rnna: Guiöj na' gula'ru'unē' bönni' tu'cu'ē zö'ö, na'a naca guiöj len, squin zö'ö.

<sup>11</sup> Xanru' Dios benē' ga naca caní ate' rubániru' ca naca lē ni rilé'eru'.

<sup>12</sup> Ní'irö ta'zóa ta'bö'ë ila'zönë' Jesús tu'téquite' enë' bucúdzu'ë didza' ca naca quégaquië', pero tádxinë' le ilún bönachi zían nacua' ni', en que lë ni na' bulu'cá'anë' Lë', söhuöjgaquië'.

*Ca naca le ta'guíxaj lázagaca bönachi*

(Mt. 22:15-22; Lc. 20:20-26)

<sup>13</sup> Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. <sup>14</sup> Bila'dxinë' bönni' ni ga na' zoë' Jesús, en tē' Lë':

—Bönni' Usedi, nözitu' ru'u didza' idütë' li. Biti' ru'i ládxi'u bi ta'nnasö bönachi, tu' cabí ruyusu' le tu'lú'isö cuínguequi bönachi, pero rusédinu' ca nácatë' le rë'enë' Dios ilún bönachi. ¿Ru'i netu' lataj xibá queë' Moisés quíxaj laztu' le tu'quíxjē' uláz queë' César? ¿Naru' uguíxajtu' o bití' quíxajtu'?

<sup>15</sup> Réquite' enë' Jesús tu'ë didza' lu yöl-la' riguílaj ladxí' quégaquië', ate' rë' légaquië':

—¿Bíx que rubéajli' neda' didza'? Guli'diguá'tsöca' tu dumí ridá para ilé'eda' le.

<sup>16</sup> Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

<sup>17</sup> Ní'irö Jesús gudxë' légaquië', rnnë':

—Buli'nödzaj queë' César le nequi queë' César, ate' queë' Dios le nequi queë' Dios.

Bulu'bánninë' ca naca didza' bubí'ë Jesús.

*Ca naca que yöl-la' rubán lu yöl-la' guti*

(Mt. 22:23-33; Lc. 20:27-40)

<sup>18</sup> Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulë' Jesús, ta'nnë':

<sup>19</sup> —Bönni' Usedi, Moisés nuzúajë' queëru' lu guichi channö gátíë' tu bönni' bití' zoa bi'i queë', ate' ugá'ananu nigula queë', bi'i böchë'ë bönni' na' ral-la' utsaga ná'alenbi'-nu, en uzóabi' bí'ido' gácabi' bi'i queëbi' böchi'bi'. <sup>20</sup> Gula'cuá'abi' gádxibi' bi'i nácagacabi' böchi'gacabi'. Bi'i huáca na' butsga ná'alenbi'-nu nigula, ate' gútibi', cuntu nu zoa bí'ido' queëbi'. <sup>21</sup> Bi'i buropi na' butsga ná'alenbi'-nu nigula uzëbi na', ate' gútibi' ca', cuntu nu zoa bí'ido' queëbi'. Lësca' caní guca queëbi' bi'i bunny. <sup>22</sup> Caní guca, bulu'tsaga ná'alenbi'-nu yúgu'tëbi', cuntu nu zoa bí'ido' quégacabi'. Ga yöjsetë, gútinu ca' nigula na'. <sup>23</sup> Na'a, cate' ulu'bán nupa chinátigaca, ¿núxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

<sup>24</sup> Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en bití' nözili' ca naca yöl-la' huáca queë' Dios. <sup>25</sup> Cate' ulu'bán nupa chinátigaca, bití' ca' ulu'tsaga ná'agaquië', ate' yugu' bönni' bití' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacué yehua' yubá. <sup>26</sup> Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ru'i didza' ca na' bulidzë' Dios lë' lu yaga yötsi'do' régui. Gudxë' lë': “Neda' naca' Dios queë' Abraham, en Dios queë' Isaac, en Dios queë' Jacob.” Tu' gunné' caní quégaquië', naca bë' nabánagaquië' sal-la' gulátië' zí'alö. <sup>27</sup> Dios náquië' Dios quégaca nupa nabángaca, calëga quégaca nupa nátigaca tsaz. Richíxitë'röli'.

*Le naca lo le gunná bë'ë Dios*

(Mt. 22:34-40)

<sup>28</sup> Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bíxilö le gunná bë'ë Dios nácatë'rö lo ca yúgu'të le gunná bë'ë?

<sup>29</sup> Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rnna: “Guli'yöni bönachi Israel. Xanru' Dios, tuzë' Lë' náquië' Xanru'. <sup>30</sup> Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'.” Lë ni naca le gunná bë'ë le nácatërö lo. <sup>31</sup> Le gunná bë'ë le naca buropi, lëbisö ca naca. Caní rnna: “Ral-la' idxí'inu' luzó'o ca nadxí'i cuinu'.” Biti' ca' zoa ia'tú le gunná bë'ë le nácarö lo ca chopa ni gunná bë'ë.

<sup>32</sup> Ní'irö bönni' yudo' usedi na' gudxë' Jesús, rnnë':

—Dxi'ado' gunnó', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios. <sup>33</sup> Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bédxido' rútigacaru'-ba' lu bucugu lá'ayi queë' Dios, enca' ca yúgu'të böa' bédxido' ruzégui'gacaru'-ba' lu bucugu na'.

<sup>34</sup> Cate' biyönnë' Jesús dxi'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

*¿Nuzxi zxi'ini náquië' Cristo?*

*(Mt. 22:41-46; Lc. 20:41-44)*

<sup>35</sup> Cate' ni' rusëdinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxi'ini xi'sóë' David? <sup>36</sup> Lë cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

“Gurö'ö cuita lë'a ibëla

cate' gunra' ga ulu'zóa zxi'bigaca lo'

nupa bití' ta'lé'e Li' dxi'a.”

<sup>37</sup> ¿Naru' nácatsë' Cristo zxi'ini xi'sóë' David channö lë cazë' David na' rnnë' queë' náquië' Xanë'?

Bönachi zián nacua' ni' tu'zë' nágagaca Lë' gula'yaza ládxi'gaca didza' ni.

*Jesús ruzégui'ë didza' bönni' yudo' tu'sëdinë'*

*(Mt. 23:1-36; Lc. 11:37-54; 20:45-47)*

<sup>38</sup> Ni' rusëdinë' Jesús yugu' bönni' dá'gaquië' Lë', rë' légaquië':

—Guli'gún chi'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácuagaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi. <sup>39</sup> Ta'bö'ë yugu' lataj lo lu yu'u ga tu'dübë' tu'sëdë' queë' Dios, enca' gapa tu'dübë' t'aj tahuë'. <sup>40</sup> Rugúagaquië' lídxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

*Le bunödzjanu tu nigula uzëbido' queë' Dios*

*(Lc. 21:1-4)*

<sup>41</sup> Tsanni ni' rö'ë Jesús chila yudo' ga zoa guí'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu guí'ina. Dumí zián ta'gu'ë bönni' dë yöl-la' tsahui' quégaquië'. <sup>42</sup> Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os. <sup>43</sup> Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu guí'ina que yudo'. <sup>44</sup> Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

## 13

*Riguíxjö'ë Jesús ca si' ulu'quínnajë' yudo'*

(Mt. 24:1-2; Lc. 21:5-6)

<sup>1</sup> Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

<sup>2</sup> Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzé'e ni, tu' ulu'quínnaj bönnachi léguequi.

*Le ilaca bë' cate' si' údxi que yödzölió*

(Mt. 24:3-28; Lc. 21:7-24; 17:22-24)

<sup>3</sup> Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

<sup>4</sup> —Gudíxjö'i netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

<sup>5</sup> Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'. <sup>6</sup> Ila'lá' lahuë' zían bönni' si' légaquië' ca lea' neda', ila'nnë' nácagaquië' Cristo. Caní ila'zí' yé'enë' bönnachi zían.

<sup>7</sup> Ní'irö cate' yönili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. <sup>8</sup> Tu yödzö tíl-lalen ia'tú yödzö, en tu ga nu rinná bë' tsöjtíl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönnachi. Yugu' lë ni ilaca le isí lo ila'guí'i ila'zaca' bönnachi dza ni'.

<sup>9</sup> Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dübë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzö zi'tu'. Ilunë' caní queë'li' tu' dá'ali' neda', pero gunli' ba nalí quia' neda' ni'. <sup>10</sup> Zí'alö ca idxín dza údxi, run bayudxi gaca libán que didza' dxi'a quia' lógaca bönnachi idútë yödzölió. <sup>11</sup> Cate' ni' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'i ládxi'li' bizxi innali'. La' dza ní'isö Dios gunnë' queë'li' didza' gü'ili', ate' lë ni innali'. Cate' ni' gü'ili' didza', calëga libí'isili' na' innali', pero Dios Bö' Lá'ayi innë'. <sup>12</sup> Ulu'dödi bönnachi la' böchi'gacasö lu ná'agaquië' bönni' ilútië' légaquië'. Yugu' bönni' nacué'abi' bi'i quégaquië' ulu'dödë' la' zxi'inigaca cazë' ca', ate' zxi'inigaquië' na' ulu'dödë'bi' la' xuz xiná'agaca cázabi' lu ná'agaquië' bönni' ilútië' légaquië'. <sup>13</sup> Yúgu'të bönnachi ulu'zóa libí'ili' tsólá'alö tu' dá'ali' neda', pero nülöli' guá' ilenli' lë na' ga idxinrö dza údxi, uláli'.

<sup>14</sup> Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rna caní: “Tsaz tu le xihui' le rucá'ana cané ga naca la'ayi.” Dza ní'irö ral-la' ila'zxunnaj nupa nacué' luyú Judea, en tsöjaca gapa naca lu guí'ado'.

<sup>15</sup> Nu zoa ícjo'olö dza ni' ral-la' izxúnnajtë, en biti' huötaj znan yu'u para tsöjzxi' bi dë que lu yu'u. <sup>16</sup> Nu zoa la' guixi' ral-la' izxúnnajtë, en biti' huöaj tsöjzxi' lari' rixóa yeni. <sup>17</sup> Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxinu-bi' bí'ido'.

<sup>18</sup> Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. <sup>19</sup> Yugu' dza ni' ila'guí'i ila'zaca'rö bönnachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca biti' gaca caní. <sup>20</sup> La'tu' cabí nunë' Dios ga ulu'huóaca nabábasö yugu' dza ni', cunt nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

<sup>21</sup> Na'a, channö nu guíë libí'ili': “Buli'yútsöca', ni zoë' Cristo”, o inná: “Buli'yútsöca', ni zoë'”, biti' ca' tséajlë'ëli' nu na'. <sup>22</sup> Ila'lá' lahuë' zían bönni' ila'zí' yé'enë' bönnachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'lu'inë' le ilaca bë', en ilunë' yugu' yöl-la' huáca zxön. Huala'zí' yé'enë' ca' nupa gurö cazë' Dios



channö ila'zéqui'nè'. <sup>23</sup> Ní'irö libí'ili', guli'sóa ban ladxi'. Yúgu'tè chigudxa' libí'ili' zí'atèlò ca gaca.

*Ca huödè' Bönni' Guljè' Bönachi*  
(Mt. 24:29-35, 42-44; Lc. 21:25-36)

<sup>24</sup> Gunnè' ca' Jesús:

—Yugu' dza ni', tōdi gaca dza na' ila'guí'i ila'zaca' caní bönachi, ichul-la gubidza, en bití' cu'u bení' beo'. <sup>25</sup> Ila'guínnaj bölej lúzxiba, en ila'zxizi le nál-lagaca nalá'gaca lúzxiba na'. <sup>26</sup> Ní'irö ila'lé'eni neda', Bönni' Guljè' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. <sup>27</sup> Isöl-la'gaca'-nè' gubáz lá'ayi quia', ate' ulu'tubè' bönachi gurö caza' quia' nacuá' idapa la'a yōdzölió, ga naguéla'tè luyú bidxi, ga ridxintè ga naguela' lúzxiba.

<sup>28</sup> 'Guli'tséajni'i le rusedi yaga higo ni'. Cate' ta'lén ni'a nè'e hué'énido', en rubía xilagui' yulu, nözili' chizóa idxín beo' cusubá. <sup>29</sup> Lësca' caní, cate' ilé'eli' taca lè ni, inözili' chizóa idxín dza údxi na', en chiridzaga lo. <sup>30</sup> Le nácatè rea' libí'ili', yúgu'tè lè ni ilaca zí'atèlò ca ilátigaca nupa nacuá' dza na'. <sup>31</sup> Huadödi que lúzxiba, en que luyú ni, pero xtídza'a catu caz tōdi que.

<sup>32</sup> 'Cate' idxín dza ni' o rëla ni', cuntu nu nözi. Bití' nözguequinè' gubáz lá'ayi nacu'è yehua' yubá, en bití' nözda' neda', Zxí'inè' Dios. Tuzè' Dios Xuz nözinè'. <sup>33</sup> Que lè ni na', bulí'subán lādxi'li'. Guli'sóa sina', en bulí'lidzè' Dios tu' cabí nözili' bizxi dza gaca lè ni. <sup>34</sup> Gaca ca raca cate' sa'yéajè' zi'tu' tu bönni'. Cate' chizóa uzè'è lidxè', udödè' lu ná'agaquiè' huen dxin queè' yugu' le dè queè'. Que queégaquiè' gu'è xichíngaquiè', en inná bē'è soa ban ladxi' nu zoa huen chí'i ga nu riyaza. <sup>35</sup> Guli'sóa libí'ili' ban ladxi' tu' cabí nözili' bátaxi huödè' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. <sup>36</sup> Guli'gún caní, para cabí idixáquiè' libí'ili' rásili' channö huödè' tsárido'os. <sup>37</sup> Lè ni rea' libí'ili', rea' ca' yúgu'tè bönachi: Guli'sóa ban ladxi'.

## 14

*Tun xtídza'gaquiè' bönni' yudo' ila'zönè' Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup> Ia'chopa dza ca' gaca Laní Pascua cate' tu'subanè' bönni' judío ca benè' Dios, bubéajè' xuz xtó'ogaquiè' luyú Egipto. Naca laní cate' tahuè' yōta xtila bití' nazí' cúa zi que. Ta'zóa ta'bō'è yugu' bixúz unná bē', en bönni' yudo' tu'sédinè' ila'zönè' Jesús bagáchi'sō para ilútiè' Lè'. <sup>2</sup> Ta'nnè':

—Bití' gaca sönru'-nè' dza laní tu' ila'tsatsa bönachi.

*Nigula rigú'unu le rilá' zxixi icjè' Jesús*  
(Mt. 26:6-13; Jn. 12:1-8)

<sup>3</sup> Zoè' Jesús yōdzö Betania, lu yu'u lidxè' Simón, bönni' gü'ínè' huè' nudzu' ruzödi. Tsanni ni' rō'è rahuè' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yōj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjè' Jesús. <sup>4</sup> Gula'lélanè' bal-lè' bönni' nacu'è ni'. Ta'nnè' la' légacasè':

—¿Bizx que guca ditaj le zxixi na'? <sup>5</sup> La'tu' nu guti' lè na', huazí' que ia'lati' ca lāzxjaru' que tu iz para nu quisi le quégaca bönachi yechi'.

Gula'nnédè'è queènu.

<sup>6</sup> Ní'irö Jesús bē'è didza', rnnè':

—Guli'güí'i-nu lataj. ¿Bizx que rinnè' zí'ili' queènu? Naca dxi'a le bennu quia'.

<sup>7</sup> Nacuá'lentica'sō bönachi yechi' libí'ili', en bátati'tès gué'énili', huáca gunli' dxi'a quégaquiè', pero neda' bití' sóatica'sa' ga zóali'. <sup>8</sup> Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atèlò ca igácha'a yeru ba. <sup>9</sup> Le

nácatë rea' libí'ili', gáti'tës ga gaca libán que didza' dxi'a quia' idú yödzülió, soa nu quixjò' ca' lë ni bennu nigula ni quia'. Caní gaca para nu tsöjné lënu.

*Rizí' lu në'ë Judas udödë' Jesús*

(Mt. 26:14-16; Lc. 22:3-6)

<sup>10</sup> Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. <sup>11</sup> Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

*Le rë'aj ráguru' rusubanru' ca gútië' Xanru'*

(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Naca dza risí lo laní cate' tahuë' yöta xtila bití nazí'í cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu tséajtu' tsöjpá'atu' le gáguru' xtsö' que Laní Pascua?

<sup>13</sup> Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzü. Ni' huadzágali' tu bönni' nu'ë tu rö'ö nisa. Guli'tséajlenë'. <sup>14</sup> Ga na' tsázië', guli'guíë' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?” <sup>15</sup> Ní'irö ulu'ínë' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

<sup>16</sup> Bila'rúajë' bönni' usëda queë' na', en bila'dxinë' lu yödzü, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

<sup>17</sup> Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'.

<sup>18</sup> Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

<sup>19</sup> Ní'irö bulu'huí'innë', en gula'sí lógaquië' tu tuë' të' Lë':

—¿Naru' neda'?

Ia'túë' ca' gunné':

—¿Naru' neda'?

<sup>20</sup> Bubi'ë didza' Jesús, rë' légaquië':

—Naca tu nu nutsa' ladaj chínnulí' ni, bönni' na' nunë'ë në'ë tsözxön len na'a lu yö'öna.

<sup>21</sup> Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

<sup>22</sup> Tsanni ni' tahuë', gudélë'ë Jesús yöta xtila. Gudxë' Dios: “Xclenu'.” Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

<sup>23</sup> Gudélë'ë ca' tu zxíga'do', en gudxë' Dios: “Xclenu'.” Ní'irö bë'ë quégaquië', ate' yúgu'të' gulé'ajë' le. <sup>24</sup> Jesús rë' légaquië':

—Lë ni xichóna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían. <sup>25</sup> Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

*Jesús rnnë' innë' Pedro bití núnbë'ë Lë'*

(Mt. 26:30-35; Lc. 22:31-34; Jn. 13:36-38)

<sup>26</sup> Gudödi gulúl-lë' yöl-la' ba, bila'rúajë' söjáquië' Guí'a Yaga Olivo. <sup>27</sup> Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnna: “Gutia'-në' uyú bö'cu' zxíla', ate' ilásilasiba' bö'cu' zxíla' na'.” <sup>28</sup> Tödi ubana' lu yöl-la' guti, tseja' luyú Galilea zí'alö ca libí'ili'.

<sup>29</sup> Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

<sup>30</sup> Jesús gudxë' lë', rnnë':

—Le nácatë rea' li', la' dzö' nisö, si' cödxi'löba' böra le buropi luzuí, tsonna luzuí innó' biti' núnbë'u neda'.

<sup>31</sup> Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

*Jesús rulidzë' Dios la' yëla Getsemaní*

*(Mt. 26:36-46; Lc. 22:39-46)*

<sup>32</sup> Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

<sup>33</sup> Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë.

<sup>34</sup> Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

<sup>35</sup> Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. <sup>36</sup> Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

<sup>37</sup> Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? <sup>38</sup> Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queë'li' ricuídí'li'.

<sup>39</sup> Ní'irö sa'yéajë' Jesús leyúbölö, rulidzë' Dios, en la' tuz ca gunnë'. <sup>40</sup> Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bi'ë, le ilë' Lë'. <sup>41</sup> Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsa'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'! <sup>42</sup> ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

*Ta'zönë' Jesús*

*(Mt. 26:47-56; Lc. 22:47-53; Jn. 18:2-11)*

<sup>43</sup> Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guié tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zëajni'inë' nasöl-la'gaquië' légaquië'. <sup>44</sup> Judas, bönni' na' rudödë' Jesús lu ná'agaquië' chinulu'ínë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. ¡Guli'sönë', en guli'ché'ë! ¡Guli'yútsöquië'!

<sup>45</sup> Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. <sup>46</sup> Ní'irö gula'zönë' Jesús, en gula'ché'ë Lë' nadzunë'.

<sup>47</sup> Ní'irö tuë' bönni' ni' dë'ë Jesús guléajë' guié tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. <sup>48</sup> Jesús gudxë' bönachi na', rnnë':

—¿Narúajtsali' nuá'ali' guié tuchi', en yaga para sönli' neda', runli' ca runli' cate' rizönli'-në' gubán? <sup>49</sup> Yugu' dza guzóalena' libí'ili' rusëdigacada' bönachi ga naca chila yudo', ate' biti' guzxönli' neda', pero raca caní para gaca le nazúaj lu guichi lá'ayi.

<sup>50</sup> Ní'irö yúgu'të bönni' usëda queë' Jesús bulu'cá'anë' Le', ta'zxúnajë'.

*Rixúnajbi' tubi' bi'i ra'bán*

<sup>51</sup> Zóabi' ca' ni' tubi' bi'i ra'bán sōjnobi' Jesús, nuxóasō cuinbi' tu lari' blaga'. Yugu' bönni' na' naché'gaquié' Jesús gula'zöné'-bi' <sup>52</sup> pero busanbi' lari' na', en xiguídisöbi' buzúnajbi'.

*Ridxiné' Jesús lógaquié' bönni' yúlahui' lo*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Gula'ché'è Jesús lahué' bixúz lo, ate' bulu'dubé' ni' yúgu'té bixúz unná bé', en bönni' gula tu'zéajni'iné', en yugu' bönni' yudo' usedi. <sup>54</sup> Pedro yōjnahué' Jesús zi'tu' zítu'sō, en guyázié' lö'a lidxi bixúz lo na', en gurō'ölené' tsōzxōn yugu' ni'a nē'è bixúz lo na', rutsé'e cuiné' ra' guí'.

<sup>55</sup> Yugu' bixúz unná bé' len yúgu'té bönni' yúlahui' lo bulu'guiljé' tu le ulu'subáguié' Jesús para gaca ila'chúguié' queé' gátié' pero biti' bi bulu'dzöliné'. <sup>56</sup> Bönni' zían gula'nné' queé' Jesús le cabí nácaté, pero biti' yōjlözagaca le gula'nné' queé'. <sup>57</sup> Ní'irō gula'zuíné' yugu' bönni' gula'nné' queé' Jesús le cabí nácaté, ta'nné':

<sup>58</sup> —Netu' biyōnitu' didza' bé'è bönni' ni, gunné': “Uquínaja' yudo' ni, lē ni nequi lu ni'a lu na' bōnachi, ate' tsonna dzasō uchisa' ia'tú le cabí nequi lu ni'a lu na' bōnachi.”

<sup>59</sup> Lēscá' lē ni, biti' yōjlözagaca xtídzá'gaquié'.

<sup>60</sup> Ní'irō guyasé' bixúz lo na' gatsaj láhui'lō bōnachi nacuá' ni', en gunábiné' Jesús, rnné':  
—¿Naru' cabí rubi'itso' didza'? ¿Bizxi na' ta'nné' quiu' bönni' ni?

<sup>61</sup> Jesús, dxisō zoé'. Biti' bi didza' rubi'è. Gunábiné' Lē' leyúbölō bixúz lo na', rnné':  
—¿Naru' nacu' Li' Cristo, Zxí'iné' Dios Lá'ayi?

<sup>62</sup> Bubi'è didza' Jesús, rnné':

—Naca'. Ilé'eli' neda', Bönni' Guljé' Bōnachi, soa' cō'a cuité' ibēla Dios napa cazé' yōl-la' huáca cate' ni' huōda' lu bōaj lúxiba.

<sup>63</sup> Ní'irō bixúz lo na', lu yōl-la' rilé queé' guchözé' lari' nácué', rnné':

—¿Núzxirō naquíniru' nu quixjō'? <sup>64</sup> ¿Riyōn quézili' rucá'ané' Dios cá'asō len didza' ru'è! ¿Nacxi rusáca'li' queéli'?

Yúgu'té' gula'chúguié' queé' gátié'.

<sup>65</sup> Ní'irō gula'sí lógaquié' bal-lé' tu'chejé' Jesús zxōna'. Bulu'sayjé' lahué', en gulundé' Lē' zi', ta'nné':

—Gunné' yá'atsōca' nuzxi na' bé' Li'.

Yugu' bönni' ni'a nē'è bixúz lo gula'gápé'è ru'è Jesús.

*Rnné' Pedro biti' núnbé'è Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Cate' ni' zoé' Pedro lö'a zxan yu'u, bidxinbi' tubi' bi'i nigula huen dxin queé' bixúz lo na' ga na' zoé'. <sup>67</sup> Cate' bilé'ebi' Pedro, rō'è rutsé'e cuiné' ra' guí', buyubi' lē', rnnabi':

—Do' o ca' li' Jesús, bönni' Nazaret na'.

<sup>68</sup> Gudá'baguié' Pedro, rnné':

—Biti' núnbé'a-né', en biti' nōzda' bizxi na' rnno'.

Burúajé' Pedro yōjsóé' ga nu riyaza lö'a. Ní'irō gurōdxiba' böra. <sup>69</sup> Buyubi' lē' leyúbölō bi'i nigula huen dxin na', en gusí lobi' rēbi' nupa nacuá' ni':

—Bönni' ni dzáguié' légaquié'.

<sup>70</sup> Leyúbölō gudá'baguié' Pedro. Ia'lati' gudzé nupa nacuá' ni' té Pedro, ta'nná:

—Le nácaté dzagu' légaquié', tu' nacu' bönni' Galilea. Yōl-la' ru'isō quiu' didza' naca bé'u, tu' tuz ca ru'ili' didza'.

<sup>71</sup> Gusí lahué' Pedro rudxía dō' cuiné', en ruzōtjé' Dios, rnné':

—Biti' ca' núnbé'a-né' bönni' na' ru'ili' didza' ca naca queé'.

<sup>72</sup> La' gurödxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': "Zi'alö cödxiba' böra le buropi luzuí, tsonna luzuí innó' biti' núnbë'u neda'." Cate' yöjnenë' didza' ni, gusí lahuë' ribödxidë'ë.

## 15

*Ridxinë' Jesús lahuë' Pilato, bönni' rinná bë'ë*  
(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Ní' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma. <sup>2</sup> Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rno'.

<sup>3</sup> Yugu' bixúz unná bë' bulu'zéguië' Jesús didza' le zían. <sup>4</sup> Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzëtsöca' nagu' cate' xö zían le ta'nnë' quiu'.

<sup>5</sup> Biti' bi didza' bubí'ë Jesús. Ca' guca, bubáninë' Pilato.

*Ta'chúguië' queë' Jesús gátie'*  
(Mt. 27:15-31; Lc. 23:13-25; Jn. 18:38-19:16)

<sup>6</sup> Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. <sup>7</sup> Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'. <sup>8</sup> Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. <sup>9</sup> Bubi'ë didza' Pilato, rnnë':

—¿Rë'ënili' usana'-në' queë'li' Bönni' Inná Bé'enë' Bönachi Judío?

<sup>10</sup> Caní gunné' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'. <sup>11</sup> Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. <sup>12</sup> Ní'irö Pilato gunábinë' légaquië' leyúbölö, rnnë':

—¿Bizxi rë'ënili' guna' queë' bönni' na' ru'í'ili' lë', Bönni' Inná Bé'enë' Bönachi Judío?

<sup>13</sup> Gulu'ë zidzaj didza', ta'nnë':

—¡Budë'ë lë'e yaga cruz!

<sup>14</sup> Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

<sup>15</sup> Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

<sup>16</sup> Ní'irö yugu' bönni' röjáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ni'. <sup>17</sup> Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxië' icjë'. <sup>18</sup> Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

<sup>19</sup> Gula'guínë' gui icjë', en bulu'chejë' Lë' zxöna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal. <sup>20</sup> Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'chë'ë Lë' ní'ilo yúlahui' na' para tsöjda'gaquië' Lë' lë'e yaga cruz.

*Tu'dě'ě Jesús lě'e yaga cruz**(Mt. 27:32-44; Lc. 23:26-43; Jn. 19:17-27)*

<sup>21</sup> Guluně' ga bi'ě tu bönni' Cirene yaga cruz queě' Jesús, ridódisě' ni' suzě'ě la' guixi'. Lě' Simón, xúzgacabi' Alejandro, en Rufo.

<sup>22</sup> Gula'chě'ě Jesús lataj na' nazí'i le Gólgota, tu didza' hebreo le rna lu didza' xidza', Lataj Que Böga' Ícjaru'. <sup>23</sup> Gulu'ě le guí'jě' Jesús xisi uva nutsi' nōri silá' que yaga mirra, pero Lě' biti' gu'ě le. <sup>24</sup> Ní'irō bulu'dě'ě Jesús lě'e yaga cruz, ate' gula'guísiě' lari' nácuě', le gula'zí' que queégaquiě' bönni' na' rōjáquiě' gudil-la. Bulu'béajě' le gaca bě' para ila'nōzině' bízxiłō idela' que queégaquiě'.

<sup>25</sup> Naca idú xsila cate' bulu'dě'ě Lě' lě'e yaga cruz. <sup>26</sup> Didza' na' bulu'zōě' lě'e yaga cruz ícjalě' Jesús ca naca le tu'quíě' Lě' rna caní: "Bōnni' Rinná Bé'eně' Bōnachi Judío." <sup>27</sup> Bulu'dá'leně' Jesús tsōzxōn lě'egaca yaga cruz chopě' gubán, tuě' cuita lě'ě ibēla, en ia'túě' cuita lě'ě yōgōla. <sup>28</sup> Caní guca lě' na' nazúaj lu guichi lá'ayi, rna: Gubábaleně' bönni' tuá' dō'.

<sup>29</sup> Yugu' bönni' ta'dōdě' ni' tu'lidza zi'ě Jesús, en tu'tá ícjagaquiě', ta'nně':

—¡Ōn! ¿Naru' uquínajtso' yudo' queě' Dios, ate' tsonna dzasō uchísatsu' le? <sup>30</sup> ¡Busōlá cuinu' na'a, en bōtaj lě'e yaga cruz na'!

<sup>31</sup> Lěsca' caní yugu' bixúz unná bě', en yugu' bönni' yudo' usedi tu'titjě' Lě'. Tě' luzá'agaquiě' tuě' ia'túě':

—Bōnachi yúbōlō busōlě', pero biti' gaca usōlá cuině'.

<sup>32</sup> Ta'nně' ca':

—¡Ōn! ¿Nácatsu' Cristo, Bönni' Inná Bé'eně' Bōnachi Israel? ¡Bōtjatsōca' na'a lě'e yaga cruz para ilé'etu', ate' tséajlě'etu' Li'!

Yugu' bönni' na' dá'gaquiě' tsōzxōn len Lě' lě'egaca yaga cruz bulu'lidza zi'ě ca' Lě'.

*Le guca cate' gútiě' Jesús**(Mt. 27:45-56; Lc. 23:44-49; Jn. 19:28-30)*

<sup>33</sup> Cate' bidxín idú huagubidza, guchul-la idútě' yōdzōlió. Guca caní ga bidxintě' idú ridōdi xihuó. <sup>34</sup> Idú ridōdi xihuó na' bě'ě Jesús zidzaj didza', rnně':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj lādxi'u neda'?

<sup>35</sup> Yugu' bönni' nacu'ě ni' bila'yōnně' didza' ni, ate' ta'nně':

—Buli'zětsōca' nágali'. Elías rulidzě'.

<sup>36</sup> Ní'irō guxítí'ě tu bönni' núsě'ě lādjagaquiě', en buxúpině' nupi zi tu le bululu rě'aj nisa. Budě'ě le lahui gui, en bě'ě le xupě' Jesús, rnně':

—Cōztsōca'ru', uyuru' channō huidě' Elías uzōtjě' Lě'.

<sup>37</sup> Gurōdxi'ě zidzaj Jesús, en la' gútitě'. <sup>38</sup> Birōza' lari' yōdx nala' lu yudo'. Birúaj choplō, gudela' icjlō, en birúajtě zxánilō. <sup>39</sup> Bönni' na' rinná bé'eně' bönni' rōjáquiě' gudil-la zuíně' lahuě' Jesús, en bilé'eně' ca na' guca gurōdxi'ě Jesús, en la' gútitě', ate' gunně':

—Le nácate' bönni' ni gúquiě' Zxí'ině' Dios.

<sup>40</sup> Nacuá'anu ca' ni' nigula, zítu'sō tu'yunu. Nútsa'gacanu lādjacacanu María Magdalena, en Salomé, en María, xiná'agacabi' Jacobo cuidi', en José. <sup>41</sup> Nigula ni yōjácacacanu Jesús cate' ni' gudě' luyú Galilea, en gulácalennu Lě', gula'gú'unu le gulahuě'. Nacuá'anu ca' ni' ia'bál-lanu nigula zían gula'zá'lennu Lě' lu yōdzō Jerusalén.

*Ta'gu'ě Jesús yeru ba**(Mt. 27:57-61; Lc. 23:50-56; Jn. 19:38-42)*

<sup>42</sup> Chizá' ral-la, en naca dza tu'pě'ě, dza si' idxín dza lá'ayi quégaquiě' bönni' judío. <sup>43</sup> Que lě' ni na' bidě' José, bönni' yōdzō Arimatea, bönni' lo lādjagaquiě' bönni' yúlahui' lo. Ribōzě' ca' dza idinná bě'ě Dios. Idú lādxi'ě guyáziě' ga na' zōě' Pilato, en gunábině' lě' gu'ě

lë' lataj u'ë Jesús. <sup>44</sup> Bubáninë' Pilato tu' gunnë' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús. <sup>45</sup> Cate' biyönnë' ca na' gunnë' bönni' na' rinná bé'enë' bönni' röjáquië' gudil-la, bë'ë José lataj u'ë Jesús. <sup>46</sup> Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'á guiöj. Budë'ë tu guiöj blaga zxön ga nu riyaza ba na'. <sup>47</sup> María Magdalena, en María, xinë'ë José tu'yunu ga na' ta'gu'ë Jesús.

## 16

### *Rubanë' Jesús lu yöl-la' guti*

(Mt. 28:1-10; Lc. 24:1-12; Jn. 20:1-10)

<sup>1</sup> Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'z'ínu yugu' le rilá' zxixi para tsöjlú'ugacanu Jesús.

<sup>2</sup> Ni' naca zílado' dza risí lo, yöjácanu ra' yeru ba queë'. Bila'dxinnu ni' cate' si' gulén gubidza. <sup>3</sup> Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

<sup>4</sup> Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca. <sup>5</sup> Gula'yú'unu yeru ba lë'e gu'á guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. <sup>6</sup> Ní'irö bi'i na' gúdxibi' légaicanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. <sup>7</sup> Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiéli' légaquië': "Tsejë' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'."

<sup>8</sup> Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

### *Rulu'i lahuë' Jesús lonu María Magdalena*

(Jn. 20:11-18)

<sup>9</sup> Cate' bubanë' Jesús zílado' dza na', bulu'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. <sup>10</sup> Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'. <sup>11</sup> Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

### *Chopë' bönni' usëda queë' Jesús tu'lé'enë' Lë'*

(Lc. 24:13-35)

<sup>12</sup> Gudödi na', nadzá'alö bulu'i lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. <sup>13</sup> Ní'irö bulu'dxinë', dutíxjöi'iguequinë' ia'zícá'rë', ate' ni xtídza'gaquië' biti' gula'yéajlë'ë.

### *Le rigu'ë Jesús lu ná'agaquië' bönni' gubáz queë'*

(Mt. 28:16-20; Lc. 24:36-49; Jn. 20:19-23)

<sup>14</sup> Ga yöjsetë, bulu'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. <sup>15</sup> Ní'irö gudxë' légaquië', rnnë':

—Guli'tséaj idütë yödzüliö tsöjenli' libán que didza' dxí'a lógaca yúgu'të bönachi. <sup>16</sup> Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. <sup>17</sup> Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. <sup>18</sup> Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

*Ruhuëpë' Jesús yehua' yubá*  
(Lc. 24:50-53; Hc. 1:6-11)

<sup>19</sup> Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. <sup>20</sup> Bila'rúajë' légaquië', yójëngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácagaca bë' naca idútë li didza' tu'ë. Ca' naca.



## DIDZA' DXI'A BUZÚAJË' LUCAS

### *Didza' rigu'ë Lucas lu në'ë Teófilo*

<sup>1</sup> Zián nupa chigulún bayudxi ulu'zúaj lu guichi idútë le nácatë, le guca ga zóaru', <sup>2</sup> ca na' bila'lé'e nupa ni' dza ni'te, ate' bulu'lu'i rë'u, en bulu'zë didza' que. <sup>3</sup> Teófilo, bönni' tsáhu'i'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. <sup>4</sup> Ruzúaja' quiu' lu guichi ni para inözinu' naca idútë li lë na' chinazëdu'.

### *Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa*

<sup>5</sup> Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazi'i le Cö' Queë' Abías. Elisabet, nigula queë' Zacarías na' nácanu ca' xzí'ini xi'söë' Aarón, bönni' gúquië' bixúz lo dza ni'te. <sup>6</sup> Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rna xtídzë'ë Dios, en le rinná bë' xibá queë'. Caní guca, cuntú nu guca bi innë' quégaquië'. <sup>7</sup> Cuntú nu zoa bi'i quégaquië', tu' nácanu Elisabet nigula huödx, ate' chinagúлагаquië' irópatë'.

<sup>8</sup> Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. <sup>9</sup> Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. <sup>10</sup> Tsanni ni' ruzégui'ë Zacarías na' yalaj, gula'cuá' yúgu'të bönachi ní'lö, tu'lidza Dios. <sup>11</sup> La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. <sup>12</sup> Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. <sup>13</sup> Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. <sup>14</sup> Gata' quiu' le uzi'u xibé, en udzëjanu', ate' zián nupa ulu'dzeja ládxi'gaca cate' gálajbi' bí'ido' na', <sup>15</sup> tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. <sup>16</sup> Gunë' Juan ni ga ulu'huóaca zián bönachi Israel queë' Xanru'. <sup>17</sup> Inöruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len xzí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu në'eguequi Xanru'.

<sup>18</sup> Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

<sup>19</sup> Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ilena' li' didza', en usiyönda' li' didza' dxi'a ni. <sup>20</sup> Na'a, tu' cabí guyéajlë'u xtídzä'a, icödzu', en bítirö gaca innó' cate' gácarö lë ni. Yúgu'të lë ni udxín cate' idxín dza que.

<sup>21</sup> Tsanni ni' raca lë ni, nacuá' bönachi ní'lö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. <sup>22</sup> Cate' burúajë' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le bulu'inë' Dios lë' lu lataj lá'ayi. Bulá'a bulu'isë' Zacarías, buzéajni'inë' légaquië', tu' cabí raca innë'.

<sup>23</sup> Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'.

<sup>24</sup> Gudödi yugu' dza na' Elisabet, nigula queë' Zacarías na', biá'anubí' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: <sup>25</sup> "Caní runë' Xanru' quia'. Ruzá' ládxi'ë quia' bí'ido', en runë' ga bítirö utuí'ida' lógaca bönachi."

*Riguíxjö'ë gubáz lá'ayi ca si' gálajbi' Jesús*

<sup>26</sup> Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea. <sup>27</sup> Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazi' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. <sup>28</sup> Cate' guyázië' Gabriel na' ga zóabi' María, gudxë'-bi':

—Padiux. Dios ruzá' lãdxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

<sup>29</sup> Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani lãdxi'bi' nacxi sa'yéaj didza' na' bulidzë'-bi' gubáz lá'ayi na'. <sup>30</sup> Ní'irö gubáz lá'ayi na' gudxë'-bi', rnnë':

—María, biti' gádxinu', tu' chibidéli'nu' le ruzá' lãdxë'ë Dios quiu'. <sup>31</sup> Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús. <sup>32</sup> Jesús ni tsépisëtërë', en si' Lë' Zxí'inë' Dios, Nu nayëpisëtërö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. <sup>33</sup> Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

<sup>34</sup> Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

<sup>35</sup> Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtërö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. <sup>36</sup> Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'. <sup>37</sup> Biti' bi zoa le cabí séqui'në' Dios.

<sup>38</sup> Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

*María söjyubi'-nu Elisabet*

<sup>39</sup> La' dza ní'isö guyú'ubi' nöza María, ate' carelö sa'yéajbi' ga naca gu'ádo', en bidxinbi' tu yödzo luyú Judea. <sup>40</sup> Ni' guyázabi' lidxë' Zacarías, en gúdxibi'-nu Elisabet:

—Padiux.

<sup>41</sup> Cate' biyöninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bö' Lá'ayi. <sup>42</sup> Ní'irö bë'ënu Elisabet zidzaj didza', rnnanu:

—¿Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u! <sup>43</sup> ¿Núzxitë neda', zá'anu xinë'ë Xana' quia'? <sup>44</sup> Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a. <sup>45</sup> ¿Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

<sup>46</sup> Ní'irö gunabi' María:

¡Idütë le naca' rigú'u Xanru' yöl-la' ba,

<sup>47</sup> en rudzeja lãdxi'lëna'-në' Dios, Nu rusölá neda'!

<sup>48</sup> ¿Dios caz buzá' lãdxë'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

<sup>49</sup> ¿Zxöntërö naca' le benë' Dios unná bë' quia'!

¡Lá'ayi naca' Lë'!

<sup>50</sup> Lë' ruhuéchi' lãdxi'tica'së' bönachi tadxi Lë'

na'a dza, en dza zá'gaca.

<sup>51</sup> Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéguequi.

<sup>52</sup> Bugüë' yöl-la' unná bë' quégaca nupa gulaca lo, en benë' ga gulaca lo nupa gulaca nõxaj ladxi'.

<sup>53</sup> Benë' ga bulu'huölej bulu'dzë'e nupa gula'dún, en bucá'anë' cá'asö nupa bila'lé'e yöl-la' tsahui'.

<sup>54</sup> Gúcalenë' bönachi Israel, nupa na' tun xichinë', tu' yöjnenë' légaquië', en buéchi' ládxë'ë légaquië'.

<sup>55</sup> Benë' ca guzxí' lu në'ë gunë' quégaquië' xuz xtó'oru enca' queë' Abraham, en quégaca di'a dza queë'.

<sup>56</sup> María bugá'analenbi'-nu Elisabet idú ca tsonna beo', ate' gudödi ni' böajbi' lídxibi'.

*Le guca cate' gúlajbe' Juan, bönni' uquilë' bönachi nisa*

<sup>57</sup> Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'.

<sup>58</sup> Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu Dios, ate' bulu'dzëjalen lënu. <sup>59</sup> Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipéla'bi' bi'i bönni'do' na' lë na' gaca bë' néquibi' queë' Dios, ate' té'ënnë' ilu'ë labi' Zacarías ca na' lë' xúzibi'. <sup>60</sup> Ní'irö bubí'inu didza' Elisabet, xiná'abi', rnnanu:

—Calëga. Juan si' labi'.

<sup>61</sup> Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

<sup>62</sup> Ní'irö bulu'lá' bulu'lu'isinë', gula'nábinë' xúzibi' nacxi ré'ënë' gu'ë labi'. <sup>63</sup> Zacarías na' gunabë' tu blágado', ate' buzúajë' lahui caní: Juan lëbi'. Bulu'bájinë' yúgu'të'. <sup>64</sup> La' ní'isö böáljatë ru'ë Zacarías na', en buguítjatë lúdxë'ë, ate' bë'ë didza' le gulu'ë Dios yöl-la' ba. <sup>65</sup> Ní'irö guládxinë', en bulu'bájinë' yúgu'të dzaga yu'u quégaquië', ate' yúgu'të yödzo'do' nacuá' lu guí'ado' luyú Judea, guzë didza' ca guca lë ni. <sup>66</sup> Gula'zá' ládxí'gaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácaté Xanru' zóalenë'-bi'.”

*Didza' bë'ë Zacarías uláz queë' Dios*

<sup>67</sup> Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnnë':

<sup>68</sup> ¡Yöl-la' ba Dios, Xángaca bönachi Israel tu' buduyúë' rë'u, bönachi queë', en böá'uë' rë'u!

<sup>69</sup> ¡Gusöl-lë'ë queëru' Bönni' usölë' rë'u, len yöl-la' huáca zxön queë'!

Bönni' ni guljë' ládajgaca di'a dza queë' David, huen dxin queë' Dios.

<sup>70</sup> ¡Dza ni'te guzxí' lu në'ë gunë' ga gaca caní!

Raca ca na' gunné' lu ruá'agaquië' bönni' gulu'ë didza' uláz queë'.

<sup>71</sup> Guzxí' lu në'ë usölë' rë'u lu ná'agaca nupa tequi rë'u zi',

enca' lu ná'agaca nupa biti' ta'lé'e rë'u dxi'a.

<sup>72</sup> Guzxí' lu në'ë huéchi' ládxë'ë xuz gudödi queëru', en tsöjnenë' le guzxí' lu në'ë le naca lá'ayi.

<sup>73</sup> Lë ni benë' tsutsu xtídzë'ë, en guzxí' lu në'ë,

le gunë' queë' Abraham, xuz gudödi queëru',

le naca tu le ral-la' gunë' queëru' rë'u.

<sup>74</sup> Guzxí' lu në'ë usölë' rë'u

lu ná'agaca nupa biti' ta'lé'e rë'u dxi'a

para cabirö gádxiru' gunru' xichinë' Lë',  
<sup>75</sup> en para gácaru' ba'a ladxi', en idú dxi'a  
 lahuë' Lë' yúgu'të dza sóaru' ibanru'.

<sup>76</sup> Li', xzí'ina'do', si' lo' bönni' ru'ë didza' uláz queë' Dios unná bē'  
 tu' tsöjnöru' ca Xanru' caz, en upó'o nöza ga tödē'.

<sup>77</sup> Gunu' ga ila'nözi bönachi queë' ca gaca ulu'lágaca,  
 en ca na' uniti lahuë' Dios dul-la' nabága'gaca.

<sup>78</sup> Caní gaca, tu' ruhuéchi'da' ládxi'ë Dios rē'u,  
 en runē' ga tsení' queëru' Bönni' na' náquiē' bení' idú.

<sup>79</sup> Lë' uzení'ë quégaca nupa nacuá' gapa naca chul-la,  
 en gapa nacuá' nupa chizóa ilátigaca  
 para ugú'ë rē'u nöza ga cō'ö dxi ládxi'do'oru'.

<sup>80</sup> Guzxönbi' bi'i bönni'do' na', en bidipa ládxi'bi'. Guzóasibi' gapa naca lu lataj cá'asö  
 cate' bidxinrö dza buluí'i lobi' lógaca bönachi Israel.

## 2

### *Le guca cate' gúlajbi' Jesús (Mt. 1:18-25)*

<sup>1</sup> Lu dza na' gunná bē'ë Augusto César, bönni' Roma, ila'yaza lu guichi yúgu'të bönachi  
 nacuá' yödzülió. <sup>2</sup> Cate' gusí lo ta'yaza lu guichi caní, rinná bē'ë bönni' lē' Cirenio luyú  
 Siria. <sup>3</sup> Yúgu'të bönachi yójaca yödzö que queëguequi ga na' zeaj nababa para ila'yaza lu  
 guichi. <sup>4</sup> Guzë'ë José yödzö Nazaret luyú Galilea, sa'yéajë' luyú Judea, en bidxinë' yödzö  
 Belén, ga ni' guljē' David, tu' guljē' José ládajgaca di'a dza queë' David na'. <sup>5</sup> Guyijē' José ni'  
 para tsáziē' lu guichi, ate' dzágabi'-nē' María, bi'i nigula nazí' lu ná'abi' utsaga ná'alēnbi'  
 lē', en chizóa sóabi' bí'ido' queëbi'. <sup>6</sup> Cate' ni' nacu'ë lu yödzö Belén, bidxín dza sóabi' bí'ido'  
 queëbi'. <sup>7</sup> Buzóanu-bi' tubi' bi'i bönni'do', bi'i huáca queënu. Buchölinu-bi' yugu' lári'do',  
 ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza.  
 Caní guca, tu' cabí bidzüli lataj ila'cu'ë lu yu'u ga ni' ta'dxín bönachi yú'ugaca nöza.

### *Tu'luí'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'*

<sup>8</sup> Gala' ra' yödzö Belén nacu'ë bönni' tu'yúgaquiē'-ba' bö'cu' zxila' la' guixi', tapa  
 chí'igaquiē'-ba' chi'i dzö'ölö. <sup>9</sup> La' buluí'itë lahuë' gubáz lá'ayi queë' Xanru' ga na' nacu'ë.  
 Yöl-la' bení' queë' Xanru' buzení' ga na' nacu'ë, ate' guládxinē'. <sup>10</sup> Ní'irö gubáz lá'ayi na'  
 gudxē' légaquiē', rnnē':

—Biti' gádxili'. Na'a rusiyönda' libí'ili' didza' le gun ga udzējade'eli', le ulu'zí' ca' xibé  
 yúgu'të bönachi. <sup>11</sup> Na'a chigúlajbi' lu ladzē' David Nu usölá libí'ili'. Nu ni naca Cristo,  
 Xanru'. <sup>12</sup> Lë ni gaca bē'ëbi'. Udzöli'li'-bi' Bí'ido' na', narölibi' yugu' lári'do', en dēbi' tu lu  
 yú'udo' ga tun chi'i le táguba' böa' quégaca bönachi yú'ugaca nöza.

<sup>13</sup> Ga na' zoë' gubáz lá'ayi na', tsárido'os bulu'luí'i lógaquiē' zianrö ca' gubáz lá'ayi queë'  
 Dios, narúajgaquiē' yehua' yubá, en ta'gu'ë Dios yöl-la' ba, ta'nnē':

<sup>14</sup> ¡Yöl-la' ba Dios zoë' xitsá',  
 ate' luyú gaca le cuéqui dxi ládxi'do'gaquiē'  
 bönni' raza ládxi'ë Dios légaquiē'!

<sup>15</sup> Cate' bulu'zē'ë gubáz lá'ayi na' ga ni' nacu'ë, söjhuöjgaquiē' yehua' yubá, ní'irö gulē'  
 luzē'ë tuē' ia'tué' bönni' uyú bö'cu' zxila' na', ta'nnē':

—Uyéajtsöca'ru' Belén para ilé'eru' lē ni chiguca ca na' chibusiyönnē' Xanru' rē'u.

<sup>16</sup> La' yójacatiē', ate' yójáca'gaquiē' María len José, enca' bí'ido' na', dēbi' tu lu yú'udo'  
 ga tun chi'i le táguba' böa' quégaca bönachi yú'ugaca nöza. <sup>17</sup> Cate' bila'lē'enē' lēbi',  
 gula'guíxjö'ë lē na' si' busiyönnē' gubáz lá'ayi na' légaquiē' ca naca queëbi' bí'ido' na'.

<sup>18</sup> Bulu'bani yúgu'të nupa bila'yöni didza' gulu'ë bönni' tu'yúë' bö'cu' zxila' na'. <sup>19</sup> María

gulú'usö icja náganu didza' ni, ate' guzá' ládxi'nu ca naca que. <sup>20</sup> Söjhuöjgaquië' bönni' na' tu'yüé'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

### *Ta'gu'ë-bi' bí'ido' Jesús lu në'ë Dios*

<sup>21</sup> Cate' chiguca xunu' dza zóabi' bí'ido' na', gula'chúguië' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

<sup>22</sup> Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'ché'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios. <sup>23</sup> Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." <sup>24</sup> Que lë ni na' yójáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

<sup>25</sup> Dza ní'isö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxi'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', <sup>26</sup> en chibulu'ínë' lë' bití' gátië' cate' ilé'erönë' Cristo, Bönni' na' isöl-lë'ë Xanru' Dios. <sup>27</sup> Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunë' queëbi' ca rinná bë' xibá na', <sup>28</sup> ní'irö bunidë'-bi' Simeón na', en guyéaj ládxi'ë Dios, rnnë':

<sup>29</sup> Xana', na'a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

<sup>30</sup> Chibilé'eda' Nu na' buzóca cazu', Nu usölá bönachi,

<sup>31</sup> Nu na' ulú'u lahui lógaca yúgu'të bönachi.

<sup>32</sup> Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

<sup>33</sup> Bulu'bánnë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús. <sup>34</sup> Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate' ulu'huóása bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'.

<sup>35</sup> Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guié' tuchi' le tsaza ládxi'do'o.

<sup>36</sup> Ana, nigula ru'ínu didza' uláz queë' Dios, zóanu ca' ni'. Nácanu zxí'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', <sup>37</sup> ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. <sup>38</sup> La' ná'asö bidxíntënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacua' Jerusalén, nupa ta'böza dza idxín Nu na' isöl-lë'ë Dios para gácalen bönachi.

### *Söjhuöjgaquië' José, en María yödzö Nazaret*

<sup>39</sup> Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzaquië' Nazaret luyú Galilea. <sup>40</sup> Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá' ládxi'ë queëbi' Dios.

### *Rudxinbi' bí'ido' Jesús chila yudo'*

<sup>41</sup> Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>42</sup> Cate' chiyú'ubi' chinnu iz bi'i Jesús, yójáquië' Jerusalén ca tun cazë' cate' raca laní na'. <sup>43</sup> Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús. <sup>44</sup> Tu' téquinë' nútsa'bi' ladaj bönachi zían yú'ulengaca légaquië'

nöza, tu dza nayá' gula'zé'ë. Ní'irö cate' bulu'guiljé'-bi' gapa nacuá' di'a dza quégaquié', en gapa nacuá' nupa núnbé'gaquié' <sup>45</sup>biti' bulu'dzöliné'-bi'. Que lë ni na' yöjhuöjgaquié' Jerusalén, söjdíljagaquié'-bi'.

<sup>46</sup>Cate' chiguca dza bunny, bulu'dzöliné'-bi' ga naca chila yudo', rö'öbi' gatsaj láhui'lë' bönni' yudo' tu'sédiné'. Ruzé nágabi' didza' tu'ë, en rinaba yúdxibi' légaquié'. <sup>47</sup>Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. <sup>48</sup>Cate' bila'lé'ené'-bi' xuz xiná'abi', bulu'bánniné', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu? Buyútsöca', len yöl-la' ruúbi ruguí'i neda', en xuzu' buguúljatu' li'.

<sup>49</sup>Ní'irö gúdxibi' Jesús légaquié', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichiné' Xuza'?

<sup>50</sup>Biti' gula'yéajni'iné' xuz xiná'abi' didza' na' gúdxibi' légaquié'.

<sup>51</sup>Jesús böajlenbi' légaquié', budxinbi' Nazaret, ate' benbi' ca rna xtídza'gaquié' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni. <sup>52</sup>Ráta'rö yöl-la' réajni'i queëbi' bi'i Jesús, en rizzönbí'. Burúajbi' dxi'a lahué' Dios, en lógaca bönachi.

### 3

*Libán runé' Juan, bönni' ruquilé' bönachi nisa*  
(Mt. 3:1-12; Mr. 1:1-8; Jn. 1:19-28)

<sup>1</sup>Cate' chiguca chinu iz rinná bé'ené' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böché'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia. <sup>2</sup>Yugu' dza na' nácagaquié' bixúz lo Anás, en Caifás, ate' la' ná'asö Dios bë'lené' Juan, zxi'iné' Zacarías, didza' cate' ni' zoé' Juan lu lataj cá'asö. <sup>3</sup>Ridé' Juan ni yúgu'të lataj nacuá' ra' yegu Jordán, runé' libán ca ral-la' ila'dila nisa nupa tu'bí'i ládxi'gaca para uniti lahué' Dios dul-la' nabága'gaca. <sup>4</sup>Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rna:

Riyön chi'ë bönni' rulidzé' lu lataj cá'asö, rnné':

“Buli'pá'a nöza lu icja ládxi'do'oli' para idxín Xanru' queëli'.

Buli'béaj li yugu' nöza lasi ga tödë'.

<sup>5</sup>Ral-la' ulígaca yúgu'të gapa naca röga',

en ulu'huóaca lachi' yúgu'të guí'a sibi, en guí'ado'.

Ral-la' ulu'rúaj li nöza nayecja nabí'igaca,

ate' ulu'huóaca dxi'a nöza guiöj.

<sup>6</sup>Ila'lé'eni yúgu'të bönachi Bönni' na' isöl-lë'ë Dios,

Nu usölá bönachi.”

<sup>7</sup>Cate' bila'rúaj bönachi zían para ila'dila nisa lu në'ë Juan, lë' gudxé' légaquié':

—Libi'ili', di'a dza quégacaba' bëla sínia'. ¿Zoa nu buluí'i libí'ili' ral-la' izxúnnajli' yöl-la' rusiúdxí si' gaca quégaca bönachi? <sup>8</sup>Na'a, guli'gún le ilaca bë' chibubí'i ládxi'li', en biti' sa' ládxi'li', biti' innali': “Nácatu' tsahui' tu' nácatu' di'a dza queë' Abraham”, tu' rea' libí'ili', huáca quelé'ë Dios yugu' guiöj ni, en guné' ga ulu'huóaca di'a dza queë' Abraham.

<sup>9</sup>Nácali' ca yugu' yaga. Chizóa riböza guíë huága para ichugu yugu' yaga. Yúgu'të yaga biti' ta'bía le naca dxi'a, ila'chúguié' yaga na', en ila'gu'ë léguequi lu guí'.

<sup>10</sup>Ní'irö bönachi nacuá' ni' gula'nabi lë', ta'nná:

—¿Nacxi gúntsatu'?

<sup>11</sup>Bubi'ë didza' Juan, rë' légaquié':

—Nu dë chopa cö' zxe ral-la' unödzej que nu biti' dë que, ate' nu dë le gagu, lësca' caní ral-la' quisi quégaca nupa biti' dë le ilágugaca.

<sup>12</sup> Bal-lë' bönni' tu' quizzjë' lázagaca bönachi uláz que yödzo zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

<sup>13</sup> Juan gudxë' légaquië':

—Biti' uquízxjaröli' tsca le chigunnë' bönni' yú'uli' lu në'ë.

<sup>14</sup> Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizzaj libí'ili', pero guli'tsaza ládxi'li' tsca rázxi'li'.

<sup>15</sup> Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. <sup>16</sup> Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluí'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' bití' naca' lesaca' ilecja' le nudë'ë ni'e. <sup>17</sup> Zönë' lu në'ë böcö' queë', ate' ulubë' ga rilubi zxoá' xtila queë', lë' ni ruluí'i le gaca quégaca bönachi. Utubë' zxoá' xtila, en cu'ë le xilataj, pero bëbu que uzéguí'ë lu guí' le catu caz ulu.

<sup>18</sup> Ca nácgaca didza' ni, en ia'zica'rö zían didza' le guchízië' icja nággaca bönachi, benë' libán Juan lógaquië' que didza' dxi'a. <sup>19</sup> Juan na' buzéguí'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'. <sup>20</sup> Ní'irö benë' Herodes tu le nácarö huiá' dö', gulu'ë Juan na' lidxi guíë.

### *Ridíle' Jesús nisa*

*(Mt. 3:13-17; Mr. 1:9-11)*

<sup>21</sup> Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' ruldzë' Dios, gualaj lúzxiba, <sup>22</sup> ate' böttjë' Dios Bö' Lá'ayi, bidxinë' ga na' zoë' Jesús. Buluí'i lahuë', rinë'ë ca riná' tuba' gu'dödo', ate' biyón chi'i Nu ruí'i didza' yehua' yubá, rna:

—Li' nacu' Zxí'ina'. Nadxí'ida' Li', en raza ládxa'a Li'.

### *Yugu' xuz xinë'e gudödi queë' Jesús*

*(Mt. 1:1-17)*

<sup>23</sup> Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxí'inë' José. Jesús náquië' zxí'ini xi'sóë' Elí, nu na' náquië' xúzinu María, nigula queë' José na'.

<sup>24</sup> Elí na' gúquië' zxí'inë' Matat,

nu ni guca zxí'inë' Leví,

nu ni guca zxí'inë' Melqui,

nu ni guca zxí'inë' Jana,

nu ni guca zxí'inë' ia'túë' José.

<sup>25</sup> José ni gúquië' zxí'inë' Matatías,

nu ni guca zxí'inë' Amós,

nu ni guca zxí'inë' Nahum,

nu ni guca zxí'inë' Esli,

nu ni guca zxí'inë' Nagai.

<sup>26</sup> Nagai na' gúquië' zxí'inë' Mat,

nu ni guca zxí'inë' ia'túë' Matatías,

nu ni guca zxí'inë' Semei,

nu ni guca zxí'inë' ia'túë' José,

nu ni guca zxí'inë' Judá.

<sup>27</sup> Judá na' gúquië' zxí'inë' Joana,

nu ni guca zxí'inë' Resa,  
nu ni guca zxí'inë' Zorobabel,  
nu ni guca zxí'inë' Salatiel,  
nu ni guca zxí'inë' Neri.

<sup>28</sup> Neri na' gúquië' zxí'inë' ia'túë' Melqui,  
nu ni guca zxí'inë' Adi,  
nu ni guca zxí'inë' Cosam,  
nu ni guca zxí'inë' Elmodam,  
nu ni guca zxí'inë' Er.

<sup>29</sup> Er na' gúquië' zxí'inë' Josué,  
nu ni guca zxí'inë' Eliezer,  
nu ni guca zxí'inë' Jorim,  
nu ni guca zxí'inë' ia'túë' Matat.

<sup>30</sup> Matat na' gúquië' zxí'inë' Leví,  
nu ni guca zxí'inë' Simeón,  
nu ni guca zxí'inë' Judá,  
nu ni guca zxí'inë' ia'túë' José,  
nu ni guca zxí'inë' Jonán,  
nu ni guca zxí'inë' Eliaquim.

<sup>31</sup> Eliaquim na' gúquië' zxí'inë' Melea,  
nu ni guca zxí'inë' Mainán,  
nu ni guca zxí'inë' Matata,  
nu ni guca zxí'inë' Natán.

<sup>32</sup> Natán na' gúquië' zxí'inë' David,  
nu ni guca zxí'inë' Isaí,  
nu ni guca zxí'inë' Obed,  
nu ni guca zxí'inë' Booz,  
nu ni guca zxí'inë' Salmón,  
nu ni guca zxí'inë' Naasón.

<sup>33</sup> Naasón na' gúquië' zxí'inë' Aminadab,  
nu ni guca zxí'inë' Aram,  
nu ni guca zxí'inë' Esrom,  
nu ni guca zxí'inë' Fares,  
nu ni guca zxí'inë' ia'túë' Judá.

<sup>34</sup> Judá na' gúquië' zxí'inë' Jacob,  
nu ni guca zxí'inë' Isaac,  
nu ni guca zxí'inë' Abraham,  
nu ni guca zxí'inë' Taré,  
nu ni guca zxí'inë' Nacor.

<sup>35</sup> Nacor na' gúquië' zxí'inë' Serug,  
nu ni guca zxí'inë' Ragau,  
nu ni guca zxí'inë' Peleg,  
nu ni guca zxí'inë' Heber,  
nu ni guca zxí'inë' Sala.

<sup>36</sup> Sala na' gúquië' zxí'inë' Cainán,  
nu ni guca zxí'inë' Arfaxad,  
nu ni guca zxí'inë' Sem,  
nu ni guca zxí'inë' Noé,  
nu ni guca zxí'inë' Lamec.

<sup>37</sup> Lamec na' gúquië' zxí'inë' Matusalén,



nu ni guca zxí'inë' Enoc,  
 nu ni guca zxí'inë' Jared,  
 nu ni guca zxí'inë' Mahalalel,  
 nu ni guca zxí'inë' ia'túë' Cainán.  
<sup>38</sup> Cainán na' gúquië' zxí'inë' Enós,  
 nu ni guca zxí'inë' Set,  
 nu ni guca zxí'inë' Adán,  
 nu ni guca ca zxí'ini cazë' Dios.

## 4

### *Satanás tu' xihui' rë'ëni usubaga' Jesús dul-la'*

(Mt. 4:1-11; Mr. 1:12-13)

<sup>1</sup> Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asö. <sup>2</sup> Guzöë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. <sup>3</sup> Ní'irö tu' xihui' na' gudxi Jesús, rnna:

—Channö naca cazú' Li' Zxí'inë' Dios, gunnátsöca' ulu'huóaca guiöj ni yöta xtila.

<sup>4</sup> Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

<sup>5</sup> Ní'irö guchë' tu' xihui' na' Jesús ga naca tu lu guí'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzülió. <sup>6</sup> Tu' xihui' na' rë Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisida' ruá'a que. <sup>7</sup> Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

<sup>8</sup> Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ládzu'u-në', en tuzë' Lë' gunu' xichinë'.”

<sup>9</sup> Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni <sup>10</sup> tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

<sup>11</sup> Lu ná'agaquië' ulu'chisë' Li' para cabí tsöjchégu'u guiöj, en bití' gunu' zí' ni'u.

<sup>12</sup> Bubi'ë didza' Jesús, rë' le:

—Nazúaj lu guichi lá'ayi le rë netu': “Biti' si' bë'u Xanu' Dios.”

<sup>13</sup> Cate' bití' budzüli tu' xihui' na' ia'tú le si' bë' Jesús, buzá' ga zoë' tu chí'ido'.

### *Risí lahuë' Jesús runë' xichinë' luyú Galilea*

(Mt. 4:12-17; Mr. 1:14-15)

<sup>14</sup> Böajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzë didza' ca naca queë', ate' bila'yöni bönachi nacua' yúgu'të yödzö idú gásibi'ilö. <sup>15</sup> Busédinë' Jesús bönachi gapa naca lu yu'u ga tu'dubë' tu'sedë' bönni' judío queë' Dios, ate' yúgu'të bönachi gulún Lë' zxön.

### *Le benë' Jesús yödzö Nazaret, ga naca ladzë'*

(Mt. 13:53-58; Mr. 6:1-6)

<sup>16</sup> Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sedë' bönni' judío queë' Dios, ate' guzuínë' para ulabë' tu le nazúaj lu guichi lá'ayi. <sup>17</sup> Bulu'dödë' lu në'ë Jesús guichi ga

na' nazúaj didza' bē'ē Isaiás, bōnni' bē'ē didza' uláz queē' Dios. Cate' gusaljē' guichi na', budzōlinē' ga nazúaj lu guichi le rnna:

<sup>18</sup> Zóalenē' Bō' Lá'ayi queē' Xanru' neda'

tu' nubéajē' neda' quez queē'

para usiyōnda' bōnachi yechi' didza' dxi'a.

Gusōl-lē'ē neda' para una' nupa raca zi' lādxi'do'guequi,

en usiyōnda' nupa nadzúngaca, ca gaca ulu'lágaca,

en úna' bōnachi nachul-la lóguequi,

en usólá' bōnachi zoa nu run léguequi zi',

<sup>19</sup> en guna' libán que dza ruzá' lādxi'ē Xanru' Dios quégaca bōnachi.

<sup>20</sup> Ní'irō butubē' Jesús guichi na', en bugu'ē le lu nē'ē bōnni' rapa chi'ē yugu' guichi lá'ayi, ate' gurō'ē. Ní'irō yúgu'tē nupa nudúbigaca lu yu'u na' gula'ná' Jesús. <sup>21</sup> Gusí lahuē' Jesús rē' légaquiē':

—Na'a dza ni zóali' libí'ili', rudxín caz le nazúaj lu guichi ni.

<sup>22</sup> Yúgu'tē' gula'nnē' dxi'a queē', en bulu'bánninē' ca naca didza' dxi'a ru'ē, ate' ta'nnē':

—¿Naru' calēga bōnni' ni zxi'inē' José?

<sup>23</sup> Jesús rē' légaquiē', rnnē':

—Nadxi huēli' neda' lē ni ta'nná bōnachi, le rnna: “Li', bōnni' ruún bōnachi, bun cuinu'.” Lē'sca' caní huēli' neda': “Yugu' le biyōnitu' benu' Capernaum, ben ca' ga ni naca ladzu'.”

<sup>24</sup> Gunnē' ca' Jesús:

—Le nácatē rea' libí'ili', channō zoē' nu bōnni' ru'ē didza' uláz queē' Dios, biti' tun bōnachi uládz queē' lē' bal. <sup>25</sup> Le nácatē rea' libí'ili', gula'cuá'anu zían nigula uzēbi luyú Israel yugu' dza ni' zoē' Elías, bōnni' bē'ē didza' uláz queē' Dios, cate' ni' biti' gulaj guiōj idú ca tsonna iz yu' xopa beo', ate' guca gubín luyú na', <sup>26</sup> pero Dios biti' gusōl-lē'ē Elías na' ga nacué'anu nigula uzēbi nabábagacanu Israel, pero gusōl-lē'ē lē' ga na' zóanu tu nigula uzēbi lu yōdzō Sarepta, le nababa yōdzō Sidón. <sup>27</sup> Lē'sca' caní, gula'cuá' zían nupa te'e huē' nudzu' ruzōdi luyú Israel dza ni' zoē' Eliseo, bōnni' bē'ē didza' uláz queē' Dios, pero biti' bōáquiē' nu bōnni' nútsē'ē ladaj bōnachi Israel na', pero bōáquiē' tuzē' Naamán, bōnni' nababē' luyú Siria.

<sup>28</sup> Cate' bila'yōnnē' didza' ni, gula'lenē' yúgu'tē bōnni' nacué' lu yu'u ga na' tu'dubē' tu'sedē' queē' Dios. <sup>29</sup> Ní'irō gula'yasē', en bulu'béajē' Jesús ní'ilō ra' yōdzō. Gula'ché'ē Lē' ga naca lē'e guí'a guiōj ga na' dē lādzagaquiē' para ulu'suláduē' Lē' ga naca lē'e guí'a guiōj na'. <sup>30</sup> Ní'irō gudōdē' Jesús gatsaj láhui'lō ga na' nacué', sōhuōajtē.

*Tu bōnni' yu'u lē' bō' xihui'*

*(Mr. 1:21-28)*

<sup>31</sup> Ní'irō guyijē' Jesús yōdzō Capernaum luyú Galilea, ate' busédinē' bōnachi yugu' dza lá'ayi quégaquiē' bōnni' judío. <sup>32</sup> Bulu'bánninē' ca naca le rusédinē' Jesús légaquiē', tu' bē'ē didza' ca tu bōnni' dē lu nē'ē yōl-la' unná bē'.

<sup>33</sup> Zóatē' ca' tu bōnni' yu'u lē' bō' xihui' lu yu'u ga na' tu'dubē' tu'sedē' queē' Dios, ate' bē'ē zidzaj didza', <sup>34</sup> rnnē':

—¡Busán netu'! ¿Bizxi rála'tu' quiu', Jesús, bōnni' Nazaret? ¿Naru' zo'o para usunítu' netu'? Núnbē'a Li' Nu nacué'. Bōnni' Lá'ayi queē' Dios nacué'.

<sup>35</sup> Jesús buzenē' le bach bō' xihui' na', en rē' le:

—Busayaj ru'u, en burúaj lu bōnni' ni.

Ní'irō bō' xihui' na' gurú'una bōnni' na' lu yu lógaca bōnachi nacué' ni'. Burúajtē lu bōnni' na', en bítirō bi ben queē'. <sup>36</sup> Bulu'bánninē' yúgu'tē', en gulu'ē didza' tu'ē len ia'tué', ta'nnē':

—¿Bizxi didza' ni ru'ē? Len yōl-la' unná bē', en yōl-la' huáca zxon rinná bé'enē' yugu' bō' xihui', ate' tu'rúajtē bō' xihui' na'.

<sup>37</sup> Guzē didza' ca naca queē' Jesús, ate' bila'yōni bōnachi yúgu'tē yōdzō idú gásibi'ilō.

*Ruúnë Jesús xiná'anu nigula queë' Pedro**(Mt. 8:14-15; Mr. 1:29-31)*

<sup>38</sup> Ní'irö guyasë Jesús, en burúajë' lu yu'u ga na' tu'dubë' tu'sedë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu. <sup>39</sup> Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë Jesús zían nupa te'e**(Mt. 8:16-17; Mr. 1:32-34)*

<sup>40</sup> Cate' chiribía gubidza, yúgu'të nupa nacuá'len léguequi nupa na' te'e que queëguequi yödzhüë' bila'dxin ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. <sup>41</sup> Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöziguequi náquië' Cristo.

*Runë Jesús libán luyú Galilea**(Mr. 1:35-39)*

<sup>42</sup> Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guílaj Jesús. Cate' bila'dxinë' ga na' zoë', gulë'ë'niguequinë' ulu'tsenë' Lë', para cabí uzë'ë ga na' nacu'ë. <sup>43</sup> Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë' ni na' gusöl-lë'ë neda' ni.

<sup>44</sup> Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

**5***Ta'dzunba' böla zían**(Mt. 4:18-22; Mr. 1:16-20)*

<sup>1</sup> Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. <sup>2</sup> Ní'irö bilé'enë' Jesús chopá bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxón böla lë'egaca bárcodo' na', en ta'guibë' yöxaj böla quégaquië'. <sup>3</sup> Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látido' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönachi zían nacuá' lu yu bidxi na'. <sup>4</sup> Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönli'-ba' böla.

<sup>5</sup> Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxaj.

<sup>6</sup> Cate' chigula'zaljë' le, gula'zönë' zióntëröba' böla, ate' réquitiqui' iröza' yöxaj böla na'.

<sup>7</sup> Ní'irö bulu'lá'a bulu'lu'ísinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa. <sup>8</sup> Cate' bilé'enë' Simón Pedro lë' ni, ní'irö buzóa zxi'bë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

<sup>9</sup> Caní gunné' tu' radxi ridzöbinë' Pedro ni'a quégacaba' böla zían na' gula'zöngaquië'-ba', en lësca' caní guca quégaca nupa nacuá'len lë'. <sup>10</sup> Guladxi gula'dzöbinë' ca' Jacobo, en Juan, yugu' zxi'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

<sup>11</sup> Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sôjácalenë' Jesús.

*Ruúnë' Jesús tu bönni' ré'enë' huë' nudzu' ruzödi*

*(Mt. 8:1-4; Mr. 1:40-45)*

<sup>12</sup> Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö rë'ënu', huáca unu' neda'.

<sup>13</sup> Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxitë huë' nudzu' queë' bönni' na'. <sup>14</sup> Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjlu'í' cuinu' lahuë' bixúz, ate' yöjnödzej que yudo' le rulu'í' nuhuóacu' dxi'a ca gunná bë'ë Moisés, lë' na' ulu'í' légaquië' chibóacu'.

<sup>15</sup> Guzëtërö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi. <sup>16</sup> Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin*

*(Mt. 9:1-8; Mr. 2:1-12)*

<sup>17</sup> Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'. <sup>18</sup> Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. <sup>19</sup> Cate' biti' gula'dzölinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láchui'lö bönachi ni' lahuë' Jesús. <sup>20</sup> Cate' gúquibe'enë' Jesús ca na' ta'yéajlé'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

<sup>21</sup> Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

<sup>22</sup> Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní? <sup>23</sup> Biti' naca böniga nu guië'sö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. <sup>24</sup> Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni. Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

<sup>25</sup> La' guyásatë' bönni' huë' na' lógaquië', ate' bu'ë lë' na' gúti'në', en söhuöjë' lidxë', rigu'ë Dios yöl-la' ba. <sup>26</sup> Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

*Jesús rulidzë' Leví*

*(Mt. 9:9-13; Mr. 2:13-17)*

<sup>27</sup> Gudödi gulaca yugu' lë' ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

<sup>28</sup> La' guyásatë' Leví, ate' bu'cá'anë' yúgu'të, en sa'yéajlenë' Jesús.

<sup>29</sup> Gudödi ni' benë' Leví na' tu gü'í' huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bö'lenë' légaquië' tahuë'. <sup>30</sup> Ní'irö

bönni' yudo' tu'sédinē' len yugu' bönni' yudo' fariseo gula'nnē' quégaquiē' bönni' usēda queē' Jesús, ta'nnē':

—¿Bizx que rē'aj rágulenli' yugu' bönni' uquízaj, en ia'zícá'rē' bönni' dul-la'?

<sup>31</sup> Bubi'ē didza' Jesús, rē' légaquiē':

—Yugu' bönni' nacu'ē dxi'a bití' naquíniguequinē' nu un bönachi, pero bönni' té'enē' naquíniguequinē' nu un bönachi. <sup>32</sup> Za'a, calēga ulídzagaca'-nē' bönni' tsahui', pero za'a ulídzagaca'-nē' bönni' dul-la' para ulu'bí'i ládxi'gaquiē'.

*Ta'nábinē' Jesús ca naca que yöl-la' run gubasa*

*(Mt. 9:14-17; Mr. 2:18-22)*

<sup>33</sup> Ní'irō bönni' yudo' na' gula'nábinē' Jesús, ta'nnē':

—¿Bizx que tunē' gubasa zían luzuí bönni' dá'gaquiē' Juan, en tu'lidzē' Dios, ate' tunē' ca' caní bönni' dá'gaquiē' yugu' bönni' yudo' fariseo, pero bönni' dá'gaquiē' Li' tē'aj tahuē'?

<sup>34</sup> Jesús rē' légaquiē':

—¿Naru' huácatsō gunli' ga ilunē' gubasa bönni' nacu'ē laní que yöl-la' rutsaga na' tsanni ni' bönni' rutsaga nē'ē zóalenē' légaquiē'? <sup>35</sup> Huadxín dza cate' udúē' bönni' rutsaga nē'ē ga nacu'ē. Dza ní'irō ilunē' gubasa.

<sup>36</sup> Ní'irō bucúdzu'ē didza' Jesús ca naca lē ni, ate' rē' légaquiē':

—Cuntu nu bönni' ichúguiē' tu lari' cubi chinadía, en cuejē' tsötaca' le udē'ē lē'e lari' tēbi. Channō gunē' caní, calēgasō gaca ditaj lari' cubi na', pero lári'do' na' birúaj lē'e lari' cubi na' bití' tsöjlōza lari' tēbi na'. <sup>37</sup> Lē'sca' caní, cuntu nu bönni' riguē'ē xisi uva cubi lu buzudi guídi gula. Channō nu gun caní, xisi uva cubi na' uchōza' buzudi guídi gula, ate' ilalaj xisi uva na', ate' gaca ditaj buzudi guídi gula na'. <sup>38</sup> Que lē ni na' ral-la' cá'aru' xisi uva cubi lu buzudi guídi cubi, ate' irópatē ilaca chí'i. <sup>39</sup> Channō zoa nu rē'aj xisi uva gula, bití' guē'ēnitē gu'aj xisi uva cubi, tu' rna: “Nácarō sizxí' xisi uva gula na'.”

## 6

*Bönni' usēda queē' Jesús ta'lecjē' do xzoa' xtila dza lá'ayi*

*(Mt. 12:1-8; Mr. 2:23-28)*

<sup>1</sup> Cate' naca tu dza lá'ayi quégaquiē' bönni' judío, ridödē' Jesús gapa dē yōla xzoa' xtila, ate' bönni' usēda queē' ta'lecjē' do ga dxía xzoa' xtila. Ta'zxúbi'ni ná'agaquiē' le, en tahuē'.

<sup>2</sup> Ní'irō gula'nábinē' bönni' yudo' fariseo légaquiē', ta'nnē':

—¿Bizx que runli' le cabí ral-la' gunru' dza lá'ayi?

<sup>3</sup> Bubi'ē didza' Jesús, rē' légaquiē':

—¿Naru' cabí nulábanili' ca benē' David cate' gudunē', ate' gula'dún ca' nupa nacuá'len lē'? <sup>4</sup> Guyáziē' lu yu'u queē' Dios, en guzxi'ē yōta xtila tu'cu'ē lahuē' Dios, lē na' bití' ral-la' gáguru', pero tuz bixúz dē lataj ilahuē', ate' gudahuē' David le, en bē'ē ca' quéguequi nupa nacuá'len lē'.

<sup>5</sup> Ní'irō Jesús gudxē' légaquiē', rnnē':

—Neda', Bönni' Guljē' Bönachi, naca' xani dza lá'ayi.

*Tu bönni' narequi' nē'ē*

*(Mt. 12:9-14; Mr. 3:1-6)*

<sup>6</sup> Cate' naca ia'tú dza lá'ayi quégaquiē' bönni' judío, guyáziē' Jesús lu yu'u ga tu'dubē' tu'sédē' queē' Dios, en busédinē' nupa nacuá' ni'. Zoē' ca' tu bönni' ni' narequi' nē'ē ibēla.

<sup>7</sup> Yugu' bönni' yudo' tu'sédinē', en yugu' bönni' yudo' fariseo tu'yúē' Jesús para ila'lé'enē' channō únē' bönni' na' cate' naca dza lá'ayi quégaquiē' para ulu'dzölinē' nacxi ulu'zéguiē' Lē' didza'. <sup>8</sup> Réquibe'enē' Jesús le ta'zá' ládxi'gaquiē', ate' gudxē' bönni' na' narequi' nē'ē, rnnē':

—Guyasa. Guzúí gatsaj láhui'lō ni.

La' guyásatē' bönni' na', guzuínē'. <sup>9</sup> Ní'irō Jesús gudxē' yugu' bönni' yudo' na', rnnē':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

<sup>10</sup> Ní'irö buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. <sup>11</sup> Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

*Riböë' Jesús chínnuë' bönni' ilácagaquië' gubáz queë'*

*(Mt. 10:1-4; Mr. 3:13-19)*

<sup>12</sup> Dza ni' guyijë' Jesús ga naca tu lu gu'ado'. Bulidzë' Dios ni', ate' idú yëla bé'lenë' Dios didza'. <sup>13</sup> Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'. <sup>14</sup> Bulidzë':

Simón, (lë' ca' Pedro),

Andrés, (böché'ë Pedro),

Jacobo, en Juan, en Felipe, en Bartolomé,

<sup>15</sup> Mateo, en Tomás,

Jacobo, (zxí'inë' Alfeo),

Simón, (bönni' ruí'i ládxi'ë yödzö queë'),

<sup>16</sup> Judas, (böché'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúnë' Jesús bönachi zían*

*(Mt. 4:23-25)*

<sup>17</sup> Jesús bötjalënë' yugu' bönni' gubáz queë' na' lu gu'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacua'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacua' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídzë'ë Jesús, en ulu'huóaca lu yödzöhuë' té'eguequi. <sup>18</sup> Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. <sup>19</sup> Yúgu'të bönachi zían na' tuí'i ládxi'gaca ila'gán Jesús tu' ruúnë' léguequi len yöl-la' huáca queë'.

*Nupa náacagaca bica' ba, en nupa náacagaca bica' bayechi'*

*(Mt. 5:1-12)*

<sup>20</sup> Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queéli' lataj ga rinná bë'ë Dios.

<sup>21</sup> 'Bica' ba libí'ili' ridunli' le gunnë' Dios queéli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxidxili'.

<sup>22</sup> 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacua', en ila'nnë zi' queéli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljë' Bönachi. <sup>23</sup> Buli'sí' xibé dza na', en buli'dzeja, tu' naca zxön le guequi queéli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

<sup>24</sup> 'Bica' bayechi' libí'ili', dë yöl-la' tsahui' queéli', tu' chidë le ruzí'ili' xibé.

<sup>25</sup> 'Bica' bayechi' libí'ili' nuhuölej nudzé'eli' na'a, tu' huadunli'.

'Bica' bayechi' libí'ili' ruzxidxili' na'a, tu' huí'inili', en cödxí yéchi'li'.

<sup>26</sup> 'Bica' bayechi' libí'ili' ta'nnë yúgu'të bönachi dxi'a queéli'. Lësca' caní gulunë' xuz xtó'oli', gula'nnë dxi'a quégaquië' bönni' gula'zí' yë'ë, gula'nnë' náacagaquië' bönni' tu'ë didza' uláz queë' Dios.

*Ral-la' idxí'iru' nupa biti' ta'lé'e rë'u dxi'a*

*(Mt. 5:38-48; 7:12)*

<sup>27</sup> Gunnë' ca' Jesús:

—Libí'ili' zóali' ni, en riyónili' xtídza'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. <sup>28</sup> Guli'nabi Dios gaca dxi'a quégaca nupa tua' dō' queéli', en buli'lidzë' Dios inábili'-në' gácalenë' nupa ta'nnë' zí' queéli'. <sup>29</sup> Channö nu capa' tsölá'a xagu', buzë' ia'tsölá'a ca' xagu'. Channö nu cúa lari' naxóa cúdzu'u, bë' lataj cúa ca' xzo'. <sup>30</sup> Núti'tës nu bi inaba le dë quiu', bunödzej que, ate' nu cúa le nequi quiu', biti' unabu' le. <sup>31</sup> Ca ré'ënili' ilún bönachi queéli', lësca' caní guli'gún quéguequi.

<sup>32</sup> 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquië'. <sup>33</sup> Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'. <sup>34</sup> Channö runödzejali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë' quégaca nupa tun dul-la', tu' tunë' löza ulu'bí'i quégaequië' lë na' bulu'nödzejë'. <sup>35</sup> Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazë' Dios, Nu nácatëro lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dō'. <sup>36</sup> Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë' yúgu'të bönachi.

*Biti' ral-la' ichugu bë'ëru' que luzá'aru'*

*(Mt. 7:1-5)*

<sup>37</sup> Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. <sup>38</sup> Buli'nödzej que luzá'ali', ate' Dios gunnë' queéli'. Ulu'nödzejë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

<sup>39</sup> Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la' ichë'ë ia'tué' bönni' lo chul-la? Biti' ca' gaca, tu' ila'bixë' iropë' tu lu yeru. <sup>40</sup> Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

<sup>41</sup> ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'? <sup>42</sup> ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiöj lo'", en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

*Le runru' naca bë' le nácaru'*

*(Mt. 7:17-20; 12:34-35)*

<sup>43</sup> Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. <sup>44</sup> Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. <sup>45</sup> Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

*Chopa ca gaca cuéquiru' xilibi yu'u*

*(Mt. 7:24-27)*

<sup>46</sup> Gunnë' ca' Jesús:

—¿Bizx que rulídzali' neda', rnnali': "Xantu', Xantu'", pero biti' runli' ca rinná bë'eda' libí'ili'? <sup>47</sup> Ulu'ida' libí'ili' ca naca nu na' za' quia', en riyöni xtídza'a, en run ca rnna

xtídza'a. <sup>48</sup> Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínaj le, tu' nulibi ga naca lu guiöj. <sup>49</sup> Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínajtë, ate' gubixi dërö zö'ö que.

## 7

### *Jesús ruúnë'-bi' bi'i huen dxin queë' tu bönni' unná bë'* (Mt. 8:5-13)

<sup>1</sup> Cate' Jesús budxi bë'lenë' légaquië' didza' ni, guyázië' yödzö Capernaum. <sup>2</sup> Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. <sup>3</sup> Cate' biyönnë' bönni' ni didza' tu'ë bönachi ca naca queë' Jesús, la' gusöl-la'të' bal-lë' bönni' gula tu'zéajni'inë' bönni' judío ga na' zoë' Jesús, tsöjóta'yugaquië' lahuë' Lë' guidë' uduhuénë'-bi' bi'i huen dxin queë' na' ré'ebi'. <sup>4</sup> Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú láchí'gaquië', ta'nnë':

—Náquië' lesaca' bönni' na' gunu' queë' lë ni, <sup>5</sup> tu' runë' bal bönachi uládz queëru', en benë' tu yu'u queëru' ga rudúbiru' rusëdaru' queë' Dios.

<sup>6</sup> Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa', <sup>7</sup> en biti' naca' lesaca' guída' ga zu'. Que lë ni na' biti' burúguida' guída' ga zu'. Bë'ësö didza', ate' huóacatëbi' bi'i huen dxin quia'. <sup>8</sup> Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

<sup>9</sup> Cate' biyönnë' Jesús didza' ni, bubájinë' queë' bönni' na', ate' buécjë', en gudxë' bönachi na' zá'gaca cúdu'lë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

<sup>10</sup> Cate' bulu'dxinë' bönni' na' gusöl-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chibóacabi' bi'i huen dxin na'.

### *Jesús rusubanë'-bi' bi'i bönni' queënu tu nigula uzëbi*

<sup>11</sup> Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zián. <sup>12</sup> Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjcháchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zián bönachi uladza queënu nigula uzëbi na' söjácálen-nu. <sup>13</sup> Cate' Xanru' bilé'enë'-nu, buéchi' láchxë'ë-nu, ate' gudxë'-nu:

—Bíti'rö cödxu'.

<sup>14</sup> Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', lí' rea', guyasa.

<sup>15</sup> Ní'irö bubanbi'. Gurö'öbi' bi'i na' zí'alö nátibi', ate' gusí lobi' ruí'ibi' didza'. Jesús budöde'-bi' lu ná'anu xiná'abi'. <sup>16</sup> Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

<sup>17</sup> Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.



*Le rinabë' Juan, bönni' buquilë' bönachi nisa  
(Mt. 11:2-19)*

<sup>18</sup> Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, <sup>19</sup> ate' gusól-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guidé', o naru' ral-la' cöztu-në' bönni' yúbölö?" <sup>20</sup> Cate' bila'dxinë' bönni' na' nasól-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasól-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guidé', o naru' ral-la' cöztu-në' bönni' yúbölö?"

<sup>21</sup> La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. <sup>22</sup> Bubi'ë didza' Jesús, rë' chopë' bönni' na' nasól-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bil'é'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuöácagaquië' bönni' gü'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulatië'. Ta'yönnë' bönni' yechi' didza' dxi'a. <sup>23</sup> Bica' ba nu bití' gaca chopa ladxi', ate' za'len neda' sal-la' bití' runa' ca réqui nu na' ral-la' guna'.

<sup>24</sup> Cate' bönni' na' gusól-lë'ë Juan bulu'zë'ë ni', gusí lahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le?

<sup>25</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí' xibé yöl-la' tsahui', nacua' lédxigaquië' bönni' ta'nná bë'ë. <sup>26</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' lib'í'ili', ate' nayëpisëtë' ca nu ru'í didza' uláz queë' Dios. <sup>27</sup> Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risól-la'a-në' gubáz quia', inöruë' ca Li'.

Bönni' ni uchi'ë nöza ga tödu'.

<sup>28</sup> 'Neda' rea' lib'í'ili': Gapa nacua' bönachi, channö zoë' nu bönni' ru'ë didza' uláz queë' Dios, bití' nácarë' lo ca Juan, bönni' na' buquilë' bönachi nisa, pero nu nácatë'ro cuídi'sö ga rinná bë'ë Dios nayëpisëtë'ro ca Juan na'.

<sup>29</sup> Cate' bönachi ni', en bönni' tu'quizzjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, <sup>30</sup> pero yugu' bönni' yudo' fariseo, en bönni' yudo' tu'sédinë' xibá queë' Moisés bití' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

<sup>31</sup> Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácagaquië'?

<sup>32</sup> Nácagaquië' ca bí'ido' ta'guítjabi'. Ta'bö'öbi' lu yë'ëyi, en ta'bödxi'abi'. Ta'nnabi' tubi' ia'tubi': "Rucódxitu' queéli' gui, pero bití' ruyá'ali'. Rul-la yéchi'tu', pero bití' ribódxili'."

<sup>33</sup> Caní nácali' tu' bidë' Juan, bönni' buquilë' bönachi nisa, en bití' gudahuë' yöta xtila, en bití' gu'ë xisi uva, ate' rnnali' queë': "Tu' xihui' dzaga lë'." <sup>34</sup> Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizzjë', en ia'zica'rë' bönni' dul-la'." <sup>35</sup> Rea' lib'í'ili': Naca bë' nupa nápagaca yöl-la' réajni'i queë' Dios ni'a que le túngaca.

*Le benë' Jesús lidxë' tu bönni' yudo' fariseo*

<sup>36</sup> Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. <sup>37</sup> Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinu ni' nuá'anu tu böga'do' néquini guiöj nazaca' le yudzu tu le rilá' zixixi. <sup>38</sup> Cate' bidxinu zaca' cúdzu'lë' Jesús, gurö'önu xini'ë ribódxinu. Ní'irö gusí lonu rigú'unu nisa ribódxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zixixi. <sup>39</sup> Cate' bönni' yudo'

fariseo na' nulidzë' Jesús bilé'enë' lë ni, guzá' láchxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquië' enë' nuzxi na', en nacxi nácanu nigula ni rigannu Lë', tu' nácanu nigula udá dzaga." <sup>40</sup> Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

<sup>41</sup> Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxië' que chopa iz, ate' ia'tuë' na' ral-lë'ë queë' lazxië' que chopa beo'.

<sup>42</sup> Tu' cabí dë quégaquië' dumí ulu'guíxjé' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

<sup>43</sup> Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

<sup>44</sup> Ní'irö buécjé' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quívida' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu. <sup>45</sup> Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. <sup>46</sup> Biti' gulú'u icja' le za, pero nigula ni gulú'unu ni'a lë na' rilá' zixi. <sup>47</sup> Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

<sup>48</sup> Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

<sup>49</sup> Yugu' bönni' na' ta'bó'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

<sup>50</sup> Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi láchxu'u.

## 8

### *Yugu' nigula tácalennu Jesús, ta'gú'unu le tahuë'*

<sup>1</sup> Gudödi gulaca lë ni, gudë' Jesús gapa nacuá' zían yödzö zxon, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. <sup>2</sup> Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüë' yugu' yödzöhuë' gü'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. <sup>3</sup> Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nödztjanu le dë quégacanu.

### *Rucúdzu'ë didza' Jesús ca naca queë' bönni' guz*

*(Mt. 13:1-9; Mr. 4:1-9)*

<sup>4</sup> Bila'rúaj bönni' zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

<sup>5</sup> —Birúajë' bönni' guz, söjësië' xisedo'. Cate' ni' söjësië', bulu'huöxaj bal-la xisedo' na' ga naca la' nöza, ate' bulu'libi bönni' léguequi. Bila'dxinba' ca' biguínido', en gulé'ajba' xisedo' na' dzö'ö la' nöza. <sup>6</sup> Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë' tu' cabí nalupa' yu na'. <sup>7</sup> Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. <sup>8</sup> Bulu'huöxaj ia'bal-la xisedo'

na' ga naca luyú bëbu. Cate' chigula'zxön, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnnë':

—¡Nu zoa nagui, en riyöni ral-la' uzé nagui!

*Bizx que rucúdzu'ë Jesús didza'*

*(Mt. 13:10-17; Mr. 4:10-12)*

<sup>9</sup> Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

<sup>10</sup> Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö bönachi ni, ru'ílëna' léguequi didza' le rucúdzu'a didza' para cate' ulu'yúë', biti' ila'lé'enë', en cate' ila'yönnë', biti' ila'yéajni'inë'.

*Rigu'xjö'ë Jesús le rulu'í le bucúdzu'ë didza'*

*(Mt. 13:18-23; Mr. 4:13-20)*

<sup>11</sup> Gunnë' ca' Jesús:

—Caní naca le rulu'í lë na' bucúdzu'a didza'. Xisedo' na' naca xtídzë'ë Dios. <sup>12</sup> Xisedo' na' bulu'huöxaj la' nöza tu'lu'í ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'. <sup>13</sup> Xisedo' na' bulu'huöxaj lu yu ga rö'ö guiöj tu'lu'í ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huöatë ládxi'gaquië'. <sup>14</sup> Xisedo' na' bulu'huöxaj ga bulu'lén lubá yötsi' tu'lu'í ca raca quégaquië' bönni' ta'yönnë' didza' na', en cate' chibila'yönnë', yugu' le tu'í ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'. <sup>15</sup> Xisedo' na' bulu'huöxaj ga naca luyú bëbu tu'lu'í ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxí' tunë' ca rnna didza' na'.

*Rucúdzu'ë didza' Jesús que le rigú'u bení' lédxiru'*

*(Mt. 4:21-25)*

<sup>16</sup> Gunnë' ca' Jesús:

—Cuntu nu bönni' ruquelë'ë guí, ate' la' rudúsi'të' le gu'ina, en biti' rigü'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. <sup>17</sup> Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

<sup>18</sup> 'Que lë ni na', buli'zé nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

*Xinë'ë Jesús, en yugu' bönni' böchë'ë*

*(Mt. 12:46-50; Mr. 3:31-35)*

<sup>19</sup> Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala' ga zoë' tu' nacuá' bönachi zían ni'. <sup>20</sup> Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' ilu'ílenë' Li' didza'.

<sup>21</sup> Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

*Jesús ribequi dxíë' bö' budunu'*

*(Mt. 8:23-27; Mr. 4:35-41)*

<sup>22</sup> Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö söjácate'. <sup>23</sup> Tsanni ni' ta'dödë' lu nísado' na', rásie' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zcan nisa, en zoa bönadxi quégaquië'. <sup>24</sup> Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en guró'ö dxi lu nísado' na'. <sup>25</sup> Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rna xtídzë'ë.

*Tu bönni' yödzö Gadara yu'u lë' bö' xihui'*

*(Mt. 8:28-34; Mr. 5:1-20)*

<sup>26</sup> Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea. <sup>27</sup> Cate' birúajë' Jesús lë'e bárcodo' na' ga naca lu yu na', dutságuie' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zcan bulóaj ga nádjagaca yeru ba. <sup>28</sup> Cate' bönni' na' yu'u bö' xihui' lë' bilé'enë' Jesús, guródxí'ë zidzaj, ate' buzóa zxi bë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayëpisëtëre'? Ráta'yua' lo' cabí usaca' zi'u neda'.

<sup>29</sup> Caní gunné' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúguie' lë' du guie', en bulu'xéjanë' bregui' guie' ni'a në'ë, pero blë'ë yugu' du guie' na', ate' bö' xihui' na' yu'u lë' guchë' lë' lu lataj cá'asö. <sup>30</sup> Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zían lea'.

Caní gunná tu' yú'ugaca bö' xihui' zían bönni' na'. <sup>31</sup> Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca. <sup>32</sup> Nacuá'aba' ca' tu cõ'öba' cuchí zían ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchí zían na'. Jesús bë'ë léguequi lataj. <sup>33</sup> Bulu'rúaj yugu' bö' xihui' lu bönni' na', en yöjtsú'ugaca cuchí zían na', ate' yójacaba' cuchí zían na' ga naca tu lë'e guí'oj. Yöjbíxigacaba' lu nísado', ate' ni' gula'yëpiba' nisa, gulátiba'.

<sup>34</sup> Cate' bila'lë'enë' bönni' tu'yúgaquië'-ba' cuchí zían na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhuójgaquië' yöjtíxjöi'iguequinë' nupa nacua' yödzö na', en nupa nacua' la' guixi' ni'. <sup>35</sup> Ní'irö bila'rúajë' bönni' yödzö na', yöjyúgaquië' lë' na' guca. Cate' bila'dxinë' ga na' zoë' Jesús, bila'lë'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizóë', ate' guládxinë'. <sup>36</sup> Nupa na' bila'lë'e lë' na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'. <sup>37</sup> Ní'irö yúgu'të bönachi zían na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuóje'. <sup>38</sup> Bönni' na' bulu'rúaj bö' xihui' na' lë' gúta'yue' lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnnë':

<sup>39</sup> —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

*Jesús ruúnë'-bi' bi'i nigula queë' Jairo enca' nigula na' gudannu lari' nácuë'*

*(Mt. 9:18-26; Mr. 5:21-43)*

<sup>40</sup> Cate' budxinë' Jesús ia 'tsölá'a nísado' na', bulu'dzeja bönachi zían nacuá' ni' ni'a queë' Lë', tu' ta'böza Lë'. <sup>41</sup> Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'. <sup>42</sup> Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zían Lë'.

<sup>43</sup> Nútsa'nu tu nigula ladaj bönachi zían na', chiguca chinnu iz riguí'i rizáca'nu. Biti' ruhu'i rön queënu que huë' quégaca cázanu nigula, ate' chibutönu dëra le dë queënu, riguízjanu nupa tu'ún bönachi, pero biti' guca nu bönni' únë'-nu. <sup>44</sup> Gubíga'nu zaca' cúdzulë' Jesús, en gudannu ruí'i lari' nácuë', ate' la' buí'të huë' rön queënu.

<sup>45</sup> Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë', ta'nnë':

—Bönni' Usedi, nacuá' bönachi zían ni, tu'quirö Li', en tu'dxiga' Li', ate' ¿rnnatso': "¿Nuzxi na' gudán neda'?"

<sup>46</sup> Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

<sup>47</sup> Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'ínu Lë' lógaca bönachi zían na' bizx que na' gudannu lari' nácuë', en ca na' guca, la' böácatënu. <sup>48</sup> Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládXu'u.

<sup>49</sup> Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízxjanu'-në' Bönni' Usedi.

<sup>50</sup> Cate' biyönnë' Jesús lë ni, bubí'ë didza', rë' bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

<sup>51</sup> Cate' guyázië' Jesús yu'u na', biti' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. <sup>52</sup> Ta'bödxi nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bítirö cödxili'. Biti' nátibi' nigúlado' ni. Rásisibi'.

<sup>53</sup> Bulu'titjë' Lë' tu' nözguequinë' chinátibi'. <sup>54</sup> Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

<sup>55</sup> Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. <sup>56</sup> Bulu'bánninë' xuz xiná'abi', pero Jesús gunná bé'enë' légaquië' cuntu nu ilë' ca na' guca.

## 9

### *Risöl-lë'ë Jesús bönni' usëda queë' tsöjéngaquië' libán*

*(Mt. 10:5-15; Mr. 6:7-13)*

<sup>1</sup> Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e. <sup>2</sup> Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. <sup>3</sup> Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en biti' ixóa yenli' chopa lari'. <sup>4</sup> Bítitës yu'u ga tsú'uli', guli'sóa ni' cate' uzá'aröli' yödzo na'. <sup>5</sup> Gátitës ga biti' ilún bönachi libí'ili' bal, buli'rúaj yödzo na', en guli'cuíbi bëchtö da' lë'e lábali', le uluí'i légaquië' nagá'ana xíguia' nabága'gaquië'.

<sup>6</sup> Ní'irö bila'rúajë' bönni' usëda queë' na'. Gula'dödë' yúgu'të yödzo'do', tunë' libán que didza' dxi'a, en tu'únë' nupa te'e yúgu'të lu yödzo na'.

*Ca gútië' Juan, bönni' buquile' bönachi nisa*  
(Mt. 14:1-12; Mr. 6:14-29)

<sup>7</sup> Biyönnë Herodes, bönni' rinná bē'ē, ca naca yúgu'tē le runē' Jesús, ate' gurō'ē böniga, tu' ta'nná bönachi:

—Juan na' chibubanē' lu yöl-la' guti.

<sup>8</sup> Ia'bal-lē' ta'nnē':

—Chibulē'ē Elías, bönni' na' bē'ē didza' uláz queē' Dios.

Ia'bal-lē' ta'nnē':

—Chibubanē' tu bönni' bítsē'ē yugu' bönni' gulu'ē didza' uláz queē' Dios dza ni'te.

<sup>9</sup> Herodes na' gunnē':

—Juan na' burixa' yenē'. ¿Nuzxi caz bönni' ni, riyönda' queē' runē' yugu' lē ni?

Rizóa ribō'ē Herodes ilé'enē' Jesús.

*Rugahuē' Jesús chi-un gayuá' bönachi*  
(Mt. 14:13-21; Mr. 6:30-44; Jn. 6:1-14)

<sup>10</sup> Cate' bulu'dxinē' bönni' gubáz nasól-lē'ē Jesús ga zoē' Lē', bulu'siyönnē' Lē' yúgu'tē le gulunē'. Ní'irō guchē'ē Jesús légaquiē' quez. Yöjáquiē' tu lataj cá'asō lu xiyú yödzō Betsaida. <sup>11</sup> Cate' chinöziguequi bönachi lē ni, yöjnóguequi Lē', ate' Jesús benē' léguequi bal, en bē'lenē' léguequi didza' ca rinná bē'ē Dios, ate' bunē' nupa te'e.

<sup>12</sup> Cate' chizá' ral-la dza na', idxínmutē' bönni' gubáz queē' Jesús gula'bíguē'ē ga zoē', en tē' Lē':

—Busöl-la' bönachi ni tsöjaca gapa dē yödzōdo', en gapa dē yú'udo' idú gásibi'ilō para tsöjtíjagaquiē' gapa ulu'gá'anē', en bi ilahuē', tu' naca lataj cá'asō ga ni zóaru'.

<sup>13</sup> Ní'irō Jesús rē' légaquiē':

—Guli'gu'ē libí'ili' le ilahuē'.

Tē' Lē':

—Gáyu'sō yōta xtílado' dē, en chópasōba' böla dēba' queētu', o ¿naru' huayéajtsatu' tsöjō'öutu' le ilágugaca bönachi zían ni?

<sup>14</sup> Nacu'ē ca chi-un gáyu'ē bönni' ga na'. Ní'irō Jesús gudxē' yugu' bönni' usēda queē', rnnē':

—Guli'gún ga ila'bō'ē tu cō' huéajgaquiē', ilaca ca chi-un huéajgaquiē'.

<sup>15</sup> Caní gulunē', ate' gula'bō'ē yúgu'tē'. <sup>16</sup> Ní'irō gudélé'ē Jesús gayu' yōta xtila na', en chópaba' böla na', ate' guchisa lahuē' ruyúé' lúzxiba, en rē' Dios: “Xclenu.” Ní'irō buzxuzxjē' léguequi, en bē'ē quégaquiē' bönni' usēda queē' para ulu'cu'ē lógaca bönachi na'.

<sup>17</sup> Gulahuē' yúgu'tē', en bulu'huöljanē'. Gudödi na' bulu'tubē' yugu' bizxaj bugá'ana, ate' bulu'lié' idú chinnu ga'bōra.

*Rnnē' Pedro Jesús náquiē' Cristo*  
(Mt. 16:13-19; Mr. 8:27-29)

<sup>18</sup> Tu dza tsanni ni' zoē' quez Jesús, rulidzē' Dios, bila'dxinē' bönni' usēda queē' ga zoē', ate' gunábinē' légaquiē', rnnē':

—¿Nuzxi ta'nná bönachi naca' neda'?

<sup>19</sup> Bulu'bi'ē didza', ta'nnē':

—Ta'nná bal-la bönachi nacu' Juan, bönni' buquile' bönachi nisa. Ta'nná ia'bal-lē' nacu' Elías, ate' ta'nná ia'bal-lē' nacu' tu bönni' bítsē'ē yugu' bönni' gulu'ē didza' uláz queē' Dios dza ni'te, en nubanē' lu yöl-la' guti.

<sup>20</sup> Ní'irō Jesús gunábinē' légaquiē', rnnē':

—Názxi libí'ili', ¿nuzxi rnnali' naca'?

Bubi'ē didza' Pedro, rnnē':

—Nacu' Cristo nasól-lē'ē Dios.

*Riguíxjō'ē Jesús ca si' ilútiē' Lē'*  
(Mt. 16:20-28; Mr. 8:30-9:1)

<sup>21</sup> Ní'irö Jesús gúdxidë'ë légaquië', en gunná bé'enë' légaquië' cuntu nu ilé' Nu náquië' Lë'. <sup>22</sup> Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zëajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

<sup>23</sup> Gudxë' ca' yúgu'të':

—Channö rë'enë' nu bönni' tē'ë neda', ral-la' uzóë' tsölá'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca tē'ë neda'. <sup>24</sup> Núti'tës bönni' ruí'i ládxë'ë gun chí'ë yöl-la' na'bán queë', unítie' le, pero channö unítie' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. <sup>25</sup> Biti' bi uzi'ë xibé tu bönni' channö utubë' queë' yúgu'të le dë yödzölió ni, pero unítie' tsaz yöl-la' na'bán queë'. <sup>26</sup> Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bë'a, dzágagaca neda' yöl-la' zxon queë' Xuza', en yöl-la' zxon quégaquië' gubáz lá'ayi queë' Dios. <sup>27</sup> Le nácatë rea' libí'ili', nacuá' bal-lë' bönni' ni bití' ilátie' cate' ila'lé'erönë' dza idinná bë'ë Dios.

*Ridzá' ca riná' lahuë' Jesús*

*(Mt. 17:1-8; Mr. 9:2-8)*

<sup>28</sup> Cate' bizá'a xunu' gubidza gudödi bē'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. <sup>29</sup> Tsanni ni' ruí'ilenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'. <sup>30</sup> Ní'irö bulu'luí'i lógaquië' chopë' bönni' ga zoë' Lë' tuí'ilenë' Lë' didza'. Nácagaquië' Moisés, en Elías. <sup>31</sup> Chopë' ni gula'yëpë' yösa bení', ate' tuí'ilenë' Jesús didza' ca si' uzë'ë yödzölió ni, gátie' lu yödzö Jerusalén. <sup>32</sup> Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'. <sup>33</sup> Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. <sup>34</sup> Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. <sup>35</sup> Ní'irö biyön chí'i Nu ruí'i didza' lu böaj na', rna:

—Bönni' ni náquië' Zxí'ina'. Nadxí'ida' Lë'. Buli'zë nágali' didza' gu'ë.

<sup>36</sup> Cate' budxi bë' didza' chí'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulë' ca naca le bila'lé'enë'.

*Ruúnë' Jesús bi'i bönni' yu'u bö' xihui' lëbi'*

*(Mt. 17:14-21; Mr. 9:14-29)*

<sup>37</sup> Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zían dutságagaca Jesús. <sup>38</sup> Ní'irö bē'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. <sup>39</sup> Yu'u bö' xihui' lëbi' le run ga ribödxí'abi', en ruxízida' lëbi'. Run ga ribía bidxina' zxoná' ruá'abi', en rurixi rutúluda' lëbi', ate' catu caz rusán lëbi'. <sup>40</sup> Gúta'yua' lógaquië' bönni' usëda quiu' ulu'béajë' le, pero bití' gula'zëqui'në'.

<sup>41</sup> Bubi'ë didza' Jesús, rnnë':

—Libí'ili', bití' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queëli'? Dijuá'a-bi' bi'i bönni' quiu' ni.

<sup>42</sup> Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu nē'ë xúzibi'.

<sup>43</sup> Bulu'bani yúgu'të bönachi ni' ca naca yöl-la' huáca zxon queë' Dios.

*Jesús ru'ë didza' leyúbölö ca si' ila'zönë' Lë'**(Mt. 17:22-23; Mr. 9:30-32)*

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', <sup>44</sup>rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

<sup>45</sup>Biti' gula'yéajni'inë' bönni' usëda queë' didza' ni, tu' cabí ru'inë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

*Nu naca lo**(Mt. 18:1-5; Mr. 9:33-37)*

<sup>46</sup>Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. <sup>47</sup>Réquiibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzöë'-bi' cuitë'. <sup>48</sup>Ní'irö rë' légaquië':

—Núti'tës bönni' gunë' bal tu bí'ido' caní tu' néquiibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ládjali' nácarë' nōxaj ladxi', bönni' ni náquië' lo.

*Nu biti' ridá'baga' rë'u, rácalen rë'u**(Mr. 9:38-40)*

<sup>49</sup>Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

<sup>50</sup>Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

*Jesús ridil-lë' Jacobo, en Juan*

<sup>51</sup>Cate' chizá' gal-la' dza ral-la' gátie' Jesús, en huëpë' yehua' yubá, benë' bayudxi tsejë' Jerusalén. <sup>52</sup>Gusól-lë'ë yugu' bönni' gubáz queë' ila'nörüë' ca Lë', ate' yöjáquië' tu yödzödo' quégaca bönachi Samaria para tsöjpá'agaquië' ga ugá'anë' Jesús tu yëla. <sup>53</sup>Yugu' bönni' yödzö na' biti' gulunë' Jesús bal tu' chinaca queë' sa'yéajë' Jerusalén. <sup>54</sup>Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

<sup>55</sup>Buécjë' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'. <sup>56</sup>Bida' ni neda', Bönni' Guljë' Bönachi, calëga para usunitia' yöl-la' na'bán quégaca bönachi, pero bida' dusólá' bönachi.

Ní'irö yöjáquië' yödzö yúbölö.

*Nupa të'ëni tsöjácálen Jesús**(Mt. 8:19-22)*

<sup>57</sup>Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lëna' Li' gátitës ga tseju'.

<sup>58</sup>Jesús rë' lë':

—Yúgu' böza', nacuá' zxan bulóaj quégacaba', ate' biguínnido', dxíagaca xcá'agacaba', pero neda', Bönni' Guljë' Bönachi, biti' dë quia' ga gáta'a uzí ládxa'a.

<sup>59</sup>Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuza'.

<sup>60</sup>Jesús gudxë' lë':



—Bë' lataj bönni' chizóa ilátië' ulu' cáché'ë nupa chinati quégaquië', pero li', guyéaj, yöjén libán ca inná bë'ë Dios.

<sup>61</sup> Ní'irö bidxinë' ia'túë' ca', en rë' Jesús:

—Xan, rë'ënda' sá'lëna' Li', pero benna neda' lataj tseja' tsöjégacada'-në' didza' di'a dza quia'.

<sup>62</sup> Jesús gudxë' lë':

—Núti'tës bönni' ruí'i ládxe'ë le raca yödzölió náquië' ca tu bönni' rugá'anë'-ba' bëdxi, en ruyúë' zaca' cúdzu'lë'. Nu run caní bití' naca lesaca' tsaza ga rinná bë'ë Dios.

## 10

### *Risöl-lë'ë Jesús tsónnalalaj yu' chië' bönni' tsöjéngaquië' libán*

<sup>1</sup> Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopá huéajgaquië' para ila'nöruë' ca Lë', en tsöjáquië' yúgu'të yödzö, en yödzödo' gapa chizóa tödë' Lë'. <sup>2</sup> Gudxë' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacua'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'. <sup>3</sup> Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' söjácaba' ladjagacaba' bö'cu' guí'a sínia'. <sup>4</sup> Bití' guá'ali' yöxaj dumí, en calëga buzudi yöta, en bití' guá'ali' ia'tú cö' xiráchuli', en bití' tseli' para güí'ilenli' bönachi didza' gapa naca la' nöza. <sup>5</sup> Gáti'tës yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni." <sup>6</sup> Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. <sup>7</sup> Guli'gá'ana yu'u ga na' tsú'uli', en guli'guí'aj guli'gagu bi ilunnë' queëli', tu' udzöli quézinë' bönni' huen dxin le gahuë'. Bití' tödili' yu'u yu'u. <sup>8</sup> Gáti'tës yödzö ga tsú'uli', ate' ilún libí'ili' bal, guli'gagu le ulu'cu'ë loli'. <sup>9</sup> Buli'ún nupa te'e nacua' yödzö na', en guli'guíë' léguequi: "Chibidxín le rinná bë'ë Dios ga zóali'." <sup>10</sup> Gáti'tës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali': <sup>11</sup> "Bëchtö que ládza'li' le da' lë'e lábatu' ruquinnajtu', le ruluí'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." <sup>12</sup> Neda' rea' libí'ili', cate' idxín dza ichúguië' Dios quégaca bönachi, ila'guí'i ila'zaca'rö bönachi yödzö ni' ca ila'guí'i ila'zaca' bönachi yödzö Sodoma, nupa ni' busunítië' Dios.

### *Le gaca quégaca nupa bití' ulu'bí'i ládxi' gaca*

*(Mt. 11:20-24)*

<sup>13</sup> Gunnë' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládxi'gaquië'. <sup>14</sup> Que lë ni na', cate' idxín dza ichúguië' Dios quégaca bönachi, quí'i sáca'röli' ca ila'guí'i ila'záquië' bönni' yödz Tiro, en yödz Sidón. <sup>15</sup> Libí'ili', bönachi Capernaum. Réquili' tsázali' yehua' yubá. Huó'tjali' tsöjtsázali' lataj chul-la quégaca nupa nátigaca.

<sup>16</sup> Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

### *Bönni' yöjéngaquië' libán tu'dxinë' ga zoë' Jesús*

<sup>17</sup> Cate' tsónnalalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

18 Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.  
 19 Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en bití' bi gaca queëli', ate' ucúl-lali' yöl-la' unná bë' que tu' xihui', nu bití' rilé'e rë'u dxi'a. 20 Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

### *Rudzéjanë' Jesús*

(Mt. 11:25-27; 13:16-17)

21 La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero buluí'iguequinu'-bi' bí'ido' ca naca. ¡Ca' gaca, Xuza', tu' caní' guyaza ládxi'u!

22 Ní'irö gunnë':

—Yúgu'të budödë' Xuza' lu na'a. Cuntu nu bönni' nözinë' Nu náquië' Zxí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxí'inë' nözinë', ate' inözigaca ca' nupa na' Zxí'inë' rë'enë' uluí'inë' léguequi Xuzë'.

23 Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili', 24 tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulë'ënnë' ila'lé'enë' le rilé'eli', pero bití' bila'lé'enë' le. Gulë'ënnë' ila'yönnë' le riyönili', pero bití' bila'yönnë' le.

### *Tu bönni' Samaria, bönni' tsahui'*

25 Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

26 Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

27 Bubi'ë didza' bönni' na', rnnë':

—Caní' rna: "Idxi'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxi'inu' bönni' luzó'o ca nadxí'i cuinu'."

28 Jesús rë' lë':

—Dxi'ado' bubí'u didza'. Ben caní, ate' gata' quiu' yöl-la' na'bán na'.

29 Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'guë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'. 31 Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'. 32 Gudödë' ca' ni' tu bönni' nababë' zxi'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'. 33 Lë'sca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi ládxi'ë lë'. 34 Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. 35 Cate' za' rení' ia'tú dza, en chizóa uzë'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'." 36 Na'a, ¿nacxi runi li'? ¿Núzxilë' bönni' yonna ni' gúquië' bönni' luzé'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi ládxi'ë lë'.

Ní'irö Jesús gudxë' lë':

—Guyéaj na'a, yójén ca' li'.

*Le benë' Jesús lídxigacanu Marta, en María*

<sup>38</sup> Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu. <sup>39</sup> Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë. <sup>40</sup> Marta na' bubi buguí'inu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'í ládxi'tso' neda' tu' nucá'anabi' bi'í zxila' ni neda', ate' tuza' runa' dxin? Gudxi-bi' gácalenbi' neda'.

<sup>41</sup> Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'í ládxi'u runu'. <sup>42</sup> Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' bití' udúa queëbi'.

## 11

*Ca ral-la' ulídzaru'-në' Dios  
(Mt. 6:9-15; 7:7-11)*

<sup>1</sup> Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'í'entu'-në' didza', ca benë' Juan, busédinë' bönni' dá'gaquië' lë'.

<sup>2</sup> Ní'irö Jesús rë' légaquië':

—Cate' ulídzali'-në' Dios gü'í'ilenli'-në' didza', guli'ná:  
Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'u Li' luyú ni, ca na' raca yehua' yubá.

<sup>3</sup> Benna le gágutu' na'a dza.

<sup>4</sup> Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

<sup>5</sup> Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila <sup>6</sup> tu' si' bidxinë' quia' böchi' luzá'a, zë'ë zi'tu', pero bití' bi dë le gu'a-në' gahuë'.” <sup>7</sup> ¿Naru' ubi'ë didza' caní bönni' na' zoë' yu'u, guí'ë lë': “Biti' utsó'o neda' tu' chinayayaj yu'u, en chidë'lengacabi' bi'í quia' neda', ate' bití' gaca chasa' bi gunna' quiu'”? <sup>8</sup> Neda' rea' libí'ili': Sal-la' bití' chasë' bi unödzjë' queë' tu' náquië' böchi' luzë'ë, pero chasë', en unödzjë' queë' idutë le riquinnë' para cabirö upízxjanë' lë'. <sup>9</sup> Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'. <sup>10</sup> Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

<sup>11</sup> 'Channö zoë' nu bönni' ládjali', en náquië' xuz, ate' channö zxí'inë' inábibi' lë' yöta xtila, ¿naru' unödzjatsë' queëbi' guiöj? Channö inábibi' lë' tuba' böla, ¿naru' unödzjatsë' queëbi' bëla? <sup>12</sup> Channö inábibi' lë' dxita que böra, ¿naru' unödzjatsë' queëbi' xöjnö'?

<sup>13</sup> Caní naca, nácali' libí'ili' huiá' dö', pero nözili' unödzjali' quégacabi' zxí'inili' le naca dxi'a. Nácatërö löza Xúzili' zoë' yehua' yubá gunnë' queëli' Dios Bö' Lá'ayi, nülöli' inábili' Lë'.

*Ta'nnë' runë' dxin Jesús len yöl-la' huáca que tu' xihui'  
(Mt. 12:22-30; Mr. 3:19-27)*

<sup>14</sup> Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacuá' ni'.

<sup>15</sup> Bal-la bönachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

<sup>16</sup> Ia'bal-la bönachi na' gulë'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá. <sup>17</sup> Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luz'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi.

<sup>18</sup> Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? <sup>19</sup> Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. <sup>20</sup> Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

<sup>21</sup> Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'. <sup>22</sup> Na'a, channö zë'ë ia'tuë' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quísië' le dë queë' bönni' na'.

<sup>23</sup> Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

### *Ca naca que bö' xihui' rudxín xilataj*

*(Mt. 12:43-45)*

<sup>24</sup> Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxi'. Channö cabí idzöli que, inná: “Huöja' xilatja' ga ni' birúaja'.” <sup>25</sup> Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. <sup>26</sup> Ní'irö reaj, en röjxi' ia'gadxi bö' xihui', nácacagatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

### *Le naca bica' ba le naca idú*

<sup>27</sup> Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

<sup>28</sup> Bubi'ë didza' Jesús, gunnë':

—Nácacagatërö bica' ba nupa ta'yöni xtídzë'ë Dios, en tun ca rnna.

### *Ta'nábinë' Jesús gunë' le gaca bë' nuzxi náquië'*

*(Mt. 12:38-42; Mr. 8:12)*

<sup>29</sup> Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. <sup>30</sup> Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. <sup>31</sup> Cate' idxín dza ichúguië' Dios quégaca bönachi ila'guí' ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bë'ënu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí' nabága'gaca bönachi ni xíguia', tu' bídanu lënu, birúajnu ga naca zí'tu' para uduzë' náganu didza' réajni'i bë'ë Salomón, bönni' gunná bë'enë' bönachi Israel, pero na'a, zoa' neda' ni, en nayëpisëtëra' ca Salomón na'.

<sup>32</sup> Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí' nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

*Le rigú'u bení' lu icja ládxi'do'oru'*  
(Mt. 5:15; 6:22-23)

<sup>33</sup> Gunně' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. <sup>34</sup> Guiőj loru' naca ca tu le rigú'u bení' lu icja ládxi'do'oru'. Channö guiőj lo' naca dxi'a, idúteo' yudzu le naca bení', pero channö naca xihui' guiőj lo', idúteo' yudzu le naca chul-la. <sup>35</sup> Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o. <sup>36</sup> Caní naca, channö idúteo' nalísinu' le naca bení', en biti' bí zóalen lí' le chul-la, yúgu'të ilé'enu' dxi'a ca raca cate' ruzení' quiu' guí'.

*Jesús ruzéqui'ë yugu' bönni' yudo' didza'*  
(Mt. 23:1-36; Mr. 12:38-40; Lc. 20:45-47)

<sup>37</sup> Cate' budxi bē'ë didza' ni Jesús, tu bönni' yudo' fariseo bulidzē' Lē' para tsöjtágulenē' lē'. Cate' guyáziē' Jesús lidxē' bönni' yudo' na', gurō'ë rahuē'. <sup>38</sup> Cate' bönni' yudo' fariseo na' bilé'enē' Lē', bubáninē' tu' cabí gudibi nē'ë Jesús cate' sí' gahuē'. <sup>39</sup> Xanru' rē' lē':

—Libí'ili', bönni' yudo' fariseo, riguibi cuinli' ca riguibili' láhuilögaca le rē'aji ráhuili', pero lu icja ládxi'do'oli' ruhuídli', en rizá' ládxi'li' le ruá' dō'. <sup>40</sup> Libí'ili', bönni' biti' réajni'ili'. ¿Naru' cabí nōzili', Nu ben le zoa láhuisō ben ca' le yu'u lē'elō? <sup>41</sup> Na'a, guli'gún gun le dē queēli', ate' ní'irō huóaca dxi'a yúgu'të le dē queēli'.

<sup>42</sup> 'Bica' bayechi' libí'ili', bönni' yudo' fariseo. Riguízxjali' que yudo' tu cō' huéaj tu' chi cō' le rizí'ili' que xōhuéaj, en que guixi' ruda, en quégaca guixi' cuando', pero rudōdisili' le naca tsahui', en yōl-la' nadxí'i queēli' Dios. Yugu' lē' ni run bayudxi gunli', en biti' ucá'anali' ia'zica' lē' na' runli'.

<sup>43</sup> 'Bica' bayechi' libí'ili', bönni' yudo' fariseo. Rē'ënili' cō'oli' gapa naca lo lu yu'u ga rudúbili' rusédali' queē' Dios, en rē'ënili' ulu'lidza bönachi libí'ili' ba zxön gapa naca láhuilöguequi bönachi.

<sup>44</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isō tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

<sup>45</sup> Ní'irō bubí'ë didza' tu bönni' yudo' usedi raquiē' xibá queē' Moisés. Rē' Jesús:

—Bönni' Usedi, cate' rnno' caní, netu' ca' runu' zí'.

<sup>46</sup> Jesús rē' lē':

—Bica' bayechi' ca' libí'ili', bönni' yudo' usedi rácali' xibá queē' Moisés, tu' rusubága'gacali' bönachi tu yua' zí'i le cabí gaca nu guá', pero libí'ili' calēga láti'do'os biti' ruláhuili' le len ná'ali'.

<sup>47</sup> 'Bica' bayechi' libí'ili', tu' richísali' biquitaj quégaca ba ga nagáchi'gaquiē' bönni' gulu'ë didza' uláz queē' Dios, ate' gulútiē' xuz xtó'oli' légaquiē'. <sup>48</sup> Caní naca, runli' ba nalí runli' tuz le gulunē' xuz xtó'oli' tu' gulútiē' xuz xtó'oli' na' légaquiē', ate' libí'ili' richísali' biquitaj quégaca ba ga nagáchi'gaquiē'.

<sup>49</sup> 'Que lē' ni na', lu yōl-la' réajni'i queē', Dios gunnē' caní: "Isōl-la'a queēli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lē' gútili', en ia'bal-lē' cuia na'li' légaquiē'." <sup>50</sup> Caní gunē' Dios tu' uchi'a usörōē' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queē', bönni' ni' bétigaca bönachi légaquiē' cate' gusí lo rata' yōdzōlió, <sup>51</sup> ga gusí lo nu bēti Abel, ga bidxintē gulútiē' Zacarías, bönni' na' gulútiē' gatsaj láhui'lō ga dē bucugu lá'ayi ga na' tu'zégui'gaquiē'-ba' bōa' bēdxido' lahuē' Dios, en ga dē lataj lá'ayi. Que lē' ni na', rea' libí'ili', Dios uchúguē' quégaca bönachi dza ni zóaru' na'a, ni'a que rön quégaca yúgu'të bönni' na' gulútiē' xuz xtó'oli' légaquiē'.

<sup>52</sup> 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxi'ini guié que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa té'eni ila'yaza.

<sup>53</sup> Cate' Jesús budxi bé'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sílógaquië' ta'naba yúdxide'enë' Lë' ca naca zían le taca, <sup>54</sup> en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

## 12

### *Rusédinë' Jesús ca naca yöl-la' rulu'isö tsahui' cuini*

<sup>1</sup> La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzé'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. <sup>2</sup> Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'. <sup>3</sup> Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bé'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

### *Nu ral-la' gádxiru' (Mt. 10:28-31)*

<sup>4</sup> Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi. <sup>5</sup> Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Öñ, rea' libí'ili', guli'gadxi Nu na'.

<sup>6</sup> 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'. <sup>7</sup> Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'tëröli' libí'ili' ca zianba' biguínido'.

### *Nupa ta'nnasö néquiquequi queë' Jesús (Mt. 10:32-33; 12:32; 10:19-20)*

<sup>8</sup> Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios, <sup>9</sup> ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

<sup>10</sup> 'Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, biti' uniti lahuë' Dios nu na'.

<sup>11</sup> 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sédë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', biti' ubi uguí'ili' nacxi gunli' o bizxi didza' ubí'ili', o bizxi innali'. <sup>12</sup> La' dza ná'asö usédinë' Dios Bö' Lá'ayi libí'ili' le ral-la' innali'.

### *Huáca gun yöl-la' tsahui' queëru' ga gal-la ládxi'ru'-në' Dios*

<sup>13</sup> Tu bönni' nútsë'ë ladaj bönachi zían na' rë' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

<sup>14</sup> Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

<sup>15</sup> Ní'irö Jesús gudxë' bönachi nacúa' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácasö le zían le dë queë'.

<sup>16</sup> Ní'irö Jesús bë'lenë légaquië didza', bucúdzu'ë didza', rnnë':

—Zoë tu bönni' rilé'enë yöl-la' tsahui' queë', ate' runödzjada' gulapa lu xiyúë'. <sup>17</sup> Ní'irö guzá' ládxe'ë bönni' na', rnnë': “¿Nacxi guntsa'? Biti' dë ga gapa chi'a le rulá' quia'.” <sup>18</sup> Ní'irö rnnë': “Caní'guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'.” <sup>19</sup> Ní'irö gaca guié cuina': Chidéda' quia' zían le chinutuba', le gáhuida' zían iz. Uzi' ládxa'a. Guí'aj gahua', en udzëjada'.” <sup>20</sup> Ní'irö Dios rë'lë: “Li', bönni' biti' bi nözinë'. Na'a dzö' gátiu'. Na'a, ¿nuzxi caz guequi que, lë na' chinutubu'?” <sup>21</sup> Caní' raca queë' bönni' rutubë' la' queëzë' yöl-la' tsahui', en biti' runë' le naca ca yöl-la' tsahui' lahuë' Dios.

*Dios run chi'ë yugu' bönachi queë'*

*(Mt. 6:25-34)*

<sup>22</sup> Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. <sup>23</sup> Nácáro lesaca' yöl-la' na'bán queëli' ca le ráguli', ate' nácáro lesaca' idú le nácali' ca lari' ráculi'. <sup>24</sup> Buli'yutëz ca raca quégacaba' boíquiaj. Biti' tázaba', en biti' ta'lápaba', en biti' nacua' quégacaba' ga ilún chí'iba' le rulá' quégacaba', pero Dios rugahuë' léga'caba'. ¿Naru' cabí nazáca'tëröli' libí'ili' ca yugu' biguínnido'? <sup>25</sup> ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu' ruubi ruguí'i ládxi'da'ahuë'? <sup>26</sup> Que lë ni na', channö cabí gaca gunli' lë ni naca cuí'disö, ¿bizx que ruubi ruguí'ili' ni'a que le naca zxöntëro?

<sup>27</sup> Buli'yutëz ca ta'zxön yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'. <sup>28</sup> Channö Dios runë' lachi yöj guíxi'do' rögaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácáro dxi'a queëli', libí'ili' na' biti' réajlë'ëli' Dios idú ládxi'li'? <sup>29</sup> Que lë ni na', biti' gü'i ládxi'li' le ral-la' gáguli', en le ral-la' guí'jali', en biti' ubi uguí'i ládxi'do'oli'. <sup>30</sup> Yúgu'të lë ni ta'guilaj bönachi yödzölió ni, pero chinöz quézinë' Xúzili' Dios le riquínili'. <sup>31</sup> Guli'güi' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

*Yöl-la' tsahui' rigú'uru' yehua' yubá*

*(Mt. 6:19-21)*

<sup>32</sup> Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'. <sup>33</sup> Guli'guti' le dë queëli', en buli'nödzaj quégaca bönachi yechi'. Caní' gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinë' bönni' gubán, en biti' usunítiba' böa'do' le. <sup>34</sup> Ga ni' dë yöl-la' tsahui' queëli', ni' gü'i ládxi'li' idxinli'.

*Ral-la' sóaru' ban ladxi'*

<sup>35</sup> Gunnë' ca' Jesús:

—Guli'sóa sina', en guli'quela' guí' le uzení' queëli'. <sup>36</sup> Guli'gaca ca bönni' huen dxin ta'bözë' dza huödë' xángaquie', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë. <sup>37</sup> Bica' bágaca huen dxin na' ila'cu'ë ban ladxi' cate' huödë' xángaquie'. Le nácaté rea' libí'ili', upá'a cuinë' xángaquie' na', ate' gunë' ga ila'bö'ë ga ilahuë', ate' cu'ë le ilahuë'. <sup>38</sup> Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. <sup>39</sup> Lë ni ral-la' inözili'. La'tu' nözinë' xan yu'u bizxi dza huadxinë' bönni' gubán, usubán ládxe'ë, en biti' gu'ë lataj bönni' na' udxíë' yeru lidxë', para cabí cuanë' le dzö'ö lidxë'. <sup>40</sup> Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza bití' ribözali' neda'.

*Bönni' huen dxin tsahui', en bönni' huen dxin biti' náquië' tsahui'**(Mt. 24:45-51)*

41 Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

42 Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queëgaquië' le ilahuë'. 43 Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. 44 Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. 45 Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' queëgaquië' ia' zíca'rë' huen dxin, bönni' en nigula, en isí lahuë' gu'aj gahuë', en súdxinë', 46 ní'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu queëgaquië' bönni' biti' ta'yéajlë'ë.

47 Bönni' huen dxin na' nözinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quínitërë' xanë' lë'. 48 Channö cabí nözinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxe'ë lë' le zxön, le zxöntërö ca' unabë' xanë' lu në'ë bönni' huen dxin na'.

*Le náquië' Jesús gun ga ila'rúaj choplö bönachi**(Mt. 10:34-36)*

49 Gunnë' ca' Jesús:

—Bida' neda' dujéna' ga tsegui gu' yödzölió ni, en caba ládxa'a chinaguéla' gu' na'. 50 Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'. 51 ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi. 52 Na'a isí lo ulu'lá'alén luzé'eguequi gayu' bönachi nacua' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'. 53 Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' xzí'ininu.

*Le nácacaca bë' le taca na'a dza**(Mt. 16:1-4; Mr. 8:11-13)*

54 Jesús gudxë' ca' bönachi zían nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca. 55 Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. 56 Libí'ili', bönni' rulu'isö tsahui' cuinli'. Nözili' le rulu'i le raca lúzxiba, en le raca luyú ni, pero biti' réquibe'eli' le rulu'i le nácacaca bë' taca dza ni zóaru' na'a.

*Ral-la' ugá' analenru' tsahui' nu rilé' rë'u**(Mt. 5:25-26)*

57 Gunnë' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'? 58 Channö zoa nu bi unabí yudxi li', ate' zéajli' idxinli' yúlahui', bë' ladxi' ugá' analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröë' libí'ili', ate' bönni' uchi'a usöröë' na' udödë' li' lu në'ë bönni' rusayjë' lidxi guié', ate' bönni' na' rusayjë' lidxi guié' cu'ë li' lidxi guié' na'. 59 Rea' li', biti' uruju' ni' cate' údxirö quíxju' yúgu'të dumí lásido' ral-lu'u que nu na'.



## 13

### *Run bayudxi ubi'i ladxiru'*

<sup>1</sup> La' dza ní'isó bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quégaquië', le bugútsi'në' xichöngacaba' böa' bëdxi chigulútië' légaçaba' para ila'gu'ë xichöngacaba' na' lahuë' Dios. <sup>2</sup> Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'gu'i gula'zaquië' caní? <sup>3</sup> Rea' libí'ili': ¡Calëga! Channö cabí ubi'i ladxili', nítili' ca' yúgu'tëli'. <sup>4</sup> Lësca' caní guca quégaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zica'rö bönnachi nacua' Jerusalén? <sup>5</sup> Rea' libí'ili': ¡Calëga! Channö cabí ubi'i ladxili', nítili' ca' yúgu'tëli'.

### *Rucúdu'ë didza' Jesús que yaga higo biti' bi ribía*

<sup>6</sup> Ní'irö bucúdu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtiljë' le ribía yaga na', pero biti' bi ridzölinë'. <sup>7</sup> Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en biti' bi ridzöliida'. Guchugu le. ¿Bizx que run nigui luyú ni?" <sup>8</sup> Ní'irö bubí'ë didza' bönni' huen dxin na', rë' lë': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. <sup>9</sup> Channö cuía yaga ni, gaca dxi'a, pero channö cabí bi cuía, ní'irö ichugu' le."

### *Ruúnë' Jesús tu nigula ré'enu cate' naca dza lá'ayi*

<sup>10</sup> Tu dza rusédinë' Jesús bönnachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. <sup>11</sup> Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönnachi, ate' nayéçhutica'sinu ridanu, en biti' ca' raca ulí cuinnu. <sup>12</sup> Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzhüë' quiu'.

<sup>13</sup> Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. <sup>14</sup> Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

<sup>15</sup> Ní'irö bubí'ë didza' Xanru', rnnë':

—Libí'ili', bönni' rulu'isó tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

<sup>16</sup> Nácanu nigula ni xzí'ini xi'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

<sup>17</sup> Cate' bë'ë didza' ni Jesús, bulu'tuí'në' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönnachi, yúgu'të nupa nacua' ni', tu' ta'lé'enë' yugu' le zxön runë' Jesús.

### *Rucúdu'ë didza' Jesús que xisedo' mostaza*

(Mt. 13:31-32; Mr. 4:30-32)

<sup>18</sup> Ní'irö rnnë' Jesús:

—¿Nacxi caz raca rizxön le rinná bë'ë Dios, o bizxi uséqui'tseru' le? <sup>19</sup> Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

### *Rucúdu'ë didza' Jesús que cúa zi que yöta xtila*

(Mt. 13:33)

<sup>20</sup> Lësca' caní rnnë' Jesús:

—¿Bizxi caz uséqui'tseda' le rinná bē'ē Dios? <sup>21</sup> Naca ca cúa zi que yōta xtila, le guzxi'inu tu nigula, en bugútsi'nu tsonna cō' cúa yōta xtila, ate' guyazxaj idútē cúa na'.

*Tu ga tödiru' le naca guído'*

*(Mt. 7:13-14, 21-23)*

<sup>22</sup> Tsanni ni' yu'ē nōza Jesús, sa'yéajē' Jerusalén, ridödē' yugu' yōdzō zxön, en yugu' yōdzōdo', ate' rusédinē' bönachi nacua' gapa na'. <sup>23</sup> Tu bönni' zoē' ni' gunábinē' Jesús, rnnē':

—Xan, ¿naru' nabábasō nupa ulu'lágaca?

Jesús rē' nupa nacua' ni', rnnē':

<sup>24</sup>—Guli'güí'i ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilē'ēni ila'yaza ni', pero bití' ila'zéqui'nē'. <sup>25</sup> Tödi chasē' Xan yu'u, en usayjē' yu'u, isí loli' libí'ili' na' zóali' ní'ilō ulídzali'-nē' ra' yu'u na', ate' guiēli'-nē': "Xan, Xan, gusalaj queētu'." Ní'irō ubi'ē didza' Lē', en guiē' libí'ili': "Bití' nōzda' nuzxi libí'ili'." <sup>26</sup> Ní'irō isí loli' innali': "Güí'i gudágulentu' Li', ate' busédinu' gapa naca lu yē'ēyi queētu'." <sup>27</sup> Ní'irō guiē' libí'ili': "Rea' libí'ili', bití' nōzda' gazxi bönachi libí'ili'. Guli'cuíta ga zoa', yúgu'tēli' ruá'ali' dö'." <sup>28</sup> Ní'irō cōdxi yéchi'li', en gagu zxea láya'li' cate' ilé'egacali'-nē' Abraham, en Isaac, en Jacob, en yúgu'tē bönni' gulu'ē didza' uláz queē' Dios, nacu'ē ga ni' rinná bē'ē Dios, pero libí'ili' sóali' ní'ilō. <sup>29</sup> Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za'bō' ziaga, en saca' ga ridödi gubidza beo' ziaga, ate' ila'bō'ē ilahuē' ga ni' rinná bē'ē Dios. <sup>30</sup> Ní'irō ilaca lo bal-la bönachi nácagaca cá'asō na'a, ate' ulu'gá'ana cá'asō bal-la nupa nácagaca lo na'a.

*Ribödxí yech'ē Jesús ni'a quégaca bönachi Jerusalén*

*(Mt. 23:37-39)*

<sup>31</sup> La' dza ní'isō bila'dxinē' bal-la bönni' yudo' fariseo ga zoē' Jesús en tē' Lē':

—¡Burúaj! ¡Buzxunnaj ni! ¡Rē'ēnē' Herodes gútiē' Li'!

<sup>32</sup> Jesús rē' légaquiē':

—Guli'tséaj, guli'tsöjōdxē' bönni' na' náquiē' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxō, en cate' gaca lidzaj, údxi guna' dxin quia'." <sup>33</sup> Run bayudxi tséajlensa' ca' nōza na'a, en cuxō, en huidzaj, ate' idxina' Jerusalén, tu' tútigaquiē' bönni' tu'ē didza' uláz queē' Dios ni'.

<sup>34</sup> 'Libí'ili', zóali' Jerusalén. Rútigacali'-nē' bönni' tu'ē didza' uláz queē' Dios, en ruládxi'gacali'-nē' guiōj bönni' gubáz risöl-lē'ē Dios ga zóali'. Cate' xō zián luzuí gú'unida' utuba' libí'ili' quia' ca runba' yōjede, rutúbiba' bórado' queéba' znan xíliba', pero bití' gú'unili'. <sup>35</sup> Buli'yútsöca', cá'asō ugá'ana lídxili', ate' rea' libí'ili', bíti'rō ilé'eli' neda' cate' idxinrō dza innali': "Bica' ba Nu na' za' uláz queē' Xanru'."

## 14

*Ruúnē' Jesús tu bönni' ré'enē' huē' gui*

<sup>1</sup> Cate' naca dza lá'ayi quégaquiē' bönni' judío, guyu'ē Jesús lidxē' tu bönni' unná bē', bönni' yudo' fariseo. Rö'ē Jesús rahuē', ate' nacu'ē bönni' yudo' fariseo ni' ta'nē'ē Lē'. <sup>2</sup> Zoē' ca' tu bönni' ré'enē' huē' gui ga na' zoē' Jesús. <sup>3</sup> Ní'irō Jesús gunábinē' bönni' yudo' usedi táquiē' xibá queē' Moisés, en yugu' bönni' yudo' fariseo, rnnē':

—¿Naru' dē' lataj unru' nu re'e cate' naca dza lá'ayi?

<sup>4</sup> Légaquiē' bulu'sayaj ruá'agaquiē'. Ní'irō Jesús gudélē'ē bönni' huē' na', en bunē' lē', ate' la' busöl-la'tē' lē'. <sup>5</sup> Ní'irō Jesús rē' yugu' bönni' yudo' na', rnnē':

—Channō nu bönni' ladjali' nacua'aba' queē' böa' bēdxi, ate' ibíxiba' tuba' lu yeru, ¿naru' cabí tsöjléajtē'-ba', sal-la' naca dza lá'ayi?

<sup>6</sup> Bití' bi didza' guca ulu'bi'ē ca naca lē' ni.

*Nu cō' lataj lo*

<sup>7</sup> Cate' bilé'ené' Jesús ca tuné' bönni' yudo' fariseo na', ta'bö'ë lataj lo ga na' ta'bö'ë tahué', ní'irö bucúdzu'ë didza', ate' rë' légaquié':

<sup>8</sup>—Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatërë' lo ca li'. <sup>9</sup> Ní'irö bönni' na' bulidzë' li' huidë' ga zu', en guié' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö. <sup>10</sup> Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxiné' bönni' na' bulidzë' li', hué' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. <sup>11</sup> Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

<sup>12</sup> Jesús rë' ca' bönni' na' bulidzë' Lë', rnnë':

—Cati' gunu' tu güí'i huagu o tu lanído', biti' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'ené' yöl-la' tsahui' quégaquié', tu' ulu'lidzë' ca' li', ate' caní gaca, ubí'i quiu'. <sup>13</sup> Cate' gunu' tu güí'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. <sup>14</sup> Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

### *Rucúdzu'ë didza' Jesús que tu laní zxön*

<sup>15</sup> Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

<sup>16</sup> Jesús rë' lë':

—Zoë' tu bönni' benë' laní zxön, ate' zían nupa bulidzë'. <sup>17</sup> Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!" <sup>18</sup> Gula'sí lógaquié' yúgu'të ta'nabë' lataj cabí tsöjáquié'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." <sup>19</sup> Ia'tué' rnnë': "Si' guzxi'a gayu' nözaba' bédxi, ate' tsöjzxí' bë'a légacaba' ugúngaca'-ba' dxin. Ráta'yua' lo' gunnu' neda' lataj." <sup>20</sup> Ia'tué' rnnë': "Si' butsaga na'a, en que lë ni na' biti' gaca guída'." <sup>21</sup> Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yé'ëyi, en gapa naca la' nöza que yödzo ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la." <sup>22</sup> Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj." <sup>23</sup> Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ilí lidxa', <sup>24</sup> tu' rea' libí'ili': Biti' gahué' que laní quia' nitué' bönni' ni' bulidza' zí'alö."

### *Le sáca'ru' cate' zéajlenru'-në' Cristo*

<sup>25</sup> Yugu' dza ni' röjácalen Jesús bönachi zían, ate' buécjë' Jesús, en rë' légaquié':

<sup>26</sup>—Channö guídalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxí'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquié' bönni' usëda quia'. <sup>27</sup> Nu bönni' biti' gáquié' ca tu bönni' sa'yéajë' söjtë'ë lë'e yaga cruz, ate' të'ë neda', biti' gaca gáquié' bönni' usëda quia'. <sup>28</sup> Channö zoë' nu bönni' ladaj libí'ili' guë'ënnë' gunë' tu yu'u zían cuía, ¿naru' cabí cö'ë zí'alö ulabë' gáca'xi dumí ral-la' utöë' para inözinë' channö dë queë' tsca le riquinnë' para údxi gunë' yu'u na'? <sup>29</sup> Channö cabí gunë' caní, en isí lahué' cuéquié' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', <sup>30</sup> ila'nná: "Bönni' ni gusí lahué' runë' yu'u, pero biti' guca údxi gunë' le." <sup>31</sup> Lë'sca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'tué' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë? <sup>32</sup> Channö cabí séqui'në', cate' ni' zoë'

zi'tu' ia'tué' bönni' na' rinná' bē'è, isöl-lē'è bönni' gubáz' queë', ate' inábinē' lē' nacxi' ralla' gunē' para ulu'dzáguiē' dxi'a. <sup>33</sup> Caní' naca, channö' zoë' nu bönni' ladaj libí'ili' bití' ucá'anē' yúgu'tē' le dē' queë', bití' gaca gáquiē' bönni' usēda' quia'.

*Zödi' le naniti yöl-la' siná'a que*

(Mt. 5:13; Mr. 9:50)

<sup>34</sup> Gunnē' ca' Jesús:

—Dxi'a naca zödi', pero channö' initi yöl-la' siná'a que, ¿nacxi' gaca úniru' le siná'a?  
<sup>35</sup> Bítirö' nazaca' zödi' na', calēga' para luyú, en calēga' para ga rirú'uniru' bēbu, pero chú'unaru' le ní'ilö. Nu zoa' nagui, en riyöni, ralla' uzē' nagui nu na'.

## 15

*Rucúdzu'è didza' Jesús ca naca queëba' bö'cu' zxila' gunítiba'*

(Mt. 18:10-14)

<sup>1</sup> Bulu'dubē' yúgu'tē' bönni' tu'quíxjē' lázagaca' bönachi, en yugu' bönni' cá'asö' ga zoë' Jesús para ulu'zē' náguiē' Lē'. <sup>2</sup> Que' lē' ni na' yugu' bönni' yudo' fariseo, en yugu' bönni' yudo' usedi' gula'nnē' queë' Jesús, ta'nnē':

—Bönni' ni runē' bal' yugu' bönni' dul-la', en rágulenē' légaquiē'.

<sup>3</sup> Ní'irö' bucúdzu'è didza' Jesús, rē' légaquiē':

<sup>4</sup> —Channö' zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö' nítiba' tuba', ¿naru' cabí' ucá'anē' ia' zíca' rōba' tápalalaj yu' chēnnaba' na' ga naca lu lataj cá'asö, ate' tsejē' tsöjdiljē'-ba' bö'cu' zxila' na' nanítiba', cate' udzölrönē'-ba'? <sup>5</sup> Cate' udzölinē'-ba', lu yöl-la' rudzeja queë' ixóē'-ba' ya' zxicjē', <sup>6</sup> en cate' udxinē' lidxē' utubē' yugu' böchi' luzē'è, en yugu' dzaga yu'u queë', ate' guiē' légaquiē': "Buli'dzéjalen neda', tu' chibudzö'lida'-ba' bö'cu' zxila' quia' gunítiba'." <sup>7</sup> Rea' libí'ili': Lē'sca' caní' gácatērö' yöl-la' rudzeja yehua' yubá' ni'a queë' tuē' bönni' dul-la' ubí'í' lādxi'è ca gaca quégaquiē' tápalalaj yu' chēnnē' bönni' tsahui', bönni' téquinē' bití' naquíniguequinē' ulu'bí'í' lādxi'gaquiē'.

*Rucúdzu'è didza' Jesús que tu dumí guniti*

<sup>8</sup> Rnnē' ca' Jesús:

—Channö' zóanu tu nigula, dē' queēnu chi dumí plata, en channö' initi tu dumí plata na', ¿naru' cabí' uquéla'nu guí', ate' ulúanu yu'u, uguilaj yúdxinu le cate' udzölrönö' le?  
<sup>9</sup> Cate' udzölinu le, utúbinu yugu' nigula luzá'anu, en yugu' nigula dzaga yu'u queēnu, ate' guiēnu légacanu: "Buli'dzéjalen neda', tu' chibudzö'lida' dumí plata na' guniti." <sup>10</sup> Rea' libí'ili': Lē'sca' caní, ulu'dzéjade'erönē' gubáz' lá'ayi queë' Dios ni'a queë' tuē' bönni' dul-la' ubí'í' lādxi'è.

*Rucúdzu'è didza' Jesús queëbi' tu bi'í' gunítibi'*

<sup>11</sup> Rnnē' ca' Jesús:

—Zoë' tu bönni' nacuá'abi' chópabi' bi'í' bönni' queë'. <sup>12</sup> Bi'í' cuidi' na' rēbi'-nē' xúzibi': "Dad, benna quia' le dē' quiu' le ralla' guequi quia'." Ní'irö' xúzibi' na' gudísiē' quégacabi' le dē' queë'. <sup>13</sup> Nabábasö' dza gudzé, bi'í' cuidi' na' butúbibi' yúgu'tē, ate' guyéajbi' tu yödzö' zi'tu', ate' ni' butöbi' dērö' le dē' queëbi'. Le ruá' dö' benbi'. <sup>14</sup> Cate' chibutöbi' dērö' le dē' queëbi', guca gubín lu yödzö' ga na' zóabi', ate' biyadzaj queëbi'. <sup>15</sup> Ní'irö' guyéajbi' yöjsóabi' huen dxin queë' tu bönni' lu yödzö' ni', ate' bönni' na' gusöl-lē'è-bi' ga dē' xiyúé' tsöjgágubi'-ba' yugu' cuchi queë'. <sup>16</sup> Guca lādxi'bi' gágubi' guixi' cá'asö' na' táguba' cuchi, pero cuntunu bi' bē' le gágubi'. <sup>17</sup> Ní'irö' bubí'í' lādxi'bi', rnnabi': "Cate' xö bönni' huen dxin nacu'è lidxē' xuzá', en dēda' le tahuē', pero neda' ni huáti' caza' yöl-la' ridún. <sup>18</sup> Uzá'a ni, huöja' ga zoë' xuzá', en tsöjödxa'-nē': Dad, bena' dul-la' lahuē' Dios, zoë' yehua' yubá', en lo' lí'. <sup>19</sup> Bítirö' naca' neda' lesaca' gaca' xzí'inu'. Ben neda' ca bönni' huen dxin quiu'." <sup>20</sup> Ní'irö' guyú'ubi' nöza, söhuóajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxë'ë-bi'. Carelö yöjxí'galë'-bi' xúzibi', en yöjnidë' yenbi', gudahuë'-bi' zxixi. <sup>21</sup> Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Biti'rö naca' neda' lesaca' gaca' zxi'inu'." <sup>22</sup> Ní'irö xúzibi' rë' yugu' bönni' huen dxin queë', rnnë': "Guli'tsöjläjtë lari' nazáca'tërö, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'. <sup>23</sup> Guli'tsöjxí'i-ba' bëdxi renni', ate' guli'guti-ba'. Gáguru'-ba', en gunru' laní, <sup>24</sup> tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

<sup>25</sup> Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'. <sup>26</sup> Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. <sup>27</sup> Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'." <sup>28</sup> Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobi' tsú'ubi'. <sup>29</sup> Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxi'la'do' para güi'lena' xibé yugu' luzá'a. <sup>30</sup> Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." <sup>31</sup> Ní'irö xúzibi' rë'ë-bi', rnnë': "Zxí'ina, li' zóalen cazu' neda' ate' yúgu'të le dë quia', quiu' nequi. <sup>32</sup> Ben bayudxi gunru' laní, en udzéjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

## 16

### *Rucúdu'ë didza' Jesús queë' bönni' huen dxin biti' náquië' tsahui'*

<sup>1</sup> Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë queë' xanë' na'. <sup>2</sup> Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'?' Buluí'i neda' le naca bë' dxin nunu', tu' cabirö gata' lu no'o uláz quia'." <sup>3</sup> Ní'irö guzá' ládxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnna'sö quia'. <sup>4</sup> Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. <sup>5</sup> Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" <sup>6</sup> Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u." <sup>7</sup> Gudödi ni' gunábinë' ia'túë', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoax'tila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." <sup>8</sup> Réquibe'enë' xanë' na' sína'të benë' bönni' huen dxin biti' náquië' tsahui' na'. Caní naca, nácagacarë' sina' bönni' yödölió ni lu le tunë' la' légacasë', ca nácagaca bönachi ta'dalen Dios lu bení' queë'.

<sup>9</sup> Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë queëli' yödölió ni, para cate' idxín dza uca'anali' yugu' lë ni, ilunë' libí'ili' bal lataj ni' zóatica'sö.

<sup>10</sup> Nu rugún dxi'a dxin tu le cuídí'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídí'sö dë lu në'e, biti' ugún dxi'a dxin tu le zxön gata' lu në'e. <sup>11</sup> Que lë ni na', channö cabí rugunli' dxi'a dxin yöl-la' tsahui' dë queëli' yödölió ni, ¿nuzxi caz udödi lu ná'ali' yöl-la' tsahui' le naca idú? <sup>12</sup> Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

<sup>13</sup> Biti' gaca nitué' bönni' huen dxin guné' xichíngaca chopaxané', tu' udí'iné' tué', en idxí'iné' ia'tué', o guné' bal tué', en uzóe' tsölá'alö ia'tué' na'. Biti' gaca gunli' xichiné' Dios, en gunli' ca' dxin para uzí'ili' xibé yöl-la' tsahui' que yödzölió.

<sup>14</sup> Bila'yönné' bönni' yudo' fariseo didza' ni, ate' tu' nadxí'iguequiné' yöl-la' tsahui' quégaquié', que lé ni na' bulu'titjé' Jesús. <sup>15</sup> Ní'irö Jesús ré' légaquié':

—Libí'ili' rubéaj dxi'a cuinli' lógaca bönachi, pero nöziné' Dios le yu'u icja ládxi'do'oli', tu' naca lé na' tun zxön bönachi tu le ruzóe' Dios tsölá'alö.

*Xibá queé' Moisés, en le rinná bē'ē Dios*

<sup>16</sup> Gunné' ca' Jesús:

—Ga bidxinté dza zoé' Juan, ben dxin le rinná bē' xibá queé' Moisés, en le bulu'zúajé' lu guichi yugu' bönni' gulu'ē didza' uláz queé' Dios. Ní'irö cate' bidxiné' Juan na', gusí lo raca libán ca gaca nu tsaza ga rinná bē'ē Dios, ate' tun bayudxi yúgu'té bönachi ila'yaza ni'.

<sup>17</sup> Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queé' Dios.

*Le rulá'a yöl-la' nutsaga na'*

(Mt. 19:1-12; Mr. 10:1-12)

<sup>18</sup> Gunné' ca' Jesús:

—Channö tu bönni' ulá'alené' nigula queé', ate' utsaga ná'alené'-nu nigula yúbölö, guné' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusané'-nu bönni' queénu, gun ca' dul-la' le riguitsaj xibá que yöl-la' nutsaga na'.

*Bönni' dē yöl-la' tsahui' queé', en Lázaro*

<sup>19</sup> Ní'irö bucúdu'ē didza' Jesús, rnné':

—Zoé' tu bönni' rilé'ené' yöl-la' tsahui' queé'. Rácué' lari' xiná, en lari' nazáca'da', ate' yugu' dza rúntica'sé' laní, ate' tē'aj tahué' le banéquini. <sup>20</sup> Zoé' ca' ni' tu bönni' yéchi'do' lé Lázaro, bönni' rinabé' nu bi unödzej queé', ate' hué'tezé' rō'ē ra' yu'u queé' bönni' na' rilé'ené' yöl-la' tsahui'. <sup>21</sup> Raca ládxe'ē bönni' yéchi'do' na' gahué' le bizxaj tu'huöxaj zxani ga rahué' bönni' na' rilé'ené' yöl-la' tsahui'. Ta'dxinba' ca' bö'cu', en ta'lé'ēba' lu hué' queé' bönni' yéchi'do' na'. <sup>22</sup> Bidxín dza gútié' bönni' yéchi'do' na', ate' gubáz lá'ayi queé' Dios gula'ché'ē lé' tsöjsóalené' Abraham ga naca lataj lachi queé' Dios. Gútié' ca' bönni' na' bilé'ené' yöl-la' tsahui', ate' bulu'cáché'ē lé' yeru ba. <sup>23</sup> Cate' ni' riguí' rizáque'ē bönni' na' bilé'ené' yöl-la' tsahui', zoé' lataj quégaca nupa nátigaca, guchisa lahué', en bilé'ené' Abraham zoé' zí'tu', en dzáguié' Lázaro na' lé'. <sup>24</sup> Ní'irö bē'ē zidzaj didza', rnné': "Xuza', Abraham, buéchi' ladxi' neda'. Gusöl-la' Lázaro quia' para usubisé' xibön né'ē, en udusuhoálé' lúdx'a, tu' riguí' rizáca'a lu guí' ni." <sup>25</sup> Abraham ré' lé', rnné': "Zxí'ina', busá' ládxi'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queé' yöl-la' yechi', ate' na'a, ruzí' zxöné' Lázaro ni, pero li' riguí' rizácu'u. <sup>26</sup> Ia'stú, tu ra' guí'a sibi rō', le zoa gatsaj láhui'lö ga ni' zóali' libí'ili', en ga ni zóatu' netu'. Que lé ni na' nupa nacua' ni, en ilé'ēni ila'dödi ga zóali' libí'ili', bití' ca' gaca iluné' ca', en bití' gaca ilida ni nupa nacua' ni." <sup>27</sup> Ní'irö bönni' na' bilé'ené' yöl-la' tsahui' ré' lé', rnné': "Xuza' Abraham, ráta'yua' lo' isöl-lu'u-né' Lázaro tsejé' lidxé' xuza', <sup>28</sup> tu' nacu'ē gáyu'ē bönni' böcha'a ni'. Gusöl-lé'ē tsöjené' liná' lo que le raca ni, para cabí guídigaquié' ca' lataj ga ni riguí' rizáca'a." <sup>29</sup> Ní'irö Abraham ré' lé', rnné': "Dē quégaquié' le buzúajé' lu guichi Moisés, en le bulu'zúajé' lu guichi bönni' gulu'ē didza' uláz queé' Dios. Yugu' didza' quégaquié' na' ral-la' ulu'zé' náguié'." <sup>30</sup> Bubi'ē didza' bönni' na' bilé'ené' yöl-la' tsahui', rnné': "Xuza' Abraham, bití' gaca caní, pero channö ubané' tu bönni' lu yöl-la' guti, en tsejé' ga na' nacu'ē, ulu'bí'i ládxi'gaquié'." <sup>31</sup> Abraham ré' lé', rnné': "Channö cabí tu'zé' náguié' didza' bē'ē Moisés, en le gula'nné' bönni' gulu'ē didza' uláz queé' Dios, bití' ila'yéajlé'ē sal-la' nu ubán lu yöl-la' guti."

## 17

*Run bönadxi queëru' gunru' ga nu gun dul-la'*  
(Mt. 18:6-7, 21-22; Mr. 9:42)

<sup>1</sup> Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. <sup>2</sup> Dxí'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'. <sup>3</sup> Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxe'ë, buniti lo lë'. <sup>4</sup> Sal-la' gadxi luzuí tu dza gu'ë dö' quiu', en gadxi luzuí ca' guidë' ga zu', en guië' li': "Rubí'i ládxa'a", ral-la' uniti lo' lë'.

*Yöl-la' huáca que le réajlë'ëru' Cristo*

<sup>5</sup> Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

<sup>6</sup> Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

*Le ral-la' gun nu naca huen dxin*

<sup>7</sup> Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bédxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, gurö'ö gagu'?" <sup>8</sup> ¡Calëga! Caní guië' lë': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'." <sup>9</sup> ¿Naru' huëtsë' bönni' nadó'o queë' na': "Xclenu'", tu' benë' ca gunná bé'enë' lë'? Runi neda', bití' gunë' caní. <sup>10</sup> Lësca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

*Chië' bönni' té'enë' huë' nudzu' ruzödi*

<sup>11</sup> Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. <sup>12</sup> Cate' guyázië' tu yödzödo', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö, <sup>13</sup> en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

<sup>14</sup> Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' sójaquië', bulu'huöáquië' dxi'a. <sup>15</sup> Ní'irö tuë' bönni' nútsë'ë ladjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ruí'tica'së' zidzaj didza', rigü'ë Dios yöl-la' ba. <sup>16</sup> Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. <sup>17</sup> Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacua'tsë' ia'zíca'rë' bönni' na'?

<sup>18</sup> ¿Naru' cabí zoa nu huöda cu'u Dios yöl-la' ba, pero tuzë' bönni' zítu' ni?

<sup>19</sup> Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

*Ca idxín le rinná bë'ë Dios*

(Mt. 24:23-28, 36-41)

<sup>20</sup> Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, bití' naca le ilé'eli'. <sup>21</sup> Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bë'ë Dios lu icja ládxi'do' gaca bönachi!

<sup>22</sup> Ní'irö Jesús gudxë' yugu' bönni' usëda queë', rnnë':

—Huadxín dza cate' gué'ënili' ilé'eli' dza huöda' neda', Bönni' Guljé' Bönachi, pero biti' ilé'eli' le. <sup>23</sup> Ila'cuá' nupa ilé libí'ili': "¡Ni zoë'!", o ila'nná: "¡Ni' zoë'!" Biti' tséajli' ni', en biti' tséajlenli' légaquié'. <sup>24</sup> Ca raca cate' rēpi yōsa, ruzení' idá'alö lúzxiba, lēasca' caní gaca cate' idxín dza huöda' neda', Bönni' Guljé' Bönachi. <sup>25</sup> Zí'alö ca gaca lē ni, run bayudxi quí'i sáca'da', ate' bönachi dza ni zóaru' na'a ulu'cá'ana neda' cá'asö. <sup>26</sup> Ca na' guca dza ni' zoë' Noé, lēasca' caní gaca cate' idxín dza huöda' neda', Bönni' Guljé' Bönachi. <sup>27</sup> Dza ni'te na' gulé'aj gulahué'. Bulu'tsaga ná'agaquié', en bulu'dödé' zxí'inigaquié' lu yöl-la' rutsaga na' ga bidxinté dza guyázié' Noé lē'e barco zxōn na' nazí'i le arca, ate' bidxinté nisa guiōj usuniti yōdzölió le busuniti yúgu'té'. <sup>28</sup> Lēasca' caní guca dza ni' zoë' Lot. Gulé'aj gulahué'. Gulá'ué', en gulúti'ē. Gulazé' xiyúgaquié', en guluné' yugu' yu'u quégaquié'. <sup>29</sup> Cate' bidxín dza na' burúajé' Lot lu yōdzö Sodoma, bōxaj guí' ca tu nisa guiōj, enca' le ruzéguida' nazí'i le azufre, ate' bulu'suniti yúgu'té'. <sup>30</sup> Lēasca' caní gaca cate' idxín dza uluí'i lahua' neda', Bönni' Guljé' Bönachi.

<sup>31</sup> 'Cate' idxín dza na', channö zoë' tu bönni' ícjo'olö, en dzö'ö le dē queé' lu yu'u na', biti' ral-la' huötjé' tsöjxi'ē le dē queé', ate' nu zoa la' guixi', lēasca' caní, biti' ral-la' huöjé' lidxé'. <sup>32</sup> Guli'sá' ládxi'li' ca guca queēnu nigula queé' Lot. <sup>33</sup> Nu bönni' ré'ēné' gun chi'ē yöl-la' na'bán queé', unítié' le, pero bönni' udödé' yöl-la' na'bán queé' ni'a quia', udélé'ē le.

<sup>34</sup> 'Rea' libí'ili': Cate' idxín rēla na', ila'cu'ē chopé' bönni' tsözxōn ga tasié', ate' tué' uduzxi'a-né', en ia'tué' ucá'ana' lē'. <sup>35</sup> Ila'cuá'anu huétu tsözxōn chópanu nigula, ate' tunu uduzxi'a-nu, en ia'tunu ucá'ana'-nu. <sup>36</sup> Ila'cu'ē chopé' bönni' la' guixi', ate' tué' uduzxi'a-né', en ia'tué' ucá'ana' lē'.

<sup>37</sup> Cate' bila'yönné' lē ni bönni' usēda queé' Jesús, gula'nábiné' Lē', ta'nné':

—Xan, ¿gazxi gaca lē ni?

Jesús ré' légaquié':

—Ga dē tu le nati, ni' ulu'dubi quéziba' bíchulab.

## 18

### *Tu nigula uzēbi, en bönni' ruchi'a rusöröē'*

<sup>1</sup> Ní'irö bucúdzü'ē didza' Jesús, ré' légaquié' ca run bayudxi ulídzatica'siru'-né' Dios, en biti' gaca chopá ládxi'ru'. <sup>2</sup> Rnné':

—Zoé' tu bönni' ruchi'a rusöröē' tu yōdzö, bönni' biti' rádxiné' Dios, en biti' runé' nu bönni' bal. <sup>3</sup> La' yōdzö ná'asö zóanu tu nigula uzēbi, ate' bidxinnu nigula ni ga zoé' bönni' ruchi'a rusöröē' na', rnnanu: "Buchí'a busörö le run quia' nu ruá' dö' quia'." <sup>4</sup> Xidzé biti' gú'unné' bi guné' queēnu, pero gudödi ni' guzá' ládxi'ē, rnné': "Biti' rádxida'-né' Dios, en biti' runa' nu bönni' bal, <sup>5</sup> pero tu' rupízxjanu nigula uzēbi ni neda', que lē ni na' uchi'a usöröa'-nu, para cabí guídati'ca'sinu ni, en para cabí tödi bē' upízxjanu neda'."

<sup>6</sup> Ní'irö Xanru' ré' légaquié', rnné':

—Guli'zé nágali' ca na' gunné' bönni' ruchi'a rusöröē' na', bönni' biti' náquié' tsahuí'.

<sup>7</sup> ¿Naru' cabí uchi'a usöröē' Dios bönachi gurö cazé' queé', nupa na' tu'lidza Lē' rēla te dza? ¿Naru' huadzétsené' gácalené' légaquié'? <sup>8</sup> Rea' libí'ili': La' uchi'a usörötené' légaquié'. Cate' huöda' neda', Bönni' Guljé' Bönachi, ¿naru' idzölida' nupa ta'yéajlé' neda' luyú ni?

### *Tu bönni' yudo' fariseo, en tu bönni' uquízxaj*

<sup>9</sup> Bucúdzü'ē didza' Jesús ca naca quégaquié' bönni' tu'béaj tsahuí' cuíngaquié', en tu'cá'ané' cá'asö ia'zica'rö bönachi. <sup>10</sup> Gunné':

—Bila'dxiné' chopé' bönni' ga naca chila yudo' para ulu'lidzé' Dios. Tué' bönni' na' náquié' bönni' yudo' fariseo, ate' ia'tué' na' náquié' bönni' ruquízxjé' lázagaca bönachi. <sup>11</sup> Guzuíné' bönni' yudo' fariseo na', en caní bulidzé' Dios, rnné': "Dios, rea' Li': Xclenu', tu' cabí naca' ca nácagaquié' ia'zica'rē' bönni', nácagaquié' gubán, en biti' nácagaquié' tsahuí'. Ta'guitsjé' xibá que yöl-la' nutsaga na'. Lēasca' biti' naca' ca bönni' uquízxaj ni.



12 Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'tè le rata' quia'." 13 Guzózazè' zi'tu' bönni' uquízaj na', en biti' böázxjanè' ichisa lahuè' uyüè' lúzxiba, pero gudapè' luchu'è, rnnè': "Dios, buéchi' ladxi' neda', bönni' dul-la'." 14 Neda' rea' libí'ili': Böajè' lidxè' bönni' uquízaj na', nuhuóáquiè' tsahui' lahuè' Dios, calèga ia'tué' bönni' ni'. Núti'tès bönni' run ba zxon cuiné', gunè' Dios ga huöta' igulé', pero nu bönni' rizóè' nöxaj ladxi', gunè' Dios ga gácarè' lo.

*Jesús rulidza tsáhuè'è-bi' yugu' bí'ido'*  
(Mt. 19:13-15; Mr. 10:13-16)

15 Ní'irö bila'dxinè' yugu' bönni', en nigula ga zoè' Jesús, nachè'gaquiè'-bi' yugu' bí'ido' quégaquiè' para ixóa nè'è Jesús légaabi'. Cate' bila'lé'enè' yugu' bönni' usèda queè' Jesús lè ni, gula'dil-lè' légaquiè'. 16 Ní'irö Jesús bulidzè' yugu' bönni' dá'gaquiè' Lè', rnnè':

—Guli'güi'-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nácgaca ca bi'i caní' lataj ga rinná bè'è Dios. 17 Le nácatè' rea' libí'ili': Nu cabi' si' lu nè'e le rinná bè'è Dios, ca runbi' tubi' bí'ido', biti' ca' tsaza ga ni' rinná bè'è Lè'.

*Tu bönni' rilé'enè' yöl-la' tsahui'*  
(Mt. 19:16-30; Mr. 10:17-31)

18 Tu bönni' unná bè' gunábinè' Jesús, rnnè':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

19 Jesús rë' lè':

—¿Bizx que rë'u neda': "Idú dxi'a"? Cuntu nu bönni' náquiè' idú dxi'a. Tuzè' Dios náquiè' idú dxi'a. 20 Nöz quézinu' yugu' le gunná bè'è Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabi' nácatè.

Ben bal xuz xinó'o.

21 Bönni' na' rë' Jesús, rnnè':

—Yúgu'tè lè ni runa' ga gudela' naca' bí'ido'.

22 Cate' biyönnè' Jesús didza' ni, rë' lè':

—Ia'tú le riyadzaj quiu' gunu'. Bèti' yúgu'tè le dè quiu', ate' lè na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

23 Cate' bönni' na' biyönnè' didza' ni, ruhuí'innè', tu' dèda' yöl-la' tsahui' queè'. 24 Cate' bilé'enè' Jesús ca na' ruhuí'innè' bönni' na', rnnè':

—¡Bica' böniga gaca, ila'yaza nupa ta'lé'e yöl-la' tsahui' ga rinná bè'è Dios! 25 Gácarö tödiba' böa' nagui yötsi', ca tsáziè' tu bönni' rilé'enè' yöl-la' tsahui' ga rinná bè'è Dios.

26 Ní'irö nupa bila'yöni didza' ni gula'nná:

—¿Nuzxi caz gaca ulá, channö?

27 Jesús gudxè' légaquiè':

—Le biti' gaca ilunè' bönni', huáca gunè' Dios.

28 Ní'irö Pedro rë' Jesús:

—Buyútsöca', netu' nucá'anatu' yúgu'tè le dè queétu', en dá'atu' Li'.

29 Ní'irö Jesús rë' légaquiè':

—Le nácatè' rea' libí'ili', nu bönni' ucá'anè' lidxè', o xuz xiné'è, o yugu' böchi' zanè', o nigula queè', o yugu' zxi'innè', tu' ruí'i ládxe'è inná bè'è Dios, 30 bönni' ni huazí'irè' dza ni zóaru' na'a, ate' dza si' za' idéli'nè' yöl-la' na'bán idú.

*Jesús rigúxjö'è leyúbölö ca si' ilútiè' Lè'*  
(Mt. 20:17-19; Mr. 10:32-34)

31 Jesús guchè'è quez queè' idxínnutè' bönni' usèda queè', en rë' légaquiè':

—Buli'yútsöca', ribenru' zéajru' Jerusalén, ga ni' ilaca yúgu'tè le nazúajgaca lu guichi ca gula'nné' bönni' gulu'è didza' uláz queé' Dios ca ral-la' gaca quia' neda', Bönni' Guljé' Bönachi. <sup>32</sup> Yugu' bönni' Jerusalén ulu'dödè' neda' lu ná'agaquié' bönni' zi'tu', ate' ulu'titjé' neda', en ulu'lidza zi'è neda', en ulu'chejé' neda' zxöna'. <sup>33</sup> Ila'guiné' neda', ate' tödirö ni' ilútié' neda', pero cate' gaca tsonna dza ubana'.

<sup>34</sup> Biti' gula'yéajni'iné' bönni' uséda queé' didza' ni, en biti' guléquibe'ené' ca sa'yéaj le ru'ilené' légaquié' didza' que, tu' naca le cabí sequi' ila'yéajni'iné'.

*Jesús ruúné' tu bönni' yödzö Jericó nachul-la lahué'*

*(Mt. 20:29-34; Mr. 10:46-52)*

<sup>35</sup> Cate' chizóa idxiné' Jesús yödzö Jericó, zoé' tu bönni' ni' nachul-la lahué'. Rö'è ra' nöza rinabé' nu bi gúnasö queé'. <sup>36</sup> Bönni' ni' biyönné' ta'dödi bönachi zían ni', ate' gunabé' bizxi na' raca. <sup>37</sup> Bönachi ni' të lè':

—Jesús, bönni' Nazaret, ridödè' ni.

<sup>38</sup> Ní'irö bönni' na' nachul-la lahué' bë'è zidzaj didza', rnné':

—¡Jesús, zxí'ini xi'sóé' David, buéchi' ladxi' neda'!

<sup>39</sup> Yugu' bönni' nanörugaquié' lahué' Jesús gula'dil-lè' bönni' na' nachul-la lahué' para usayaj ru'è, pero lè' zidzajrö bë'è didza', rnné':

—¡Zxí'ini xi'sóé' David, buéchi' ladxi' neda'!

<sup>40</sup> Ní'irö guzé' dxiz Jesús ribözé', ate' gunná bé'ené' nu tsöjlidza lè' para idxiné' lahué'. Cate' bönni' na' nachul-la lahué' bidxiné' lahué' Jesús, gunábiné' Jesús lè', rnné':

<sup>41</sup> —¿Bizxi rë'ènu' guna' quiu'?

Bönni' na' nachul-la lahué' rnné':

—Rë'énida' huöálaj guiöj lahua'.

<sup>42</sup> Jesús rë' lè':

—Chiböálaj guiöj lo'. Chiböácu' tu' réajlè'u neda'.

<sup>43</sup> La' ní'isö bulé'etené', ate' sa'yéajlené' Jesús, rigu'è Dios yöl-la' ba. Lësca' yúgu'tè bönachi nacuá' ni', en bila'lé'e lè' na' guca gula'gú'u Dios yöl-la' ba.

## 19

*Jesús, en Zaqueo*

<sup>1</sup> Ní'irö guyázié' Jesús yödzö Jericó, en ridödè' lu yödzö na'. <sup>2</sup> Zoé' tu bönni' lè' Zaqueo ni', bönni' lo ládjagaquié' bönni' uquízaxj, ate' dè yöl-la' tsahui' queé'. <sup>3</sup> Ruí'i ládxxé'è bönni' ni ilé'ené' Jesús, pero bití' guca queé' tu' nacuá' bönachi zían ni', en náquié' bönni' ga rë'èdo'. <sup>4</sup> Ní'irö carelö yöjnörüé' lógaca bönachi zían na', ate' yöjchené' tu lu yaga para gaca ilé'ené' Jesús, tu' ral-la' tödè' ni'. <sup>5</sup> Cate' bidxiné' Jesús ni', guchisa lahué' ruyúé' ga na' dxíé' Zaqueo na', en rë' lè':

—Zaqueo, bötjatè lu yaga na', tu' run bayudxi tsöjgá'ana' lidxu' na'a.

<sup>6</sup> Ní'irö la' bötjatè' Zaqueo lu yaga, ate' lu yöl-la' rudzeja queé' guché'è Jesús lidxé'.

<sup>7</sup> Cate' bila'lé'e bönachi nacuá' ni' lè' ni, gula'sí lógaquié' yúgu'tè' ta'nné' queé', ta'nné':

—Guyázié' Jesús ugá'analéné' bönni' dul-la'.

<sup>8</sup> Ní'irö guzuíné' Zaqueo, en rë' Xanru':

—Xan, buyútsöca'. Gatsaj le dè quia' gu'a quégaca bönachi yechi', en channö bi gudödi bë' buquizzja' bönachi, ubi'a quégaca bönachi na' tapa cö'tèlö ca'.

<sup>9</sup> Jesús rë' lè':

—Na'a dza ni bidxín yöl-la' rusölá quégaca nupa nacuá' yu'u ni, tu' nababé' bönni' ni di'a dza queé' Abraham. <sup>10</sup> Bida' neda', Bönni' Guljé' Bönachi, ududilja', en udusölá nupa nanítigaca.

*Rucúdzü'è didza' Jesús que chi cö' dumí*

<sup>11</sup> Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bë'ë Dios. <sup>12</sup> Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu në'ë yöl-la' unná bë', ate' ní'irö huödë'. <sup>13</sup> Cate' chizóa tsejë' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huóda'."  
<sup>14</sup> Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz queëgaquië' ga ni' tsejë', ila'nnë': "Biti' rë'ënitü' inná bé'enë' bönni' ni netu'." <sup>15</sup> Ní'irö guzxi' lu në'ë yöl-la' unná bë', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'. <sup>16</sup> Cate' bönni' zí'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." <sup>17</sup> Xanë' na' rë' lë': "Tshui' benu'. Nacu' huen dxin tsahui'. Tu' dxi'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö." <sup>18</sup> Ní'irö bidxinë' ia'tué' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." <sup>19</sup> Xanë' na' rë' ca' lë': "Inná bé'enu' gayu' yödzö." <sup>20</sup> Ní'irö bidxinë' ia'tué' lahuë' lë', rnnë': "Xan, ni dë tu cö' dumí quiu' na'. Ben chí'a le, butúlida' le lari'." <sup>21</sup> Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." <sup>22</sup> Ní'irö xanë' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöröa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" <sup>23</sup> Na'a, ¿bizx que biti' yöjlú'u dumí quia' na' ga gun icja, para cate' huóda', uzi'a le idú len icja na'?" <sup>24</sup> Ní'irö rë' nupa nacua' ni': "Guli'cúa lu në'ë dumí na', ate' guli'gü'i queë' bönni' na' dë queë' chi cö' dumí." <sup>25</sup> Légaquië' të' lë': "Xan, chidë queë' chi cö' dumí." <sup>26</sup> Ní'irö bubi'ë didza' xángaquië', rnnë': "Rea' libí'ili': Nu rugún dxi'a dxin le do' dë lu në'e, ulu'zxöni ládxi'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë' na' guta' lu në'e." <sup>27</sup> Ca naca queëgaquië' bönni' ni' biti' ta'lé'enë' neda' dxi'a, en biti' gulë'ënnë' inná bé'eda' légaquië', guli'tsöjzxi' légaquië' para ídigaquië' ni, ate' guli'guti légaquië'."

*Len yöl-la' ba zxön razië' Jesús yödzö Jerusalén  
(Mt. 21:1-11; Mr. 11:1-11; Jn. 12:12-19)*

<sup>28</sup> Cate' budxi gunné' caní Jesús, buguelë'ë xinözë', sa'yéajë' zaca' yödzö Jerusalén. <sup>29</sup> Cate' bila'dxinë' gala' ga nacua' yödzö Betfagé, en yödzö Betania, ga naca ra' gu'ado' nazí'i le Guí'a Yaga Olivo, gusöl-lë'ë Jesús chopë' bönni' usëda queë', <sup>30</sup> ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntü nu ribíani lëba'. Guli'sedxi-ba', en guli'duchë'-ba' quia' ni. <sup>31</sup> Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

<sup>32</sup> Söjáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. <sup>33</sup> Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

<sup>34</sup> Bulu'bi'ë didza', ta'nnë':

—Xanru' riquinnë'-ba'.

<sup>35</sup> Gula'chë'ë-ba' ga na' zoë' Jesús. Cate' chigula'xóë' yugu' lari' tsölá'a queëgaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. <sup>36</sup> Gapa ral-la' tödë' Jesús, gula'chiljë' lari' queëgaquië' la' nöza. <sup>37</sup> Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja queëgaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. <sup>38</sup> Ta'nnë':

—¡Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

<sup>39</sup> Ní'irö yugu' bönni' yudo' fariseo nútsa' gaquië' ladaj bönachi zián ni' të' Jesús, ta'nnë':  
—jBönni' Usedi, gudil-la yugu' bönni' usëda quiu'!

<sup>40</sup> Bubi'ë didza' Jesús, rë' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualu'í' caz zidzaj didza'.

<sup>41</sup> Cate' bidxinë' Jesús gala' ra' yödzö na', en rilé'enë' le, ní'irö ribödxë' que, <sup>42</sup> rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queëli', para cabí ilé'eli' le. <sup>43</sup> Huala'dxin queëli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gu'u libí'ili' lë'alö, ate' yúgu'të lataj idú gásibi'ilö ilúnlenë' libí'ili' gudil-la. <sup>44</sup> Ulu'quinnajë' zö'ö run chi'i yödzö queëli', en ilútië' nupa nacua' lu yödzö ni. Biti' ugá'ana guiöj lahuí luzé'e. Yúgu'të lë ni gaca queëli' tu' cabí gúquibe'eli' dza bidë' Dios buduyüë' libí'ili'.

### *Rulatjë' Jesús lö'a yudo'*

*(Mt. 21:12-17; Mr. 11:15-19; Jn. 2:13-22)*

<sup>45</sup> Ní'irö guyázië' Jesús lö'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. <sup>46</sup> Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxi'gaca bönni' gubán.

<sup>47</sup> Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. <sup>48</sup> Biti' bulu'dzölinë' nacxi ilútië' Lë', tu' idú ládxi'gaca tu'zë ná'agagaca yúgu'të bönachi xtídzë'ë.

## 20

### *Yöl-la' unná bë' dë lu në'ë Jesús*

*(Mt. 21:23-27; Mr. 11:27-33)*

<sup>1</sup> Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', <sup>2</sup> ate' të' Jesús:

—Gudixjöi' i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

<sup>3</sup> Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. <sup>4</sup> ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

<sup>5</sup> Gulún xtídzagaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guíë' rë'u: “¿Bizx que biti' guyéajlë'ëli'-në'?”

<sup>6</sup> Channö guiëru'-në': Gula'söl-lë'ë yugu' bönni' lë', bönachi lu yödzö ni ulu'ladxi' rë'u guiöj, tu' nöziguequi bë'ë didza' Juan na' uláz queë' Dios.

<sup>7</sup> Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

<sup>8</sup> Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

### *Yugu' bönni' huen dxin biti' nacagaquië' tsahui'*

*(Mt. 21:33-44; Mr. 12:1-11)*

<sup>9</sup> Ní'irö la' gusí lotë' Jesús ruí'ilenë' bönachi nacua' ni' didza'. Rucúdzü'ë didza', rnnë':

—Zoë' tu bönni' budë'ë yugu' lubá uva lu xiyüë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé.

<sup>10</sup> Cate' bidxin dza ulu'chibë' uva luyú na', gusöl-lë'ë tuë' bönni' gubáz queë' ga na' nacü'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. <sup>11</sup> Leyúbölö gusöl-lë'ë ia'tué' gubáz queë', ate' légaquië' gulúndë'ë

lë ca' zi', en gulu'ë dö' queë', ate' bulu'söl-lë'ë lë cá'asö. <sup>12</sup> Leyúbölö gusöl-lë'ë quégaquië' bönni' bunní gubáz queë', ate' bulu'dxië' ca' lë' huë', en bulu'béajë' lë' ní'ilo luyú na'.

<sup>13</sup> Ní'irö guzá' láchxë'ë xani luyú na', gunné': "¿Nacxi guntsa'? Isöl-la'a xzí'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." <sup>14</sup> Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': "Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'." <sup>15</sup> Bulu'béajë'-bi' ní'ilo luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? <sup>16</sup> Guidé', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacuá' ni' bila'yöni lë ni, gula'nnë':

—¡Inná Dios biti' gaca caní!

<sup>17</sup> Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiój na' gula'ru'unë' bönni' huen zö'ö,

guiój ni chinaca guiójlen squin zö'ö?

<sup>18</sup> Núti'tës nu ibixi lahui guiój ni, quítsaj nu na', ate' nu bönni' tsöjbága' guiój ni lë', uzzuxaj lë'.

*Ca naca dumí ta'guixxaj lázagaca bönachi*

*(Mt. 21:45-46; 22:15-22; Mr. 12:12-17)*

<sup>19</sup> La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero guládxinë' bi ilún bönachi zían nacuá' ni'. <sup>20</sup> Ní'irö bulu'yúyenië' Jesús, en gula'söl-lë'ë yugu' bönni' para ulu'béajë' Lë' didza', bönni' ulu'lu'i cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. <sup>21</sup> Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchí'a rusöröu' ca naca le tu'lu'isö lahui bönachi, pero idútë li naca ca rusédinu' xibá queë' Dios. <sup>22</sup> Gudíxjö'i netu'. ¿Naru' run bayudxi quixxaj laztu' queë' César, bönni' Roma rinná bë'ë, o cabí?

<sup>23</sup> Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizi' bë'ëli' neda'? <sup>24</sup> Buli'lu'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

<sup>25</sup> Ní'irö Jesús rë' légaquië':

—Buli'nödza' queë' César le nequi queë' César, ate' queë' Dios le nequi queë' Dios.

<sup>26</sup> Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'bábinë' ca naca didza' bubi'ë, ate' bulu'sayaj ruá'agaquië'.

*Ca gaca quégaca nupa ulu'bán lu yöl-la' guti*

*(Mt. 22:23-33; Mr. 12:18-27)*

<sup>27</sup> Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

<sup>28</sup> —Bönni' Usedi, Moisés buzúajë' queëru' lu guichi, le rnna: "Channö gátië' nu bönni', ate' ugá'ananu nigula queë', en channö cuntú nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'." <sup>29</sup> Gula'cuá'abi' gadxi bi'i bönni' nácagacabi' böchi'bi', ate' bi'í zí'alö na' butsaga ná'alénbi' bi'i nigula, en gútibi', biti' zóabi' bi'í queëbi'. <sup>30</sup> Ní'irö bi'í buropi na' butsaga ná'alénbi'-nu nigula na', ate' gútibi' ca' bi'í ni, biti' zóabi' bi'í queëbi'. <sup>31</sup> Butsaga ná'alénbi'-nu bi'í bunní na', ate' la' tuz ca gulunbi' igádxitëbi', ate' gulátibi', biti' zóabi' bi'í quégacabi'. <sup>32</sup> Ga búdxitë, gútinu ca'

nigula na'. <sup>33</sup> Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

<sup>34</sup> Ní'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bi' xzí'inigaquië' para ulu'tsaga ná'agacabi'. <sup>35</sup> Na'a, nupa ná'cagaca lesaca' ulu'bán lu yöl-la' guti, en tsöjcuá' yödzölió si' gata', bití' ilún yöl-la' rizóalen nigula, en bití' ulu'tsaga ná'agaca. <sup>36</sup> Caní gaca, tu' cabirö ilati nupa na' ulu'bán lu yöl-la' guti, pero ilácagaca ca ná'cagaquië' gubáz lá'ayi queë' Dios, en ilácagaca xzí'ini cazë' Dios. <sup>37</sup> Ca na' ral-la' ulu'bán nupa chinátigaca, rulu'ínë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' ná'quië' Dios queë' Abraham, en Dios queë' Isaac, en Dios queë' Jacob. <sup>38</sup> Dios ná'quië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

<sup>39</sup> Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

<sup>40</sup> Bítí'rö bulu'rúguinë' ila'nábinë' Lë' didza'.

*¿Nuzxi xzí'ini ná'quië' Cristo?*

*(Mt. 22:41-46; Mr. 12:35-37)*

<sup>41</sup> Ní'irö Jesús rë' légaquië':

—¿Nacxi caz na' ta'nnë': “Cristo ná'quië' xzí'inë' David”? <sup>42</sup> David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

<sup>43</sup> cate' gunra' ga ulu'zechu xzí'bigaca lo' nupa ta'dá'baga' Li'.”

<sup>44</sup> David caz na' gunné' queë' ná'quië' Xanë'. ¿Nacxi caz naca, rnnali' libí'ili' ná'quië' xzí'inë'?

*Jesús ruzéqui'ë diza' bönni' yudo' tu'sédinë'*

*(Mt. 23:1-36; Mr. 12:38-40; Lc. 11:37-54)*

<sup>45</sup> Tsanni ni' yúgu'të bönachi nacuá' ni' tu'zë ná'gagaca Jesús, rë' yugu' bönni' usëda queë':

<sup>46</sup> —Gulí'gún chí'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë' ná'cugaquië' lari' tunna, en té'ënnë' ulu'lidza bönachi légaquië' zxön gapa naca lu yë'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sëdë' queë' Dios, en gapa ta'bö'ë tahuë'. <sup>47</sup> Ta'güë' lídxigacanu nigula uzëbido', ate' para ulu'luí'i tsahui' cuíngaquië', xidzé tu'lidzë' Dios. Yugu' bönni' ni, yënni'tërö gunë' Dios ga ila'guí'i ila'záquië'.

## 21

*Gun le gulú'unu tu nigula yechi' lahuë' Dios*

*(Mr. 12:41-44)*

<sup>1</sup> Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu guí'ina que dumí gun que yudo'. <sup>2</sup> Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os. <sup>3</sup> Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zíca'rö bönachi na' ta'gu'ë dumí. <sup>4</sup> Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idütë le dë queënu, le ral-la' gáhuinu.

*Rigúxjö'ë Jesús ca ulu'sunítië' yudo'*

*(Mt. 24:1-2; Mr. 13:1-2)*

<sup>5</sup> Nacuá' ni' nupa tuí'i didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' ná'cagaca lachi, ate' Jesús rë' légaquië', rnnë':

<sup>6</sup> —Yúgu'të lë ni rilé'eli', huadxín dza cate' bítirö ugá'ana guiöj lahui luzë'e ni, tu' ulu'sunítì bönachi yudo' ni.

*Le ilaca bë' cate' si' idxín dza údxi*  
(Mt. 24:3-28; Mr. 13:2-23)

<sup>7</sup> Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

<sup>8</sup> Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'z'í' lágaquië' ca lea' neda', ila'nnë' nácagaquië' Cristo, en ila'nnë': "Chizá' gala' dza údxi." Neda' rea' libí'ili': Biti' tséajlenli' légaquië'. <sup>9</sup> Cate' yónili' raca gudil-la, en ta'dá'baga' bönachi yúlahui', bití' gadxi idzóbili', tu' run bayudxi ilaca le caní, pero bití' zuítëni dza údxi.

<sup>10</sup> Ní'irö rë' ca' légaquië':

—Til-la tu yödzo len ia'tú yödzo, ate' bönachi tu ga nu rinná bë' ila'díl-lalen bönachi ia'tú ga nu rinná bë'. <sup>11</sup> Tödígaca budó' zxu', ate' zían lataj gaca gubín, en ilatsaj yödzo'huë' zxön. Ila'lá' lahui lúzxiba le ilún gadxi bönachi, en le ilaca bë'.

<sup>12</sup> Zí'atëlö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guië. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. <sup>13</sup> Gaca caní queëli' para séqui'li' gunli' ba nalí quia' neda'. <sup>14</sup> Tsutsu guli'gún ládxi'li', para cabí cuéqui ícjali' zí'alö nacxi innali' uláz queëli', <sup>15</sup> tu' gunna' queëli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ni' bití' ila'lé'enë' libí'ili' dxi'a. <sup>16</sup> Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' dí'a dza que quézili', en yugu' böchi' luzë'e quézili', ate' ilútië' bál-lali'. <sup>17</sup> Yúgu'të bönachi ulu'zóa libí'ili' tsólá'alö tu' dá'ali' neda', <sup>18</sup> pero bití' inítì nitú guitsa' ícjali'. <sup>19</sup> Channö ugá'anali' tsutsu, idéli'li' yöl-la' na'bán idú.

<sup>20</sup> Cate' ilé'eli' bönni' röjáquië' gudil-la nagú'ugaquië' lë'a Jerusalén, inözili' chibidxín dza inítì yödzo ni. <sup>21</sup> Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzo ni ral-la' ila'rúaj ni, ate' nupa nacuá' la' guixi', bití' ral-la' ulu'dxín lu yödzo ni. <sup>22</sup> Yugu' dza ni' Dios gunë' xíguia' nupa nacuá' yödzo ni para gaca yúgu'të le nazúaj lu guichi lá'ayi ca ral-la' gaca quégaquië'. <sup>23</sup> Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbí', en nigula tu'gádxinu-bi' bí'ido', tu' ila'guí'i ila'záca'da' bönachi nacuá' ni', ate' Dios gúndë'ë bönachi ni' xíguia'. <sup>24</sup> Ilátie' zíanë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yödzo'lió, ate' yödzo Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

*Le ilaca bë' si' huödë' Bönni' Guljë' Bönachi*  
(Mt. 24:29-35, 42-44; Mr. 13:24-37)

<sup>25</sup> Gunnë' ca' Jesús:

—Ní'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. <sup>26</sup> Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzo'lió, en ila'zxizi le nalá'gaca lúzxiba. <sup>27</sup> Ní'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. <sup>28</sup> Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

<sup>29</sup> Jesús gudxë' ca' légaquië' tu le bucúdzü'ë didza', rnnë':

—Buli'yútsöca' ca raca que yaga higo, en que bítitës yaga yúbölö. <sup>30</sup> Cate' rilé'eli' ta'lén ni'a në'e huë'enido', nöz quézili' chizá' gala' cusu ba. <sup>31</sup> Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

<sup>32</sup> 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni.  
<sup>33</sup> Ila'dödi que lúzxiba, en que luyú ni, pero xtídza'a, bití' tödi cá'asö, tu' idxín caz ca rna.

<sup>34</sup> 'Guli'gún chi'i cuinli' para cabí güf'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxi', <sup>35</sup> en para cabí gaca queéli' ca tu le rizön bönachi, ca naca le gaca quégaca yúgu'të bönachi nacuá' idútë yödzülió. <sup>36</sup> Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljé' Bönachi.

<sup>37</sup> Lahui' dza rizóë' Jesús chila yudo', rusédinë' bönachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo. <sup>38</sup> Yugu' zila bila'dxín yúgu'të bönachi ga zoë' Jesús chila yudo' para ulu'zë náagagaca xtídzë'ë.

## 22

### *Tun xtídza'gaquië' ilútië' Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', <sup>2</sup> bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéquínë' tu' tádxinë' bi ilún bönachi.

<sup>3</sup> Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo. <sup>4</sup> Guyijë' Judas na', yöj'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. <sup>5</sup> Bulu'dzéjanë' bönni' yudo' na', en gula'z' lu ná'agaquië' ulu'nödzejë' queë' dumí. <sup>6</sup> Raza ládxië' Judas lë ni, ate' rizóa ribö'ë udödë' Jesús lu ná'agaquië' bagáchi'sö.

### *Le ráguru' le rusá' ládxi'ru' ca gútië' Xanru'*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. <sup>8</sup> Jesús gusöl-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

<sup>9</sup> Të' Lë':

—¿Gazxi ré'ënu' tsöjpá'atu' queëru'?

<sup>10</sup> Jesús rë' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'. <sup>11</sup> Guli'guíë' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" <sup>12</sup> Ní'irö uluí'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

<sup>13</sup> Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

<sup>14</sup> Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön. <sup>15</sup> Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'.

<sup>16</sup> Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

<sup>17</sup> Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'guí'aj lati' huéaj, <sup>18</sup> tu' rea' libí'ili': Bítirö guí'ja' xisi uva cate' idxinrö le rinná bë'ë Dios.

<sup>19</sup> Ní'irö gudélë'ë yöta xtila, en gudxë' Dios: "Xclenu'." Gudödi ni' buzuzxjë' le, en bë'ë que queégaquië', rnnë':

—Lë ni naca idútë le naca' le rudöda' uláz queéli'. Guli'gún caní para usá' ládxi'li' neda'.

<sup>20</sup> Cate' budxi gulahuë', lësca' caní bë'ë didza' que zxíga'do' na', rnnë':



—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queëli'.

<sup>21</sup> 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön. <sup>22</sup> Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

<sup>23</sup> Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní'?

*Tu'i xtídzá'gaquië' núzxilögaquië' gáquië' lo*

<sup>24</sup> Ní'irö gulu'ë didza' la' légacasë' núzxilögaquië' idéli'në' lataj lo. <sup>25</sup> Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen. <sup>26</sup> Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídí'tërö, ate' nu rinná bë' ral-la' gaca ca nu run dxin quéguequi luzë'e. <sup>27</sup> ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

<sup>28</sup> 'Libí'ili' ni guzóalenli' neda' cate' ni' bi guca quia', yugu' le gula'zí bë' neda'. <sup>29</sup> Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'. <sup>30</sup> Caní guna' para gaca cö'öli', en guí'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' zxi'ini xi'sóë' Israel.

*Rnnë' Jesús innë' Pedro biti' núnbë'ë Lë'*

*(Mt. 26:31-35; Mr. 14:27-31; Jn. 13:36-38)*

<sup>31</sup> Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoá' xtila, <sup>32</sup> pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huöácu' quia', butipa ládxi'gaquië' böchi' luzó'o.

<sup>33</sup> Pedro rë' Lë':

—Xan, chizóá' sá'lena' Li', calëgasö tseja' lidxi guíë, pero lësca' gátileña' Li'.

<sup>34</sup> Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

*Le benë' Jesús cate' chizóá ilútië' Lë'*

<sup>35</sup> Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

<sup>36</sup> Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guíë tuchi' ral-la' guti' lari' rixóa yeni, en si' tu guíë tuchi'. <sup>37</sup> Rea' libí'ili': Run bayudxi gaca quia' lë na' nazúaj lu guichi lá'ayi, rnna: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

<sup>38</sup> Ní'irö légaquië' ta'nnë':

—Xan, ni dë chopá guíë tuchi'.

Lë' rë' légaquië':

—Chinaca.

*Jesús rulidzë' Dios la' yëla Getsemaní*

*(Mt. 26:36-46; Mr. 14:32-42)*

<sup>39</sup> Ní'irö birúajè' Jesús, en ca run cazè' sa'yéajè' lu Gu'á Yaga Olivo, ate' yugu' bönni' usèda queè' sòjácalenè' Lè'. <sup>40</sup> Cate' bila'dxinè' ni', Jesús rè' légaquiè', rnnè':

—Buli'lídzè' Dios, inábili'-nè' cabí gata' lataj si' bè' tu' xihui' libí'ili'.

<sup>41</sup> Ní'irö Jesús guzè'è ga na' nacu'è, en gudödè' ia'lati' tsca ga ridxín tu guiöj rirú'uniru', ate' ni' buzóa zxi'bè', en rulidzè' Dios. <sup>42</sup> Rnnè':

—Xúz, channö ré'ènu', bucuása ga zoa' lè na' ral-la' quí'i saca'a, pero calèga ca ré'ènda' neda', pero ca ré'ènu' Li' gunu'.

<sup>43</sup> Ní'irö buluí' lahuè' gubáz lá'ayi queè' Dios, zè'è yehua' yubá, ate' butipè' ládxè'è Jesús. <sup>44</sup> Lu yöl-la' risèbi ladxi' queè', idú ládxè'è Jesús bulidzè' Dios, ate' nisa yösa queè' guca ca rön raba' luyú.

<sup>45</sup> Cate' budxi bulidzè' Dios, guyasè', en böajè' ga na' nacu'è bönni' usèda queè', ate' duxáquiè' légaquiè' tásiè' tu' tu'huí'inigaquiè'. <sup>46</sup> Ní'irö Jesús rè' légaquiè':

—¿Rásitsali'? ¡Guli'chasa, en buli'lídzè' Dios! Inábili'-nè' cabí gata' lataj si' bè' tu' xihui' libí'ili'.

### *Ta'zönè' Jesús*

*(Mt. 26:47-56; Mr. 14:43-50; Jn. 18:2-11)*

<sup>47</sup> Tsanni ni' ru'è didza' Jesús, la' bila'dxintè' bönni' zían ni', ate' Judas, bönni' na' nababè' idxínnuè' bönni' usèda queè' Jesús dzáguiè' légaquiè', ate' nanöruè' lógaquiè' bönni' zían na'. Gubígu'è ga zoè' Jesús para utsaga lahuè' Lè'. <sup>48</sup> Ní'irö Jesús rè' lè':

—Judas, ¿naru' rudöditso' caní neda', Bönni' Guljè' Bönachi, rutsaga lo' neda'?

<sup>49</sup> Cate' yugu' bönni' na' nacuá'lenè' Jesús bila'lé'enè' ca na' raca queè' Lè', tè' Lè':

—Xan, ¿naru' güí'itu' légaquiè' guíè tuchi'?

<sup>50</sup> Tuè' bönni' usèda queè' Jesús benè' huè' guídi náguiè' bönni' huen dxin queè' bixúz lo. Burixè' guídi náguiè' ibèla. <sup>51</sup> Jesús rnnè':

—Chinaca na'a. Tsca' gaz.

Gudanè' Jesús guídi náguiè' bönni' huen dxin na', en bunè' le. <sup>52</sup> Ní'irö ré' yugu' bixúz unná bè', en bönni' dè lu ná'agaquiè' que yudo', en bönni' gula tu'zéajni'inè', bönni' na' bití' ta'lé'enè' Lè' dxi'a, rnnè':

—¿Narúajtsali' nuá'ali' guíè tuchi', en yaga para sönli' neda' ca runli' rizönli'-nè' gubán?  
<sup>53</sup> Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxín dza queè'li', le naca dza dè lu nè'e nu na' zoa lataj chul-la.

### *Rnnè' Pedro: "Bití' núnbè'a-nè' Jesús"*

*(Mt. 26:37-58, 69-75; Mr. 14:53-54, 66-72; Jn. 18:12-18, 25-37)*

<sup>54</sup> Ní'irö gula' zönè' Jesús, en gula' ché'è Lè' ga na' bulu'sudxinè' Lè' lidxè' bixúz lo. Pedro yöjnuhuè' Jesús zi'tu' zítu'sö. <sup>55</sup> Cate' ni'a nè'è bixúz lo chigula'béquiè' guí' lö'a lidxè' bixúz lo na', gula'bö'è idú gásibi'ilö ra' guí' na', ate' Pedro guró'lenè' légaquiè' tsözxön. <sup>56</sup> Cate' tubí' bi'i nigula huen dxin bilé'ebi'-nè' Pedro, ni' rő'ösè' ra' guí', buyubi' lè', en rnnabi':

—Bönni' ni dè'è ca' Jesús.

<sup>57</sup> Gudá'baguiè' Pedro, rnnè':

—Nígúla, bití' ca' núnbè'a-nè' bönni' na'.

<sup>58</sup> Ia'lati' gudzé ia'tué' bönni' bilé'enè' Pedro, ate' rnnè':

—Li' do'o ca' légaquiè'.

Pedro gunné':

—Bönni', calèga neda'.

<sup>59</sup> Ia'lati'sö gudzé, gunné' ia'tué' bönni':

—Le nácatè bönni' ni dè'è Jesús, tu' náquiè' bönni' Galilea.

<sup>60</sup> Ní'irö Pedro gunné':

—Bönni', bití' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra. <sup>61</sup> Ní'irö buécjé' Xanru', en ruyúé' Pedro, ate' yöjnené' Pedro xtídzë'ë Xanru', ca na' gudxë' lë': "Zí'alö cödxiba' böra na'a, li' chigudá'bagu'u tsonna luzuí, innó' biti' núnbë'u neda'." <sup>62</sup> Burúajé' Pedro ní'ilö, ate' rön caz gurödxë'.

*Tu'titjé' Jesús*

(Mt. 26:67-68; Mr. 14:65)

<sup>63</sup> Yugu' bönni' na' nazöngaquié' Jesús bulu'titjé' Lë', ate' gula'guiné' Lë'. <sup>64</sup> Ní'irö bulu'sayjé' lahué' Jesús, ate' gula'gápë'ë lahué', en gula'nábinë' Lë', ta'nnë':

—¿Gunnëya'atsöca'! ¿Nuzxi na' gudapa' Li'?

<sup>65</sup> Ziánró ca' gula'nnë' queë' le gulu'ë dö' queë'.

*Ridxiné' Jesús lógaquié' bönni' yudo' tu'chi'a tu'söröë'*

(Mt. 26:59-66; Mr. 14:55-64; Jn. 18:19-24)

<sup>66</sup> Cate' chizá' rení' dza na', bulu'dubë' bönni' gula tu'zéajni'iné' bönachi judío len yugu' bixúz unná bë', en bönni' yudo' tu'sédinë', ate' gula'ché'ë Jesús lógaquié' bönni' yudo' tu'chi'a tu'söröë', ate' gula'nábinë' Lë', <sup>67</sup> ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquié':

—Channö guía' libí'ili' naca' Cristo, biti' tséajlë'ëli' neda', <sup>68</sup> en channö inábida' libí'ili' tu didza', biti' ubí'ili' didza', en biti' usanli' neda'. <sup>69</sup> Na'a isí lo, neda', Bönni' Guljé' Bönachi, cö'a cuita lë'ë ibëla Dios, nápatëré' yöl-la' unná bë'.

<sup>70</sup> Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquié':

—Le nácasö rnnali'.

<sup>71</sup> Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyöniru' didza' ru'ë.

## 23

*Ridxiné' Jesús lahué' Pilato, bönni' rinná bë'ë uláz queë' César*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Ní'irö gulazuiné' yúgu'të bönni' zían ni', ate' gula'ché'ë Jesús lahué' Pilato, <sup>2</sup> ga ni' gula'sí lógaquié' tu'zéguié' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guízxaj laz ruquíxjé' César, en rnnë' lë' cazë' náquié' Cristo, bönni' ral-la' inná bë'ë.

<sup>3</sup> Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

<sup>4</sup> Ní'irö Pilato gudxë' yugu' bixúz unná bë', en bönachi nacua' ni', rnnë':

—Biti' bi rudzólida' le naca xíguia' nunë' bönni' ni.

<sup>5</sup> Ní'irö gulunrë' tsutsu xtídzá'gaquié', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahué' benë' caní luyú Galilea ga ridxintë runë' ca' ni.

*Ridxiné' Jesús lahué' Herodes, bönni' rinná bë'ë luyú Galilea*

<sup>6</sup> Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquié' channö náquié' Jesús bönni' Galilea. <sup>7</sup> Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahué' Herodes na', tu' zoë' ca' Herodes Jerusalén yugu' dza na'.

<sup>8</sup> Cate' Herodes na' bilé'enë' Jesús, budzéjanë', tu' chiguca xidzé rë'ënë' ilé'enë' Lë' tu'

chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. <sup>9</sup> Ní'irö Herodes gunábinë' Jesús le zían, pero Jesús bití' bi didza' bubí'ë. <sup>10</sup> Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. <sup>11</sup> Ní'irö Herodes, en bönni' queë' rójáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. <sup>12</sup> Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'túë'.

*Ta'chúguië' queë' Jesús gátie'*

(Mt. 27:15-26; Mr. 15:6-15; Jn. 18:39-19:16)

<sup>13</sup> Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, <sup>14</sup> ate' rë' légaquië':

—Djujá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabí yúdxida'-në', ate' zóatëli' ca' ni, bití' bi budzólida' le naca xíguia' nabáguë'ë, yugu' lë na' ruzéguali'-në' didza'. <sup>15</sup> Cate' gusöl-la'a libí'ili' lahuë' Herodes, bití' bi budzölinë' le benë' bönni' ni le naca xíguia' nabáguë'ë para nu ichugu queë' gátie'. <sup>16</sup> Na'a usaca' zí'a-në', ate' tödi na' usana'-në'.

<sup>17</sup> Run bayudxi tu le gunë' Pilato, usané' lu ná'agaca bönachi tuë' bönni' nadzunë' cate' raca laní na', ca na' run cazë'. <sup>18</sup> Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

<sup>19</sup> Nadzunë' Barrabás na' lidxi guië tu' gudíl-lalenë' yúlahui' lu yödzö na', en tu' bëtië' bönachi. <sup>20</sup> Bulidzë' Pilato légaquië' leyúbölö, tu' rë'ënë' usané' Jesús. <sup>21</sup> Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

<sup>22</sup> Ní'irö Pilato gudxë' légaquië' le bunny luzuí, rnnë':

—¿Bizxi caz le ruá' dö' benë' bönni' ni? Bití' bi budzólida' nunë' le run ga nabáguë'ë xíguia' gátie'. Usaca' zí'a-në', ate' ní'irö usana'-në'.

<sup>23</sup> Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxí'ë yenni' yugu' bönni' na', en yugu' bixúz unná bë', gula'délinë' gaca ca na' té'ënnë'. <sup>24</sup> Ní'irö Pilato guchúguië' queë' Jesús, para gaca queë' ca na' ta'nabë'. <sup>25</sup> Busanë' quégaquië' bönni' na' nadzunë' lidxi guië tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' té'ënnë'.

*Dë'ë Jesús lë'e yaga cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Cate' ni' ta'ché'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzulë' Jesús.

<sup>27</sup> Bönachi zían, enca' yugu' nigula söjné'gaca Jesús, ta'bödxinu nigula na', en ta'bödxí yéchi'nu queë' Lë'. <sup>28</sup> Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Bití' cödxili' quia' neda', pero guli'cödxí que quézili', en quégacabi' zxi'nili' <sup>29</sup> tu' huadxín dza ila'nná: “Bica' bágaca yugu' nigula huödx, en nigula bití' guluá'anu-bi' bí'ido', en bití' bulu'gádxí'nu-bi' bí'ido'.” <sup>30</sup> Ní'irö ila'sí lógaca ila'nná bönachi, ilé' yugu' guí'a sibi: “Guli'dubága' netu’”, en ilé' ca' yugu' guí'ado': “Guli'cachí' netu’.” <sup>31</sup> Channö caní tunë' quia' neda', naca' ca tu yaga ya'a, ¿naru' cabí ilúntërë' ca' queëli', nácali' ca yaga bidxi?

<sup>32</sup> Gula'ché'ë ca' chopë' bönni' tuá' dö', para ilútië' légaquië' tsözxön len Jesús. <sup>33</sup> Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'túë' bulu'dë'ë cuita lë'ë yögöla. <sup>34</sup> Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queëgaquië' le nácuë' Jesús, en bulu'quitjé' le gaca bë' lahui. <sup>35</sup> Bönachi nacuá' ni' tu'yú, en yugu' bönni' dë lu ná'agaquië' bulu'titjé' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' gurö cazë' Dios.

<sup>36</sup> Yugu' bönni' na' röjáquië' gudil-la bulu'titjé' ca' Jesús. Gula'biguë'ë ga na' zoë', en bulu'gui'jé' Lë' nupi zi, <sup>37</sup> ta'nnë':

—Channö nacu' Li' bönni' inná bé'enë' bönachi judío, busölá cuinu'.

<sup>38</sup> Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: “Bönni' Rinná Bé'enë' Bönachi Judío.” <sup>39</sup> Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

<sup>40</sup> Bubi'ë didza' ia'túë' bönni' huiá' dö' na', en gudil-lë' luzë'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátu'. <sup>41</sup> Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ë.

<sup>42</sup> Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

<sup>43</sup> Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

### *Ratië' Jesús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Cate' bidxín idú huagubidza, guchul-la idútë yödzölió ga bidxinrö idú ridödi xihuó.

<sup>45</sup> Guchul-la gubidza, ate' lari' nal-la' lu yudo' biröza' chopa dí'ilö. <sup>46</sup> Ní'irö bë'ë zidzaj didza' Jesús, rnnë':

—Xuz, rigu'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

<sup>47</sup> Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

<sup>48</sup> Cate' yúgu'të bönni' nacu'ë ni' tu'yúë' bila'lë'enë' lë na' guca, yöjhuöjgaquië' yödzö, ta'gapa' luchú'ugaquië' tu' tu'bánnë'. <sup>49</sup> Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yójacalennu Lë' cate' ni' gudë' luyú Galilea, ate' tu'yúë' lë ni raca.

### *Rigáchë'ë Jesús yeru ba*

*(Mt. 27:57-61; Mr. 15:42-47; Jn. 19:38-42)*

<sup>50</sup> Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'. <sup>51</sup> Biti' benë' tuz nupa na' gula'chugu queë' Jesús gátie', tu' ribözë' ca' José ni le rinná bë'ë Dios. <sup>52</sup> Ní'irö guyijé' José na' lahuë' Pilato, en gunabë' lataj u'ë Jesús. <sup>53</sup> Cate' chinuzötjé' Lë', buchölinë' Lë' lari', ate' gulu'ë Jesús yeru ba, le nadaj lë'e gu'a guiöj, ate' lu ba na', cuntu nu nagü'iguequinë'. <sup>54</sup> Dza na' naca dza tu'pë'ë que dza lá'ayi quëgaquië' bönni' judío, tu' si' idxín dza na'.

<sup>55</sup> Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lë'enu yeru ba na', en ca na' guca, gula'gu'ë Lë' ni'. <sup>56</sup> Cate' yöjhuöjgacanu yu'u, bulu'pá'anu nörí rilá' zixi, en yugu' le za rilá' zixi. Ní'irö bulu'zì ládxi'gacanu dza lá'ayi na' quëgaquië' bönni' judío ca na' rinná bë' xibá queë' Dios.

## 24

*Rubanë' Jesús lu yöl-la' guti**(Mt. 28:1-10; Mr. 16:1-8; Jn. 20:1-10)*

<sup>1</sup> Cate' bidxín dza risí lo ia'gadxi dza na', cate' ni' naca zílado', bila'dxinu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu lé'gacanu ia'bál-lanu nigula. <sup>2</sup> Cate' bila'dxinu ni', bila'lé'enu chinadúa guiöj na' gudá' ga nu riyaza yeru ba queë'. <sup>3</sup> Cate' gula'yázanu yeru ba na', biti' bulu'dzölinu zoa Xanru' Jesús ni'. <sup>4</sup> Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacuá'anu. <sup>5</sup> Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' tē' lé'gacanu, ta'nnë':

—¿Bizx que ruguílajli' nu zoa nabán xilataj nu nati? <sup>6</sup> Biti' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea. <sup>7</sup> Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'e neda' lë'e yaga cruz, ate' ubana' cate' gaca tsonna dza."

<sup>8</sup> Ní'irö yöjnégacanu didza' na' bë'e Jesús, <sup>9</sup> ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zícá'rë' ca', ca naca lë na' guca. <sup>10</sup> Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'e Jacobo, en ia'bál-lanu nigula na' dzágagacanu lé'gacanu. <sup>11</sup> Guléquinë' bönni' gubáz na' tu'ínu didza' chixi, en biti' gula'yéajlë'e lé'gacanu.

<sup>12</sup> Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

*Le guca la' nöza ridxintë Emaús**(Mr. 16:12-13)*

<sup>13</sup> La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. <sup>14</sup> Yú'ugacasë' ca' nöza, tu'ë didza' ca naca yúgu'të lë na' guca. <sup>15</sup> Tsanni ni' yú'ugaquië' nöza, tu'ë didza' la' lé'gacasë', gubígui'e gala' Lë cazë' Jesús, ate' gudálenë' lé'gaquië' tsözxön. <sup>16</sup> Biti' bulu'únbë'e Lë' tu' naca ca tu le nabaga' guiöj lógaquië'. <sup>17</sup> Ní'irö Jesús gunábinë' lé'gaquië', rnnë':

—¿Bizxi didza' na' ru'í'ili' la' libí'isili' yú'uli' nöza? ¿Bizx que na' ruhu'ínili'?

<sup>18</sup> Bubi'e didza' bönni' na' lë' Cleofas, rë' Lë':

—¿Nácatsö' bönni' zì'tu' lu yödzö Jerusalén, en tuzu' li' biti' nözinu' lë na' guca néaje nasi ni'?

<sup>19</sup> Ní'irö Jesús rë' lé'gaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'e didza' uláz queë' Dios, ate' len yöl-la' huáca zxön benë' dxin, en bë'e didza' lahuë' Dios, en lógaca yúgu'të bönachi.

<sup>20</sup> Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dë'e Lë' lë'e yaga cruz. <sup>21</sup> Netu' bentu' löza gúquië' Lë' bönni' na' ral-la' huó'á'uë' bönachi Israel, pero na'a chiguca tsonna dza cate' gulaca lë ni. <sup>22</sup> Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza, <sup>23</sup> en cate' biti' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë lé'gacanu zoë' nabanë' Jesús. <sup>24</sup> Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

<sup>25</sup> Ní'irö Jesús gudxë' lé'gaquië':

—Libi'ili', bönni' biti' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'e didza' uláz queë' Dios. <sup>26</sup> ¿Naru' cabí ben bayudxi qui'i sáquë'e Cristo yugu' lë ni, en tsázië' ga ni' tsépisëtë'rë'?

<sup>27</sup> Ní'irö gusí lahuë' Jesús riguíxjö'inë' légaquië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

<sup>28</sup> Cate' bila'dxinë' yödzo' ga na' sōjáquië', benë' Jesús ca tu bönni' zéajtë'rë' zi'tu'.

<sup>29</sup> Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'. <sup>30</sup> Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: "Xclenu'." Ní'irö buzuzxjë' le, en bë'ë quégaquië'. <sup>31</sup> La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'. <sup>32</sup> Ní'irö gulë luzé'ë tuë' ia'tué':

—¿Naru' cabí böála'tica' ládxi'do'oru' tsanni ni' ruí'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

<sup>33</sup> La' ní'isö gula'zuinë' yöjhuöjgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'. <sup>34</sup> Ní'irö yugu' bönni' na' nacu'ë ni' gulé' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

<sup>35</sup> Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzuzxjë' yöta xtila na'.

### *Bönni' usëda queë' Jesús tu'lé'enë' Lë'*

*(Mt. 28:16-20; Mr. 16:14-18; Jn. 20:19-23)*

<sup>36</sup> Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Gulí'sóa dxi ládxi'li'.

<sup>37</sup> Ní'irö guladxi gula'dzöbinë' tu' téquinë' bixín ta'lé'enë'. <sup>38</sup> Jesús rë' légaquië':

—¿Bix que rö'öli' böniga? ¿Bix que rizá' ládxi'li' yugu' lë ni? <sup>39</sup> Buli'yútsöca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

<sup>40</sup> Ní' ruí'isë' ca' didza' ni, buluí'inë' légaquië' në'ë, en ni'ë. <sup>41</sup> Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queéli' ni le gahua'?

<sup>42</sup> Ní'irö bulu'nödzejë' queë' láti'do'oba' böla chinégui'ba', en tu quízxi'ba' buz. <sup>43</sup> Guzxi'ë Jesús le, en gudahuë' lógaquië'. <sup>44</sup> Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

<sup>45</sup> Ní'irö buzéajni'inë' légaquië' lë na' nazúajgaca lu guichi lá'ayi. <sup>46</sup> Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, <sup>47</sup> ate' idütë yödzo'lió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzo' Jerusalén isí lo gaca libán na' <sup>48</sup> ate' libí'i cázali' na' bilé'eli' yugu' lë ni ral-la' gunli' ba nalí que. <sup>49</sup> Buli'yútsöca', isöl-la'a queéli' le guzxi' lu në'ë Xuza' gunnë' queéli', pero buli'gá'anasö Jerusalén cate' idxinrö queéli' yöl-la' huáca na' za' yehua' yubá.

### *Ruhuëpë' Jesús yehua' yubá*

*(Mr. 16:19-20)*

<sup>50</sup> Ní'irö Jesús guchë'ë yugu' bönni' dá'gaquië' Lë', sōjáquië' yödzo' Betania, ate' ni' guchisa në'ë, en bulidza tsáhuë'ë légaquië'. <sup>51</sup> Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. <sup>52</sup> Gudödi gula'yéaj ládxi'gaquië' Lë', lu yöl-la'

rudzeja quégaquië' yõjhuõjgaquië' Jerusalén. <sup>53</sup> Gula'cuá'tica'së' chila yudo', ta'gu'ë Dios  
yöl-la' ba, en tun zxönë' Lë'. ¡Ca' naca!



## DIDZA' DXI'A BUZÚAJË' JUAN

### *Bönni' na' nazí'i lë' Didza' gúlajë' bönachi*

<sup>1</sup> Cate' gusí lo, zí'atëlö cate' si' gata' yödzölió, ni' zoa cazë Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. <sup>2</sup> Bönni' na' náquië' Didza' zóalenë' Dios cate' ni' gusí lo si' rata' yödzölió. <sup>3</sup> Lu në'ë Bönni' ni, Dios benë' yúgu'të le dë, en bití' bi dë le nunë' Dios le cabí benë' lu në'ë Bönni' na'. <sup>4</sup> Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. <sup>5</sup> Ruzení' bení' na' ga naca chul-la que dul-la', pero bití' ca' sequí' le chul-la na' usulu bení' na'.

<sup>6</sup> Dios gusól-lë'ë ni tu bönni' lë' Juan. <sup>7</sup> Bidë' bönni' ni para gáquië' nu gun ba nalí. Bidë' para gunë' ba nalí queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nalí. <sup>8</sup> Bití' náquië' Juan bení' na', pero bidë' para gunë' ba nalí queë' Bönni' na' náquië' bení'. <sup>9</sup> Bönni' na' náquië' bení' le naca idú ni' razië' yödzölió ni, ate' ruzeni'ë lu icja ládxi'do'gaca yúgu'të bönachi.

<sup>10</sup> Bönni' na' náquië' bení' bidxinë' yödzölió ni, ate' lu në'ë Lë' Dios benë' yödzölió ni, pero bönachi yödzölió bití' bulu'únbë'ë Lë'. <sup>11</sup> Bidxinë' ga nequi queë', pero bití' ca' gula'zí' lu ná'agaquië' Lë' bönni' nabábalenë'. <sup>12</sup> Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' zxi'inë' Dios. <sup>13</sup> Bönni' ni nácagaquië' zxi'inë' Dios, calëga tu' nácagaquië' zxi'inë' nu bönni', en calëga tu' nálajgaquië' ni'a que le rizë ládxe'ë nu bönni', o ni'a que tu le rë'ënë' nu bönni', pero nácagaquië' caní tu' naca le rë'ëni quézinë' Dios.

<sup>14</sup> Bönni' na' náquië' Didza' guljë' bönachi, en tu chí'isö guzóalenë' rë'u, idú dzágagaca Lë' le ruzá' ládxe'ë Dios queëru', en le naca idútë li. Bilé'etu' yöl-la' zxön queë', ate' yöl-la' zxön queë' na' naca le ru'i queëbi' bi'i la's dui que, Nu na' naca Xúzibi'. <sup>15</sup> Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjō'a que, gunní'a: Bönni' si' zá'tëlë' ca neda' nayëpisëtërë' ca neda', tu' zoa cazë' Lë' zí'alö ca neda'.

<sup>16</sup> Le naca idú queë' buzí'iru' xibé yúgu'tëru', lë na' buzá' ládxe'ë queëru' Dios, en zíanrö ca' le ruzá' ládxe'ë queëru'. <sup>17</sup> Bidxín queëru' xibá queë' Dios lu në'ë Moisés, pero le ruzá' ládxe'ë queëru' Dios, en le naca idútë li bila'dxín queëru' lu në'ë Jesucristo. <sup>18</sup> Catu caz nu bilé'ë Dios, pero Lë', la's dui Zxi'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'ëru'-në' Dios.

### *Le benë' ba nalí Juan, bönni' buquilë' bönachi nisa, ca náquië' Jesús*

*(Mt. 3:1-12; Mr. 1:7-8; Lc. 3:1-17)*

<sup>19</sup> Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni nácagaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

<sup>20</sup> Yálajdo' bë'ë didza' Juan, en bití' gudá'baguië', pero gudíxjō'ë catëz naca, rnnë':

—Bití' naca' Cristo, Bönni' na' guzxi' lu në'ë Dios isöl-lë'ë queëru'.

<sup>21</sup> Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunnë' Juan:

—Bití' naca'.

Ní'irö të' lë':

—¿Naru' nacu' li' bönni' na' ral-la' guidë' gu'ë didza' uláz queë' Dios?

Bubi'ë didza' Juan, rnnë':

—Calëga neda’.

<sup>22</sup> Ní’irö të’ lë’:

—¿Nuzxi caz nacu’? Gudíxjöi’i netu’ para gaca usiyöntu’ nupa gula’söl-la’ netu’. ¿Bizxi rno’ li’ nuzxi nacu’?

<sup>23</sup> Bubi’ë didza’ Juan, rë’ légaquië’:

—Neda’ naca’ bönni’ na’, nazúaj lu guichi lá’ayi ca naca queë’, rna: Riyön chi’i nu rulidza lu lataj cá’asö, rna: Buli’béaj li nöza para idxín Xanru’ queëli’. Caní gunnë’ Isaías, bönni’ na’ bë’ë didza’ uláz queë’ Dios.

<sup>24</sup> Yugu’ bönni’ ni nácalaquië’ bönni’ yudo’ fariseo nasöl-la’ gaquië’ bönni’ judío unná bë’.

<sup>25</sup> Gula’nábinë’ Juan, të’ lë’:

—¿Bizx que ruquilu’ bönachi nisa channö cabí nacu’ li’ Cristo, en biti’ nacu’ Elías, en calëga bönni’ na’ ral-la’ guidë’ gu’ë didza’ uláz queë’ Dios?

<sup>26</sup> Bubi’ë didza’ Juan na’, rë’ légaquië’:

—Neda’ ruquila’ bönachi nisa lu nisa, pero gatsaj láhui’lö ga zóali’ zoë’ tu bönni’ biti’ núnbë’ëli’-në’. <sup>27</sup> Bönni’ ni náquië’ Bönni’ na’ si’ zá’tëlë’ ca neda’, en nayëpisëtëre’ ca neda’, ate’ biti’ naca’ neda’ lesaca’ ulecja’ xiráchuë’ nudë’ë.

<sup>28</sup> Yúgu’ të lë ni guca lu xiyú yödzö Betábara, ga naca ia’tsölá’a yegu Jordán, zaca’ ga rilén gubidza, ga ni’ buquilë’ Juan bönachi nisa.

*Jesús náquië’ ca bö’cu’ zxíla’do’ tutië’-ba’ lahuë’ Dios tu’ nözi dul-la’*

<sup>29</sup> Dza buropi ni’ Juan bilé’enë’ Jesús, zë’ë ga zoë’, ate’ rnnë’:

—Buli’yútsöca’. Bönni’ ni náquië’ bö’cu’ zxíla’do’ queë’ Dios, gátië’ para ugüë’ dul-la’ nabága’gaca bönachi yödzölió. <sup>30</sup> Lë’ náquië’ bönni’ na’ gunniá’ queë’: “Si’ zá’tëlë’ ca neda’ tu bönni’, nayëpisëtëre’ ca neda’, tu’ zoa cazë’ zí’alö ca neda’.” <sup>31</sup> Neda’ biti’ bënbe’a-në’ zí’alö, pero bida’, ruquila’ bönachi nisa para ilúnbë’e bönachi Israel Lë’.

<sup>32</sup> Benë’ ba nalí Juan ca naca queë’ Jesús, rnnë’:

—Bilé’eda’-në’ Dios Bö’ Lá’ayi, bötjë’ birúajë’ yehua’ yubá, gunë’ë ca riná’aba’ gu’dödo’, ate’ bidxinë’ ga zoë’ Jesús, en bugá’analenë’ Lë’. <sup>33</sup> Biti’ bënbe’eda’ Lë’ zí’alö. Gudxi neda’ Nu na’ gusöl-la’ neda’ para uquila’ bönachi nisa, gunnë’: “Cate’ ilé’enu’-në’ huötjë’ Dios Bö’ Lá’ayi, tsöjsóalenë’ Bönni’ na’, en ugá’analenë’ Lë’, Bönni’ ni gunë’ le rulu’isö yöl-la’ ridila nisa ni, uchízië’ bönachi Dios Bö’ Lá’ayi.” <sup>34</sup> Na’a, chibilé’eda’ lë na’, en runa’ ba nalí queë’ Bönni’ ni, náquië’ Zxí’inë’ Dios.

*Yugu’ bönni’ usëda zí’alö queë’ Jesús*

<sup>35</sup> Ia’tú dza ca’, leyúbölö zoë’ Juan ni’, ate’ nacuá’lenë’ lë’ chopë’ bönni’ dá’gaquië’ lë’.

<sup>36</sup> Cate’ Juan na’ bilé’enë’ Jesús, ridödë’ ni’, ní’irö gudxë’ bönni’ na’ dá’gaquië’ lë’, rnnë’:

—Buli’yútsöca’. Ni’ zoë’ bönni’ na’ náquië’ bö’cu’ zxíla’do’ queë’ Dios, gatië’ uláz quegaca bönachi dul-la’.

<sup>37</sup> Chopë’ bönni’ na’ dá’gaquië’ Juan bila’yönnë’ didza’ ni bë’ë lë’, ate’ yöjnógaquië’ Jesús.

<sup>38</sup> Ní’irö buécjë’ Jesús, en buyúë’ chopë’ ni söjnógaquië’ Lë’, ate’ rë’ légaquië’:

—¿Bizxi rigu’ljali’?

Të’ Lë’:

—Bönni’ Usedi, ¿gazxi zu’?

<sup>39</sup> Bubi’ë didza’ Jesús, rë’ légaquië’:

—Guli’dá, uyuli’.

Ní’irö yöjácalenë’ Lë’, en bila’lé’enë’ ga na’ zoë’, ate’ bulu’gá’analenë’ Lë’ dza na’, tu’ chizá’ ral-la’.

<sup>40</sup> Andrés, böchë’ë Simón Pedro, náquië’ tuë’ bönni’ chopë’ ni’ bila’yönnë’ didza’ bë’ë Juan, en yöjnógaquië’ Jesús. <sup>41</sup> Andrés na’, zí’alö yöjdiljë’ bönni’ böchë’ë, lë’ Simón, ate’ rë’ lë’:

—Chibidzölitu’-në’ Mesías.

Mesías naca tu didza' hebreo le rna lu didza' griego: Cristo, ate' lu didza' xidza': Bönni' nasöl-lë'ë Dios.

<sup>42</sup> Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':  
—Li' nacu' Simón, xzí'inë' Jonás. Na'a, si' lo' Cefas.

Cefas naca ca' tu didza' hebreo le rna: Pedro, lu didza' xtila, ate' lu didza' xidza': Guiöj.

### *Jesús rulidzë' Felipe, en Natanael*

<sup>43</sup> Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

<sup>44</sup> Náquië' Felipe bönni' yödzö Betsaida, le naca ládzagaquië' Andrés, en Pedro. <sup>45</sup> Felipe budzölinë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, xzí'inë' José, bönni' yödzö Nazaret.

<sup>46</sup> Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú'.

<sup>47</sup> Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

<sup>48</sup> Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zcan yaga higo, bilé'eda' li'.

<sup>49</sup> Ní'irö bubí'ë didza' Natanael, rë' Lë':

—Bönni' Usedi, Li' nacu' Xzí'inë' Dios. Li' nacu' Nu inná be'e bönachi Israel.

<sup>50</sup> Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zcan yaga higo? Yugu' le zxöntëro ca lë ni hualé'enu'.

<sup>51</sup> Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

## 2

### *Laní que yöl-la' rutsaga na' le guca lu yödzö Caná*

<sup>1</sup> Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xinë'ë Jesús ni'. <sup>2</sup> Lësca' zoa nu bulidza Jesús, en yugu' bönni' usëda queë' dijáquië' laní na'. <sup>3</sup> Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:  
—Bití'rö dë xisi uva ilé'ajë'.

<sup>4</sup> Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Bití' ca' ridxini dza ulu'a lahui yöl-la' huáca quia'.

<sup>5</sup> Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Gulí'gún yúgu'të le guíë' libí'ili'.

<sup>6</sup> Nacuá' ni' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'. <sup>7</sup> Jesús gudxë' yugu' bönni' huen dxin na', rnnë':

—Bulí'li' yugu' yusu' ni nisa.

Bulu'lié' yugu' yusu' na' nisa. <sup>8</sup> Ní'irö Jesús rë' légaquië':

—Gulí'gachí' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. <sup>9</sup> Buyúé' bönni' na' zoë' ra' yusu' channö nazxí'i nisa na' nuhuóaca xisi uva, pero biti' réquibe'enë' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, <sup>10</sup> en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulë'ajë' yenni', ní'irö tu'nödzejë' le cabí nazxí'i. Li', ga bidxintë na'a ben chi'u xisi uva nácarö sizxí'i.

<sup>11</sup> Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

<sup>12</sup> Gudödi na' guyijë' Jesús yödzö Capernaum, ate' dzágagaquië' xinë'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

*Rulatjë' Jesús lö'a yudo', rubéajë' nupa tun le cabí ral-la' ilún ni'*

*(Mt. 21:12-13; Mr. 11:15-18; Lc. 19:45-46)*

<sup>13</sup> Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén. <sup>14</sup> Lu yödzö na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bédxi, en yugu' bö'cu' zxila', en yugu' gu'dödo', böa' bédxi na' tútigaquië'-ba' lahuë' Dios. Ró'ögaquië' ca' ni' bönni' tu'tsë'ë dumí za' idútë yödzölió. <sup>15</sup> Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bédxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. <sup>16</sup> Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yë'ëyi.

<sup>17</sup> Ní'irö yöjnéguequinë' bönni' usëda queë' Jesús le nazúaj lu guichi lá'ayi, rna: Tu ruí'ida' ládxa'a lidxu', régui rilá ládxi'da'ahua'.

<sup>18</sup> Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

<sup>19</sup> Bubi'ë didza' Jesús, rë' légaquië':

—Guli'quínaj yudo' ni, ate' tsonna dzasö uchisa' le.

<sup>20</sup> Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

<sup>21</sup> Yudo' na' bë'ë didza' que Jesús naca la' cuin cazë'. <sup>22</sup> Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

*Jesús núnbë'ë yúgu'të bönachi*

<sup>23</sup> Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. <sup>24</sup> Biti' buzxöni ládxe'ë Jesús légaquië', tu' nunbë' cazë' yúgu'të bönachi. <sup>25</sup> Biti' naquínnë' Jesús nu quíxjöi'i Lë' ca nácgaca bönachi, tu' nöz quézinë' Lë' le yu'u icja ládxi'do'gaca bönachi.

### 3

*Jesús, en Nicodemo*

<sup>1</sup> Nicodemo, tu bönni' yudo' fariseo, nabábalenë' yugu' bönni' judío unná bë'. <sup>2</sup> Bidë' bönni' ni ga zoë' Jesús chí'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácgaca bë' ca nácgaca le caní runu' Li' channö cabí zóalenë' Dios lë'.

<sup>3</sup> Bubi'ë didza' Jesús, rë' lë':

—Le nácatë rea' li', nu cabí galaj leyúbölö, biti' ca' ilé'e lataj ga ni' rinná bë'ë Dios.

<sup>4</sup> Nicodemo gunábinë' Lë', rnnë':

—¿Nacxi caz séqui'nē' tu bönni' galjē' leyúbölö cate' chináquiē' bönni' gula? ¿Naru' huácatsö tsu'ē leyúbölö lē'ēnu xinē'ē, ate' galjē' ia'tú?

<sup>5</sup> Bubi'ē didza' Jesús, rē' lē':

—Le nácatē rea' li'. Nu bönni' cabí galjē' ni'a que nisa, en ni'a queē' Dios Bö' Lá'ayi, biti' gaca tsáziē' ga rinná bē'ē Dios. <sup>6</sup> Nu na' nalaj lu ni'a lu na' bönachi, bönáchisö naca, pero nu nalaj ni'a queē' Dios Bö' Lá'ayi, Bö' Lá'ayi nabani nu na'. <sup>7</sup> Biti' ubánu' tu' rea' li', run bayudxi galju' leyúbölö. <sup>8</sup> Gátitēs recja bö', ate' riyönnu' rnnē bö' na', pero biti' nözinu' gazxi za', o gazxi zeaj. Lēscá' caní raca quégaca nupa náljagaca ni'a queē' Dios Bö' Lá'ayi.

<sup>9</sup> Ní'irö Nicodemo gunábinē' Jesús, rnnē':

—¿Nacxi caz gaca lē' ni'?

<sup>10</sup> Bubi'ē didza' Jesús, rē' lē':

—¿Ruséditsenu' li' bönachi Israel, en biti' nözinu' yugu' lē' ni'? <sup>11</sup> Le nácatē rea' li', le nöztu' ru'ítu' didza' que, en le bilé'etu' runtu' ba nalí que, pero biti' rizi' lu ná'ali' lē' na' runtu' ba nalí. <sup>12</sup> Channö cabí réajlē'ēli' neda' cate' ru'ílēna' libí'ili' didza' ca naca le raca yödzölió ni, ¿nacxi caz gaca tséajlē'ēli' channö guía' libí'ili' le raca yehua' yubá?

<sup>13</sup> 'Catu caz gurenē' nu bönni' yehua' yubá, pero tuza' neda', Bönni' Guljē' Bönachi, bötja' birúaja' yehua' yubá, ate' zoa caza' ni' yehua' yubá. <sup>14</sup> Ca na' benē' Moisés lu lataj cá'asö, buchisē'-ba' bēla néquiniba' guié, budē'ē-ba' lē'e yaga, lēscá' caní run bayudxi gaca quia' neda', Bönni' Guljē' Bönachi, ulu'chisē' neda' xitsá'. <sup>15</sup> Caní gaca quia', para cabí ila'niti yúgu'tē nupa ila'yéajlē' neda', pero gata' quéguequi yöl-la' na'bán idú.

### *Dios nadxí'ide'enē' bönachi yödzölió*

<sup>16</sup> Tu' bidxí'ide'enē' Dios bönachi yödzölió, buzá' ládxē'ē quéguequi Zxí'inē' la' buduínē', para cabí ila'niti yúgu'tē nupa ila'yéajlē' Lē', pero gata' yöl-la' na'bán idú quéguequi. <sup>17</sup> Dios gusöl-lē'ē Zxí'inē' yödzölió ni, calēga para ichúguiē' quégaca bönachi yödzölió ni gátigaca, pero para ulu'lágaca bönachi yödzölió ni ni'a queē' Lē'.

<sup>18</sup> Nu bönni' réajlē'ē Zxí'inē' Dios, biti' ca' narugu queē' inítiē', pero bönni' na' biti' réajlē'ē Lē', chinarugu queē' gátie', tu' cabí réajlē'ē Zxí'inē' Dios la' buduínē'. <sup>19</sup> Que lē' ni na' chinarugu quégaca bönachi gátigaca, tu' bidxinē' Bönni' na' náquiē' bení' yödzölió ni, pero gulunrö zxön bönachi ni le naca chul-la' que dul-la' ca gulunē' zxön Bönni' na' náquiē' bení', tu' náca'gaca xihui' le tunē'. <sup>20</sup> Yúgu'tē bönni' tu'ē dö' biti' raza ládxí'gaquiē' bení', en biti' rídigaquiē' lu bení', para cabí ilá' lahui' le tunē'. <sup>21</sup> Nu run le naca idütē li ridxín lu bení' para gaca bē' núngaca ni'a queē' Dios le run nu na'.

### *Juan, bönni' ruquilē' bönachi nisa, ru'ē didza' ca naca queē' Jesús*

<sup>22</sup> Gudödi na', Jesús guyéajlenē' bönni' dá'gaquiē' Lē', ate' bila'dxinē' luyú Judea, en guzóalenē' légaquiē' ni', ga na' tu'quilē' bönachi nisa. <sup>23</sup> Lēscá' ruquilē' Juan bönachi nisa ga nazí'i le Enón, gala' ga dē yödzö Salim, tu' dē nisa zila lataj na', ate' ta'dxín bönachi ni', en ta'dila nisa. <sup>24</sup> Raca caní zí'atēlö cate' biti' idzunē' Juan na' lidxi guié.

<sup>25</sup> Ní'irö gula'sí lógaquiē' bal-lē' bönni' dá'gaquiē' Juan ta'díl-lalenē' yugu' bönni' judío didza' ca naca que yöl-la' ruchi'a cuini que yudo'. <sup>26</sup> Bila'dxinē' ga zoē' Juan, en tē' lē':

—Bönni' usedí. Buyútsöca'. Bönni' na' guzóalenē' li' ia'tsölá'a yegu Jordán, bönni' na' benu' ba nalí queē', ruquilē' bönachi nisa, ate' ta'dxín yúgu'tē bönachi ga zoē'.

<sup>27</sup> Ní'irö bubi'ē didza' Juan, rē' légaquiē':

—Biti' bi dē lu nē'ē nu bönni', channö cabí nudödē' Dios le lu nē'ē. <sup>28</sup> Biyön quézili' lē' na' bena' ba nalí, gunniá': "Biti' naca' neda' Cristo", pero Dios nasöl-lē'ē neda' para guía' bönachi si' zē'ē Lē'. <sup>29</sup> Bönni' na' rizi'ē-bi' bi'i nigula rutsaga ná'abi' náquiē' bönni' rutsaga nē'ē, pero böchi' luzē'ē bönni' rutsaga nē'ē, en dzáguiē' lē', ruzé' náguiē' didza' ru'ē, en rudzéjanē' tu' riyönnē' didza' ru'ē bönni' rutsaga nē'ē. Lēscá' caní, rudzéjade'eda' neda' tu' raca lē' ni caní. <sup>30</sup> Run bayudxi gácarē' zxön Cristo, pero neda', run bayudxi gácará' cuídí'sö.

### *Nu za' zaca' yehua' yubáló*

<sup>31</sup> Gunné' ca' Juan:

—Bönni' na' zè'è zaca' xitsá'alö nayépisètèrè' ca yúgu'tè bönachi. Nu bönni' náquiè' bönachi yödzölió ni, que yödzölió ni náquiè', en ru'è didza' que le raca yödzölió ni, pero Bönni' na' zè'è zaca' yehua' yubáló nácatèrè' lo ca yúgu'tè bönachi. <sup>32</sup> Bönni' na' runè' ba nalí que le bilé'enè', en le biyönnè', pero cuntú nu rizi' lu nē'e le runè' ba nalí. <sup>33</sup> Núti'tès bönni' rizi' lu nē'è lē na' runè' ba nalí, bönni' ni rulu'è lahui réajlè'è naca idútè li didza' ru'è Dios. <sup>34</sup> Bönni' na' nasól-lè'è Dios, didza' queè Dios ru'è, tu' nuzóadèrè' Dios Bò' Lá'ayi queè lu Bönni' na'. <sup>35</sup> Dios Xuz nadxí'inè' Zxí'inè', ate' yúgu'tè le dē chinudödè' lu nē'è Zxí'inè' na'. <sup>36</sup> Nu bönni' réajlè'è Dios Zxí'ini, dē yöl-la' na'bán idú queè', pero bönni' na' bití' réajlè'è Dios Zxí'ini, bití' idéli'nè' yöl-la' na'bán na', pero nabáguè'è xíguia' lahuè' Dios.

## 4

### *Jesús ru'ilenè'-nu didza' tu nigula Samaria*

<sup>1</sup> Bila'yönnè' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilè' ca' nisa zíanrö bönachi ca ruquilè' nisa Juan. <sup>2</sup> Calèga Jesús caz ruquilè' bönachi nisa, pero bönni' usèda queè' tu'quilè' bönachi nisa. <sup>3</sup> Cate' gúquibe'enè' Jesús lè ni, buzè'è luyú Judea, ate' sa'yéajè' leyúbölö luyú Galilea.

<sup>4</sup> Ga ni' sa'yéajè', run bayudxi tödè' luyú Samaria. <sup>5</sup> Caní guca, bidxinè' Jesús tu yödzödo' luyú Samaria, nazí'i le Sicar, gala' ga dē yu na' bunödzjè' Jacob queébi' José, zxi'inè' Jacob na', dza ni'te. <sup>6</sup> Lataj na' zoa tu yeru nisa nachö'önè' Jacobo na' ga rē'. Cate' bidxinè' Jesús ni', gurö'è ra' yeru nisa na' tu' yöjxéqui'nè' yu'è nöza. Guca idú huagubidza. <sup>7</sup> Ní'irö bidxinnu tu nigula Samaria ni' para sí'inu nisa. Jesús rē'è-nu:

—Benna le guí'ja'.

<sup>8</sup> Tuzè' zoè' Jesús tu' chisöjáquiè' bönni' usèda queè' lu yödzö söjxi'gaquiè' le ilahuè'. <sup>9</sup> Ní'irö nigula Samaria na' rēnu Jesús, rnnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria. Caní gunnānu tu' cabí ta'dzaga dxi'a bönachi Samaria len bönachi judío.

<sup>10</sup> Bubi'è didza' Jesús, rē'è-nu:

—La'tu' núnbè'u le runödzjè' Dios, en Nuzxi na' rē li': “Benna le guí'ja'”, li' inabu', ate' Lē' gunnè' quiu' nisa runna yöl-la' na'bán.

<sup>11</sup> Ní'irö nigula na' rēnu Lē', rnnanu:

—Bönni', bití' nu'u le cuéaju' nisa, ate' yeru nisa ni, dxí'tèrö rö'. ¿Gazxi dē nisa na' runna yöl-la' na'bán? <sup>12</sup> ¿Naru' nácatèrötso' Li' zxon ca xúziru' gudödi Jacob, bönni' ni' bennè' queétu' yeru nisa ni, ga ni guzxi'è nisa gu'è, en gulè'ajbi' ca' zxi'inè', en gulè'ajba' ca' böa' bēdxi queè'?

<sup>13</sup> Bubi'è didza' Jesús, rē'è-nu:

—Núti'tès nu guí'aj nisa ni, leyúbölö ubidxi nisa, <sup>14</sup> pero nu guí'aj nisa na' unödzja' neda', bíti'rö ubidxi icja lādxi'da'ahuè', tu' unödzja' queè' nisa na' gaca lu icja lādxi'da'ahuè' ca tu ga ralaj nisa, le gü'i yöl-la' na'bán idú queè'.

<sup>15</sup> Ní'irö nigula na' rēnu Lē', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

<sup>16</sup> Jesús rē'è-nu:

—Guyéaj, yöjlidzè' bönni' quiu', ate' huödu' ni.

<sup>17</sup> Bubi'ínu didza' nigula na', rēnu Lē':

—Cuntu nu zoa bönni' quia'.

Ní'irö Jesús rē'è-nu:

—Ca nácatè rño': “Cuntu nu zoa bönni' quia'”, <sup>18</sup> tu' chiguzóalenu' gayu' bönni', ate' bönni' na' zóalenu'-nè' na'a, bití' náquiè' bönni' quiu'. Didza' ni ru'u, ca nácatè rño'.

<sup>19</sup> Ní'irö nigula na' rēnu Lē', rnnanu:

—Bönni', runi neda' nacu' bönni' ru'ë didza' uláz queë' Dios. <sup>20</sup> Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

<sup>21</sup> Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' biti' idisóali' guí'ado' ni, en biti' tsöjsóali' Jerusalén. <sup>22</sup> Libí'ili' reaj ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusölá ni'a quégaquië' bönni' judío. <sup>23</sup> Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní. <sup>24</sup> Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li.

<sup>25</sup> Ní'irö nigula na' rënu Lë', rnnanu:

—Nözda' ral-la' guidë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

<sup>26</sup> Jesús rë'ë-nu:

—Lë' cazë' ruí'ilenë' li' didza'.

<sup>27</sup> La' ná'asö bulu'dxinë' bönni' usëda queë' Jesús, ate' bulu'báininë' tu' ruí'ilenë'-nu nigula didza', pero biti' burúguinë' nitué' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenü'-nu?" <sup>28</sup> Ní'irö nigula na' bucá'ananu xichö'önu ni', ate' böajnu la' yödzö, söjöldxinu nupa nacuá' ni', rnnanu:

<sup>29</sup> —¿Gulí'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

<sup>30</sup> Ní'irö bila'rúaj bönachi yödzö na', en bila'dxín ga zoë' Jesús.

<sup>31</sup> Tsanni ni' söhuöajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

<sup>32</sup> Jesús rë' légaquië':

—Dë tu le rahua', le cabí réquibe'eli'.

<sup>33</sup> Ní'irö gula'nabi luzá'agaquië' bönni' usëda queë' tuë' ia'tué', ta'nnë':

—¿Zoa nu chidiguá'tsö le gudahuë'?

<sup>34</sup> Ní'irö Jesús rë' légaquië':

—Le nabánida' naca guna' ca rë'ënë' Xuza' nasöl-lë'ë neda', en údxi guna' xichinë'.

<sup>35</sup> Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Gulí'chisa loli' uyuli' bönachi nácagaca ca gapa nadúzgaca, le chinabídxigaca para tsöjláparu'. <sup>36</sup> Bönni' na' rulapë' rizi'ë lazxjë', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxön nu raza, en nu rulapa. <sup>37</sup> Naca idútë li lë na' rna caní: Tu nu raza, ate' ia'tú nu rulapa. <sup>38</sup> Neda' gusöl-la'a libí'ili' tsöjlápali' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquië'.

<sup>39</sup> Zían bönachi Samaria nacuá' yödzö Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'." <sup>40</sup> Cate' bila'dxinë' bönni' Samaria ga ni' zoë' Jesús, guláta'yue' lahuë' ugá'analenë' légaquië'. Jesús bugá'anë' ni' ia'chopa dza. <sup>41</sup> Caní guca, zióntërë' ca' bönni' ni' gula'yéajlë'ë Jesús ni'a que didza' bë'ë. <sup>42</sup> Ní'irö bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lësca' tu' biyönitü' netu' Lë', en nöztu' le nácatë bönni' ni náquië' Cristo, Nu rusölá bönachi yödzölió.

### *Ruünë' Jesús xzí'inë' tuë' bönni' dë lu në'ë*

<sup>43</sup> Ia'chopa dza ca', buzë'ë Jesús luyú Samaria, en sa'yéajë' luyú Galilea. <sup>44</sup> Caní benë', tu' gudíxjö'ë Lë' cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal." <sup>45</sup> Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lë'enë' le benë' Jesús ni'.

<sup>46</sup> Ní'irö böajë' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. <sup>47</sup> Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yuë' lahuë' guidë' lidxë', para uduhuënë'-bi' bi'i bönni' queë' na', tu' chirequi gátibi'. <sup>48</sup> Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácagaca bë', en yugu' yöl-la' huáca guna'.

<sup>49</sup> Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

<sup>50</sup> Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuöjë'. <sup>51</sup> Tsanni ni' yu'ë nöza söhuöjë', duzxi'gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

<sup>52</sup> Gunábinë' légaquië' bátaxi gusí lo ruhuöáca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

<sup>53</sup> Ní'irö gúquibe'enë' xúzibi' bi'i na', böácabi' cate' ni' bë'lenë' Jesús lë' didza', en gudxë' lë': “Nabanbi' bi'i quiu'.” Que lë' ni na' guyéajlë'ë Jesús, ate' gula'yéajlë' ca' Lë' bönachi nacúa' lidxë'.

<sup>54</sup> Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

## 5

### *Ruúnë' Jesús tu bönni' nacú'unië' bin ga nazí'i le Betesda*

<sup>1</sup> Gudödi guca lë ni, guca laní' quégaquië' bönni' judío, ate' guyijë' Jesús Jerusalén. <sup>2</sup> Lu yödzö na', gala' ga tu'ú'uba' bö'cu' zxila', dë tu le zxön yudzu nisa, nazí'i le Betesda lu didza' hebreo, en nacúa' gayu' chila don que. <sup>3</sup> Yugu' lu chila na' dëgaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. <sup>4</sup> Caní' raca, tu' ruhuötjë' tu gubáz lá'ayi queë' Dios tu chi'i huéaj, en röjtsu'ë lu nisa na', en rutë' nisa na'. Huöácatë' nu bönni' tsöjtsú'utië' lu nisa na' cate' rutá cuini ca naca bítitës yödzöhuë' raca queë'. <sup>5</sup> Zoë' tu bönni' ni', chiguca chixxunu' uruá' iz ré'enë'. <sup>6</sup> Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huöácu'?

<sup>7</sup> Bubi'ë didza' bönni' huë' na', rë' Jesús:

—Bönni', cuntú nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

<sup>8</sup> Jesús rë' lë':

—Guyaschi. Buá' le denu', en guzë'e.

<sup>9</sup> La' böácatë' bönni' na', ate' bu'ë le gúti'në', en guzë'ë. Dza na' raca caní' naca dza lá'ayi quégaquië' bönni' judío. <sup>10</sup> Ní'irö bönni' judío unná bë' gulë' bönni' na' nuhuöáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

<sup>11</sup> Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunnë': “Buá' le denu', en guzë'e.” Bönni' na' bunë' neda'.

<sup>12</sup> Ní'irö gula'nábinë' lë', ta'nnë':

—¿Nuzxi na' gudxi caní' li': “Buá' le denu', en guzë'e”?

<sup>13</sup> Biti' nözinë' bönni' na' nuhuöáquië' nuzxi na', tu' chibuzë'ë Jesús lataj ni' tu' nacúa' bönachi zían ni'. <sup>14</sup> Gudödi guca lë ni, Jesús yöjxáquië' bönni' na' ga naca chila yudo', ate' rë' lë':



—Buyútsöca'. Chiböácu'. Bítirö gunu' dul-la', para cabí gaca quiu' tu le nácarö zi' ca læ na' guca quiu'.

<sup>15</sup> Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. <sup>16</sup> Que læ ni na' bönni' judío unná bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' læ ni cate' naca dza lá'ayi quégaquië'. <sup>17</sup> Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

<sup>18</sup> Que læ ni na' gulë'ënrönë' bönni' judío unná bë' ilútië' Jesús, calëgasö tu' guditsjë' xibá que dza lá'ayi quégaquië', pero læsca' tu' gunné' Dios caz náquië' Xuzë', ate' caní naca nun cuinë' ca náquië' Dios.

### *Yöl-la' unná bë' dë lu në'ë Zxí'inë' Dios*

<sup>19</sup> Ní'irö bubi'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz læ na' rilé'eda' runë' Dios Xuz. Yúgu'të le runë' Dios Xuz, læsca' caní runa' neda', Zxí'inë'.

<sup>20</sup> Dios Xuz nadxí'inë' neda', Zxí'inë', en rulu'ínë' neda' yúgu'të le runë', ate' yugu' le zxöntërö ca læ ni ulu'ínë' neda', le ilún ga ubánili' libí'ili'. <sup>21</sup> Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, læsca' caní runa' neda', Zxí'inë', runödza' quégaca bönachi yöl-la' na'bán ca rë'ëni quézida'. <sup>22</sup> Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöröa' bönachi. <sup>23</sup> Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

<sup>24</sup> 'Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidë yöl-la' na'bán idú queë'. <sup>25</sup> Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtídza'a, en ilún ca rnna, huöáta' yöl-la' na'bán quéguequi. <sup>26</sup> Ca na' dë lu në'ë Dios Xuz unödzjë' yöl-la' na'bán quégaca bönachi, læsca' caní benë' ga dë lu na'a neda', Zxí'inë', unödzja' yöl-la' na'bán quégaca bönachi. <sup>27</sup> Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. <sup>28</sup> Bití' ubánili' ca naca læ ni, tu' huadxín dza cate' yúgu'të nupa chinátigaca ila'yöni chí'a, <sup>29</sup> en ulu'rúaj yeru ba. Ulu'bán nupa na' gulún le naca tsahui', en huöáta' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

### *Le naca bë' le náquië' Jesús*

<sup>30</sup> Gunnë' ca' Jesús:

—Bití' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'ënisida' neda', pero ca rë'ëni quézinë' Xuza' nasöl-lë'ë neda', runa'. <sup>31</sup> Channö neda' runa' ba nalí que la' cuin caza', bití' naca lesaca' læ na' runa' ba nalí. <sup>32</sup> Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. <sup>33</sup> Libí'ili' gusöl-la'li' bönni' yöjnábiguequinë' Juan, ate' læ na' benë' ba nalí quia' naca idútë li. <sup>34</sup> Neda' bití' naquinda' nu bönni' gunë' ba nalí quia', pero ruá'a didza' caní para uláli'. <sup>35</sup> Didza' bë'ë Juan na' gulaca ca tu guí'yöri, le guyegui, en buzení, ate' libí'ili', tu chí'isö guyaza ládxi'li' uzí'ili' xibébení' queë'. <sup>36</sup> Na'a, zoa le run ba nalí quia' neda' le nácarö idú li ladxe' ca læ na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' læ na' runa', tun ba nalí quia', en nácgaca bë' gusöl-lë'ë Dios Xuz neda'. <sup>37</sup> Lësca' Dios Xuz nasöl-lë'ë neda' runë' ba nalí quia'. Catu caz biyönili' chí'ë, en catu caz bilé'eli' lahuë', <sup>38</sup> en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusöl-lë'ë. <sup>39</sup> Rusédali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que læ na' nazúaj

lu guichi lá'ayi, ate' lë na' nazúaj lu guichi run ba nalí quia' neda'. <sup>40</sup> Biti' rë'ënili' guídali' quia' neda' para gata' yöl-la' na'bán queëli'.

<sup>41</sup> 'Biti' riguilja' yöl-la' ba le ila'gú'u bönachi neda'. <sup>42</sup> Neda' núnbë'a libí'ili', en nözda' bití' nadxí'ili'-në' Dios. <sup>43</sup> Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. <sup>44</sup> ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguiljali' yöl-la' run zxön na' za' lu në'ë la's dui Dios? <sup>45</sup> Biti' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxí'ili'-në', sal-la' gútië' dza ni'te. <sup>46</sup> La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. <sup>47</sup> Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

## 6

### *Rugahuë' Jesús zíanrö ca chi-un gayuá' bönachi*

*(Mt. 14:13-21; Mr. 6:30-44; Lc. 9:10-17)*

<sup>1</sup> Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. <sup>2</sup> Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. <sup>3</sup> Ní'irö gurenë' Jesús, guyijë' ga naca tu lu guí'ado', ga ni' gurö'ölenë' yugu' bönni' usëda queë'. <sup>4</sup> Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>5</sup> Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöjöruru' yöta xtila le ilágugaca bönachi zían ni?

<sup>6</sup> Caní gunné' Jesús para si' bë'ë Felipe na', tu' chinözinë' Lë' naca gunë'. <sup>7</sup> Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', bití' guequi láti'do' huéaj le ilágugaca bönachi zían ni.

<sup>8</sup> Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

<sup>9</sup> —Ni zóabi' tubi' bi'i bönni', nuá'abi' gayu' yöta xtila néquiguequini zxoa' cebada, en chópaba' böla cuídi'do'. ¿Naru' huéqui'tse ugagu le do' ni cate' xö bönachi?

<sup>10</sup> Ní'irö Jesús rë' légaquië':

—Guli'gún ga ila'bö' bönachi zían ni lu yu.

Lataj na', rö'öda' daca', ate' gula'bö'ë idú ca chi-un gáyu'ë bönni' ni'. <sup>11</sup> Ní'irö gudélë'ë Jesús yugu' yöta xtila na'. Cate' chigudxë' Dios: "Xclenu'", gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' rö'gaca lu daca' ni'. Lësca' caní gulunë' quégacaba' böla cuídi'do' na', ate' gulahuë' tsca gulë'ënnë' ilahuë'.

<sup>12</sup> Cate' chibulu'huöljanë', Jesús gudxë' yugu' bönni' usëda queë', gunné':

—Buli'túbi le bizxaj nagá'anagaca, para cabí ilaca ditaj.

<sup>13</sup> Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini zxoa' cebada na', le bulu'gá'ana quégaquië' bönni' na' gulahuë'. <sup>14</sup> Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guíde' yödölió ni.

<sup>15</sup> Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

### *Rizë'e ni'ë Jesús lu nísado'*

*(Mt. 14:22-27; Mr. 6:45-52)*

<sup>16</sup> Cate' chizá' ral-la, yöjáquië' bönni' usëda queë' Jesús, ate' bila'dxinë' ra' nísado'. <sup>17</sup> Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús bití' ridxíninë' ga na' nacu'ë. <sup>18</sup> Gusí lo recja bö'

budunu' lu nísado' na', ate' riyasa ridxía nisa na'. <sup>19</sup> Cate' chibulu'sé'ë bárcodo' na', le guzá' le naca tsca rizá'aru' tu hórásö, ní'irö bila'lé'ené' Jesús rizé'e ni'ë lu nísado' na', en zé'ë ribígué'ë ga na' zeaj barco na', ate' guladxi gula'dzöbiné'. <sup>20</sup> Ní'irö Jesús rë' légaquié':

—Neda' caz ni. Biti' gádxili'.

<sup>21</sup> Ní'irö len yöl-la' rudzeja quégaquié' bulu'guélé'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' söjáquié'.

### *Bönachi zían tu'guilaj Jesús*

<sup>22</sup> Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlené' yugu' bönni' uséda queé' lë'e bárcodo' na', pero légacasé' na' yöjáquié'. <sup>23</sup> Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dë gála'sö ga ni' gulahué' yöta xtila cate' ni' Xanru' Jesús gudxé' Dios: "Xclenu" que. <sup>24</sup> Tu' bila'lé'ené' bí'tirö zoé' Jesús ni', en biti' nacu'ë bönni' uséda queé' ni', que lë ni na' gula'bené' lë'egaca bárcodo' na', ate' yöjáquié' Capernaum, tu'guiljé' Jesús.

### *Náquié' Jesús yöta xtila nabánigaca tsaz bönachi*

<sup>25</sup> Cate' bila'dxín bönachi zían na' ia'tsölá'a nísado' na', yöjxáca'gaquié' Jesús, en tē' Lë':

—Bönni' Usedi, ¿bátaxi bidxinu' ni'?

<sup>26</sup> Bubi'ë didza' Jesús, rë' légaquié':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en böljali'. <sup>27</sup> Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljé' Bönachi, gunna' queéli', tu' bulu'ë lahui Xuza' Dios naca' Zxí'iné'.

<sup>28</sup> Ní'irö gula'nábiné' Lë', ta'nné':

—¿Bizxi run bayudxi guntu' para guntu' le raza ládxé'ë Dios?

<sup>29</sup> Bubi'ë didza' Jesús, rë' légaquié':

—Lë ni le raza ládxé'ë Dios, tséajlë'ëli' neda', naca' nu gusöl-lë'ë Lë'.

<sup>30</sup> Ní'irö gula'nábiné' Lë', ta'nné':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'?

<sup>31</sup> Gulahué' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rnna: "Yöta xtila que yehua' yubá Moisés bë'ë quégaquié', gulahué'."

<sup>32</sup> Bubi'ë didza' Jesús, rë' légaquié':

—Le nácatë rea' libí'ili': Calëga Moisés na' benné' queéli' yöta xtila que yehua' yubá, pero Xuza' Dios runné' queéli' yöta xtila le naca idú que yehua' yubá. <sup>33</sup> Yöta xtila na' runné' Dios quégaca bönachi naca' neda', lë na' birúaj yehua' yubá, en runödzaj yöl-la' na'bán quégaca bönachi yödzölió ni.

<sup>34</sup> Ní'irö tē' Lë':

—Xan, bénnatica'sö queëtu' yöta xtila na'.

<sup>35</sup> Jesús rë' légaquié':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queé' Dios, ate' nu tséajlë' neda', chiné'aj tsaz le naca queé' Dios. <sup>36</sup> Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'." <sup>37</sup> Yúgu'të nupa na' runné' Xuza' quia', ídigaca quia', ate' nupa na' zaca quia', biti' usá'gaca'-né'. <sup>38</sup> Caní naca, tu' bö'tja' birúaja' yehua' yubá, calëga para guna' ca rë'ënda' neda' caz, pero para guna' ca rë'ënë' Dios Xuz, nasöl-lë'ë neda'. <sup>39</sup> Lë ni le rë'ënë' Xuza' nasöl-lë'ë neda', rë'ënë' cabí unítia' nitú nupa na' benné' quia', pero usubana' léguequi dza údxi. <sup>40</sup> Lë ni le rë'ënë' Dios Xuz nasöl-lë'ë neda', rë'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'iné', en ila'yéajlë' neda', ate' neda' usubana' léguequi dza údxi na'.

<sup>41</sup> Ní'irö gula'nné' queé' Jesús bönni' judío unná bë' tu' gunné': "Neda' caz naca' yöta xtila na' bö'taj, birúaj yehua' yubá." <sup>42</sup> Que lë ni na' ta'nné':

—¿Naru' cabí bönni' ni Jesús, zxi'iné' José? Nunbë' cázaru' xuz xiné'ë. ¿Nacxi caz naca na', rnnë' bönni' ni: “Bötja' birúaja' yehua' yubá”?

<sup>43</sup> Ní'irö bubi'ë didza' Jesús, rë' légaquië':

—Biti' innëli' quia' la' libí'isili'. <sup>44</sup> Biti' séqui'në' nitúë' bönni' guídë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi. <sup>45</sup> Nazúaj lu guichilá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

<sup>46</sup> Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. <sup>47</sup> Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. <sup>48</sup> Neda' caz naca' yöta xtila nabánigaca tsaz bönachi. <sup>49</sup> Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulatië'. <sup>50</sup> Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'. <sup>51</sup> Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quégaca bönachi yödzölió.

<sup>52</sup> Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

<sup>53</sup> Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', bití' ca' zóalen libí'ili' yöl-la' na'bán na'. <sup>54</sup> Núti'tës nu gagu xipéla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi. <sup>55</sup> Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. <sup>56</sup> Núti'tës bönni' gahuë' xipéla'a, en guí'jé' xichöna', sóaléntica'së' bönni' na' neda', ate' neda' sóaléntica'sa' lë'. <sup>57</sup> Ca na' zoë' nabanë' Dios Xuz nasöl-lë'ë neda', ate' neda' nabánida' Lë', lësca' caní ibáninë' neda' núti'tës bönni' gahuë' neda'. <sup>58</sup> Lë ni yöta xtila bötaj birúaj yehua' yubá, en bití' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quégaquië', gulatië'. Núti'tës bönni' gahuë' yöta xtila ni sóatica'së' ibanë'.

<sup>59</sup> Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni' rusédinë' bönachi Capernaum.

### *Didza' rúnnagaca queëru' yöl-la' na'bán idú*

<sup>60</sup> Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

<sup>61</sup> Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'? <sup>62</sup> ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? <sup>63</sup> Le naca queë' Dios Bö' Lá'ayi naca le runna yöl-la' na'bán queëli'. Le naca bëla'sö cuntu nu uzí' xibé. Didza' na' bë'lëna' libí'ili' náçagaca queë' Dios Bö' Lá'ayi, en rúnnagaca yöl-la' na'bán quégaca bönachi. <sup>64</sup> Na'a, bál-lali' bití' réajlë'ëli'.

Gunnë' caní Jesús tu' nözinë' dza ni'te nupa na' bití' ta'yéajlë', enca' nu na' udödi Lë' lu ná'agaquië' bönni' ilútië' Lë'. <sup>65</sup> Que lë ni na' gunnë':

—Que lë ni na' chigudxi caza' libí'ili': Bití' séqui'në' nitúë' bönni' tē'ë neda' channö Dios Xuz cabí gu'ë lë' lataj.

<sup>66</sup> Dza na' gulaca chopá ládxi'gaquië' zían bönni' usëda queë', en bití'rö gula'dálenë' Lë'.

<sup>67</sup> Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

<sup>68</sup> Bubi'ë didza' Pedro, rë' Lë':

—Xan, ¿nuzxi que tséajtu? Li' napu' didza' rúnnagaca queétu' yöl-la' na'bán idú. <sup>69</sup> Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

<sup>70</sup> Bubi'ë didza' Jesús, rë' légaquië':

—Gurö caza' libí'ili' chínnuli' ni, pero tuë' bönni' ládajli' libí'ili' dzaga tu' xihui' lë'.

<sup>71</sup> Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

## 7

### *Bönni' böchi' cazë' Jesús biti' ta'yéajlë'ë Lë'*

<sup>1</sup> Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' të'ënnë' bönni' judío unná bë' nacu'ë ni' ilútië' Lë'. <sup>2</sup> Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' zxan libín lága'do'. <sup>3</sup> Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. <sup>4</sup> Channö rë'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, bulu'i' cuinu' lógaca yúgu'të bönachi.

<sup>5</sup> Caní gula'nnë', tu' cabí ta'yéajlë'ë bönni' böchë'ë Jesús Lë'. <sup>6</sup> Ní'irö Jesús rë' légaquië':

—Biti' ridxini dza quia' para ulu'i' lahua' lógaca bönachi, pero dza queëli' tséajli' ni' chizóa caz. <sup>7</sup> Bönachi yödzülió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rnní'a' naca xihui' le tunë'. <sup>8</sup> Gulí'tséaj libí'ili' laní na'. Biti' tseja' laní na' na'a tu' biti' ridxini dza quia'.

<sup>9</sup> Cate' chigudxë' légaquië' lë ni, bugá'anë' luyú Galilea.

### *Sa'yéajë' Jesús laní quégaca bönachi judío*

<sup>10</sup> Gudödi söjáquië' bönni' böchë'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. <sup>11</sup> Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

<sup>12</sup> Bönachi zían ni' gulu'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Biti' náquië' dxi'a tu' rizí' yé'enë' bönachi.

<sup>13</sup> Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

<sup>14</sup> Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'.

<sup>15</sup> Bulu'bánninë' bönni' judío, ta'nnë':

—¿Nacxi caz naca, rácadë'ë bönni' ni, en biti' ca' nazëdë' que yudo'?

<sup>16</sup> Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'.

<sup>17</sup> Channö rë'ënë' nu bönni' gunë' ca rë'ënë' Dios, huéquië'ënë' bönni' na' channö nequi queë' Dios le rusédida' bönachi o channö rácasö quia' ruá'a didza'. <sup>18</sup> Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idútë li, en biti' ca' rizí' yë'ë.

<sup>19</sup> 'Moisés bennë' queëli' xibá queë' Dios, pero biti' runli' ca rinná bë' xibá na'. ¿Bizx que rizóa ribö'öli' gútili' neda'?

<sup>20</sup> Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribö'ö guti li'?

<sup>21</sup> Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'téli'. <sup>22</sup> Le nácatè Moisés bennè' queéli' lè na' narugu lu xipéla'li' le naca bē', pero calēga Moisés caz bennè' queéli' lè na', pero guzxi'è le lu ná'agaquiē' xuz xtá'ahuē'. Na'a, sal-la' naca dza lá'ayi, richúguli' lu xipéla'gacabi' bi'i bōnni'do' lè na' naca bē' néquiguequibi' queē' Dios. <sup>23</sup> Channō ta'z'í'ibi' lu xipéla'gacabi' lè na' naca bē' cate' naca dza lá'ayi, para cabí quítsjali' xibá queē' Moisés, ¿naru' rilétseli' neda' tu' buna'-nē' tu bōnni', ate' bōáquiē' dxí'ado' cate' naca dza lá'ayi? <sup>24</sup> Biti' ral-la' uchi'a usörö lízili' ca', pero buli'chi'a buli'sörö ca naca le naca idútē li.

### *Riguíxjö'è Jesús ga narúajē'*

<sup>25</sup> Ní'irō gulu'è didza' bal-lē' bōnni' nacu'è Jerusalén, ta'nnē':

—¿Naru' calēga bōnni' ni Nu na' tu'guiljē' bōnni' judío unná bē' para ilútiē' Lē'? <sup>26</sup> Buli'yútsöca', yálajdo' ru'è didza', en biti' bi tē' Lē'. ¿Naru' téquibe'enē' bōnni' ta'nná bé'enē' rē'u, le nácatē bōnni' ni náquiē' Cristo, Nu na' ral-la' inná be'e rē'u? <sup>27</sup> Bōnni' ni, nōz quéziru' gazxi bōnni' Lē'. Cate' guídē' Cristo, cuntú nu inōzi gazxi bōnni' Lē'.

<sup>28</sup> Ní' zoē' Jesús rusédinē' bōnachi chila yudo', en cate' biyōnnē' didza' ni, ní'irō bē'ē zidzaj didza', rnnē':

—¿Naru' núnbe'etseli' neda', en nōzitseli' gazxi bōnni' neda'? Bida' ni, calēga rácasō quia', pero Dios caz nasöl-lē'è neda', ate' Lē', biti' núnbē'ēli'-nē' libí'ili'. <sup>29</sup> Neda' núnbe'eda'-nē', tu' za'a queē' Lē', ate' Lē' cazē' nasöl-lē'è neda'.

<sup>30</sup> Ní'irō gulunē' bayudxi ila'zōnē' Lē', pero cuntú nu guzxon Lē', tu' cabí ridxini dza queē' tsu'è lu ná'agaquiē'. <sup>31</sup> Gula'yéajlē' zían bōnachi ni' Lē', ta'nná:

—Cate' guídē' Cristo, ¿naru' gunē' zíanrō yöl-la' huáca ca le runē' bōnni' ni?

### *Bōnni' yudo' ta'söl-lē'è nupa ila'zōn Jesús*

<sup>32</sup> Bila'yōnnē' bōnni' yudo' fariseo yugu' didza' ni tuí'i bōnachi ca naca queē' Jesús, ate' yugu' bixúz unná bē', en yugu' bōnni' yudo' fariseo na' gula'söl-lē'è ni'a ná'agaquiē' para tsōjxōngaqüē' Lē'. <sup>33</sup> Ní'irō Jesús gunnē':

—Ia'tú chí'isō sóalena' libí'ili', ate' ní'irō huōja' ga zoē' Xuza' nasöl-lē'è neda'. <sup>34</sup> Uguíljali' neda', pero biti' udzölili' neda'. Ga ni' tsōjsóa' neda' biti' gaca guídali' libí'ili'.

<sup>35</sup> Ní'irō tē' luzá'agaquiē' bōnni' judío, ta'nnē':

—¿Gazxi tséajtsē' bōnni' ni, ga ni' biti' udzöliru'-nē'? ¿Naru' huayéajtsē' ga nacu'è bōnni' judío násilasigaquiē' idútē yōdzölió, en usédinē' yugu' bōnni' zi'tu' ni'? <sup>36</sup> ¿Bizxi rē'ēni inná didza' na' bē'è: “Uguíljali' neda', pero biti' udzölili' neda'”, enca': “Ga ni' tsōjsóa' neda' biti' gaca guídali' libí'ili'”?

### *Nisa yegu le runna yöl-la' na'bán queēru'*

<sup>37</sup> Cate' ni' naca dza údxi que laní na', dza na' naca lo, guzuínē' Jesús, en bē'ē zidzaj didza', rnnē':

—Channō zoē' nu bōnni' ribidxi icja lādxi'da'ahuē', ral-la' guídē' bōnni' na' ga zoa', en guí'jē'. <sup>38</sup> Nu bōnni' réajlē'è neda', gaca queē' ca na' nazúaj lu guichi lá'ayi, rna: Lu icja lādxi'da'ahuē' bōnni' na' ilén le naca ca nisa yegu, lè na' ulu'z'í' xibé bōnachi, gata' yöl-la' na'bán quéguequi.

<sup>39</sup> Didza' ni bē'è Jesús ca naca queē' Dios Bö' Lá'ayi, Nu ral-la' idisóalen bōnni' na' ila'yéajlē'è Jesús. Caní gunnē' Jesús tu' cabí ridxininē' Dios Bö' Lá'ayi, tu' cabí ruhuēpinē' Jesús ga tsépisētēre'.

### *Ta'ráaj choplö bōnachi*

<sup>40</sup> Cate' bila'yōni didza' ni, gula'nná bal-la bōnachi zían na', ta'nná:

—Le nácatē Bōnni' ni náquiē' Bōnni' na' ru'è didza' uláz queē' Dios, Bōnni' na' guzxi' lu nē'è Dios isöl-lē'è queēru'.

<sup>41</sup> Ta'nnē' ia'bal-lē':

—Bōnni' ni náquiē' Cristo.

Ta'nná bal-la bönachi:

—¿Naru' irúajtsë' Cristo luyú Galilea? <sup>42</sup> Nazúaj lu guichi lá'ayi le rnna: “Cristo galjé' ladaj di'a dza queë' David, en gáquië' ca' bönni' Belén le guca ladzë' David na'.”

<sup>43</sup> Caní guca, bila'rúaj bönachi na' choplö tu' nözinë' Jesús. <sup>44</sup> Të'ennë' bal-lë' ila'zönë' Jesús, pero cuntú nu bi ben queë'.

*Biti' ta'yéajlë'ë Jesús bönni' unná bë'*

<sup>45</sup> Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquië' gulë' ni'a ná'agaquië' na', ta'nnë':

—¿Bizx que biti' dichë'ëli'-në'?

<sup>46</sup> Bulu'bi'ë didza' ni'a ná'agaquië', ta'nnë':

—Cuntu nu bönni' ru'ë didza' ca ru'ë didza' Bönni' ni.

<sup>47</sup> Ní'irö bulu'bi'ë didza' bönni' yudo' fariseo na', ta'nnë':

—¿Naru' bë'tsali' lataj guzxi' yé'enë' ca' libí'ili'? <sup>48</sup> ¿Naru' guyéajlë'tsë' Lë' nu bönni' unná bë' o nu bönni' yudo' fariseo? <sup>49</sup> Libí'ili' dxíali' dö' tu' cabi rácali' xibá queë' Dios.

<sup>50</sup> Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca' bönni' yudo' fariseo, ate' rë' légaquië':

<sup>51</sup> —¿Naru' richúguru' queë' tu bönni' gátië' lu xibá queëru' channö cabi yörniru' lë' zí'alö para inöziru' bi benë'?

<sup>52</sup> Ní'irö bulu'bi'ë didza' ia'zica'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitué' bönni' ru'ë didza' uláz queë' Dios luyú Galilea.

<sup>53</sup> Ní'irö yöjhuójgaquië' lidxi que queëgaquië'.

## 8

<sup>1</sup> Guyijë' Jesús ga naca lu Guí'a Yaga Olivo.

*Nigula nagúitsjanu xibá que yöl-la' nutsaga na'*

<sup>2</sup> Cate' za' reni' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'. <sup>3</sup> Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu' gula'dzölinë'-nu ni' rigúitsjanu xibá que yöl-la' nutsaga na'. Bulu'sudxinë'-nu lógaca bönachi na' tu'zë nágagaca Jesús, <sup>4</sup> ate' të' Lë':

—Bönni' Usedi, nigula ni guzxöntu'-nu ni' runnu dul-la' rigúitsjanu xibá que yöl-la' nutsaga na'. <sup>5</sup> Lu xibá queë' Moisés, gunná bé'enë' netu' uládxitu'-nu guiöj nu nigula runnu caní, para gátinu. ¿Názxiga Li', nacxi rnno'?

<sup>6</sup> Caní gula'nnë' para ila'zí' bë'ë Jesús para ila'zéqui'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibón në'ë. <sup>7</sup> Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabi nunli' dul-la' isí loli' uládxili'-nu guiöj.

<sup>8</sup> Leyúbölö biyéchuë' Jesús, ruyúë' lu yu, en buguéle'ë ruzúajë' leyúbölö lu yu na'. <sup>9</sup> Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógaquië' bönni' gúlarö ga bidxintë bönni' cuidi'. Nagá'anë' Jesús ni', dzáganu nigula na' Lë' gatsaj láhui'lö nupa na' tu'zë nágagaca Lë'. <sup>10</sup> Ní'irö buzuínë' Jesús leyúbölö, en cuntú nu bilé'enë' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacuá' nupa na' bulu'zegui li' didza'? ¿Naru' cabi zoa nu bönni' richúguië' quiu'?

<sup>11</sup> Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

*Náquië' Jesús bení' quégaca bönachi yödzölió*

<sup>12</sup> Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', biti' tē' ga naca chul-la que dul-la', pero tu bení' sóalen bönni' na' le uluí' i lē' naca gata' yöl-la' na' bän idú queë'.

<sup>13</sup> Ní'irö tē' Lē' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

<sup>14</sup> Bubi'ë didza' Jesús, rē' légaquië':

—Sal-la' runa' ba nalí que la' cuinsa', idútē li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en calēga gazxi tseja'. <sup>15</sup> Libí'ili' ruchí'a rusöröli' ca nátagaca le taca yödzölió ni, pero neda', rácasö quia' cuntu nu bönni' ruchí'a rusöröa' queë'. <sup>16</sup> La'tu' uchi'a usöröa', ca nácatē uchi'a usöröa', tu' calēga néda'sö uchi'a usöröa', pero Xuza' nasöl-lē'ë neda' gunē' neda' tsözxön. <sup>17</sup> Lēasca' caní lu xibá queë' Moisés nazúaj lu guichi le rnna: Le tunē' ba nalí chopē' bönni', idútē li naca. <sup>18</sup> Neda' runa' ba nalí que la' cuinsa', ate' Xuza' nasöl-lē'ë neda', runē' ca' ba nalí quia'.

<sup>19</sup> Ní'irö bönni' yudo' fariseo na' gula'nábinē' Lē', ta'nnë':

—¿Gazxi zóatsē' Xuzu'?

Bubi'ë didza' Jesús, rē' légaquië':

—Biti' núnbē'ëli' neda', en biti' núnbē'ëli'-nē' Xuza'. La'tu' núnbē'ëli' neda', lēasca' Xuza' gúnbē'ëli'-nē'.

<sup>20</sup> Yugu' didza' ni bë'ë Jesús cate' ni' zoë' rusédinē' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntu nu guzxon Lē', tu' cabí ridxini dza queë' tsu'ë lu ná'agaquië'.

*Rnnë' Jesús: “Ga tseja' neda', biti' gaca guídali”*

<sup>21</sup> Leyúbölö Jesús rē' légaquië', rnnë':

—Uzá'a yödzölió ni, ate' uguí'jali' nu usölá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

<sup>22</sup> Ní'irö gulu'ë didza' bönni' judío unná bë', ta'nnë':

—¿Naru' guti cuinē'? Rnnë': “Ga tseja' neda', libí'ili' biti' gaca guídali'.”

<sup>23</sup> Jesús rē' légaquië':

—Libí'ili' nácali' que luyú dē cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni. <sup>24</sup> Que lē ni na' gudxa' libí'ili': Ugá'ana dul-la' nabága'li', en gátili'. Channö cabí tséajlē'ëli' naca caza' Nu usölá, ugá'ana dul-la' nabága'li', en gátili'.

<sup>25</sup> Ní'irö gula'nábinē' Lē', ta'nnë':

—¿Nuzxi caz nacu'?

Jesús rē' légaquië':

—Naca' la' leze ca na' chigudxa' libí'ili' dza ni'te. <sup>26</sup> Zián le ral-la' guía' libí'ili', en uchi'a usöröa' le naca queëli'. Didza' idútē li ru'ë Xuza' nasöl-lē'ë neda', ate' didza' riyönda' ru'ë Lē', ru'ílena' bönachi yödzölió ni.

<sup>27</sup> Biti' gula'yéajni'inē' ru'ílenē' légaquië' didza' ca naca queë' Dios Xuz. <sup>28</sup> Que lē ni na' Jesús rē' légaquië':

—Cate' idxín dza uchísali' neda', Bönni' Guljē' Bönachi, gútili' neda', ní'irö guéquibe'ëli' naca caza' Nu rusölá, en biti' bi runa' rácasö quia', pero ca na' rulu'ínē' Xuza' neda', ca' ruá'a didza'. <sup>29</sup> Xuza' nasöl-lē'ë neda' zóalenē' neda'. Biti' nucá'anē' Xuza' neda' tuza', tu' rúntica'sa' le raza ládxē'ë Lē'.

<sup>30</sup> Cate' bë'ë Jesús didza' ni, bönni' zián gula'yéajlē'ë Lē'.

*Nupa nátagaca zxi'inē' Dios, en nupa nadzúngaca lu na' dul-la'*

<sup>31</sup> Ní'irö Jesús gudxē' yugu' bönni' judío na' ta'yéajlē'ë Lē', rnnë':



—Channö gúntica'sili' ca rnna xtídza'a, gácali' idú bönni' usëda quia'. <sup>32</sup> Gúnbë'ëli' le naca idútë li, ate' le naca idútë li na' usölá libí'ili'.

<sup>33</sup> Bulu'bi'ë didza', tē' Lē':

—Abraham naquië' xuz gudödi queëtu', en cuntu nu ben netu' bönni' nadó'ogaca. ¿Rnnatso': "Usölá libí'ili'?"

<sup>34</sup> Jesús rē' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. <sup>35</sup> Nu naca bönni' nadó'o biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u. <sup>36</sup> Caní naca, channö Nu na' naca Zxí'inë' Dios usölá libí'ili', le nácatë uláli'. <sup>37</sup> Nözda' naquië' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'ali' xtídza'a. <sup>38</sup> Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

<sup>39</sup> Bulu'bi'ë didza', tē' Lē':

—Abraham náquië' xuztu'.

Ní'irö Jesús rē' légaquië':

—La'tu' nácali' idú zxí'ini xi'sóë' Abraham, gunli' ca na' benë' Abraham. <sup>40</sup> Na'a, rizóa ribö'öli' gútili' neda', sal-la' ruí'ilena' libí'ili' didza' idútë li, didza' na' biyönda' bë'ë Dios. Biti' benë' Abraham caní. <sup>41</sup> Libí'ili' runli' ca run xuz quézili'.

Ní'irö tē' Lē':

—Netu' biti' ca' nácatu' bi'i lando'. Tuzë' Dios náquië' Xuztu'.

<sup>42</sup> Ní'irö Jesús rē' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusöl-lë'ë neda'. <sup>43</sup> ¿Bizx que biti' gaca tséajni'ili' didza' ruá'a? Naca tu' cabí rē'ënili' uzë' nágali' xtídza'a. <sup>44</sup> Xuz quézili' naca tu' xihui'. Néquili' que tu' xihui', en rē'ënili' gunli' le rizé'ladxi' xúzili' na'. Dza ni'te naca tu' xihui' nu guti' bönachi, en cabí nazí' lu nē'e le naca idútë li, tu' cabí ruí'i didza' idútë li. Cate' rizí' yë' tu' xihui', ca naca caz ruí'i didza', tu' naca nu rizí' yë', en naca ca xúzgaca caz nupa ta'zí' yë'. <sup>45</sup> Tu' ruá'a neda' didza' idútë li biti' réajlë'ëli' neda'. <sup>46</sup> ¿Núzxilöli' gaca usubága'li' neda' dul-la'? Channö ruá'a didza' idútë li, ¿bizx que biti' réajlë'ëli' neda'? <sup>47</sup> Nu naca queë' Dios, ruzë' nagui xtídzë'ë Dios, pero libí'ili', tu' cabí nácali' queë' Dios, biti' ruzë' nágali' xtídzë'ë.

### *Cristo zoa cazë' zí'atëlö ca Abraham*

<sup>48</sup> Ní'irö bulu'bi'ë didza' yugu' bönni' judío, tē' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

<sup>49</sup> Bubi'ë didza' Jesús, rē' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö.

<sup>50</sup> Biti' runa' zxön cuina'. Zoa Nu run zxön neda', ate' Lē' ruchi'a rusöröë' rē'u. <sup>51</sup> Le nácatë rea' libí'ili': Nu bönni' si' lu nē'ë xtídza'a, biti' ca' gátië' bönni' na'.

<sup>52</sup> Ní'irö yugu' bönni' judío na' tē' Lē', ta'nnë':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu nē'ë xtídza'a, biti' ca' gátië' bönni' na'." <sup>53</sup> ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

<sup>54</sup> Bubi'ë didza' Jesús, rē' légaquië':

—Channö neda' guna' zxön cuina', yöl-la' zxön na' biti' bi gaca. Xuza' runë' neda' zxön, ate' libí'ili' rnnali' náquië' Dios queëli'. <sup>55</sup> Libí'ili' biti' núnbë'ëli'-në' Dios Xuz, pero neda' núnbë'a-në'. La'tu' inniá': Biti' núnbë'a-në', gaca' nu rizí' yë' ca na' nácali' libí'ili', rizí' yë'ëli'. Na'a, le nácatë núnbë'a-në', en nazí' lu na'a xtídzë'ë. <sup>56</sup> Xúzili' Abraham budzëjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzëjade'enë'.

<sup>57</sup> Ní'irö yugu' bönni' judío na' të' Jesús, ta'nnë':

—Biti' yu'ínu' chi-un iz. ¿Naru' bilé'etsenu' Abraham?

<sup>58</sup> Jesús rë' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

<sup>59</sup> Ní'irö gula'guélé'ë guiöj para ulu'ladxë' Jesús, pero Lë' bunítitë cuinë', en burúajë' lö'a yudo' na'. Gudödë' gatsaj láhui'lö ga na' nacu'ë, ate' söhuöjë'.

## 9

### *Ruúnë' Jesús tu bönni' guljë' nachúl-latë lahuë'*

<sup>1</sup> Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

<sup>2</sup> Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

<sup>3</sup> Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni. <sup>4</sup> Run bayudxi gunru' xichinë' Xuza' nasöl-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntú nu gaca gun dxin. <sup>5</sup> Tsanni ni zoa' yödzölió ni, naca' bení' quégaca bönachi yödzölió.

<sup>6</sup> Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guiöj lahuë' bönni' na' nachul-la lahuë'. <sup>7</sup> Ní'irö rë' lë':

—Guyéaj yöjtibi lo' lu beaj nisa nazí'i le Siloé.

Siloé naca tu didza' hebreo le rna: Nasöl-la'.

Ní'irö bönni' na' nachul-la lahuë' guyijë' ni', yöjtibi lahuë'. Cate' buzë'ë ni' chirilé'enë'.

<sup>8</sup> Ní'irö bulu'bani bönachi dzaga yu'u queë', en nupa ni' bila'lë'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

<sup>9</sup> Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

<sup>10</sup> Ní'irö gula'nábinë' lë', ta'nnë':

—¿Nacxi caz guca, gyalaj guiöj lo'?

<sup>11</sup> Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': “Guyéaj ra' beaj nisa nazí'i le Siloé, yöjtibi lo'.” Guyija' ni', yöjtibi lahua', ate' gyalajtë guiöj lahua'.

<sup>12</sup> Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

### *Yugu' bönni' yudo' ta'náb yúdxinë' bönni' na' gyalaj guiöj lahuë'*

<sup>13</sup> Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. <sup>14</sup> Tu' naca dza lá'ayi quégaquië' cate' benë' Jesús gúna'do' na', en gusaljë' guiöj lahuë' bönni' na' zí'alö nachul-la lahuë', <sup>15</sup> que lë' ni na' yugu' bönni' yudo' fariseo na' gula'nábinë' lë' leyúbölö nacxi guca gyalaj guiöj lahuë'. Lë' gudxë' légaquië':

—Budxië' gúna'do' guiöj lahua', ate' yöjtiba' le, en rilé'eda'.

<sup>16</sup> Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila' rúajë' choplö. <sup>17</sup>Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rnno' li' queë' bönni' na', gusaljë' guiöj lo'?

Lë' rnnë':

—Náquië' bönni' ru'ë didza' uláz queë' Dios.

<sup>18</sup> Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiöj lahuë', cate' bulu'lídzarë' xuz xinë'ë bönni' na' guyalaj guiöj lahuë', <sup>19</sup> ate' gula'nábinë' légaquië', ta'nnë':

—¿Naru' náquië' bönni' ni zxí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

<sup>20</sup> Bulu'bi'ë didza' xuz xinë'ë na', të' légaquië':

—Nözitu' bönni' ni náquië' zxí'initu', en guljë' nachúl-latë lahuë', <sup>21</sup> pero nacxi guca, rilé'enë' na'a, bití' nöztu', en nuzxi na' gusalaj guiöj lahuë', bití' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

<sup>22</sup> Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. <sup>23</sup> Que lë' ni na' gula'nnë' xuz xinë'ë: “Guli'nabi-në' lë', tu' chináquië' bönni' chinaca.”

<sup>24</sup> Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

<sup>25</sup> Ní'irö ubi'ë didza', rnnë':

—Channö náquië' bönni' dul-la' bití' nözda'. Tu le nözda'. Zí'alö nachul-la lahua', ate' na'a rilé'eda'.

<sup>26</sup> Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiöj lo'?

<sup>27</sup> Bubi'ë didza', rë' légaquië':

—Chigúdxí caza' libí'ili', pero bití' gú'unili' si' lu ná'ali' xtídza'a. ¿Bizx que na' rë'ënili' yönili' leyúbölö? ¿Naru' rë'ënili' tá'ali' ca' Lë'?

<sup>28</sup> Ní'irö bulu'lidza' zí'ë lë', ta'nnë':

—Li' do'o Lë', pero netu' dá'atu' Moisés. <sup>29</sup> Netu' nöztu' Dios bë'lenë' Moisés didza', pero ca naca queë' bönni' ni, bití' nöztu' nuzxi caz gusöl-la' Lë'.

<sup>30</sup> Ní'irö ubi'ë didza' bönni' na', rë' légaquië':

—Lë' ni run ga rubánida'. Libí'ili' bití' nözili' nuzxi gusöl-la' bönni' ni, ate' Lë' gusaljë' guiöj lahua'. <sup>31</sup> Nöziru' bití' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca rë'ënë' Lë', Dios riyönnë' bönni' ni. <sup>32</sup> Dza ni'te bití' riyön nu gunná channö nu bönni' gusaljë' guiöj lahuë' tu bönni' guljë' nachúl-latë lahuë'. <sup>33</sup> La'tu' cabí náquië' bönni' ni queë' Dios, bití' bi gaca gunë'.

<sup>34</sup> Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'?

Ní'irö bulu'béajë' lë' ní'ilö.

### *Nupa nácaqaca chul-la niti*

<sup>35</sup> Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

<sup>36</sup> Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

<sup>37</sup> Jesús rē' lē':

—Chibilé'enu' Lē', ate' neda' ni ru'ílēna' li' didza', naca' Zxí'inē' Dios.

<sup>38</sup> Ní'irō bōnni' na', gyalaj guiōj lahuē', guyéaj lādxe'ē Jesús, en rē' Lē':

—Xan, réajlē'a Li'.

<sup>39</sup> Jesús rnnē':

—Para uchi'a usōrōa' bōnachi bida' yōdzōlió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

<sup>40</sup> Cate' yugu' bōnni' yudo' fariseo na' nacua'lenē' Jesús bila'yōnnē' didza' ni, ní'irō tē' Lē':

—¿Naru' nachul-la nanítitsatu'?

<sup>41</sup> Bubi'ē didza' Jesús, rē' légaquiē':

—La'náru' nachúl-lasō guiōj loli', bití' ibága'li' dul-la'. Na'a rnnali': "Rilé'etu'." Que lē ni na' nabága'li' dul-la'.

## 10

*Rucúdzū'ē didza' Jesús que lē'a quégacaba' bō'cu' zxila'*

<sup>1</sup> Gunnē' ca' Jesús:

—Le nácatē rea' libí'ili': Nu bōnni' bití' raziē' saca' ga nu riyaza lē'a quégacaba' bō'cu' zxila', pero tsáziē' saca' ga yúbölö, bōnni' ni náquiē' gubán, en ribán cazē'. <sup>2</sup> Nu bōnni' raziē' saca' ga nu riyaza náquiē' bōnni' run chí'i cazē' bō'cu' zxila' na'. <sup>3</sup> Para tsáziē' bōnni' ni, risalaj nu zoa run chí'i ga nu riyaza, ate' ta'yōniba' bō'cu' zxila' na' chí'ē, en tu'únbē'ēba'-nē'. Lē' rulidzē'-ba' que queēba' ca légacaba', en rubéajē' yugu' bō'cu' zxila' na'. <sup>4</sup> Cate' chinubéajē'-ba' yúgu'tēba' bō'cu' zxila' néquigacaba' queē', rōjnōruē' lógacaba', ate' bō'cu' zxila' na' rōjnógacaba' lē', tu' tu'únbē'ēba' chí'ē. <sup>5</sup> Bōnni' yúbölö bití' tsōjnógacaba' lē', pero ulu'zxúnnajba' queē', tu' cabí núnbē'gacaba' chí'igaquiē' bōnni' yúbölö.

<sup>6</sup> Le rucudzu' didza' ni gudxe' Jesús légaquiē', pero bití' gula'yéajni'inē' lē na' rē' légaquiē'.

*Náquiē' Jesús ca bōnni' rapa chí'ē-ba' bō'cu' zxila'*

<sup>7</sup> Ní'irō Jesús rē' légaquiē' leyúbölö, rnnē':

—Le nácatē rea' libí'ili': Neda' naca' ca tu ga ta'yázaba' bō'cu' zxila'. <sup>8</sup> Chigula'lé'ē zían bōnni' gula'nnē' nácagaquiē' Cristo, pero yúgu'tē bōnni' na' bila'dxinē' zí'alö ca neda', nácagaquiē' gubán, en ta'bán cazē', ate' bití' bulu'zē' nágaba' bō'cu' zxila' na' légaquiē'. <sup>9</sup> Neda' naca' ca tu ga nu riyaza. Núti'tēs bōnni' tsázalenē' neda', ulé' bōnni' na', en gáquiē' ca tuba' bō'cu' zxila' rázaba', en rurúajba', en ridzōliba' le ráguba'.

<sup>10</sup> 'Za'zē' bōnni' gubán para cuanē'-ba', en gútiē'-ba', en usunítiē'-ba'. Neda' bida' para gata' yöl-la' na'bán idú quégaca bōnachi nácagaca ca bō'cu' zxila' quia'. Le nácatē gata' quégaquiē' yöl-la' na'bán idú na'. <sup>11</sup> Neda' run chí'igaca' bōnachi quia' ca runē' bōnni' na', lu yöl-la' dxi'i ladxi' queē' rapa chí'ē yugu' bō'cu' zxila'. Bōnni' na' rapa chí'ē-ba' bō'cu' zxila' caní zoa cazē' udödē' yöl-la' na'bán queē' ni'a quégacaba' bō'cu' zxila' queē'.

<sup>12</sup> Tu bōnni' nazxjē' rapa chí'ē-ba' bō'cu' zxila', cate' rilé'enē' zá'aba' bō'cu' guí'a sínia', rucá'anē'-ba' bō'cu' zxila' na', en ruzxúnnajē', ate' bō'cu' guí'a sínia' na' ráguya'aba' yugu' bō'cu' zxila' na', en rusilásiba' légacaba'. Caní runē' bōnni' na' rapa chí'ē-ba' bō'cu' zxila' tu' cabí náquiē' idú nu run chí'i-ba' bō'cu' zxila', ate' bití' néquigacaba' que cazē' bō'cu' zxila' na'. <sup>13</sup> Ruzxúnnajē' bōnni' nazxjē' na' tu' rapa chí'ē-ba' bō'cu' zxila' na' para sí'isē' dumí, en bití' ruí'i lādxe'ē-ba' bō'cu' zxila' na'.

<sup>14-15</sup> Neda' naca' bōnni', lu yöl-la' dxi'i ladxi' quia' run chí'igaca'-ba' bō'cu' zxila'. Ca na' núnbē'ē Xuza' neda', ate' neda' núnbē'a-nē' Xuza', lē'sca' caní núnbe'egacada' bōnachi quia' nácagaca ca bō'cu' zxila' quia', en rudōda' yöl-la' na'bán quia' ni'a quégacaba' bō'cu' zxila' na', ate' bō'cu' zxila' na' néquiguequiba' quia' núnbē'gacaba' neda'. <sup>16</sup> Lē'sca' nacua'aba' ia'zíca'rōba' bō'cu' zxila' quia' bití' nabábagacaba' ni. Lē'sca' légacaba' ral-la' tsōjxí'gaca'-ba'.

Légacaba' ulu'zë nágaba' chi'a, en ilácaba' tuz len ia'zíca'röba' bö'cu' zxila' quia', ate' neda' caz gun chí'igaca'-ba'.

<sup>17</sup> Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. <sup>18</sup> Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

<sup>19</sup> Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'. <sup>20</sup> Zíanë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágali' Lë'?

<sup>21</sup> Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

*Yugu' bönni' judío unná bë' tu'zöë' Jesús tsölá'alö*

<sup>22</sup> Raca beo' ziaga, en naca dza na' tunë' laní yödzo Jerusalén, tu'subanë' ca gula'gu'ë yudo' quégaquië' lu në'ë Dios. <sup>23</sup> Ridë' Jesús ra' yudo' ga naca chila que, nazí'i le Chila Queë' Salomón. <sup>24</sup> Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' lí' Cristo, ca nácatë gudíxjöi'i netu'.

<sup>25</sup> Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. <sup>26</sup> Libí'ili' bití' réajlë'ëli' neda', tu' cabí nabábalenlí' nupa nácagaca bö'cu' zxila' quia', ca na' chigudxi caza' libí'ili'. <sup>27</sup> Ta'yöniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. <sup>28</sup> Neda' runödza' yöl-la' na'bán idú quégacaba', ate' bití' ca' ila'nítiba', ate' cuntu nu sequi' ubéaj légacaba' lu na'a neda'. <sup>29</sup> Xuza' Dios bennë' quia' légacaba', ate' Lë' nápatërë' yöl-la' huáca ca yúgu'të bönachi, ate' cuntu nu sequi' ubéaj légacaba' lu në'ë Xuza'. <sup>30</sup> Neda', en Dios Xuz, tuz nácatu'.

<sup>31</sup> Leyúbölö yugu' bönni' judío unná bë' na' bulu'guélë'ë guiöj ulu'ladxë' Jesús. <sup>32</sup> Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ní'a que bízxilö dxin dxi'a ni uládxí'li' neda' guiöj?

<sup>33</sup> Bulu'bi'ë didza' bönni' judío unná bë' na', të' Lë':

—Ní'a que dxin dxi'a bití' uládxí'tu' lí' guiöj, pero tu' cabí rnnió' dxi'a queë' Dios, tu' nacu' lí' bönáchisö, en run cuinu' Dios.

<sup>34</sup> Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunné' Dios, rnna: “Neda' rnnía': Nácalí' yugu' dios”? <sup>35</sup> Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágachië' dios, bönni' ní' Dios bë'lenë' légaquië' didza'. <sup>36</sup> Dios bubéajë' neda' quez queë', en gusöl-lë'ë neda' yödzülió ni. ¿Naru' rnnátsali' quia': “Lí' bití' rnnió' dxi'a queë' Dios”, tu' gunnía': Zxí'inë' Dios naca”? <sup>37</sup> Channö cabí runa' dxin budödë' Xuza' Dios lu na'a, bití' ral-la' tséajlë'ëli' neda'. <sup>38</sup> Channö runa' dxin budödë' Dios lu na'a, sal-la' bití' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

<sup>39</sup> Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

<sup>40</sup> Ní'irö guyijë' Jesús leyúbölö ia'tsölá'a yegu Jordán, ga ní' buquile' Juan bönachi nisa zí'atëlö, ate' bugá'anë' Jesús ní'. <sup>41</sup> Bila'dxín bönachi zían ga zoë' Jesús, ta'nná:

—Le nácatë bití' benë' Juan nitú yöl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idútë li zeaj naca.

<sup>42</sup> Que lë ni na' gula'yéajlë'ë bönni' zían Jesús ga na' zoë'.

## 11

*Le guca cate' gútië' Lázaro*

<sup>1</sup> Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. <sup>2</sup> Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzzinu ni'ë len guitsa' ícjanu.

<sup>3</sup> Gula'sól-la'nu nigula zanë' Lázaro na' nu yöjödix Jesús, gunná:

—Xan, buyútsöca', ré'enë' Lázaro, bönni' na' nadxí'inu'-në'.

<sup>4</sup> Cate' biyönnë' Jesús didza' ni, gudxë' nupa nacua' ni', rnnë':

—Yödzöhuë' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzöhuë' ni ilá' lahui ca' yöl-la' zxön quia' neda', Zxí'inë' Dios.

<sup>5</sup> Jesús nadxí'inë' Marta, en nigula zxílanu Marta na', en Lázaro na'. <sup>6</sup> Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. <sup>7</sup> Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

<sup>8</sup> Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

<sup>9</sup> Bubi'ë didza' Jesús, rë' légaquië':

—Nacua' caz chinnu hora lahui' dza. Nu bönni' ridë' lahui' dza, bití' tsöjchégu'ë, tu' rilé'enë', tu' zóalen lë' bení' zoa yödzölió ni. <sup>10</sup> Channö ridë' bönni' na' chi'i dzö'ölö, röjchégu'ë, tu' cabí zóalen bení' lë'.

<sup>11</sup> Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

<sup>12</sup> Ní'irö yugu' bönni' usëda queë' të' Lë', ta'nnë':

—Xan, channö rásië', huöáquië'.

<sup>13</sup> Gunnë' caní Jesús tu' chigútië' Lázaro, pero légaquië' téquinë' gunné': Rásisë' Lázaro.

<sup>14</sup> Ní'irö Jesús gudxë' légaquië' yálajdo', gunné':

—Chigútië' Lázaro. <sup>15</sup> Rudzëjada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

<sup>16</sup> Ní'irö Tomás, bönni' na' tu'ë lë', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyéajru' ca' rë'u, en gátillenru'-në'.

*Náquië' Jesús Nu rusubán nupa chinátigaca, enca' Nu nabániru'*

<sup>17-19</sup> Dë yödzö Betania gála'sö ga dë Jerusalén na', le naca ca rizá'aru' tu hórátëz. Que lë ni na' chibila'dxinë' zían bönni' judío ga na' nacua'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. <sup>20</sup> Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'. <sup>21</sup> Marta na' rënu Jesús:

—Xan, la'tu' zu' ni, bití' gátië' bönni' zana'. <sup>22</sup> Lësca' na'a, nözda' yúgu'të le inábinu' Dios, Lë' gunné' quiu'.

<sup>23</sup> Jesús rë'ë-nu:

—Ubanë' bönni' zanu'.

<sup>24</sup> Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

<sup>25</sup> Ní'irö Jesús rë'ë-nu:

—Naca каза' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, <sup>26</sup> ate' yúgu'të bönni' nabánigachië', en ta'yéajlë'ë neda', bití' ca' ilátië' tsaz. ¿Réajlë'u lë ni'?

<sup>27</sup> Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isöl-lë'ë yödzülió ni.

*Ribödxë' Jesús tu' ru'i ládxë'ë nigula zanë' Lázaro*

<sup>28</sup> Cate' budxi bë'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

<sup>29</sup> Cate' biyöninu María didza' ni, la' guyástënu, zéajnu ga na' zoë' Jesús. <sup>30</sup> Biti' rázinë' Jesús la' yödzüdo' na', pero zóasë' ga na' yöjtsáaganu Marta Lë'. <sup>31</sup> Cate' yugu' bönni' judío na' nacua'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnéhoaquie'-nu, ta'nnë':

—Uyéajnu ra' yeru ba tsöjchödxinu ni'.

<sup>32</sup> Ní'irö bidxinu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

<sup>33</sup> Cate' bilé'enë' Jesús ribödxinu, en ta'bödxë' ca' bönni' judío na' dzágagaquie'-nu, ní'irö buí'innë', en gunnéda' ládxë'ë. <sup>34</sup> Rnnë':

—¿Gazxi bucáchi'li'-në'?

Të' Lë':

—Gudá uyú'.

<sup>35</sup> Gurödxë' Jesús. <sup>36</sup> Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

<sup>37</sup> Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga bití' gátië' Lázaro?

*Rubanë' Lázaro lu yöl-la' guti*

<sup>38</sup> Leyúbölö gunnéda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lé'e gu'a guiöj, ate' da' tu guiöjta'a le nusayaj ga nu riyaza le. <sup>39</sup> Jesús gudxë' nupa nacua' ni', rnnë':

—Guli'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

<sup>40</sup> Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

<sup>41</sup> Ní'irö gula'gúë' guiöjta'a na' nusayaj ga nu riyaza yeru ba ga na' yu'ë bönni' nati na'. Buyúë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. <sup>42</sup> Neda' nözda' riyöntiqui'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Li' na' nasöl-lu'u neda'.

<sup>43</sup> Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

<sup>44</sup> Burúajë' bönni' na' gúquie' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquie':

—Buli'lí lari' na' naröli ni'a në'ë, en guli'gu'ë lataj së'ë.

*Tun xtídzë'ë yugu' bönni' judío unná bë' ilútië' Jesús*

*(Mt. 26:1-5; Mr. 14:1-2; Lc. 22:1-2)*

<sup>45</sup> Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'. <sup>46</sup> Bal-lë' yöjáquie' ga nacu'ë bönni' yudo' fariseo, en bulu'siyönnë' légaquie' ca na' benë' Jesús. <sup>47</sup> Ní'irö bönni' yudo' fariseo na' bulu'dúbilenë' tsözxön bönni' yudo' tu'chí'a tu'söröë', en yugu' bixúz unná bë', ta'nnë':

—¿Nacxi caz gunru? Runë bönni' ni zían yöl-la' huáca zxön. <sup>48</sup> Channö gü'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquinnajgaquië' yudo' lá'ayi queëru', en yödzö queëru'.

<sup>49</sup> Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nözili', <sup>50</sup> en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzö.

<sup>51</sup> Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzö na'. <sup>52</sup> Gátië' Jesús, calëgasö ni'a que yödzö na', pero gátië' ca' para utubë' yugu' zxí'inë' Dios násilasigaquië', para ilácagaquië' tuz. <sup>53</sup> Caní guca, la' dza ná'asö gulún xtídza'gaquië' ilútië' Jesús. <sup>54</sup> Que lë ni na' bítirö gudë' Jesús yálajdo' gapa nacua' bönachi judío, pero buzë'ë ni', sa'yéajlë' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

<sup>55</sup> Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzö ni', ate' gula'benë', söjáquië' Jerusalén cate' si' idxín laní na' para tsöjpa'a cuíngaquië' ca naca que yudo'. <sup>56</sup> Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huídatsë' laní, o biti' guídë'?

<sup>57</sup> Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjö'i légaquië' para gaca tsöjxöngaquië' Lë'.

## 12

### *María rigú'unu le rilá' zxixi ni'ë Jesús*

*(Mt. 26:6-13; Mr. 14:3-9)*

<sup>1</sup> Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubanë' lu yöl-la' guti. <sup>2</sup> Gula'gu'ë tu gü'í huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaaj bönni' rö'ölengaquië' Jesús ga na' tahuë'. <sup>3</sup> Ní'irö gudéla'nu María ca tu guíë le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzé bö' zxixi. <sup>4</sup> Ní'irö bë'ë didza' tu bönni' usëda queë' Jesús, lë' Judas Iscariote, zxí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

<sup>5</sup> —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

<sup>6</sup> Gunnë' caní, calëga tu' ru'í láchë'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. <sup>7</sup> Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. <sup>8</sup> Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

### *Tun xtídza'gaquië' bönni' judío unná bë' ilútië' Lázaro*

<sup>9</sup> Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calëgasö tu' zoë' Jesús ni', pero lësca' tu' té'ënnë' ila'lé'enë' Lázaro, bönni' na' busubanë' Jesús lu yöl-la' guti. <sup>10</sup> Ní'irö gulún xtídza'gaquië' yugu' bixúz unná bë', ilútië' ca' Lázaro, <sup>11</sup> tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

### *Len yöl-la' ba zxön razië' Jesús Jerusalén*

*(Mt. 21:1-11; Mr. 11:1-11; Lc. 19:28-40)*



<sup>12</sup> Bönachi zián bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. <sup>13</sup> Ní'irö gula'guítsjé' zin, en bila'rúajé' sòjxí'gala'gaquié' Jesús, ate' gulu'ë zidzaj didza', ta'nné':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'ené' bönachi Israel!

<sup>14</sup> Budzöliné' Jesús tuba' búrrodo', ate' gudxié'-ba' ca na' nazúaj lu guichi lá'ayi, rnna:

<sup>15</sup> ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bé'ené' libí'ili'!

¡Dxié'-ba' tuba' búrrodo'!

<sup>16</sup> Cate' ni' si' guca lë ni, bití' gula'yéajni'iné' bönni' usëda queë' Jesús, pero gudödi ni', cate' bubané' Jesús lu yöl-la' guti, en buëpë' yehua' yubá queë', ní'irö yöjnéguequiné' lë ni nazúaj lu guichi lá'ayi ca ral-la' gaca queë', ate' guca queë' caní.

<sup>17</sup> Lësca' yugu' bönni' na' gula'cuá'lené' Jesús cate' ni' bulidzë' Lázaro, bönni' na' yu'ë yeru ba, en busubané' lë' lu yöl-la' guti, guluné' ba nalí queë'. <sup>18</sup> Que lë ni na' ca' bila'rúajé' bönni' yöjxí'gala'gaquié' Jesús, tu' bila'yönné' ca naca yöl-la' huáca ni bené' Lë'. <sup>19</sup> Ní'irö gula'nné' la' légacasë' bönni' yudo' fariseo, ta'nné':

—Chinaca bé' bití' bi séqui'ru' gunru'. Buli'yú ca dá'gaca yúgu'të bönachi Lë'.

### *Yugu' bönni' zi'tu' tu'guiljé' Jesús*

<sup>20</sup> Bal-lë' bönni' zi'tu' dzágagaquié' nupa na' bila'dxín Jerusalén dza Laní Pascua na' para ila'yéaj ládxi'gaquié' Dios. <sup>21</sup> Yugu' bönni' zi'tu' na' bila'dxiné' ga zoë' Felipe, bönni' Betsaida que luyú Galilea, ate' guláta'yue' lahue', ta'nné':

—Bönni', ré'ënitú' ilé'etu'-né' Jesús.

<sup>22</sup> Guyijé' Felipe na', en yöjödxe' ca' Andrés. Ní'irö Andrés, en Felipe na' gulé' ca' Jesús.

<sup>23</sup> Bubi'ë didza' Jesús, ré' légaquié':

—Chizóa idxín dza gátia' neda', Bönni' Guljé' Bönachi, huöja' xilatja' yehua' yubá. <sup>24</sup> Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej. <sup>25</sup> Nu bönni' ruí'i ládxi'dë'ë yöl-la' na'bán queë', unítië' le, tu' gátië' tsaz bönni' na'. Nu bönni' bití' ruí'i ládxi'ë yöl-la' na'bán dë queë' yödzölió ni gun chí'ë le ga idxinrö dza gata' yöl-la' na'bán idú queë'. <sup>26</sup> Channö ré'ëné' nu bönni' guné' xichina', ral-la' t'ë'ë neda' bönni' na', ate' ga ni' tsöjsóá' neda', ni' tsöjsóë' ca' bönni' na' runé' xichina'. Channö runé' xichina' nu bönni', Xuza' Dios guné' bal bönni' na'.

### *Rigúxjö'ë Jesús ca si' ilútië' Lë'*

<sup>27</sup> Gunné' ca' Jesús:

—Na'a rö'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. <sup>28</sup> Xuza', ben ga ilá' lahui yöl-la' zxön quiu'.

Ní'irö biyön chí'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

<sup>29</sup> Bila'yöni bönachi zián nacuá' ni' chí'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lené' Lë' didza'.

<sup>30</sup> Ní'irö bubí'ë didza' Jesús, ré' légaquié':

—Biyön chí'i ni, calëga para uzi'a xibé neda', pero para uzí'ili' xibé libí'ili'. <sup>31</sup> Chibidxín dza uchi'a usöröë' Dios bönachi yödzölió ni. Na'a chú'uné' Dios tu' xihui' ní'ilö, nu na' rinná be'e bönachi yödzölió ni. <sup>32</sup> Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

<sup>33</sup> Didza' ni bé'ë Jesús naca bé' ca gátië'. <sup>34</sup> Bönachi zián na' t'ë Jesús, ta'nná:

—Netu' biyõnitu' nupa bulu'laba le rnna xibá queë' Dios, læ na' rnna: Sóatica'së' Cristo. ¿Nacxi caz naca, rnno' Li': "Run bayudxi Bõnni' Guljê' Bõnachi, ulu'chisë' Lë' xitsá"?" ¿Nuzxi na' Bõnni' Guljê' Bõnachi?

<sup>35</sup> Ní'irõ Jesús rë' légaquië':

—Ia'tú chí'ido'osõ sóalena' neda' libí'ili', en naca' bení' queëli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítli'. Nu bõnni' ridë' ga chul-la niti bití' nõzinë' gazxi sa'yéajë'. <sup>36</sup> Tsanni ni zóalena' libí'ili', naca' bení' queëli'. Guli'tséajlë' neda' naca' bení' queëli' para ilé'eli' bení' na' naca idú.

Cate' Jesús budxi bë'ë didza' ni, yõjhuõjê' yõjcachi' lahuë' lógaquië'.

*Le run nigui bõnachi judío, para cabí ila'yéajlë' Jesús*

<sup>37</sup> Sal-la' benë' Jesús zían yõl-la' huáca lógaquië', bití' gula'yéajlë'ë Lë'. <sup>38</sup> Caní guca læ na' buzúajë' Isaías lu guichi, bõnni' na' bë'ë didza' uláz queë' Dios, gunnë':

Xan, ¿nuzxi caz guyéajlë' didza' bë'ëtu'?

¿Nuzxi caz bulu'inë' Xanru' yõl-la' huáca queë'?

<sup>39</sup> Caní guca, bití' guca ila'yéajlë'ë Jesús. Guca ca na' gunnë' ca' Isaías:

<sup>40</sup> Dios benë' ga gula'chul-la gula'nítië',

ate' guca zidi ládxi'do'gaquië'

para cabí ila'lé'enë' len guiõj lógaquië',

en cabí ila'yéajni'inë' lu icja ládxi'do'gaquië'.

Bití' ulu'huõáquië' quia' para úngaca'-në'.

<sup>41</sup> Bë'ë Isaías didza' ni tu' bilé'enë' yõl-la' zxõn queë' Cristo, en bë'ë didza' ca naca queë' Lë'. <sup>42</sup> Sal-la' raca caní, gula'yéajlë' bõnachi zían Jesús, ga bidxintë gula'yéajlë'ë bal-lë' bõnni' unná bë' Lë', pero tu' tádxinë' yugu' bõnni' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu'dubë' tu'sëdë' queë' Dios. <sup>43</sup> Caní gulunë' tu' tunrë' zxõn le tun bõnachi légaquië' bal ca le runë' Dios légaquië' bal.

*Ilún didza' bë'ë Jesús ga irugu quégaca bõnachi ilátigaca*

<sup>44</sup> Bë'ë zidzaj didza' Jesús, rnnë':

—Nu bõnni' réajlë'ë neda', calëga neda'sõ réajlë'ë, pero réajlë'ë ca' Xuza' nasõl-lë'ë neda'.

<sup>45</sup> Lë'sca' caní, nu bõnni' rilé'enë' neda', rilé'enë' ca' Xuza' nasõl-lë'ë neda'. <sup>46</sup> Neda' naca' bení', en bida' yõdzolió ni, para cabí ulu'gá'anë' ga chul-la yúgu'të bõnni' ila'yéajlë'ë neda'.

<sup>47</sup> Channõ riyõnnë' nu bõnni' xtídzá'a, en bití' runë' le bal, calëga neda' ichuga' queë' bõnni' na' gátie', tu' bida' ni, calëga para ichuga' quégaca bõnachi yõdzolió ni, pero para usólá' bõnachi yõdzolió ni. <sup>48</sup> Nu bõnni' ruzóë' neda' tsólá'alõ, en bití' rizí' lu në'ë xtídzá'a, chizó'a le ichugu queë' bõnni' na'. Didza' na' chibé'lana' libí'ili' naca tu le ichugu queë' bõnni' na' dza údxi. <sup>49</sup> Caní naca, ruá'a didza', calëga rácasõ quia', pero Xuza' nasõl-lë'ë neda' gudxë' neda' le ral-la' innía', enca' ca ral-la' gu'a didza'. <sup>50</sup> Nõzda' gunná bë'ë Dios caní para gata' yõl-la' na'bán idú quégaca bõnachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

## 13

*Jesús riguibë' ní'agaquië' bõnni' usëda queë'*

<sup>1</sup> Ní' naca dza si' idxín Laní Pascua cate' tu'subanë' bõnni' judío ca benë' Dios, bubéajë' bõnachi queë' luyú Egipto. Nõzinë' Jesús chibidxín dza queë' gátie', cate' ral-la' uzë'ë yõdzolió ni, en huõjê' ga zoë' Xuzë'. Ca na' nadxí'inë' bõnachi queë' nacuá' yõdzolió ni, na'a nadxí'inë' légaquië' ga idxintë gátie' uláz quégauquië'.

<sup>2</sup> Satanás tu' xihuí' chinagú'u yõl-la' Judas Iscariote, zxí'inë' tu bõnni' lë' Simón, para udödë' Jesús lu ná'agaca nupa iluti Lë'. <sup>3</sup> Nõzinë' Jesús ca naca, birúajë' ga zoë' Dios, en huõjê' ca' ga na' zoë' Dios, ate' Dios Xuzë' chinudödë' lu në'ë Lë' iduté yõl-la' unná bë' queë'. <sup>4</sup> Que læ ni na', cate' ní' tahuë', guzuínë' Jesús, en gudúë' lari' rixó'a yenë'. Gudélë'ë

tu lari' ruzxini ná'aru' le budë'ë lë'ë. <sup>5</sup> Ní'irö gudë'ë nisa tu lu zxiga' guíë, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

<sup>6</sup> Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

<sup>7</sup> Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzé tséajni'inu'.

<sup>8</sup> Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

<sup>9</sup> Ní'irö Simón Pedro rë' Lë':

—Xan, calëgasö ni'a quibu', pero quibu' ca' na'a, en icja'.

<sup>10</sup> Jesús rë' lë':

—Nu nayari, ní'asö run bayudxi tsari, tu' naca cazë' dxi'a idutë', ate' libí'ili' nácali' dxi'a, pero calëga yúgu'tëli'.

<sup>11</sup> Gunnë' caní Jesús: “Calëga yúgu'tëli' nácali' dxi'a”, tu' nözinë' nálögaquië' na' udödi Lë'.

<sup>12</sup> Gudödi gudibë' Jesús ní'agaquië', buguelë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'? <sup>13</sup> Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'. <sup>14</sup> Na'a, channö neda' naca' Xanli', en Bönni' Usedi queëli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'. <sup>15</sup> Tu le buluí'ida' libí'ili' para gunli' libí'ili' ca na' bena' neda'. <sup>16</sup> Le nácatë rea' libí'ili': Biti' nayëpisëtëre' tu bönni' huen dxin ca xanë', ate' bönni' gubáz biti' nayëpisëtëre' ca nu nasöl-la' lë'. <sup>17</sup> Channö réajni'ili' yúgu'të lë ni, bica' ba libí'ili' channö gunli' caní. <sup>18</sup> Didza' ni ruá'a biti' rea' yúgu'tëli'. Nöz quézida' nupa guró caza' neda', pero run bayudxi gaca lë na' nazúaj lu guichi lá'ayi, le rnna: “Nu rágulen neda' tsözxön, nu ni tá'baga' neda'.”

<sup>19</sup> Na'a riguíxjöi'ida' libí'ili' zí'alö ca gaca, para cate' gaca caní, tséajlë'ëli' zoa caza' neda'.

<sup>20</sup> Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

### *Riguíxjö'ë Jesús ca gunë' Judas, udödë' Lë'*

(Mt. 26:20-25; Mr. 14:17-21; Lc. 22:21-23)

<sup>21</sup> Cate' Jesús budxi bë'ë didza' ni, bu'innë', ate' yálajdo' gunné':

—Le nácatë rea' libí'ili': Tu bönni' nútsë'ë ladjali' udödë' neda'.

<sup>22</sup> Ní'irö bulu'yú lo luzá'agaquië' tuë' ia'tué' bönni' usëda queë', en gula'cu'ë böniga, ate' ta'naba ladxí'gaquië' nuzxi que na' gunné' Jesús caní. <sup>23</sup> Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë. <sup>24</sup> Simón Pedro bulá'a buluí'isë' bönni' ni para inábinë' Jesús nuzxi que na' gunné' caní. <sup>25</sup> Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

<sup>26</sup> Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubisië' yöta xtila na', en bë'ë queë' Judas Iscariote, zxí'inë' tu bönni' lë' Simón.

<sup>27</sup> Gudödi gudahuë' Judas yöta xtila na', guyaza Satanás tu' xihui' icja ladxí'da'ahuë'. Ní'irö Jesús rë' lë':

—Lë na' gunu', yöjentë na'a.

<sup>28</sup> Biti' ta'yéajni'inë' ia'zíca'rë' bönni' usëda queë' rö'ögaquië' tahuë' bizx que na' Jesús gudxë' lë' caní. <sup>29</sup> Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yöxí' le gáguru' laní, o gunné': Bë' lati' quégaca bönachi yechi'. <sup>30</sup> Cate' budxi gudahuë' Judas yöta xtila na', en ni' naca chi'i dzö'ölö, la' birúajtë'.

*Tu xibá cubi*

<sup>31</sup> Cate' chibirúajë' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. <sup>32</sup> Channö ilá' lahui yöl-la' zxön queë' Dios ni'a quia' neda', Zxí'inë', lësca' Lë cazë' Dios gunë' ga ilá' lahui yöl-la' zxön quia' neda', Zxí'inë', en la' guntë' caní. <sup>33</sup> Libí'ili', zxí'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-në' bönni' judío, lësca' rea' libí'ili' na'a: Ga na' tseja' neda', biti' gaca guídali' rácasö queëli'. <sup>34</sup> Rea' libí'ili' tu xibá cubi le rnna caní: Guli'dxi'i luzá'ali' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'ali' tuli' ia'tuli'. <sup>35</sup> Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

*Rnnë' Jesús innë' Pedro biti' núnbë'ë Lë'*

(Mt. 26:31-35; Mr. 14:27-31; Lc. 22:31-34)

<sup>36</sup> Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

<sup>37</sup> Pedro rë' Lë':

—Xan, ¿bizx que biti' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

<sup>38</sup> Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'alö ca cödxiba' böra, li' tá'bágu'u tsonna luzuí, innó' biti' núnbë'u neda'.

**14***Náquië' Jesús nöza tséajlenru' para idxinru' ga zoë' Dios Xuz*

<sup>1</sup> Rnnë' Jesús:

—Biti' cö'li' baniga lu icja ládxi'do'oli'. Guli'tséajlë' Dios, en guli'tséajlë' ca' neda'. <sup>2</sup> Lu yu'u lidxë' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queëli' ga tsöjsóali'. <sup>3</sup> Channö huayéaja', en tsöjpá'a lataj queëli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsó'a neda', tsöjsóali' ca' libí'ili'. <sup>4</sup> Nöz quézili' ga ni' tseja', en núnbë'ëli' ca' nöza.

<sup>5</sup> Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbë'ëtu' nöza?

<sup>6</sup> Bubi'ë didza' Jesús, rë' lë':

—Neda' naca caza' nöza, en naca' ca' le naca idütë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë' Dios Xuz. <sup>7</sup> La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

<sup>8</sup> Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

<sup>9</sup> Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?" <sup>10</sup> ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lenu' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. <sup>11</sup> Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. <sup>12</sup> Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntëro ca' gunë' bönni' na' tu' huöja' ga zoë' Dios Xuz. <sup>13</sup> Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz. <sup>14</sup> Bítí'tës bi inábali', en ugunli' dxin La' neda', neda' guna' le.

*Jesús isöl-lë'ë Dios Bö' Lá'ayi, para idisóalenë' bönachi queë'*

<sup>15</sup> Rnnë' ca' Jesús:

—Channö nadxí'ili' neda', guli'gún le rea' libí'ili', <sup>16</sup> ate' neda' gáta'yua' lahuë' Dios Xuz, ate' Lë' isöl-lë'ë queëli' Nu yúbölö Nu gácalen libí'ili', Nu utipa ládxi'li', en sóalenta'só libí'ili'. Nu ni naca Dios Bö' Lá'ayi, Nu ruí' didza' idútë li. <sup>17</sup> Biti' gaca ulu'zí' bönachi yödzölió ni xibë' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'. <sup>18</sup> Biti' ucá'ana' libí'ili' ca yugu' bi'i uzé'bido'. Huöda' udusóalena' libí'ili'. <sup>19</sup> Ia'tú chí'ido'osó bíti'rö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. <sup>20</sup> Dza ní'irö cate' Dios Bö' Lá'ayi na' idisóalenë' libí'ili', inöz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. <sup>21</sup> Nu bönni' rizí' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en ulu'í' lahua' lahuë'.

<sup>22</sup> Judas rë' lë', pero calëga Judas Iscariote, rnnë':

—Xan, çnacxi caz gaca ulu'í' lo' lotu' netu', en bití' ulu'í' lo' lógaca bönachi yödzölió?

<sup>23</sup> Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'. <sup>24</sup> Bönni' na' bití' nadxí'inë' neda' bití' runë' ca rnna xtídza'a. Didza' na' biyönili' bë'a neda', calëgasö quia' na', pero naca queë' Dios Xuz nasöl-lë'ë neda'.

<sup>25</sup> Rë' caza' libí'ili' yugu' lë' ni tsanni ni zóalena' libí'ili', <sup>26</sup> pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë ládxi'li' ca naca yúgu'të didza' na' chigudxa' libí'ili'.

<sup>27</sup> Rucá'ana' queëli' le cuéqui dxi ládxi'li'. Runna' queëli' yöl-la' rö'ö dxi ladxí' quia'. Yöl-la' rö'ö dxi ladxí' na' runna' queëli' bití' naca ca le tunna queëli' bönachi yödzölió ni. Biti' ichixi icja ládxi'do'oli', en bití' gadxi idzöbili'. <sup>28</sup> Chibiyönili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayëpisëtë'rë' Dios Xuz ca neda'. <sup>29</sup> Na'a, chigudxa' libí'ili' zí'aló ca si' gaca, para cate' gaca caní, tséajlë'ëli' neda'.

<sup>30-31</sup> Bítirö gü'ilena' libí'ili' didza' zían, tu' za' tu' xihui', nu rinná be'e bönachi yödzölió ni. Sal-la' bití' bi dë lu në'e bi gun quia' neda', ral-la' gaca caní para iléquibe'e bönachi yödzölió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

## 15

*Ca naca que lubá uva, en ni'a në'e lubá na'*

<sup>1</sup> Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chi'ë lubá na'. <sup>2</sup> Ugüë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. <sup>3</sup> Libí'ili' chinácali' dxi'a ni'a que didza' na' chibë'lëna' libí'ili'. <sup>4</sup> Guli'dá'tica'só neda', ca na' neda' dá'tica'sa' ca' libí'ili'. Ca naca que ni'a në'e lubá na', bití' gaca bi cuía rácasö que, channö cabí dá'tica'só lubá na', lësca' caní naca queëli', bití' bi gaca gunli' channö cabí tá'tica'sili' neda'.

<sup>5</sup> Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alënlí' neda', bití' bi gaca gunli'. <sup>6</sup> Nu bönni' bití' dá'tica'së' neda', gaca queë' ca raca quégaca ni'a në'e lubá na' bití' nácagaca dxi'a, ta'rú'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí, ate' tséguigaca.

<sup>7</sup> Channö tá'tica'sili' neda', en gunli' ca rnna xtídza'a, huáca inábali' bi guë'ënilí', ate' neda' guna' lë na' inábali'. <sup>8</sup> Gunli' bal Xuza' Dios cate' gunli' xichinë', ate' gácali' ca ni'a

në'e lubá na' ta'bía, en caní gaca bë' nácali' idú bönni' ta'dë'ë neda'. <sup>9</sup> Ca na' nadxí'inë' Dios Xuz neda', lëscá' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'. <sup>10</sup> Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza lãdxë'ë Lë', Bönni' na' nadxí'inë' neda'.

<sup>11</sup> 'Yugu' didza' ni rea' libí'ili' para udzë'jalenli' tsözxön neda', en gaca idú ca na' udzë'jali'. <sup>12</sup> Lë ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'. <sup>13</sup> Biti' gaca idxí'irönë' nu bönni' luzë'ë ca nu bönni' udödë' yöl-la' na'bán queë', gátie' para gácalenë' yugu' böchi' luzë'ë tu' nadxí'inë' légaquië'. <sup>14</sup> Libí'ili' nácali' böchi' luzá'a channö gunli' ca na' chigudxa' libí'ili' gunli'. <sup>15</sup> Bítirö innía' queëli' nácali' huen dxin quia', tu' cabí nözine' bönni' huen dxin naca gunë' xanë'. Neda' chigunnía' queëli' nácali' böchi' luzá'a, tu' chibena' ga nözili' yúgu'të le chigudxë' Xuza' neda' guna'. <sup>16</sup> Calëga libí'ili' guröli' neda', pero neda' gurö caza' libí'ili', en buzóa' libí'ili' para tséajli' bi tsöjenli', ca na' tun ni'a në'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunnë' queëli' yúgu'të le inábili' Lë', en ugunli' dxin La' neda'. <sup>17</sup> Lë ni naca le rea' libí'ili' gunli': Guli'dxí'i luzá'ali' tuli' ia'tuli'.

### *Bönachi yödzülió tu'zóa tsölá'alö Jesús, en nupa dá'gaca Lë'*

<sup>18</sup> Gunnë' ca' Jesús:

—Channö bönachi yödzülió ni tu'zóa libí'ili' tsölá'alö, nözili' chibulu'zöë' neda' tsölá'alö zí'alö ca tu'zöë' libí'ili' tsölá'alö na'a. <sup>19</sup> La'tu' nácali' tuz len bönachi yödzülió ni, huala'dxí'i bönachi yödzülió ni libí'ili' ca na' ta'dxí'i luzë'eguequi, pero tu'zóa bönachi yödzülió ni libí'ili' tsölá'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödzülió ni. <sup>20</sup> Guli'tsöjné didza' na' chigudxa' libí'ili', gunnía': Biti' nayépisëtëre' nu bönni' huen dxin ca xanë'. Channö gula'bía lãdxí'gaca bönachi neda', ila'bía lãdxí'gaca ca' libí'ili'. Channö nacua' nupa tun ca rnna xtídza'a, ilún ca' ca rnna xtídza'li' libí'ili'. <sup>21</sup> Yúgu'të lë ni ilún bönachi queëli' tu' dá'ali' neda', tu' cabí núnbë'gaca Dios Xuz nasöl-lë'ë neda'.

<sup>22</sup> 'La'tu' cabí bida', en la'tu' cabí bë'lëna' légaquië' didza', biti' ila'báguë'ë dul-la', pero na'a tu' bida' ni, biti' bi gaca ila'nnë' que dul-la' nabága'gaquië' le ubéaj légaquië' dxí'a. <sup>23</sup> Nu bönni' ruzöë' neda' tsölá'alö, ruzöë' ca' Xuza' Dios tsölá'alö. <sup>24</sup> La'tu' cabí bena' yugu' yöl-la' huáca ga nacu'ë, yugu' le cuntu nu ben ca gulaca, biti' ila'báguë'ë dul-la'. Na'a, bila'lë'enë' yugu' lë na' bena', ate' tu'zöë' neda' tsölá'alö, en tu'zöë' ca' Xuza' tsölá'alö. <sup>25</sup> Caní raca, para gaca ca rnna xtídzë'ë Dios, le nazí' lu ná'agaquië', le rnna: Tu'zöë' neda' tsölá'alö, en biti' zoa bizx que.

<sup>26</sup> 'Cate' idxinë' Dios Bö' Lá'ayi, Bönni' ru'ë didza' idütë li, en gácalenë' libí'ili', utipë' lãdxí'li'. Isöl-la'a Bönni' na' queëli' uláz queë' Dios Xuz, ate' gunë' ba nalí quia' neda'.

<sup>27</sup> Libí'ili' ca' gunli' ba nalí quia', tu' zóalen cázali' neda' tsözxön dza ni'te.

## 16

<sup>1</sup> Gunnë' ca' Jesús:

—Yugu' didza' ni chigudxa' libí'ili', para cabí gaca chopá lãdxí'li'. <sup>2</sup> Yugu' bönni' judío ulu'béajë' libí'ili' tsaz ga tu'dubë' tu'sëdë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'. <sup>3</sup> Caní ilunë', tu' cabí núnbë'gaquië' Dios Xuz, en cabí núnbë'gaquië' neda'. <sup>4</sup> Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

### *Le gunë' Dios Bö' Lá'ayi*

Gunnë' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'. <sup>5</sup> Na'a huöja', tsöjsóalëna'-në' Dios Xuz, nasöl-lë'ë neda'. Biti' inábili' neda' nituli' libí'ili', biti' innali':

¿Gazxi tseju? <sup>6</sup> Na'a, tu' rea' libí'ili' yugu' didza' ni, risëbi ládxi'li'. <sup>7</sup> Neda' rea' libí'ili' le naca idútë li. Gácarö dxi'a queëli' huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isölla'a-në', na' idisóalenë' libí'ili'. <sup>8</sup> Cate' guidë' Lë', gunë' ga iléquibe'e bönachi yödzölió ni nabága'gaca dul-la', en bití' núnbë'gaca le naca tsahui', ate' ichúguië' Dios quéguequi ilátigaca. <sup>9</sup> Nabága'gaquië' dul-la' tu' cabí ta'yéajlë'ë neda'. <sup>10</sup> Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bítirö' ila'lé'enë' neda'. <sup>11</sup> Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

<sup>12</sup> 'Ia'zica' zían didza' ré'ënda' güi'lena' libí'ili', pero bití' gaca tséajni'ili' na'a. <sup>13</sup> Cate' guidë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rásasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca. <sup>14</sup> Lë' gunë' neda' bal, tu' si'ë le nequi quia', en gunë' ga inözili' le. <sup>15</sup> Yúgu'të le nequi queë' Dios Xuz nequi quia'. Que lë ni na' gunniá' si'ë le nequi quia', en gunë' ga inözili' le.

*Yöl-la' risëbi ládxi' queëli' huöaca yöl-la' rudzeja*

<sup>16</sup> Gunnë' ca' Jesús:

—Yetú chí'ido'osö, en bítirö' ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

<sup>17</sup> Ní'irö bönni' usëda queë' gulë' luzá'agaquië' tuë' ia'tué', ta'nnë':

—¿Bizxi rna didza' ni rë' rë'u? Rnnë': “Ia'tú chí'ido'osö, en bítirö' ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz.”

<sup>18</sup> Ní'irö gula'nnë':

—¿Bizxi caz ré'ëni inná didza' ni, gunnë': “Ia'tú chí'ido'osö”? Bití' réajni'itu' didza' ni ru'ë.

<sup>19</sup> Réquibe'enë' Jesús té'ënnë' ila'nábinë' Lë', ate' rë' légaquië':

—¿Naru' rinábítsö luzá'ali' ca naca que didza' na' bë'a, gunniá': Ia'tú chí'ido'osö, en bítirö' ilé'eli' neda', ate' ia'tú chí'ido'osö ca' ulé'eli' neda'? <sup>20</sup> Le nácatë rea' libí'ili': Cödxili', en isëbi ládxi'li', pero bönachi yödzölió ni ulu'dzeja cate' iluti neda'. Ní'irö salla' isëbi ládxi'li', yöl-la' risëbi ládxi' queëli' huöaca yöl-la' rudzeja cate' ulé'eli' neda'. <sup>21</sup> Tu nigula cate' chizóa gáljabi' bí'ido' queënu, rigu'i rizáca'nu, tu' chibidxín dza queënu, pero cate' chizóabi' tubi' bí'i bönni'do' queënu, bítirö' röjnenu lë na' butságanu, tu' rudzéjanu tu' chigúlajbi' tubi' bí'i bönni'do' yödzölió ni. <sup>22</sup> Lësca' caní' raca queëli', risëbi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' bití' séqui'në' nu bönni' ugüë' yöl-la' rudzeja queëli' na'.

<sup>23</sup> 'Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunnë' queëli'. <sup>24</sup> Ga ridxintë na'a dza bití' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queëli'.

*Ridéli'në' Jesucristo lu le raca yödzölió ni*

<sup>25</sup> Gunnë' ca' Jesús:

—Yugu' lë na' chibë'lena' libí'ili' didza' bucúdzua' didza'. Huadxín dza cate' bítirö güi'lena' libí'ili' didza' le rucúdzua' didza', pero yálajdo' güi'lena' libí'ili' didza' ca naca queë' Dios Xuz. <sup>26-27</sup> Dza na' inábili'-në' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queëli', tu' nadxí'inë' Lë' cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. <sup>28</sup> Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

<sup>29</sup> Ní'irö yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bítirö rucúdz'u didza'. <sup>30</sup> Na'a réquibe'etu' nöz quézinu' Li' yúgu'tè, en bití' run bayudxi nu bi inabi yudxi Li', tu' riguíxjöi'inu' netu' le si' inábatu'. Que lè ni na' réajlè'ètu' birúaju' ga zoè' Dios.

<sup>31</sup> Bubi'è didza' Jesús, rë' légaquiè':

—¿Naru' réajlè'tsali' neda' na'a? <sup>32</sup> Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero bití' soa' tuza', tu' zóalen cazè' Dios Xuz neda'. <sup>33</sup> Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzülió ni gaca queéli' le usaca' zì' libí'ili', pero buli'tipa ládxi'li'. Neda' chibidéli'da' lu le raca yödzülió ni.

## 17

### *Jesús rinábinè' Dios gácalenè' nupa dá'gaca Lè'*

<sup>1</sup> Cate' budxi bē'è Jesús yugu' didza' ni, guchisa lahuè', ruyúe' yehua' yubálo, ate' rnnè':

—Dios Xuz, chibidxín dza. Ben ga ilá' lahui yöl-la' zxon quia' neda', Zxí'inu', para gaca guna' ga ilá' lahui yöl-la' zxon quiu' Li'. <sup>2</sup> Ben caní tu' chinudödu' lu na'a yöl-la' unná bē' para inná bé'eda' yúgu'tè bönachi, en gu'a yöl-la' na'bán idú quégaca yúgu'tè nupa na' chibennu' quia'. <sup>3</sup> Lè ni naca yöl-la' na'bán idú na', tu' núnbē'gaquiè' Li', nacu' la's dui Dios idú, en tu' núnbē'gaquiè' ca' neda', Jesucristo, ate' Li' nasöl-lu'u neda'.

<sup>4</sup> Neda' chibena' ga nalá' lahui yöl-la' zxon quiu' yödzülió ni, en chibudxi bena' dxin na' budödu' lu na'a. <sup>5</sup> Na'a, Xuz, ben ga ilá' lahui yöl-la' zxon napa' tsözxön len Li', para gaca quia' yöl-la' zxon guta' quia' tsözxön len Li' dza ni'te quez cate' si' gata' yödzülió.

<sup>6</sup> Chibulu'a lahui le nacu' Li' lógaquiè' bönni' ni bennu' quia', nupa na' gurö cazu' Li' ladaj bönachi yödzülió. Guléquinè' bönni' ni quiu', ate' bēnnagacu'-nè' quia', ate' tunè' ca rnna xtídz'u. <sup>7</sup> Na'a nözguequinè' yúgu'tè lè na' bennu' quia' zá'gaca lu no'o Li', <sup>8</sup> tu' chibudöda' lu ná'agaquiè' didza' na' budödu' Li' lu na'a neda', ate' légaquiè' nazí' lu ná'agaquiè' le, en téquibe'enè' birúaja' ga zu' Li', ate' ta'yéajlè'è Li' nasöl-lu'u neda'.

<sup>9</sup> Neda' ráta'yua' Lo' gácalenu' légaquiè'. Ráta'yua' Lo', calèga gácalenu' yúgu'tè bönachi yödzülió, pero gácalengacu'-nè' bönni' ni chibēnnagacu'-nè' quia', tu' néquiguequinè' quiu'.

<sup>10</sup> Yúgu'tè nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'i lahui yöl-la' zxon quia'.

<sup>11</sup> Na'a, bítirö ugá'ana' yödzülió ni, pero yugu' bönni' ni ulu'gá'anè' yödzülió, ate' neda' udusóalena' Li'. Xuz Lá'ayi, len yöl-la' huáca quiu' ben chi'i nupa ni chibennu' quia', para ilácagaca tuz, ca na' nácaru' rē'u tuz. <sup>12</sup> Cate' ni' guzóalena' légaquiè' yödzülió ni, ben chí'igaca'-nè', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-nè', ate' nitué' bití' bunítia'-nè', pero tuzè' bönni' na' náquiè' ca zxí'ini tu' xihui', en narugu queè' gátiè' tsaz. Caní raca ca nazúaj lu guichi lá'ayi.

<sup>13</sup> Na'a udusóalena' Li', ate' tsanni ni zoa' yödzülió ni, ruá'a yugu' didza' ni para gaca idú yöl-la' rudzeja quégacaquiè' ca na' raca quia' neda' yöl-la' rudzeja. <sup>14</sup> Neda' chibudöda' lu ná'agaquiè' xtídz'u, ate' bönachi yödzülió ni tu' zóa légaquiè' tsölá'alö tu' cabí nácagaquiè' tuz len léguequi, ca na' naca quia' neda', bití' naca' tuz len bönachi yödzülió ni. <sup>15</sup> Ráta'yua' Lo', calèga cúagacu'-nè' yödzülió ni, pero gun chí'igacu'-nè', para cabí ila'dzunè' lu na' tu' xihui'. <sup>16</sup> Bití' nácagaquiè' tuz len bönachi yödzülió ni ca na' naca quia' neda', bití' naca' tuz len bönachi yödzülió. <sup>17</sup> Guléaj quez quiu' légaquiè', ugunu' dxin le naca idútè li. Le naca idútè li na' naca xtídz'u. <sup>18</sup> Ca na' benu' Li', gusöl-lu'u neda' ladaj bönachi yödzülió ni, lēscá' caní runa' neda', risöl-la'gaca'-nè' ladaj bönachi yödzülió. <sup>19</sup> Tu' nadxí'igacada'-nè' rudödi cuina' quiu', para ulu'rúajè' ca' légaquiè' quez quiu' tu' nazí' lu ná'agaquiè' le naca idútè li.

<sup>20</sup> Ráta'yua' Lo', calèga quégacasè' bönni' ni, pero lēscá' quégacaquiè' bönni' ni' ila'yéajlè'è neda' ni'a que didza' ilu'è bönni' ni. <sup>21</sup> Ráta'yua' Lo' gunu' ga ilácagaquiè' tuz yúgu'tè', en ilácagaquiè' ca' tuz len rē'u, ca na' nacu' Li', Xuza', nacu' tuz len neda', ate' neda' ca',



naca' tuz len Li'. Caní ral-la' ilácagaquië' para ila'yéajlë' ia'zica'rö bönachi yödzölió ni, Li' caz gusöl-lu'u neda'. <sup>22</sup> Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. <sup>23</sup> Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquibe'e ia'zica'rö bönachi yödzölió ni, Li' caz gusöl-lu'u neda', ate' nadxí'igacanu'-në' ca na' nadxí'inu' neda'.

<sup>24</sup> Xúza'do', rë'ënda' ila'cuá'lenë' neda' bönni' ni bénnagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'. <sup>25</sup> Xuza' tsahui', bönachi yödzölió ni bití' núnbë' gaca Li', pero neda' nunbë' caza' Li', ate' yugu' bönni' ni chinöziguequinë' Li' caz gusöl-lu'u neda'. <sup>26</sup> Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadxí'inu' Li' neda', lësca' caní ila'dxí'i luzá'agaquië', ate' gaca caza' tuz len légaquië'.

## 18

### *Ta'zönë' Jesús*

*(Mt. 26:47-56; Mr. 14:43-50; Lc. 22:47-53)*

<sup>1</sup> Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. <sup>2</sup> Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ni' zían luzuí. <sup>3</sup> Ní'irö guchë'ë Judas tu cö' bönni' röjáquië' gudíl-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yöjáquië' ga ni' zoë' Jesús, nuá'agaquië' yugu' guí' yöri, en yugu' le tu'dí'inë'. <sup>4</sup> Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljali'?

<sup>5</sup> Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. <sup>6</sup> Cate' Jesús gudxë' légaquië': “Neda' caz”, ní'irö bulu'biguë'ë cusi zxanlö, en gula'dzö'ë lu yu. <sup>7</sup> Jesús gunábinë' légaquië' leyúbölö, rnnë':

—¿Nuzxi riguíljali'?

Të' Lë':

—Jesús, bönni' Nazaret, riguíljatu'-në'.

<sup>8</sup> Ní'irö bubí'ë didza' Jesús, rnnë':

—Chigúdxá' libí'ili': Neda' caz. Channö riguíljali' neda', guli'güí'-gáquië' lataj tsöjhuöjgaquië' bönni' ni.

<sup>9</sup> Caní gunné' Jesús para idxín didza' na' bë'ë, gunné': “Nupa ni bennu' quia', nitué' bití' bunítia'-në'.” <sup>10</sup> Ní'irö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídí náguië' ibëla bönni' na'. <sup>11</sup> Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

### *Ridxinë' Jesús lahuë' bixúz lo*

*(Mt. 26:57-58; Mr. 14:53-54; Lc. 22:54)*

<sup>12</sup> Yugu' bönni' na' röjáquië' gudíl-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'ë Lë'. <sup>13</sup> Ní'irö gula'chë'ë Lë' zí'alö lahuë' Anás, tu' náquië' xto' zxí'inë' Caifás, bönni' náquië' bixúz lo iz na'. <sup>14</sup> Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátie' tuzë' bönni', en calëga iníti idútë yödzö quégaquië'.

*Rnnë Pedro: “Biti’ núnbë’a-në Jesús”**(Mt. 26:69-70; Mr. 14:66-68; Lc. 22:55-57)*

<sup>15</sup> Simón Pedro, en ia’túë’ bönni’ usëda queë’ Jesús yöjáquië’ cúdzu’lë’ Lë’, söjnéhoquië’ Lë’. Bönni’ usëda ni guyázalenë’ Jesús lö’a que lidxi bixúz lo, tu’ núnbë’ë bixúz lo na’ lë’.

<sup>16</sup> Bugá’anë’ Pedro ní’ilö ga nu riyaza lö’a na’. Que lë ni na’ burúajë’ bönni’ usëda na’ núnbë’ë bixúz lo lë’, ate’ bé’lenë’-nu didza’ nigula na’ run chí’inu ga nu riyaza lö’a na’, ate’ benë’ ga guyázië’ Pedro lö’a. <sup>17</sup> Ní’irö nigula na’ run chí’inu ga nu riyaza lö’a rënu Pedro, rnnanu:

—¿Naru’ cabí do’o ca’ li’ bönni’ ni?

Bubi’ë didza’ Pedro, rnnë’:

—Calëga neda’.

<sup>18</sup> Tu’ run ziaga, yugu’ bönni’ huen dxin, en yugu’ bönni’ ni’a ná’agaca bönachi yudo’ nabéquiagaquië’ guí’, ate’ zuíguequinë’ ra’ guí’ na’, en tu’tsë’e cuíngaquië’. Lësca’ Pedro zuílenë’ légaquië’, rutsë’e cuinë’.

*Bixúz lo rinabi yúdxinë’ Jesús**(Mt. 26:59-66; Mr. 14:55-64; Lc. 22:66-71)*

<sup>19</sup> Ní’irö gunabi yúdxinë’ bixúz lo Jesús para inözinë’ nupxi dá’gaca Lë’, en nacxi naca le rusedinë’ Jesús bönachi. <sup>20</sup> Bubi’ë didza’ Jesús, rë’ lë’:

—Lahui’ lo bé’lena’ yúgu’të bönachi didza’. Buseditiqui’sida’ légaquië’ gapa naca lu yu’u ga tu’dubë’ tu’sëdë’ queë’ Dios, enca’ chila yudo’, ga ni’ tu’dubë’ yúgu’të bönni’ judío, en bití’ bi didza’ bë’a bagáchi’sö. <sup>21</sup> ¿Bíx que rinabi yúdxinu’ neda’? Gunabi yudxi nupa ni’ bila’yöni didza’ bé’lena’ léguequi. Nözguequi quézinë’ bönni’ na’ didza’ na’ bé’lena’ légaquië’.

<sup>22</sup> Cate’ budxi bë’ë Jesús didza’ ni, tu bönni’ ni’a ná’agaca bönachi yudo’ gudápë’ë ru’ë Jesús, rnnë’:

—¿Naru’ caní rubí’itso’ didza’ lahuë’ bixúz lo?

<sup>23</sup> Bubi’ë didza’ Jesús, rë’ lë’:

—Channö bití’ gunní’a dxi’a, gudixjö’ bízxilö didza’ bë’a bití’ naca dxi’a, en channö guca dxi’a didza’ bë’a, ¿bíx que na’ gudápu’u neda’?

<sup>24</sup> Ní’irö Anás na’ gusöl-lë’ë Jesús náguë’ë, ate’ bulu’sudxinë’ Lë’ lahuë’ Caifás, bönni’ náquië’ idú bixúz lo.

*Leyúbölö rnnë’ Pedro: “Biti’ núnbë’a-në Jesús”**(Mt. 26:71-75; Mr. 14:69-72; Lc. 22:58-62)*

<sup>25</sup> Cate’ ni’ zuíne’ Pedro ra’ guí’ rutsë’e cuinë’, yugu’ bönni’ nacu’ë ni’ gulë’ lë’, ta’nnë’:

—¿Naru’ cabí do’o ca’ li’ Jesús na’?

Gudá’baguië’ Pedro, rnnë’:

—Calëga neda’.

<sup>26</sup> Zoë’ ni’ tu bönni’ huen dxin queë’ bixúz lo, náquië’ di’a dza queë’ bönni’ na’ Pedro guchúguië’ guídi náguië’, ate’ bönni’ huen dxin na’ rë’ Pedro:

—¿Naru’ cabí bilé’e quézida’ li’ la’ yëla ni’, dzagu’-në’ Jesús?

<sup>27</sup> Leyúbölö gudá’baguië’ Pedro, ate’ la’ gurödxitëba’ böra.

*Ridxinë’ Jesús lahuë’ Pilato**(Mt. 27:1-2, 11-14; Mr. 15:1-5; Lc. 23:1-5)*

<sup>28</sup> Ní’irö gula’ché’ë Jesús, en bulu’zë’ë lidxë’ Caifás na’, ate’ bila’dxinë’ yúlahui’ queë’ bönni’ yu’u lu në’ë uláz que yödz Roma, le nazí’i le Pretorio. Chizá’ rení’ dza na’, ate’ bití’ gula’yázië’ yugu’ bönni’ judío yúlahui’ na’, tu’ téquinë’ ila’báguë’ë xíguia’ channö ila’yázië’ ni’, le gun ga bití’ gaca ilahuë’ xtsö’ Laní Pascua, laní na’ tu’subanë’ ca benë’ Dios, bubéajë’ bönachi Israel luyú Egipto. <sup>29</sup> Ní’irö birúajë’ Pilato, bönni’ na’ yu’u lu në’ë, en bidxinë’ ga na’ nacu’ë, ate’ rë’ légaquië’:

—¿Bizxi ruzégui'li'-në' bönni' ni didza'?

<sup>30</sup> Bulu'bi'ë didza', tē' lē':

—La'tu' cabí nu'ë bönni' ni dö', biti' udöditu'-në' lo'.

<sup>31</sup> Ní'irö Pilato rē' légaquië', rnnë':

—Libí'i cázali' guli'chë'ë, en buli'chi'a buli'sörö Lē' ca rinná bë' xibá queëli'.

Yugu' bönni' judío tē' lē', ta'nnë':

—Biti' dē lu na'tu' nu gútitu'.

<sup>32</sup> Caní guca para idxín xtídzë'ë Jesús, le bë'ë naca ral-la' gátië'. <sup>33</sup> Ní'irö buázië' Pilato yúlahui' na', ate' bulidzë' Jesús, en rē' Lē':

—¿Nacu' Li' Bönni' Rinná Bé'enë' Bönachi Judío?

<sup>34</sup> Bubi'ë didza' Jesús, rē' lē':

—¿Naru' rácasö quiu' rnno' caní, o gulë' bönachi li' caní ca naca quia'?

<sup>35</sup> Pilato rē' Lē':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

<sup>36</sup> Ní'irö bubí'ë didza' Jesús, rē' lē':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

<sup>37</sup> Ní'irö Pilato rē' Lē':

—¿Nácatso' bönni' rinná bë'ë?

Bubi'ë didza' Jesús, rē' lē':

—Naca' ca na' rnno'. Que lē ni na' bida' ga gulja' yödzölió ni, para guna' ba nalí que le naca idútë li. Yúgu'tē nupa ni tun le naca idútë li tu'zë nágagaca didza' ruá'a.

<sup>38</sup> Pilato rē' Lē':

—¿Bizxi na' le naca idútë li?

*Ta'chúquië' queë Jesús gátië'*

*(Mt. 27:15-31; Mr. 15:6-20; Lc. 23:13-25)*

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rē' légaquië':

—Biti' bi dö' ridzöliida' nu'ë bönni' ni. <sup>39</sup> Libí'ili' dē tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënili' usana'-në' queëli' Bönni' Rinná Bé'enë' Bönachi Judío?

<sup>40</sup> Ní'irö yúgu'tē' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

## 19

<sup>1</sup> Ní'irö Pilato guchë'ë Jesús, en benë' ga gula'guinë' yugu' bönni' röjáquië' gudil-la Lē'.

<sup>2</sup> Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gacuë' Lē' tu lari' tunna xiná chul-la ca naca le tácuë' bönni' ta'nná bë'ë. <sup>3</sup> Ní'irö gula'bigüë'ë lahuë' Jesús, en tē' Lē':

—¡Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

<sup>4</sup> Ní'irö burúajë' Pilato, en rē' yugu' bönni' judío unná bë', rnnë':

—Buli'yú, rubéaja'-në' loli' ni para inözili' biti' bi rudzöliida' le naca dö' nu'ë bönni' ni.

<sup>5</sup> Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rē' légaquië':

—Ni zoë' bönni' ni.

<sup>6</sup> Cate' yugu' bixúz unná bē', en yugu' bönni' ni'a ná'agaquiē' bila'lé'enē' Jesús, zidzaj gulu'ē didza', ta'nnē':

—¡Budē'ē lē'e yaga cruz! ¡Budē'ē lē'e yaga cruz!

Pilato rē' légaquiē':

—Libí'i cázali' guli'chē'ē, en guli'tsöjdē'ē lē'e yaga cruz. Neda' biti' bi dö' budzövida' nu'ē bönni' ni.

<sup>7</sup> Ní'irö bönni' judío na' tē' lē':

—Dē queētu' tu xibá, ate' rinná bē' xibá queētu' na' ral-la' gátiē' bönni' ni tu' gunnē' náquiē' Zxí'inē' Dios.

<sup>8</sup> Cate' biyönnē' Pilato didza' ni, gúdxirönē'. <sup>9</sup> Leyúbölö buáziē' yúlahui' na', en rē' Jesús:

—¿Gázxitē bönni' Li'?

Biti' bi didza' bubí'ē Jesús.

<sup>10</sup> Ní'irö Pilato rē' Lē':

—¿Naru' cabí ubí'tso' didza', quíxjöi'inu' neda'? ¿Naru' cabí nözinu' dē lu na'a udá'a Li' lē'e yaga cruz, en dē lu na'a usana' Li'?

<sup>11</sup> Bubi'ē didza' Jesús, rē' lē':

—Biti' bi dē lu no'o gunu' quia' la'tu' cabí nudödē' Dios yöl-la' unná bē' na' lu no'o. Que lē ni na', bönni' na' budödē' neda' lu no'o nabága'rē' xíguia' ca li'.

<sup>12</sup> La' ní'isö rizóa ribö'ē Pilato usané' Jesús, pero gulu'ē zidzaj didza' bönni' judío unná bē', ta'nnē':

—Channö usanu'-nē' bönni' ni, biti' ridzagu'-nē' dxi'a César, bönni' rinná bé'enē' idútē yödzölió. Nu bönni' run cuiné' bönni' rinná bē'ē, ridá'báguē'ē César na'.

<sup>13</sup> Cate' biyönnē' Pilato didza' ni, gunná bé'enē' nupa diguá'gaca Jesús, ate' gurö'ē xilatjē' ga ruchi'a rusöröē', lataj na' nazí'i le Lö'a Ga Zxóagaca Guiöjta'a, en ca naca didza' hebreo nazí'i le Gabata. <sup>14</sup> La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxē' yugu' bönni' judío unná bē' na', rnnē':

—Ni zoē' bönni' rinná bé'enē' libí'ili'.

<sup>15</sup> Gulu'ē zidzaj didza', ta'nnē':

—¡Bétiē'! ¡Bétiē'! ¡Budē'ē lē'e yaga cruz!

Pilato rē' légaquiē':

—¿Rinábitseli' neda' udá'a-nē' lē'e yaga cruz bönni' rinná bé'enē' libí'ili'?

Bulu'bi'ē didza' bixúz unná bē', ta'nnē':

—Cúnturö nu zoa rinná be'e netu'. Tuzē' César rinná bé'enē' netu'.

<sup>16</sup> Que lē ni na' Pilato budödē' Jesús lu ná'agaquiē', para tsöjdá'agaquiē' Lē' lē'e yaga cruz. Ní'irö gula'guélē'ē Jesús, en gula'chē'ē Lē' ní'ilö.

### *Tu'dē'ē Jesús lē'e yaga cruz*

*(Mt. 27:32-44; Mr. 15:21-32; Lc. 23:26-43)*

<sup>17</sup> Birúajē' Jesús ni', nu'ē yaga cruz queē', sa'yéajē' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. <sup>18</sup> Bulu'dē'ē Jesús lē'e yaga cruz ni', ate' bulu'dá'lenē' Lē' tsözxön lē'egaca yaga cruz ia' chopē' bönni'. Tsölá'a huéaj ta'dē'ē, ate' Jesús dē'ē gatsaj láhui'lö chopē' bönni' na'. <sup>19</sup> Gusöl-lē'ē Pilato tu bönni' nu'ē le buzúajē' lu guichi le buzöē' lē'e yaga cruz icjlē' Jesús, le rna caní: "Jesús, Bönni' Nazaret, Bönni' Rinná Bé'enē' Bönni' Judío." <sup>20</sup> Bulu'labē' zían bönni' judío didza' ni, tu' zoa ga na' bulu'dē'ē Jesús lē'e yaga cruz gála'sö ra' yödzö, ate' didza' na' nuzúajē' len didza' hebreo, en len didza' griego, en len didza' latín. <sup>21</sup> Yugu' bixúz unná bē' quégaquiē' bönni' judío tē' Pilato, ta'nnē':

—Biti' uzúaju', "Bönni' Rinná Bé'enē' Bönni' Judío." Buzúaj caní: "Bönni' ni gunnē': Inná bé'eda' bönni' judío."

<sup>22</sup> Bubi'ē didza' Pilato, rē' légaquiē':

—Le chinuzúaja', tsaz chinuzúaja'.

<sup>23</sup> Cate' yugu' bönni' na' röjáquië' gudil-la budxi bulu'dë'ë Jesús lë'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélé'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba. <sup>24</sup> Ní'irö yugu' bönni' na' röjáquië' gudil-la gulé luzá'agaquië' tuë' ia'túë', ta'nnë':

—Biti' ichúguru' le, pero dxí'arö gaca uyuru' le gaca bë' para inóziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guisië' que queégaquië' lari' nacuá', en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

<sup>25</sup> Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz. <sup>26</sup> Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxí'inu'.

<sup>27</sup> Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

### *Le guca cate' gutië' Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

<sup>29</sup> Dë ni' tu zxiga' yudzu nupi zi. Ní'irö yugu' bönni' na' röjáquië' gudil-la bulu'guijë' nupi zi na' tu le bululu rizxupi nisa, ate' bulu'zöë' le tu lahui gui, en bulu'dë'ë le ru'ë Jesús para xupë'. <sup>30</sup> Budxi gu'ë Jesús nupi zi na', gunné':

—Chinácatë.

Ní'irö buzötaj icjë'. Burúajtë bö' naca cazë', gútië'.

### *Tu bönni' reajë' gudil-la runë'ë yaga tuchi' cuita lë'ë Jesús*

<sup>31</sup> Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lé'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío guláta'yuë' lahuë' Pilato guíë' bönni' röjáquië' gudil-la tsöjtítsjagaquië' xiguíchjagaquië' bönni' dá'gaquië' lé'egaca yaga cruz, en ulu'zötjë' légaquië' lé'egaca yaga cruz na'. <sup>32</sup> Que lë ni na' gula'biguë'ë bönni' röjáquië' gudil-la, ate' gula'guítsjë' xiguichjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz. <sup>33</sup> Cate' bila'dxinë' ga na' dë'ë Jesús, en bila'lé'enë' chinátië', biti' gula'guítsjë' xiguichjë'.

<sup>34</sup> Ní'irö tuë' bönni' na' reajë' gudil-la bunë'ë yaga tuchi' cuita lë'ë Jesús, ate' la' birúajtë rön, en nisa. <sup>35</sup> Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús.

<sup>36</sup> Gulaca yugu' lë ni para budxín le nazúaj lu guichi lá'ayi, le rnna: "Biti' gatsaj nitú dxita yu'ë." <sup>37</sup> Ia'tú le nazúaj ca' lu guichi rnna caní: "Ulu'yúë' bönni' na' bulu'në'ë lë' yaga tuchi'."

### *Tu'cächë'ë Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Gudödi guca yúgu'të lë ni, guyijë' José, bönni' yödzö Arimatea, bönni' dë'ë Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dë'ë Jesús lë'e yaga cruz, ate' bu'ë Lë'.

<sup>39</sup> Lësca' bidxinë' Nicodemo ni', bönni' na' guyijë' zí'alö yöjyüë' Jesús chí'i dzö'ölö, nu'ë tu le nutsí'i nöri silá' que mirra, en tu le rilá' zixi, le naca ca tu gayuá' guíë'. <sup>40</sup> Ní'irö José, en Nicodemo na' gula'guélé'ë Jesús, en bulu'chölinë' Lë' yugu' lári'do', ate' gula'gu'ë láhuilö

lë na' nutschí'i nöri silá' que mirra, en le rilá' zxxi. Gulunë' ca nalëbiguequinë' tunë' bönni' judío cate' tu' cáchë'ë tu bönni' nati. <sup>41</sup> Gala' ga na' bulu'dë'ë Jesús lë'e yaga cruz dë tu luyú ga zeaj da' yaga olivo, ate' gatsaj láchui'ló lataj na' zoa tu yeru ba cubi le nadaj lë'e guí'a guiöj, yeru ba na' cuntu nu ta'güi'inë'. <sup>42</sup> Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pë'ë bönni' judío que Laní Pascua.

## 20

### *Rubanë' Jesús lu yöl-la' guti*

(Mt. 28:1-10; Mr. 16:1-8; Lc. 24:1-12)

<sup>1</sup> Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiöjta'a na' busayaj ga nu riyaza yeru ba na'. <sup>2</sup> Ní'irö böajnu carelö ga zoë' Simón Pedro, dzáguië' lë' ia'tué' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

<sup>3</sup> Ní'irö bila'rúajë' Pedro, en ia'tué' bönni' usëda na', söjáquië' ra' yeru ba na'. <sup>4</sup> Tsözxön ta'xíti'ë iropë', pero ia'tué' bönni' usëda na' guxíti'rë' carelö ca Pedro, ate' zí'alö lë' bidxinë' ra' yeru ba na'. <sup>5</sup> Biyéchuë', en buyúë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'. <sup>6</sup> Ní'irö bidxinë' Simón Pedro cúdzu'lë' ia'tué' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. <sup>7</sup> Lësca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsölá'alö nudubi quez. <sup>8</sup> Ní'irö guyázië' ca' ia'tué' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë' didza' bë'ë Jesús. <sup>9</sup> Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. <sup>10</sup> Ní'irö iropë' bönni' usëda na' yöjhuöjgaquië' lídxigaquië'.

### *Rulu'i lahuë' Jesús lonu María Magdalena*

(Mr. 16:9-11)

<sup>11</sup> Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'. <sup>12</sup> Bilé'enu chopë' gubáz lá'ayi queë' Dios ni', nácugaquië' lari' chiguichi. Rö'ögaquië' ni', tuë' ícjälö ba na', en ia'tué' xiní'alö ba na' ga ni' gula'gu'ë Jesús. <sup>13</sup> Yugu' gubáz lá'ayi na' tē' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

<sup>14</sup> Cate' budxi gunnánu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. <sup>15</sup> Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chi'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

<sup>16</sup> Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

<sup>17</sup> Jesús rë'ë-nu:

—Biti' canu' neda', tu' cabí ruhuëpinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queëli'."

<sup>18</sup> Ní'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

*Rulu'i lahuë' Jesús lógaquië' bönni' usëda queë'*  
(Mt. 28:16-20; Mr. 16:14-18; Lc. 24:36-49)

<sup>19</sup> Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö buluí'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>20</sup> Cate' budxi gudxë' légaquië' didza' ni, buluí'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. <sup>21</sup> Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca' caní risöl-la'a libí'ili' tsöjenli' xichina'.

<sup>22</sup> Cate' budxi gunné' caní, bulubë' lógaquië', en rë' légaquië':

—Guli'sí Dios Bö' Lá'ayi. <sup>23</sup> Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu bití' uniti loli' le, ugá'ana dul-la' que nu na' nun dul-la'.

*Biti' réajlë'ë Tomás*

<sup>24</sup> Tomás bití' zóalenë' légaquië' cate' Jesús buduyúë' légaquië'. Náquië' Tomás tuë' bönni' chínnuë' ní', en tu'ë ca' lë' Bönni' Bilidi'. <sup>25</sup> Gudödi ní' ia'zícá'rë' bönni' usëda na' gulë' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunné' bididaj, en unë'a xibón na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', bití' ca' tséajlë'a.

<sup>26</sup> Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, buluí'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

<sup>27</sup> Ní'irö Jesús rë' Tomás na':

—Bunë' xibón no'o ni, en buyú na'a ni. Bunë' no'o cuita lë'a ni, en bítí'rö gaca chopa ládxi'u, pero guyéajlë' neda'.

<sup>28</sup> Ní'irö bubí'ë didza' Tomás, rë' Lë':

—Xána'do', en Dios quia'.

<sup>29</sup> Jesús rë' lë':

—Tomás, tu' bulé'enu' neda', réajlë'u. Bica' ba nupa ní' ila'yéajlë' neda' sal-la' bití' ila'lé'eni neda'.

*Le rë'ëni gun didza' nazúaj lu guichi ni*

<sup>30</sup> Benë' Jesús ziánrö ca' yöl-la' huáca lógaquië' bönni' usëda queë', le cabí nazúajgaca lu guichi ni. <sup>31</sup> Yugu' lë' ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

## 21

*Rulu'i lahuë' Jesús lógaquië' gadxë' bönni' usëda queë'*

<sup>1</sup> Gudödi guca lë' ni, leyúbölö buluí'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluí'i lahuë' lógaquië'. <sup>2</sup> Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia' chopë' ca' bönni' usëda queë' Jesús.

<sup>3</sup> Simón Pedro rë' légaquië':

—Tseaja' tsöjxöna'-ba' böla.

Të' lë' ia'zícá'rë', ta'nnë':

—Guntu' li' tsözxön.

Ní'irö yójáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'. <sup>4</sup> Cate' chizá' rení', yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'. <sup>5</sup> Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

<sup>6</sup> Ní'irö Jesús rë' légaquië':

—Guli'chílaj yöxaj böla queëli' tsolá'a ibëla barco, ate' söngacali'-ba'.

Ní'irö gula'chiljé' le, ate' bití'rö guca ulu'béajé' le, tu' naguíraba' böla lë'e yöxaj böla na'.

<sup>7</sup> Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagúë' le zí'alö, ate' guyázië' lu nisa. <sup>8</sup> Bila'dxinë' ia'zica'rë' bönni' usëda na', tu'së'ë barco na', suná'ayöjgaquië' yöxaj ga na' dzö'öba' böla, tu' cabí naca zí'tu' ga dë luyú bidxi. Nácatë ca tu gayuá' löga ní'aru'. <sup>9</sup> Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'. <sup>10</sup> Jesús rë' légaquië':

—Guli'diguá'a-ba' ni böla na' si' guzxöngacali'-ba'.

<sup>11</sup> Gurenë' Pedro lë'e barco na', ate' gú'uyöjé' yöxaj na' zaca' luyú bidxi, nalíró-ba' böla zxön, idú tu gayuá' yu' chí'inu-unba'. Sal-la' nácacagaba' böla zián, bití' biröza' yöxaj na'.

<sup>12</sup> Ní'irö Jesús rë' légaquië':

—Guli'dá gáguli'.

Bití' burúguinë' nitúë' bönni' usëda queë' na' inábinë' Lë', innë': “¿Nuzxi Li'?” Nözguequi quëzinë' náquië' Xanru'. <sup>13</sup> Ní'irö gubíguí'ë Jesús, en gudélë'ë yöta na', enca' böla na', ate' bë'ë quëgaquië'.

<sup>14</sup> Lë' ni naca le bunny luzuí buluí'i lahuë' Jesús lógaquië' bönni' usëda queë' gudödi bubanë' lu yöl-la' guti.

### *Jesús ru'ilenë' Simón Pedro didza'*

<sup>15</sup> Cate' budxi gulahuë', Jesús rë' Simón Pedro:

—Simón, zxí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quëzinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

<sup>16</sup> Jesús rë' lë' le buropi luzuí, rnnë':

—Simón, zxí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quëzinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

<sup>17</sup> Jesús rë' lë' le bunny luzuí:

—Simón, zxí'inë' Jonás, ¿raza ládxa'u neda'?

Buí'innë' Pedro tu' le chibunny luzuí rinabi yúdxinë' lë', gunné': “¿Raza ládxa'u neda'?” Bubi'ë didza' Pedro, rë' Lë':

—Xan, yúgu'të nöz quëzinu' Li'. Nözinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'. <sup>18</sup> Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu lí' lari', en ichë' li' ga ni' bití' guë'ënnu' tseaju'.

<sup>19</sup> Yugu' didza' ni bë'ë Jesús naca bë' naca gátië' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia' tú:



—Gudá' neda'.

*Ru'ë didza' Jesús ca gaca queë' bönni' usëda na' nadxí'inë'*

<sup>20</sup> Buécjë' Pedro, en bilé'enë' söjnhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuíta lë'ë Jesús cate' ni' gulahuë', en gudxë' Jesús: “Xan, ¿nuzxi na' udödi Li?” <sup>21</sup> Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

<sup>22</sup> Jesús rë' lë':

—Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

<sup>23</sup> Guzë didza' ni ga nacu'ë böchi'ru' ta'yéajlë'ë Cristo. Téquinë' biti' gátië' bönni' usëda na'. Jesús biti' gudxë' lë' biti' gátië', pero caní gunné': “Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga.”

<sup>24</sup> Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nõzili' naca idútë li le runa' ba nalí.

<sup>25</sup> Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

## LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

### *Le guzxí lu nĕ'ĕ Dios, isöl-lĕ'ĕ Dios Bö' Lá'ayi*

<sup>1</sup> Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusi lahuĕ' runĕ' Jesús, en rusédinĕ' <sup>2</sup> ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' gurö cazĕ'. <sup>3</sup> Gudödi gudí'i guzxáque'ĕ Jesús, gútiĕ'. Ní'irö bubanĕ', en bulu'í'i lahuĕ' lógaquiĕ' gubáz queĕ' na'. Bulu'ínĕ' légaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí bulu'í'i lahuĕ' lógaquiĕ' idú ca choá' dza, en bĕ'lenĕ' légaquiĕ' didza' ca rinná bĕ'ĕ Dios.

<sup>4</sup> Cate' ni' nacu'ĕ tsözxön, gunná bĕ'enĕ' légaquiĕ' cabí ulu'zĕ'ĕ Jerusalén. Jesús gudxĕ' légaquiĕ', rnnĕ':

—Guli'cöz ni' le guzxí lu nĕ'ĕ Xuza' isöl-lĕ'ĕ queĕli' ca na' chibusiyön quézida' libí'ili'.

<sup>5</sup> Gunnĕ' ca':

—Le nácatĕ Juan buquilĕ' bönachi nisa lu nisa. Na'a biti' tse xidzé gaca queĕli' le rulu'í'i yöl-la' ridila nisa ni, idisóalenĕ' Dios Bö' Lá'ayi libí'ili'.

### *Ruhuĕpĕ' Jesús yehua' yubá*

<sup>6</sup> Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölö dza ni zóaru' na'a?

<sup>7</sup> Jesús gudxĕ' légaquiĕ':

—Biti' nequi queĕli' inözili' bizxi dza o bizxi dzö' gunĕ' Dios Xuz le nuzóĕ' lu na' cazĕ'.

<sup>8</sup> Sí'ili' yöl-la' huáca cate' guídĕ' Dios Bö' Lá'ayi idisóalenĕ' libí'ili'. Ní'irö gunli' ba nalí quia' neda' lu yödzo Jerusalén, en idú luyú Judea, en luyú Samaria, en ga idxintĕli' idútĕ yödzölió.

<sup>9</sup> Cate' budxi bĕ'lenĕ' légaquiĕ' didza' ni, tsanni ni' tu'yusĕ' ca' Lĕ', la' buĕpitĕ' xitsá' ga rö'ö tu böaj le bucache' Lĕ', ate' bí'trö bila'lĕ'enĕ' Lĕ'. <sup>10</sup> Tsanni ni' tu'yúĕ' lúxibalö cate' ni' buĕpĕ' Jesús, bulu'lu'í'i lógaquiĕ' chopĕ' gubáz lá'ayi ga na' nacu'ĕ, nácugaquiĕ' lari' chiguíchido'os. <sup>11</sup> Chopĕ' ni gulĕ' légaquiĕ', ta'nnĕ':

—Bönni' Galilea, ¿bizx que ruyuli' lúxibalö? Lĕ' cazĕ' Jesús ni si' guzĕ'ĕ ga zóali', buĕpĕ' yehua' yubá, lĕsca' caní huödĕ' leyúbölö ca na' chibilĕ'eli'-nĕ' söhuójĕ' yehua' yubá.

### *Ta'böĕ' Matías para tsáziĕ' xilatjĕ' Judas*

<sup>12</sup> Ní'irö gula'zĕ'ĕ ga na' rö'ö guí'ado' na' nazí'i le Guí'a Yaga Olivo, ate' yöjhuójgaquiĕ' Jerusalén. Guí'ado' ni dĕ' gála'sö ga dĕ' Jerusalén, tsca nazí'gaquiĕ' lataj ta'zĕ'ĕ dza lá'ayi quégaquiĕ'. <sup>13</sup> Cate' bulu'dxinĕ' yödzö ni', gula'benĕ' ga naca buropi cuía lu yu'u, ga ni' ta'cu'ĕ Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inĕ' Alfeo, en Simón, bönni' na' ruí'í ladxĕ'ĕ ladzĕ', en Judas, böchĕ'ĕ Jacobo. <sup>14</sup> Yúgu'tĕ bönni' ni tu'lidzĕ' Dios tsözxön, ate' yugu' böchĕ'ĕ Jesús, en María, xinĕ'ĕ Jesús, en ia'zica'rönu nigula ca' núnagaquiĕ' légaquiĕ' tsözxön.

<sup>15</sup> La' dza ná'asö guzuínĕ' Pedro gatsaj láhui'lö ga nacu'ĕ böchi' luzá'aru' na' ta'yéajlĕ'ĕ Cristo. Gulaca idú ca xópalalaj bönachi nupa nudúbigaca ni'. <sup>16</sup> Pedro gudxĕ' légaquiĕ', rnnĕ':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnĕ' Dios Bö' Lá'ayi dza ni'tĕ, le buzúajĕ' David lu guichi, ca guca queĕ' Judas, bönni' na' guchĕ'ĕ nupa ni' gula'zön Jesús. <sup>17</sup> Judas na' gubábalenĕ' rĕ'u, en bĕnlenĕ' rĕ'u tsözxön dxin ni. <sup>18</sup> Gula'zí'inĕ' tu la' yĕla lazxaj que dö' na' bi'ĕ bönni' ni. Judas ni gubixĕ', en biröza' lĕ'ĕ, ate' bila'rúaj yúgu'tĕ le dzö'ö lĕ'ĕ. <sup>19</sup> Cate' bila'yöni bönachi nacuá' Jerusalén lĕ ni, gulu'ĕ le

la' yëla na' Acéldama, tu didza' hebreo le rnna lu didza' xidza': La' Yëla Rön. <sup>20</sup> Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',  
en biti' idzöli nu soa yu'u na'.

Rnna ca':

Nu yúbölö tsaza xilatjë'.

<sup>21-22</sup> 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacué'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

<sup>23</sup> Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo.

<sup>24</sup> Ní'irö bulu'lidzë' Dios, ta'nnë':

—Xantu' Dios, nunbë' casu' icja ládxi'do' gaca yúgu'të bönachi. Buluí'i netu' nulë' chopë' ni chiguró casu' Li' <sup>25</sup> para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunitië' xilatjë' tu' benë' dul-la', ate' guyijë' xilataj cazë' lataj chul-la.

<sup>26</sup> Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

## 2

### *Dios Bö' Lá'ayi ridisóalenë' légaquië'*

<sup>1</sup> Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo.

<sup>2</sup> Tsálido'os biyön bö le birúaj lúzxiba, le biyön ca riyön cate' recja bö' budunu', ate' biyön idütë lu yu'u ga na' rö'ögaquië'. <sup>3</sup> Bulu'lu'i lahui yugu' bululu guí'do' lu bö'ös lógaquië', ate' gula'guisi que queëgaquië'. Bidisóalengaca tu tuë'. <sup>4</sup> Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idütë yödzölió ni. <sup>6</sup> Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'të', en bulu'báninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? <sup>8</sup> ¿Nacxi caz naca riyöniru' tu'ë xtídza'ru' ca naca didza' ru'iru' tu turu'? <sup>9</sup> Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,

en luyú Mesopotamia, en luyú Judea, en luyú Capadocia,

en luyú Ponto, en luyú Asia,

<sup>10</sup> en luyú Frigia, en luyú Panfilia, en luyú Egipto,

en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. <sup>11</sup> Lësca' nacu'ë ni yugu' bönni' narúajgaquië' Creta, en luyú Arabia. Riyöniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

<sup>12</sup> Caní guca, bulu'báninë yúgu'të', en gula'bö'ë böniga. Gulë luzá'agaquië' tuë' ia'túë', ta'nnë':

—¿Bizxi caz lë ni?

<sup>13</sup> Bulu'titjë' bal-lë', ta'nnë':

—¡Ta'zúdxinë'!

*Libán benë' Pedro lógaca bönachi zían*

<sup>14</sup> Ní'irö Pedro guzuilenë' ia' chinéajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacua'ali' yödzö Jerusalén! ¡Lë ni ral-la' inözili'! ¡Buli'zë nágali' le guía' libí'ili'! <sup>15</sup> Netu' ni bití' rizúdxitu' ca na' réquili' libí'ili', tu' ni zóaru' si' gala' xsila, ate' cuntú nu rizudxi hora caní. <sup>16</sup> Lë ni naca le gunné' Joel, bönni' bë'ë didza' uláz queë' Dios, gunné':

<sup>17</sup> Caní rnnë' Dios: Lë ni le gaca dza tsöjsétëgaca.

Isöl-la' a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, iluí'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

<sup>18</sup> Cate' idxín dza ni' quísia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

<sup>19</sup> Ulu'a lahui lúzxiba xitsá' le ilún ga ulu'bani bönachi,

ate' yödzölió ulu'a lahui le ilaca bë',

rön, en guí', en dzön ca böaj.

<sup>20</sup> Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

<sup>21</sup> Ulu'lágaca yúgu'të nupa ni' ulu'lidza Lë' Xanru',

lu yöl-la' réajlë' quéguequi Lë'.

<sup>22</sup> 'Buli'zë nágali' lë ni guía' libí'ili', bönachi Israel. Dios caz benë' bal Jesús, bönni'

Nazaret ga zóali'. Dios bë'ë Lë' lataj benë' le tun ga rubániru', yugu' yöl-la' huáca, en le

taca bë'. Yúgu'të lë na' benë' Dios lu në'ë Jesús, ca na' chinöz quézili'. <sup>23</sup> Lësca' caní, Dios

bë'ë lataj nu budödi Jesús lu ná'ali'. Caní guca, ca na' chigunná ladxë'ë Dios gunë', en ca

naca le chibucözë' dza ni'te. Libí'i cázali' guzxönli'-në' Jesús, en bëtili'-në' lu ná'agaquië'

yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. <sup>24</sup> Ní'irö

Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-

la' guti na'. <sup>25</sup> Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda',

para cabí gaca nu bi gun quia'.

<sup>26</sup> Que lë ni na' budzeja ládxa'a,

ate' lu yöl-la' rudzeja quia' bil-la'.

Que lë ni na' guna' löza Lë'

cate' idxín dza gátia'.

<sup>27</sup> Xantu' Dios, nözda' bití' ucá'anú' neda'

lataj chul-la ga nacua' nupa nátigaca.

Bití' gu'u lataj initi idútë le naca'.

Naca' bönni' nadxí'i quézinu' Li'.

<sup>28</sup> Buzéajni'inu' neda' ca ral-la' guna'

para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

<sup>29</sup> 'Na'a, libí'ili', böcha'a. Naca bë' gútië' xuz xtó'oru' David, en bigáchë'ë yeru ba, ate'

ba queë' na' dë ga zóaru' ga ridxintë na'a dza. <sup>30</sup> David na' bë'ë didza' uláz queë' Dios, en

gunözinë' benë' tsutsu Dios didza' le guzxí' lu në'ë queë', gunë' ga galjë' Cristo ladaj di'a

dza queë' si' zá'gaca, ate' Cristo na' inná bë'ë xilatjë' David na'. <sup>31</sup> Tu' bilé'enë' David lë

ni zí'alö, bë'ë didza' ca guca, hubanë' Cristo, en ca guca, bití' bugá'anë' lataj chul-la ga

nacuá' nupa nátigaca, en biti' guniti le naca cazë'. <sup>32</sup> Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que. <sup>33</sup> Caní guca, len yöl-la' huáca queë', Dios buchisé' Lë' xitsá' ga ni' nácatërë' zxon. Na'a, Cristo chigusól-lë'ë Dios Bö' Lá'ayi ni, ate' raca ca na' guzxi' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyónili'. <sup>34</sup> Biti' buëpë' David na' yehua' yubá, pero lë cazë' David na' gunné': Xanru' Dios gudxë' Xana':

Gurö'i cuita lë'a ibëla ga naca lo

<sup>35</sup> cate' gunra' ga ulu'zechu zxi'bigaca nupa ta'dá'baga' Li' lo' Li'.

<sup>36</sup> Na'a, bönachi Israel, ral-la' inözili' le nácatë. Dios benë' ga náquië' Lë cazë' Jesús ni Xanru', en Bönni' Rusölá, bönni' na' budá'ali'-në' lë'e yaga cruz.

<sup>37</sup> Cate' yugu' bönni' ni' bila'yönnë' lë ni, gula'bö'ë böniga, ate' gulë' Pedro, en ia'zica'rë' bönni' gubáz queë' Cristo, ta'nnë':

—Böchi'ru', ¿nacxi gúntsatu'?

<sup>38</sup> Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isól-lë'ë Dios. <sup>39</sup> Queë'li' nequi le guzxi' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

<sup>40</sup> Yugu' didza' ni, en ia'bal-la zían didza' benë' ba nalí Pedro, le guchízië' icja nágagaquië', gunné':

—Guli'gún ga uláli', irúajli' ládjagaca bönachi tuá' dö' nacua' dza ni zóaru' na'a.

<sup>41</sup> Caní guca, gula'dila nisa nupa ni' gula'zì' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz. <sup>42</sup> Gulunë' yúgu'të idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'tué', en gulahuë' tsözxön le rusá' ládxi'ru' ca gútië' Jesús, ate' gulunë' tsözxön, bulu'lidzë' Dios.

### *Ca tun bönachi queë' Cristo*

<sup>43</sup> Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi. <sup>44</sup> Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi. <sup>45</sup> Cate' bila'lé'enë' ta'yadzaj nupa nútsa'gaca ládjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que quégaca nupa ni' bi ta'yadzaj. <sup>46</sup> Bulu'dubë' tsözxön chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ládxi'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

## 3

### *Ruhuöáquië' tu bönni' biti' raca së'ë*

<sup>1</sup> Tu dza ni' gula'benë' Pedro, en Juan, söjáquië' tsözxön lu chila yudo', cate' tu'dubi bönachi tu'lidza Dios ni', le naca idú ridödi xihuö. <sup>2</sup> Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'bëquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yue' lógaquië' bi ulu'nödztasë' queë'. <sup>4</sup> Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

<sup>5</sup> Ní'irö bönni' na' buzëda' náguië' légaquië' tu' runë' löza bi ulu'nödztasë' queë'. <sup>6</sup> Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

<sup>7</sup> Ní'irö gudélë'ë Pedro në'ë ibëla bönni' huë' na', en buchisë' lë', ate' la' böácatë ni'ë, en buguitaj bëchaj ni'ë bönni' na'. <sup>8</sup> Ní'irö guzuínë' bönni' na', ate' guxíti'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixíti'ë, en rigu'ë Dios yöl-la' ba. <sup>9</sup> Yúgu'të bönachi nacuá' ni' ta'lé'e lë' rizë'e ni'ë, en rigu'ë Dios yöl-la' ba. <sup>10</sup> Caní guca, guládxinë', en bulu'báninë ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödztasö queë'.

### *Didza' bë'ë Pedro chila yudo'*

<sup>11</sup> Tsanni ni' bönni' na' bití' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. <sup>12</sup> Cate' bilé'enë' Pedro lë ni, gudxë' bönachi na':

—Libí'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' netu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxi'tu'-në' Dios? <sup>13</sup> Naca lë ni le benë' Dios. Náquië' Dios quégaquië' xuz gudödi queëru' Abraham, en Isaac, en Jacob. Lë cazë' béntërë' bal Jesús, Zxí'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'. <sup>14</sup> Buzóali' tsólá'alö Bönni' Tsahui', en Lá'ayí, ate' gunábili'-në' Pilato usanë' queéli' tu bönni' rútië' bönachi. <sup>15</sup> Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. <sup>16</sup> Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

<sup>17</sup> 'Na'a, böcha'a, nözda' benli' caní, bëtili'-në' Jesús tu' cabí guyéajni'ili', en bití' gula'yéajni'inë' bönni' ta'nná bé'enë' libí'ili'. <sup>18</sup> Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo. <sup>19</sup> Que lë ni na', buli'bí'i ládxi'li', en buli'huóaca queë' Dios, para ugüë' dul-la' nabága'li', en gunë' ga huóaca ládxi'li'. <sup>20</sup> Ní'irö isöl-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. <sup>21</sup> Na'a, run bayudxi ugá'anë' yehua' yubá ni' cate' idxinrö dza uduhuénë' tsahui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. <sup>22</sup> Lësca' caní Moisés gudxë' xuz xtó'oru', gunné': "Xanru' Dios isöl-lë'ë queéli' tu bönni' galjë' ladjagaca di'a dza queéli'. Gáquië' bönni' gu'ë didza' uláz queë' Dios. Isöl-lë'ë Lë' queéli' ca na' gusöl-lë'ë neda'. Run bayudxi uzë' nágali'-në' ca naca yúgu'të le guíë' libí'ili'. <sup>23</sup> Yúgu'të nupa bití' ulu'zë' nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

<sup>24</sup> 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. <sup>25</sup> Libí'ili' nácali' zxi'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tsahui', le bënlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú' ilaca bica' ba yúgu'të bönachi yödztölió." <sup>26</sup> Cate' Dios busubanë' Zxi'inë' lu yöl-la' guti, gusöl-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxi'a runli'.

## 4

### *Ta'dxinë' Pedro, en Juan lógaquië' bönni' yudo' tu'chi'a tu'söröë'*

<sup>1</sup> Tsanni ni' bönachi na' tu'ílenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë. <sup>2</sup> Gula'lenë' bönni' ni tu' tu'sédinë' Pedro, en Juan, bönachi, en tē' léguequi ulu'bán nupa chinátigaca tu' bubanë' Jesús. <sup>3</sup> Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzö' dza na'. <sup>4</sup> Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguíú'sö ta'yéajlë'ë Cristo nácaquië' idú chi-un gáyu'ë.

<sup>5</sup> Dza buropi ni', yugu' bönni' unná bē', en bönni' gula tu'zėjni'inē' bönachi judío, en yugu' bönni' yudo' usēdi, bulu'dubē' lu yödzo Jerusalén. <sup>6</sup> Lēasca' Anás, bixúz lo, en Caifás, en Juan, en Alejandro, enca' yúgu'tē bönni' di'a dza quégaquiē' bixúz lo bulu'dubē' ni'. <sup>7</sup> Ní'irō duché'gaquiē' Pedro, en Juan, ate' bulu'sudxinē' légaquiē' gatsaj láhui'lō ga na' nacu'ē, en gula'nábinē' légaquiē', ta'nnē':

—¿Bizxi yöl-la' unná bē' dē lu ná'ali' runli' lē ni? ¿Nuzxi budödi lu ná'ali' yöl-la' unná bē' ni?

<sup>8</sup> Ní'irō Pedro gudxē' légaquiē', zóalenē' Dios Bö' Lá'ayi lē', rnnē':

—Libi'ili', núlöli' rinná bē'eli' netu', bönachi Israel, en libi'ili', bönni' gula. <sup>9</sup> Na'a, ¿rinábitseli' netu' ca naca dxin dxi'a bentu' queē' bönni' huē' ni, en nacxi guca, böáquiē' bönni' ni? <sup>10</sup> Riguíxjöi'itu' libi'ili' para ila'nözi yúgu'tē bönachi Israel. Zoē' bönni' ni loli', nuhuöáquiē' tu' ben dxin yöl-la' huáca queē' Jesucristo, bönni' Nazaret, Bönni' ni' budá'ali'-nē' lē'e yaga cruz, pero Dios busubanē' Lē' lu yöl-la' guti. <sup>11</sup> Dios bē'ē didza' ca naca queē' Jesús ni, cate' ni' gunné': "Libi'ili', bönni' rucuá'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö." <sup>12</sup> Cúnturö nu zoa nu gaca usölá bönachi, tu' cabí zoa yödzo'lió ni ia'tuē' bönni' nuzöē' Dios, nu gaca usölá rē'u.

<sup>13</sup> Cate' bila'lē'enē' nácagaquiē' rugu ladxi' Pedro, en Juan, en guléquibe'enē' biti' nazédagaquiē' que yudo', en nácagaquiē' bönni' cá'asö, bulu'bábinē', ate' yöjnéguequinē' Pedro, en Juan na', gula'cuá'lenē' Jesús. <sup>14</sup> Lēasca' bila'lē'enē' bönni' na' böáquiē', zuínē' lógaquiē', ate' biti' guca bi ila'nnē' quégaquiē'. <sup>15</sup> Ní'irō gula'nná bē'enē' nupa ulu'béaj légaquiē' lö'alö yu'u ga na' nudúbigaquiē', ate' gulún xtídzē'ē la' légacasē'. <sup>16</sup> Gula'nnē':

—¿Nacxi gúntsaru' quégaquiē' bönni' ni? Le nácate' gulunē' tu le run ga tu'bani bönachi, ate' nözigaca yúgu'tē bönachi nacuá' Jerusalén lē ni. Biti' gaca tá'baga'ru' le. <sup>17</sup> Na'a, para cabí sērö didza', en ila'yöni zíanrö ca' bönachi, uzeru' bach légaquiē' para cabí ilu'ilenrē' bönachi didza' ca naca queē' Jesús na'.

<sup>18</sup> Ní'irō bulu'lídzē' Pedro, en Juan, ate' bulu'zenē' bach légaquiē' para cabí ilu'ilenrē' bönachi didza', en para cabí ulu'sédinē' légaquiē' ca naca queē' Jesús. <sup>19</sup> Ní'irō bulu'bi'ē didza' Pedro, en Juan. Gulé' légaquiē':

—Buli'chi'a buli'sörö libi'ili' channö naca tsahui' lahuē' Dios uzērö nágatu' xtídzali' libi'ili' ca xtídzē'ē Dios. <sup>20</sup> ¡Biti' gaca soa dxitu'! ¡Run bayudxi gü'itu' didza' que le bilé'etu', en le biyönitu'!

<sup>21</sup> Ní'irō yugu' bönni' yudo' tu'chi'a tu'söröē' bulu'zenē' bach légaquiē', pero bulu'sanē' légaquiē' tu' cabí gula'dzölinē' nacxi ilunē' légaquiē' xíguia'. Caní gulunē' tu' guládxinē' le ilún bönachi lu yödzo ni', tu' ta'gú'u Dios yöl-la' ba ni'a que lē na' guca. <sup>22</sup> Bönni' na' böáquiē', en guca queē' lē na' run ga rubániru', chiyú'urē' ca choá' iz.

### *Ta'nábinē' Dios gunē' ga ilácagaquiē' rugu ladxi'*

<sup>23</sup> Cate' bönni' yudo' bulu'sanē' Pedro, en Juan, böajgaquiē' ga na' nacu'ē luzá'agaquiē', ate' bulu'siyönnē' légaquiē' yúgu'tē lē na' gula'nnē' yugu' bixúz unná bē', en bönni' gula tu'zėjni'inē' bönachi judío. <sup>24</sup> Cate' bila'yönnē' lē ni, bulu'lídzē' Dios tsözxön, gula'nnē':

—Xantu' Dios, ¡zxöntērö nacu' Li'! ¡Li' nacu' Dios! ¡Benu' lúzxiba! ¡Benu' luyú! ¡Benu' nísado'! ¡Benu' yúgu'tē le nacuá' tu tu lataj na'! <sup>25</sup> Uláz quiu' Li' bē'ē didza' David, bönni' huen dxin quiu', ni' zóalenē' Dios Bö' Lá'ayi lē', gunné':

¿Bizx que tun dzatsa bönachi,  
en ta'zá' ládxi'gaca le ruá' dö'?

<sup>26</sup> Yugu' bönni' ta'nná bē'ē yödzo'lió ni gulún dzatsē',  
ate' guláquiē' tuz bönni' unná bē'.

Gula'dá'báguē'ē Xanru' Dios,  
enca' Cristo, bönni' gurö cazē' Lē'.

<sup>27</sup> Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödö ni. Gula'dá'báguë'ë Jesús, Zxí'inu' lá'ayi, Bönni' na' buzú' queëtu'.  
<sup>28</sup> Gulunë' yúgu'të le bucözu' zí'atëlö, en guzxí' lu no'o, ate' guca ca na' benu' tsutsu xtídzu'u ca ral-la' gaca. <sup>29</sup> Na'a, Xantu', buyú le tu'zenë' bach netu', en ben ga gácatu' rugu ladxi', para güi'itu' xtídzu'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

<sup>31</sup> Cate' budxi bulu'lidzë' Dios, guxzizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

### *Tu'únë' tuz le dë quégaquië'*

<sup>32</sup> Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' nútsë'ë ládjagaquië' nequi queëzë' le dë queë', pero bulu'únë' tuz le dë quégaquië'. <sup>33</sup> Len yöl-la' huáca zxön gula'guíxjö'ë gubáz na' nasöl-lë'ë Xanru' Jesús ca bubané' Lë', ate' le buzá' ládxi'ë Dios quégaquië' gúcalen yúgu'të'. <sup>34</sup> Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', <sup>35</sup> en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guisië' le que queégaca nupa bi biyadzaj quéguequi. <sup>36</sup> Zoë' José ni', bönni' bulu'zóë' gubáz na' nasöl-lë'ë Cristo ia'tú lë' Bernabé, le rnna lu didza' xidza', Bönni' Ruhue' Tsáhuë'ë. Nabábalenë' zxi'ini xi'sóë' Leví, en guljé' luyú Chipre. <sup>37</sup> Bëti'ë bönni' ni tu cö' xiyué', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

## 5

### *Dul-la' gulunë' Ananías, en Safira*

<sup>1</sup> Tu bönni' yúbölö lë' Ananías, bëti'ë tu cö' xiyué'. Safira, nigula queë', benu tsözxön lë'. <sup>2</sup> Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsca nisö guzxí'a.

<sup>3</sup> Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizi' yé'enu' Dios Bö' Lá'ayi, ate' bucachi' lanu' late' dumí que xiyú' na'? <sup>4</sup> Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxí' yé'enu', calégasö bönachi.

<sup>5-6</sup> Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chólibi' lë' lari', en gulu'á'abi' lë', en yöjchá'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

<sup>7</sup> Ca tsonna hora gudödi ni', bidxinnu nigula queë' Ananías na' ni', en biti' nözinu lë na' guca queë' bönni' queënu. <sup>8</sup> Ní'irö Pedro gudxë'-nu:

—Gudíxjöi'i neda'. ¿Naru' guzxí'ili' tsca nisö xiyuli' na'?

Gunnánu:

—Ön, tsca nisö guzxí'itu'.

<sup>9</sup> Ní'irö Pedro gudxë'-nu:

—¿Bizx que ben tuz xtídzá'li' guzxí' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

<sup>10</sup> Ní'irö la' gudzö'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjchá'gacabi'-nu cuita lë'ë bönni' queënu. <sup>11</sup> Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

### *Tunë' bönni' gubáz nasöl-lë'ë Cristo le taca bë'*



<sup>12</sup> Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxon lógaca bönachi lu yödzö. Yúgu'të' bulu'dubë' tsözxön ga naca chila yudo' nazí'i le Chila Queë' Salomón. <sup>13</sup> Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal. <sup>14</sup> Ní'irö ia'bal-la bönachi zían ca' gula'yéajlë' Cristo, bönni', en nigula. <sup>15</sup> Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xöë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca. <sup>16</sup> Lësca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'téguequi.

*Bönni' yudo' ta'bía ládxi'gaquië' bönni' gubáz nasöl-lë'ë Cristo*

<sup>17</sup> Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guíë. <sup>19</sup> Ní'irö bidxinë' gubáz lá'ayi queë' Xanru' chí'i dzö'ölö, ate' gusaljë' lidxi guíë na', en bubéajë' légaquië'. <sup>20</sup> Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení zílado', en bulu'sédinë' bönachi.

La' ní'isö bulu'dubë' bixúz lo, en nupa nacuá'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guíë para tsöjxí'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guíë na'. <sup>22</sup> Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guíë na', ate' ní'irö bulu'huóajë' tsöjtíxjö'gaquië' ca'. <sup>23</sup> Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacuá' nupa tun chí'i ra' lidxi guíë na', pero cate' gusalajtu', cuntu nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná'bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca. <sup>25</sup> Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali-në' lidxi guíë nacu'ë chila yudo' tu'sédinë' bönachi.

<sup>26</sup> Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ládxi' bönachi nacuá' ni' légaquië' guíöj. <sup>27</sup> Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

<sup>28</sup> —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idútë yödzö Jerusalén, en rë'ënili' usubága'li' netu' xíguia' tu' nözi yöl-la' gutí queë' bönni' na'.

<sup>29</sup> Ní'irö bulu'bi'ë didza' Pedro, en ia'zíca'rë' gubáz na' nasöl-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídzagaca bönachi. <sup>30</sup> Libí'ili' bétili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. <sup>31</sup> Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. <sup>32</sup> Ca naca lë ni, runtu' netu' ba nalí que, ate' lësca' runë' Dios Bö Lá'ayi ba nalí que, Bö' na' risöl-lë'ë Dios quégaca nupa tun ca rnna xtídzë'ë.

<sup>33</sup> Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'. <sup>34</sup> Ní'irö guzuínë' tu bönni' yudo' ruchí'a rusöröë' lógaquië', lë' Gamaliel, tu

bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasól-lë'ë Cristo ló'aló tu chí'ido'. <sup>35</sup> Ní'irö gudxë' bönni' yudo' tu'chi'a tu'söröë' na', gunné':

—Libi'ili', bönni' Israel, buli'yutëz queëli' ca naca le ré'ënili' gunli' quégaquië' bönni' ni. <sup>36</sup> Ral-la' tsöjnéli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtëre'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'. <sup>37</sup> Gudödi guca lë' ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yöjtá'gaca lë'. <sup>38</sup> Que lë' ni na' rea' libi'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi lë' ni ta'nnë' o lë' ni tunë', initi caz, <sup>39</sup> pero channö naca queë' Dios, biti' gaca usunítili' le. ¡Buli'yú cuinli' cabí tíl-lalenli'-në' Dios!

<sup>40</sup> Ní'irö gulunë' tuz didza' len lë'. Bulu'lidzë' yugu' gubáz na' nasól-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'. <sup>41</sup> Bila'rúajë' gubáz na' nasól-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'gu'i gula'záquë'ë tu' dá'gaquië' Jesús. <sup>42</sup> Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

## 6

### *Ta'böë' gadxi bönni' para ilácalenë' bönachi queë' Cristo*

<sup>1</sup> Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntu nu ru'i le ilágunu nigula uzëbi quégaquië' bönni' ni' tu'ë didza' griego. <sup>2</sup> Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. <sup>3</sup> Que lë' ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. <sup>4</sup> Netu' ni ulídzatica'stu'-në' Dios, en uséditu' bönachi xtídzë'ë Dios.

<sup>5</sup> Yúgu'të' gula'yaza ládxí'gaquië' didza' ni, ate' gula'böë' Esteban, tu bönni' réajlë'ë Cristo idú ládxë'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquia, bönni' zí'aló butsé'ë ca runë' para tseaj ládxë'ë Dios ca tunë' yugu' bönni' judío. <sup>6</sup> Ní'irö bulu'sudxinë' bönni' na' gula'böë' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

<sup>7</sup> Guzëro xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

### *Ta'zönë' Esteban*

<sup>8</sup> Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' ládxë'ë queë'. <sup>9</sup> Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sëdë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandría, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'. <sup>10</sup> Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. <sup>11</sup> Ní'irö gula'guíxjë' bönni' ila'zí' yë'ë, ila'nnë': “Netu' biyónitu' didza' ru'ë Esteban ni, rnnë' zí'ë queë' Moisés, en queë' Dios.” <sup>12</sup> Caní

guca, bönni' ni gula'gu'ë xilá ládxi'gaca bönachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'. <sup>13</sup> Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zi'ë que yudo' lá'ayi ni, en que xibá queë' Dios. <sup>14</sup> Biyöñitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalébiru' runru', yugu' lë' na' gunná bé'enë' Moisés rë'u.

<sup>15</sup> Ní'irö bönni' yudo' tu'chi'a tu'söröë', en yúgu'të nupa rő'gaca ni' bulu'yúë' Esteban, ate' bila'lë'enë' lahuë', rna' ca rna' lahuë' tu gubáz lá'ayi queë' Dios.

## 7

### *Didza' bë'ë Esteban, le gunnë' uláz queë'*

<sup>1</sup> Ní'irö bixúz lo gunábinë' Esteban na', rnnë':

—¿Naru' nácatë caní?

<sup>2</sup> Bubi'ë didza' Esteban, rnnë':

—Libi'ili', bönni' gula, en libí'ili', böcha'a. Buli'zë nágali' le guía' libí'ili'. Dios, Bönni' nayëpisëtërë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzö Harán. <sup>3</sup> Dios gudxë' lë': “Birúaj ladzu', en bulá'alén di'a dza quiu', ate' guyéaj luyú ni' uluí'ida' lí'.” <sup>4</sup> Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsöë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni' zóaru' na'a. <sup>5</sup> Dios biti' bë'ë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxí' lu në'ë Dios unödzejë' queë' luyú ni, ate' tödi gátië' Abraham guequi luyú ni quégaca xzí'ini xi'söë', sal-la' biti' nacu'inibi' bi'i queë'. <sup>6</sup> Lësca' caní Dios gudxë' Abraham: “Tsöjáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz.” <sup>7</sup> Lësca' Dios gudxë' lë': “Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tödi ni' ulu'rúajë' ni', ate' ilunë' xichina' luyú ni.” <sup>8</sup> Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë' na' naca bë'. Isaac na', lësca' caní benë' queë'bi' bi'i Jacob, xzí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

<sup>9</sup> Yugu' xuz xtó'oru' na', lu yöl-la' ruzxë'e quégagaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' <sup>10</sup> en busölë'-bi' lu le gulaca queë'bi'. Dios bë'ë-bi' yöl-la' réajni'i, le ben ga guyaza ládxe'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

<sup>11</sup> Ní'irö gúcada' gubín idú luyú Egipto, en luyú Canaán ni, ate' gula'guí' gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. <sup>12</sup> Cate' biyöñnë' Jacob dë zxoa' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'. <sup>13</sup> Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José. <sup>14</sup> Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. <sup>15</sup> Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que quégagaquië'. <sup>16</sup> Cate' gulátië' tu tu xuz xtó'oru', xzí'ini xi'sóagaquië'

yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zxan bulóaj na' gú'uë' Abraham lu ná'agaca zxi'inë' Hemor, bönni' Siquem na'.

17 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. 18 Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. 19 Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ënido' que queégaquië', para ilátibi'. 20 La' dza ní'isö gúljabí ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. 21 Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula zxi'inë' Faraón ga ni' bulu'cá'anë'-bi', ate' yöjzxi'inu-bi', en buscúluunu-bi' ca bi'i que cázanu. 22 Caní guca, bizédabi' bi'i Moisés yúgu'të le táquië' bönni' Egipto, en gúcatërobí' zxon ca naca didza' bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel. 24 Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-në' bönni' uládz queëbi' na', en bëtibi'-në' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'. 25 Gúquibi' Moisés huala'yéajni'inë' bönni' böchi'bi' gunë' Dios ga usölábi' lë cázabi' légaquië', pero légaquië' biti' gula'yéajni'inë'. 26 Ia'tú dza ca' yöjxáca'bi' ia' chopë' bönni' Israel, ta'dil-lë', ate' gú'unibi' cuéqui dxibi' légaquië', en gúdxibi' légaquië': "Libí'ili', böchi'li' naca. ¿Bizx que ruá'ali' luzá'ali' dö'?" 27 Ní'irö bönni' na' ru'ë dö' que luzë'ë budxiguë'ë-bi' bi'i Moisés, gunné': "¿Núzxitë buzóa li' para inná bé'enu' netu', en uchi'a usöröu' le runtu'?" 28 ¿Naru' ré'ënitsenu' gútiu' ca' neda' ca benu' néaje, bëtü'-në' bönni' Egipto na'?" 29 Cate' Moisés biyönibi' didza' ni, buzxúnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'aleni'-nu nigula lu yödzö ni', ate' gúl jagacabi' chópabi' bi'i bönni' queë'.

30 'Cate' chigudödi choá' iz zoë' ni', buluí'lahuë' tu gubáz lá'ayi queë' Dios ga zoë' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí. 31 Cate' Moisés bilé'enë' guí' na', bubáninë', ate' gubígüi'ë gala' para ilé'enë' dxi'a, ate' biyönnë' chi'ë Xanru'. 32 Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxi'xidë'ë Moisés, en bíti'rö burúguinë' uyúë'. 33 Xanru' gudxë' lë': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni. 34 Le nácate' chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxi yeche'. Bötja', zoa' ni para usölá' légaquië'. Gudá na'a, isöl-la'a li' luyú Egipto."

35 'Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxitë buzóa li' para inná bé'enu' netu', en uchi'a usöröu' le runtu'?" Dios gusöl-lë'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate' buluí'lahuë' lu yaga yötsi'do' régui ga na' zoë'. 36 Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. 37 Lë' cazë' Moisés na' gudxë' bönachi Israel ni', gunné': "Xanru' Dios isöl-lë'ë queëli' tu bönni' galjë' ladaj di'a dza queëli', ate' gáquië' bönni' gu'ë didza' uláz queë' Dios. Isöl-lë'ë lë' queëli' ca na' gusöl-lë'ë neda'. Lë' cazë' run bayudxi uzë nágali'-në'." 38 Lësca' lë' cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguie' gubáz lá'ayi queë' Dios lë', Nu na' bë'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca zxi'ini xi'sóagaquië' ga ridxintë queëru' rë'u.

<sup>39</sup> Biti' gulé'ënnë' xuz xtó'oru' ilunë' ca rnna xtídzë'ë Moisés, pero bulu'zöë' lë' tsölá'alö, en gulé'ënnë' tsöjhuöjgaquië' luyú Egipto. <sup>40</sup> Cate' ni' zoë' Moisés na' lu guí'a Sinaí na', légaquië' gulé' Aarón, böchë'ë Moisés na', gula'nnë': "Rë'ënitü' gunu' yugu' dios queëtu', tu budó' guië, para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto." <sup>41</sup> Ní'irö gulunë' tu budó' oro le naca ca tu bëdxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'. <sup>42</sup> Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni'

bëtigacali'-ba', en buzégui'gacali'-ba',

lë na' benli' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda',

pero biá'ali' le nequi que Moloc, budó' guiöj queëli'.

Biá'ali' ca' tu le naca ca böläj lúzxiba nazí'i le Refán,

lë na' buzóali' ca dios queëli'.

Yugu' budó' guiöj budó' yaga ni,

la' libí'isili' benli' para guyéaj ládxi'li' léguequi.

Que lë ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

<sup>44</sup> 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluí'inë' Dios lë' lu guí'a ni'. <sup>45</sup> Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'guë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David. <sup>46</sup> Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. <sup>47</sup> Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios. <sup>48</sup> Caní benë' sal-la' biti' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

<sup>49</sup> Yehua' yubá naca ga rö'a rinná bë'a,

ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?

¿Naru' zóatsö tu lataj ga ral-la' uzí ládxa'a?

<sup>50</sup> ¿Naru' cabí len na'a caza' bena' yúgu'të lë ni?"

<sup>51</sup> Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágalí'. Nazidi icja ládxi'do'olí' ca raca quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. <sup>52</sup> Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'alö ca ral-la' guidé' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni' gulútië' Lë'. <sup>53</sup> Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rnna.

### *Tútië' Esteban*

<sup>54</sup> Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. <sup>55</sup> Ní'irö buyüë' Esteban na' lúxibalö, ate' zóalenë' Dios Bö' Lá'ayi lë', bilé'enë' lataj bení ga zoë' Dios, enca' Jesús, zuinë' cuita lë'ë ibëla Dios ga nayëpisëtëre'. <sup>56</sup> Ní'irö gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

<sup>57</sup> Ní'irö bönni' yudu' tu'chi'a tu'söröë' na' bulu'sayaj nágagaquië'. Gula'bödxi'ë zidzaj, en tsözxön gula'bía di'ë Esteban na'. <sup>58</sup> Bulu'béajë' lë' ní'ilö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj. <sup>59</sup> Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

<sup>60</sup> Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

## 8

### *Saulo ribía ládxë'ë bönachi queë' Cristo*

<sup>1-3</sup> Saulo benë' tsözxön yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yöjçáchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxi'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guié.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légasasë' gubáz na' nasöl-lë'ë Cristo bulu'gá'anë' Jerusalén.

### *Raca libán que didza' dxi'a luyú Samaria*

<sup>4</sup> Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a.

<sup>5</sup> Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. <sup>6</sup> Bulu'dubë' yugu' bönni' ni', ate' idú ládxi'gaquië' bulu'zë nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. <sup>7</sup> Caní guca, tu' benë' ga bulu'rúaj zían bö' xihui' yú'ugaca bönachi, ta'bödxi'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca.

<sup>8</sup> Caní guca, bulu'dzeja bönachi yödzö ni'.

<sup>9</sup> Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guxzí' yé'enë' bönachi Samaria na', gunné' lë cazë' náquië' bönni' nayépisëtë're'. <sup>10</sup> Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxön queë' Dios." <sup>11</sup> Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' unë ya'a queë'.

<sup>12</sup> Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. <sup>13</sup> Ní'irö guyéajlë'ë ca' Simón na', en bidilë' nisa, ate' gudá'entica'së' tsözxön Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáninë' Simón na'.

<sup>14</sup> Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'. <sup>15</sup> Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. <sup>16</sup> Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. <sup>17</sup> Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

18 Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quixjé' légaquië' dumí, 19 ate' rë' légaquië':

—Benna ca' yöl-la' huáca ni quia', para cate' ixóa na'a núti'tës bönachi, idisóalenë' Dios Bö' Lá'ayi nu na'.

20 Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios.

21 Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. 22 Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u. 23 Réquibe'eda' nabágu'u xíguia', en nadzunu' lu yalaj que tu' xihui'.

24 Ní'irö bubí'ë didza' Simón na', rë' légaquië':

—Buli'ldzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

25 Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuöjgaquië' Jerusalén.

### *Felipe, en tu bönni' Etiopía*

26 Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajjé'. La' nöza ni' yöjtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijé' Jerusalén bönni' ni para guyéaj ládxi'ë Dios. 28 Na'a, söhuöjé' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios.

29 Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

30 Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

31 Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntú nu zoa uzéajni'i neda'?

Ní'irö gúta'yuë' lahuë' Felipe cuenë', en cö'lenë' lë' tsözxön lu carreta na'.

32 Lë na' nazúaj lu guichi rulabë', rnna caní:

Ca bö'cu' zxíla'do',

gula'ché'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

33 Bulu'cá'anë' Lë' cá'asö,

en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

34 Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

35 Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús. 36 Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

<sup>37</sup> Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquile' bönni' huödx na' nisa. <sup>39</sup> Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bíti'rö bilé'enë' lë'. Ní'irö buguélë'ë xinözë', söhuöjë' rudzéjanë'. <sup>40</sup> Cate' chiréquië'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

## 9

### *Saulo ruhuöáquië' queë' Cristo*

<sup>1</sup> Ní' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sédë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén. <sup>3</sup> Tsanni ni' yú'ugaquië' nöza Saulo, en nupa nacuá'len lë', söjáquië', en cate' chizóa ila'dxinë' Damasco, tsárido'os buzeni'da' tu bení' za' lúzxiba, le buzeni' ga ni' söjáquië'. <sup>4</sup> Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

<sup>5</sup> Saulo gunábinë' Lë', gunné':

—¿Nuzxi li', Xan?

Lë' gunné':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queéba' bédxi, run zi' cuinba' richégu'ba' yaga tuchi' túndë'ë-ba' zi'.

<sup>6</sup> Ní'irö Saulo guxzízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu guíë li' le ral-la' gunu'.

<sup>7</sup> Guládxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lé'enë'. <sup>8</sup> Ní'irö böasë' Saulo luyú, en cate' guxá' guiöj lahuë', biti' ca' rilé'enë'. Que lë ni na' gula'guélë'ë në'ë, en gula'chë'ë lë' Damasco. <sup>9</sup> Guzóë' ni' tsonna dza nachul-la lahuë', en biti' bi güi'i gudahuë'.

<sup>10</sup> Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubi'ë didza', gunné':

—Ni zoa', Xan.

<sup>11</sup> Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. <sup>12</sup> Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóálaj guiöj lahuë'.

<sup>13</sup> Ní'irö bubi'ë didza' Ananías, ré' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacuá' Jerusalén. <sup>14</sup> Zë'ë ca' ni, dë lu në'ë uláz quégaquië' bixúz unná bë' sönnë' yúgu'të nupa tu'lidza Dios len Lo' Li'.

<sup>15</sup> Ní'irö Xanru' ré' Ananías na', rnnë':

—Guyéaj, tu' guró caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. <sup>16</sup> Ulu'ida' lë' le zían le qui'i sáquë'ë uláz quia' neda', gunë' xichina'.



<sup>17</sup> Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahuí la' nōza ga ni' zo'o, gusöl-lë'ë neda' para huóalaj guiöj lo', en idisóalenë' Dios Bö' Lá'ayi li'.

<sup>18</sup> La' ní'isö gula'guínnaj le naca ca xilácuba' böla lu guiöj lahuë', ate' la' böáljatë guiöj lahuë'. Ní'irö guyasë' Saulo, en bidilë' nisa. <sup>19</sup> Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

### *Runë' libán Saulo lu yödzo Damasco*

<sup>20</sup> La' gusílotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sedë' queë' Dios, rnnë':

—Jesús náquië' Zxí'ini cazë' Dios.

<sup>21</sup> Bulu'bánninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

<sup>22</sup> Bidíparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

### *Rulë' Saulo lu ná'agaquië' bönni' judío*

<sup>23</sup> Cate' chigudödi zían dza, gulún xtídza'gaquië' bönni' judío nacu'ë ni' ilútië' Saulo.

<sup>24</sup> Rëla, en tē dza gula'bö' nísie' yugu' bönni' judío ga nu ridödi lu zö'ö run chí'i yödzo na' para ilútië' lë', pero gúquibe'enë' Saulo le té'ennë' ilunë' queë'. <sup>25</sup> Ní'irö yugu' bönni' ta'yéajlë'ë Cristo gula'guélë'ë Saulo chí'i dzö'ölö, ate' gula'gu'ë lë' tu lu ga'böra zxon naga' du, en bulu'zötjé' lë' ní'ilö lu zö'ö run chí'i yödzo na'.

### *Rudxinë' Saulo Jerusalén*

<sup>26</sup> Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. <sup>27</sup> Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nōza, ate' Xanru' caz bé'lenë' lë' didza', en ca na' benë' Saulo lu yödzo Damasco, len yöl-la' rugu ladxi' benë' libán ca naca queë' Jesús. <sup>28</sup> Ní'irö Saulo guzóalenë' légaquië' lu yödzo Jerusalén, ate' gudálenë' légaquië' tsözxön. <sup>29</sup> Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquibe'enë' böchi'ru' ta'yéajlë'ë Cristo lë'ni, gula'ché'ë Saulo lu yödzo Cesarea, ate' gula'söl-lë'ë lë' yödzo Tarso, le naca ladzë' Saulo.

<sup>31</sup> Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxí'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

### *Pedro ruínë' tu bönni' lë' Eneas*

<sup>32</sup> Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzo Lida. <sup>33</sup> Yöjxáquië' tu bönni' ni' lë' Eneas, chiguca xunu' iz dë' ré'enë', nacú'unië' bin. <sup>34</sup> Pedro gudxë' lë':

—Eneas, Jesucristo ruínë' li'. Guyasa, en butubi xto'o.

La' guyásatë' Eneas na'. <sup>35</sup> Yúgu'të nupa nacuá' yödzo Lida, en yödzo Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

### *Rátinu Dorcas, en rubannu*

<sup>36</sup> Ia'stú le guca, lu yödzo Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le nácagaca dxi'a le tácalen bönachi yechi'.

<sup>37</sup> Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. <sup>38</sup> Tu' dë yödzo Lida gála'sö ga na' dë yödzo Jope, ga na'

zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queëtu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu. <sup>40</sup> Ní'irö Pedro bubéajë' ní'ilö yúgu'të nupa nacuá' ni', ate' buzóa zxibë', rulidzë' Dios. Ní'irö buécjë' ga dënu Dorcas na', gunnë':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu. <sup>41</sup> Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë ni guzë didza' idú lu yödzö Jope, ate' gula'yéajlë' bönnachi zían Xanru' Jesús. <sup>43</sup> Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

## 10

### *Le benë' Pedro lidxë' Cornelio*

<sup>1</sup> Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i lágaquië' Bönni' Italia Röjáquië' Gudil-la. <sup>2</sup> Cornelio na' reaj ládxë'ë Dios, en rádxinë' Lë', ate' yúgu'të bönnachi nacuá' lidxë' núngaca lë' tsözxön. Runödzejë' Cornelio dumí zían le rácalen bönnachi yechi', en rulídzatica'së' Dios. <sup>3</sup> Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

<sup>4</sup> Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönnachi yechi'. <sup>5</sup> Na'a, gusöl-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. <sup>6</sup> Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

<sup>7</sup> Cate' chibuzë'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguië' bönnachi nacuá' lidxë' Cornelio. <sup>8</sup> Cate' budxi busiyönnë' légaquië' yúgu'të le guca, gusöl-lë'ë légaquië' yödzö Jope.

<sup>9</sup> Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza. <sup>10</sup> La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal. <sup>11</sup> Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. <sup>12</sup> Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xíligacaba'.

<sup>13</sup> Ní'irö biyönnë' chi'i nu rë' lë':

—Pedro, guyasa. Bëti-gacaba', en gudagu.

<sup>14</sup> Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

<sup>15</sup> Le buropi luzuí biyönnë' chi'i nu na' gudxi lë':

—Le nunë' Dios dxi'a, bití' innó' que: “Bití' naca dxi'a.”

<sup>16</sup> Tsonna luzuí guca caní, ate' ní'irö la' buëpitë' lari' zxön na' lúzxiba. <sup>17</sup> Tsanni ni' rö'ë bönniga Pedro, rizá' ládxë'ë bizxi sa'yéaj lë' na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'. <sup>18</sup> Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu

bönni' lë' Simón ni', zoa ia'tú lë' Pedro. <sup>19</sup> Tsanni ni' rizá láchxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljé' li'. <sup>20</sup> Guyaschi na'a, en bötaj zxan yu'u. Biti' gaca chopa láchxu'u tséajlenu' légaquië', tu' nasól-la'a neda' yugu' bönni' ni.

<sup>21</sup> Ní'irö bötjé' Pedro zxan yu'u ga na' nacu'ë bönni' na' nasól-lë'ë Cornelio, en gudxë' légaquië':

—Neda' bönni' ruguílajli'. ¿Bizxi huen zá'ali' ni?

<sup>22</sup> Bulu'bi'ë didza', tē' lë':

—Cornelio, tu bönni' rinná bé'enë' bönni' röjáquië' gudil-la, nasól-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isól-lë'ë nu udulídza li' guídu' lidxë' para yönnë' didza' gu'u.

<sup>23</sup> Ní'irö Pedro gulu'ë légaquië' lu yu'u, en bē'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxón.

<sup>24</sup> Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzé'ë nadxí'irönë' lidxë'. <sup>25</sup> Cate' guyázië' Pedro lö'a, birúajé' Cornelio yu'u, yöjtságuië' lë'. Biyéchuë' xini'ë Pedro, en guyéaj láchxë'ë lë' ca runru' queë' Dios caz. <sup>26</sup> Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

<sup>27</sup> Ní' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'.

<sup>28</sup> Ní'irö Pedro gudxë' légaquië', rnnë':

—Libi'ili' nöz quézili' ca rinná bē' xibá queë' Moisés, rnna bití' ral-la' gunë' tu bönni' judío tsözxón o tsázalenë' nu bönni' izá'a. Na'a, Dios buluí'inë' neda' bití' ral-la' innía' queë' nitúë' bönni' náquië' cá'asó o bití' náquië' dxi'a. <sup>29</sup> Que lë ni na' cate' bulídzali' neda', la' bídatea', en bití' guca chopa láchxa'a. Rinaba' na'a, ¿bizx que na' bulídzali' neda'?

<sup>30</sup> Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rēpi yösa bení', dului' lobi' neda'. <sup>31</sup> Caní gúdxibi' neda': “Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. <sup>32</sup> Na'a, isól-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bēdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a.” <sup>33</sup> Caní guca, la' gusól-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë ni na' zóatu' ni yúgu'tëtu', nudúbitu' lahuë' Dios para uzé' nágatu' le inná bé'enë' Dios li' innó'.

### *Didza' bē'ë Pedro lidxë' Cornelio*

<sup>34</sup> Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, bití' ruyusë' Dios yöl-la' rinnësö quégaca bönachi, pero tuz ca rilé'enë' rë'u. <sup>35</sup> Dios raza láchxë'ë bönachi idútë yödzölió, nupa na' tadxi Lë', en tun le naca dxi'a. <sup>36</sup> Gusól-lë'ë Dios xtídzë'ë ga nacuá' bönachi Israel, en gusól-lë'ë nu ben libán que didza' dxi'a, le run ga raca dxi'a quégaca bönachi, lë na' bidxín queëru' lu nē'ë Jesucristo. Lë cazë' náquië' Xanru' yúgu'tëru'. <sup>37</sup> Libi'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guí' gula'zaca' lu na' tu' xihui'. Caní benë', tu' guzóalenë' Dios Lë'. <sup>39</sup> Na'a, netu' runtú' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. <sup>40</sup> Ní'irö Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'. <sup>41</sup> Bití' buluí'i lahuë'

lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nali queë' Jesús, ate' güi'i gudágulentu' Lë' tsözxön gudödi bubanë' lu yöl-la' guti. <sup>42</sup> Gunná bé'enë' Dios netu' guntu' libán lógaca bönachi, ate' runtu' ba nali queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nali queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

### *Dios Bö' Lá'ayi ridisóalenë' bönachi izá'a*

<sup>44</sup> Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' biti' nácagaca judío. <sup>46</sup> Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. <sup>47</sup> Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yue' lahuë' Pedro ugá'analenë' légaquië' ca chopá tsonna dza.

## 11

### *Didza' bë'ë Pedro lógaca bönachi queë' Cristo nacué' Jerusalén*

<sup>1</sup> Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' biti' nácagaquië' judío gula'zì' lu ná'agaquië' xtídzë'ë Dios. <sup>2</sup> Cate' budxinë' Pedro Jerusalén, böchi'ru' judío gula'díl-lalenë' lë' didza'. <sup>3</sup> Gulë' Pedro:

—¿Bizx que yöjtsú'ulenu' bönni' biti' nácagaquië' judío, en gudágulenu' légaquië' tsözxön?

<sup>4</sup> Ní'irö gusí lahuë' Pedro rusiyönnë' légaquië' idütë lë na' guca, rnnë':

<sup>5</sup> —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'. <sup>6</sup> Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacué' tapa ní'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa' xíligacaba'. <sup>7</sup> Biyönda' chi'i nu gudxi neda': "Pedro, guyasa. Bëti-ba', en gudagu." <sup>8</sup> Ní'irö gudxa'-në': "Biti' ca', Xan. Catu caz gudahua' tu le cabí ralla' gágutu', o tu le cabí naca dxi'a." <sup>9</sup> Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a." <sup>10</sup> Tsonna luzuí guca caní, ate' ní'irö idütë lë na' bilé'eda' la' buépité lúzxiba. <sup>11</sup> La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasöl-lë'ë légaquië' tu bönni' lë' Cornelio. Sududíjagaquië' neda'. <sup>12</sup> Dios Bö' Lá'ayi gudxë' neda': "Guyéajlen légaquië', en cabí gaca chopá ladxu'u." Lësca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'. <sup>13</sup> Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isöl-la'gacu'-në' bönni' tsójáquië' yödzö Jope, tsöjlídzagaquië' Simón, zoa' ia'tú lë' Pedro. <sup>14</sup> Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacué' ladxu'." <sup>15</sup> Cate' ni' gusí lahua' ru'ílena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. <sup>16</sup> Ní'irö yöjneda' didza' na' bë'ë Xanru', gunné': "Le nácatë Juan buquilë' bönachi nisa lu nisa, pero libí'ili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi libí'ili'." <sup>17</sup> Que lë ni na', channö Dios gusöl-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, ¿núzxitë neda' inná bé'eda'-në' Dios?

<sup>18</sup> Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ladxí'gaquië' para ila'déli'në' yöl-la' na'bán idú.

### *Yugu' bönni' nacu'ë Antioquía ta'yéajlë'ë Cristo*

<sup>19</sup> Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. <sup>20</sup> Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. <sup>21</sup> Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

<sup>22</sup> Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquía na'. <sup>23</sup> Cate' Bernabé na' bidxinë' Antioquía, bilé'enë' le ruzá' ládxe'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'. <sup>24</sup> Náquië' Bernabé na' tsahui', en idú zóalenë' Dios Bö' Lá'ayi lë', en idú ládxe'ë réajlë'ë Cristo. Ni'a que libán benë' Bernabé na', bönachi zían lu yödzö na' gula'yéajlë' Xanru'.

<sup>25</sup> Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë'ë lë' Antioquía. <sup>26</sup> Idú ca tu iz gula'cu'ë ni', tunë' tsözxön bönachi queë' Cristo, en tu'sëdinë' bönachi zían. Lu yödzö Antioquía na', gusí lo gula'z'í lágaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

<sup>27</sup> Dza ni' bila'rúajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios. <sup>28</sup> Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunnë':

—Si' gaca gubín iduté yödzölió.

Guca gubín na' cate' ni' rinná bë'ë Claudio, lu yödzö Roma. <sup>29</sup> Ní'irö gula'z'í lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que queëgaquië', le gácalen böchi'ru' nacu'ë luyú Judea. <sup>30</sup> Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

## 12

### *Tútië' Jacobo, en ta'gu'ë Pedro lidxi guíë*

<sup>1</sup> Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zi'ë légaquië'. <sup>2</sup> Gunná bé'enë' bönni' gulútië' Jacobo, böchë'ë Juan. Gulu'ë lë' guíë tuchi'. <sup>3</sup> Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que. <sup>4</sup> Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquië' tapa cö' bönni' röjáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxe'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. <sup>5</sup> Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

### *Dios rubéajë' Pedro lidxi guíë*

<sup>6</sup> Cate' si' idxín dza yu'u ládxe'ë Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacu'ë chopë' bönni' röjáquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' röjáquië' gudil-la tapa chi'ë ga nu riyaza lidxi guíë na'. <sup>7</sup> Tsálido'os bulu'í lahuë' tu gubáz lá'ayi queë' Xanru' ni', ate' buzení'da' bení' lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guíë na' naga' ni'a në'ë Pedro. <sup>8</sup> Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzu'u, en gudá len neda'.

<sup>9</sup> Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'. <sup>10</sup> Cate' chigula'dödë' ga nacu'ë bönni' zí'alö, en bönni' buropi cö', bönni' na' röjáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. <sup>11</sup> Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusöl-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

<sup>12</sup> Tsanni ni' yu'ë nöza Pedro, riza' ládxi'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. <sup>13</sup> Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'. <sup>14</sup> Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtíxjöi'ibi' nupa nacua' ni', rnnabi':

—Zoë' Pedro ra' yu'u.

<sup>15</sup> Ní'irö gulë' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

<sup>16</sup> Tsanni na' biti' zoa dxíë' Pedro rulidzë' nupa nacua' lu yu'u. Cate' gula'saljë' yu'u, gula'nítisinë' cate' bila'lé'enë' lë'. <sup>17</sup> Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guíë. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

<sup>18</sup> Cate' za' rení' dza na', bönni' röjáquië' gudil-la gula'bö'ë böniga nacxi guca, bíti'rö yu'ë Pedro lidxi guíë. <sup>19</sup> Ní'irö gusöl-lë'ë Herodes nupa tsöjxí'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

### *Ca gútië' Herodes*

<sup>20</sup> Dza ní'isö rilenë' Herodes bönachi yödzö Tiro, en yödzö Sidón. Zí'alö bönachi lu xiyúë' Herodes na' gula'söl-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilenë' Herodes légaquië', bíti'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë' quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'.

<sup>21</sup> Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchí'a rusöröë' bi raza, nácuë' lari' nazaca', en benë' libán lógaquië'. <sup>22</sup> Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

<sup>23</sup> La' ná'asö la' bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

<sup>24</sup> Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

*Le zí'alö luzuí röjéngaquië' Bernabé, en Saulo libán*

<sup>25</sup> Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ni', yöjhuöjgaquië' yödzö Antioquía. Gula'chë'ë-bi' ca' bi'i Juan, zoa ia'tú labi' Marcos.

## 13

<sup>1</sup> Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxon bönachi queë' Cristo lu yödzö na'. Caní légaquië':

Bernabé,  
Simón, (lë' ca' Bönni' Gasja),  
Lucio, (bönni' Cirene),  
Saulo,

Manaén, (bönni' na' guzxönlënë' tsözxön Herodes, bönni' rinná bë'ë luyú Galilea).

<sup>2</sup> Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

<sup>3</sup> Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

*Yugu' gubáz nasöl-lë'ë Cristo tunë' libán luyú Chipre*

<sup>4</sup> Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre. <sup>5</sup> Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sedë' queë' Dios. Nachë'gaquië'-bi' bi'i Juan para gunbi' légaquië' tu zxon. <sup>6</sup> Budxi gula'dödë' idú gapa dë yödzödo' luyú bidxi na' lu nisa zxon, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë yë'ë, en rnnë' ru'ë didza' uláz queë' Dios. <sup>7</sup> Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'enë' yönnë' xtídzë'ë Dios. <sup>8</sup> Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi izá'a ga na'. <sup>9</sup> Ní'irö Saulo, lë' ca' Pablo, buzóa tsutsu lahuë', zóalënë' Dios Bö' Lá'ayi lë'. Ruyúë' Elimas na' <sup>10</sup> en rë' lë':

—Li', bönni' rizí' yë', en bönni' huiá' dö', nacu' ca zxf'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'? <sup>11</sup> Na'a, Xanru' usaca' zí'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'. <sup>12</sup> Cate' bilé'enë' bönni' unná bë' na' lë' na' guca, bubáinë' ca naca xtídzë'ë Xanru', ate' guyéajlë'ë Cristo.

*Le gulunë' Pablo, en Bernabé lu yödzö Antioquía luyú Pisidia*

<sup>13</sup> Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' légaquië', en böajbi' Jerusalén. <sup>14</sup> Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. <sup>15</sup> Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjödix Saulo, en Bernabé, gunné':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë.

<sup>16</sup> Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zë nágali' le guía' libí'ili', bönni' Israel, en libí'ili', núlöli' rádxili'-në' Dios. <sup>17</sup> Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'. <sup>18</sup> Idú choá' iz Dios biá' gulénë' quégaquië' cate' ni' gula'dë' idú luyú bidxi lu lataj cá'asö. <sup>19</sup> Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'. <sup>20</sup> Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. <sup>21</sup> Ní'irö gula'nábinë' Dios uzöë' tu bönni' unná'bë' quégaquië'. Dios guröë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'. <sup>22</sup> Gudödi ni' Dios gudüë' Saúl na', ate' buzöë' David quégaquië' para inná'bë'ë. Dios benë' ba nalí queë' David ni, gunné': “Nözda' runë' David, xzí'inë' Isaí, le raza ládxa'a, en gunë' yúgu'të le rë'ënda' neda'.” <sup>23</sup> Ladaj xzí'ini xi'söë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxi' lu në'ë Dios zí'atëlö gunë'. <sup>24</sup> Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa. <sup>25</sup> Cate' ni' chizóa údxi gunë' libán Juan na', gunné': “¿Nuzxi réquili' naca' neda'? Biti' naca' Cristo, bönni' na' ral-la' guidé'. ¡Na'a, buli'yútsöca'! Chizöë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudë'ë.”

<sup>26</sup> 'Libí'ili', böcha'a, yugu' xzí'ini xi'söë' Abraham, en núlöli' zóali' ni, en rádxili'-në' Dios. Dios caz gusöl-lë'ë queëli' didza' ni para uláli'. <sup>27</sup> Nupa nacué' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátie'. <sup>28</sup> Sal-la' bití' budzöli le nabáguë'ë Jesús gátie', gula'nábinë' Pilato inná bé'enë' bönni' ilútië' Lë'. <sup>29</sup> Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba. <sup>30</sup> ¡Ní'irö Dios busubanë' Lë' lu yöl-la' guti! <sup>31</sup> Zíán dza bulu'í' lahuë' Jesús lógaca nupa yójácalen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

<sup>32</sup> 'Caní naca, lësca' netu' ni rusiyöntu' libí'ili' didza' dxi'a ca naca lë na' guzxi' lu në'ë Dios gunë' quégaquië' xuz xtó'oru'. <sup>33</sup> Lë na' guzxi' lu në'ë Dios quégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: “Li' nacu' Xzí'ina'. Neda' buzóa caza' Li'.” <sup>34</sup> Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: “Gonna' quiu' le nácagaca bica' ba guzxi' lu na'a lahuë' David.” <sup>35</sup> Que lë ni na' nazúaj ca' lu guichi, ga zoa ia'tú salmo, le rnna caní: “Bití' gu'u lataj ugá'anë' bönni' lá'ayi quiu' ga initi le naca cazë'.” <sup>36</sup> Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. <sup>37</sup> Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. <sup>38</sup> Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. <sup>39</sup> Na'a, Dios ruúnë' tsahui' yúgu'të nupa ta'yéajlë' Jesús, rugüë' yugu' dul-la' na' le cabí guca ugúa xibá queë' Dios, le bë'ë Moisés. <sup>40</sup> Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

<sup>41</sup> Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu ulu'í' libí'ili' le rulu'í' dxin na', bití' ca' tséajlë'ëli'.



<sup>42</sup> Cate' bulu'ruájë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógaquië' ulu'sëdinë' légaquië' ca naca lë ni cate' idxín ia'tú dza lá'ayi quégaquië'. <sup>43</sup> Cate' ni' bulu'ruájë' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxië'ë Dios quégaquië'.

<sup>44</sup> Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzö na' para ila'yönnë' xtídzë'ë Dios. <sup>45</sup> Ní'irö bulu'zxé'enë' bönni' judío bití ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. <sup>46</sup> Ní'irö lu yöl-la' rugu ladxí' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a. <sup>47</sup> Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a, en gacu' Nu usölá bönachi idútë yödzölió.

<sup>48</sup> Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. <sup>49</sup> Caní guca, guzé xtídzë'ë Xanru', ate' bila'yöni bönachi yúgu'të yödzö nacua' luyú ni'. <sup>50</sup> Ní'irö bönni' judío bití ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni' ní'ilö lu xiyúgaquië'. <sup>51</sup> Ní'irö Pablo, en Bernabé bulu'quínnajë' yu bëchtö da' la' lábagaquië' le rulu'í nagá'ana xíguia' nabága'gaca bönachi lu yödzö na', ate' yójáquië' lu yödzö Iconio. <sup>52</sup> Bulu'dzéjanë' bönni' yödzö Antioquía na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

## 14

### *Le gulunë' Pablo, en Bernabé lu yödzö Iconio*

<sup>1</sup> Cate' bila'dxinë' Pablo, en Bernabé yödzö Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. <sup>2</sup> Ní'irö bönni' judío bití ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo. <sup>3</sup> Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxí' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ládxië'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. <sup>4</sup> Ní'irö bönachi lu yödzö na' bila'ruáj choplö. Bal-lë' gula'dë'ë bönni' judío bití ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo. <sup>5</sup> Ní'irö bönni' judío bití ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasöl-lë'ë Cristo, en ulu'ládxë' légaquië' guiöj. <sup>6</sup> Cate' téquibe'enë' Pablo, en Bernabé lë ni, bulu'zxúnnajë' ni', yójáquië' yödzö Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', <sup>7</sup> gapa ni' gulunë' libán que didza' dxi'a ca naca queë' Cristo.

### *Tu'ládxë' Pablo guiöj lu yödzö Listra*

<sup>8</sup> Zoë tu bönni' lu yödzo Lистра biti' raca sè'ë. Rõ'ösë' ni' tu' cabí rizë'ë cate' ni' guljë', en catu caz guzë'e ni'ë. <sup>9</sup> Bönni' ni ruzë náguië' didza' ru'ë Pablo. Pablo buyúë' lë', en gúquibe'enë réajlë'ë Cristo para huóáquië'. <sup>10</sup> Ní'irö Pablo bë'ë zidzaj didza', en rë' lë':

—Guzuí.

La' guxíti'të bönni' na', en guzë'e ni'ë. <sup>11</sup> Cate' yugu' bönni' Lистра bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuótjagaquië' ga zóaru', en tu'lu'i cuíngaquië' ca nácagaquië' bönni'!

<sup>12</sup> Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'. <sup>13</sup> Zoa yudo' que Júpiter ga ni' nacu'ë, cuita nõza ga ni' ta'yaza bönachi lu yödzo na'. La' bidxintë' bixúz que Júpiter na', nachë'ë-ba' yugu' bëdxi, en nu'ë ca' yugu' bregui' yøj, ate' dzágagaca bönachi zían lë'. Gulë'ënnë' ilútië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'. <sup>14</sup> Cate' Bernabé, en Pablo, gubáz na' nasól-lë'ë Cristo, guléquibe'enë' lë ni, gula'chözë' lari' nácagaquië'. Tu'hu'ininë' tu' tunë' bönni' ni le cabí ral-la' ilunë', ate' gula'xíti'ë, en yøjcu'ë gatsaj láhui'lö bönachi zían na', en gulu'ë zidzaj didza', të' légaquië':

<sup>15</sup> —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en riguíxjöi'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzhiba, en yödzülió, en nísado', en yúgu'të le nacuá' tu tu lataj na'. <sup>16</sup> Yugu' iz chigula'dödi, gulún yúgu'të bönachi ca rnnasö que queëguequi, ate' Dios biti' buzáguë'ë xinózguequi, <sup>17</sup> pero benë' ga gulaca le tun ba nalí queë', yugu' le nácagaca dxi'a benë' quégaquië'. Risól-lë'ë queëru' nisa guiøj, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja ládxi'ru'.

<sup>18</sup> Sal-la' Bernabé, en Pablo gulë' légaquië' caní, cánnisö bila'déli'në' bulu'záguë'ë xinózguequi bönachi zían na', para cabí ilútië'-ba' bëdxi na' lógaquië'.

<sup>19</sup> Ní'irö bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yöl-lë'ë bönachi zían na'. Ní'irö yúgu'të' bulu'ladxë' Pablo guiøj, en gula'ayöjë' lë' ní'ilö ra' yödzo na', tu' téquinë' chinátie'. <sup>20</sup> Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë'lë', en buázië' lu yödzo na'. Cate' za' rení' ia'tú dza, burúajlenë' Bernabé, yøjáquië' yödzo Derbe.

<sup>21</sup> Lu yödzo ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yøjhuøjgaquië' Lистра, en Iconio, en Antioquía. <sup>22</sup> Cate' gula'dödë' Bernabé, en Pablo yugu' yödzo na', bulu'tipë' ládxi'gaquië' bönni' ni' ta'yéajlë'ë Cristo, en bulu'së'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

<sup>23</sup> Bulu'cu'ë yugu' bönni' gula'ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulufílenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

### *Pablo, en Bernabé tu' dxinë' Antioquía luyú Siria*

<sup>24</sup> Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. <sup>25</sup> Budxi gulunë' libán que xtídzë'ë Cristo lu yödzo Perge, yøjáquië' yödzo Atalia. <sup>26</sup> Bulu'zë'ë ni', ate' gula'benë' tu lë'e barco, en bulu'dxinë' yödzo Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsøjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxí' quégaquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. <sup>28</sup> Pablo, en Bernabé bulu'gá'analenë' bönachi ni' ta'yéajlë' Cristo zían dza.

## 15

### *Tu'dubë' huen dxin queë' Cristo lu yödzö Jerusalén*

<sup>1</sup> Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipëla'li' ca nalëbitu' runtu' ca na' gunná bë'ë Moisés, bití' gaca uláli'.

<sup>2</sup> Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para iluí'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

<sup>3</sup> Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huöáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

<sup>4</sup> Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. <sup>5</sup> Ní'irö gula'zuinë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bë' xibá queë' Moisés.

<sup>6</sup> Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. <sup>7</sup> Gudödi gulu'ë zían didza', guzuinë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. <sup>8</sup> Dios, Nu nunbë' caz le yu'u icja ládxi'do'gaca bönachi, buzöë' le naca bë' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'. <sup>9</sup> Bití' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo. <sup>10</sup> Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le. <sup>11</sup> Rë'u ni, réajlë'ëru' nuláru' ni'a que le buzá' ládxi'ë Xanru' Jesús queëru', en ca na' nuláru' rë'u, ulu'lë' ca' légaquië'.

<sup>12</sup> Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zë' nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacua' bönachi izá'a. <sup>13</sup> Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libi'ili', böcha'a. Buli'zë' nágali' le guía' libí'ili'. <sup>14</sup> Simón Pedro chigudíxjö'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí' lógaca yugu' bönachi izá'a para bubéajë' quez queë' bönachi nútsa'gaca ládjagaquië'. <sup>15</sup> Ca naca lë ni röjlözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnaa:

<sup>16</sup> Dza tödi lë ni huöda', en uchisa' Nu inná bë', bönni' na' tsázië' xilatjé' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

<sup>17</sup> para ulu'guilaj ia'zíca'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

<sup>18</sup> Caní rnnë' Xanru',

Nu na' dza ni'te ben ga naca bë' yúgu'të lë ni.

<sup>19</sup> 'Que lë ni na' runi neda' biti' ral-la' gun níguiru' bönachi izá'a, nupa tu'huóaca queë' Dios. <sup>20</sup> Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guió' budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' bítitës böa' guixi'. <sup>21</sup> Dza ni'te nacua' yúgu'të yödzo nupa tun libán lu yu'u gapa tu'dubë' bönni' judío, en tu'sëdë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

<sup>22</sup> Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ladjagaquië', en ila'söl-lë'ë légaquië' Antioquia. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ladjagaquië' böchi'ru' ni'. <sup>23</sup> Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasöl-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquia, en yugu' yödzo luyú Siria, en Cilicia. <sup>24</sup> Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. <sup>25</sup> Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxi'iru'. <sup>26</sup> Chiyöjajúquië' Bernabé, en Pablo gapa guzóa bönadxi ilátië' tu' nadxi'iguequinë' Xanru' Jesucristo. <sup>27</sup> Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. <sup>28</sup> Dios Bö' Lá'ayi bulu'inë' netu' le raza ládxi'ë, en lësca' caní raza ládxi'tu' netu', biti' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

<sup>29</sup> Biti' gáguli' le nadödi lógaca budó' guió' budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a.”

<sup>30</sup> Caní guca, yugu' bönni' na' nasöl-la'gaquië' bila'dxinë' Antioquia. Bulu'tubë' bönachi queë' Cristo nacua' ni', ate' gula'gu'ë guichi na' lu ná'agaquië'. <sup>31</sup> Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë' tsahui' légaquië'. <sup>32</sup> Tu' nácagaquië' Judas, en Silas bönni' tu'ë didza' uláz queë' Dios bulu'huë' tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulú'ilenë' légaquië'. <sup>33</sup> Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a didza' para tsöjhuóajgaquië' Jerusalén ga nacu'ë bönni' gula'söl-lë'ë légaquië'. <sup>34</sup> Guyaza ládxi'ë Silas bugá'anë' Antioquia. <sup>35</sup> Bulu'gá'anë' ca' Pablo, en Bernabé Antioquia na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

### *Risí lahuë' Pablo röjenë' libán le buropi luzuí*

<sup>36</sup> Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'të yödzo gapa chiyöjenru' libán que xtídzë'ë Xanru', para ilé'eru' nacxi raca quégaquië'.

<sup>37</sup> Gú'unnë' Bernabé ila'chë'ë-bi' bi'i Juan Marcos, tséajlenbi' légaquië', <sup>38</sup> pero biti' guyaza ládxi'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bítirö yójenlenbi' légaquië' dxin queë' Xanru'. <sup>39</sup> Biti' guca tuz xtídza'gaquië'

Bernabé, en Pablo ga bidxintë bulu'lá'alenë' tuë' ia'túë'. Bernabé guchë'ë-bi' bi'i Marcos, ate' gula'benë' tu lë'e barco, yöjáquië' luyú Chipre. <sup>40</sup> Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'. <sup>41</sup> Gula'dödë' yugu' yödzö luyú Siria, en Cilicia, ate' bulu'tipë' ládxi'gaca bönachi queë' Cristo nacua' ni'.

## 16

### *Bi'i Timoteo runbi' tsözxön Pablo, en Silas*

<sup>1</sup> Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xzi'ininu tu nigula judío réajlë'ënu Cristo, pero xúzibi' biti' náquië' judío. <sup>2</sup> Yugu' böchi'ru' nacu'ë Listra, en Iconio tunë' ba nali queëbi', ta'nnë' runbi' le naca dxi'a. <sup>3</sup> Gú'unnë' Pablo tséajlenbi' bi'i ni lë', ate' gudëlé'ë-bi', en guchúguië' lu xipëla'bi' ca tun bönachi judío. Cani benë' para cabi'ila'nnë' queëbi' bönni' judío nacu'ë yugu' yödzö ni', tu' nöziguequinë' yúgu'të' xúzibi' biti' náquië' judío. <sup>4</sup> Cate' Pablo, en nupa dzágagaca lë' gula'dödë' gapa nacua' yödzö ni', tu tu yödzö na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'. <sup>5</sup> Cani guca, bönachi yúgu'të cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

### *Tu bönni' Macedonia rulidzë' Pablo lu yëla bëchigal*

<sup>6</sup> Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabi' ilunë' libán que xtídzë'ë Xanru' luyú Asia. <sup>7</sup> Cate' bila'dxinë' luyú Misia, gulë'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queëru', biti' bë'ë légaquië' lataj. <sup>8</sup> Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'në' Pablo. <sup>9</sup> Lu yödzö ni' Dios buluí'inë' Pablo tu le bilé'enë' lu yëla bëchigal. Tu bönni' Macedonia buluí'i lahuë' lë', zuínë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

### *Le gulunë' Pablo, en Silas lu yödzö Filipos*

<sup>11</sup> Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. <sup>12</sup> Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucu'á'agaquië' bönachi uládz quégaquië'. Lu yödzö nisö guzóatu' nababa dza. <sup>13</sup> Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. <sup>14</sup> Nútsa'nu ladjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë. <sup>15</sup> Ní'irö bidílanu lënu nisa, ate' gula'dila ca' nisa bönachi nacua' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zídë'ë dumí yugu' bönni' xanbi'. <sup>17</sup> Bi'i nigula ni sudunóbi'-në' Pablo, en netu', ru'íbi' zidzaj didza', rnnabi':

—¡Yugu' bönni' ni tunë' xichinë' Dios nayépisëtëre'! ¡Tu'siyönnë' libí'ili' naca gaca uláli'!

18 Caní benbi' zían dza. Cate' bíti'rö guyaza ládxë'ë Pablo, buécjè', en bulidzè' bö' na' yu'u lèbi', rnnè':

—Lu Lè' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!  
La' ní'isö burúajtè bö' na'.

19 Cate' bila'lé'enè' xanbi' chiburúaj bö' na' run ga rinné yá'abi', en bíti'rö naca löza ila'zi'ë dumí ni'a queébi', que lè ni na' gula'zönè' Pablo, en Silas, ate' gula'chë'ë légaquiè' lógaquiè' bönni' yúlahui', nudúbigaquiè' ga naca lu yè'ëyi. 20 Bulu'cu'ë légaquiè' lógaquiè' bönni' yúlahui' na', ta'nnè':

—Yugu' bönni' ni nácagaquiè' judío, en tunè' ga tu'tsatsa bönachi yödzö ni. 21 Tu'sédinè' le cabí ral-la' si' lu ná'aru', en bití' ral-la' gunru', tu' nabábaru' Roma.

22 Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enè' nupa gula'lecja lari' nácugaquiè' Pablo, en Silas, ate' gula'guiné' légaquiè' gubá'ayi. 23 Gudödi gula'guíndé'ë légaquiè', gula'gu'ë légaquiè' lidxi guíë. Gula'nná bé'enè' bönni' rusayjè' lidxi guíë na' gun chí'idè'ë légaquiè'. 24 Bönni' ni, cate' chigula'nná bé'enè' lè' caní, gulu'ë légaquiè' lu yu'u lè'e dxi' lidxi guíë na', en gulu'ë ní'agaquiè' yeru yaga ta'zön ní'agaquiè'.

25 Idú guluhuëla Pablo, en Silas tu'lidzè' Dios, en tul-lè' yöl-la' ba queë' Dios, ate' ta'yönnè' yugu' bönni' nadzúngaquiè' lidxi guíë na'. 26 Ní'irö tsárido'os gudödi budó' zxu' bach. Caní guca ga bidxintè guzxizi xilibi zö'ö lidxi guíë na', ate' la' gula'yáljatè yúgu'tè gapa nu riyaza, ate' bulu'huédxi ca' yugu' du guíë nága'gaca bönni' nadzúngaquiè' ni'. 27 Bubanè' bönni' na' rusayjè' lidxi guíë. Cate' bilé'enè' nayáljagaca gapa nu riyaza lidxi guíë na', gulecjè' guíë tuchi' queë' para guti cuiné', tu' réquinè' chibulu'zxúnnajè' bönni' nadzúngaquiè' lidxi guíë na'. 28 Ní'irö Pablo zidzaj bulidzè' lè', gunné':

—¡Biti' bí' gúni cuinu', tu' zóatu' ni yúgu'tètu'!

29 Ní'irö bönni' na' gunabè' guí', ate' gudá'atè' lu yu'u lidxi guíë na'. Guzxízidè'ë lu yöl-la' radxi, ate' biyéchuè' xini'agaquiè' Pablo, en Silas. 30 Cate' chinubéajè' légaquiè' lidxi guíë na', gudxè' légaquiè':

—Libi'ili', bönni', ¿bizxi ral-la' guna' para ulá'?

31 Légaquiè' tè' lè':

—Guyéajlè'ë Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

32 Gulu'ilenè' lè' didza' ca naca xtídzè'ë Xanru', dzágagaca lè' yúgu'tè bönachi nacua' lidxè'. 33 La' ná'asö, ni' naca chí'i dzö'ölö la' guchè'tè légaquiè', ate' yöjtibè' légaquiè' ga dxíagaquiè' huè'. Gudödi ni', la' bidílatè' nisa, ate' gula'dila ca' nisa yúgu'tè bönachi nacua' lidxè'. 34 Ní'irö guchè'ë légaquiè' lidxè', en bè'ë le gulahuè'. Rudzéjanè' lè', en tu'dzeja ca' yúgu'tè bönachi nacua' lidxè' tu' ta'yéajlè'ë Dios.

35 Cate' za' rení' dza na', yugu' bönni' yúlahui' gula'söl-lè'ë ni'a ná'agaquiè', ate' gulè' bönni' na' rusayjè' lidxi guíë:

—Busán-gáquiè' bönni' na'.

36 Ní'irö bönni' na' rusayjè' lidxi guíë gudíxjöi'inè' Pablo didza' ni, gunné':

—Gula'söl-lè'ë bönni' yúlahui' didza' usana' libí'ili'. Na'a, guli'rúaj, en buli'huöaj dxí'ado' ga rizóali'.

37 Ní'irö birúajè' Pablo, en gudxè' yugu' ni'a ná'agaquiè' bönni' yúlahui' na', gunné':

—Chigula'guiné' netu' lógaca bönachi sal-la' bití' narúguini queëtu' ca rinná bè' xibá, en gula'gu'ë netu' lidxi guíë, ate' netu' ni nabábatu' Roma. ¿Naru' tu'santsè' netu' bagáchi'sö? ¡Biti' ca' gaca! ¡lídigarè' légaquiè' udusángaquiè' netu'!

38 Yöjhuöjgaquiè' ni'a ná'agaquiè' bönni' yúlahui' na', en bulu'siyönnè' yugu' bönni' yúlahui' didza' ni, ate' légaquiè' guládxinè' cate' bila'yönnè' nabábagaquiè' Pablo, en Silas Roma. 39 Cate' bila'dxinè' lidxi guíë ni', guláta'yuè' lógaquiè' Pablo, en Silas cabí ulu'subáguè'ë légaquiè' xíguia'. Ní'irö gula'béajè' légaquiè' lidxi guíë na', en guláta'yuè' lógaquiè' ulu'rúajè' yödzö na'. 40 Ní'irö bila'rúajè' Pablo, en Silas lidxi guíë na', ate'

gula'yázië' lídxinu Lidia. Cate' chibila'lé'enë' böchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

## 17

### *Yugu' bönachi Tesalónica tunë' dzatsa*

<sup>1</sup> Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sëdë' queë' Dios. <sup>2</sup> Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'. <sup>3</sup> Buchila lá'anë', en buluí'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali! ¡Bönni' ni náquië' Cristo!

<sup>4</sup> Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. <sup>5</sup> Ní'irö yugu' bönni' judío biti' ta'yéajlë'ë, lu yöl-la' ruzxë'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'tübë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. <sup>6</sup> Cate' biti' bulu'dzölinë' Pablo, en Silas, gula'béajë' Jasón, en ia'zíca'rë' böchi'ru' nacu'ë ni', ate' gula'ché'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idütë yödzölió chibila'dxinë' ca' ni. <sup>7</sup> Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'tué' bönni' rinná bé'ë, lë' Jesús.”

<sup>8</sup> Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böniga. <sup>9</sup> Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zíca'rë' bönni' na', bulu'sanë' légaquië'.

### *Le gulunë' Pablo, en Silas lu yödzö Berea*

<sup>10</sup> Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. <sup>11</sup> Gulácarë' tsahui' bönni' ni ca bönni' nacu'ë Tesalónica, tu' gula'zí' lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléqui'be'enë' channö nácatë lë na' rnnë' Pablo. <sup>12</sup> Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. <sup>13</sup> Ní'irö cate' guléqui'be'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bönachi zían. <sup>14</sup> Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea. <sup>15</sup> Yugu' bönni' Berea na' gula'ché'ë Pablo lu yödzö Atenas. Ní'irö la' yöjhuöjgacatë' lu yödzö Berea, tu'ú'ë xtídzë'ë Pablo, para ilé' Silas, en bi'i Timoteo, tsöjácate' ga ni' zoë' Pablo.

### *Le benë' Pablo lu yödzö Atenas*

<sup>16</sup> Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhuí'ini ládxië' tu' rilé'enë' ta'yéaj ládxi'gaca yúgu'të bönachi yödzö na' yugu' budó' guiöj budó' yaga. <sup>17</sup> Que lë ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yé'ëyi didza' ca naca xtídzë'ë Cristo. <sup>18</sup> Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'ílenë' Pablo didza'. Bal-lë' gula'nnë':

—¿Bizxi rë'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. <sup>19</sup> Ní'irö gula'guélé'ë në'ë Pablo, en gula'ché'ë lë' lu guí'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yöñitu' didza' cubi ni rusiyöñnu' netu'? <sup>20</sup> Rusiyöñnu' netu' le tun ga rubánitu'. Ré'ëñitu' inözitu' bizxi rna didza' ni ru'u.

<sup>21</sup> Bítirö ta'yaza ládxi'gaquië' ilunë' böñni' Atenas na', en böñni' izá'a nacu'ë ni', pero ila'yönisinë', en iluí'isë' didza' tu le cubi.

<sup>22</sup> Ní'irö guzuínë' Pablo gatsaj láhui'lö lö'a Areópago na', gunnë':

—Böñni' Atenas, yúgu'të le rilé'eda' naca bë' reaj ládxi'da'ali' yugu' dios queéli'. <sup>23</sup> Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ládxi'li'-në' sal-la' biti' núnbë'ëli'-në', Dios ni runa' libán queë' loli'.

<sup>24</sup> ¡Dios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! <sup>25</sup> Biti' bi riyadzaj queë' le gaca ulu'nödzaj bönachi, tu' runödzjë' Lë' cazë' quégaca yúgu'të bönachi yöl-la' na'bán, en yúgu'të le riquíniru'.

<sup>26</sup> 'Lë' benë' tuzë' böñni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. <sup>27</sup> Dios bucu'ë légaquië' para ulu'guiljë' Lë', channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'. <sup>28</sup> Lë' cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' böñni' nútsa'gaquië' libí'ili', nupa bulu'zúaj le do' rúl-lali', le ta'nná: “Di'a dza queë' Dios nácaru'.” <sup>29</sup> Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícaguequi. <sup>30</sup> Dios budödë' cá'asö yugu' le gulunë' lu yöl-la' biti' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idütë yödzölió ulu'bí'i ládxi'gaca. <sup>31</sup> Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, böñni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

<sup>32</sup> Cate' bila'yöñnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yöniguëtu' ia'tú lë ni ru'u didza' que.

<sup>33</sup> Ní'irö burúajë' Pablo gatsaj láhui'lö ga na' nacu'ë, söhuöjë'. <sup>34</sup> Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, böñni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

## 18

### *Le benë' Pablo lu yödzö Corinto*

<sup>1</sup> Gudödi guca lë ni, buzë'ë Pablo yödzö Atenas na', ate' guyijë' yödzö Corinto. <sup>2</sup> Yöjxáquië' Aquilo, tu böñni' judío ni'. Guljë' böñni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, böñni' unná bë', ulu'rúajë' yúgu'të böñni' judío yödzö Roma. Guyijë' Pablo ga nacu'ë Aquilo, en Priscila na' <sup>3</sup> tu' naca tuz dxin tunë' Aquilo, en Pablo. Bugá'analenë' légaquië', ate' tsözxön gulunë' dxin, tunë' yugu' yu'u guídido'. <sup>4</sup> Cate' nácgaca dza lá'ayi quégaquië' böñni' judío, razië' Pablo lu yu'u ga tu'dubë' tu'sëdë' queë' Dios, ga ni' bé'lenë' légaquië' didza'. Gú'unnë' uluí'inë' yugu' böñni' judío, en yugu' böñni' izá'a nacu'ë ni', naca idütë li le riguixjö'ë ca naca queë' Jesucristo.



<sup>5</sup> Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

<sup>6</sup> Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para uluí'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queëli', calëga neda' nabága'a le. Na'a, uyija' ga nacua' bönachi izá'a.

<sup>7</sup> Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sedë' queë' Dios. <sup>8</sup> Crispo, bönni' lo que yu'u ga na' tu'dubë' tu'sedë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacua' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. <sup>9</sup> Ní'irö Lë cazë' Xanru' gudxë' Pablo lu yëla bëchigal, gunnë':

—Biti' gádxinu', en biti' su' dxisö, quíxjö'u xtídza'a, <sup>10</sup> tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiguequi quia' bönachi zían lu yödzö ni.

<sup>11</sup> Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

<sup>12</sup> Cate' bidxín dza rinná bë'ë Galión luyú Acaya, guláquië' tuz bönni' judío bití ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'. <sup>13</sup> Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

<sup>14</sup> Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídza'li' ca ral-la' guna', <sup>15</sup> pero channö naca didza' bizxaj que dídza'sö, o que lágaca bönachi, en ca naca xibá queëzili', guli'cá'ana tsahui' libí'isili', tu' cabí'ré'ënda' neda' gaca' nu uchi'a usörö yugu' le caní.

<sup>16</sup> Ní'irö Galión bulágui'ë légaquië' lu yu'u yúlahui'. <sup>17</sup> Ní'irö yúgu'të bönni' uládz na' gula'guélé'ë Sóstenes, bönni' lo que yu'u ga tu'dubë' bönni' judío, en tu'sedë' queë' Dios, ate' gula'guiné' lë' lö'a yúlahui', pero bití' bë' ládxë'ë Galión lë na' raca.

<sup>18</sup> Pablo bugá'anë' lu yödzö na' zían dza, ate' gudödi busiyönnë' böchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dë tu le nazí' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. <sup>19</sup> Cate' bila'dxinë' yödzö Éfeso, Pablo bulá'alënë' légaquië' ni'. Guyázië' lu yu'u ga tu'dubë' bönni' judío, en tu'sedë' queë' Dios, ate' bë'lenë' nupa nacua' ni' didza'. <sup>20</sup> Yugu' bönni' ni' guláta'yuë' lahuë' Pablo ugá'analenë' légaquië' ia'lati' xidzé, pero lë' bití' gú'unnë'. <sup>21</sup> Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ënnë' Dios.

Ní'irö gurenë' Pablo tu lë'e barco, en buzë'ë Éfeso na'.

### *Redxinë' Pablo Antioquia, ate' risí lahuë' röjenë' libán le bunny luzuí*

<sup>22</sup> Gudödi bidxinë' Pablo yödzö Cesarea, gurenë' guyijë' Jerusalén, ga ni' yöjyúë' bönachi queë' Cristo, ate' ní'irö buzë'ë ni', en guyijë' Antioquia. <sup>23</sup> Gudödi zoë' ni' nababa dza, buzë'ë ni', sa'yéajë' tu tu yödzö luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

### *Runë' libán Apolos lu yödzö Éfeso*

<sup>24</sup> Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazëdadë'ë le nazúaj lu guichi lá'ayi. <sup>25</sup> Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë'

Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sedë' queë' Dios. Cate' Priscila, en Aquilo bila'yönnë' didza' ru'ë Apolos na', gula'ché'ë lë' quez, en bulu'zéajni'irönë' lë' xibá queë' Dios. <sup>27</sup> Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quegaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zi'dë'ë xibé didza' ru'ë Apolos na', tu' ruzá' ládxë'ë Dios quegaquië'. <sup>28</sup> Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

## 19

### *Le benë' Pablo lu yödzö Éfeso*

<sup>1</sup> Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. <sup>2</sup> Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitü' channö zoë' Dios Bö' Lá'ayi.

<sup>3</sup> Ní'irö Pablo gunábinë' légaquië', rnnë':

—¿Nacxi guca le bidílali' nisa?

Ta'nnë':

—Ca buquílë' Juan bönachi nisa.

<sup>4</sup> Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'tëlë' ca lë', ate' Bönni' ni' naquië' Jesús, Lë' Cristo.

<sup>5</sup> Cate' yugu' bönni' na' bila'yönnë' didza' ni' ru'ë Pablo, bila'dilë' nisa tu' chita'yéajlë'ë Xanru' Jesús. <sup>6</sup> Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. <sup>7</sup> Guláquië' bönni' ni' idú chínnuë'.

<sup>8</sup> Guzóë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ládxi' benë' libán lógachië'. Bë'lenë' légaquië' didza', en gú'unnë' ulu'inë' légaquië' nácatë le riguixjö'ë ca rinná bë'ë Dios. <sup>9</sup> Ní'irö bizídi icja ládxi'do'gaquië' bal-lë', en bití' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bë'lenë' bönachi ni' ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. <sup>10</sup> Caní béntica'së' Pablo idú ca chopá iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzö luyú Asia, bönachi judío, en bönachi izá'a. <sup>11</sup> Dios benë' yugu' yöl-la' huáca zxön lu në'ë Pablo. <sup>12</sup> Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lári' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhuë' que queégaquië', en bulu'rúaj bö' xihui' yú'ugaca bönachi na'.

<sup>13</sup> Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

<sup>14</sup> Caní gulunë' gadxi bönni' zxi'inë' Esceva, tu bönni' judío náquië' bönni' lo ládjagaquië' bixúz unná bë'. <sup>15</sup> Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ¿núzxité libí'ili'?

<sup>16</sup> Ní'irö guxítí'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en huë'gacatzë' bulu'zxúnnajë' gadxë' bönni' na' lu yu'u ni'. <sup>17</sup> Guzë' didza' ca guca lë' ni, ate' bila'yöni yúgu'të' nupa nacuá'

lu yödzo Éfeso, bönachi judío, en bönachi izá'a, ate' yúgu'tè' guládxinë' Dios. Que lè ni na' gulunè' zxön Lè' Xanru' Jesús.

<sup>18</sup> Lësca' bila'dxinè' zían bönni' ta'yéajlè'è Cristo, en gula'xóalèpè' dul-la' nabága'gaquiè', en gula'guíxjö'è le chigulunè'. <sup>19</sup> Lësca' caní gulunè' zían bönni', zí'alò gulunè' yöl-la' udzá'. Dujuá'agaquiè' yugu' guichi udzá' quégaquiè', ate' bulu'zégui'è léguequi lógaca yúgu'tè bönachi. Bulu'labè' tsca nazáca'gaca guichi na', le guca idú chi un mil dumí plata. <sup>20</sup> Caní guca, guzèda' xtídzè'è Xanru', en bidéli'da' bönachi zían. Idú ládxi'gaquiè' gula'yéajlè'è Cristo.

<sup>21</sup> Gudödi gulaca lè ni, benè' queè' Pablo tsejè' Jerusalén, pero zí'alò ral-la' tödè' yugu' yödzo luyú Macedonia, en luyú Acaya, ate' gunnè':

—Tödi tseja' Jerusalén, run bayudxi tseja' ca' Roma.

<sup>22</sup> Ní'irö gusöl-lè'è-bi' chópabi' bi'i bönni' tácalenbi' lè', légacabi' Timoteo, en Erasto, luyú Macedonia, pero bugá'anè' lè' nababa dza luyú Asia na'.

### *Tu'tsatsa bönachi lu yödzo Éfeso*

<sup>23</sup> Bulu'tsatsa bönachi Éfeso dza ni', ate' gula'dá'baguè'è xtídzè'è Xanru'. <sup>24</sup> Benè' Demetrio, bönni' gubèdxi guíè plata ga bulu'tsatsè'. Run cazè' yugu' lidxi budó' guiöj budó' yaga néquiquequini plata que dios quégaquiè', lènu Diana. Gula'zi'è bönni' tunè' dxin ni dumí bach. <sup>25</sup> Butubè' Demetrio na' ia'zica'rè' bönni' tunè' la' dxin nisö, ate' gudxè' légaquiè':

—Böcha'a, nöz quézili' ca naca dxin runru', runna dumí queèru'. <sup>26</sup> Rilé'eli', en riyönili' ca runè' Pablo na'. Calégasö Éfeso ni, pero idú luyú Asia chibidéli'nè' bönachi zían, ate' chibutsè'è ca tunè', tu' rè' légaquiè': "Yúgu le núngaca bönachi biti' nácacaca dios."

<sup>27</sup> Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lènu Diana. Caní gaca, ugá'ana cá'asö yöl-la' zxön queènu, dios ni ta'yéaj ládxi'gaca-nu bönachi idútè luyú Asia, enca' idútè yödzölió.

<sup>28</sup> Cate' yugu' bönni' na' bila'yönnè' didza' ni, gula'léde'enè', ate' gulu'è zidzaj didza', ta'nnè':

—Nácatèronu zxön Diana, dios queèru' rè'u, bönachi Éfeso.

<sup>29</sup> Caní guca, bulu'tsatsa bönachi idútè lu yödzo na', ate' guláquiè' tuz, en carelò yöjáquiè' lö'a yúlahui'. Gulá'ayöjè' Gayo, en Aristarco, bönni' Macedonia túngaquiè' Pablo tsözxön, ga ni'. <sup>30</sup> Cate' gú'unnè' Pablo tsáziè' ga nacuá' bönachi zían na', biti' ca' gulu'è lè' lataj bönni' ta'yéajlè'è Cristo. <sup>31</sup> Lësca' caní gulunè' bal-lè' bönni' yúlahui' que luyú Asia, bönni' ta'lé'enè' Pablo dxi'a. Gula'söl-lè'è queè' nupa guláta'yu lahuè' biti' tsaziè' lö'a yúlahui' na'. <sup>32</sup> Ga ni' tu'tsatsè', en ta'bödxí'è, tu le ta'nnè' bal-lè', en ia'tú le ta'nnè' ia'zica'rè', tu' rő'ögacasè' baröli bönni' zían na' tu'tsatsè', en lá'tu'biqui' yúgu'tègaquiè' biti' nözguequinè' bizx que na' nudúbigaquiè' ni'. <sup>33</sup> Ní'irö yugu' bönni' judío gula'béajè' Alejandro ladaj bönachi zían na', ate' bulu'dxíguè'è lè' lógaca bönachi zían na'. Bulu'e Alejandro na' len nè'è para ila'bö' dxisö, tu' gú'unnè' gu'è didza' le gácalen yugu' bönni' judío na' lógaca yúgu'tèguequi. <sup>34</sup> Cate' guléquibe'enè' náquiè' judío, yúgu'tè' gulu'è tsözxön zidzaj didza' idú ca chopá hora, ta'nnè':

—¡Nácatèronu zxön Diana, dios queèru' rè'u bönachi Éfeso!

<sup>35</sup> Ní'irö bönni' uzúaj que yúlahui' benè' ga gula'bö' dxisö bönachi zían na', gunnè':

—Bönni' Éfeso, nözigaca yúgu'tè bönachi zoa yudo' queènu Diana, dios zxön, ni. Rè'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba.

<sup>36</sup> Cuntu nu gaca tá'baga' lè ni. Que lè ni na' run bayudxi sóali' dxisö, en biti' bi gúntèzili'.

<sup>37</sup> Naché'gacali'-nè' bönni' ni, en biti' ta'banè' le dzö'ö yudo', en biti' ta'nnè' xihuè'è queènu dios queèli'. <sup>38</sup> Que lè ni na', channö zoa didza' bizxaj quégaquiè' Demetrio, en yugu' bönni' gubèdxi guíè plata nacuá'lenè' lè', len nútí'tès bönni', dè lataj ga nu uzé nagui légaquiè', en zoa nu uchi'a usörö légaquiè'. Ni' huáca ulu'zegui luzá'agaquiè' didza' tuè'

ia'túë'. <sup>39</sup> Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'. <sup>40</sup> Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

<sup>41</sup> Cate' budxi bë'ë didza' ni, busól-lë'ë bönachi zían na' nudúbigaca ni' tsöhuöjgaca lídxiguequi.

## 20

### *Sa'yéajë' Pablo luyú Macedonia, en luyú Grecia*

<sup>1</sup> Cate' gurö'ö dxi dzatsa na' guca lu yödzö Éfeso, bulidzë' Pablo yugu' bönni' ta'yéajlë'ë Cristo, ate' guchizië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. <sup>2</sup> Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya. <sup>3</sup> Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bö' nísie' bönni' judío lë' para ila'zönë' lë'. Que lë ni na' buguelë'ë nöza söhuöjë' luyú Macedonia, ate' bidxinë' yödzö Filipos. <sup>4</sup> Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxön lë'. <sup>5</sup> Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'. <sup>6</sup> Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila bití nazí'í cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

### *Le benë' Pablo lu yödzö Troas*

<sup>7</sup> Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá'ládxiru' ca gútië' Jesucristo. Ni' rusëdinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla. <sup>8</sup> Ga ni' nudúbigaquië' naca lu yu'u xitsá', ate' nacuá' zían le ta'gú'u bení' ga na'. <sup>9</sup> Zóabi' bi'i Eutico ni', rő'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rő'öbi' rásibi' bi'i na' naca ga bunny cuía lu yu'u, ate' rásisibi' ca' gubíxitëbi', böxjabi' ga bidxintëbi' zcan yu'u. Nátitëbi' bulu'lisë'-bi'. <sup>10</sup> Bötjë' Pablo zcan yu'u na', ate' yöjxöë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

<sup>11</sup> Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bé'lenë' légaquië' didza' ga bidxintë zila balö. Gudödi ni' burúajë' ni'. <sup>12</sup> Bi'i bönni' ra'bán na' gubíxibi', bulu'ché'ë-bi' nabanbi', en bulu'zí' zxöndë'ë.

### *Ca guca bidxintu' Mileto*

<sup>13</sup> Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzö Asón para tsöjtságatu'-në' Pablo ni', para gaca ca na' chibén xtídza'tu', tu' gú'unnë' Pablo tsejë' ni' sé'esi ni'ë. <sup>14</sup> Cate' chibudzágatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene. <sup>15</sup> Buzá' barco ni', ate' dza buropi bidxintu' tödi li ga zoa luyú bidxi nazí'í le Quío, ate' ia'tú dza ca' gudöditu' tödi li ga dë yödzö Samos, en bidxintu' yödzö Trogilio ga ni' guzóatu' tu chi'i. Ia'tú dza ca' bidxintu' yödzö Mileto. <sup>16</sup> Caní bentu' tu' chibenë' queë' Pablo tödisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

### *Didza' bë'ë Pablo lu yödzö Mileto*

<sup>17</sup> Cate' ni' zoë' Pablo lu yödzö Mileto, gusól-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso. <sup>18</sup> Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. <sup>19</sup> Yugu' dza bena' xichinè' Xanru' lu yöl-la' nòxaj ladxi', ga bidxintè gurödxá' ni'a queéli', ate' zían le guca quia' le guzxi' bē' neda' ni'a que le ruá' dö' gulunè' quia' bönachi judío biti' ta'yéajlè' Cristo. <sup>20</sup> Béntica'sa' libán ga zóali' que yúgu'tè le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. <sup>21</sup> Bena' ba nalí lógaca bönachi judío, en lógaca bönachi izá'a para ulu'bí'i ládxi' gaca, en ulu'huóáca queé' Dios, en ila'yéajlè' Xanru' Jesucristo. <sup>22</sup> Na'a, Dios Bö' Lá'ayi chinunè' quia' tseja' Jerusalén, en biti' nözda' bizxi gaca quia' ni'. <sup>23</sup> Yúgu'tè yödzö ga ridá', riguíxjöi'inè' Dios Bö' Lá'ayi neda', rē' neda' ila'gu'è neda' lidxi guié bönni' judío biti' ta'yéajlè', en ulu'saca' zì'è neda'. <sup>24</sup> Biti' bi runi neda' que lē na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödè' Xanru' Jesús lu na'a, le naca guna' libán que didza' dxi'a ca naca le ruzá' ládxi'è Dios queéru'. Caní guna' len yöl-la' rudzeja.

<sup>25</sup> Na'a, yúgu'tèli' na' chibena' libán loli' ca rinná bē'è Dios, nözda' bíti'rö ulé'eli' neda'. <sup>26</sup> Que lē ni na', le nácatè rea' libí'ili' na'a dza. Biti' nabága'a neda' queéli' nituli' libí'ili'. <sup>27</sup> Biti' bi bucáchi'da' libí'ili', pero gudíxjöi'ida' libí'ili' yúgu'tè le rnnè' Dios. <sup>28</sup> Que lē ni na', guli'gún chi'i cuinli', en guli'gún chi'i yúgu'tè bönachi queé' Cristo, tu' nuzöè' Dios Bö' Lá'ayi libí'ili' para gácalenli' légaquiè', en gun chí'ili' bönachi queé' Xanru', Bönni' na' gútiè' uláz quégaquiè', bulaljè' xichönè' le böá'uinè' légaquiè'. <sup>29</sup> Chinözda', tödi uzá'a ga zóali', ila'yaza nupa ilè'èni ulu'suniti bönachi queé' Cristo ga zóali', ilunè' ca tunba' bö'cu' guí'a sínia', tu'sunítiba' yugu' bö'cu' zxila'. <sup>30</sup> Ila'ruájè' bönni' nútsa'gaquiè' ládjali', ate' ilu'è didza' biti' nácatè para ulu'béajè' quégacasè' nupa ta'yéajlè' Cristo nútsa'gaca ládjali'. <sup>31</sup> Que lē ni na', guli'sóa ban ladxi', en guli'tsöjné ca bena' neda' idú ca tsonna iz, rēla, en tē dza buchízia' icja nágalí tu tuli' ga bidxintè gurödxá' queéli'.

<sup>32</sup> Na'a, böchi' luzá'ado', rigú'a libí'ili' lu nē'è Dios. Rinábida' Lē' uzá' ládxi'è queéli', en gunè' ca rna xtídzè'è. Dios gunè' libí'ili' tsutsu, en gunè' ga idéli'li' gunli' tsözxön yugu' bönni' rö queé'. <sup>33</sup> Catu caz guzè ládxa'a le nequi quégaquiè' böchi' luzá'a. Biti' guzè ládxa'a dumí, o lari' quégaquiè'. <sup>34</sup> Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. <sup>35</sup> Ca naca yúgu'tè le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bē'è Xanru' Jesús, gunné': "Uzírö xibé nu bi runödzej ca nu bi rizí'."

<sup>36</sup> Cate' budxi bē'è Pablo didza' ni, buzóa zxibè', ate' benè' tsözxön yúgu'tè', bulu'lidzè' Dios. <sup>37</sup> Ní'irö gula'bödxè' yúgu'tè'. Bulu'nidè' yenè' Pablo, en bulu'tsaga lahuè' lē'. <sup>38</sup> Caní gulunè' tu' bulu'huí'innè' ni'a que didza' na' bē'è Pablo, gunné': "Biti'rö ulé'eli' neda'." Yöjácalenè' tsözxön lē' ga na' gurenè' lu barco.

## 21

### *Sa'yéajè' Pablo Jerusalén*

<sup>1</sup> Gudödi bulá'alentu' légaquiè', guyú'utè nözä barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. <sup>2</sup> Yöjxáca'tu' tu barco yúbölö ni' le zeaj luyú Fenicia. Gurentu' lē'e barco na', ate' guyú'utè nözä. <sup>3</sup> Gudöditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lē'e barco na'. <sup>4</sup> Lu yödzö Tiro na' yöjxáca'tu' tu bönni' réajlè'è Cristo, ate' bugá'analentu' lē', en yugu' böchi'ru' ni' idú gadxi dza. Tu' chibuluí'inè' Dios Bö' Lá'ayi légaquiè' le ral-la' gaca queé' Pablo, gulé' lē' biti' tsejè' Jerusalén. <sup>5</sup> Cate' chibizá'a dza na', burúajtu' ni', ate' gula'zá'lenè' netu' tsözxön yúgu'tè' len nigula que quégaquiè', en yugu' bi'i quégaquiè', ga bidxintètu' ní'ilo ra' yödzö na'. Ra' nísado' ni' buzóa zxíbitu', en bulidztu'-nè' Dios. <sup>6</sup> Budxi bunida' luzá'atu' tutu' ia'tutu', bubentu' lē'e barco, ate' légaquiè' yöjhuójgaquiè' lídxigaquiè'.

<sup>7</sup> Buzá'atë barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza. <sup>8</sup> Cate' za' rení' ia'tú dza, burúajë' Pablo ni', ate' dzágotu'-në' netu' guyéajtu' yödzö Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. <sup>9</sup> Nacuá'abi' tapa bi'i nigula ra'bán queë' Felipe na', tuí'ibi' didza' uláz queë' Dios. <sup>10</sup> Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. <sup>11</sup> Bönni' ni buduyúë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a.”

<sup>12</sup> Cate' biyönitu' didza' ni, gúta'yutu' lahuë' Pablo, netu', en nupa nacua' ni', para cabí tsejë' Jerusalén. <sup>13</sup> Bubi'ë didza' Pablo, gunné':

—¿Bizxi ni runli', ribödxili', en rusuhuí'inili' neda'? Neda' chizóa caza' sina', calégasö ilúguië' neda', pero gátia' ca' lu yödzö Jerusalén ni'a queë' Xanru' Jesús.

<sup>14</sup> Tu' cabí guxzéqui'tu'-në' didza', bítirö bi gúdxitu'-në', ate' gunnatu':

—Gaca ca raza ládxë'ë Xanru'.

<sup>15</sup> Cate' chigula'dödi dza na', bupa'atu' queëtu', ate' guyéajtu' Jerusalén. <sup>16</sup> Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

### *Pablo röjyüë' Jacobo*

<sup>17</sup> Cate' bidxintu' Jerusalén, len yöl-la' rudzeja quégaquië' böchi'ru' ni' ta'yéajlë'ë Cristo gulunë' netu' bal. <sup>18</sup> Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queë' Cristo nacu'ë Jerusalén. <sup>19</sup> Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacua' bönachi izá'a. <sup>20</sup> Cate' bila'yönnë' lë' ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të túndë'ë bal xibá queë' Moisés. <sup>21</sup> Chibila'yönnë' yugu' le tuí' didza' bönachi le ta'nnë quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' bití' ila'chúguië' lu xpéla'gacabi' bi'i bönni'do' quégaquië', en bití' ilunë' bal yugu' le nalëbiru' runru' rë'u, bönachi judío. <sup>22</sup> ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni.

<sup>23</sup> Na'a, ben lë' ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'. <sup>24</sup> Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudizxaj lí' le ral-la' ila'guizxjë' para ilún yútusö ícjagaquië'. Ní'irö ila'nözinë' yúgu'të bönni' judío bití' nácatë lë' na' ta'nnë' quiu', pero lësca' li' runu' le naca dxi'a, en runu' ca rinná bë' xibá queë' Moisés. <sup>25</sup> Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Bití' run bayudxi ilún chi'ë yugu' lë' ni tunë' bönni' judío, pero tuz:

Bití' ilahuë' le ta'gú'u bönachi lógaca budó' guiöj budó' yaga.

Bití' ilahuë' rön.

Bití' ilahuë' xipéla'gacaba' böa' guixi' bití' narúaj-gácaba' rön.

Bití' ilunë' le ruá' dö'.

### *Ta'zönë' Pablo lö'a yudo'*

<sup>26</sup> Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cuíngaquië', dza ni' ral-la' tsöjuá'agaquië' le ila'gu'ë lahuë' Dios que quégaquië'. <sup>27</sup> Cate' chizóa izá'a gadxi dza na', bal-lë' judío narúajgaquië' luyú Asia

bila'lé'enë' Pablo, zoë' lö'a yudo'. Gulunë' ga gulún dzatsa bönachi zián, ate' gula'zönë' Pablo. <sup>28</sup> Gulu'ë zidzaj didza', ta'nnë':

—¿Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

<sup>29</sup> Caní gula'nnë' tu' bila'lé'enë' Pablo zí'alö lu yödzö dzáguie' Trófimo, bönni' Éfeso, en téquinë' gulu'ë bönni' ni lu yudo'.

<sup>30</sup> Caní guca, bulu'dubi yúgu'të bönachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lé', bulu'béajë' lé' lö'a yudo', ate' la' bulu'sáyjatë' ga nu riyaza lö'a yudo' na'. <sup>31</sup> Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén. <sup>32</sup> Bönni' lo ni la' butúbitë' bönni' röjáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' röjáquië' gudil-la, en bönni' na' röjáquië' gudil-la, bulu'sanë' ta'guinë' Pablo. <sup>33</sup> Ní'irö gubígui'ë bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lé' len chopa du guié. Gudödi ni' gunábinë' bönachi zián ni', rnnë':

—¿Nuzxi caz bönni' ni, en bizxi benë'?

<sup>34</sup> Ta'bödxí'a bönachi zián na', que queëgaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'chë'ë Pablo lu yu'u zxön ga nagá'anagaquië' bönni' na' röjáquië' gudil-la. <sup>35</sup> Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'ínë' Pablo, tu' dxíadi'igaca bönachi zián légaquië', <sup>36</sup> en zá'gaca cúdzu'lögaquië', ta'bödxí'a, ta'nná:

—Guli'gútië'.

### *Didza' bë'ë Pablo uláz queë' lógaca bönachi*

<sup>37</sup> Cate' ni' gula'sí lógaquië' ila'gu'ë Pablo lu yu'u zxön ni', lé' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? <sup>38</sup> ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

<sup>39</sup> Ní'irö Pablo gudxë' lé', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

<sup>40</sup> Bönni' lo na' bë'ë lé' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zián ni'. Cate' chigula'cu'ë dxisö, Pablo bé'lenë' légaquië' didza' lu didza' hebreo.

## 22

<sup>1</sup> Caní gunné' Pablo:

—Libí'ili', bönni' gula, en libí'ili' böcha'a. Buli'zé nágali' le guía' libí'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quegaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a. <sup>4</sup> Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxóngaca'-në', en gulú'ugaca'-në' lidxi guié, yugu' bönni', en nigula. <sup>5</sup> Lë'sca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsöjxóngaca' nupa ni' ta'yéajlé' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

*Rigúxjö'ë Pablo ca böáquië' queë' Cristo*

<sup>6</sup> Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyépi yösa bení' le za' lúzxiba, le buzení' ga na' sa'yéaja'. <sup>7</sup> La' yöjötá'tea' lu yu, en biyönda' chí'i Nu gudxi neda': "Saulo, Saulo, ¿bizx que ribía ládxi'u neda'?" <sup>8</sup> Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." <sup>9</sup> Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chí'i Nu na' bulidza neda'. <sup>10</sup> Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." <sup>11</sup> Tu' cabirö rilé'eda' tu' budí'i yösa bení' na' guyépidá' lahua', que lë' ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

<sup>12</sup> Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. <sup>13</sup> Bidxinë' Ananías na' ga zoa', en gudxë' neda': "Saulo, böcha'a, huóalaj guiöj lo'." La' ní'isö böálaj guiöj lahua', ate' bilé'eda' lë'. <sup>14</sup> Lë' gudxë' neda': "Dios quégaquië' xuz xtó'oru', dza ni'te gurö cazë' li' para inözinu' le rë'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guié' Lë' cazë' li'. <sup>15</sup> Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyönninu'. <sup>16</sup> Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugüë' dul-la' nabágu'u."

*Cristo gusöl-lë'ë Pablo para gunë' libán lógaca bönachi izá'a*

<sup>17</sup> Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. <sup>18</sup> Bilé'eda'-në' Xanru', ate' gudxë' neda': "¡Guyéaj carelô! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!" <sup>19</sup> Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sedë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guié. <sup>20</sup> Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chí'a lari' nácugaquië' bönni' na' bulu'ladxë' lë' guiöj." <sup>21</sup> Ní'irö Xanru' gudxë' neda': "Guyéaj, tu' risöl-la'a lí' lógaca bönachi izá'a."

*Pablo ru'ilenë' bönni' lo didza', bönni' rinná bé'enë' bönni' röjáquië' gudil-la*

<sup>22</sup> Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Gulí'gútië' bönni' ni! ¡Bíti'rö ral-la' soë' ibanë'!

<sup>23</sup> Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, <sup>24</sup> bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácatë, para ila'nözinë' bizx que na' ta'bödxi'ë bönni' judío caní queë' Pablo. <sup>25</sup> Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntú nu buchi'a busörö neda' channö nabága'a xíguia'.

<sup>26</sup> Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

<sup>27</sup> Ní'irö bidë' bönni' lo na' ga zoë' Pablo, en gudxë' lë':

—¡Gudíxjö'! ¿Naru' nababu' li' Roma?

Pablo gudxë' lë':

—Ön, nababa'.



<sup>28</sup> Bubi'ë didza' bönni' lo na', gunnë':

—Neda' ni, dumí zían gudixja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

<sup>29</sup> Cate' bönni' na' chizóa ila'guinë' lë' bila'yönnë' lë' ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

*Ridxinë' Pablo lógaquië' bönni' yudo' tu'chi'a tu'söröë'*

<sup>30</sup> Dza buropi ni', gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzöë' lë' lógaquië'.

## 23

<sup>1</sup> Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunnë':

—Libí'ili', böcha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuë' Dios.

<sup>2</sup> Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë.

<sup>3</sup> Pablo gudxë' lë':

—Lëzca' caní Dios ubi'ë quiu', li', rulu'isö tsahui' cuinu'. ¿Naru' rö'ö cazu' ruchí'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

<sup>4</sup> Nupa nacua' ni' tē Pablo:

—¿Naru' rulidza zi'tso'-në' bixúz lo queë' Dios?

<sup>5</sup> Pablo gudxë' légaquië':

—Libí'ili', böcha'a. Nazúaj lu guichi, rna: “Bití' ulidza zi'u nu rinná be'e bönachi uládz quiu'”, pero neda' bití' gúquibe'eda' náquië' bixúz lo.

<sup>6</sup> Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunnë':

—¡Libí'ili', böcha'a! ¡Naca' bönni' fariseo, en naca' xzí'inë' tu bönni' fariseo! ¡Na'a ruchí'a rusöröli' neda' tu' runa' löza ulu'bán nupa chinátigaca!

<sup>7</sup> Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídze'ë la' légacasë'. <sup>8</sup> Caní gulunë' tu' ta'nnë' bönni' saduceo na' bití' ulu'bán nupa chinátigaca, en bití' nacu'ë gubáz lá'ayi, en bití' nacua' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë' ni. <sup>9</sup> Que lë' ni na' gula'bödxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídze'ë, ta'nnë':

—Rusáca'tu' queëtu' bití' bi dö' nu'ë bönni' ni. Channö tu bö' naca caz bönachi bë'len lë' didza', o channö tu gubáz lá'ayi queë' Dios bë'lenë' lë' didza', bití' ral-la' tá'baga'ru'-në' Dios.

<sup>10</sup> Cate' chita'díl-lada' dídze'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quinnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'ché'ë lë' lu yu'u zxön ga na' nagá'anagaquië' bönni' na' röjáquië' gudil-la.

<sup>11</sup> Cate' chinaca chi'i dzö'ölö la' dza ná'asö, buluí' lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzo Roma.

*Tun xtídza'gaquië' ilútië' Pablo*

<sup>12</sup> Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. <sup>13</sup> Nayanrö ca choá'gaquië' bönni' na' gulún tsutsu xtídza'gaquië' caní. <sup>14</sup> Yójáquië' bönni' ni ga nacu'ë yugu' bixúz unná bë', en bönni' gula tu'zëajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' gu'aj gágutu' ga gútirötu'-në' Pablo. <sup>15</sup> Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' rójáquië' gudil-la idichë'ë Pablo cuxö para idxinë' ga nudúbili', innali' ré'ënili' inábili'-në' Pablo tu didza' gate ga rë'. Netu' cö'ö nistu'-në' la nōza, ate' gútitu'-në' zí'alö ca idxinë' ni.

<sup>16</sup> Biyónibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo. <sup>17</sup> Pablo bulidzë' tuë' bönni' nacu'ë lu në'ë bönni' rójáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

<sup>18</sup> Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulidzë' Pablo, bönni' na' yu'ë lidxi guié, neda', en gúta'yuë' lahua' idigu'a-bi' bi'i ni lo', tu' ré'ënibi' gü'ilenbi' li' didza'.

<sup>19</sup> Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

<sup>20</sup> Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxö, para idxinë' lógaquië' bönni' yudo' tu'chi'a tu'söröë'. Ilë' li' té'ënnë' ila'nábinë' lë' tu didza' gate ga rë', <sup>21</sup> pero biti' tséajlë'u le ila'nnë' tu' nadödi choá'gaquië' ila'bö' nísie' Pablo. Chigulún tsutsu xtídze'ë gula'nnë' gunë' Dios légaquië' xíguia' channö cabí ilútië' lë'. Biti' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

<sup>22</sup> Ní'irö bönni' lo na' rinná bé'enë' bönni' rójáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busöl-lë'ë-bi' bi'i ni.

### *Ridxinë' Pablo lahuë' Félix, bönni' rinná bë'ë luyú na'*

<sup>23</sup> Ní'irö bönni' lo na' bulidzë' chopë' bönni' nacu'ë tu gáyu'ë bönni' rójáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rójáquië' gudil-la ta'zë'e ní'agaquië', en tsónnalalay yu' chië' bönni' rójáquië' gudil-la dxíagaquië' böa', en chopa gáyu'ë bönni' rójáquië' gudil-la ilu'ë yaga tuchi' para tsöjáquië' yödzö Cesarea idú ridödi xtsö'. <sup>24</sup> Lësca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

<sup>25</sup> Gusöl-lë'ë ca' tu guichi le rnna caní:

<sup>26</sup> “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

<sup>27</sup> Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rójáquië' gudil-la, en busölá'-në' lu ná'agaquië' judío na'. <sup>28</sup> Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'. <sup>29</sup> Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guié. <sup>30</sup> Ní'irö cate' bidxín nu gudíxjöi'i neda' ta'bö' nísie' yugu' bönni' judío lë', la' gusöl-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápagaquië' lë'. ¡Dios gun tsáhuë'ë li'!”

<sup>31</sup> Ní'irö bönni' na' rójáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'ché'ë lë' yödzö Antípatris, ni' naca chi'i dzö'ölö. <sup>32</sup> Cate' za'

rení ia'tú dza bönni' röjáquië' gudil-la ta'zë'e ní'agaquië' yöjhuójgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nōza, dzágagaquië' Pablo. <sup>33</sup> Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzejë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'. <sup>34</sup> Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, <sup>35</sup> gudxë' lë':

—Yönida' le innó' cate' ila'dxín ni nupa tu'zegui li' didza'.

Ní'irö gunná bë'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

## 24

### *Pablo ru'ë didza' uláz queë' lahuë' Félix*

<sup>1</sup> Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' naz'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. <sup>2</sup> Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queëtu'. <sup>3</sup> Yúgu'të lë ni ruzi'tica'stu' xibé gátitës, ate' idú ládxi'tu' rëtu' li': "Xclenu'." <sup>4</sup> Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guíëtu' li'. <sup>5</sup> Gúquibe'etu' bönni' ni rigú'u yöl-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idütë yödzólió, en náquië' bönni' lo quégaquië' bönni' dá'gaquië' bönni' Nazaret na'. <sup>6</sup> Lësca' gú'unnë' gun dítjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'. <sup>7</sup> Ní'irö Lisias, bönni' lo rinná bë'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugüë' bönni' ni lu na'tu'. <sup>8</sup> Ní'irö gunná bë'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inózinu' gate ga rë' yúgu'të lë ni ruzéguitu' lë' didza'.

<sup>9</sup> Lësca' caní gula'nnë' yugu' bönni' judío ni', gula'nnë' naca caz caní. <sup>10</sup> Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quíxjö'a ca naca le runa', tu' chinaca zián iz ruchí'a rusöröu' le raca quégaca bönachi ladztu'. <sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. <sup>12</sup> Biti' yöjxáca'gaquië' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzö. <sup>13</sup> Biti' ca' gaca ulu'béaj lië' yugu' lë ni tu'zéguië' neda' didza'. <sup>14</sup> Lë ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. <sup>15</sup> Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'. <sup>16</sup> Que lë ni na' ruí'i ládxi'tica'sa' cabí ibága'a le gun ga uxös ládxi'da'ahua' neda' lahuë' Dios o lógaca bönachi.

<sup>17</sup> Gudödi zoa' ga yúbölö idú chopá tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigú'a lahuë' Dios. <sup>18</sup> Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zián, en cabí nuna' ga ulu'tsatsa bönachi. <sup>19</sup> Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'. <sup>20</sup> Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a

tu'söröë' légaquië'. <sup>21</sup> Tuz cate' ni' zoa' lógaquië', bë'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

<sup>22</sup> Cate' biyönnë' Félix didza' ni, en dxí'ado' chinözinë' ca naca que lë na' rusëdinë' Pablo, buzë lähui'së' ca' didza' bizxaj ni, gunnë':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yönida' ca naca didza' bizxaj queëli'.

<sup>23</sup> Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

<sup>24</sup> Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo. <sup>25</sup> Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

<sup>26</sup> Lësca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zían luzuí bulidzë' Pablo, en bë'lenë' lë' didza'. <sup>27</sup> Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guié.

## 25

### *Ridxinë' Pablo lahuë' Festo, bönni' unná bë'*

<sup>1</sup> Bidxinë' Festo yödzo Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzë'ë yödzo na', sa'yéajë' Jerusalén. <sup>2</sup> Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo <sup>3</sup> bi uzá ládxi'ë quégaquië', isöl-lë'ë nupa tsöjxí'gaca Pablo, para udxinë' Jerusalén. Gulë'ënnë' ila'bö' nísie' lë' la' nöza para ilútië' lë'. <sup>4</sup> Bubi'ë didza' Festo, gudxë' légaquië':

—Lu yödzo Cesarea nadzunë' Pablo, ate' ral-la' tseja' ni' cuxö huidzaj nisö. <sup>5</sup> Que lë ni na', núti'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

<sup>6</sup> Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia' tú dza gurö'ë ga ruchi'a rusöröë', en gunná bé'enë' nupa tsöjxí'gaca Pablo. <sup>7</sup> Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'. <sup>8</sup> Ní'irö bë'ë didza' Pablo uláz queë', gunnë':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

<sup>9</sup> Gú'unnë' Festo gunë' le ila'yaza ládxi'gaquië' bönni' judío, ate' bubí'ë didza', gudxë' Pablo:

—¿Ré'ënu' so'o Jerusalén, ga na' soa nu uchi'a usörö li' ca nácagaca lë ni ta'nnë' quiu'?

<sup>10</sup> Bubi'ë didza' Pablo, gudxë' lë':

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usöröu' neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni. <sup>11</sup> La'tu' nuna' tu le ruá' dö', o bítitës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a urö quia'.

<sup>12</sup> Cate' Festo chibë'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

### *Ru'ë didza' Pablo lahuë' Agripa, bönni' unná bë'*

<sup>13</sup> Gudödi chopa tsonna dza, bidxinë' Agripa, bönni' rinná bē'ē lu yōdzō Cesarea, dzáganu Berenice lē', duyúgaquiē' Festo. <sup>14</sup> Cate' chigula'cu'ē ni' zián dza, Festo buluí'inē' Agripa, bönni' rinná bē'ē, ca naca queē' Pablo. Gudxē' lē':

—Zoē' tu bönni' ni bucá'anē' Félix lē' lidxi guíē. <sup>15</sup> Cate' guzóa' Jerusalén, yugu' bixúz unná bē', en bönni' gula tu'zėjni'inē', bila'dxinē' lahua', ate' gula'nnē' queē' bönni' ni. Gula'nábinē' neda' ichuga' queē' gátiē. <sup>16</sup> Neda' bubí'a didza', gudxa' légaquiē' bití' nalébiguequinē' bönni' Roma ila'chúguiē' queē' tu bönni' gátiē' channō cabí ila'dxini lahuē' nupa tu'zegui lē' didza', para gaca ubi'ē didza' ca naca lē' na' ta'nnē' queē'. <sup>17</sup> Que lē' ni na', cate' bila'dxinē' légaquiē' ni, bití' ca' gudzedá', pero cate' guzá' gúyeaní' ia'tú dza gurō'a ga ruchí'a rusōrōa', ate' gunná bé'eda' nupa yōjxí'gaca bönni' ni. <sup>18</sup> Cate' gula'cu'ē ni bönni' na' tu'zéguiē' lē' didza', bití' bi gula'nnē' queē' ca busaca' quia' ila'nnē'. <sup>19</sup> Gula'nnē' queē' bal-la didza' bizxaj ca naca le ta'yéajlē'ē Dios, en ca naca queē' tu bönni' lē' Jesús, nu na' guti, pero Pablo runē' tsutsu xtídzē'ē rnnē' ni zoē' nabanē' leyúbölö. <sup>20</sup> Tu' buchíxida' ca náca'gaca lē' ni, gunábida'-nē' Pablo channō ré'ēnē' tsejē' Jerusalén, ga ni' soa nu uchi'a usōrō lē' ca náca'gaca lē' ni. <sup>21</sup> Ní'irō cate' gunabē' Pablo tsejē' lahuē' Augusto César para uchi'a usōrōē' lē' ni', gunná bé'eda' bönni' rōjáquiē' gudil-la ilún chí'igarē' lē' cate' gála'rō dza isól-la'a-nē' lahuē' César.

<sup>22</sup> Ní'irō Agripa gudxē' Festo na':

—Lēzca' neda' ré'ēnda' yōnida' le innē' bönni' na'.

Festo gudxē' lē':

—Cuxó yōnnu' le innē'.

<sup>23</sup> Cate' za' rení' ia'tú dza, len ba zxōn bila'dxinē' Agripa, en Berenice ni'. Gula'yáziē' ga ral-la' ilu'ē didza', dzágagaquiē' légaquiē' bönni' unná bē', ate' gula'sól-lē'ē nupa tsōjxí'gaca Pablo. <sup>24</sup> Ní'irō Festo gudxē' Agripa, bönni' unná bē':

—Bönni' unná bē', Agripa, en yúgu'tēli' zóali' ni tsōzxōn len netu'. Ni zoē' rilé'eli'-nē' bönni' na', ta'nnē' queē' yúgu'tē bönni' judío nacu'ē Jerusalén, enca' nupa nacuá' ni, tē' neda' ral-la' gátiē. <sup>25</sup> Runi neda' bití' bi benē' le nabáguē'ē xíguia' gátiē', pero tu' gunabē' lē' cazē' tsejē' ga uchi'a usōrōē' Augusto César lē', que lē' ni na' chinuna' quia' isól-la'a-nē' lahuē' Augusto. <sup>26</sup> Tu' cabí nōzda' bi ral-la' uzúaja' lu guichi le zegui bönni' ni didza' para isól-la'a lu nē'ē César, xana', que lē' ni na' nachē'a-nē' loli', en le nácarō lo, nachē'a-nē' lo' li', Agripa, bönni' unná bē', para cate' údxí rinábini yudxu'-nē', ní'irō inōzda' bi ral-la' uzúaja' lu guichi ca naca queē' bönni' ni. <sup>27</sup> Réquida' bití' naca dxi'a isól-la'a-nē' nu bönni' náguē'ē ni' channō cabí gaca ulu'a le nabáguē'ē.

## 26

*Didza' bē'ē Pablo uláz queē' lahuē' Agripa, bönni' unná bē'*

<sup>1</sup> Ní'irō Agripa gudxē' Pablo:

—Dē lataj gu'u didza' uláz quiu'.

Buchila nē'ē Pablo lahuē' Agripa, ate' gusí lahuē' ru'ē didza', rnnē':

<sup>2</sup> —Bönni' unná bē', Agripa. Raza ládxa'a tu' dē lataj na'a gu'a didza' uláz quia' lo' li' ca naca yúgu'tē le tu'zéguiē' bönni' judío neda' didza'. <sup>3</sup> Raza ládxi'ra' tu' núnbē'u yúgu'tē le nalébiguequinē' tunē' bönni' judío, enca' yugu' lē' ni ridíl-latu' didza'.

*Yugu' le benē' Pablo zí'atēlö*

<sup>4</sup> Gunnē' ca' Pablo:

—Nōzguequi quézinē' yúgu'tē bönni' judío ca na' bena' ga gudéla'tē cuídia' ga nacuá' bōnachi uládz quia', enca' lu yōdzō Jerusalén. <sup>5</sup> Nōzguequi quézinē' ca', en huáca ila'guíxjō'ē ca na' bena' dza ni'te. Guca' bönni' fariseo. Yugu' bönni' fariseo tuí' ládxi'gacaré' ila'yéaj ládxi'gaquiē' Dios ca tunē' ia'zíca'rē' bönni' judío. <sup>6</sup> Na'a, zoa' ni loli' para nu uchi'a usōrō neda' tu' runa' löza Dios, usubanē' bönni' nati, en gunē' ca na'

guzxí' lu në'ë lógaquië' xuz xtó'otu'. <sup>7</sup> Tunë' löza yugu' bönni' idxinu cö' di'a dza queëtu' ila'déli'në' lë na' guzxí' lu në'ë Dios. Que lë ni na' ta'yéaj ládxi'gaquië' Dios, en tunë' xichinë' rëla, en tè dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bë', Agripa. <sup>8</sup> Na'a, ¿naru' réquitseli' libí'ili' bití' naca le tséajlë'ëru', usubanë' Dios bönni' nati?

*Pablo gudxía ládxe'ë bönachi queë' Cristo*

<sup>9</sup> Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. <sup>10</sup> Caní bena' lu yödzo Jerusalén. Gulu'a zían bönachi ta'yéajlë' Jesús lidxi guíë, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' bönachi ni', bénlena' légaquië' tuz didza'. <sup>11</sup> Zían luzuí busaca' zí'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sédë' queë' Dios. Guléde'eda' légaquië', ate' gudxía ládxa'a légaquië' ga bidxintë guyija' gapa nacua' yödzo zí'tu' para tsöjxöngaca'-në'.

*Riguíxjö'ë Pablo ca böáquië' queë' Cristo*

<sup>12</sup> Gunnë' ca' Pablo:

—Para guna' caní guyija' yödzo Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'. <sup>13</sup> Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacua' nupa söjácalen neda'. <sup>14</sup> Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bizx que ribía ládxi'u neda'? Run zí' cuinu', ridá'bagu'u neda'. Raca quiu' ca raca queëba' bëdxi, run zí' cuinba', richégu'ba' yaga tuchi' le túndë'ë-ba' zí'." <sup>15</sup> Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxi'u." <sup>16</sup> Na'a, guyasa, en guzú, tu' buluí'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'. <sup>17</sup> Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a. <sup>18</sup> Risöl-la'a li' ga na' nacué' para gunu' ga ulu'huóálaj guiöj lógaquië', en ulu'huóáquië' queë' Dios, en ulu'cá'anë' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

*Benë' Pablo ca naca le buluí'inë' Xanru' lë'*

<sup>19</sup> Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluí'inë' Dios, zoë' yehua' yubá, neda'. <sup>20</sup> Buzéajni'ida' nupa nacua' yödzo Damasco, en gudödi ni' nupa nacua' Jerusalén, en nupa nacua' luyú Judea, en bönachi yugu' yödzo zí'tu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca. <sup>21</sup> Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. <sup>22</sup> Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. <sup>23</sup> Gula'nnë': "Qui'i sáquë'ë Cristo, en tódi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

*Pablo ruzéajni'inë' Agripa para tséajlë'ë Cristo*

<sup>24</sup> Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

<sup>25</sup> Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'. <sup>26</sup> Lë cazë' Agripa, bönni' ni rinná bē'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. <sup>27</sup> Bönni' unná bē', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

<sup>28</sup> Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

<sup>29</sup> Pablo gudxë' lë':

—Ni'a queë' Xanru' Dios rē'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero caléga gága'li' du guié ca ni nága'a neda'.

<sup>30</sup> Cate' budxi bē'ë Pablo didza' ni, guzuínë' bönni' lo unná bē' na', ate' gulazuínë' ca' bönni' rinná bē'ë, en Berenice, en nupa rō' lengaca légaquië'. <sup>31</sup> Cate' bila'ruájë' quez, gulu'í' xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en caléga tsázië' lidxi guié.

<sup>32</sup> Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

## 27

### *Ta'söl-lë'ë Pablo yödzö Roma*

<sup>1</sup> Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélé'ë Pablo, en ia'bal-lë' nupa nadzúngaca, ate' bulu'dödë' légaquië' lu nē'ë Julio, tu bönni' rinná bē'enë' tu cö' bönni' rōjáquië' gudil-la nazí'i le: Bönni' Queë' Augusto Rōjáquië' Gudil-la. <sup>2</sup> Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguie' netu'. <sup>3</sup> Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bē'enë' bönni' rōjáquië' gudil-la, lu yöl-la' dxi'i ladxi' queë', bē'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'. <sup>4</sup> Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rō'ö dxi bö' na' recja, tu' za' saca' lotu' bö' recja lu nísado' na'. <sup>5</sup> Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

<sup>6</sup> Bönni' na' rinná bē'enë' bönni' rōjáquië' gudil-la, en nachë'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rō' yödzö Roma. Gulu'ë netu' lë'e barco na'. <sup>7</sup> Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rō'ö dxi bö' na' recja, en bidxintu' ga nalá' yödzö Salmón luyú Creta na'. <sup>8</sup> Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

<sup>9</sup> Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', <sup>10</sup> rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

<sup>11</sup> Bönni' na', rinná bē'enë' bönni' rōjáquië' gudil-la, guyéajlë'ërë' le gula'nnë' bönni' na' dë lu nē'ë barco, en bönni' xan caz, ca le gunné' Pablo. <sup>12</sup> Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqúi' yúgu'të bönni' nacu'ë lë'e barco na' gulún tuz xtídza'gaquië' ulu'zë'ë ni',

channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

*Recja bö' budunu' lu nísado'*

<sup>13</sup> Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ënnë', ate' bulu'lisë' guië zi'i naga' du guië le ruzóa dxisö barco, ate' gudödi barco na' gala' ra' luyú bidxi na' nazí'i le Creta. <sup>14</sup> Ia'tú chí'isö ca', guyecja tu bö' budunu' za' lotu', nazí'i le Euroclidón. <sup>15</sup> Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bë'ëtu' lataj bö' na' buzéaj barco na' ga rë'ëni. <sup>16</sup> Cate' gudödi barco na' ga bidxintu' tsölá'a tu luyú bídximo' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxon na' yú'utu'. <sup>17</sup> Gudödi burentu' le lahui barco zxon na', ní'irö bëga'ratu' barco zxon na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bë'ëtu' lataj bö' na' recja buzéaj barco. <sup>18</sup> Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. <sup>19</sup> Dza bunny, len na' cuintu' gurú'unatu' le tun dxin que barco na' lu nísado'. <sup>20</sup> Cate' chiguca zían dza bití' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bití'rö runtu' löza ulatu'.

<sup>21</sup> Tu' chiguca zían dza bití' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzë nágali' neda', en cabí uzá'aru' luyú Creta, en cabí udutságaru' lë ni riguí' rizáca'ru', en yugu' lë ni raca ditaj que barco ni. <sup>22</sup> Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. <sup>23</sup> Caní gaca tu' budulu'i' lahuë' neda' gudiyëla tu gubáz lá'ayi queë Dios. Dios ni néquida' queë, en runa' xichinë'. <sup>24</sup> Gubáz lá'ayi na' gudxë' neda', gunné': "Pablo, bití' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'të bönachi nacua'len li' lë'e barco ni." <sup>25</sup> Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë neda'. <sup>26</sup> Caní gaca sal-la' run bayudxi gaca ditaj barco ni tu luyú bídximo', ga ni' tsöjca'ana rë'u.

<sup>27</sup> Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. <sup>28</sup> Gula'ru'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'látido', gula'ru'unë' du na' leyúbölö, en gula'nözinë' chinaca chinu ösa. <sup>29</sup> Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula'ru'unë' lu nísado' tapa guië zi'i nága'gaca du guië le tu'zóa dxisö barco lu nisa. Lu yöl-la' ruúbi ruguí'isö ládxi'do'gaquië' gula'bözë' tsení'. <sup>30</sup> Ní'irö gulé'ënnë' bönni' tunë' dxin lu barco ulu'zxúnajë' lë'e barco na'. Bulu'zötjë' bárcodo' na' dë lahui barco zxon na' lu nísado'. Gulunë' ca té'ënnë' ilu'ë ia'lati' zi'tu' guië zi'i na' naga' du guië le ruzóa dxisö barco na', le zoa saca' tsölá'a láhuilö. <sup>31</sup> Ní'irö Pablo gudxë' bönni' na' rinná bë'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, bití' gaca uláli'.

<sup>32</sup> Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yüë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, bití' bi náguli'. <sup>34</sup> Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

<sup>35</sup> Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzzuxjë' yöta xtila na', en gusi lahuë' rahuë'. <sup>36</sup> Ní'irö bila'dipa ládxi'gaquië' yúgu'të', en gulahuë'. <sup>37</sup> Tscatu' zóatu' lë'e barco na', gúcatu' idú



chopa gayuá' yu' tsónnalalaj yu' chizxópatu'. <sup>38</sup> Gudödi gulahuë', en bulu'huóljanë', ní'irö gula'ru'unë' zxoá' xtila dë'le' barco na' lu nisa, para ulu'lahuë' yua' dzö'ö'le' barco na'.

### *Raca ditaj barco lu nísado'*

<sup>39</sup> Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lé'enë' ga röjrö' nisa zxön na' gatsaj láhui'lö luyú bidxi na', en dë' lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'. <sup>40</sup> Ní'irö bulu'sedxë' yugu' du guié' nága'gaca yugu' guié' zí'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjrö' nísado' gatsaj láhui'lö luyú bidxi na'. <sup>41</sup> Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúde'lö barco na', gusí lo riguitsaj nísado' na' le, len yöl-la' rizá' que. <sup>42</sup> Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí'ila'zxúnnajë', ila'zxóë' lu nisa na'. <sup>43</sup> Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí' ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. <sup>44</sup> Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

## 28

### *Le benë' Pablo luyú bidxi nazí'i le Malta*

<sup>1</sup> Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. <sup>2</sup> Bönni' xidza' nacu'ë luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí', ate' bulu'lidzë' netu' yúgu'tëtu' iditsë'e cuintu', tu' rala'j guiöj, en runda' ziaga. <sup>3</sup> Ní'irö Pablo gúchë'ë tu' tsölén huága zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizzúnnajba' böchila que guí' na', ate' yöjtí'iniba' yen në'ë Pablo. <sup>4</sup> Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'túë':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tsahui' biti' ru'ë lë' lataj soë' ibanë'.

<sup>5</sup> Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí', ate' lë' biti' bi guca queë'. <sup>6</sup> Bönni' xidza' nacu'ë ni' tu'yüë' Pablo, bátacalö cö'ë gui, o tsó'ötë' gátie'. Ní'irö cate' chigudzé ta'bözë', en bila'lé'enë' biti' bi raca queë', ia'tú le guléquinë', ate' gula'nnë' naca cazë' tu dios.

<sup>7</sup> Lataj ní'isö dë' xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. <sup>8</sup> Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyüë' lë', en gudödi bulidzë' Dios, ní'irö guxóá në'ë bönni' huë' na', en bunë' lë'. <sup>9</sup> Tu' benë' Pablo lë' ni, lësca' bila'dxín nupa te'e ga zoë', nacuá' luyú bidxi ni', en bulu'huóáquië'. <sup>10</sup> Yugu' bönni' ni gulunë' netu' bal, en zían le gulunë' queëtu'. Cate' chizóá uzá'atu' luyú ni', bulu'nödzjé' yugu' le naquínitu' queëtu'.

### *Ridxinë' Pablo lu yödzö Roma*

<sup>11</sup> Cate' chiguca tsonna beo' zóatu' ni', ní'irö gurentu' tu lë' barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca bönachi Alejandría na'. <sup>12</sup> Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza. <sup>13</sup> Buzá'atu' ni', ate' gudöditu' tsölá'alö luyú ni', en bidxintu' yödzö Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxintëtu' yödzö Puteoli luyú Italia. <sup>14</sup> Lu yödzö na' yöjxáca'tu' yugu' böchi'ru' ta'yéajlë'ë Cristo, ate'

guláta'yue' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizë'e ní'atu'. <sup>15</sup> Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzödo' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxe'ë, en gudxë' Dios: "Xclenu'."

<sup>16</sup> Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyúë' lë'.

### *Runë' Pablo libán lu yödzö Roma*

<sup>17</sup> Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzarú', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guië'. <sup>18</sup> Ní'irö cate' chigula'nabi yúdxinë' neda' bönni' Roma, gulë'ennë' ulu'sanë' neda', tu' gulé'quibe'enë' biti' nabága'a xíguia' gátia'. <sup>19</sup> Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'. <sup>20</sup> Que lë' ni na' bulidza' libí'ili' para ilé'eda' libí'ili', en gü'ílëna' libí'ili' didza', tu' nága'a du guië' ni tu' runa' löza le runru' löza rë'u, bönachi Israel, gácatë lë' na' guzxí' lu në'ë Dios gata' queëru'.

<sup>21</sup> Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë' na' raca quiu', en cuntú nu ridxini nu naca böchi'ru' judío, nu usiyöni netu' channö nu bi rnnë' quiu' le ruá' dö'. <sup>22</sup> Na'a, rë'ënitú' yönitú' xtídzú'u, lë' na' riguinnaj icju', tu' chinözitu' ta'nnë' bönachi yúgu'të lataj quégaca nupa nazí' lu në'eguequi xibá cubi ni.

<sup>23</sup> Caní guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. <sup>24</sup> Bal-lë' gula'zí' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë. <sup>25</sup> Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë' na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

<sup>26</sup> Guyéaj lógaca bönachi ni', yöjödxi légaquië':

Yöni nágalí', pero biti' tséajni'ili'.

Uyuli' iná'ali', pero biti' ilé'eli'.

<sup>27</sup> Yugu' bönni' ni chinazidi icja ládxi'do'gaquië',

en biti' bi riyaza icja nágagaquië'.

Gulunë' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilé'ëni ulu'huöáca queë' Dios

para gaca una' léguequi.

<sup>28</sup> Na'a, ral-la' inözili' lë' ni. Dios risöl-lë'ë netu' lógaca bönachi izá'a para ulu'lágaca, ate' légaquië' ila'yönnë'.

<sup>29</sup> Cate' Pablo budxi bë'ë didza' ni, bila'rúajë' bönni' judío, ta'díl-lada' dídze'ë la' légacasë'.

<sup>30</sup> Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'. <sup>31</sup> Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntú nu buzaga' xinözë'. ¡Ca' naca!

## DIDZA' GUSÖL-LË'Ë PABLO YÖDZÖ ROMA

### *Pablo rugapë' Dios bönachi queë' Cristo nacu'ë Roma*

<sup>1</sup> Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en gurö cazë' neda' para guna' libán que didza' dxi'a queë'.

<sup>2</sup> Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. <sup>3</sup> Bulu'zúajë' lu guichi yúgu'të le ral-la' gunë' Zxí'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, <sup>4</sup> pero ca naca bö' naca cazë', le naca lá'ayi, naca bë' náquië' Zxí'inë' Dios, en nápadë'ë yöl-la' huáca. Naca bë' náquië' caní tu' hupanë' lu yöl-la' guti. <sup>5</sup> Ni'a que le benë' Jesucristo ruzí'iru' xibé le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë. <sup>6</sup> Bítsa'li' libí'ili' ládjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' ládxe'ë queëru', en le ribequi dxi ládxi'ru'.

### *Rë'ënë' Pablo tsöjyüë' bönachi queë' Cristo nacu'ë Roma*

<sup>8</sup> Lë ni risílahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu" ca naca queëli' yúgu'tëli', ate' ta'guixjö' bönachi idútë yödzölió ca réajlë'ëli' Jesucristo. <sup>9</sup> Idú ládxa'a runa' xichinë' Dios, runa' libán que didza' dxi'a ca naca queë' Zxí'inë'. Nözinë' Dios rulídzatica'sa'-në', en rinábida'-në' gaca tsahui' queëli'. <sup>10</sup> Rinábitica'sida' Dios, channö naca le rë'ënë' Lë', gunnë' neda' lataj uduyúa' libí'ili'. <sup>11</sup> Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu. <sup>12</sup> Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

<sup>13</sup> Böchi' luzá'ado', ré'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la' bönachi yödzölió ni. <sup>14</sup> Dë le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. <sup>15</sup> Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

### *Yöl-la' huáca zxön que didza' dxi'a*

<sup>16</sup> Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risílo, ré'ënë' Dios ila'yönnë' bönni' judío le, ate' tödi na' ila'yöni ca' bönachi izá'a. <sup>17</sup> Didza' dxi'a ni ruluí'i rë'u gunë' Dios ga huóácaru' tsahui', channö uyéajlë'ëru' Lë', en bití' gaca chopa ládxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

### *Xíguia' nabága' gaca bönachi*

<sup>18</sup> Dios, Nu zoa yehua' yubá, bulu'e lahui bití' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idútë li. <sup>19</sup> Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí'i quézinë' Dios lë ni ga na' nacu'ë. <sup>20</sup> Dza ni'te cate' si' guta' yödzölió, ga ridxintë na'a dza, yugu' le nunë' Dios nácgaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', bití' gaca ila'nnë' bití' nabága'gaquië' xíguia'. <sup>21</sup> Cate' ni' gulúnbë'ë Dios, bití'

gula'yéaj ládxi'gaquië' Lë' ca ral-la' tseaj ládxi'ru'-në' Dios, en biti' gulë' Lë': "Xclenu'." Que lë ni na', cá'asö böáca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'. <sup>22</sup> Sal-la' guléquinë' ta'yéajni'inë' yenni', bulu'huöáquië' bönni' biti' bi nözguequinë' <sup>23</sup> tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guiöj budó' yaga, budó' na' nácgaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

<sup>24</sup> Que lë ni na' Dios guléaj ládxi'gaquië' légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túë'. <sup>25</sup> Guca caní tu' bulu'cá'anë' xtídze'ë Dios, le naca idútë li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

<sup>26</sup> Que lë ni na' Dios guléaj ládxi'gaquië' légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. <sup>27</sup> Lësca' caní gulunë' yugu' bönni' biguíú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'túë', en gulunë' le tun ga nu ru-tuí'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'zá'quië' lu xipéla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

<sup>28</sup> Tu' cabí gulë'ënnë' ilunë' Dios bal, que lë ni na' guléaj ládxi'gaquië' légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

<sup>29</sup> Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachí, en zítë nácgagaquië' xihuí'.

Ta'nnë' que luzá'agaquië'.

<sup>30</sup> Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácgagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljë' le ruá' dö' ilunë', en ta'dá'baguë'ë xuz xiná'agaquië'.

<sup>31</sup> Nácgagaquië' bönni' biti' ta'yéajni'inë', en tun dítjagaquië' xtídza'gaquië'.

Biti' nácgagaquië' dxi'i ládxi' ca ral-la' ilácgagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

<sup>32</sup> Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calëgasö caní tunë', pero ta'yaza ládxi'gaquië' nupa tun ca' caní.

## 2

### *Naca tsahui' ichúquië' Dios quégaca bönachí gátigaca*

<sup>1</sup> Que lë ni na', biti' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. <sup>2</sup> Nöz quéziru' ca ruchi'a rusöröë' Dios. Naca idútë li ca ruchi'a rusöröë' nupa tun le ruá' dö'. <sup>3</sup> Lí' richugu bë'u nupa tun le ruá' dö', en tuz ca runu' lí'. ¿Naru' réquitsenu' uló' lí' cate' uchi'a usöröë' Dios? <sup>4</sup> ¿Naru' rucá'angatso' cá'asö yöl-la' dxi'i ládxi' idú queë' Dios, en yöl-la' riböza zxön ládxi' queë', en ca runë', ridzenë' para lenë' lí'? ¿Naru' cabí nöz quézinu' ruzá' ládxi'ë Dios quiu' yöl-la' dxi'i ládxi' queë' para gunë' ga ubí'i ládxi'u? <sup>5</sup> Lu yöl-la' ládxi'do' zidi quiu' biti' rubí'i ládxi'u. Que lë ni na' rusubaga' cuinu' xíguia' gunë' Dios lí' cate' uchi'a usöröë' bönachí, ate' gaca bë' naca ca ral-la' gunë' Dios cate' ichúquië'

quégaca bönachi ilátigaca. <sup>6</sup> La' dza ní'sö ubí'i cazë' Dios que queë' bönni' tsca naca le gulunë' tu tuë'. <sup>7</sup> Unödzej' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. <sup>8</sup> Lu yöl-la' rilé queë', Dios gunë' xíguia' nupa ta'dá'baga', en biti' té'ëni ilún ca rnna le naca idútë li, pero tun ca rnna le cabí naca tsahui'. <sup>9</sup> Ila'guí'i ila'záquië', en hu'inida' ládxi'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. <sup>10</sup> Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

<sup>11</sup> Caní uchi'a usöröë' Dios bönachi, ate' Lë' biti' runë' bal le ta'nnasö bönachi. <sup>12</sup> Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. <sup>13</sup> Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. <sup>14</sup> Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. <sup>15</sup> Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'. <sup>16</sup> Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

### *Yugu' bönni' judío, en xibá queë' Dios*

<sup>17</sup> Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, <sup>18</sup> nöz quézili' le rë'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a. <sup>19</sup> Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. <sup>21</sup> Na'a, libí'ili' rusédili' ia'zica' rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? <sup>22</sup> Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiöj budó' yaga. ¿Naru' ribántsali' le dzö'ö lu yudo' quéguequi? <sup>23</sup> Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en rigúitsjali' xibá le gunná bë'ë Lë'? <sup>24</sup> Nazúaj lu guichi lá'ayi ca runli', rnna: Ni'a que le runli' libí'ili' nupa biti' nácagaca judío ta'nnë' zì' queë' Dios.

<sup>25</sup> Le nácatë ruzi'u xibé lë na' narugu lu xipëlu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuóácu' ca tu bönni' biti' néquinë' queë' Dios. <sup>26</sup> Que lë ni na', channö zoë' tu bönni' biti' narugu lu xipélë'ë lë na' naca bë' nu nazí'i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipëla' cazë'. <sup>27</sup> Bönni' na' biti' narugu lu xipélë'ë lë na' naca bë' nu nazí'i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'. <sup>28</sup> Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipélë'ë nu bönni'. <sup>29</sup> Náquië' idú bönni' judío bönni' na' náquië' caní lu icja ládxi'da'ahuë', en le naca idú le

narugu lu xipélë'ë nu bönni' le naca bē' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lē' bal, pero Dios caz gunē' lē' bal.

### 3

<sup>1</sup> Channö caní naca, ¿bizxi ruzi'tsē' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë? <sup>2</sup> Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lē' biti' ta'yéajlë'ë Dios. ¿Naru' réquitsenu' biti' gunē' Dios ca rnna xtídzë'ë tu' cabí ta'yéajlë'ë Lē'? <sup>4</sup> ¿Biti' ca' gaca! Ral-la' guéquibe'eru' rúntica'sē' Dios ca rnna didza' bē'ë, sal-la' ta'zi' yē' yúgu'tē bönachi. Ca naca queë' nazúaj lu guichi lá'ayi le rnna:

Gaca bē' nacu' tsahui' ni'a que didza' ru'u,  
en uruju' tsahui' channö nu uchi'a usörö Li'.

<sup>5</sup> Cate' runru' le ruá' dö', Dios rnnē' biti' naca tsahui' le runru'. Lē ni naca bē' tsahui' náquië' Dios. Nacuá' nupa ta'nná: "Le cabí naca tsahui' le runru' naca bē' náquië' Dios tsahui', ate' que lē ni na' biti' ral-la' gunē' rē'u xíguia'." <sup>6</sup> ¿Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzölió ni?

<sup>7</sup> Cate' nu rizi' yē', Dios rnnē' biti' ru'i didza' nu na' ca runē' Lē'. Lē ni naca bē' naca idútē li didza' ru'ë Dios. Ta'nnē' bönni' le ta'zi' yē'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innē' nácagaquië' bönni' dul-la'. <sup>8</sup> ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnē' zi' queëru' ta'nná rusédiru' caní, ate' tsahui' naca ichúguië' Dios quéguequi.

#### *Yúgu'tëru' nabága'ru' dul-la'*

<sup>9</sup> ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'zíca'rö bönachi? ¿Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¿Yúgu'tē' nabága'gaquië' dul-la'! <sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'i.

Cuntu nu riguilaj Dios.

<sup>12</sup> Yúgu'tē' ta'dé' ga yúbölö.

Yúgu'tē' nanítigaquië'.

Cuntu nu run le naca dxi'a, cuntu nu caz.

<sup>13</sup> Lubá'agaquië' nácagaca ca yeru ba nayáljagaca.

Len yöl-la' rinnësö quégaquië' ta'zi' yé'enē' luzá'agaquië'.

Didza' rirúaj ruá'agaquië' naca ca le yudzu láya'ba' bēla sínia'.

<sup>14</sup> Len yugu' didza' tu'ë, tu'didza' yúdxinē' bönachi,

en ta'nnē' zi'ë quégaca bönachi na'.

<sup>15</sup> Nacu'ë sina' tútigaquië' bönachi.

<sup>16</sup> Gátitēs ga ta'dödē' tu'sunítië', en tu'saca' zi'ë luzá'agaquië'.

<sup>17</sup> Biti' ta'zéqui'nē' ila'bözē' dxí'ado'.

<sup>18</sup> Biti' ca' tádxinē' Dios.

<sup>19</sup> Nöziru' yúgu'tē didza' ni bē'ë Dios, rē' yugu' bönni' na' dē lu ná'agaquië' xibá queë'. Que lē ni na' cuntu nu gaca inná biti' nabága' dul-la', ate' yúgu'tē bönachi idútē yödzölió, uchi'a usöröë' Dios quéguequi. <sup>20</sup> Tuí'i ládxi'gaquië' yugu' bönni' judío ilunē' yugu' le rinná bē' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

#### *Uláru' tu' réajlë'ëru' Jesucristo*

<sup>21</sup> Na'a, chibulu'i lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bē' xibá queë' Dios, sal-la' lu xibá queë' na', en lu guichi

lá'ayi ga nazúajgaca le gula'nné' bönni' gulu'ë didza' uláz queë' Dios, ru'í didza' ca gaca huóácaru' tsahui'. <sup>22</sup> Dios caz runé' ga huóácaru' tsahui' tu' réajlë'ëru' Jesucristo, ate' guné' ga ulu'huóáca tsahui' yúgu'të nupa ila'yéajlë' Lë'. Tuz ca nácagaca yúgu'të bönachi <sup>23</sup> tu' núnagaquië' yúgu'të' dul-la', en biti' ca' nácagaquië' tsahui' ca na' náquië' Dios idú tsahui'. <sup>24</sup> Dios ruzá' ládxi'ë queëru', en nunsë' rë'u tsahui' tu' böá'uë' Jesucristo rë'u. <sup>25</sup> Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budödisë' cá'asö yugu' dul-la' benru' dza ni'te. <sup>26</sup> Caní benë' Dios, buluí' cuiné' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bönachi, runë' ga tu'huóáca tsahui' nupa ta'yéajlë' Cristo.

<sup>27</sup> ¿Naru' huácatsö gun ba zxön cuinru' ca naca queëru'? ¡Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. <sup>28</sup> Na'a, rusáca'ru' queëru' nuhuóáquië' tsahui' tu' bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

<sup>29</sup> Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na' <sup>30</sup> tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipéla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipéla'gaquië' lë na' naca bë'. <sup>31</sup> Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

## 4

### *Le benë' Abraham rusedi rë'u*

<sup>1</sup> ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxön cuiné', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le riguízjaru'-në' biti' naca tu le ruzá' ládxi'ru' queë', pero naca tu le ralla'ru' queë' bönni' na'. <sup>5</sup> Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'. <sup>7</sup> Caní gunné' David:

¡Bica' ba bönni' na' Dios runiti lahuë' le biti' naca tsahui' nunë', en rugüë' yugu' dul-la' nabáguë'ë!

<sup>8</sup> ¡Bica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

<sup>9</sup> ¿Naru' nácagacsë' bica' ba bönni' narugu lu xipéla'gaquië' lë na' naca bë', o nácagaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. <sup>10</sup> ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'aló? Biti' guca cate' chinarugu lu xipélë'ë, pero zí'aló guca. <sup>11</sup> Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'. <sup>12</sup> Náquië' Abraham xuz xtó'ogaquië' yugu' bönni' judío ta'yéajlë'ë Dios. Calëgasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.



*Le guzxi' lu në'ë Dios gata' queëru' tu' réajlë'ëru' Lë'*

<sup>13</sup> Guzxi' lu në'ë Dios bi unödzejë' queë' Abraham, en quégaca zxi'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuóacagaquië' tsahui' lahuë' Lë' tu' ta'yéajlë'ë Lë'. <sup>14</sup> La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxi' lu në'ë Dios. <sup>15</sup> Rulu'i xibá queë' Dios rë'u nabágaru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

<sup>16</sup> Que lë ni na' uzí'iru' xibé le guzxi' lu në'ë Dios tu' réajlë'ëru' Lë', para gaca bë' naca tu le ruzá' láchxë'ë queëru'. Caní naca, para gaca bë'da' gata' quéguequi yúgu'të zxi'ini xi'sóë' Abraham lë na' guzxi' lu në'ë Dios, calëgasö quégaquië' bönni' na' dë lu ná'agaquië' xibá queë' Dios, pero lë'sca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. <sup>17</sup> Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zu'ni tsca chizóa caz nu na' biti' zu'ni.

<sup>18</sup> Caní naca tu' gudxë' Dios Abraham na': "Ziántërö ila'cuá' zxi'ini xi'sú'." Abraham guyéajlë'ë Dios, en benë' löza lë na' guzxi' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. <sup>19</sup> Biti' guca Abraham chopá láchxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúladë'ë, enca' ca naca queënu Sara queë', nácanu nigula huödx. <sup>20</sup> Biti' guca chopá láchxë'ë, en biti' gúquië' tu' caréajlë' ca naca le guzxi' lu në'ë Dios gunë' queë', pero bidipa láchxë'ë tu' guyéajlë'ë Dios, ate' gulu'ë Dios yöl-la' ba. <sup>21</sup> Idú láchxë'ë benë' löza Dios, napë' yöl-la' huáca gunë' idútë lë na' guzxi' lu në'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calëgasö para uzí'ë xibé Abraham, <sup>24</sup> pero para uzí'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabágaru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

## 5

*Le rata' queëru' tu' rnnë' Dios nuhuóácaru' tsahui'*

<sup>1</sup> Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' láchxë'ë Dios queëru', le rutipa láchxi'ru'. Rudzéjaru' tu' runru' löza uzí'iru' ca' xibé yöl-la' zxon queë' Dios. <sup>3</sup> Calëgasö caní rudzéjaru', pero rudzéjaru' ca' cate' riguí'i rizáca'ru', tu' chinöziru' le riguí'i rizáca'ru' rusedi rë'u cözaru' zxon ladxi'. <sup>4</sup> Cate' ribözaru' zxon ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. <sup>5</sup> Cate' runru' löza Lë', biti' ca' raca chopá láchxi'ru'. Caní naca, tu' nuhuölaj nudzë'e icja láchxi'do'oru' yöl-la' nadxi'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

<sup>6</sup> Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'. <sup>7</sup> Cuntu nu guë'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxi'a. <sup>8</sup> Dios rulu'inë' rë'u ca nadxi'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. <sup>9</sup> Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. <sup>10</sup> Cate' ni' biti' rilë'ëru'-në' Dios dxi'a, gútië' Zxi'inë' Dios uláz queëru' para huóácaru'

tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'.  
 11 Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

*Le benë' Adán, en le benë' Cristo*

12 Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. 13 Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. 14 Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxí'ini xi'sóë'. Lë ni ruluí'i rë'u ca ilaca tuz len Cristo yúgu'të nupa ila'yéajlë' Lë'.

15 Le rúnнасë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxë'ë queëru' Dios, en le rúnнасë' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo. 16 Le rúnнасë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían. 17 Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. 19 Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

20 Guyú'u xibá queë' Dios yödzölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntërö naca le buzá' ládxë'ë Dios quégaca bönachi. 21 Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

## 6

*Naca tsca chinátiru' para cabirö gunru' dul-la' tu' nabániru'-në' Jesucristo*

1 ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxë'ë Dios queëru'? 2 ¿Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? 3 ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa ruluí'i rë'u chigudódiru' lu yöl-la' guti tsözxön len Lë'. 4 Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u nubánlenru'-në' Jesús tsözxön para gácaru' bönachi idútë cubi queë'.

5 Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'. 6 Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u. 7 Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bítirö yú'uru' lu na' dul-la'. 8 Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön, 9 tu' chinöziru' bubanë' Cristo lu yöl-la' guti, en bítirö gátië'.

Que lë ni na' bítí'rö bi gaca gun yöl-la' guti na' queë' Lë'. <sup>10</sup> Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. <sup>11</sup> Lësca' caní ral-la' usáca'li' queë'li' naca queë'li' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

<sup>12</sup> Que lë ni na', bití' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizé ládxi'li' le ruá' dö', lu le naca cázali'. <sup>13</sup> Bití' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a. <sup>14</sup> Bití' gü'ili' lataj le naca dul-la', para cabí gun ga gunli' dul-la', tu' nuzöë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxië'ë queëru'.

### *Le rucudzu' didza' ca naca que nu bönni' nadó'o*

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxië'ë Dios rë'u? ¡Bití' ca' gunru' caní! <sup>16</sup> Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóacali' tsahui'. <sup>17</sup> Na'a, ¡xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuóacali' ca yugu' bönni' nadó'ogaca lu na' le naca dxi'a. <sup>19</sup> (Ru'ílëna' libí'ili' didza' ca tu'í didza' bönachi, tu' cabí réajni'ili' idútë lu yöl-la' bönachi queë'li'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'. <sup>21</sup> Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queë'li' yöl-la' na'bán idú. <sup>23</sup> Lazxaj nu run dul-la' naca yöl-la' guti, pero le rúnнасë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

## 7

### *Le rucudzu' didza' yöl-la' nutsaga na'*

<sup>1</sup> Böcha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. <sup>2</sup> Naca queë'li' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinátie', nurúajnu lu na' xibá na'. <sup>3</sup> Caní naca, tsanni ni zoë' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátie' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, bití' gunnu dul-la' le riguitsaj xibá que yöl-la' nutsaga na'.

<sup>4</sup> Lësca' caní raca queë'li', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxië'ë Dios.

<sup>5</sup> Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxi' lu idútë le naca cázaru' para ilún ga gátiru'.

<sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u

zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

### *Le dzaga neda' le naca dul-la'*

<sup>7</sup> ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni'i le rinná bë' xibá na' neda', bití' gunözda' naca dul-la' le runa'. La'tu' cabí zoa lu xibá na' le rnna: "Bití' së ládxi'u le dë que luzó'o", bití' gunözda' naca dul-la' yöl-la' rizé ladxí' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga bití' ridxini xibá na', bití' naca bë' le naca dul-la'. <sup>9</sup> Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

<sup>12</sup> Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. <sup>13</sup> ¿Naru' bentsö lë na' naca dxi'a ga bidxín quia' yöl-la' guti? ¡Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

<sup>14</sup> Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. <sup>15</sup> Na'a, bití' réajni'ida' le runa'. Ré'ënda' guna' ca rinná bë' xibá na', pero bití' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. <sup>16</sup> Runa' dul-la' sal-la' bití' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. <sup>17</sup> Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nözda' bití' zóalen neda' le naca dxi'a, o huáca innía', lë na' naca dxi'a bití' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö bití' gaca guna' lë na' naca dxi'a. <sup>19</sup> Bití' runa' le naca dxi'a le ré'ënda' guna', pero rúntica'sa' le bití' naca dxi'a le cabí ré'ënda' guna'. <sup>20</sup> Que lë ni na', channö runa' dul-la' na' bití' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queëru' yúgu'tëru'. Cate' ré'ëniru' gunru' le naca dxi'a, dzaga rë'u le run ga runru' le ruá' dö'. <sup>22</sup> Lu icja ládxi'da'ahua' raza ládxa'a xibá queë' Dios <sup>23</sup> pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

<sup>24</sup> ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? <sup>25</sup> ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

## 8

### *Le runru' tu' zóalenë' Dios Bö' Lá'ayi rë'u*

<sup>1</sup> Que lë ni na', bítirö bi xíguia' nabága'gaquië' yugu' bönni' néquiqueuinë' queë' Jesucristo, bönni' na' bítirö tunë' ca ré'ëni yöl-la' bönáchisö quégaquië', pero ca ré'ëne' Dios Bö' Lá'ayi tunë'. <sup>2</sup> Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. <sup>3</sup> Chinunë' Dios le cabí guca gun xibá na', tu' cabí bi guxzéqui' gun tu' nácaru' bönáchisö. Dios gusól-lë'ë Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero bití' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. <sup>4</sup> Caní benë' para gaca gunru' idútë le naca tsahui' le

rinná bē' xibá queē', núlöru' na' bíti'rö runru' ca ré'ëni yöl-la' bönáchisö queëru', pero ca ré'ënē' Dios Bö' Lá'ayi runru'.

<sup>5</sup> Bönni' tunē' ca ré'ëni yöl-la' bönáchisö quégaquiē', tuí'i ládxi'gaquiē' le naca que yöl-la' bönáchisö quégaquiē', pero bönni' tunē' ca ré'ënē' Dios Bö' Lá'ayi, tuí'i ládxi'gaquiē' le naca queē' Dios Bö' Lá'ayi. <sup>6</sup> Channö ruí'i ládxi'siru' le naca que yöl-la' bönáchisö queëru', tsaz gátiru', pero channö ruí'i ládxi'ru' le naca queē' Dios Bö' Lá'ayi, chidē yöl-la' na'bán idú queëru', en ribözaru' dxi ladxi'. <sup>7</sup> Núti'tēs nu ruí'i ládxi'sö le naca que yöl-la' bönáchisö que, bití' ril'é Dios dxi'a, tu' cabí run nu na' ca rinná bē' xibá queē' Dios, en bití' ca' gaca gun caní. <sup>8</sup> Que lē ni na', bönni' na' tunē' ca ré'ëni yöl-la' bönáchisö quégaquiē' bití' gaca ilunē' le raza ládxi'ē' Dios.

<sup>9</sup> Na'a, bíti'rö runli' ca ré'ëni yöl-la' bönáchisö queéli', pero runli' ca ré'ënē' Dios Bö' Lá'ayi tu' zóalen cazē' Lē libí'ili'. Tu bönni' bití' zóalenē' Dios Bö' Lá'ayi lē', Nu na' risöl-lē'ē' Cristo queëru', bití' néquinē' queē' Cristo. <sup>10</sup> Tu' zóalenē' Cristo libí'ili', chinati caz idútē le guca cázali' tu' nözi dul-la', ate' na'a nabánili'-nē' Dios Bö' Lá'ayi tu' nunē' Dios libí'ili' tsahui'. <sup>11</sup> Bö' Lá'ayi queē' Dios, Nu na' busubán Jesús lu yöl-la' guti, zóalenē' libí'ili'. Lē cazē' Dios, Nu busubán Jesucristo lu yöl-la' guti, runē' ga nubanli' lu idútē le gúcali' le rati caz. Caní nunē' tu' zóalenē' Dios Bö' Lá'ayi libí'ili'.

<sup>12</sup> Que lē ni na', libí'ili' böcha'a, dē tu le ral-la'ru', pero calēga que yöl-la' bönáchisö queëru', para cabirö gunru' ca ré'ëni yöl-la' bönáchisö queëru' na'. <sup>13</sup> Channö runli' ca ré'ëni yöl-la' bönáchisö queéli', gátili' tsaz, pero channö len yöl-la' huáca queē' Dios Bö' Lá'ayi runli' ga ila'niti le runli' lu yöl-la' bönáchisö queéli', gata' yöl-la' na'bán idú queéli'.

<sup>14</sup> Yúgu'tē nupa tun ca ré'ënē' Dios Bö' Lá'ayi nácagaca zxi'inē' Dios. <sup>15</sup> Dios Bö' Lá'ayi na' zóalenē' libí'ili' bití' nuzóē' libí'ili' leyúbölö ca bönni' nadó'ogaca para gadxi idzöbilibi', pero chinunē' ga nácali' zxi'inē' Dios caz, en runē' ca' ga rulídzaru'-nē' Dios, rnnaru': "Abba", le rnna: Dad. <sup>16</sup> Lē cazē' Dios Bö' Lá'ayi ruzéajni'inē' bö' naca cázaru', en runē' ga nöziru' nácaru' zxi'inē' Dios. <sup>17</sup> Channö chinácaru' zxi'inē' Dios, gata' ca' queëru' tsözxön len Cristo le nequi queē' Xúziru' Dios. Caní gaca queëru' channö riguí'i rizáca'lenru'-nē' tsözxön Cristo para uzí'iru' xibé tsözxön len Cristo yöl-la' zxön queē' Dios.

<sup>18</sup> Runi neda', yugu' lē ni riguí'i rizáca'ru' na'a naca tu le cuídido'os tsca naca yöl-la' zxön na' gata' queëru' dza sí' za'. <sup>19</sup> Ta'böza yúgu'tē le nunē' Dios, en ta'zē ládxi'gaca idxintē dza na' ulu'ē lahui Dios yugu' bönni' nácagaquiē' zxi'ini cazē'. <sup>20</sup> Yúgu'tē lē na' nunē' Dios gula'dödi lu na' le run ga ila'niti, calēga tu' gulē'ëni caz gaca caní, pero tu' benē' Dios ga naca caní. Benē' ca' ga naca löza que idútē lē na' nunē', <sup>21</sup> ate' ulu'lágaca yúgu'tē le nunē' Dios lu lē na' run ga ila'niti. Caní gaca, yúgu'tē lē na' ulu'zí' ca' xibé yöl-la' rusölá le nazáca'da' na' ulu'zi'ē xibé yugu' zxi'inē' Dios. <sup>22</sup> Nöziru' ta'guí'i ta'zaca' yúgu'tē le nunē' Dios ga ridxintē na'a dza, ca na' riguí'i rizáca'nu tu nigula chizóa sóabi' bí'ido' queënu. <sup>23</sup> Riguí'i rizáca'a, calēgasö yödzölió ni, pero riguí'i rizáca'ru' ca' rē'u, sal-la' zóalenē' Dios Bö' Lá'ayi rē'u, Nu na' naca queëru' le ruluí'i rē'u ca ral-la' gaca cázaru'. Riguí'i rizáca'ru' tsanni ni ribözaru' dza ni' ulu'ē lahui Dios nácaru' idú zxi'inē', dza ni' únē' ca' idútē le naca cázaru'. <sup>24</sup> Tu' runru' löza lē ni, nuláru' rē'u, pero channö gaca ilé'eru' lē na' runru' löza, bití' naca tu le ribözaru'. Bití' ribözaru' le chirilé'eru'. <sup>25</sup> Na'a, channö runru' löza tu le cabí gaca ilé'eru', lu yöl-la' riböza zxön ladxi' ribözaru' le.

<sup>26</sup> Lēasca' caní rácalenē' Dios Bö' Lá'ayi rē'u cate' rudú ládxi'ru', tu' cabí nöziru' bi ral-la' inábiru'-nē' Dios, pero Lē cazē' Dios Bö' Lá'ayi rudödē' xtídza'ru' lahuē' Dios, ate' lu yöl-la' rinaba yudxi queē' rinnēda' ládxi'ē', tsca cabí gaca nu inná. <sup>27</sup> Dios ruyúē' le yu'u ícja ládxi'do'gaca bönachi, en nözinē' le ré'ënē' innē' Dios Bö' Lá'ayi na', ate' Lē', ca ré'ëni quézinē' Dios, rudödē' xtídza'gaca nupa néquiquequi quez queē' Cristo lahuē' Dios.

### *Nadéli'tөрöru' tu' zóalenē' Cristo rē'u*

<sup>28</sup> Nöziru' tu'zi'ē xibé bönni' yúgu'tē le raca quégaquiē', bönni' na' nadxí'iguequinē' Dios, ate' bulidzē' Dios légaquiē' ca nuzóa cazē' gunē'. <sup>29</sup> Yugu' bönni' na' gurö cazē'

queë' Dios zí'atëlö, buzöë' ca' quégaquië' zí'atëlö ilácagaquië' ca naca cazë' Zxí'inë', para gáquië' Zxí'inë' lo ladaj zían böchë'ë. <sup>30</sup> Nupa na' buzöë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxön queë'.

<sup>31</sup> ¿Bizxi caz innaru' na'a ca nácagaca lë ni? Channö rácalenë' Dios rë'u, biti' ral-la' gádxiru' sal-la' bi ilún bönachi queëru'. <sup>32</sup> Dios, idú ládxe'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë? <sup>33</sup> ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'! <sup>34</sup> ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queëru' lahuë' Dios! <sup>35</sup> Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u:

sal-la' riguí' rizáca'ru', o sal-la' risëbi ládxi'ru',  
o sal-la' ta'bía ládxi'gaca bönachi rë'u,  
o sal-la' ridunru', o sal-la' riyadzaj le gácuru',  
o sal-la' zoa bönadxi queëru', o sal-la' ilútië' bönni' rë'u.

<sup>36</sup> Ca nácagaca lë ni nazúaj lu guichi lá'ayi, rnna:  
Tu' néquitu' quiu' Li', túntica'sö bönachi ga gátitu'.  
Nácatu' ca yugu' bö'cu' zxila',  
nadödigacaba' lu na' nu guti légacaba'.

<sup>37</sup> Na'a, tu' zóalen rë'u Nu na' nadxí'i rë'u, nácatërö löza idéli'ru' lu le raca queëru'.  
<sup>38-39</sup> Que lë ni na' runi neda':

Biti' bi sequi' gun ga bítirö idxí'inë' Dios rë'u.  
Nadxí'inë' rë'u tu' néquiru' queë' Xanru' Jesucristo.  
Biti' sequi' gun caní yöl-la' guti o yöl-la' na'bán,  
o yugu' gubáz lá'ayi o nupa ta'nná bë',  
o yugu' yöl-la' huáca que tu' xihui',  
o bítitës bi zoa o bítitës bi si' za',  
o tu le dë xitsá'alö o tu le dë cadxí'ilö,  
o bítitës bi nunë' Dios.

## 9

### *Dios gurö cazë' queë' bönachi Israel*

<sup>1</sup> Ruá'a didza' idútë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¿Biti' rizi' yë'a! <sup>2</sup> Ruhuí'inide'eda', en risëbitica'sö ládxa'a <sup>3</sup> tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'ëni quézida' ubéaj ládxe'ë Dios neda', en ulá'alena' Cristo. <sup>4</sup> Yugu' bönni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' bönachi. <sup>5</sup> Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¿Rácatuca'sö queë' yöl-la' ba! ¿Ca' gaca!

<sup>6</sup> Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të zxí'ini xi'sóë' Israel nácagaquië' idú bönachi Israel, nupa néquiguequi queë' Dios. <sup>7</sup> Sal-la' gúljagaquië' zían zxí'ini xi'sóë' Abraham, biti' guláquië' yúgu'të' idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." <sup>8</sup> Caní naca, nupa nácagaca

zxí'inë' tu bönni' néquinë' queë' Dios, calëga yúgu'të' nácagaquië' zxí'inë' Dios. Lësca' caní, nácagaca idú zxí'ini xi'sóë' Abraham núpasö na' náljagaca ni'a que lë na' guzxí' lu në'ë Dios. <sup>9</sup> Lë na' guzxí' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

<sup>10</sup> Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', <sup>11-13</sup> cate' ni' si' iláljabi', en biti' bi' núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjloz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

<sup>14</sup> ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní! <sup>15</sup> Dios gudxë' Moisés, gunné': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a." <sup>16</sup> Que lë ni na', biti' raca caní ni'a que le të'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi. <sup>17</sup> Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzölió le naca' neda'." <sup>18</sup> Caní naca, Dios ruhuéchi' ládxe'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

<sup>19</sup> Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?" <sup>20</sup> ¿Biti' ca' naca caní! ¿Nuzxi caz lí' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bizx que benu' neda' caní?" <sup>21</sup> ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

<sup>22</sup> Rë'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' gulénë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítie' légaquië'. <sup>23</sup> Caní runë' Dios para gaca bë' nácaterö lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzóë' quégaquië' zí'atëlö ulu'zi'ë xibé yöl-la' zxön queë'. <sup>24</sup> Yugu' bönni' caní bulidzë' Dios. Calëgasö bulidzë' netu', bönachi judío, pero lësca' bulidzë' bönachi izá'a. <sup>25</sup> Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa biti' nácagaca bönachi quia',  
gu'a láguequi: Bönachi quia',  
ate' nupa na' biti' bidxí'ida',  
gu'a láguequi: Nupa nadxí'ida'.

<sup>26</sup> La' ná'asö ga gunnía' quéguequi:

"Biti' nácali' bönachi quia'",  
si' láguequi: "Yugu' zxí'inë' Dios ban."

<sup>27</sup> Na'a, ca naca quégaca zxí'ini xi'sóë' Israel, Isaías gunné':

Sal-la' ila'yanë' zxí'ini xi'sóë' Israel,  
en iláquië' tsca naca yuzxi tu ra' yegu zxön,  
ulu'lë' nabásë'.

<sup>28</sup> Xanru' Dios la' guntë' ga gaca idútë  
lë na' ichúguië' quégaca bönachi yödzölió ni.

<sup>29</sup> Lësca' caní Isaías bë'ë didza' zí'atëlö, gunné':

Dios, Xanru' unná bë' idú,  
la'tu' cabí bucá'anë' queëru' yugu' zxí'ini xi'sóaru',

ugá'anaru' ca yödzö Sodoma, en yödzö Gomorra,  
yugu' yödzö na' busunítië' Dios.

*Bönachi Israel, en didza' dxi'a*

<sup>30</sup> ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuóácagaquië' tsahui' lahuë' Dios, en biti' gulunë' bayudxi ulu'huóáquië' tsahui' lahuë' Dios, pero nuhuóácagaquië' tsahui' tu' ta'yéajlë'ë Dios. <sup>31</sup> Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bë' xibá na'. <sup>32</sup> ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchégu'gaquië' lu lë na' nazi'i le: Guiöj Ga Nu Røjchegu'. <sup>33</sup> Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Sión bönni' na'  
gáquië' ca tu guiöj ga nu tsøjchegu',  
guiöj na' gun ga nu ichixi inigui.  
Nu tséajlë' Lë', biti' ca' utuí' i nu na'.

## 10

<sup>1</sup> Libí'ili', böcha'ado', le rizé ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'. <sup>2</sup> Runa' ba nalí quégaquië', idú ládxi'gaquië' tuí' i ládxi'gaquië' Dios, pero calëga len yöl-la' réajni' i idú. <sup>3</sup> Biti' nözguequinë' ca runë' Dios, runse' ga nácaru' tsahui', pero té'ënnë' ilún cuíngaquië' tsahui' rácasö quégaquië', en biti' ta'cu'ë nòxaj ladxi' lahuë' Dios para gaca gunë' légaquië' tsahui'. <sup>4</sup> Budxi benë' Cristo le ré'ëni gun xibá queë' Moisés, benë' ga gaca ulu'huóáca tsahui' yúgu'të nupa ila'yéajlë' Lë'.

<sup>5</sup> Ca naca que nu huóáca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní." <sup>6</sup> Na'a, ca naca que nu huóáca tsahui' tu' réajlë' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo, <sup>7</sup> en biti' innó': "¿Nuzxi caz huötaj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti. <sup>8</sup> Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë ni naca didza' que le réajlë'ëru' Dios runtú' libán que, rnnatu': <sup>9</sup> "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'." <sup>10</sup> Lu icja ládxi'do'oru' réajlë'ëru' Jesús para gácaru' tsahui', ate' len didza' ruí'iru', rulu'iru' lahui le náquië' Jesucristo para uláru'.

<sup>11</sup> Nazúaj lu guichi lá'ayi le rnna: "Biti' ca' ulu'tuí' i yúgu'të nupa ta'yéajlë' Lë'." <sup>12</sup> Dios, la' tuz ca ruí' i ládxi'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xángaqië' yúgu'të', en nápadë'ë bi unödzjë' quégaca yúgu'të nupa tu'lidza Lë'. <sup>13</sup> Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." <sup>14</sup> ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntú' nu zoa nu gun libán lógaquië'? <sup>15</sup> ¿Nacxi caz gaca ilunë' libán channö cuntú' nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' røjéngaquië' libán que le ribequi dxi ládxi'ru', en tunë' libán que didza' dxi'a."

<sup>16</sup> Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunnë': "Xan, ¿nuzxi caz guyéajlë' le bentu' libán que?" <sup>17</sup> Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

<sup>18</sup> Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:  
Idútë yödzölió bila'yöni chí'iguequi.



Yúgu'tè lataj bila'dxín xtídza'guequi.

<sup>19</sup> Lësca' rnníá': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi biti' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

<sup>20</sup> Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa biti' gula'guílaj neda'.

Buluí'i lahua' lógaquië' bönni' biti' bi gula'nábinë' neda'.

<sup>21</sup> Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi biti' túngaca ca rnna xtídza'a, en ta'dá'bagá' neda'."

## 11

### *Nupa nulágaca ladaj bönachi Israel*

<sup>1</sup> Na'a rnníá': ¿Naru' nusán në'ë Dios bönachi Israel? ¿Biti' ca' naca caní! Neda' caz naca' bönni' Israel. Naca' xzí'ini xí'sóë' Abraham, en nababa' di'a dza queë' Benjamín, xzí'ini cazë' Israel na'. <sup>2</sup> Dios biti' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." <sup>4</sup> Na'a, ¿bizxi didza' bubí'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu zxíbigaquië' lo budó' guiöj na' nazí'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxe'ë caní quégaquië'. <sup>6</sup> Channö naca le ruzá' ládxe'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxe'ë queëru' Dios bítirö gaca tu le ruzá' ládxe'ë queëru'.

<sup>7</sup> ¿Bizxi caz innaru' na'a? Lë na' gula'guíljë' bönni' Israel, biti' bila'déli'në', pero chibila'déli' le nupa ni' gurö cazë' queë' Dios, ate' ia'zícá'rë' na', Dios benë' zidi icja ládxi'do'gaquië'. <sup>8</sup> Ca naca lë ni nazúaj lu guichi lá'ayi, rnna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a. <sup>9</sup> Ca naca lë ni bë'ë ca' David didza', gunné':

Yugu' laní quégaquië' ulu'huóaca le ila'zön légaquië',

en ca tu yalaj ga ila'rölinë'.

Ila'ca ca' le ilún ga ila'chíxinë',

en ca tu le uzí' lëbi légaquië'.

<sup>10</sup> Ila'chul-la guiöj lógaquië', para cabí ila'lé'enë'.

Ila'yechu tsaz cúdzu'gaquië' tu' ilu'ë yua'.

### *Ca gaca ulu'lagaca bönachi biti' náca gaca judío*

<sup>11</sup> Na'a rnníá': ¿Naru' gula'chíxinë' yugu' bönni' judío ga bidxintë gula'nítie' tsaz? ¿Biti' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lagaca nupa biti' náca gaca judío para gunë' ga ulu'zxé'enë' yugu' bönni' judío léguequi. <sup>12</sup> Le gulunë' bönni' judío, gula'chíxinë', ben ga bidxín quégaca bönachi yödölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' náca gaca judío tu' gula'nítie' yugu' bönni' judío, zxöntëro gaca le gata' quéguequi cate' yugu' bönni' judío na' ulu'huóaquie' queë' Dios.

<sup>13</sup> Na'a rea' libí'ili' biti' nácali' judío, rnníá': Tu' naca' gubáz nasöl-lë'ë Dios lógaca nupa biti' náca gaca judío, runa' zxön lë na' dë lu na'a <sup>14</sup> para nadxi ca' huáca guna'

ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. <sup>15</sup> Channö bulu'huóaca bönachi nacua' idú yödžolió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huóazië' xilátjagaca cazë' na'. Gaca ca raca cate' tu'bángaca nupa chinátigaca. <sup>16</sup> Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

<sup>17</sup> Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. <sup>18</sup> Que lë ni na', bití' gun ba zxön cuinli', bití' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

<sup>19</sup> Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca." <sup>20</sup> Nácate didza' ru'u, pero gula'rúguië' tu' cabí gula'yéajlë'ë, ate' yójtó'o li' yaga na' tu' réajlë'u Dios. Que lë ni na', bití' ral-la' gun ba zxön cuinu', pero ral-la' gádxinu' Dios. <sup>21</sup> Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' li'? <sup>22</sup> Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácate rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. <sup>23</sup> Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsójtá'gaquië' leyúbölö lu yaga na', tu' napë' Dios yöl-la' huáca gunë' ga tsójtá'gaquië' le leyúbölö. <sup>24</sup> Nacu' li' ca tu ni'a në'e gurugu lu yaga olivo guí'a, en yójtó'o yaga olivo dxi'a ga cuntu nu udá' tu ni'a në'e yaga guí'a. Yénni'tëro huáca quégaquië', nácagaca cazë' ni'a në'e yaga dxi'a na', huáca tsójtá'gaquië' leyúbölö lu yaga quéguequi cazë' na'.

### *Ca gaca ulu'lágaca bönachi Israel*

<sup>25</sup> Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queëli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayázgaca yúgu'të bönachi bití' nácagaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Iruáj yödžö Sión Nu rusölá,

en ugúa le ruá' dö' nabága'gaca zxí'ini xi'sóë' Jacob.

<sup>27</sup> Lë ni naca didza' dzaga gúnlena' légaquië' cate' ugúa' dul-la' nabága'gaquië'.

<sup>28</sup> Caní naca, gula'dá'baguë'ë didza' dxi'a, ate' Dios guléaj ládxe'ë légaquië' para gaca uláli' libí'ili', pero nadxi'inë' ca' légaquië', tu' gurö cazë' queë' xuz xtó'ogaquië'. <sup>29</sup> Tsaz runödžjë' Dios le runödžjë', en tsaz rulidzë' bönachi. <sup>30</sup> Ca na' naca queëli', zí'atëlö bití' benli' ca rnna xtídzë'ë Dios, ate' na'a ruhuéchi' ládxe'ë Dios libí'ili' tu' cabí gulunë' yugu' bönni' judío ca rnnë'. <sup>31</sup> Lësca' caní naca quégaquië' na'a, bití' tunë' ca rnnë' Dios, pero caní gácasö ga idxinrö dza huéchi' ládxe'ë Dios légaquië', ca ruhuéchi' ládxe'ë libí'ili' na'a. <sup>32</sup> Dios guléaj ládxe'ë yúgu'të bönachi para ila'dá'baguë'ë xtídzë'ë, para gaca huéchi' ládxe'ë yúgu'të'.

<sup>33</sup> Zxöntëro naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios. <sup>34</sup> ¿Nuzxi caz guyéajni'i le guzá' ládxe'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödžaj queë' Dios para gun bayudxi bi ubi'ë Dios que? <sup>36</sup> Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatica'sö queë' Dios yöl-la' ba! ¡Ca' gaca!

## 12

### *Ral-la' udödi cuinru' quez queë' Dios*

<sup>1</sup> ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios. <sup>2</sup> Biti'rö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a rë'ënë' Dios gunli', lë na' raza ládxë'ë, en le naca idú.

<sup>3</sup> Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nōxaj ladxi' ca ribequi íjali', tsca naca yöl-la' réajlë' queëli' Dios le bennë' que queëli'. <sup>4</sup> Ca na' naca tuz idütë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', <sup>5</sup> lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

<sup>6</sup> Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzjë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

<sup>7</sup> Bönni' na' Dios bunödzjë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzjë' queë' usédinë' bönachi, dxí'ado' ral-la' usédinë' bönachi.

<sup>8</sup> Bönni' na' Dios bunödzjë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzjë' que nu yúbölö, idú ládxë'ë ral-la' unödzjë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzë'ë, len yöl-la' rudzeja ral-la' gunë' caní.

### *Yugu' le ral-la' gun nu nequi queë' Cristo*

<sup>9</sup> Ral-la' idxí'ili' luzá'ali' idú ládxi'li'.

Buli'cá'ana le ruá' dō'.

Guli'güi' ládxi'li' gunli' le naca dxi'a.

<sup>10</sup> Guli'dxí'i-guéquinë' luzá'ali' ca nadxí'iguecli'-në' böchi' cázali'.

Ca runli'-në' bal luzá'ali' ral-la' gunli' ga gácarë' lo ca nácali' la' cuínsili'.

<sup>11</sup> Buli'típatica'sö ládxi'li', en biti' gácali' xöhuëdi.

Guli'gún xichinë' Xanru' idú ládxi'li'.

<sup>12</sup> Buli'dzeja tu' zoa le runli' löza.

Guli'cöz zxön ladxi' cate' bi riguí'i rizáca'li'.

Buli'lídzatica'së' Dios.

<sup>13</sup> Buli'nödzaj quégaca bönachi queë' Cristo tsca nayádzjaguequinë'.

Guli'güi' lataj ga ila'cuá' nupa ta'dxín queëli'.

<sup>14</sup> Guli'nábinë' Dios gunë' dxi'a quégaca nupa ta'bía ládxi'gaca libí'ili'.

Guli'naba gaca dxi'a quégaquië', en biti' udxí'ali' légaquië' dō'.

15 Buli'dzéjalen nupa tu'dzeja.

Guli'códxilen nupa ta'bödxi.

16 Guli'gaca tuz len luzá'ali'.

Biti' gun ba zxon cuinli',

pero guli'gún tsözxön yugu' bönni' nöxaj ladxi'.

Biti' guéquili' chinadéli'li' idútë yöl-la' réajni'i.

17 Cuntu nu ubí'ili' que,

biti' guá'ali' dö' que nu ruá' dö' queéli'.

Guli'gún dxi'a quégaca yúgu'të bönachi.

18 Channö huáca, tsca séqui'li', guli'cöz dxi'a

len yúgu'të bönachi.

19 Böchi' luzá'ado', biti' uzí' lëbili' bönachi la' libí'isili', pero guli'gü' lataj ubi'ë Dios quégaca bönachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios. 20 Lësca' caní rnna:

Channö zoë' nu bönni' biti' ridzáguië' li' dxi'a,

en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

21 Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

## 13

1 Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu ná'agaquië' yöl-la' unná bë' nápagaquië', en nucu'ë xilátjagaquië' bönni' ni dë lu ná'agaquië' yöl-la' unná bë'.

2 Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xigua'. 3 Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö rë'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'.

4 Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xigua' nu ruá' dö'. 5 Que lë ni na' run bayudxi gunli' ca rnnë' bönni' na' dë lu në'ë, calëgasö tu' budödë' Dios lu në'ë gunë' libí'ili' xigua', pero lësca' para soa dxi ládxi'do'oli' lahuë' Dios. 6 Que lë ni na' ca' riguizxaj lázali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

7 Guli'guizxaj yúgu'të bönachi le rál-la'li' quégaquië'. Guli'guizxaj lázali' lu na' nu ral-la' quizxaj lázali'. Guli'guizxaj dumí nu ral-la' quizxjali'. Guli'gadxi nu ral-la' gádxili', en guli'gún bal nu ral-la' gunli' bal. 8 Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bë' xibá queë' Dios nu nadxí'i luzë'e. 9 Caní ta'nná bë' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' së ládxi'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

10 Nu na' nadxí'i luzë'e biti' bi run que luzë'e le ruá' dö'. Caní naca, nu na' nadxí'i luzë'e run idú ca rinná bë' xibá queë' Dios.

<sup>11</sup> Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo. <sup>12</sup> Ga zóaru' na'a naca ca chi'i dzó'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'. <sup>13</sup> Para gunru' caní ral-la' gunru' dxi'a ca ral-la' gun nu ridá lahui' dza. Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tül-lalenru' luzá'aru', en cabí uzxé'ëru' luzá'aru'.

<sup>14</sup> Na'a, ral-la' un cuinli' lu icja ládxi'do'oli' ca náquië' Xanru' Jesucristo, en bití' gü'i ládxi'li' gunli' le rizë ládxi'li' lu yöl-la' bönáchisö queëli'.

## 14

### *Biti' ral-la' si' quídza'ru' böchi' luzá'aru'*

<sup>1</sup> Guli'güi' lataj nu réajlë' Cristo gun libí'ili' tsözxön sal-la' bití' naca idú ca réajlë' nu na' Lë'. Biti' tül-lalenli' nu na' ca nácagaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të bití' ral-la' uzóë' tsölá'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' si' quídzë'ë bönni' na' rahuë' yúgu'të, tu' nazi' lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz li', rizí' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'.

<sup>6</sup> Bönni' na' runë' bal tu dza, runë' le bal para tseaj ládxë'ë Xanru', ate' bönni' na' bití' runë' bal dza na', para tseaj ládxë'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu", ate' bönni' na' bití' rahuë' yúgu'të, bití' rahuë' le para tseaj ládxë'ë Xanru', en rë'ë ca' Dios: "Xclenu'."

<sup>7</sup> Bití' zoë' nabanë' queëzë' nitüë' bönni' nabábalenë' rë'u, en bití' ratië' queëzë' nitüë' bönni'. <sup>8</sup> Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gütië' Cristo, en bubanë', para gáquië' Xángaca nupa chinátigaca, en nupa nabángaca.

<sup>10</sup> Na'a li', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. <sup>11</sup> Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxíbigaca yúgu'të bönachi lahua' neda'.

Ila'guixjö' yálajdo' naca' Dios."

<sup>12</sup> Caní naca, uchi'a usöröë' Dios yúgu'tëru'.

### *Biti' ral-la' gunru' ga ichixi iníquinë' böchi' luzá'aru'*

<sup>13</sup> Que lë ni na', bití'rö ral-la' ichugu bé'ëru' luzá'aru', pero ral-la' gun yúdxiru' cabí gunru' ga ichixi iníquinë' böchi' luzá'aru', en para cabí gunru' ga gunë' dul-la'. <sup>14</sup> Nöz quézida' bití' bi' dë le ráguru' le gaca gun ga bití'rö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bití'rö náquië' tsahui' lahuë' Dios, queë' bönni' ni, caní naca. <sup>15</sup> Channö rusuhuí'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzë'e. Bití'

bi ral-la' gagu' le gun ga gaca chopa ládxë'ë bönni' na', gútië' Cristo uláz queë'. <sup>16</sup> Que lë ni na', biti' bi gunli' le gun ga ila'nnë xihui' bönachi que le rusáca'li' queéli' naca tsahui'. <sup>17</sup> Cate' rinná bé'enë' Dios rë'u, biti' ruí'i ládxi'ru' le guí'aj gáguru', pero ruí'i ládxi'ru' gácaru' tsahui', en sóaru' dxi ladxi', en udzëjaru', yugu' le gaca gunru' tu' zóalenë' Dios Bö' Lá'ayi rë'u. <sup>18</sup> Núti'tës nu run xichinë' Cristo ca nácagaca lë ni, run le raza ládxë'ë Dios, ate' urúaj dxi'a lógaca bönachi.

<sup>19</sup> Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. <sup>20</sup> Biti' bi ral-la' gagu' le gun ga gaca chopa ladxi' nu na' nuzóë' Dios. Nácate lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' rágu'ru'. <sup>21</sup> Gácarö dxi'a cabí gagu' bëla', en cabí guí'ju' xisi uva nal-la, en biti' bi gunu' le gun ga ichixi iníguinë' böchi' luzó'o, o le gun ga gaca chopa ládxë'ë, o le gun ga huöaj ládxë'ë ca réajlë'ë Cristo. <sup>22</sup> Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' biti' ruxösa ládxi'da'ahuë' lë' tu' nözi lë na' runi lë' dë lataj gunë', <sup>23</sup> pero bönni' na' raza chopa ládxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

## 15

### *Ral-la' gunru' le raza ládxë'ë böchi' luzá'aru'*

<sup>1</sup> Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Biti' ral-la' gunru' le raza ládxi'ru' la' cuínsiru'. <sup>2</sup> Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo. <sup>3</sup> Caní ral-la' gunru', tu' cabí benë' Cristo le guyaza ládxë'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'i nupa gula'nnë xihui' quiu' Li', Dios." <sup>4</sup> Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxön ladxi', en ruhuë' tsahui' rë'u. Que lë ni na' zoa le runru' löza. <sup>5</sup> Rinábida'-në' Dios, Nu run ga ribözaru' zxön ladxi', en Nu ruhuë' tsahui' rë'u, gunë' ga gunli' tuz ca rusáca'li' queéli', para gácali' ca na' ré'ënë' Jesucristo. <sup>6</sup> Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo. <sup>7</sup> Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u. <sup>8</sup> Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxí' lu në'ë Dios unödzejë' quégaquië' xuz xtó'otu'.

### *Yugu' bönachi izá'a ila'yöni didza' dxi'a*

<sup>9</sup> Bidë' ca' Cristo para benë' ga ila'gú'u Dios yöl-la' ba nupa biti' nácagaca judío tu' ruhuëchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'  
lógaca bönachi idútë yödzölió,  
en gul-la' quiu' yöl-la' ba.

<sup>10</sup> Ga yúbölö nazúaj lu guichi lá'ayi le rnna:  
Libí'ili', bönachi idútë yödzölió,  
buli'dzëjalen bönachi queë' Dios.

<sup>11</sup> Ga yúbölö nazúaj ca' lu guichi lá'ayi le rnna:  
Guli'cu'ë Xanru' yöl-la' ba,  
yúgu'tëli' biti' nácali' judío.  
Guli'tséaj ladxi' Lë',  
yúgu'tëli' zóali' idútë yödzölió.

<sup>12</sup> Lësca' caní buzúajë' Isaías lu guichi le rnna:

Ilá' lahui Nu nababa di'a dza queë' Isaí.

Gaca lo Nu na' para inná be'e nupa biti' náacagaca judío.

Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

<sup>14</sup> Böchi' luzá'ado'. Chinöz quézida' rúntica'sili' le naca dxi'a, en dëda' yöl-la' réajni'i queéli' para gaca uzéajni'ili' luzá'ali'. <sup>15</sup> Na'a naca' rugu ladxi', ruzúaja' queéli' lu guichi ni, böcha'a, en rusá'a ládxi'li' tu' zoa le buzá' ládxi'ë Dios quia' neda'. <sup>16</sup> Que lë ni na' runa' xichinë' Jesucristo lógaca bönachi biti' náacagaca judío, en runa' libán que didza' dxi'a queë' Dios, para gaca ugu'a bönachi biti' náacagaca judío lu në'ë Dios, nupa na' gurö cazë' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxi'ë Lë'.

<sup>17</sup> Na'a, tu' rúnlena' tsözxön Jesucristo dxin, dë lu na'a tsaza ládxa'a ca naca le nuna' lu xichinë' Dios. <sup>18</sup> Lësca' rurúguida' innía' ca naca lë na' benë' Cristo lu na'a neda', benë' ga tun bönachi biti' náacagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. <sup>19</sup> Lu na'a neda' bugunë' dxin ca' le náacagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilo ga ridxintë luyú Ilírico, chinuna' libán que didza' dxi'a ca naca queë' Cristo. <sup>20</sup> Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguelë'ë lahui dxin zxön chinunë' bönni' yúbölö. <sup>21</sup> Ca bena' neda' naca ca na' nazúaj lu guichi lá'ayi le rnna:

Ila'lé'e nupa nacua' ga cuntu nu ben libán queë' Lë',

en ila'yéajni'i nupa catu caz bila'yöni ca naca queë'.

### *Rë'ënë' Pablo tsejë' yödzö Roma*

<sup>22</sup> Que lë ni na', sal-la' zían luzuí gú'unida' guída' ga zóali', biti' guca guída'. <sup>23</sup> Na'a, chibudxi bena' dxin quia' yugu' lataj ni, en chirë'ënda' zían iz guída' ga zóali'. <sup>24</sup> Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tödi ni' huáca ugu'uli' neda' nöza. <sup>25</sup> Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo. <sup>26</sup> Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi bönachi yechi' dzágagaca bönachi queë' Cristo, nacu'ë Jerusalén. <sup>27</sup> Gula'yaza ládxi'gaquië' bönni' biti' náacagaquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channö bönni' biti' náacagaquië' judío tu'zi'ë xibé le náacagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. <sup>28</sup> Que lë ni na', cate' údxi udöda' lu ná'agaca bönachi judío lë na' bulu'nödzjë' bönni' ni, ní'irö töda' ga zóali' libí'ili' cate' tseja' luyú España. <sup>29</sup> Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

<sup>30</sup> Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxi'do'oru', ráta'yua' loli', böcha'ado', ulídzali'-në' Dios tsözxön len neda', inábili'-në' gácalenë' neda'. <sup>31</sup> Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' náacagaquië' queë' Cristo, nacu'ë Jerusalén. <sup>32</sup> Guli'nabi-në' ca', channö naca ca rë'ënë' Dios, gunnë' neda' lataj idxina' queéli' len yöl-la' rudzeja quia', para uzí' ládxi'lëna' libí'ili'. <sup>33</sup> Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

## 16

*Tu'gapa Dios luz'éaguequi bönachi queë' Cristo*

<sup>1</sup> Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacua' yödzo Cencrea. <sup>2</sup> Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzejali' queënu bíti'tës bi riquínnu. Lë cázanu gúcalennu bönachi zián, en gúcalennu ca' neda'.

<sup>3</sup> Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. <sup>4</sup> Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calëgasö neda', pero lësca' yúgu'të böchi' luzá'aru' nabábagaquië' gapa nacua' bönachi queë' Cristo bití' nácagaca judío, tē'ë légaquië': "Xclenli'." <sup>5</sup> Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. <sup>6</sup> Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. <sup>7</sup> Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

<sup>8</sup> Guli'gapa Dios Amplias, bönni' na' nadxí'ida', en néquinë' queë' Xanru'. <sup>9</sup> Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. <sup>10</sup> Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacua' lidxë' Aristóbulo. <sup>11</sup> Guli'gapa Dios Herodiön, bönni' uládz quia'. Guli'gapa Dios nupa nacua' lidxë' Narciso, en ta'yéajlë'ë Xanru'. <sup>12</sup> Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. <sup>13</sup> Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'. <sup>14</sup> Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacua'lenë' légaquië'. <sup>15</sup> Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacua'lenë' légaquië'.

<sup>16</sup> Guli'gapa Dios luzá'ali', unída'li' luzá'ali' lu yöl-la' nadxí'i queëli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacua' bönachi queë' Cristo luyú ni.

<sup>17</sup> Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguli', tu' tu'sëdinë' le cabí röjlöz le nazédali'. Guli'cuíta ga nacua' bönachi caní' <sup>18</sup> tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. <sup>19</sup> Rizé didza' ca na' runli' ca rna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'. <sup>20</sup> Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxe'ë queëli' le gácalen libí'ili'.

<sup>21</sup> Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

<sup>23</sup> Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

<sup>24</sup> Rinábida'-në' Xanru' Jesucristo uzá' ládxe'ë queëli' yúgu'tëli' le gácalen libí'ili'. ¡Ca' gaca!

*Yöl-la' ba Dios*



<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. <sup>26</sup> Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

<sup>27</sup> ¡Ni'a que le benë' Jesucristo, gácatíca'sö yöl-la' ba queë' la's dui Dios, Nu rácatërö caz!  
¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ CORINTO

### *Pablo rugapë' Dios bönachi queë' Cristo nacu'ë Corinto*

<sup>1</sup> Ca rë'ëni quëzinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. <sup>2</sup> Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. <sup>3</sup> Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

### *Yugu' le ruzí'iru' xibé tu' néquiru' queë' Cristo*

<sup>4</sup> Rética'sa'-në' Dios: "Xclenu'" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo. <sup>5</sup> Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të. <sup>6</sup> Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo. <sup>7</sup> Que lë ni na', bití' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo. <sup>8</sup> Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo. <sup>9</sup> Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

### *Narúajgaca choplö bönachi queë' Cristo nacu'ë Corinto*

<sup>10</sup> Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Bití' irúajli' choplö, pero guli'gaca tuz ca rizá' ládxi'li', en ca runi libí'ili'. <sup>11</sup> Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'. <sup>12</sup> Lë ni rnniá': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. <sup>13</sup> ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'latsali' nisa para gácali' tuz len neda'? <sup>14</sup> Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo. <sup>15</sup> Que lë ni na' bití' gaca innali' bidí'lali' nisa para gácali' tuz len neda'. <sup>16</sup> Lësca' buquila' nisa Estéfanos, en nupa nacuá' lidxë'. Bití' röjneda' channö buquila' nisa nu yúbölö. <sup>17</sup> Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

### *Cristo napa cazë' yöl-la' huáca, en yöl-la' réajni'i queë' Dios*

<sup>18</sup> Nupa nátagaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'ëru' dzaga le yöl-la' huáca queë' Dios le rusólá rë'u. <sup>19</sup> Caní naca, tu' nazúaj lu guichi lá'ayi le rnna: Guna' ga huóaca nítisö yöl-la' rácada' quégaca nupa taca yenni'. Tsölá'alö ucá'ana' yöl-la' réajni'i quégaca nupa ta'yéajni'i yenni'.

<sup>20</sup> ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzülió ni. <sup>21</sup> Dios, lu yöl-la' réajni'i queë', bití' bë'ë lataj ilúnbe'e bönachi yödzülió ni Lë' ni'a que yöl-la' rácada' quégaquië'. Dios guyaza

ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

<sup>22</sup> Té'ënnë' yugu' bönni' judío ila'lé'enë' yöl-la' huáca nácagaca bë', ate' bönni' zi'tu' ta'guiljë' yöl-la' réajni'i. <sup>23</sup> Rë'u ni runru' libán queë' Cristo, ca na' gútië' lë'e yaga cruz. Le nácate, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. <sup>24</sup> Bönni' na' bulidzë' Dios légaquië', sal-la' nácagaquië' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. <sup>25</sup> Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuíd'ne', pero lë na' benë' náparö yöl-la' huáca ca yöl-la' huáca quégaca bönachi. <sup>26</sup> Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ladjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ladjali' zían bönni' unná bë', en calëga zían bönni' nácagaquië' lo. <sup>27</sup> Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuíd'gaca yödzölió ni para gunë' ga ulu'tuí'i nupa nál-lagaca. <sup>28</sup> Lësca' caní, téquiguequi bönachi yödzölió ni nupa na' guröë' Dios nácagaca cá'asö, en biti' bi nácagaca, en nacuíd'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. <sup>29</sup> Que lë ni na', cuntu nu gaca gun ba zxön cuini lahuë' Dios. <sup>30</sup> Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. <sup>31</sup> Naca ca na' nazúaj lu guichi lá'ayi, le rnna: "Channö zoa nu bi rë'ëni gun zxön, ral-la' gun zxön Xanru'."

## 2

### *Libán runru' queë' Cristo, ca gudë'ë lë'e yaga cruz*

<sup>1</sup> Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. <sup>2</sup> Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácate queë' Jesucristo bë'a didza', ca na' gudë'ë lë'e yaga cruz. <sup>3</sup> Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízida'a. <sup>4</sup> Bë'lena' libí'ili' didza', en bena' libán que xtídzë'ë Dios, calëga ca tuí'i didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. <sup>5</sup> Caní bena' para gaca tséajlë'ëli' Dios, calëga tu' biyónili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

### *Dios Bö' Lá'ayi runë' ga núnbë'ëru'-në' Dios*

<sup>6</sup> Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. <sup>7</sup> Ruí'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé. <sup>8</sup> Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dë'ë Xanru' nayëpisëtë'rë' lë'e yaga cruz. <sup>9</sup> Naca ca na' nazúaj lu guichi lá'ayi le rnna:

Chinupë'ë Dios le ulu'zí' xibé nupa nadxí'iguequi Lë',  
yugu' le cuntu nu ble'e, en biti' biyöni,

en biti' gula'zá' ládxi'gaca bönachi ca naca que.

<sup>10</sup> Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

<sup>11</sup> ¿Naru' gaca inözinë' nu bönni' le yu'u icja ládxi'da'ahuë' ia'tué' bönni'? Tuz bö' naca cazë' bönni' na' nözi lë na'. Lësca' caní, cuntu nu nözi le yu'u icja ládxi'da'ahuë' Dios. Tuzë'

Dios Bö' Lá'ayi nõzinë' lë ni. <sup>12</sup> Rë'u ni, biti' nazí' lu ná'aru' tu bö' ridasö yödzölió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxë'ë Dios queëru'. <sup>13</sup> Yugu' lë na' buzá' ládxë'ë Dios queëru' ruí'iru' didza' que, calëga len didza' tu'sédinë' bönachi rë'u len yöl-la' rácada' quëguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

<sup>14</sup> Tu bönni' biti' zóalenë' Dios Bö' Lá'ayi lë' biti' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. <sup>15</sup> Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'. <sup>16</sup> Nazúaj lu guichi lá'ayi le rnna:

¿Nuzxi caz nõzi le rizá' ládxë'ë Xanru'?

¿Nuzxi caz gaca uzéajni'i Lë'?

Le rizá' ládxë'ë Cristo yu'u icja ládxi'do'oru' rë'u.

### 3

#### *Nácaru' huen dxin tsözxön len Dios*

<sup>1</sup> Que lë ni na', böchi' luzá'ado', biti' guca gü'ílëna' libí'ili' didza' ca ruí'ílëna'-në' didza' tu bönni' nudödi cuinë' lu në'ë Dios Bö' Lá'ayi, pero bë'lëna' libí'ili' didza' ca ruí'ílëna' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i huë'ëni. Biti' nácali' tsutsu ca réajlë'ëli'-në' Cristo. <sup>2</sup> Busévida' libí'ili' le cabí naca böniga, lë na' guca ca nidxi' gü'ili'. Biti' busévida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. <sup>3</sup> Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni. <sup>4</sup> Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

<sup>5</sup> ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. <sup>6</sup> Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxön xisedo' na' nadúz icja ládxi'do'oli'. <sup>7</sup> Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxön xisedo' na'. <sup>8</sup> Tuz ca nácaquië' bönni' razë', en bönni' rigu'ë nisa. Dios ubi'ë que queëgaquië' tsa naca dxin runë' tu tuë'. <sup>9</sup> Nácatu' huen dxin tsözxön len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios. <sup>10</sup> Ca naca le buzá' ládxë'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ralla' uyuru' ca richíсарu' zö'ö lahui xilibi zö'ö na'. <sup>11</sup> Dios chigulu'ë tu xilibi zö'ö le naca Lë cazë' Jesucristo, ate' cuntú nu gaca cu'u ia'tú xilibi zö'ö caní. <sup>12</sup> Dxin runru' queë' Cristo naca ca richíсарu' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. <sup>13</sup> Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi. <sup>14</sup> Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'. <sup>15</sup> Channö tsegui dxin nunë' tu bönni' le naca ca tu zö'ö guchisë', unítie' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

<sup>16</sup> ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? <sup>17</sup> Channö nu usuniti yudo' queë' Dios, Dios usunitië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

<sup>18</sup> Biti' si' ye'e cuinli'. Channö réqui nu nutsa' ládjali' rácada' ca tácada' bönachi yödzölió ni, ral-la' huöáca nu na' ca tu bönni' biti' bi nöziné', para gata' que yöl-la' rácada' le naca idú. <sup>19</sup> Nu bönni' napzë' yöl-la' rácada' que yödzölió ni náquië' tu bönni' biti' bi nöziné' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." <sup>20</sup> Lësca' caní rnna: "Xanru' nöziné' nítisö naca le ta'bequi ícjagaca bönachi tácada'." <sup>21</sup> Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të. <sup>22</sup> Néquiguequi queëli':

Pablo, en Apolos, en Cefas,

en yödzölió ni,

en yöl-la' na'bán, en yöl-la' guti,

en dza ni zóaru' na'a, en dza si' za'.

Yúgu'të nequi queëli',

<sup>23</sup> ate' libí'ili' néquili' queë' Cristo,

ate' Cristo néquinë' queë' Dios.

## 4

### *Dxin tunë' bönni' gubáz nasöl-lë'ë Cristo*

<sup>1</sup> Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. <sup>2</sup> Yugu' bönni', Dios nudödë' lu náagaquië' ulu'gunë' dxin le nequi queë', run bayudxi ilunë' idú dxi'a le tunë'. <sup>3</sup> Biti' bi ruí'i ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'. <sup>4</sup> Biti' ruxös ládxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchi'a rusöröë' neda'. <sup>5</sup> Que lë ni na', biti' ral-la' uchi'a usöröli' nu bönni' zí'alö ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chulla, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

<sup>6</sup> Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'tué'. <sup>7</sup> ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rásasö quiu' bidéli'nu' lë na'?

<sup>8</sup> ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queëli'? ¿Naru' réquitseli' rinná bë'ëli', sal-la' biti' rinná bë'ëtu' netu'? Ní'a queë' Xanru' Dios ré'ënda' inná bë'ëli' para gaca inná bë'lentu' libí'ili' tsözxön. <sup>9</sup> Runi neda' naca queëtu', bönni' gubáz queë' Dios, ca nuzöë' netu' zéajtu' xibánitë ca na' raca quégaquië' bönni' chinarugu quégaquië' ilátië' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë'ë gubáz lá'ayi queë' Dios. <sup>10</sup> Tu' ré'ënitü' guntu' xichinë' Cristo, ruí'itu' bönachi lataj téquiguequi nácatu' bönni' biti' bi nözquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',

pero téquiguequi bönachi nacuídi'tu' netu'.

Tu'zóa bönachi netu' tsölá'alö,

pero tun libí'ili' bal.

<sup>11</sup> Ga ridxintë na'a dza, riduntu', en ribídxitu' nisa.

Biti' dë lari' gácutu'.

Tun bönachi netu' zí', en biti' zoa lídxitu'.

<sup>12</sup> Rusaca' zí' cuintu', la' nétu'sö runtu' dxin.

Tu'lidza bönachi netu' zi',  
pero netu' rinábatu' le gácalen léguequi.  
Ta'bía ládxi'gaca bönachi netu',  
pero ruá' rilentu' le.

<sup>13</sup> Ta'nně' queētu',  
pero lu yöl-la' nōxaj ladxi' ru'ilentu' légaquiē' didza'.  
Ga ridxintē na'a dza nácatu' ca bēbu que yōdzölió ni,  
en ca tu le ta'rú'una yúgu'tē bönachi.

<sup>14</sup> Ruzúaja' queēli' caní lu guichi, calēga tu' rě'ēnda' guna' ga utu'ili', pero rě'ēnda' uzéajni'ida' libí'ili', runa' ca runē' tu bōnni' ruzéajni'inē' yugu' xzí'ini cazē' tu' nadxí'inē' légacabi'. <sup>15</sup> Sal-la' gaca zían gáyu'ē bōnni' ila'cuá'alen libí'ili', en ulu'sédinē' libí'ili' ca naca queē' Cristo, tuz nu zoa naca ca xúzili', nu na' ben ga néquili' queē' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyōnda' libí'ili' didza' dxi'a. <sup>16</sup> Que lē ni na', ráta'yua' loli' güi' ládxi'li' gunli' ca runa' neda'.

<sup>17</sup> Que lē ni na' ca' risöl-la'a-bi' bi'i Timoteo ga zóali'. Tu' rúnlenbi' neda' dxin queē' Xanru' nácabi' ca xzí'ini caza', en nácabi' idú ladxi', ate' nadxí'ida'-bi'. Gunbi' Timoteo ga tsōjnéli' yugu' xibá rusédida' tu' néquida' queē' Cristo, yugu' le rusédida' yúgu'tē lataj lógaca yúgu'tē cō' bönachi queē' Cristo. <sup>18</sup> Bál-lali' run ba zxön cuinli' tu' réquili' bití'rō udxina' ga zóali'. <sup>19</sup> Na'a, la' udxíntea' ga zóali' channō Xanru' gunnē' neda' lataj. Ní'irō guéquibe'eda', calégasō didza' tu'ē bōnni' tun ba zxön cuíngaquiē', pero guéquibe'eda' channō zóalen yöl-la' huáca queē' Dios légaquiē'. <sup>20</sup> Channō nazí' lu ná'ali' rinná bé'enē' Dios libí'ili', bití' naca bē' naca caní tu' rnnásili' ca'. Naca bē' naca caní channō zóalen libí'ili' yöl-la' huáca queē' Dios. <sup>21</sup> ¿Bízxilō rě'ēnili'? ¿Naru' rě'ēnili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nōxaj ladxi'?

## 5

### *Pablo ruchi'a rusöröē' tuē' bōnni' runē' le ruá' dö'*

<sup>1</sup> Rizē didza' zóalenē' libí'ili' tuē' bōnni' runē' le ruá' dö', tu' zóalenē' nigula queē' xuzē'. Le ruá' dö' caní bití' ca' tun bönachi bití' núnbē'gaca Dios. <sup>2</sup> Libí'ili' run ba zxön cuinli', pero ral-la' huí'inili', en ubéajli' nu na' run dul-la' na' ga zóali'. <sup>3</sup> Sal-la' bití' zóalena' libí'ili' lu idútē le naca', le nácatē zóalena' libí'ili' lu bō' naca caza'. Ca chizóalen caza' libí'ili' chibuchí'a busöröa' nu na' run dul-la' na'. <sup>4</sup> Cate' udúbili' queē' Xanru' Jesucristo guna' libí'ili' tsözxön lu bō' naca caza'. Ní'irō, len yöl-la' huáca queē' Xanru' Jesús <sup>5</sup> buli'dödē' bōnni' na' lu na' Satanás tu' xihui' para initi idútē le naca cazē', pero ulá bō' naca cazē' dza ni' huödē' Xanru'.

<sup>6</sup> Bití' naca dxi'a gun ba zxön cuinli' ca naca le runli'. ¿Naru' cabí nōzili' didza' na' rnna: "Cua zído'os que yōta xtila gun ga chazxaj idútē cúa nazí'i le"? <sup>7</sup> Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irō gácali' ca tu cúa cubi le cabí nazí'i cúa zi que, ca na' le nácatē chinácali'. Naca queēru' ca chizóaru' Laní Pascua cate' tahuē' yōta xtila bití' nazí' cúa zi que, en chigulútiē'-ba' uláz queēru' bō'cu' zxila' que Laní Pascua na', bō'cu' zxila' na' náquiē' Lē cazē' Cristo. <sup>8</sup> Que lē ni na' ral-la' gunru' laní na', calēga zóalen rē'u cúa zi gulás na' le rulu'i le ruá' dö', en le cabí nazaca', pero ral-la' ugunru' dxin yōta xtila na' bití' nazí'i cúa zi que, yōta xtila na' rulu'i le naca idú dxi'a, en le naca idútē li.

<sup>9</sup> Cate' buzúaja' queēli' lu guichi zí'alō, gudxi caza' libí'ili' bití' gunli' tsözxön bōnni' tunē' le ruá' dö'. <sup>10</sup> Gudxa' libí'ili' caní, calēga para ucuítali' tsaz ga nacué' bönachi yōdzölió ni, nupa tun le ruá' dö', en ga nacué' bönachi ta'zē ládxi'gaca le dē que luzē'eguequi, en ga nacué' yugu' bōnni' gubán, en bönachi ta'yéaj ládxi'gaca budó' guiōj budó' yaga. Para gunli' caní gun bayudxi irúajli' yōdzölió ni. <sup>11</sup> Le rě'ēni inná didza' na' buzúaja' queēli'

zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizé lãdxë'ë le dë que luzë'ë, o reaj lãdxë'ë tu budó' néquini, o rinnë xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní. <sup>12-13</sup> Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

## 6

### *Biti' ral-la' ichë'ëru' böchi' luzá'aru' lógaca bönachi yúlahui'*

<sup>1</sup> Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'. <sup>2</sup> ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí nápalí' yöl-la' réajni'i uchi'a usöröli' didza' bizxaj caní? <sup>3</sup> ¿Naru' cabí nözili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzölió ga ni zóaru' na'a. <sup>4</sup> Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucú'ali' nupa ulu'chi'a ulu'sörö le, nupa na' biti' bi dë lu në'eguequi lãdjagaca bönachi queë' Cristo? <sup>5</sup> Rnní'a' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'? <sup>6</sup> ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

<sup>7</sup> Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queéli'? ¿Bizx que biti' guá' ilenli' nu rucáchi'lan le dë queéli'? <sup>8</sup> Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

<sup>9-10</sup> ¿Naru' cabí nözili' biti' ila'yaza bönachi biti' nácatë tsahui' ga rinná bë'ë Dios? ¿Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':  
 Cuntu nu reaj ladxi' budó' guiöj budó' yaga,  
 en cuntu nu riguitsaj xibá que yöl-la' nutsaga na',  
 en cuntu nu bönni' run cuinë' ca nigula,  
 en cuntu nu bönni' zóalenë' la' luzë'e bönni'së',  
 en cuntu nu bönni' gubán, en cuntu nu ruhuidí',  
 en cuntu nu rizudxi, en cuntu nu rinnë xihui',  
 en cuntu nu rucáchi'lan.

Biti' ca' tsaz nu run caní ga rinná bë'ë Dios.

<sup>11</sup> Caní gúcali' bál-lali' libí'ili', pero na'a chinuhuócali' dxi'a que dul-la' gubága'li', en chinéquili' quez queë' Dios, en chinuhuócali' tsahui' ni'a que le benë' Xanru' Jesús. Bö Lá'ayi queë' Dios runë' ga raca caní.

### *Idütë le naca cázaru' nequi quez queë' Dios*

<sup>12</sup> Ta'nná bönachi: "Yúgu'të dë lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'. <sup>13</sup> Ta'nná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lé'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzí' xibë' idütë le naca cázaru'. <sup>14</sup> Dios busubanë' Xanru' Cristo lu yöl-la' guti. Lëscá' caní, len yöl-la' huáca queë' usubanë' rë'u.

<sup>15</sup> ¿Naru' cabí nözili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! <sup>16</sup> ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'." <sup>17</sup> Na'a, nu bönni' náquië' tuz len Xanru', náquië' tuz len Lë' lu bö' naca cazë'.

18 Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilo lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. 19 ¿Naru' cabí nözili' idútë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queézili' idútë le naca cázali'. Na'a, nequi queë' Dios. 20 Dios gú'uë' libí'ili' len tu le zxön le gudizxjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiquequi queë' Dios idútë le naca cázali', enca' bö' naca cázali'.

## 7

### *Rusëdinë' Pablo ca naca que yöl-la' nutsaga na'*

1 Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. 2 Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queëgaquië', ate' yúgu'të nigula ral-la' ila'cuá'lennu-në' bönni' que queëgacanu. 3 Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lëbisö ral-la' gunnu nigula len bönni' queënu. 4 Biti' dë lu ná'asönu nigula le naca cázanu, pero bönni' queënu dë lu në'ë ca' le. Lëscá' caní, biti' dë lu ná'asë' bönni' le naca cazë', pero nigula queë' dë lu ná'anu ca' le. 5 Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzáguië' tu chí'sö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

6 Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. 7 Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzejë' Dios queë' gunë'. Tuë' rizi'ë tu le runödzejë', ate' ia'túë' rizi'ë ia'tú le runödzejë'.

8 Na'a, rea' nupa zóagaca tuz, enca' yugu' nigula uzëbi, gácarö dxi'a quëguequi ulu'gá'ana tuz ca na' zoa' tuz neda'. 9 Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

10 Rinná bé'eda' nupa chinutsaga në'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." 11 Channö nu nigula ulá'alennu-në' bönni' queënu, ral-la' ugá'ananu túzinu, o huóacanu tuz len bönni' queënu na'. Lëscá' caní tu bönni' biti' ral-la' ucá'anë'-nu nigula queë'.

12 Na'a, néda'sö rea' ia'zica'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' biti' réajlë'ënu Xanru', en channö ré'ëninu ugá'analennu lë', biti' ral-la' ulá'alënë'-nu. 13 Lëscá' caní rnnía': Channö zóanu nu nigula zanru' réajlë'ënu Cristo, ate' bönni' queënu biti' réajlë'ë Xanru', en channö ré'ënnë' ugá'analenë'-nu, biti' ral-la' ulá'alennu lë'. 14 ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, biti' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' xzí'inigaquië' ca yugu' bi'i lan lahuë' Dios. Na'a, nácacacabi' quez queë' Dios. 15 Nu bönni' o nigula nu cabí réajlë' Cristo, channö ré'ëni ulá'alenu na' nutsaga ná'alenu, huáca ca'. Biti' run bayudxi ugá'analen nu na' böchi' luzá'aru' o zanru' nu réajlë' Cristo, tu' bulidzë' Dios rë'u para cözaru' tsáhu'i'do'. 16 ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

17 Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guëquiru' queë'. Rusëdida' yúgu'të cö' bönachi queë' Cristo xibá ni. 18 Channö Dios bulidzë' nu bönni' narugu lu xipëlë'ë le naca bë' néquinë' queë' Dios,



ral-la' ugá'ané' caní, zoa lu xipélë'ë lë na' naca bë'. Lësca' caní, channö Dios bulidzë' nu bönni' biti' narugu lu xipélë'ë lë na' naca bë', biti' ral-la' ichúguië' lë na' lu xipélë'ë. <sup>19</sup> Biti' bi nazaca' lë na' narugu lu xipélë'ë tu bönni', en channö biti' narugu lu xipélë'ë bönni' lë na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios. <sup>20</sup> Ral-la' ugá'ané' tu tuë' bönni' ca na' gúquië' cate' ni' bulidzë' Dios lë'. <sup>21</sup> Channö bulidzë' li' cate' ni' nacu' bönni' nadó'o, biti' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé' lataj na' gata' quiu' iruju'. <sup>22</sup> Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. <sup>23</sup> Zxöntëro le gudizxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi. <sup>24</sup> Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

<sup>25</sup> Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë' Xanru' neda'. <sup>26</sup> Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'ané' yúgu'të bönni' ca nácagaquië' na'a. <sup>27</sup> Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. <sup>28</sup> Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'guí' ila'zaca' nupa nutsaga ná'agaca yödzölió ni, ate' ré'ënda' guna' ga uláli' lu yöl-la' riguí' rizaca' na'.

<sup>29</sup> Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' iluí' ládxi'gaquië' Dios, ca runë' nu bönni' biti' nutsaga ná'aleni' nigula. <sup>30</sup> Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. <sup>31</sup> Nupa tu'gún dxin le dë yödzölió ni ral-la' ilaca ca nu biti' ruí' ladxi' le dë yödzölió ni, tu' udödi quégaca le rilé'eru' yödzölió ni.

<sup>32</sup> Ré'ënda' biti' ubi uguí'ili'. Tu bönni' biti' zóanu nigula queë' ruí' ládxi'ë' le nequi queë' Xanru', naca gunë' le raza ládxi'ë' Xanru'. <sup>33</sup> Tu bönni' nutsaga ná'lenë'-nu tu nigula ruí' ládxi'ë' le raca yödzölió, naca gunë' le raza ládxi'nu nigula queë'. <sup>34</sup> Lësca' caní raca queënu tu nigula nutsaga ná'lenu-në' bönni', en queënu nigula na' zóanu túzinu. Nigula na' zóanu túzinu ruí' ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lenu-në' tu bönni' ruí' ládxi'nu le raca yödzölió ni, naca gunnu le raza ládxi'ë' bönni' queënu.

<sup>35</sup> Yugu' lë ni rea' libí'ili' para uzí'ili' xibé lë ni, en calëga para uzága'a xinözili'. Ré'ënda' gunli' le ral-la' gunli', para gunli' xichinë' Xanru' idú ládxi'li'.

<sup>36</sup> Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queëbi', en ré'ënde'ebi' utsaga ná'aleni'-në' bönni', huáca utsaga ná'aleni'-në'. ¡Biti' gunbi' dul-la'! <sup>37</sup> Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. <sup>38</sup> Caní naca, nu ruí' lataj bi'i que utsaga ná'aleni'-në' bönni', run le naca dxi'a, pero nu run ga ugá'anabi' túzibi' run le nácáro dxi'a.

<sup>39</sup> Nigula na' nutsaga ná'lenu-në' bönni', rinná be'e xibá que yöl-la' nutsaga na' lënu tsanni ni zoë' nabanë' bönni' queënu. Channö gátie' bönni' queënu, gata' lu ná'anu utsaga ná'lenu-në' nu bönni' ré'ëninu, channö réajlë'ë Xanru' bönni' na'. <sup>40</sup> Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzazxön.

## 8

*Le ta'gú'u bönachi lógaca budó' guiöj budó' yaga*

<sup>1</sup> Na'a, gu'a didza' ca naca que le rë'aj ráguru', lë na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxön cuinru', pero yöl-la' nadxi'i queëru' luzá'aru' run ga rácalenru' luzá'aru'. <sup>2</sup> Channö zoë' nu bönni' réquinë' chiréajni'inë', bití' bi réajni'ininë' ca ral-la' tséajni'inë', <sup>3</sup> pero nu bönni' nadxi'inë' Dios, Dios caz zóalenë' bönni' na'.

<sup>4</sup> Na'a, ca naca que le rë'aj ráguru', lë na' gula'gú'u bönachi lógaca budó' guiöj budó' yaga, nöziru' bití' bi nazáca'gaca budó' guiöj budó' yaga na' yödzölió ni, en cünturö nu zoa naca Dios. <sup>5</sup> Sal-la' nacué' le téquiguequi bönachi nácgaca díos, le nacué' lúzxiba, en le nacué' luyú, ate' zían le tu'lidza bönachi, en tuí'i lágaca: díos, enca': xan, <sup>6</sup> pero queëru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

<sup>7</sup> Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guiöj budó' yaga, ga ridxintë na'a dza të'aj tahuë' le gula'gú'u bönachi lógaca budó' guiöj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. <sup>8</sup> Bití' gun le guí'aj gáguru' ga gunë' Dios rë'u bal. Channö gáguru' le, bití' gácaröru' dxi'a, en channö cabí gáguru' le, bití' gácaröru' cá'asö. <sup>9</sup> Dë lu ná'ali' guí'aj gáguli' bíti'tës. Guli'gún chí'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo. <sup>10</sup> Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guiöj budó' yaga, en guí'aj gagu' le gula'gú'u bönachi lo budó' guiöj budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiöj budó' yaga na'. <sup>11</sup> Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo? <sup>12</sup> Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölá'alö. <sup>13</sup> Que lë ni na', channö le guí'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

## 9

### *Le dë lu në'ë nu bönni' gubáz nasöl-lë'ë Cristo*

<sup>1</sup> ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? <sup>2</sup> Nadxi ca' téquiguequi ia'zícá'rö bönachi bití' naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

<sup>3-4</sup> Nacué' nupa ta'zì' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. <sup>5</sup> Lë'sca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxön ga ridá', ca na' tunë' ia'zícá'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro. <sup>6</sup> ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'? <sup>7</sup> ¿Nuzxi caz bönni' rejë' gudil-la, ate' riguizxjë' la' cuinsë'? ¿Nuzxi caz bönni' rudé'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chí'ë-ba' bö'cu' zxila', en bití' re'jë' nidxi' quégacaba'? <sup>8</sup> Bití' guéquili' la' neda'sö ruá'a caní didza'. Lë'sca' caní rnna le nazúaj lu guichi lu xibá queë' Moisés. <sup>9</sup> Lu xibá queë' Moisés nazúaj lu guichi le rnna: Bití' cu' u du rúa'aba' bëdxi cate' rulíbiba' zxoá' xtila. Bë'ë Dios didza' ni, calëgasö

tu' ru'i ládxe'ë-ba' bédxi, <sup>10</sup> pero para uzí'iru' ca' xibé rē'u. Que lē ni na' nazúaj lu guichi didza' na', ate' bōnni' na' rugá'anē'-ba' bédxi, enca' bōnni' na' runē' ga tu'libiba' bédxi zxoá' xtila, iropē' na' ral-la' ilunē' lōza ila'zi'ē que le rulá' luyú na'. <sup>11</sup> Na'a, channō bentu' dxin ga zóali', le naca ca dxin guz gú'una, lē na' naca queē' Dios Bō' Lá'ayi, ¿naru' réquitseli' biti' ral-la' uzí'itu' xibé tu le do' dē queēli' ca na' ruzi'ē xibé bōnni' guz gú'una le rulapē'? <sup>12</sup> Ia'zica'rō bōnachi tu'zējai'ninē' libí'ili' tu'zi'ē xibé le dē queēli'. ¿Naru' cabí rála'tērō uzí'itu' xibé netu' le dē queēli'?

Catu caz buzi'tu' xibé lē ni dē lu na'tu', pero biá' gulentu' yúgu'tē para gaca guntu' libán que didza' dxi'a ca naca queē' Cristo. <sup>13</sup> Nōz quézili' ca raca quégaca nupa tun dxin que yudo', tu'zí' xibé gun que yudo'. Lēscá' caní nupa ta'gú'u rōn quégacaba' bōa' bédxi lu bucugu lá'ayi queē' Dios, tahuē' bēla' quégacaba' bōa' bédxi na'. <sup>14</sup> Lēscá' caní nuzóē' Xanru' ca ral-la' gaca quégaquiē' bōnni' tunē' libán que didza' dxi'a. Nupa tu'zí' xibé libán na' tunē' ral-la' ulu'gagu légaquiē'. <sup>15</sup> Neda' catu caz buzi'a xibé lē ni dē lu na'a, ate' lē ni ruzúaja' lu guichi ni biti' naca le rinábini nu bi gunna quia'. Run ba zxōn cuina' tu' cabí nazxja' cate' runa' libán que didza' dxi'a. Guē'ēnitēra' gátia' ca gu'a lataj nu innē runa' libán na' tu' nazxja'.

<sup>16</sup> Biti' dē lu na'a gun ba zxōn cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channō cabí guna' libán que didza' dxi'a. <sup>17</sup> La'tu' runa' libán tu' rē'ēni quézida', huáca inaba' lazxa', pero run bayudxi guna' libán, tu' naca tu le busubáguē'ē Dios neda' guna'. <sup>18</sup> ¿Bizxi lazxa' uzi'tsa' xibé channō? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lē na' dē lu na'a tu' runa' libán que didza' dxi'a.

<sup>19</sup> Na'a, sal-la' cuntu nu yu'a lu nē'e, chibén cuina' ca tu bōnni' nadó'o quégaca yúgu'tē bōnachi para gaca guna' ga ulu'lágaca zíanrō ca' bōnachi. <sup>20</sup> Cate' runa' libán lógaca bōnachi judío, run cuina' ca tu bōnni' judío para gaca guna' ga ulu'lágaca bōnachi judío na'. Bōnachi judío na' tun ca rinná bē' xibá queē' Moisés. Que lē ni na' run cuina' ca tu bōnni' runē' ca rinná bē' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bē' xibá na'. <sup>21</sup> Cate' runa' libán lógaca bōnachi izá'a, nupa biti' rinná be'e xibá queē' Moisés léguequi, run cuina' ca tu bōnni' zi'tu' na', para gaca guna' ga ulu'lē'. Biti' rucá'ana' cá'asō xibá queē' Dios. Neda' runa' ca rinná bē' xibá queē' Cristo. <sup>22</sup> Run cuina' ca tu bōnni' biti' naca idú ca réajlē'ē Cristo para gaca guna' ga ulu'lágaca nupa na' biti' naca idú ca ta'yéajlē' Lē'. Run cuina' ca nácagaca yúgu'tē bōnachi para gaca guna' ga ulu'lágaca bal-la bōnachi na'. <sup>23</sup> Lu yúgu'tē lē ni runa', runa' ga ta'yōni bōnachi didza' dxi'a, para gaca uzi'a xibé tsōzxōn len libí'ili' didza' dxi'a na'.

<sup>24</sup> Chinōz quézili' ca tunē' bōnni' nútsa'gaquiē' lu huitaj. Ta'xíti'ē yúgu'tē', pero tuzē' bōnni' idéli'nē' uzi'ē xibé lataj lo. Lēscá' caní ral-la' gunli' xichinē' Dios, gácali' ca bōnni' nútsa'gaquiē' lu huitaj, para idéli'li' uzí'ili' xibé le ubi'ē Dios queēli'. <sup>25</sup> Yúgu'tē bōnni', cate' tu'pá'a cúngaquiē' para gaca ila'yáziē' lu huitaj, ta'nná be'e cúngaquiē' lu yúgu'tē le tunē'. Tunē' caní para ila'déli'nē' tu breguí' zin le inítitē, pero idéli'ru' rē'u tu le uzí'tica'siru' xibé. <sup>26</sup> Que lē ni na', naca' neda' ca tu bōnni' idú ládxe'ē rixíti'ē. Naca' ca' ca tu bōnni', idú ládxe'ē ridil-lē'. Biti' rucudxa' lu bö'ös. <sup>27</sup> Ca runē' bōnni' na' rulidzē' bōnachi para tsōjtsázagaca lu huitaj, runa' ca' neda', runa' libán para ulu'lágaca bōnachi. Bōnni' na' nútsē'ē lu huitaj runē' ga gaca tsutsu idútē le naca cazē', en rinná bé'enē' le. Lēscá' caní runa' neda', para cabí unítia' xilatja' lu dxin queē' Dios.

## 10

### *Biti' ral-la' tseaj ládxi'ru' budó' guiöj budó' yaga*

<sup>1</sup> Ré'ēnda' uzējai'ida' libí'ili', böchi' luzá'ado', ca guca quégaquiē' xuz xtó'otu'. Dios benē' ga gulú'u zxul-la tu böaj yúgu'tē'. Lēscá' caní, gula'dödē' yúgu'tē' gatsaj láchui'lō nísado'. <sup>2</sup> Lu böaj ni', en lu nísado' ni', guca quégaquiē' ca raca que nu ridila nisa. Lē

na' guca quégaquië' guca bë' guláquië' tuz len Moisés. <sup>3</sup> Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégaquië'. <sup>4</sup> Gulë'ajë' yúgu'të' nisa na' bunödzjë' Dios Bö' Lá'ayi quégaquië', tu' gulë'ajë' nisa birúaj lë'e guiöj na' bulu'e lahui Dios Bö' Lá'ayi, guiöj na' gula'báininë' légaquië'. Ca guca guiöj na' naca cazë' Cristo, nabániru' Lë'. <sup>5</sup> Sal-la' guca caní, bití' guyaza ládxe'ë Dios yúgu'të'. Que lë ni na' gulátië' lu lataj cá'asö.

<sup>6</sup> Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'. <sup>7</sup> Bití' ral-la' tseaj ládxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'." <sup>8</sup> Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. <sup>9</sup> Bití' ral-la' si' bë'ëru' Xanru', ca na' gula'zì' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. <sup>10</sup> Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

<sup>11</sup> Yúgu'të lë ni le gulaca quégaquië' xuz xtó'otu', tu' zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni. <sup>12</sup> Que lë ni na', nu réqui chinal-la, ral-la' gun chi'i cuini, para cabí ichixi inigui. <sup>13</sup> Ca naca le ta'zì' bë' libí'ili' raca ca' quéguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', ulu'ínë' libí'ili' naca gaca irúajli' lu na' tu' xihui', para gaca guá' ilenli'.

<sup>14</sup> Que lë ni na', böchi' luzá'ado', bití' tseaj ládxi'li' budó' guiöj budó' yaga. <sup>15</sup> Ru'ílena' libí'ili' didza' ca ru'ílena' didza' nupa ta'yéajni'i. Buli'chi'a buli'sörö didza' ni gu'a. <sup>16</sup> Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' rulu'í' nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzjaru', en ráguru', rulu'í' dzágaru'-në' Cristo, en ruzí'iru' xibé le benë' Cristo cate' budödë' idútë le naca cazë' uláz queëru'. <sup>17</sup> Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

<sup>18</sup> Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'í' dzágagaquië' Dios. <sup>19</sup> ¿Bizxi rnna didza' ni ruá'a? Bití' rnní'a' napa budó' guiöj budó' yaga yöl-la' huáca, en le ta'gú'u bönachi lógaca budó' guiöj budó' yaga na' bití' napa yöl-la' huáca. <sup>20</sup> Caní rnní'a': Lë na' ta'gú'u bönachi bití' núnbë'gaquië' Dios lógaca budó' guiöj budó' yaga, ta'gú'u lógaca bö' xihui', en calëga lahuë' Dios. Ré'ënda' bití' idzágalí' yugu' bö' xihui'. <sup>21</sup> Bití' gaca gu'jali' le rulu'í' nácaru' tuz len Xanru', enca' lë na' ulu'í' nácali' tuz len yugu' bö' xihui'. Bití' gaca gáguli' le rulu'í' dzágaru'-në' Xanru', enca' le ulu'í' dzágali' yugu' bö' xihui'. <sup>22</sup> ¿Naru' gúntsaru' ga uzxé'enë' Xanru'? ¿Naru' réquitseli' nápatëroli' yöl-la' huáca ca napë' Lë'?

### *Le dë lu ná'aru' gunru', en ca ral-la' idxí'igacru'-në' böchi' luzá'aru'*

<sup>23</sup> Naca idútë li didza' na' rnna: "Yúgu'të dë lu ná'aru' gunru'." Na'a, neda' rnní'a': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. <sup>24</sup> Ral-la' gü'í ládxi'ru' gunru' le gun ga gaca dxi'a' quégaquië' böchi' luzá'aru', en calëgasö le gun ga gaca dxi'a' que la' cuínsiru'.

<sup>25</sup> Bítí'tës bi tuti' bönachi lu yé'ëyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'. <sup>26</sup> Nazúaj lu guichi le rnna: "Queë' Xanru' nequi yödzölió ni, enca' yúgu'të le dë yödzölió ni."

<sup>27</sup> Channö ulidzë' tu bönni' bití' réajlë'ë Dios libí'ili' para guídali' lidxë', ate' guë'enili' tséajli', guli'gagu yúgu'të le cu'ë loli', en bití' bi inábali' que, para cabí cuéqui böniga ládxi'do'oli'. <sup>28</sup> Channö nútí'tës nu guié libí'ili': "Lë ni gula'gu'ë lo budó' guiöj budó' yaga", bití' gáguli' lë na' para gaca dxi'a' que nu na' gudí'xjöi' caní libí'ili', en para cabí

cuéqui böniga ládxi'da'ahuë'. <sup>29</sup> Rnnía': Para cabí cuéqui böniga ládxi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzóa' tsölá'alö le dë lu na'a guna' tu' ribequi böniga ládxi'da'ahuë' bönni' yúbölö?" <sup>30</sup> Huáca inná ca' nu na': "Channö guía'në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?" <sup>31</sup> Channö bi gáguli' o bi guí'jali', o bití'tës bi gunli', guli'gún yúgu'të para gaca queë' Dios yöl-la' ba. <sup>32</sup> Biti' bi gunli' le gun ga ila'chixi ila'nigui bönachi judío, en bití' gunli' le gun ga ila'chixi ila'nigui bönachi queë' Dios. <sup>33</sup> Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en bití' ruí'i ládxa'a guna' le uzi'a xibé la' néda'sö, pero le ulu'zì' xibé ia'zìca'rö bönachi para ulu'lágaca.

## 11

<sup>1</sup> Guli'gún ca runa' neda', ca na' neda' ca' runa' ca benë' Cristo.

### *Le tunnu nigula lógaca bönachi queë' Cristo*

<sup>2</sup> Runa' libí'ili' zxön, böchi' luzá'ado', tu' röjnética'sili' neda', en nazí' lu ná'ali' xibá budöda' lu ná'ali'. <sup>3</sup> Na'a, rë'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo. <sup>4</sup> Channö tu bönni' rulidzë' Dios, o ru'ë didza' uláz queë' Dios, en dxía icjé' xilu'ë, rucá'anë' Cristo cá'asö. <sup>5</sup> Na'a, channö tu nigula rulídzanu Dios, o ruí'inu didza' uláz queë' Dios, en bití' bi zxoá ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu. <sup>6</sup> Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bi ixóá ícjanu. <sup>7</sup> Tu bönni' bití' bi ral-la' udxía icjé' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' ruluí'i lahui yöl-la' zxön queë' Dios, pero le nácanu nigula na' ruluí'i lahui yöl-la' zxön queë' bönni' queënu. <sup>8</sup> Cate' benë' Dios bönachi, bití' bubéajë' bönni' na' lu nigula. Nigula na', lu bönni' na' bubéajë'-nu. <sup>9</sup> Lësca' caní, bití' benë' Dios bönni' para uzí'inu xibé' nigula, pero benë' nigula para uzi'ë xibánu bönni'. <sup>10</sup> Que lë ni na', nigula na' ral-la' ixóá ícjanu le ruluí'i zoa nu rinná be'e lënu tu' tu'yúë' gubáz lá'ayi queë' Dios rë'u. <sup>11</sup> Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. <sup>12</sup> Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúaj lu në'ë Dios.

<sup>13</sup> Bulí'chi'a bulí'sörö la' libí'isili'. ¿Naru' ral-la' ulídzanu-në' Dios tu nigula bití' bi zxoá ícjanu? <sup>14</sup> ¿Naru' cabí rusëdi libí'ili' yöl-la' nácatë quégaca bönachi, ral-la' utuí'inë' bönni' na' ru'ë lataj itunna guitsa' icjé'? <sup>15</sup> Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. <sup>16</sup> Channö zoa nu guë'ëni tá'baga' didza' ni, canísö nazí' lu na'tu' runtu', en lëbisö tun yugu' cö' bönachi queë' Dios.

### *Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'*

<sup>17</sup> Biti' runa' libí'ili' bal ca naca le uzéajni'ida' libí'ili' na'a. Le runli' bití' run ga raca dxi'a queëli' cate' rudúbili' queë' Cristo, pero run ga raca queëli' le cabí naca dxi'a. <sup>18</sup> Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní. <sup>19</sup> Run bayudxi ila'cuá'alen libí'ili' nupa tu'sedi le cabí nácatë para ilaca bë' nupa nácatë idú bönachi queë' Cristo. <sup>20</sup> Que lë ni na', cate' rudúbili', lë na' ráguli' tsözxön bití' naca le rë'aj ráguru' para usubanru' ca gútië' Xanru'. <sup>21</sup> Caní naca, tu' runli' bayudxi tu tuli' ráguli' le nuá'ali' que queëli' cate' ráguli' tsözxön, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'. <sup>22</sup> ¿Naru' cabí zoa lídxili' ga huáca guí'aj gáguli'? Ca na' runli', rucá'anali'

bönachi queë' Dios cá'asö, en runli' ga tu'tu'i nupa biti' bi dë queguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

*Le rë'aj ráguru' para usubanru' ca gútië' Xanru'*

<sup>23</sup> Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, <sup>24</sup> en cate' budxi gudxë' Dios: "Xclenu'", buxuzxjë' le, en gunné': "Guli'gagu. Lë ni naca xipëla'a le nayuzxaj uláz queëli'. Guli'gún caní, para usubanli' ca gaca quia' neda'." <sup>25</sup> Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." <sup>26</sup> Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

*Ca ral-la' gunru' cate' guí'aj gáguru' para usubanru' ca gútië' Xanru'*

<sup>27</sup> Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. <sup>28</sup> Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. <sup>29</sup> Núti'tës nu rë'aj ragu lë ni, en biti' run le bal tu' cabí réquibe'e rulu'i le guca queë' Xanru', rusubaga' cuini dul-la' ni'a que lë na' rë'aj ragu. <sup>30</sup> Que lë ni na' te'e zían nupa dzágagaca libí'ili', en ta'cuídi', ate' zianguequi chinátigaca. <sup>31</sup> La'tu' uchi'a usöröru' la' cuínsiru', biti' uchi'a usöröë' Xanru' rë'u. <sup>32</sup> Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' queguequi bönachi yödzölió ilátigaca.

<sup>33</sup> Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. <sup>34</sup> Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero uca'ana' tsahui' yugu' lë na' cate' uduyúa' libí'ili'.

## 12

*Yugu' yöl-la' huáca runné' queëru' Dios Bö' Lá'ayi*

<sup>1</sup> Na'a, böchi' luzá'ado', rë'ënda' tséajni'ili' ca zeaj naca yöl-la' huáca runné' queëru' Dios Bö' Lá'ayi.

<sup>2</sup> Nöz quézili' ca guca cate' ni' biti' réajlë'ënili' Cristo, bë'ëli' lataj gula'ché' bönachi libí'ili' ga yúbölö. Guyéaj ládxi'li' budó' guió'j budó' yaga, le cabí ta'nnë. <sup>3</sup> Que lë ni na', ruzéajni'ida' libí'ili' caní, rnniá': Ladaj yúgu'të nupa tu'i didza' uláz queë' Bö' Lá'ayi queë' Dios, cuntu nu gaca innë xihui' queë' Jesús, en nitúë' gaca innë': "Jesús náquië' Xanru'", channö cabí zóalenë' Dios Bö' Lá'ayi nu na'.

<sup>4</sup> Na'a, nadzá'gaca tu tu le runné' Dios Bö' Lá'ayi queëru', pero tuzë' náquië' Bö' Lá'ayi na'. <sup>5</sup> Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. <sup>6</sup> Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. <sup>7</sup> Dios runné' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'. <sup>8</sup> Dios Bö' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'túë' bönni', Lë cazë' Bö' Lá'ayi runödzejë' queë' yöl-la' huáca ru'ë didza' lu yöl-la' réajni'i. <sup>9</sup> Lësca' caní, Lë cazë' Dios Bö' Lá'ayi na' runödzejë' queë' ia'túë' bönni' yöl-la' réajlë' Cristo bi gunë', ate' ia'túë' bönni' runödzejë' queë' yöl-la' huáca ru'ünë' nupa te'e. <sup>10</sup> Ia'túë' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'túë' bönni' ru'ë lë' lataj ru'ë didza' uláz queë' Dios, ate' ia'túë' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'túë' bönni' yöl-la' huáca ru'ë didza' yúbölö le cabí nazëdë', ate' queë'

ia'túé' bönni' yöl-la' huáca rudödë' didza' yúbölö na' biti' nazëdë'. <sup>11</sup> Yúgu'të lë ni runë' Lë cazë' Dios Bö' Lá'ayi, tu' runödzejë' que tu tu bönachi tsca rë'ëni quëzinë'.

*Yúgu'tëru' nácaru' ca tuz bönachi*

<sup>12</sup> Ca na' naca tuz idútë le naca cázaru', sal-la' zián le nagudi' dzágalenru', ate' le zián na' nagudi' dzágalenru' nácacaca tuz idútë le naca cázaru', lësca' caní naca queë' Cristo. <sup>13</sup> Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödza cazë' Bö' Lá'ayi.

<sup>14</sup> Na'a, lu idútë le naca cázaru', zián le nagudi' dzágalenru', en calëga tuz. <sup>15</sup> La'tu' huáca güi' didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. <sup>16</sup> La'tu' huáca güi' didza' nágaru', huanná: "Tu' cabí naca' guiøj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. <sup>17</sup> La'tu' naca guiøj loru' idútë le naca cázaru', ¿nacxi gaca yóniru'? La'tu' naca nágaru' idútë, ¿nacxi gaca ilé'e zxína'ru'? <sup>18</sup> Na'a, Dios nucu'ë yúgu'të le nagudi' dzágalenru' ca gú'uni quëzinë' Lë'. <sup>19</sup> La'tu' naca tuz le nagudi' dzágalenru', bíti'rö soa idú ca naca cázaru'. <sup>20</sup> Na'a, ca nácaru', zián le nagudi' dzágalenru', pero tuz le nácaru'.

<sup>21</sup> Que lë ni na', guiøj loru' biti' gaca guië ná'aru', inná: "Biti' riquinda' li'." Lësca' caní, ícjaru' biti' gaca guië ní'aru', inná: "Biti' riquinda' libí'ili'." <sup>22</sup> Na'a, yugu' le nagudi' dzágalenru', lë na' réquiru' nácacacarö cuídi'sö, lë ni naquíniröru'. <sup>23</sup> Lësca' caní, yugu' le nagudi' dzágalenru', le réquiru' nácacacarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. <sup>24</sup> Biti' run bayudxi gunru' caní que le nácarö lachi que le néquiniru'. Dios benë' idútë le naca cázaru', en benë' ga nácarö lesaca' lë na' réquiru' rë'u nácarö cá'asö. <sup>25</sup> Caní benë', ate' biti' narúajgaca choplö le nagudi' dzágalenru', tu' tun chi'i luzë'eguequi tu ia'tú. <sup>26</sup> Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zì xibé tsözxön le.

<sup>27</sup> Na'a, libí'i cázali' dzágali' idútë le naca cazë' Cristo, ate' tu tuli' nácali' ca yugu' le nagudi' dzágalenë'. <sup>28</sup> Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunny nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazëdagaquië'.

<sup>29</sup> Calëga yúgu'të' nácacagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

<sup>30</sup> Calëga yúgu'të' dë lu ná'agaquië' ulu'ünë' nupa te'e.

Calëga yúgu'të' tu'ë didza' yúbölö biti' nazëdagaquië'.

Calëga yúgu'të' tu'dödë' didza' yúbölö biti' nazëdagaquië'.

<sup>31</sup> Guli'gü' ládi'li' cu'ë Dios lu ná'ali' yugu' yöl-la' huáca na' nácacacarö lesaca'. Na'a, ulu'ida' libí'ili' tu le nácarö lesaca' ca yúgu'të lë ni.

## 13

### *Yöl-la' nadxí'i*

<sup>1</sup> Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a bití' gácarö lesaca' ca bö le run gui rucödxiru' o guíë rutíl-laru' luzë'e. <sup>2</sup> Sal-la' nazi' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' guí'a, pero channö cabí nadxí'ida' luzá'a, bití' bi nazáca'a. <sup>3</sup> Sal-la' quísia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, bití' ca' uzi'a xibé lë na' runa'.

<sup>4</sup> Nu bönni' nadxí'inë' luzë'ë, ribözë' zxön ladxi'.

Náquië' dxi'i ladxi', en bití' ruzxé'enë' luzë'ë.

Nadxí'inë' luzë'ë idú lãdxë'ë.

Bití' run ba zxön cuinë', en bití' run cuinë' lo.

<sup>5</sup> Bití' runë' le ruá' dö'.

Bití' rudúli'në' le dë queë'.

Bití' rilétenë', en bití' rönjenë' dö' guluí'i bönachi queë'.

<sup>6</sup> Bití' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

<sup>7</sup> Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxi'.

<sup>8</sup> Bítí'rö tödi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazëdagaca, ate' huadödi que yöl-la' réajni'i quéguequi bönachi. <sup>9</sup> Láti'do'os réajni'iru' na'a, en láti'do'os ca' ruí'iru' didza' uláz queë' Dios. <sup>10</sup> Cate' idxín le naca idú, ní'irö údxi que lë na' naca láti'do'os.

<sup>11</sup> Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' lãdxa'a ca bí'ido'. Cate' bigula' bucá'ana' le nequi que bí'ida'ahua'. <sup>12</sup> Na'a le rilé'eru' naca ca le rilé'eru' cate' ruyú cuinru' tu lu guíë dxí'lido'. Bití' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. <sup>13</sup> Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

## 14

### *Yugu' yöl-la' huáca runnë' queëru' Dios Bö' Lá'ayi*

<sup>1</sup> Guli'gún bayudxi idxí'ili' luzá'ali', en guli'güí' lãdxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios.

<sup>2</sup> Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nácagaca le nagachi' queë' Dios. <sup>3</sup> Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa lãdxi'guequi, en ruhuë tsahui' léguequi. <sup>4</sup> Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

<sup>5</sup> Raca lãdxa'a güí'ili' didza' yúbölö le cabí nazëdali' yúgu'tëli', pero le naca lo, rë'ënda' güí'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. <sup>6</sup> Que lë ni na', böchi' luzá'ado', cate' guída' ga zóali', channö güí'ilena' libí'ili' didza' yúbölö le cabí nazëda', bití' bi uzí'ili' xibé.



Uzı'isili' xibé didza' na' gü'ílena' libí'ili' le nulu'ínè' Dios neda', o didza' uzéajni'i rē'u, o didza' gu'a uláz queë' Dios, o le naca xibá queë'.

<sup>7</sup>Lësca' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lè na' rul-la gui na', o guitarra na'? <sup>8</sup>Channö cabí cödxı ca ral-la' gun lúzuba' böa' na' ulidza rē'u lu gudil-la, ¿nuzxi caz upá' cuini para tseaj lu gudil-la na'? <sup>9</sup>Lësca' caní raca queëli'. Channö len lúdxı'lı' gü'íli' didza' le cabí taca bönachi, bitı' ca' ila'yéajni'i didza' gü'íli'. Caní gaca, nítısö gü'íli' didza'. <sup>10</sup>Le nácatè nacuá' zıán didza' yúbölö tu'ı zıán cö' bönachi izá'a lu yödzülió ni, ate' nacuá' bönachi ta'yéajni'i tu tu didza' na'. <sup>11</sup>Na'a, channö cabí réajni'ida' didza' ru'è tu bönni', gaca' ca tu bönni' zı'tu' lahuë' bönni' na' ru'è didza', ate' bönni' na' ru'è didza' gáquië' ca' lahua' neda' ca tu bönni' zı'tu'. <sup>12</sup>Lësca' caní naca queëli'. Ru'ıda' lúdxı'lı' sı'ılı' yugu' le runnè' queëru' Dios Bö' Lá'ayi. Que lè ni na', guli'güf' lúdxı'lı' sı'ılı' le ilún ga ilácarö tsutsu bönachi queë' Cristo.

<sup>13</sup>Que lè ni na' ca', nu ru'ı didza' yúbölö le cabí nazèda ral-la' ulidza Dios, en inabi Lè' gunnè' que yöl-la' huáca quıxjö' le rē'èni inná didza' na' ru'ı nu na'. <sup>14</sup>Cate' rulidza'-nè' Dios, channö ruá'a didza' yúbölö le cabí nazèda', lu bö' naca caza' rulidza'-nè' Dios, pero tu' cabí réajni'ida' didza' ruá'a, lu yöl-la' réajni'i quia' bitı' ruzı'a xibé didza' na' ruá'a. <sup>15</sup>¿Nacxi caz ral-la' guna' channö? Ulidza'-nè' Dios lu bö' naca caza', enca' lu yöl-la' réajni'i quia' ulidza'-nè' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. <sup>16</sup>Channö lu bö' naca cazu' rulidza lá'ayu'-nè' Dios, ate' zoa ni' nu riyónısö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rē'u-nè' Dios: "Xclenu"? <sup>17</sup>Nadxi ca' dxı'ado' ru'u didza', rē'u-nè' Dios: "Xclenu." Channö cabí réajni'i didza' ru'u, bitı' bi uzı' xibé nu na' riyöni. <sup>18</sup>Rea'-nè' Dios: "Xclenu", tu' ru'ı'ira' didza' yúbölö le cabí nazèda' ca yúgu'tèli'. <sup>19</sup>Lógaca bönachi queë' Dios guë'ènitèröda' gu'a gáyu'sö didza' le gaca ila'yéajni'i bönachi ca zıán gayuá' didza' yúbölö le cabí nazèda', ate' cuntu nu gaca tséajni'i. Gaca usédida' ia'zıca'rö bönachi tuzı channö ila'yéajni'i didza' gu'a.

<sup>20</sup>Böchi' luzá'ado', bitı' gácalı' ca bí'ıdo' ca naca le rizá' lúdxı'lı'. Guli'gaca ca bí'ıdo' para cabí gunli' le ruá' dö', pero guli'gaca bönni' chinácagaca ca naca le rizá' lúdxı'lı'. <sup>21</sup>Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílena' bönachi ni didza'. Sal-la' guna' canı, bitı' ulu'zè náagaca xtıdza'a." ¡Canı rnnè' Xanru'! <sup>22</sup>Canı naca, Dios ru'è rē'u lataj ru'ıru' didza' yúbölö le cabí nazèdaru' para gaca tu le naca bë' lógaca bönachi bitı' ta'yéajlè', en calèga lógaca nupa ta'yéajlè' Cristo. Ru'è rē'u lataj ru'ıru' didza' uláz queë' Lè' le ulu'zı' xibé nupa ta'yéajlè' Cristo, en calèga bönachi na' bitı' ta'yéajlè'. <sup>23</sup>Que lè ni na', cate' udúbili' tsözxön, yúgu'tèli' na' néquili' queë' Cristo, channö gü'íli' didza' yúbölö le cabí nazèdali' yúgu'tèli', ate' tsázagaca nupa nazèdagaca láti'do'os, o nupa bitı' ta'yéajlè' Cristo, ¿naru' cabı ila'nná: "Nachixi ícjali"? <sup>24</sup>Na'a, channö yúgu'tèli' gü'íli' didza' uláz queë' Dios, ate' tsaz nu cabı réajlè' Cristo o nu nazèda láti'do'os, guéquibe'e nu na' nabaga' xıguia', ate' Dios uchi'a usöröë' lè'. Canı guéquibe'e nu na', tu' tseajni'i didza' gü'íli' yúgu'tèli'. <sup>25</sup>Guéquibe'e ca naca le rizá' lúdxı' nu na', lè na' bigachi', ate' uzóa zxibi nu na', en tseaj lúdxı' Dios, ate' inná: "Le nácatè Dios zóalenè' libí'ili'."

### *Ca ral-la' gunru' ga rudúbiru' queë' Cristo*

<sup>26</sup>Que lè ni na', böchi' luzá'ado', cate' rudúbili' queë' Cristo, rul-lè' tuë' bönni' dzáguie' libí'ili' tu salmo, ate' rusédinè' ia'túë' tu xibá, ate' ia'túë' riguíxjöi'ínè' libí'ili' tu le bulu'ínè' Dios lè', ate' ia'túë' ru'è didza' yúbölö le cabı nazèdè', ate' ia'túë' rudödè' didza' yúbölö na' le cabı nazèdè'. Yúgu'tè le gunli' ral-la' gaca le ulu'zı' xibé nupa tu'dubi queë' Cristo. <sup>27</sup>Cate' nacuá' ni' nupa tu'ı didza' yúbölö le cabı nazèdagaca, bitı' ral-la' gü'íli' didza' canı zıánrö ca chopa tsónnasılı'. Huáca gu'è didza' tuzè' bönni' na', ate' tödi na' huáca

gu'ë didza' ia'tué', pero run bayudxi soa nu udödi didza' yúbölö na' le biti' nazédali'.  
<sup>28</sup> Channö cuntu nu zoa nu gaca udödi didza' yúbölö na' le cabí nazédali', nu na' ruí'i didza' yúbölö le cabí nazéda ral-la' soa dxisö ga na' nudúbili', ate' huáca gü'ilen Dios didza' na' lu icja ládxi'da'ahui. <sup>29</sup> Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zícá'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'. <sup>30</sup> Channö Dios ulu'inë' tu bönni' rö'ë ni' le ré'ëni inná xtídzë'ë, ral-la' soa dxisö nu na' ruí'i didza'. <sup>31</sup> Yúgu'téli' huáca gü'ili' didza' uláz queë' Dios tu tuli' para izédali' yúgu'téli', en idipa ládxi'li' ca' yúgu'téli'. <sup>32</sup> Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö. <sup>33</sup> Calëga Dios nu run ga rutsátsaru', tu' ré'ënë' Lë' gácaru' ba'a ladxi', ca na' runë' ga nacué' yúgu'të cö' bönachi queë' Cristo.

<sup>34</sup> Ral-la' ila'cuá'anu dxisö nigula queëli' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anu nöxaj ca na' rinná bë' xibá queë' Dios. <sup>35</sup> Channö t'ëninu ila'yéajni'ínu ia'lati', ral-la' ila'nábinu bönni' que queégacanu cate' ni' nacu'ë lídxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

<sup>36</sup> ¿Naru' réquitseli' bunödzjë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queézili' libí'ili'? <sup>37</sup> Channö nu bönni' nútsë'ë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queëli' lu guichi ni. <sup>38</sup> Na'a, channö cabí ruí'i ládxi'ë didza' ni, biti' gü'í ládxi'li'-në' bönni' na'.

<sup>39</sup> Que lë ni na', böchi' luzá'ado', guli'güí' ládxi'li' gü'ili' didza' uláz queë' Dios, en biti' inná bé'eli' nu ruí'i didza' yúbölö le cabí nazéda. <sup>40</sup> Ral-la' gunru' yúgu'të ca sa'yéaj, en lu yöl-la' ba'a ladxi'.

## 15

### *Bubanë' Cristo lu yöl-la' guti*

<sup>1</sup> Na'a, böchi' luzá'ado', riguíxjöi'ida' libí'ili' ca naca didza' dxi'a na' bena' libán que ga zóali', lë na' guzxi' lu ná'ali', ate' run ga nácarö idú ca réajlë'ëli' Cristo. <sup>2</sup> Ni'a que didza' ni uláli', channö gunli' ca rna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

<sup>3</sup> Ga gusí lo budöda' lu ná'ali' le budödë' Dios lu na'a neda'. Caní rna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rna ben bayudxi benë'. <sup>4</sup> Rna ca': "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rna ben bayudxi guca queë'. <sup>5</sup> Gudödi ni' bulu'í lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. <sup>6</sup> Ní'irö bulu'í lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxön. La'tu'biqui' yúgu'të böchi'ru' ni nacu'ë nabángaquië' na'a, sal-la' bal-lë' chinátigaquië'. <sup>7</sup> Ní'irö Jacobo bilé'enë' Lë', en gudödi ni' bulu'í lahuë' lógaquië' yúgu'të bönni' gubáz queë'.

<sup>8</sup> Ga yöjsetë bulu'í lahuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'. <sup>9</sup> Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládxa'a bönachi queë' Dios. <sup>10</sup> Na'a, tu' buzá' ládxi'ë quia' Dios naca' le naca' na'a, en calëga nítisö buzá' ládxi'ë quia'. Béntëra' neda' xichinë' ca ia'zícá'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. <sup>11</sup> Na'a, channö bena' libán neda' o channö gulunë' libán ia'zícá'rë' bönni', lë ni le runtu' libán que, en le guyéajlë'ëli' libí'ili'.

### *Ubanru' lu yöl-la' guti*

<sup>12</sup> Runtu' libán queë' Cristo ca na' bubanë' lu yöl-la' guti. Channö caní naca, ¿nacxi' caz naca, rnnali' bál-lali': "Biti' ulu'bán nupa chinátigaca"? <sup>13</sup> La'tu' cabí ulu'bán nupa

chinátigaca, biti' bubanë' Cristo, <sup>14</sup> en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. <sup>15</sup> Ia'stú, la'tu' cabí bubanë' Cristo, rizí' yé'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. <sup>16</sup> La'tu' cabí ulu'bán nupa chinátigaca, biti' bubanë' Cristo, <sup>17</sup> en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'. <sup>18</sup> Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. <sup>19</sup> Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

<sup>20</sup> Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. <sup>21</sup> Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. <sup>22</sup> Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. <sup>23</sup> Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'. <sup>24</sup> Ní'irö idxín dza údxi cate' ugüë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'e Dios Xuz. <sup>25</sup> Run bayudxi inná bë'e Cristo ga idxinrö dza chibenë' Dios ga ulu'zachu zxíbigaca lahuë' Lë' yúgu'të nupa ta'dá'baga' Lë'. <sup>26</sup> Le ridá'baga' Lë' le usunítië' ga údxi naca yöl-la' guti. <sup>27</sup> Dios chinudödë' yúgu'të lu në'e Zxí'inë' para inná bé'enë' le. Nazúaj lu guichi lá'ayi, rna: "Budödë' yúgu'të lu në'e para inná bé'enë' le." Na'a, naca bë' biti' budödi cuinë' lu në'e Zxí'inë', tu' naca cazë' Lë' Nu rudödi yúgu'të lu në'e Zxí'inë'. <sup>28</sup> Cate' idxín dza ni' chinudödë' Dios lu në'e Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'e Dios, Nu na' budödi lu në'e Zxí'inë' yúgu'të, ate' ga údxi, Dios inná bé'enë' tsaz yúgu'të.

<sup>29</sup> Bál-lali' ridí'lali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridí'lali' nisa uláz quégaca nupa chinátigaca?

<sup>30</sup> Zoa bönadxi queëtu' gátitu' yúgu'të dza. ¿Bizx que ruí'itu' lataj gaca caní channö cabí ubanru' lu yöl-la' guti? <sup>31</sup> Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. <sup>32</sup> Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé' Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxó huidzaj."

<sup>33</sup> Biti' güf'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huóacali' chul-la niti. <sup>34</sup> Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utuf'ili'.

### *Ca ilaca nupa ulu'bán lu yöl-la' guti*

<sup>35</sup> Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácacaca cazë' cate' ulu'dxinë'?" <sup>36</sup> Li', bönni' biti' bi nözinë'. Lë na' rázu' luyú biti' ilén channö cabí initi. <sup>37</sup> Lë na' rázu' luyú naca tu xisédo'os, nadxi ca' que zxoa' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. <sup>38</sup> Dios runë' ga gaca guixi' cuando' ca nun cazë' que. Ca naca tu tu xisedo' na' runë' ga gaca guixi' cuando' que. <sup>39</sup> Lësca' caní, biti' naca lëbisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla. <sup>40</sup> Lësca' caní nadzá' idú ca nácacaca caz nupa nacué' yehua' yubá ca naca idú ca nácacaca caz nupa nacué' luyú ni. Zoa tu yöl-la' lachi quégaca nupa nacué' yehua' yubá, en ia'tú ca naca yöl-la' lachi quégaca nupa nacué' luyú ni. <sup>41</sup> Zoa tu yöl-la' lachi que gubidza, en ia'tú que beo', en ia'tú quéguequi böla' lúzxiba. Yöl-la' lachi que tu böla' lúzxiba nadzá' ca naca yöl-la' lachi que ia'tú böla' lúzxiba. <sup>42</sup> Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. <sup>43</sup> Cate' rigachi' lu yeru ba naca tu bëla'

ca'asö, en le nacuidi'. Cate' ubán, ní'irö gaca tu le lachi, en le nál-la. <sup>44</sup> Cate' rigachi' lu yeru ba naca tu bëla' que yödzo'lió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzo'lió ni, en ia'tú ca gaca le idzaga bö' naca cázaru'.

<sup>45</sup> Nazúaj lu guichi lá'ayi le rnna: "Bönni' na' gusílahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. <sup>46</sup> Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'. <sup>47</sup> Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá. <sup>48</sup> Nupa nacua' luyú ni nácgaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. <sup>49</sup> Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöéquiru' ca néquinë' Nu na' birúaj yehua' yubá.

<sup>50</sup> Caní ré'ëni inná lë ni rea' libí'ili', böchi' luzá'ado', rnníá': Le néquini bëla', en rön bití' gaca tsaz ga ni' rinná bë'ë Dios, en lësca' caní, lë na' inítí bití' gaca ideli' lë na' soa tsaz. <sup>51</sup> Buli'yútsöca', rea' libí'ili' tu le bigachi': Bití' gátiru' yúgu'tëru', pero Dios utsë'ë ca nácaru' yúgu'tëru'. <sup>52</sup> Tsárido'os gaca, tsca naca tu le rutásö guiój loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'. <sup>53</sup> Lë na' nácaru' le rínítí ral-la' huóaca le soa tsaz, ate' le néquiniru', lë na' ral-la' gati, huóaca tu le catu caz gati. <sup>54</sup> Cate' lë na' rínítí chinuhuóaca le soa tsaz, enca' lë na' ral-la' gati chinuhuóaca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

<sup>55</sup> Bítí'rö inná be'e yöl-la' guti rë'u.

Bítí'rö gaca yöl-la' guti bi gun queëru'.

<sup>56</sup> Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. <sup>57</sup> ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

<sup>58</sup> Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' bití' runlí' nítisö xichinë' Xanru'.

## 16

### *Yugu' bönachi Corinto tu'nödzej quégaquië' böchi'gaca ta'yádzjanë'*

<sup>1</sup> Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacué' Jerusalén, guli'gún na'a ca na' gunná bé'eda' yugu' cö' bönachi queë' Cristo, nacua' luyú Galacia. <sup>2</sup> Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queëli'. Guli'gún chí'i le, para cabí gun bayudxi bi utúbili' cate' idxina' ga zóali'. <sup>3</sup> Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzejali'. <sup>4</sup> Channö ral-la' tseja' ca' neda', tsöjácálenë' neda'.

### *Le rë'ëne' gunë' Pablo*

<sup>5</sup> Guída' ga zóali' cate' údxi töda' yugu' yödzo' luyú Macedonia, tu' run bayudxi töda' yugu' yödzo' na'. <sup>6</sup> Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. <sup>7</sup> Cate' guída' uduyúa' libí'ili' bití' rë'ënda' tödisa' ni'. Runa' löza sóalena' libí'ili' xidzé, channö gunnë' Xanru' neda' lataj. <sup>8</sup> Ugá'ana' ni lu yödzo' Éfeso ga idxinrö dza Pentecostés <sup>9</sup> tu' dë lataj ni guna' tu dxin zxon queë' Xanru', sal-la' zían nupa ta'dá'baga' neda'.

<sup>10</sup> Channö idxinbi' bi'i Timoteo ga na' zóali', guli'güí'i ládxi'li'-bi', para cabí ubi uguí'ibi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'. <sup>11</sup> Que lë ni na', cuntú nu ral-la' uzóa lëbi' tsóal'alö. Guli'gácalen-bi', ugú'uli'-bi' nöza idú tsáhui'do',

para udxinbi' ga ni zoa' neda', tu' riböza'-bi' läbi', enca' yugu' böchi'ru' túnlenë'-bi' tsözxön dxin.

<sup>12</sup> Ca naca queë' böchi'ru' Apolos, gúta'yua' lahuë' tsejë' tsöjyüë' libí'ili' tsözxön len yugu' böchi'ru', pero biti' ré'ënë' tsejë' na'a. Guídë' cate' séqui'në'.

*Didza' ru'ë Pablo ga ruúdx*

<sup>13</sup> Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxi'li'. <sup>14</sup> Len yöl-la' nadxí'i guli'gún biti'tës bi gunli'.

<sup>15</sup> Na'a, böchi' luzá'ado', chinöz quézili' ca naca queë' Estéfanas, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacuá' luyú Acaya. Bulu'dödi cuíngaquië' para ilunë' xichíngaca bönachi queë' Dios. <sup>16</sup> Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'. <sup>17</sup> Rudzėjada' tu' bila'dxinë' Estéfanas, en Fortunato, en Acaico ga zoa', tu' gúcalengaquië' neda' uláz queëli'. <sup>18</sup> Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

<sup>19</sup> Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'. <sup>20</sup> Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

<sup>21</sup> Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

<sup>22</sup> Nu biti' nadxí'i Xanru' Jesucristo, chinabía dö' nu na'.

Gudá Xanru'.

<sup>23</sup> Rinábida'-në' Xanru' Jesucristo uzá' ládxi'ë queëli'. <sup>24</sup> Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

## DIDZA' BUROPI GUSÖL-LË'Ë PABLO YÖDZÖ CORINTO

### *Pablo rugapë' Dios bönachi queë' Cristo nacu'ë Corinto*

<sup>1</sup> Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzö Corinto, enca' yúgu'tëli' néquili' quez queë' Dios luyú Acaya ga na' nababa Corinto. <sup>2</sup> Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

### *Yugu' le gudí'i guzáquë'ë Pablo*

<sup>3</sup> ¿Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhuí'tica'sö rë'u! <sup>4</sup> Dios ruhuë tsáhuë'ë rë'u cate' raca bíti'tës bi raca queëru', para gaca huë tsáhuí'ru' ca' nupa bi raca queéquequi. Ruhuë tsáhuí'ru' légaquië' ca na' Dios ruhuë tsáhuë'ë rë'u.

<sup>5</sup> Tsca ta'yán le riguí'i rizáca'ru', ca na' gudí'i guzáquë'ë Cristo, lësca' caní ta'yán le tu'huë tsahuí' rë'u, tu' nácaru' tuz len Cristo. <sup>6</sup> Que lë ni na', channö bi riguí'i rizáca'tu', raca caní queëtu' para gaca huë tsáhuí'tu' libí'ili', en guntu' ga uláli'. Channö Dios ruhuë tsáhuë'ë netu', raca caní para gaca huë tsáhuí'tu' libí'ili', ate' lu yöl-la' riböza zxön ladxi' queëli', gaca guá' ilenli' yugu' le quí'i sáca'li', ca na' raca ca' queëtu'. <sup>7</sup> Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibé tsözxön len netu' le ruhuë tsáhuë'ë Dios rë'u.

<sup>8</sup> Ré'ënitü' inözili', böchi' luzá'ado', ca naca le zían le gulaca queëtu' luyú Asia. Gudödité bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'. <sup>9</sup> Gúquitu' guca queëtu' ca raca queégaquië' bönni' chinarugu queégaquië' ilátië'. Guca caní queëtu' para cabí' uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. <sup>10</sup> Dios busölé' netu' lu lë na' ben ga guzóa bönadxi gátitu', ate' rusölé' netu' yúgu'të dza. Runtu' löza usölé' Lë' netu' caní leyúbölö <sup>11</sup> channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

### *Rigúixjö'ë Pablo bizx que ridzenë' idxinë' Corinto*

<sup>12</sup> Lë ni le run ga rudzéjatu'. Bö' naca caztu' ruluí'i netu', len yöl-la' ba'a ladxi' queëtu', en idú ládxi'tu' runtu' bi runtu' yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni'i queëztu' bentu' caní. <sup>13</sup> Ruzúajstötu' queëli' lu guichi le gaca ulábali', en le gaca tséajni'ili'. Raca ládxa'a tséajni'ili' idú <sup>14</sup> lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

<sup>15-16</sup> Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. <sup>17</sup> ¿Naru' réquitseli' guzxi' yë'a tu' butsó'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bë'ësa' ca' didza' cate' gunnía: "Caní guna'?" <sup>18</sup> Ni'a queë' Xanru' Dios, Nu run iduté ca rnna xtídzë'ë, bití' bë'ësa' ca' didza' cate' bë'lëna' libí'ili' xtídzë'ë Dios. <sup>19</sup> Jesucristo, Zxí'inë' Dios, Nu na' bentu' libán que ga zóali', neda' len Silvano, en Timoteo, bití' ruí'së' ca' didza'. Lë' ru'ë didza' iduté li. <sup>20</sup> Cristo caz runë' ga naca iduté löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. <sup>21</sup> Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'. <sup>22</sup> Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

<sup>23</sup> Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'. <sup>24</sup> Biti' ré'ënitü' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitü' guntu' le gun ga udzeja ládxi'li'.

## 2

<sup>1</sup> Que lë ni na' bë' ládxa'a cabí guídatea' queëli' zí'alö, para cabí guna' ga huí'inili'. <sup>2</sup> Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'? <sup>3</sup> Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. <sup>4</sup> Cate' ni' buzúaja' queëli' lu guichi lë na', gusëbide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxí'ide'eda' libí'ili'.

### *Ral-la' uniti loru' nu ruá' dö' cate' rubí'i ladxí'*

<sup>5</sup> Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnní'a: "Huaca innaru'", para cabí tödi bë' ichugu bë'a queë bönni' na'. <sup>6</sup> Tscati' gaz xíguia' chibenli' látu'biqui' yúgu'tëli' queë bönni' na'. <sup>7</sup> Na'a, ral-la' uniti loli' bönni' na', en utí'pali' ládxe'ë, para cabí tödi bë' huí'ininë', en para cabí gaca tsaz chopa ládxe'ë. <sup>8</sup> Que lë ni na' ráta'yua' loli' gunli' le gaca bë' nadxí'ili'-në' idú ládxi'li'. <sup>9</sup> Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica'sili' ca rna xtídza'a. <sup>10</sup> Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé. <sup>11</sup> Caní runa', para cabí sequí' Satanás tu' xihui' ucúl-la rë'u, tu' chinöziru' yugu' le ré'ëni gun queëru'.

### *Gurö'ë böniga Pablo lu yödzö Troas*

<sup>12</sup> Cate' bidxina' lu yödzö Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'. <sup>13</sup> Sal-la' guca caní, gurö'a böniga tu' cabí yöjxáca'a-bi' bi'i böchi'ru' Tito ni'. Que lë ni na' buzá'alena' bönachí ni', ate' guyija' luyú Macedonia.

### *Idéli'ru' tu' zóalenë' Cristo rë'u*

<sup>14</sup> ¿Xclenë' Dios! Richë'tica'së' rë'u ca tu le naca bë' bidéli'në' Cristo yöl-la' rusölá queëru'. Dios rugunë' dxin rë'u para rulu'ë lahui ca gaca ilúnbë'e bönachí Cristo. Le nácaru' naca ca tu le rilá' zxixi, le riguisi gátitës. <sup>15</sup> Nácaru' ca tu nöri rilá' zxixi, le ruzégui'ë Cristo lahuë' Dios, en le riguisië' lógaca nupa nulágaca, en nupa nanítigaca. <sup>16</sup> Lógaca nupa na' nanítigaca nácaru' ca tu le rilá' siguti le naca bë' ilátië'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? <sup>17</sup> Biti' runtu' ca tun zían bönachí, nupa tu' gún dxin xtídzë'ë Dios ca tu le tuti', en to'o. Tu' nasöl-lë'ë Dios netu', idú ládxi'tu' ruí'itu' didza' lahuë' Lë' tu' nácatu' tuz len Cristo.

## 3

### *Ca naca didza' le ruún rë'u tuz len Dios*

<sup>1</sup> ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi uluí'itu' libí'ili' tu guichi le rulu'í le nácatu'? ¿Naru' ral-la' inábitu' libí'ili' gúnnali' queëtu' tu guichi caní, ca na' tun bal-la bönachí? <sup>2</sup> Libí'i cázali' nácali' ca tu guichi le rulu'í le nácatu', le nazúaj lu icja ládxi'do'otu', ate' yúgu'të bönachí gaca ulu'laba le, en tséajni'iguequi le. <sup>3</sup> Le nácali' nalá' lahui ca tu guichi nuzúajë' Cristo, le gusöl-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiöjta'a, pero lu icja ládxi'do'oli' nuzúajë'.

<sup>4</sup> Ru'itu' caní didza' tu' ruzxöni ládxi'tu'-në' Dios tu' zóalenë' Cristo rë'u. <sup>5</sup> Biti' réquitu' bi gaca guntu' rácasö queëtu', pero Dios runnë' queëtu' yöl-la' huáca bi guntu'. <sup>6</sup> Dios caz bennë' queëtu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guíchisö richugu queëru' gátiru', pero Dios Bö' Lá'ayi nabániru'.

<sup>7</sup> Yugu' xibá queë' nazúajgaca lu guichi, Dios buzúajë' yugu' lu guiöjta'a, ate' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyëpitërö yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca, <sup>8</sup> zxöntërö naca yöl-la' bení' na' dzaga yugu' le runë' Dios Bö' Lá'ayi. <sup>9</sup> Yöjtsaga yöl-la' bení' lë na' ben ga narugu quégaca bönachi ilátigaca. Zxöntërö naca yöl-la' bení' que lë na' run ga rnnë' Dios nátagaca tsahui' bönachi. <sup>10</sup> Tu' nácatërö lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi. <sup>11</sup> Channö guzóa yöl-la' bení' que lë na' guzóa tu chí'ido'osö, zxöntërö naca yöl-la' bení' que lë ni sóatica'sö.

<sup>12</sup> Tu' zoa lë ni runru' löza, ru'itu' didza' lu yöl-la' rugu ladxi'. <sup>13</sup> Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. <sup>14</sup> Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugüë' tuzë' Cristo. <sup>15</sup> Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiój lógaquië' le run ga nachul-la nanítigaquië'. <sup>16</sup> Cate' nu ruhuóaca queë' Xanru', rigúa lë na' run ga nachul-la naniti nu na'. <sup>17</sup> Cate' ni rnnatu': "Xanru'", ru'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. <sup>18</sup> Yúgu'tëru' rë'u bití' bi nusayaj loru'. Nácaru' ca tu guíë dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queëru' yöl-la' bení' queë'.

## 4

<sup>1</sup> Dios buéchi' ládxi'ë netu', en budödë' lu na'tu' dxin ni runtu'. Que lë ni na' bití' raca chopa ládxi'tu'. <sup>2</sup> Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí' yé'etu', en bití' rutsá'atu' xtídzë'ë Dios. Tu' ru'itu' didza' que le naca idútë li, ru'í ládxi'tu' guntu' le iléquibe'e yúgu'të bönachi naca dxi'a lahuë' Dios. <sup>3</sup> Channö zoa nu bití' réajni'ini didza' dxi'a runtu' ba nalí que, nátagacasö nupa nachul-la nanítigaca bití' ta'yéajni'i le. <sup>4</sup> Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. <sup>5</sup> Bití' runtu' libán que la' cuínsitu', pero runtu' libán queë' Jesucristo, en riguixjö'ötu' náquië' Xanru', ate' netu' ni nácatu' huen dxin queëli' tu' nadxí'itu'-në' Jesús. <sup>6</sup> Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

### *Tu' réajlë'ëru' Dios runru' ca rë'ënë' Lë'*

<sup>7</sup> Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

<sup>8</sup> Tu'saca' zi' bönachi netu', pero bití' rudú ládxi'tu'.

Rö'ötu' böniga, pero bití' raca chopa ládxi'tu'.

<sup>9</sup> Ta'bía ladxi' bönachi netu', pero bití' rubéaj ládxi'ë Dios netu'.

Ta'zé'ede'e netu' yu, pero bití' tu'suniti netu'.



<sup>10</sup> Lu idú le naca caztu' rátitica'stu' tsözxón len Jesús, na' naca bë' lu le naca caztu' nabánitu' Lë'.

<sup>11</sup> Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. <sup>12</sup> Caní naca, zoa bönadxi queëtu' gátitu', pero ni'a que lë ni rata' yöl-la' na'bán queëli'.

<sup>13</sup> Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lëscá caní raca queëtu', réajlë'ëtu' Dios, en que lë ni na' ruí'itu' didza'. <sup>14</sup> Nöztu' ca gunë' Dios, Nu busubán Xanru' Jesús, usubanë' ca' netu' tsözxón len Jesús, en usudxinë' netu' tsözxón len libí'ili' lahuë' Lë'. <sup>15</sup> Raca caní yúgu'të lë ni para gaca bi uzí'ili' xibé. Channö ila'deli' zianró ca' bönachi le ruzá' ládxë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

<sup>16</sup> Que lë ni na', biti' raca chopá ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. <sup>17</sup> Le cuídi'sö riguí'i rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'. <sup>18</sup> Biti' ruí'i ládxi'ru' le rilé'ëru' luyú ni, pero le biti' gaca ilé'ëru' ruí'i ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

## 5

<sup>1</sup> Nöziru' cate' initi idútë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. <sup>2</sup> Que lë ni na' rinnë ládxi'ru' tu' ré'ëni'ru' tsú'uru' le cubi ni', lë na' naca ca tu lídxiru' ni' yehua' yubá. <sup>3</sup> Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'. <sup>4</sup> Tsanni ni zóaru' lu idútë le naca cázaru', le naca ca tu yu'u lári'do', rinnë ládxi'ru' lu yöl-la' risëbi ladxi' queëru'. Biti' runru' caní tu' ré'ëni'ru' ucá'anaru' idútë le naca cázaru', pero ré'ëni'ru' tsú'uru' tsaz le cubi ni'. Caní gaca, ucá'anaru' idútë le naca cázaru' le riniti, ate' tsú'uru' lu yöl-la' na'bán idú. <sup>5</sup> Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupë'ë queëru'.

<sup>6</sup> Que lë ni na' nadipa ládxi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'. <sup>7</sup> Runru' ca runru' tu' réajlë'ëru'-në' Dios, en calëga tu' zoa bi rilé'ëru'. <sup>8</sup> Tu' runru' löza lë ni, ré'ëni'ru' ucá'anaru' le naca cázaru' ni para tsöjsóalenru'-në' Xanru'. <sup>9</sup> Que lë ni na' ruí'i ládxi'ru' gunru' le raza ládxë'ë Xanru', channö ugá'anaru' lu idútë le naca cázaru' ni, o channö tsöjsóalenru'-në' Xanru' ni'. <sup>10</sup> Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröë'. Ní'irö ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

### *Le ruún rë'u tuz len Dios*

<sup>11</sup> Que lë ni na', tu' rádxitu'-në' Dios, ruí'i ládxi'tu' uzéajni'itu' bönachi. Nözinë' Dios ca naca le yu'u icja ládxi'do'otu', ate' ruzxóni ládxa'a nözili' dxi'a ca' libí'ili' lë na' yu'u icja ládxi'do'otu'. <sup>12</sup> Biti' rubéaj cuintu' dxi'a loli'. Ré'ëni'ru' gata' lataj queëli' gunli' netu' bal, para gaca ubí'ili' didza', bi guiéli' yugu' bönni' tun ba zxón cuíngaquië' ca na' tu'luí'isö lahui cuíngaquië', en calëga ca nácaquië' lu icja ládxi'do'gaquië'. <sup>13</sup> Channö nachixi ícjatu', naca para gaca yöl-la' ba queë' Dios, en channö cabí nachixi ícjatu', naca para gaca bi uzí'ili' xibé. <sup>14</sup> Run bayudxi bi guntu' tu' nadxí'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxón. <sup>15</sup> Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. <sup>16</sup> Que lë ni na', bíti'rö gúnbë'ëtu' bönachi tsca naca le nalá'gaca láhui'lö, en sal-la' canísö bënbe'ëtu'-në' Cristo, biti' núnbë'ëtu'-në' caní na'a. <sup>17</sup> Channö nuhuóaca

núti'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

<sup>18</sup> Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóáca yúgu'të bönachi tuz len Lë'. <sup>19</sup> Libán runtu' rna caní: "Dios guzóalenë' Cristo, en benë' ga gaca ulu'huóáca bönachi yödzölió ni tuz len Lë', en biti' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huóáca bönachi tuz len Dios. <sup>20</sup> Na'a, nácatu' gubáz queë' Cristo, en raca na'a ca Dios caz ráta'yüë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóáca tuz len Dios. <sup>21</sup> Cristo biti' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

## 6

<sup>1</sup> Tu' runtu' dxin tsözxön len Dios, ráta'yutu' loli', rnnatu': Biti' udödili' cá'asö le ruzá' ládxe'ë Dios queëli'. <sup>2</sup> Nazúaj lu guichi lá'ayi ca gunné' Dios le rna:

Tu dza buzá' ládxa'a quiu', biyönda' li',  
ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxe'ë queëru'! ¡Na'a naca dza gaca uláru'!

<sup>3</sup> Biti' rë'ënitü' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. <sup>4</sup> Ni'a que bítitës bi runtu', ruí' ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxi' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga rő'ötu' böniga. <sup>5</sup> Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'i netu'. Gudödi bë' bentu' dxin, en biti' guta' lataj queëtu' gásitu' o bi gágutu'. <sup>6</sup> Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i,  
en tu' riböztu' zxön ladxi', en tu' nácatu' dxi'i ladxi',  
en tu' zóalenë' Dios Bö' Lá'ayi netu',  
en tu' naca idú ca nadxí'itu' luzá'atu'.

<sup>7</sup> Ruí'itu' didza' idütë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

<sup>8</sup> Nacuá' nupa tun netu' bal, enca' nupa tu'zóa netu' tsölá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizí' yë'ëtu', ruí'itu' didza' idütë li.

<sup>9</sup> Sal-la' nacuá' bönachi biti' núnbë'gaquië' netu',  
nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë' netu' xíguia', pero biti' tutië' netu'.

<sup>10</sup> Tu'suhuí'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zián.

Sal-la' biti' bi dë queëtu', nequi queëtu' yúgu'të le dë.

<sup>11</sup> Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí' ládxi'da'tu' libí'ili'. <sup>12</sup> Channö cabí nácaru' tuz biti' naca tu' cabí ruí' ládxi'tu' libí'ili', pero libí'i cázali' biti' ruí' ládxi'li' netu'. <sup>13</sup> Na'a, ruí'ilená' libí'ili' didza' ca runë' tu bönni' ruí'ilenë'-bi' zxi'inë' didza', rnnía': Buli'bí'i queëtu' ca rúnlentu' libí'ili'. Guli'güf' ladxi' netu'.

### *Nácaru' ca tu yudo' ga yu'ë Dios ban*

<sup>14</sup> Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

<sup>15</sup> ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

<sup>16</sup> ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunné':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

<sup>17</sup> Que lë ni na', gunné' ca' caní:

Guli' rúaj ládjagaquië', en buli' lá' alen légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

<sup>18</sup> Neda' gaca' xuz cázali', ate' libí'ili' gácali' zxí'ina', bönni', en nigula."

Caní rnnë' Xanru', Nu napa caz idútë' yöl-la' huáca.

## 7

<sup>1</sup> Böchi' luzá'ado', néquiguequi queëru' yugu' lë ni guzxi' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

*Ca bulu'bí'i ládxi' gaca nupa ta'yéajlë' Cristo*

<sup>2</sup> Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

<sup>3</sup> Ruá'a caní didza', calëga para usubága'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí'i ládxa'a libí'ili'.

<sup>4</sup> Ruzxónida' ládxa'a libí'ili', en rúnda'a libí'ili' zxön. Sal-la' zían le riguí'i rizáca'tu', nadípada' ládxa'a, en rudzëjade'e ládxa'a.

<sup>5</sup> Cate' bidxintu' luyú Macedonia, ga ridxintë na'a dza, biti' rata' queëtu' lataj uzí' ládxi'tu', pero zían le taca queëtu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. <sup>6</sup> Ní'irö Dios, Nu rutipa ladxi' nu chizóa gaca chopá ladxi', butipë' ládxi'tu' cate' budxinbi' bi'i Tito ga guzóatu'. <sup>7</sup> Biti' gúcasö tu' budxinbi' queëtu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' ré'ënde'eli' ulé'eli' neda', en ca na' ruhuí'inili' ni'a que lë na' guca ni', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

<sup>8</sup> Sal-la' le buzúaja' queëli' lu guichi zí'alö ben ga buí'inili', biti' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu' chí'ido', <sup>9</sup> pero na'a rudzëjada', calëga tu' buí'inili', pero tu' ben yöl-la' ruhuí'ini queëli' na' ga bubí'i ládxi'li'. Dios bugunë' dxin yöl-la' ruhuí'ini queëli', para cabí' ichixi iníguili' ni'a que le bentu' netu'. <sup>10</sup> Yöl-la' ruhuí'ini na' rugunë' dxin Dios run ga nu ubí'i ladxi' para ulá nu na', ate' que lë ni na' biti' ral-la' huí'iniru' que. Yöl-la' ruhuí'ini le naca que yödzölió ni run ga ilátigaca bönachi.

<sup>11</sup> Buli'yútsöca' ca bugunë' Dios dxin yöl-la' ruhuí'ini queëli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi' dul-la' nabága'li' ni'a que lë na' guca.

<sup>12</sup> Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guzxcaca', pero para gaca bë' lahuë' Dios le nácatë ruí'i ládxi'li' netu'. <sup>13</sup> ¡Lë ni butipa ládxi'tu'! Calëgasö bidipa ládxi'tu', pero rudzëjade'e ládxi'tu' tu' rudzëjabí' bi'i Tito ni'a que le benli' libí'ili', tu' butípali' ládxi'bi'.

<sup>14</sup> Bena' libí'ili' zxön lobi' Tito, ate' biti' benli' ga utu'ida'. Bě'lentica'stu' libí'ili' didza' idútě li, ate' lěsca' caní naca idútě li didza' bě'lentu'-bi' Tito cate' bentu' libí'ili' bal.  
<sup>15</sup> Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídza'tu', en ca na' benli'-bi' bal lu yöl-la' radxi Dios queéli' en lu yöl-la' nōxaj ladxi' queéli'.  
<sup>16</sup> Rudzėjade'eda' tu' gaca uzxöni ládxa'a libí'ili' idú ládxa'a.

## 8

### *Ca ral-la' unödzej nu réajlě' Cristo le dě que*

<sup>1</sup> Na'a, böchi' luzá'ado', rě'ěnitú' quíxjöi'itu' libí'ili' ca naca le buzá' ládxe'ě Dios quegaca yugu' cö' bönachi queě' Cristo luyú Macedonia. <sup>2</sup> Sal-la' yenni' gula'guí'i gula'záquiě' lu yugu' le guzxi' bě' légaquiě', bulu'dzėjade'eně', en idú ládxi'gaquiě' bulu'nödzejadě'ě sal-la' nácagaquiě' bönachi yechi'. <sup>3</sup> Neda' runa' ba nalí' quegaquiě', idú ládxi'gaquiě' bulu'nödzejadě'ě tsca gula'zéquí'ně', en bulu'nödzejare' tsca gula'zéquí'ně'.  
<sup>4</sup> Gula'nábide'eně' netu', en guláta'yudě'ě lotu' gú'itu' légaquiě' lataj tsözxön len netu' ilácaleně' böchi'ru' ta'yéajlě'ě Cristo. <sup>5</sup> Gulunrě' ca guqui ícjavu' iluně'. Bulu'dödi cuíngaquiě' zí'alö lu ně'ě Xanru', enca' lu na'tu' netu', le naca le raza ládxe'ě Dios. <sup>6</sup> Que lě ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzejali' lu yöl-la' dxi'i ladxi' queéli', ca na' gusí lobi' benbi' zí'alö. <sup>7</sup> Nácali' lo ca naca yúgu'tě le runli',  
ca réajlě'ěli' Cristo,  
en ca réajni'ili',  
en ca ruzéajni'ili' bönachi,  
en ca ruí'i ládxi'li' luzá'ali',  
enca' ca nadxí'ili' netu'.  
Lěsca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unödzejali' quegaquiě'.

<sup>8</sup> Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bě' naca idú ca nadxí'ili' luzá'ali'. <sup>9</sup> Nöz quezili' le buzá' ládxe'ě Xanru' Jesucristo queéru'.  
Bilé'eně' yöl-la' tsahui'  
pero para gácaleně' libí'ili'  
böáquiě' yechi'  
para gata' queéli' yöl-la' tsahui',  
tu' gúquiě' Lě' yechi'.

<sup>10</sup> Caní runi neda': Dxi'arö gaca queéli' údxi gunli' lě na' gusí loli' runli' chiguca tu iz. Gúcali' lo, calégasö ca bunödzejali', pero lěsca' ca gú'unili' unödzejali'. <sup>11</sup> Na'a, idú ládxi'li' buli'siyudxi gunli' lě na' gusí loli' runli', idú ládxi'li' bunödzejali'. Buli'nödzej na'a tsca séqui'li'. <sup>12</sup> Channö rě'ěnilí' bi unödzejali', Dios runě' bal le runödzejali' tsca naca le dēsö queéli'. Biti' rinabě' unödzejari' tsca le dēsö queéli'.

<sup>13</sup> Biti' rě'ěnda' guna' ga unödzejali' le gácalen ia'zica'rö bönachi ga idxintě yadzaj queéli'.  
<sup>14</sup> Rě'ěnda' gaca tuz ca dě queéli', en quegaquiě'. Na'a dēda' queéli' le gaca unödzejali' para bi gata' quegaca nupa ni' riyadzaj queguequi. Ní'irö cate' bi yadzaj queéli', légaquiě' huáca bi ulu'nödzejě' queéli' para caní gaca tuz ca dě queéli', en quegaquiě' yúgu'těli'. <sup>15</sup> Lěsca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

### *Ca runbi' bi'i Tito, enca' nupa dzágagaca lěbi'*

<sup>16</sup> ĵcłeně' Dios, tu' beně' Lě' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'! <sup>17</sup> Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rásasö queěbi' gú'unibi' tsöyubi' libí'ili'.

<sup>18</sup> Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. <sup>19</sup> Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runödzjali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo. <sup>20</sup> Caní gaca, gunë' netu' tsözxön para cuntu nu bi gaca innë queëtu', ca rúnlentu' dumí na' runödzjada'ali', le gácalen bönachi yechi'. <sup>21</sup> Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

<sup>22</sup> Risöl-la'tu'-në' ca' ia'tué' böchi'ru' tsözxön len légaquië', ate' zían luzuí guzxí' bë'ëtu' lë', ate' naca bë' ré'ënë' gácalenë' rë'u idú ládxi'ë. Ia'stú, tu' ruzxöni ládxi'ë libí'ili', ré'ënitëronë' ca' gácalenë' rë'u lu dxin ni. <sup>23</sup> Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zíca'rë' böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. <sup>24</sup> Guli'gún ga gaca bë' nadxí'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queëli'.

## 9

### *Ca naca dumí rutúbiru' le gácalen yugu' böchi'ru'*

<sup>1</sup> Ca naca le runödzjali' quégaquië' böchi'ru' ta'yéajlë'ë Cristo, biti' run bayudxi uzúaja' queëli' lu guichi ni. <sup>2</sup> Chinözda' ca ré'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queëli', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqui' yúgu'të bönachi ni ta'yéajlë' Cristo. <sup>3</sup> Na'a, risöl-la'a yugu' böchi'ru' ni queëli' para gaca bë' naca idútë li didza' ruí'itu' ca naca queëli', ate' naca ca na' chigunnía' queëli', chizóa gunli' lë na' gácalen yugu' luzá'aru'. <sup>4</sup> Channö ila'zá'alen bal-la bönachi Macedonia ta'yéajlë' Cristo neda' tsözxön, ate' gaca bë' biti' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. <sup>5</sup> Que lë ni na' gúquida' ral-la' isöl-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxí' lu ná'ali' unödzjali'. Caní gaca, údxí utúbili' dumí na' zí'alö ca idxina', ate' gaca bë' runödzjali' tu' ré'ëni cázali', en calëga tu' rinná bë'etu' libí'ili' bi unödzjali'.

<sup>6</sup> Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

<sup>7</sup> Tu tuli' ral-la' unödzjali' tsca na' chinuzóali' icja ládxi'do'oli', en calëga lu yöl-la' ruhu'ini queëli' o tu' run bayudxi, tu' nadxí'inë' Dios nu runödzaj idú ladxi'. <sup>8</sup> Dios gaca gúnnadë'ë queëli' ca riquínili' para gata' queëli' yúgu'të lë na' riquínili', ate' ugá'ana queëli' para gaca gácalenli' nu bi riyadzaj que. <sup>9</sup> Lësca' caní nazúaj lu guichi lá'ayi le rnna: Idú ládxi'ë bunödzjë' quégaca bönachi yechi'.

Naca bë'tica'sö yöl-la' dxi'i ladxi' queë'.

<sup>10</sup> Dios, Nu runna queëru' bi gaz uzóaru', enca' bi guí'aj gáguru', gunnë' ca' queëli' bi unödzjali', le naca ca lë na' nu raza ruzóa, en gunë' ca' ga ila'yán le ilápali' le nácagaca yugu' le dxi'a runli'. <sup>11</sup> Dios gunë' ga gáta'da' queëli' yöl-la' tsahui' para gaca unödzjada'ali'. Caní gaca, yugu' le unödzjali', lë na' quísitu' uláz queëli', gun ga ila'nná bönachi zían: "Xclenë' Dios." <sup>12</sup> Lë na' runödzjali' le gácalen yugu' böchi'ru', calégasö güí'i quégaquië' le ta'yádzjanë', pero gun ga ila'nnë': "Xclenë' Dios." <sup>13</sup> Cate' gunli' caní, ila'gu'ë Dios yöl-la' ba tu' gaca bë' runli' ca rnna didza' dxi'a queë' Cristo ca na' rnnali' runli'. Ila'gu'ë Lë yöl-la' ba ca', tu' nácali' dxi'i ladxi', runödzjali' quégaquië', enca' quégaca ia'zíca'rö bönachi. <sup>14</sup> Ulu'lidzë' Dios, en ila'nábinë' Lë' gácalenë' libí'ili' tu' nadxí'iguequinë'

libí'ili' ni'a que le buzá' ládxi'dè'è Dios queéli'. <sup>15</sup> ¡Xclenè' Dios, bennè' tu le nácada' lesaca' queéli'!

## 10

### *Yöl-la' unná bē' dē lu nē'ē Pablo*

<sup>1</sup> Ta'nná bönachi naca' nōxaj ladxi' cate' zóalena' libí'ili', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquiē' nōxaj ladxi', en dxi'i ladxi' Cristo, neda', Pablo, ráta'yua' loli' <sup>2</sup> cabí gunli' ga gun bayudxi gaca' rugu ladxi' len libí'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' bönáchisö queētu'. <sup>3</sup> Le nácate' nácatu' bönachi, pero calēga rácasö queētu' runtu' xichiné' Dios. <sup>4</sup> Yugu' le rudí'initu' lu gudil-la, bití' nácagaca ca le tu'dí'ini bönachi yödžolió ni lu gudil-la, pero yugu' le rudí'initu' lu gudil-la nápagaca yöl-la' huáca queē' Dios, le ruguntu' dxin para usunítitu' le nál-lagaca que tu' xihui'.

<sup>5</sup> Rusunítitu' yugu' didza' bití' nácate' le tu'zxöni ládxi'gaca bönachi, en yúgu'tē le tun ga tun ba zxön cuínguequi, en le tun ga cabí ilunbē' Dios. Runtu' ga gaca ila'nná bē'enē' yúgu'tē le ta'zá' ládxi'gaquiē', lē na' tun ga ta'dá'baguē'è Dios, ate' runtu' ca' ga tunē' ca rnnē' Cristo. <sup>6</sup> Tödi gunli' le gaca bē' naca idú ca runli' ca rnna xtídzē'è Cristo, sóatu' sina' guntu' xíguia' yúgu'tē nupa ni' ta'dá'baga' xtídzē'è.

<sup>7</sup> Ruyuli' le nalá' láchuisö. Channö réquinē' nu bönni' dzáguiē' libí'ili' néquinē' queē' Cristo, ral-la' guéquibe'enē' ca' lē ni: Ca na' lē' néquinē' queē' Cristo, lēasca' caní netu' néquitu' queē' Cristo. <sup>8</sup> Bití' ca' rutu'ida' sal-la' gudödi bē' ben ba zxön cuina' ca naca yöl-la' unná bē' budödē' Xanru' lu na'tu'. Lē na' dē lu na'tu' naca para guntu' ga gácarö idú ca réajlē'èli' Cristo, en calēga para usunítitu' libí'ili'. <sup>9</sup> Bití' ré'ènda' guéquili' ré'ènda' gun gádxida' libí'ili' ni'a que le ruzúaja' queéli' lu guichi ni. <sup>10</sup> Nacuá' ni' nupa ila'nná: "Yugu' le ruzúajē' Pablo queēru' lu guichi, rulidza zi'è rē'u, en ralē' didza', pero cate' zóalenē' rē'u runē' nōxaj ladxi', en didza' gúlado' ru'è." <sup>11</sup> Nu na' ru'i caní didza' ral-la' guéquibe'e lē ni: Ca na' nácatu' cate' bi ruzúajtu' queéli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

<sup>12</sup> Le nácate' bití' nácatu' rugu ladxi' para innatu' nácatu' lēbi ca nácagaca nupa ni' tun ba zxön cuínguequi. Nácagaca nupa ni' yugu' bönni' bití' bi nōzguequinē'. Lu le ta'za'sö ládxi'gaquiē' tu'zöē' ca ral-la' ilaca bönachi, en tu'chi'a tu'söröē' la' légacasē' tsca naca lē na' ta'za'sö ládxi'gaquiē'. <sup>13</sup> Netu' bití' gunrö ba zxön cuintu' ca ral-la' guntu', pero ca nácate' dxin budödē' Dios lu na'tu', ate' lu dxin ni, ral-la' guntu' le ga ni' zóali' libí'ili'. <sup>14</sup> Channö budödē' Dios lu na'tu' dxin guntu' ga zóali', bití' ca' gudödi bē'ètu' ca bentu' cate' bidxintu' ga zóali', en bentu' libán que didza' dxi'a ga na' zóali'. <sup>15</sup> Bití' run ba zxön cuintu' ca naca dxin núngaca ia'zica'rö bönachi, pero ca nácasö dxin na' budödē' Dios lu na'tu'. Runtu' löza gácarö idú ca réajlē'èli' Cristo para gaca guntu' dxin ga zóali' le nácarö lesaca', tsca naca le budödē' Dios lu na'tu' guntu'. <sup>16</sup> Ní'irö gaca guntu' libán que didza' dxi'a ga nacuá' yödžö dzö'ö zí'tu'rö ga zóali'. Caní gaca, bití' gun bayudxi gun ba zxön cuintu' ni'a que dxin núngaca ia'zica'rö bönachi, lē na' budödē' Dios lu nē'eguequi.

<sup>17</sup> Nazúaj lu guichi lá'ayi le rnna:

Nu ré'èni bi gun zxön,  
le ben cazē' Xanru' ral-la' gun zxön.

<sup>18</sup> Nurúajē' dxi'a tu bönni' cate' rnnē' Xanru' nurúajē' dxi'a, en calēga cate' ru'è caní didza' bönni' na' que la' cuinsē'.

## 11

### *Ca nácagaquiē' Pablo, en bönni' tun cuíngaqiē' gubáz queē' Cristo*

<sup>1</sup> Ré'ènda' guá' ilenli' neda' tsanni ni gu'a didza' lu yöl-la' bití' bi nözi quia'. Buli'sá' ládxi'li' quia'. <sup>2</sup> Ru'i ládxa'a libí'ili' ca na' Dios caz ru'i ládxe'è libí'ili', tu' nácali' ca nácabi'

tubi' bi'i nigula ra'bando', naca idú ládxi'bi', rusudxina'-bi' lahuë' Cristo para utsaga ná'aleni' Lë cazë'. <sup>3</sup>Rádxida' idxín queéli' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queënu Eva, nigula queë' Adán, cate' guzxí' ye'e Satanás tu' xihui' lënu lu yöl-la' sina' que. <sup>4</sup>Caní rnnía' tu' idú ládxi'li' ruí'ili' nu za' queéli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá' gaca ca nácagaca Bö' Lá'ayi na', en didza' dxi'a na' guzxí' lu ná'ali' lu na'tu' netu'. <sup>5</sup>Réquida' biti' nácara' cuídísö ca nácagaquië' bönni' ni' nácaterögaquië' lo, ate' réquili' nácagaquië' gubáz queë' Cristo. <sup>6</sup>Nadxi ca' naca' cuídísö ca ruá'a didza', pero biti' naca' cuídísö ca naca yöl-la' réajni'i napa'. Zián luzuí, en zián ca buluí'itu' libí'ili' ca naca yöl-la' réajni'i nápatu'.

<sup>7</sup>Nadxi ca' biti' naca dxi'a tu le bena', biti' bi buquizxja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. <sup>8</sup>Buguna' dxin le nequi quéguequi ia'zica'rö cö' bönachi queë' Cristo, tu' guzxí'a dumí bulu'nödzjé' légaquië' quia' para guca bena' dxin ga zóali' libí'ili'. <sup>9</sup>Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'rúajé' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'. <sup>10</sup>Ni'a que le naca idütë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya. <sup>11</sup>¿Naru' réquitseli' rnnía' caní tu' cabí nadxí'ida' libí'ili'? Nözinë' Dios nadxí'ida' libí'ili'.

<sup>12</sup>Gúntica'sa' ca runa' na'a, para cabí gata' quégaquië' lataj ilún ba zxön cuíngaquië' bönni' ni' ta'nnasë' nácagaquië' gubáz queë' Cristo, en ta'nnë' tunë' xichinë' Lë' ca runtu' netu'. <sup>13</sup>Biti' ca' nácagaquië' gubáz nasöl-lë'ë Cristo. Ta'zí' yë'ë ca naca dxin tunë', en tun cuíngacasë' gubáz queë' Cristo. <sup>14</sup>Biti' ral-la' ubániru' ca tunë' bönni' na'. Lësca' Satanás caz, tu' xihui', ruluí' cuini ca tu gubáz lá'ayi queë' Dios, ridé' lu bení'. <sup>15</sup>Que lë ni na' biti' ral-la' ubániru' channö yugu' huen dxin que tu' xihui' na' tu'luí' cuíngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

### *Yugu' le gudí'i guzxáquë'ë Pablo*

<sup>16</sup>Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güí' neda' lataj gu'a didza' ca tu bönni' nachixi icjé', para gun ba zxön cuina' tu chí'ido'. <sup>17</sup>Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjé', run ba zxön cuina'. <sup>18</sup>Nacu'ë zián bönni' tun ba zxön cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba zxön cuina'. <sup>19</sup>Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi ícjagaquië'. <sup>20</sup>Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. <sup>21</sup>Rutu'ida' rnnía' lë ni: Biti' bentu' caní queéli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjé'.

<sup>22</sup>¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxi'ini xi'sóë' Abraham?

Lësca' naca' neda'.

<sup>23</sup>¿Naru' nácagaquië' huen dxin queë' Cristo?

Lësca' nácatera' neda'.

(Na'a ruá'a didza' ca tu bönni' nachixi icjé' cate' rnnía' caní.)

Béntëra' dxin ca gulunë' légaquië'.

Guyu'a lidxi guíë' ziánrö luzuí ca gula'yu'ë légaquië'.

Gula'zé'eda' neda' yu bönachi ziánrö luzuí ca guca quégaquië'.

Guzóa bönadxi gátia' ziánrö luzuí ca guzóa quégaquië'.

<sup>24</sup> Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

<sup>25</sup> Tsonna luzuí gula'guínë' neda' gubá'ayi.

Tu luzuí bulu'ladxë' neda' guiöj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

<sup>26</sup> Zián luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zi'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquië' bönni' ta'zì yë'ë, ta'nnë' nácagaquië' böchi'ru' ta'yéajlë'ë Cristo.

<sup>27</sup> Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubídxá' nisa.

Zián luzuí biti' guta' quia' bi gahua', o ga utsë'e cuina', o lari' gácua'.

<sup>28</sup> Ia'stú, yúgu'të dza ruúbi rugu'ida' tu' ru'ida' ládxa'a yúgu'të cö' bönachi queë' Cristo.

<sup>29</sup> Cate' nu ricuídi', neda' ca' ricuídi'da'. Cate' nu run ga ichixi iníguinë' tu böchi'ru', rileda'

nu run caní. <sup>30</sup> Channö run bayudxi gun ba zxön cuina', gun ba zxön cuina' ca naca le

nácagaca bë' ricuídi'da'. <sup>31</sup> ¡Dios, Xuzë' Xanru' Jesucristo, gácatíca'sö queë' yöl-la' ba! ¡Lë'

nözinë' ruá'a didza' idútë li! <sup>32</sup> Cate' ni' guzóa' lu yödzö Damasco, bönni' ni' guta' lu në'ë

uláz queë' bönni' rinná bë'ë, lë' Aretas, bucu'ë yugu' bönni' gula'bö' nísíë' para ila'zönë'

neda', <sup>33</sup> pero yugu' böchi'ru' ni' bulu'dödë' neda' tu ga ra'a bení' que yu'u, yu'a tu ga'böra

zxön, en bulu'zötjë' neda' ní'ilö lu zö'ö run chi'i yödzö na'. Caní guca, bulá' lu ná'agaquië'

bönni' ni' gula'bö' nísíë' neda'.

## 12

### *Yugu' le bulu'inë' Dios Pablo*

<sup>1</sup> Le nácate' biti' ral-la' gun ba zxön cuina'. Sal-la' caní naca, na'a gu'a didza' ca nácagaca

le bulu'inë' Xanru' neda', en le buzéajni'inë' neda'. <sup>2</sup> Núnbë'a-në' tu bönni' réajlë'ë Cristo,

chiguca chidá' iz zoa nu guchë' lë' yehua' yubá. Biti' nözda' channö guyijë' ni' lu idútë le

naca cazë', o lu bö' naca cazë'. Tuzë' Dios nözinë'. <sup>3</sup> Nözda' guyázië' lataj lachi queë' Dios,

nazí'i le paraíso. Biti' nözda' channö guyijë' ni' lu idútë le naca cazë', o cabí. Tuzë' Dios

nözinë'. <sup>4</sup> Tsanni ni' zoë' ga na', biyönnë' le tun ga nu rubani, yugu' le biti' dë' lataj nu

gü'i didza' que. <sup>5</sup> Bönni' ni huáca guna' lë' zxön, pero biti' gun ba zxön cuina'. Tuz gun ba

zxön cuina' tu' ricuídi'da'. <sup>6</sup> La'tu' guë'ënida' gun ba zxön cuina', biti' gaca' bönni' biti' bi

nözinë', channö innía' le naca idútë li. Na'a, biti' gun ba zxön cuina' tu' cabí ré'ënda' nu

gunrö neda' bal tsca le bilé'e bena' neda', o tsca naca didza' biyöni bë'a neda'.

<sup>7</sup> Ní'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios

buzöë' tu huë' lu xipëla'a le riláda' ca rilá ga rinë' tu yötsi'. Huë' na' guca ca tu le bugún

dxin tu' xihui', para busaca' zi' neda'. Caní guca quia' para cabí tödi bë' gun ba zxön

cuina'. <sup>8</sup> Tsonna luzuí gúta'yua' lahuë' Xanru', en gunábida' Lë' ugüë' xihuë'a na'. <sup>9</sup> Xanru'

gudxë' neda': "Nácate' quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate'

ricuídi'nu'." Que lë' ni na', rudzëjade'eda' tu' ricuídi'da'. Tu' raca caní quia', rácalentëro

yöl-la' huáca queë' Cristo neda'. <sup>10</sup> Que lë' ni na', tu' nadxí'ida'-në' Cristo, rudzëjada' cate'



ricuídida', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídida', nápatērō caza' yöl-la' huáca queë' Lë'.

*Pablo ru'i lãdxë'ë bönachi queë' Cristo nacua' Corinto*

<sup>11</sup> Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí' cázali' benli' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácaquië' bönni' ni' nácada'gaquië' lo, ta'nnë' nácaquië' gubáz queë' Cristo. <sup>12</sup> Yugu' le bena' lu yöl-la' riböza zxon ladxi' quia' ga ni' zóali' nácaquië' bë' naca' gubáz queë' Cristo. Bilé'eli' yugu' le bena', le nácaquië' bë', en le tun ga nu rubani, en yugu' yöl-la' huáca zxon que yehua' yubá. <sup>13</sup> Tuz le cabí bena' ga zóali' le bena' ga nacua' ia'zica'rö cö' bönachi queë' Cristo. Biti' busaca' zi'a libí'ili' bi gúnnali' le guí'aj gahua'. Bulí'niti lo neda' tu' cabí bena' caní queë'li'.

<sup>14</sup> Chizóa guída' ga zóali' le bunni luzuí. Biti' bi inaba' gúnnali' quia'. Rë'ënda' gunna cuin cázali' quia', en calëga bi dë queë'li'. Yugu' bi'i huë'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxi'inigaquië'. <sup>15</sup> Idú lãdxa'a utöa' yúgu'të le dë quia', en udödi cuina' ni'a queë'li' para gaca bi uzí'ili' xibé, sal-la' réquida' cate' nãdxí'iröda' libí'ili', zeaj ruhuéchi' yöl-la' nãdxí'i queë'li' neda'.

<sup>16</sup> Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatë buzí'a xibali'. <sup>17</sup> ¿Naru' réquitseli' guzxi' yé'eda' libí'ili' cate' gusöl-la'a yugu' gubáz quia' ga zóali'? <sup>18</sup> Gúta'yua' lobí' bi'i Tito tséajbi' ga zóali', ate' gusöl-la'a-në' böchi'ru' na' tsözxön len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

<sup>19</sup> ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácaquië' para gácarö idú yöl-la' réajlë' queë'li' Cristo. <sup>20</sup> Rãdxida' biti' gácali' ca rë'ënda' gácali' cate' guída' ga zóali', ate' neda' biti' gaca' ca rë'ënili' libí'ili' gaca'. Rãdxida' ridil-la' dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxon cuinli', en rutsátsali'. <sup>21</sup> Cate' guída' ga zóali', channö caní raca queë'li', rãdxida' gunë' Dios ga utuí'ida' ca naca queë'li', ate' gun bayudxi cödx'a ni'a quégaca zian nupa ni' gulún dul-la', en biti' bulu'bí'i lãdxí'gaca ca nácaquië' le cabí naca tsahuí' gulúngaca, en yugu' le gula'zë lãdxí'guequi le cabí naca dxi'a.

## 13

*Pablo ruzéajni'inë' bönachi Corinto, en rugapë' Dios légaquië'*

<sup>1</sup> Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzé'e didza'." <sup>2</sup> Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxi' para til-la' légaquië'. <sup>3</sup> Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídinë' Cristo cate' bi runë' queë'li', pero lu yöl-la' huáca zxon queë' runë' bi runë' queë'li'. <sup>4</sup> Le nácatë gudë'ë lë'e yaga cruz ca nu ricuidi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuíditu' tsözxön len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

<sup>5</sup> Bulí'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'? <sup>6</sup> Runtu' löza chinöz quézili' le nácatë netu' réajlë'ëtu' Cristo. <sup>7</sup> Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahuí' sal-la' guéquili' richixi rinígitu' netu'. <sup>8</sup> Biti' ca' gaca tá'baga'tu' le naca idütë li, pero gácasö guntu' ca sa'yéaj le naca idütë li. <sup>9</sup> Que lë ni na' rudzëjatu' cate' ricuíditu', ate' libí'ili' ridipa lãdxí'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli'

Cristo. <sup>10</sup> Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxi'li', en calëga para usunítia' libí'ili'.

<sup>11</sup> Na'a, böchi' luzá'ado', dipa ládxi'li'.

Guli'güü' ládxi'li' gaca idú ca réajlë'ëli' Cristo.

Guli'güü' ládxi'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribözaru' dxí'ado'.

<sup>12</sup> Guli'gapa Dios luzá'ali', tuli' ia'tuli', en unída'li' luzá'ali'. <sup>13</sup> Yúgu'të böchi' luzá'aru' ni tu'gapë' Dios libí'ili'.

<sup>14</sup> Rinábida'-në' Dios gunë' ga gata' queëli' yúgu'tëli' le ruzá' ládxi'ë' Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

## DIDZA' GUSÖL-LË'Ë PABLO LUYÚ GALACIA

### *Ruzúajë' Pablo quégaca bönachi luyú Galacia*

<sup>1</sup> Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. <sup>2</sup> Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' böchi'ru' ni tu zxön neda'. <sup>3</sup> Rinábida' Xúziru' Dios, enca' Xanru' Jesucristo uzá' ládxe'ë queëli', en gunë' ga soa dxi icja ládxi'do'oli'. <sup>4</sup> Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca rë'ëni quézinë' Xúziru' Dios. <sup>5</sup> ¡Gácatica'sö queë' Dios yöl-la' ba! ¡Ca' caz!

### *Tuz naca le rinnë dxi'a queë' Jesucristo*

<sup>6</sup> Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxe'ë Jesucristo queëru', ate' na'a rë'ënili' si' ladxi' ná'ali' tu le rinnë dxi'a izá'a. <sup>7</sup> Le nácatë bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinnë dxi'a queë' Cristo. <sup>8</sup> Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. <sup>9</sup> Chigunná caza' caní zí'alö, ate' na'a rnníá' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

<sup>10</sup> ¿Réquitseli' rë'ënda' cú'uli' neda' yöl-la' zxön cate' ru'a caní didza'? ¡Biti' ca'! Rë'ënda' urúaja' tsahui' lahuë' Dios. ¿Réquili' rë'ënda' uzaca' baládxilengaca bönachi neda'? La'tu' rë'ënda' uzaca' baládxilengaca bönachi neda', bití' gaca' huen dxin queë' Cristo.

### *Naca böáquië' Pablo bönni' gubáz queë' Cristo*

<sup>11</sup> Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da'ahuiguequi bönachi. <sup>12</sup> Cuntu nu bönni' budödë' lu na'a le rinnë dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queë'. <sup>13</sup> Chibiyön quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguequi. <sup>14</sup> Lu le tequi le bach Dios bönni' judío, guyépisëtëra' neda' ca lá'tu'biqúi' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'. <sup>15</sup> Caní bena' neda', pero tu' náquië' dxi'i ladxi' Dios, gurö cazë' neda' zí'atëlö ca gulja', ate' bulidzë' neda' para guna' xichinë'. <sup>16</sup> Ní'irö, cate' gú'uni quézinë' Dios, benë' ga núnbë'a-në' zxí'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'. <sup>17</sup> Cabí guyija' yödzo Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzo Damasco.

<sup>18</sup> Caní guca, chigudödi tsonna iz cate' ni' guyija' yödzo Jerusalén, yöyúa'-në' Pedro, ate' bugá'analena' lë' idú ca chidá' gubidza. <sup>19</sup> Tsanni ni' zoa' ni' bití' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'. <sup>20</sup> Didza' ni ruzúaja' queëli' lu guichi nácatë. Ni'a queë' Dios bití' ca' rizí' yë'a.

<sup>21</sup> Gudödi ni' guyija', gudöda' yugu' yödz luyú Siria, en luyú Cilicia. <sup>22</sup> Yugu' dza ni' bití' núnbë'gaquië' neda' böchi'ru' tu'dubë' queë' Cristo gapa naca luyú Judea. <sup>23</sup> Gula'nözisinë' lë na' gúla'guixjö' quia' ia'zíca'rö bönachi, gula'nná: "Bönni' na' gudxía

nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'." <sup>24</sup> Caní guca, gula'gu'e yöl-la' ba Dios tu' nözda' neda'.

## 2

### *Bönni' gubáz queë' Cristo guzxi' lu ná'agaquië' Pablo*

<sup>1</sup> Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. <sup>2</sup> Guyija' ni', en bë'lëna' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibëna', enca' dxin ni runa' na'a. <sup>3</sup> Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. <sup>4</sup> Le nácatë gula'cuá' bal-la bönachi ni', nupa ni' ta'zì' yë', ta'ná nácagaca böchi'ru', ate' gulë'ëni ilún ga irugu lu xpéla'bi' Tito lë na' naca bë'. Yugu' bönni' ni núnagaquië' tu zxön rë'u pero tu'yusë' ca runru' para iléquië' enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'. <sup>5</sup> Biti' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

<sup>6</sup> Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'i ládxa'a ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. <sup>7</sup> Biti' bi gula'nná be'e neda' tu' guléquië' enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío. <sup>8</sup> Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

<sup>9</sup> Jacobo, en Pedro, en Juan, bönni' ni' réquiru' yu'u lu na'agaquië' dxin queë' Cristo, guléquië' enë' Dios nudödë' lu na'a dxin ni. Que lë ni na' guzxi' ládxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. <sup>10</sup> Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'ítica'sö ládxa'a runa'.

### *Ca guca cate' Pablo gudíl-lalenë' Pedro lu yödzö Antiquía*

<sup>11</sup> Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchíxinë' ca benë'. <sup>12</sup> Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en biti'rö gudágulenë' tsözxön bönachi izá'a na' tu' gúdxinë' bi ilunë' bönni' na' nazí lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. <sup>13</sup> Ní'irö ia'zíca'rë' bönni' judío ni' ta'yija ládxi'ë' Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'. <sup>14</sup> Cate' bilé'eda' biti' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bizx queë' ré'ënu' gunu' ga ilúngaca bönachi izá'a ca tunë' bönni' judío?"

### *Nulágaca bönachi judío ca na' nulágaca ca' bönachi izá'a*

<sup>15</sup> Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en calëga bönachi izá'a, nupa cabí núnbë'gaca Dios. <sup>16</sup> Nöz quéziru' cuntu nu huóáca tsahui' lahuë' Dios tu' run nu na' tsca rinná bë' xibá queë' Moisés, pero huóáca tsahui' tuzi nu na' reja ládxi' Jesucristo. Lës caní ca' rë'u reja ládxi'ru' Jesucristo para huóácaru' tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huóáca tsahui' lahuë' Dios tu' run tsca rinná bë' xibá queë' Moisés.

17 'Na'a, réquiru' nuhuóácaru' tsahui' tu' reja ládxi'ru' Cristo, pero channö naca bē' nácaru' bönni' dul-la' ca nácagaca bönachi izá'a, ¿innátsaru' runē' Cristo ga runru' dul-la'? ;Biti' caz! 18 Channö ruí'i ládxa'a uchisa' le chibuquinja', lē ni naca bē' riguitsja' xibá le gunná bē'ē Dios. 19 Tu' cabí guca uzóa' didza' xibá na' gunná bē'ē Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rē'ēnē' Dios. 20 Naca quia' ca chigútilena' tsözxön Cristo lē'e yaga cruz ga na' gútiē' Lē'. Que lē ni na' calēga neda' ni zoa' nabana', pero Cristo zoē' nabanē' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lē' zxi'inē' Dios, Bönni' na' bidxi'inē' neda', en budödi cuinē' lu yöl-la' guti uláz quia' neda'. 21 Biti' rē'ēnda' uzóa' tsölá'alö le ruzá ládxi'ē' queēru' Dios. Channö huáca huóáquiē' tsahui' tu bönni' lahuē' Dios tu' runē' tsca rinná bē' xibá queē' Moisés, ní'irö nítisö gútiē' Cristo."

### 3

#### *Le rinná bē' xibá queē' Moisés, en le reja ládxi'ru' Cristo*

1 Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nēbi para cabirö uzóali' didza' le nácate? Gate ga rē' buluí'itu' libí'ili' le sa'yéaj ca gútiē' Jesucristo lē'e yaga cruz. 2 Gudíxjöi' neda' lē ni. ¿Bidisóalenē' libí'ili' Dios Bö' lá'ayi tu' benli' ca rinná bē' xibá queē' Moisés o tu' guyija ládxi'li' le rinné dxi'a biyönili'? 3 ¿Nacxi guca nácali' tu' canöz caní? Gusí loli' nácali' bönachi queē' Dios tu' zóalenē' libí'ili' Dios Bö' lá'ayi. ¿Réquitseli' huáca udxí gunli' ga guéquili' queē' Dios rácasö queéli'? 4 ¿Guca nítisö guca queéli' yúgu'tē lē na' guzaca' gudí'ili'? ;Biti' ca' guca caní! 5 Cate' Dios risól-lē'ē queéli' Dios Bö' lá'ayi, en ru'ē libí'ili' lataj gunli' yugu' yöl-la' huáca que yehua' yubá, ¿runē' caní tu' runli' ca rinná bē' xibá queē' Moisés o tu' reja ládxi'li' le rinné dxi'a na' biyönili'?

6 Lu guichi lá'ayi rnna: Abraham guyija ládxi'ē' Dios, ate' Dios gunné' náquiē' bönni' tsahui' tu' guyija ládxi'ē' Lē'. 7 Que lē ni na' ral-la' inözili', nupa na' ta'yija ladxi' Dios nácagaca idú zxi'ini xi'sóē' Abraham. 8 Lu guichi lá'ayi ruí'i didza' zí'atélö ca gunē' Dios, innē' nácagaquiē' tsahui' bönni' izá'a ila'yija ládxi'ē' Lē'. Que lē ni na' Dios gudíxjöi'inē' Abraham zí'atélö ca naca le rinné dxi'a, gunné': "Lu nē'ē Zxi'ini xi'sú' guna' ga gaca dxi'a quégaca bönachi idutē yödžölió." 9 Caní naca, Abraham guyija ládxi'ē' Dios, ate' Dios benē' ga guca dxi'a queē'. Lēs caní ca' na'a, Dios runē' ga raca dxi'a quégaca yúgu'tē nupa ta'yija ladxi' Lē'.

10 Nupa na' tu' zxöni ladxi' ulu'huóáca tsahui' tu' túngaca ca rinná bē' xibá queē' Moisés, nabága' gaca xíguia'. Caní naca tu' nazúaj lu guichi lá'ayi, le rnna: "Yúgu'tē nupa na' cabí túngaca idutē ca rinná bē' xibá na' nabága' gaca xíguia'." 11 Na'a, naca bē' cuntú nu huóáca tsahui' lahuē' Dios tu' run nu na' le rinná bē' xibá na', tu' zoa lu guichi lá'ayi le rnna: "Nu na' nuhuóáca tsahui' lahuē' Dios soa' ibán tu' reja ladxi' Lē'." 12 Ca na' nuhuóáca tsahui' lahuē' Dios nu na' reja ladxi' Cristo nadzá' ca naca que nu na' ruzxöni ladxi' nuhuóáca tsahui' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa' ibán tu' run caní."

13 Cristo busölé' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga." 14 Caní guca queē' Cristo para gaca gunē' Dios ca na' guzxi' lu nē'ē queē' Abraham, gunē' ga gaca dxi'a quégaca bönachi izá'a lu nē'ē Jesucristo, en para gaca gunē' ga idisóalenē' Dios Bö' lá'ayi rē'u channö uyija ládxi'ru' Lē', ca na' guzxi' lu nē'ē Dios gunē'.

#### *Le rinná bē' xibá queē' Moisés, en le guzxi' lu nē'ē Dios gunē' queēru'*

15 Na'a, böchi' zána'do', uzúaja' queéli' tu' le rucudzu' didza', tu' le raca queēru'. Cate' chopá bönni' chigulunē' tuz xtídza'gaquiē', en chigulunē' tsutsu didza' na', cuntú nu gaca utsá' didza' na', en cabí gaca nu bi udá' lē'e didza' na'. 16 Dios guzxi' lu nē'ē bi gunē' queē' Abraham, en que zxi'ini xi'sóē'. Ga zoa lu guichi lē ni, biti' rnna: "Quégaca zxi'ini xi'sú'",

le ruí'i didza' que zían bönachi, pero rna: "Que zxi'ini xi'sú'." Lë ni ruí'i didza' que tuz bönni', Lë Cristo. <sup>17</sup> Lë ni na' le rë'ënda' innía': Dios benë' tuz didza' len Abraham, en guzxi' lu në'ë gunë' ca na' gunnë'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, biti' gaca ugúa lë na' guzxi' lu në'ë Dios gunë', en cabí gaca usulu le. <sup>18</sup> Na'a, channö ral-la' gunru' ca rinná bë' xibá na' para sí'iru' le guzxi' lu në'ë Dios gunsë', bítirö naca tu le guzxi' lu ná'asë' gunë'. Dios runsë' caní tu' caní guzxi' lu në'ë bi gunë' queë' Abraham.

<sup>19</sup> Channö caní naca, ¿bizx queë' gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xi'sóë' Abraham na', Bönni' na' guzxi' lu në'ë Dios gunë' queë' lë na'. Yugu' le gunná bë'ë Dios lu xibá queë', gusöl-lë'ë yödzölió ni lu ná'agaquië' gubáz lá'ayi queë', ate' Moisés budödë' didza' ca nácagaca xibá na'. <sup>20</sup> Biti' naquín nu udödi didza' cate' naca tuz nu run tuz didza', ate' Dios, tuz náquië'.

### *Bizx queë' gunná bë'ë Dios le zóagaca lu xibá queë'*

<sup>21</sup> Le nazúajgaca lu xibá queë' Dios, ¿ta'dá'gaca lë na' guzxi' lu në'ë Dios gunë'? ¿Biti' ca'! La'tu' gunná bë'ë Dios tu xibá le gaca gun ga sóaru' ibanru' tsaz, ní'irö huáca huóácaru' tsahui' lahuë' Dios channö gunru' ca na' rinná bë' xibá na'. <sup>22</sup> Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxi' lu në'ë Dios gata' queëru' cate' tseja ládxi'ru' Jesucristo.

<sup>23</sup> Zí'atëlö ga bidxín dza gaca tseja ládxi'ru' Cristo, le rna xibá na' gunná be'e rë'u, ca na' zoa le rinná be'e tu bönni' yu'ë lidxi guíë. Caní guca ga bidxintë dza bilá' lahui' gaca huóácaru' tsahui' channö uyija ládxi'ru' Lë'. <sup>24</sup> Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'. <sup>25</sup> Na'a, tu' bidxín dza gaca huóácaru' tsahui' channö uyija ládxi'ru' Cristo, bítirö inná be'e rë'u lë na' busedi rë'u.

<sup>26</sup> Yúgu'tëli' nácali' bi'i queë' cazë' Dios tu reja ládxi'li'-në' Jesucristo, en chinácali' tuz len Lë'. <sup>27</sup> Yúgu'të nupa nadílagaca nisa para huóácagaca tuz len Jesucristo, nuhuóácagaca ca náquië' Lë' cazë'. <sup>28</sup> Bítirö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. <sup>29</sup> Na'a, channö néquili' queë' Cristo, nácali' ca' zxi'ini xi'sóë' Abraham, ate' nazí'ili' lë na' guzxi' lu në'ë Dios gunnë' queë' Abraham.

## 4

<sup>1</sup> Lë ni le rë'ënda' innía': Tsanni ni ribözabi' tu bi'i bönni'do' sí'ibi' bi ral-la' gunnë' xúzibi' queëbi', ni' nácabi' bí'ido', en biti' nayëpisëtërobi' ca raca que tu nu naca tsaz huen dxin, sal-la' le nácatë nequi queëbi' yúgu'të. <sup>2</sup> Tsanni ni' nácabi' bí'ido', nacuá' nupa tun chí'i lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. <sup>3</sup> Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzölió ni. <sup>4</sup> Cate' bizá'a dza, Dios gusöl-lë'ë zxi'ini cazë' ni. Gúquië' zxi'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'. <sup>5</sup> Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

<sup>6</sup> Para gaca bë' chinácali' bi'i queë' cazë', Dios guchizë' Dios Bö' lá'ayi ládxi'do'oli', ate' Lë' cazë' rulidzë' Dios uláz queëli', rnnë': "Xuza'." <sup>7</sup> Caní naca, chinácali' bi'i queë' Dios, en bítirö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë' cazë' Dios, Lë' cazë' nazí' ladxí' në'ë guequi queëli' le nequi queë' tu' nácali' tuz len Cristo.

*Pablo ruí'i ládxi'ë bönni' Galacia ta'yija ládxi'ë Cristo*

<sup>8</sup> Cate' ni' biti' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Biti' ca' nácagaca budó' na' Dios. <sup>9</sup> Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë ré'ënili' ubí'ili' yugu' lu xibá cané na' cabí nu uzí' xibé? ¿Ré'ënili' huóacali' huen dxin tsaz, en gunli' ca rinná bë' xibá na'? <sup>10</sup> Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. <sup>11</sup> Rádxida' bi gaca queéli'. ¿Naru' nuhuóaca nítisó dxin bena' para gúnbë'ëli' le nácatë? <sup>12</sup> Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Biti' bi le cabí naca dxi'a benli' quia' neda'.

<sup>13</sup> Chinöz quézili' bizx queë na' gusí lahua' runa' libán loli' que le rinnë dxi'a. Bena' libán ni' tu' gúí'ida'. <sup>14</sup> Biti' bucá'anali' neda' cané, en cabí buzóali' neda' tsólá'aló sal-la' bigútili' ca guca yódzöhuë' quia' na'. Benli' neda' bal, tuz ca gunli' bal tu gubáz lá'ayi queë Dios, o ca runli' bal Jesucristo caz. <sup>15</sup> Budzéalë'ëli' dza ni'. ¿Bizxi guca queéli' tu' cabirö raca caní? Lë ni gaca innía' ca guca queéli': La'tu' huáca gunli', bubéajli' guió'j lo quézili', le gúnnali' quia'. <sup>16</sup> Na'a, ¿réquili' nuhuóaca' tu nu riléde'e libí'ili' tu' gudxa' libí'ili' le nácatë?

<sup>17</sup> Bönni' ni' tu'tsë'ë libí'ili' tu'í'í ládxi'ë libí'ili', pero calëga para gaca dxi'a queéli'. Té'ënë' ilunë' ga ucá'anali' netu' para gúí'í ládxi'li' légaquië'. <sup>18</sup> Na'a, naca dxi'a zoa nu ruí'í ladxi' libí'ili', pero tuz channö naca para gaca dxi'a queéli'. Caní ruí'itica'sö ládxa'a libí'ili', en calëgasö cate' ni' zóalena' libí'ili'. <sup>19</sup> Libí'ili', zxí'ina'do'. Ca na' raca queënu nigula chizóa sóabi' bí'ido' queënu, riguí'í rizáca'nu, lës caní riguí'í rizáca'a neda' ni'a queéli' leyúbölö ga idxinrö dza gácali' idú ca náquië' Cristo. <sup>20</sup> Nácaru la' zóalena' libí'ili' na'a para gaca gúí'ilena' libí'ili' didza' nadzá'aló, tu' ruúbi ruguí'ilë'ëda' ni'a queéli'.

### *Le rucudzu' didza' ca guca quégacanu Agar en Sara*

<sup>21</sup> Na'a, libí'ili', nuli' ré'ënili' uzóa cuinli' lu xibá queë Moisés, guli'ná'tsöca' didza' ni gu'a. ¿Catu caz buzë nágali' le rnna xibá na'? <sup>22</sup> Rnna xibá na' caní: gula'cuá'abi' chópabi' bí'í bönni'do' queë Abraham. Tubi' gúcabi' zxí'ininu tu nigula tsaz nácacanu huen dxin, ate' ia'tubi' gúcabi' zxí'ininu nigula nazannu. <sup>23</sup> Zxí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bí'ido', pero zxí'ininu nigula nazannu na' gúlajbi' tu' guzxí' lu në'ë Dios gunë' ga gálajbi'. <sup>24</sup> Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopa didza' Dios bénlenë' bönachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácagaca ca zxí'ininu Agar, en nácagaca ca huen dxin tsaz lu xibá na'. <sup>25</sup> Le gúcacanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yódzö Jerusalén na'a dza, tu' naca yódzö na' ca tu bönni' tsaz náquië' huen dxin tsözxön len nupa nacuá' lu yódzö na'. <sup>26</sup> Jerusalén na' zoa yehua' yubá nazán, ate' rë'u ni nácaru' bönachi uládz que yódzö ni'. <sup>27</sup> Nazúaj lu guichi lá'ayi le rnna:

Budzeja, nigula huödx, cabí nacuá' zxí'inu'.

Lu yöl-la' rudzeja quiu' gurödxí'a,

sal-la' catu caz guca quiu' le riguí'í rizáca'nu nigula

chizóa sóabi' bí'ido' queënu.

Budzeja tu' sal-la' nusán në'eguequi bönachi lí,

gunë' Dios ga ila'yántërö zxí'inu'

ca bí'í queënu nigula zóalennu bönni' queënu.

<sup>28</sup> Libí'ili', böchi' zána'do', rë'u ni nácaru' ca gúcabi' Isaac, zxí'inë' Abraham. Nácaru' ca yugu' zxí'ini xi'sóë' Abraham, guzxí' lu në'ë Dios gata' queë'. <sup>29</sup> Dza ni', bí'í na' gúlajbi' ca tálajbi' yúgu'të bí'ido', gudxía ná'abi' bí'í na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bia no bönachi yódzölió ni rë'u. <sup>30</sup> ¿Bizxí rnna le zoa lu guichi lá'ayi? Caní rnna: "Gurú'una-nu nigula na' tsaz nácacanu huen dxin tsözxön len zxí'ininu, tu' biti' gaca zxí'ininu nigula na' sí'ibi' tsözxön zxí'ininu nigula nazannu

le guzxi' lu në'ë Dios guequi queëbi' zxi'ininu nigula nazannu na'." <sup>31</sup> Caní naca, böchi' zána'do'. Biti' nácaru' ca nácabí' zxi'ininu nigula na', tsaz gúcanu huen dxin, pero nácaru' ca zxi'ininu nigula nazannu na'.

## 5

### *Guli'gún chi'i cuinli', ugá'anali' lu yöl-la' nazán*

<sup>1</sup> Chinazanru' tu' busanë' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

<sup>2</sup> Buli'zë nágali' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', bití' ca' uzí'ili' xibé le benë' Cristo. <sup>3</sup> Leyúbölö rë'ënda' guía' nútí'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. <sup>4</sup> Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxi'ë Dios queëru'. <sup>5</sup> Rë'u ni ruzxöni ládxi'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. <sup>6</sup> Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

<sup>7</sup> Dxí'ado' guca ca gusí loli' runli' dza ni'. ¿Nuzxi ben ga buca'anali' le nácatë? <sup>8</sup> Bití' benë' Dios, Bönni' rulidzë' libí'ili', ga benli' caní. <sup>9</sup> Bití' gal-la ládxi'li' lë na' rnna: "Látí'sö cúa zi que yöta xtila ruhuóázx idutë cúa ga nayú'u cúa zi na'." <sup>10</sup> Tu' nácaru' tuz len Xanru', runa' löza ca naca queëli', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsë'ë libí'ili', nútí'tës nu naca bönni' na'.

<sup>11</sup> Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë ta'bia nahuë' bönni' judío neda'? La'tu' rusédida' caní, cuntú nu ilé neda' tu' runa' libán ca gútië' Cristo lë'e yaga cruz. <sup>12</sup> Ca naca que nupa ni' tu'tsá' libí'ili', té'ëni irugu lu xpéla'li' lë na', nácöru la' ila'chugu tsaz cuínguequi.

<sup>13</sup> Ca naca queëli', böchi' zána'do', Dios bulidzë' libí'ili' para gácali' bönachi nazángaca. Bití' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxi'ili' luzá'ali'. <sup>14</sup> Yúgu'të le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxí'inu' luzó'o ca nadxi'i cuinu'." <sup>15</sup> Channö rizí' quídza'li' luzá'ali' tuli' ia'tuli', runli' ca tunba' böa' guí'a sínía', táguya'aba', en táguba' luzá'aba'. Buli'yú tsate' usulu usunítli' luzá'ali' tuli' ia'tuli'.

### *Le runru' lu yöl-la' bönáchisö queëru', en le runru' len yöl-la' huáca queë' Dios Bö' lá'ayi*

<sup>16</sup> Lë ni na' rea' libí'ili': Guli'gü' latja inná bé'enë' libí'ili' Dios Bö' lá'ayi, ate' ní'irö bítí'rö gunli' ca rizësö ládxi'li' lu yöl-la' bönáchisö queëli'. <sup>17</sup> Yugu' le rizé ládxi'ru gunru' lu yöl-la' bönáchisö queëru' bití' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi bití' röjlöz le rë'ëniru' gunru' lu yöl-la' bönáchisö queëru'. Chopa ni, bití' röjlözgaca, en que lë ni na' bití' gaca gunli' ca rë'ëni quézili'. <sup>18</sup> Channö ruí'ili' lataj inná bé'enë' Dios Bö' lá'ayi libí'ili', bítí'rö inná be'e xibá queë' Moisés libí'ili'.

<sup>19</sup> Naca bë' le tun bönachi lu yöl-la' bönáchisö quéguequi. Tun dul-la' le riguitsaj xibá que yöl-la' nutsaga na', enca' dul-la' le lë'ë. Tun yugu' le naxihui', en yugu' le catsahui'.

<sup>20</sup> Téquiguequi le bach budó' néquiniguequi.

Tun yöl-la' gudzá'.

Tu'dí'i luzë'eguequi, en ta'díl-lalen léguequi.

Tu'zxé'e luzë'eguequi, en ta'lé nupa na', en tu'huídi'.

Ta'rúaj choplö, en tu'béaj tsölá'alö nupa dá'gaca léguequi.



21 Ta'zë ladxi' le dë que luzë'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnníá': Nupa túngaca caní biti' ca' ila'deli' ila'yú'u ga na' rinná bë'ë Dios.

22 Channö zóalen Dios Bö' lá'ayi rë'u runru' caní:

Nadxí'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribözaru' zxön ladxi'.

Ruí'i ládxi'ru' luzá'aru'.

Nácaru' dxi'i ladxi'.

Rusudxinru' xtídza'ru'.

23 Nácaru' nōxaj ladxi'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní. 24 Nupa néquiguequi queë' Cristo bíti'rö tun ca té'ëni quez, en cabí tun le ta'zësö ladxi' lu yöl-la' bönáchisö que'guequi. 25 Dios Bö' lá'ayi runnë' yöl-la' na'bán queëru'. Lë' cazë' ral-la' inná bé'enë' rë'u ca naca yúgu'të le runru'.

26 Biti' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

## 6

### *Ral-la' gácalenru' luzá'aru' turu' ia'turu'*

1 Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxi'ë bönni' na', pero run bayudxi gunli' caní lu yöl-la' nōxaj ladxi' queéli', en uyú cuinli' tsate' cu'u tu' xihui' libí'ili' nōza dul-la'.

2 Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

3 Channö zoa nu réqui chinadeli' yöl-la' nayëpisë, en biti' bi nadeli' nu na', nu ni na' rizí' ye'e la' cuinsi. 4 Tuhuéaj tuhuéajë' bönni' ral-la' uchi'a usöröë' que le runë'. Ní'irö channö urúajë' dxi'a, huáca gun ba zxön cuinë' ni'a que le chinunë', en biti' gun bayudxi uyúë' ca núngaca ia'zíca'rö bönachi channö ba benrë' dxi'a o cabí. 5 Tuhuéaj tuhuéajë' bönni' ral-la' gu'ë le nusubáguë'ë Dios lë'.

6 Channö zoa nu rusedi libí'ili' ca naca le rinnë dxi'a, ral-la' unödzejali' nu na' rusedi libí'ili' lati' que yúgu'të le do' dë queéli'.

7 Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'. 8 Channö le rázali' naca yugu' le runli' ca rizësö ládxi'li' lu yöl-la' bönáchisö queéli', le ulápali' gaca yöl-la' guti. Channö le rázali' naca yugu' le runli' ca raza ládxi'ë Dios Bö' Lá'ayi, ulápali' le gunnë' Dios Bö' lá'ayi queéli', le naca yöl-la' na'bán idú. 9 Caní naca, biti' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'. 10 Que lë ni na', bátati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

### *Le buzúajë' Pablo lu guichi ga ruúdx*

11 Buli'yú cate' bach didza' ni ruzúaja' lu guichi len na' cuina'. 12 Nupa na' té'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'rúaj dxi'a lógaca bönachi, en cabí bi ilún que'guequi tu' túngaca libán ca gútië' Cristo lë'e yaga cruz. 13 Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, biti' tu'zóë' didza' idutë ca rnna xibá na'. Té'ënë' ilunë' ga irugu lu xpéla'li' para gaca ilún ba zxön cúngaquië' tu' ta'nná bé'enë' libí'ili' para irugu lu xpéla'li' caní. 14 Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu'

nözi le benë' Cristo lë'e yaga cruz, yugu' le dë yödzölió ni naca quia' ca tu le chinati, biti' ruí'i ládxa'a le, ate' neda' naca' quégaca bönachi yödzölió ni ca tu bönni' nati, biti' tuí'i ladxi' neda'. <sup>15</sup> Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. <sup>16</sup> Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxe'ë légaquië'.

<sup>17</sup> Na'a zë lo, cuntú nu bönni' ral-la' utsé'ë neda', tu' nácgaca bë' butsóa zóagaca lu xpéla'a naca' huen dxin queë' Xanru' Jesús.

<sup>18</sup> Na'a, böchi' zána'do', rinábida'-në' Xanru' Jesucristo uzá' ládxe'ë queëli' yúgu'tëli'. Ca' caz.

## DIDZA' GUSÖL-LË'Ë PABLO YÖDZÖ ÉFESO

### *Pablo rugapë' Dios bönachi queë' Cristo nacué' Éfeso*

<sup>1</sup> Neda', Pablo, naca' gubáz nasöl-lë'ë Jesucristo tu' gú'uni quézinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. <sup>2</sup> Rinábida'-në' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

### *Le naca queë' Dios Bö' Lá'ayi rata' queëru'*

<sup>3</sup> ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'. <sup>4</sup> Zí'atëlö ca benë' Dios yödzölió ni, gurö cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'. <sup>5</sup> Dios bucözë' zí'atëlö si' lu në'ë rë'u ca zxi'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quézinë' gunë'. <sup>6</sup> ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Zxi'inë', Nu na' nadxí'inë'! <sup>7</sup> ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntërö naca le buzá' ládxë'ë Dios queëru', <sup>8</sup> lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë' <sup>9</sup> benë' Dios le bucözë' queëru', ate' buluí'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! <sup>10</sup> Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacué' yehua' yubá, en le nacué' yödzölió ni.

<sup>11</sup> Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quézinë' Dios, Nu run yúgu'të ca rë'ëni quézinë' Lë'. <sup>12</sup> Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxöni ládxi'ru'-në' Cristo zí'atëlö ca ia'zica'rö bönachi. <sup>13</sup> Lësca' caní guca queéli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queéli' le naca bë' nácali' queë', tu' guchízië' icja ládxi'do'oli' Dios Bö' Lá'ayi, Nu na' guzxi' lu në'ë Dios isöl-lë'ë queëru'. <sup>14</sup> Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huöá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

### *Pablo rinábinë' Dios gunnë' queëru' yöl-la' réajni'i*

<sup>15</sup> Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza <sup>16</sup> bití' ca' rusana' rea'-në' Dios: "Xclenu", ca naca queéli'. Röjneda' libí'ili' cate' rulidza'-në' Dios. <sup>17</sup> Rinábida'-në' Dios queë' Xanru' Jesucristo, Dios na' náquië' Xúziru' nayépisëtërë', rinábida'-në' isöl-lë'ë Dios Bö' Lá'ayi queéli', Bö' na' runna yöl-la' réajni'i queëru', en rulu'i rë'u ca naca cazë' Dios, para gaca idú ca núbë'ëru'-në'. <sup>18</sup> Rinábida'-në' Dios uzéajni'inë' libí'ili' lu icja ládxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibé, en para inözili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, <sup>19</sup> enca' para inözili' cate' zxön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxön ni naca la' lébisö na' bulu'e lahui Dios <sup>20</sup> cate' ni' busubanë' Cristo lu yöl-la' guti, en benë' ga gurö'ë cuita lë'ë Lë' cazë' ga nayépisëtërë' ni' yehua' yubá. <sup>21</sup> Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nacagaca xan. Cristo nayépisëtërë' ca yúgu'të nupa nadéli'gaca yöl-la' unná bë' yödzölió ni, en lu yödzölió si' za'. <sup>22</sup> Dios budödë' lu në'ë Cristo yúgu'të le dë para inná bé'enë' le, en buzóë' Lë' quégaca bönachi queë' para gáquië' Xanru' lu yúgu'të le nequi

queéru'. <sup>23</sup> Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

## 2

### *Nuláru' tu' nadxí'inë' Dios rë'u*

<sup>1</sup> Dios chibennë' yöl-la' na'bán idú queëli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. <sup>2</sup> Dza ni' benli' lëbisö ca tun bönachi biti' nácagaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa biti' túngaca ca rnna xtídzë'ë Dios. <sup>3</sup> Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queéru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zíca'rö bönachi. <sup>4-5</sup> Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön len Cristo tu' buéchi' ládxi'ë rë'u, en bidxí'ide'enë' rë'u. Nuláli' tu' zoa le buzá' ládxi'ë Dios queëli'. <sup>6</sup> Dios busubanë' rë'u tsözxön len Cristo para gunë' ga cö'öru' tsözxön len Lë' ga ni' rinná bë'ë yehua' yubá. <sup>7</sup> Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxi'ë queéru', tu' budödë' Jesucristo ni'a queéru', le naca bë' ca nadxí'ide'enë' rë'u. <sup>8</sup> Nuláli' tu' zoa le buzá' ládxi'ë Dios queëli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios. <sup>9</sup> Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxi'a nun nu na'. <sup>10</sup> Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlö gunru'.

### *Rö'ö dxi icja ládxi'do'oru' lahuë' Dios ni'a que le benë' Cristo*

<sup>11</sup> Guli'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipëla'gaquië' le naca bë' dá'gaquië' Dios, en nazi' lágaquië' bönni' narugu lu xipëla'gaquië', ta'nnë' nácali' libí'ili' bönni' biti' narugu lu xipëla'gaquië'. <sup>12</sup> Dza ni' nubíga'li' ga zoë' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benë' tsutsu Dios, en guzxi' lu në'ë bi gata' quégaca bönachi queë'. Guzóali' yödzölió ni, biti' zoa le runli' löza, en biti' núnbë'ënili'-në' Dios. <sup>13</sup> ¡Na'a, nácali' tuz len Jesucristo! ¡Zí'atëlö nubíga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queéru'! <sup>14</sup> Lë' cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zí'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. <sup>15</sup> Lë ni benë' Cristo cate' gútië' uláz queéru', en gudúë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopa cö' bönachi na', bunë' tuz bönachi cubi, nupa nácagaca tuz len Lë' cazë'. Caní benë', en gulequi dxíë' yöl-la' rilé na'. <sup>16</sup> Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

<sup>17</sup> Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zí'tu' ga zoë' Dios, enca' bönachi judío nacuá' gála'sö. <sup>18</sup> Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë' cazë' Dios Bö' Lá'ayi rë'u, sal-la' nácaru' bönachi judío o bönachi izá'a. <sup>19</sup> Que lë ni na', libí'ili', bönachi izá'a, bíti'rö nácali' ca bönachi zí'tu' zóali' tu luyú biti' nequi queëli', pero nabábalenli' bönachi queë' Dios. ¡Chinácali' ca bi'i queë' cazë' Dios! <sup>20</sup> Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë' cazë' Jesucristo náquië' ca guiöj lo que xilibi zö'ö na'. <sup>21</sup> Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacuá' tu'lapa yugu' guiöj que, para gaca tu yudo'

lá'ayi le naca tuz len Xanru'. <sup>22</sup> Libí'í cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

### 3

#### *Náquië' Pablo huen libán que didza' dxi'a lógaca bönachi izá'a*

<sup>1</sup> Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibë', libí'ili', bönachi izá'a. <sup>2</sup> Réquida' chinöz quézili' ca benë' Dios, budödë' lu na'a dxin runa' para uzí'ili' xibé le ruzá' ládxë'ë queëru'. <sup>3</sup> Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queëli' lu guichi. <sup>4</sup> Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo. <sup>5</sup> Dza ni'te cuntú nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. <sup>6</sup> Caní rna lë na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huöáquië' ca tuz bönachi, en ulu'zi'ë xibé tsözxön len légaquië' le guzxí' lu në'ë Dios unödzejë' quégaquië' tu' dá'gaquië' Jesucristo." <sup>7</sup> Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'. <sup>8</sup> Nacra' cá'asö ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. <sup>9</sup> Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'ëru'. <sup>10</sup> Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácgaca bönachi queë' Cristo. <sup>11</sup> Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. <sup>12</sup> Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. <sup>13</sup> Que lë ni na' ráta'yua' loli' bití' gaca chopa ládxí'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibé.

#### *Ca naca yöl-la' nadxí'i queë' Cristo*

<sup>14</sup> ¡Que lë ni na', ruzechu zxiba' lahuë' Xuzë' Xanru' Jesucristo! <sup>15</sup> Ca lë', nazí' ca' lágaca yúgu'të bönachi queë', nupa nacua' yehua' yubá, en nupa nacua' yödzölió ni. <sup>16</sup> Rinábida'-në' Xúziru' Dios, lu yöl-la' zxön queë', le nazáca'da', gunné' queëli' yöl-la' huáca queë' Dios Bö' Lá'ayi, en gunë' ga gálali' lu icja ládxí'do'oli'. <sup>17</sup> Rinábida'-në' Cristo soë' icja ládxí'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en bití' tséaj bö' icja ládxí'do'oli' ca nadxí'ili'-në', <sup>18</sup> para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö. <sup>19</sup> Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

<sup>20</sup> ¡Na'a, yöl-la' ba Dios, Nu gaca gúntëro ca gaca inábaru' o ca gaca sa' ládxí'ru', ugunë' dxin yöl-la' huáca queë' lu icja ládxí'do'oru'! <sup>21</sup> ¡Gácatíca'sö queë' Dios yöl-la' ba lógaca bönachi queë' Cristo, en lahuë' Lë' cazë' Jesucristo, na'a dza, en yúgu'të dza zá'gaca! ¡Ca' gaca!

### 4

#### *Dios Bö' Lá'ayi nunë' rë'u tuz*

<sup>1</sup> Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. <sup>2</sup> Guli'gaca nöxaj ladxi', en dxi'i ladxi'. Guli'cöz zxön ladxi'. Guli'güí' ladxi' luzá'ali' tuli' ia'tuli' lu yöl-la' nadxí'i queëli'. <sup>3</sup> Guli'güí' ladxi' gácatíca'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhui'do' queëli' le rutsaga libí'ili'. <sup>4</sup> Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

<sup>5</sup> Tuzë' náquië' Xanru'.

Tuz le réajlë'ëru'.

Tuz le bidílaru' nisa.

<sup>6</sup> Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

<sup>7</sup> Tu turu' nazí'iru' tu yöl-la' huáca queë' Dios tsca naca le bennë' Cristo que queëru'.

<sup>8</sup> Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runödztasë' quégaquië'.

<sup>9</sup> ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödzölió cadxí'ilö ni. <sup>10</sup> Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'. <sup>11</sup> Cristo caz bennë' que queëru' yugu' yöl-la' huáca queë': Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sédinë' bönachi queë'.

<sup>12</sup> Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácgaca ca idútë le naca cazë' Lë'. <sup>13</sup> Caní gaca ga idxintë dza huöácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huöácaru' idú ca náquië' Lë' cazë' Cristo. <sup>14</sup> Bítirö gácaru' ca yugu' bí'ido', ca nácgaca nupa na' tu'tsa'të ca túngaca, en nácgaca ca tu le nachë' lu yegu, o ca tu le röjchë' bítitës bö' recja, tu' ta'zí' lu në'eguequi bítitës didza' nu rusëdi léguequi, nu na' rizi' ye'e léguequi len yöl-la' sina' que, en run ga ta'chixi ta'nigui. <sup>15</sup> Na'a, rë'u ni, tu' nadxí'iru' luzá'aru', ral-la' güí'iru' didza' le naca idútë li para gaca huöácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. <sup>16</sup> Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxön ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rixxön, en raca idú, ca na' zeaj rácarö idú ca nadxí'iru' luzá'aru'.

### *Yöl-la' na'bán cubi náparu' tu' nácaru' tuz len Cristo*

<sup>17</sup> Uláz queë' Xanru' rea' libí'ili' lë ni, en rigu'a le lu ná'ali', rnnía': Bítirö gunli' ca tun nupa bití' núnbë'gaquië' Dios, nupa na' tun ca ta'za'sö ládxi'guequi, <sup>18</sup> en nachul-la nanítigaca icja ládxi'do'guequi. Tu' cabí nözguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queëru'. <sup>19</sup> Bití' ca' tu'tu'inë'. Nudödi cuíngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'. <sup>20</sup> Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bönachi caní. <sup>21</sup> Le naca idútë li biyönili' ca naca queë' Cristo, en le nácalí' queë' tu'sédinë' libí'ili' le naca idútë li na' zóalen Jesús. <sup>22</sup> Guli'nná be'e yöl-la' bönáchisö queëli' le gúcalí' zí'alö, lë na' riniti ni'a que yöl-la' rizë ladxí' queëli' le ruá' dö' le guzxí' ye'e libí'ili'. <sup>23</sup> Ral-la' huöácalí' cubi lu icja ládxi'do'oli', en lu bö' naca cázali'. <sup>24</sup> Ral-la' sí'ili' yöl-la' bönachi cubi le nunë' Dios ca naca cazë' Lë', le rulu'i cuini ni'a que le naca dxi'a, en le naca tsahui' runli', en run ga gaca gunli' caní.

<sup>25</sup> Que lë ni na', bítirö sí' yë'ëli'. Yúgu'tëru' ral-la' güí'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

<sup>26</sup> Channö hualéli', bití' ral-la' gunli' dul-la'. Bití' ileli' xidzé. <sup>27</sup> Bití' bi gunli' le gü'i lataj tu' xihui' ucúl-la libí'ili'.

<sup>28</sup> Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzejë' quégaca nupa ta'yadzaj.

<sup>29</sup> Bití' gü'ili' didza' xihui', pero guli'güi' didza' dxi'a, yugu' le ilácalen nu yöni, en ilún ga gaca dxi'a que nu na'. <sup>30</sup> Bití' usuhuí'inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölë' libí'ili' lu dul-la'.

<sup>31</sup> Guli'cúa ladaj libí'ili'  
yöl-la' ruzxë'e, en yöl-la' ridzá'a,  
en yöl-la' rilé, en yöl-la' ridil-la didza',  
en yöl-la' rutsaga yudxi,  
en yúgu'të yöl-la' bití' rilé'e luzá'ali' dxi'a.

<sup>32</sup> Ral-la' gácali' dxi'i ladxi',  
en huéchi' ládxi'li' luzá'ali' tuli' ia'tuli',  
en uniti loli' luzá'ali' tuli' ia'tuli',  
ca na' benë' Dios, buniti lahuë' libí'ili' tu' nácali' tuz len Cristo.

## 5

### *Ca ral-la' ilaca nupa nácgaca ca bi'i queë cazë' Dios*

<sup>1</sup> Tu' nácali' ca bi'i queë cazë' Dios, ate' nadxí'inë' libí'ili', guli'güi' ladxi' gácali' ca náquië' Lë'. <sup>2</sup> Ca naca yúgu'të le runli':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bédxido' rútiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxixi le raza ládxë'ë Dios le rigú'uru' lu bucugu lá'ayi queë'.

<sup>3</sup> Tu' nácali' queë' Dios,  
bití' ca' gunli' le ruá' dö',  
en bití' gunli' le cabí ral-la' gunli',  
en bití' uhuídi'li'.  
Ní'irö cuntú nu gaca bi innë queëli'.

<sup>4</sup> Bití' gü'ili' didza' xihui',  
o didza' canöz, o didza' cá'asö,  
yugu' le cabí ral-la' gunli',  
pero nácarö dxi'a guiëli'-në' Dios: "Xclenu'."

<sup>5</sup> Chinöz quézili' nitúë' bönni' runë' le ruá' dö' bití' ca' tsázië' ga rinná bë'ë Cristo tsözxön len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuidi' naca ca nu reaj ladxi' budó' guiöj budó' yaga. <sup>6</sup> Bití' gü'ili' lataj nu si' ye'e libí'ili' len didza' bití' nácatë. Tu' nözi dul-la' caní Dios gunë' xíguia' nupa bití' túngaca ca rnna xtídzë'ë. <sup>7</sup> Bití' ca' gunli' tuz bönachi caní.

<sup>8</sup> Zí'atëlö guzóali' ga naca chul-la' que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení', <sup>9</sup> tu' run bení' na' ga gácaru' dxi'i ladxi', en ga gü'iru' didza' le naca idútë li, en ga gácaru' tsahui'. <sup>10</sup> Guli'güi' ladxi' inözili' le raza ládxë'ë Xanru'. <sup>11</sup> Bití' gútsa'li' nupa tun le ruá' dö', lë na' tunë' ga naca chul-la' que dul-la', pero buli'béaj ga liná' yugu' lë na' tunë'. <sup>12</sup> Utuí'iru' gü'iru' didza' ca naca le tun bönachi na' bagáchi'sö. <sup>13</sup> Cate' bi ubéajru' ga liná', gaca bë' yúgu'të tsca nácgaca, tu' gun le naca bení' ga gaca bë' yúgu'të. <sup>14</sup> Que lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátgaca.

Cristo uzení'ë quiu'.

<sup>15</sup> Buli'yú cuinli' ca runli'. Biti' gácali' nupa bití' ta'yéajni'ini, pero guli'gaca bönachi ta'yéajni'i. <sup>16</sup> Guli'sí' xibé lataj dë queëli' tu' chizóaru' dza bití' raca dxi'a queëru'. <sup>17</sup> Biti' gácali' bönni' bití' bi nõzguequinë'. Guli'gü' ladxi' tséajni'ili' le rë'ënë Xanru' gunli'.

<sup>18</sup> Biti' súdxili', tu' gun yöl-la' rizudxi ga nítli' tsaz.

Guli'gü'ida' lataj inná bé'enë Dios Bõ' Lá'ayi libí'ili'.

<sup>19</sup> Guli'gü'ilen luzá'ali' didza' tuli' ia'tuli',  
ugunli' dxin yugu' le rul-la légaca salmo,  
en yugu' le rul-la yöl-la' ba Dios,  
en yugu' le rul-la nagu'ë Dios Bõ' Lá'ayi icja ládxi'do'oru'.  
Idú ládxi'ru' ral-la' gúl-laru' queë',  
le cú'uru'-në' Dios yöl-la' ba.

<sup>20</sup> Guli'gún dxin Lë' Xanru' Jesucristo,  
en guli'guíëtica'së' Xúziru' Dios: "Xclenu'" ca naca yúgu'të.

### *Ca ral-la' gunru' quegaca di'a dza queëru'*

<sup>21</sup> Guli'gún ca rnna xtídza' luzá'ali' tuli' ia'tuli' para caní gunli'-në' Dios zxön.

<sup>22</sup> Libí'ili', yugu' nigula, guli'gún ca rnna xtídza'gaquië' bönni' que queëli', ca na' ral-la' gunli' ca rnna xtídzë'ë Xanru'. <sup>23</sup> Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusölá bönachi queë', nupa na' dzágagaca le naca cazë' Lë'. <sup>24</sup> Ca na' tun bönachi queë' Cristo ca rnna xtídzë'ë, lësca' caní ral-la' ilunnu nigula ca rnna xtídza'gaquië' bönni' que queégacanu ca naca yúgu'të le raca.

<sup>25</sup> Libí'ili', yugu' bönni', ral-la' idxi'ili'-nu nigula que queëli' ca na' Cristo nadxí'inë' bönachi queë', en budödi cuinë', gútië' uláz queégaquië'. <sup>26</sup> Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë. <sup>27</sup> Gútië' uláz queégaquië' para gaca usudxinë' légaquië' lahuë' Dios, nácagaquië' ca tu lari' lachi, bití' nuá' bösaj le në'aj, en bití' naxú'una, en bití' zoa nitú le run ditaj le, pero runë' ga ilácagaquië' idú dxi'a, cuntu nu gaca bi innë' queégaquië'. <sup>28</sup> Ral-la' idxi'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. <sup>29</sup> Cuntu nu bönni' runi zí' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë', <sup>30</sup> nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipëlë'ë, en dxita queë'!

<sup>31</sup> Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huöáquië' tuz." <sup>32</sup> Lë na' nazúaj lu guichi ni rulu'i lahui tu le naca idútë li, ate' neda' réquida' ruí' didza' ca' ca naca queë' Cristo, en quegaca bönachi queë' na'. <sup>33</sup> Lësca' ruí' didza' ca naca queëli'. Yúgu'tëli' libí'ili', bönni', ral-la' idxi'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queégacanu.

## 6

<sup>1</sup> Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. <sup>2</sup> Xibá zí'alö na' benë' Dios le nachë' tu le guzxi' lu në'ë gunë', naca lë na' rnna: "Ben bal xuz xinó'o, <sup>3</sup> ate' gaca dxi'a quiu', ate' xidzé su' ibanu' yödzülió ni."

<sup>4</sup> Libí'ili', yugu' xuz, bití' gun leli' zxí'inili', pero buli'xön légacabi', en guli'sína' légacabi', en buli'sëdi légacabi' ca raza ládxë'ë Xanru'.

<sup>5</sup> Libí'ili', nülöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo. <sup>6</sup> Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxë'ë Dios, ca na'



ral-la' gunli' xichinë' Cristo. <sup>7</sup> Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. <sup>8</sup> Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

<sup>9</sup> Libí'ili', nacua' queéli' bönni' nadó'ogaca, guli'gún dxi'a caní quégaca huen dxin queéli' na', en biti' uzéli' ba nadx légaquië'. Guli'tsöjné ca naca queéli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' biti' rutsë'ë ca runë' que que bönachi.

*Dios runnë' queëru' le tun chi'i rë'u*

<sup>10</sup> Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. <sup>11</sup> Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'. <sup>12</sup> Biti' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacua' yödzölió ni ga naca chul-la que dul-la'. <sup>13</sup> Que lë ni na':

Guli'sí' yúgu'të le runnë' queëru' Dios le tun chi'i rë'u,  
para cate' idxín queëru' dza ni' ilaca le nácgaca xihui',  
gaca guá' ilenli',  
en cate' údxi gunli' caní, ugá'anali' tsutsu.

<sup>14</sup> Guli'sóa tsutsu.

Guli'sí' le naca idútë li,  
le gaca queéli' ca tu guídi guga' lë'ëli'.  
Guli'gaca tsahui' tu' gun chi'i libí'ili' le naca tsahui'  
ca run tu lari' yödx run chi'i luchu'ë bönni' rejë' gudil-la.

<sup>15</sup> Guli'sóa sina' para gunli' libán que didza' dxi'a  
le ribequi dxi icja ládxi'do'oru' lahuë' Dios,  
ca na' ruzóa cuinë' sina',  
en ridë'ë xiráchuë' tu bönni' rejë' gudil-la.

<sup>16</sup> Le naca lo, yöl-la' réajlë' queéli' Cristo  
gaca queéli' ca tu le naca tsutsu uzéli' loli',  
para cabí gál-la' yugu' le usán tu' xihui' libí'ili',  
le nácgaca ca yaga túchi'do' zoa guí' láhuilöguequi.

<sup>17</sup> Yöl-la' rusölá gaca queéli' ca tu lu'u guié le gun chi'i ícjali'.  
Xtídzë'ë Dios gaca queéli' ca tu guié tuchi'  
le runnë' Dios Bö' Lá'ayi queëru',  
para utíl-lalenru' le naca xihui'.

<sup>18</sup> Guli'gún yúgu'të lë ni,  
en buli'lidzë' Dios inábili'-në' gácalenë' libí'ili'.  
Buli'lidzatica'së' Dios zóalenë' Dios Bö' Lá'ayi libí'ili'.  
Para gunli' caní ral-la' usubán ládxi'li' en cabí huöaj ládxi'li',  
inábili'-në' Dios gácalenë' nupa néquiguequi queë'.

<sup>19</sup> Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxi' cate' guna' libán para uzéajni'ida' bönachi ca naca le bigachi' que didza' dxi'a. <sup>20</sup> Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guié ni. Buli'lidzë' Dios channö, inábili'-në' gunë' ga gaca' rugu ladxi' para guna' libán que didza' dxi'a ca ral-la' guna'.

*Ruúdx didza' bë'ë Pablo*

<sup>21</sup> Tíquico, böchi'ru' na' nadxí'iru'-në', en runë' xichinë' Xanru' idú ládxi'ë, quíxjöi'inë' libí'ili' idú ca raca quia', en ca runa' neda' ni. <sup>22</sup> Que lë ni na', isöl-la'a-në' queéli', ate' uluí'në' libí'ili' ca raca queëtu', ate' caní utipë' ládxi'li'.

<sup>23</sup> Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queéli' yöl-la' nadxí'i le dzaga yöl-la' réajlë' queéli' Cristo, yúgu'tëli' na' néquili' queë'.

<sup>24</sup> Le ruzá' ládxe'ë Dios queëru' gaca queéli', yúgu'tëli' na' nadxí'ili'-në' Xanru' Jesucristo, naca idú yöl-la' nadxí'i queéli' Lë'. ¡Ca' gaca!

## DIDZA' GUSÖL-LË'Ë PABLO YÖDZÖ FILIPOS

### *Pablo rugapë' Dios bönachi queë' Cristo nacua' Filipos*

<sup>1</sup> Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. <sup>2</sup> Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxë'ë queëru', en gunë' ga soa dxi icja ládxí'do'oli'.

### *Pablo rinábinë' Dios bi gunë' quégaca bönachi ta'yéajlë' Cristo*

<sup>3</sup> Rea'-në' Dios: "Xclenu'", cate' rizá' ládxa'a queëli'. <sup>4</sup> Cate' rulidza'-në' Dios, en rinábida'-në' gácalenë' libí'ili', rudzeja ládxa'a <sup>5</sup> tu' röjneda' ca bënlenli' neda' tsözxön dxin que didza' dxi'a. Gusí loli' runli' dxin na' dza ni' si' biyönili', en runli' le ga ridxintë na'a dza. <sup>6</sup> Dios gusí lahuë' runë' tu le naca dxi'a lu icja ládxí'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. <sup>7</sup> Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxön len neda' le ruzá' ládxë'ë Dios queëru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz. <sup>8</sup> Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. <sup>9</sup> Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú <sup>10</sup> para gaca cöli' le nácatërö dxi'a. Channö gaca caní queëli', gácali' idú dxi'a, ate' cuntunu gaca bi innë queëli' dza ni' huödë' Cristo. <sup>11</sup> Le nácali' naca bë' le naca dxi'a runë' Cristo lu icja ládxí'do'oli' para ilá' lahui yöl-la' zxön queë' Dios, en gaca queë' yöl-la' ba.

### *Zóaru' nabanru' para gácaru' ca náquië' Cristo*

<sup>12</sup> Böchi' luzá'ado', ré'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. <sup>13</sup> Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nözguequinë' yu'a lidxi guié ni tu' runa' xichinë' Cristo. <sup>14</sup> Tu' yu'a neda' lidxi guié ni ben ga látu'biqui' yúgu'të böchi'ru' nacagacarë' rugu ladxi', ate' tu' zxöni ládxí'gaquië' Xanru', en bití'rö tádxinë' tunë' libán que xtídzë'ë Dios.

<sup>15</sup> Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxí'gaquië'. <sup>16</sup> Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxí'gaquië'. Të'ënnë' ulu'saca' zi'ë neda' tsanni ni yu'a lidxi guié. <sup>17</sup> Yugu' bönni' idú ládxí'gaquië' na', lu yöl-la' nadxí'i quégaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. <sup>18</sup> Biti' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxí'gaquië' o bití' tunë' le caní.

Na'a, rudzëjaröda' <sup>19</sup> tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöl-lë'ë Jesucristo queëru'. <sup>20</sup> Caní ré'ënda', en ruzxöni ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatica'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. <sup>21</sup> Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. <sup>22</sup> Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxilö ral-la' cöa'. <sup>23</sup> Naca böniga cöa'. Ré'ënda' gátitea' para tsöjsóalentea'-në' Cristo, tu' gácatërö dxi'a quia', <sup>24</sup> pero runrö bayudxi sóasa' ibana' para séqui'da' gácalena' libí'ili'. <sup>25</sup> Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'. <sup>26</sup> Caní naca, udusóalena' libí'ili' leyúbölö, le gun ga tsaz ládxí'li'-në' Jesucristo ni'a que le gunë', gácalenë' neda'.

<sup>27</sup> Guli'gü'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayönida' nácali' tsutsu, en nácali' tuz, runli' tsözxön dxin que le réajlë'ëru' le za' queëru' ni'a que didza' dxi'a. <sup>28</sup> Biti' gü'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni ulu'í légaquië' ila'nítië', pero uláli' libí'ili', le gaca bë' rácalenë' Dios caz libí'ili'. <sup>29</sup> Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí'i rizáca'li' cate' runli' xichinë'. <sup>30</sup> Na'a, gaca gunli' neda' tsözxön gü'í ládxi'ru' gunru' libán que didza' dxi'a. Bilé'e quézili' ca gudí'i guzxáca'a cate' bena' caní zí'alö, ate' riyönili' ca riguí'i rizáca'a ca' na'a.

## 2

### *Gúquië' Cristo nōxaj ladxi', ate' bidéli'në' yöl-la' zxön*

<sup>1</sup> Cristo runë' ga rutipa ládxi'li', en lu yöl-la' nadxi'i queë' ruhuéchi' ládxi'ë libí'ili', en runë' ga nácali' tuz len Dios Bö' Lá'ayi, en ga nadxi'ili' luzá'ali', en ga ruhuéchi' ládxi'li' luzá'ali' tuli' ia'tuli'.

<sup>2</sup> Na'a guli'gún ga udzëjarö ládxa'a. Para gunli' caní, ral-la' gácali' tuz len luzá'ali', en gaca lëbisö ca nadxi'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. <sup>3</sup> Ca naca le runli', bití' bi ral-la' gunli' lu yöl-la' rudul-li' queëli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. <sup>4</sup> Guli'gü' ladxi' gaca dxi'a ca' que luzá'ali', en calëga queëzili'.

<sup>5</sup> Ral-la' gácali' nōxaj ladxi' ca na' gúquië' Jesucristo nōxaj ladxi'. <sup>6</sup> Lë' naca cazë' lëbisö ca náquië' Dios caz, pero bití' gúquinë' ral-la' gunë' bayudxi ugá'anë' lëbisö ca na' náquië' Dios. <sup>7</sup> Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachi, en gúquië' idú bönachi. <sup>8</sup> Cate' ni' náquië' bönni', gúquië' nōxaj ladxi', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'. <sup>9</sup> Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatërö lo ca yúgu'të lágaca bönachi. <sup>10</sup> Caní benë' Dios para cate' ila'yöni ca na' lë' Jesús, ulu'zechu zxíbigaca yúgu'të nupa nacua' yehua' yubá, en lu yödzülió, en lu lataj chul-la. <sup>11</sup> Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

### *Ral-la' gácaru' ca tu le ta'gú'u bení' yödzülió ni*

<sup>12</sup> Que lë ni na', böchi' luzá'ado', ca na' benli' ca rnna xtídzá'a cate' ni' zóalena' libí'ili', runrö bayudxi gunli' ca rnna xtídzá'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queëli' Lë', en lu yöl-la' rizxizi. <sup>13</sup> Lë cazë' Dios runë' dxin lu icja ládxi'do'oli'. Runë' ga rë'ënili' gunli' le raza ládxi'ë Lë', en runë' ca' ga séqui'li' gunli' lë na'.

<sup>14</sup> Guli'gún yúgu'të le ral-la' gunli', en bití' bi innëli' que, en bití' til-la dídza'li'. <sup>15</sup> Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yödzülió ga ni zóali' ladaj bönachi bití' nacagaca tsahui', en nucá'anagaca Dios. Libí'ili' rigú'uli' bení' ladjagaquië' ca na' ta'gú'u bení' böljaj lúzxiba cate' ni naca chul-la, <sup>16</sup> cate' ru'ili' lógaquië' didza' íbániguequinë'. Channö caní gunli', huáca udzëjade'eda' ni'a que le naca cázali' dza huödë' Cristo, tu' inözda' bití' guca nítisö guzóa bönadxi gátia', en calëga nítisö bena' dxin. <sup>17</sup> Yöl-la' réajlë' queëli' Cristo naca tu le raza ládxi'ë Dios. Sal-la' gun bayudxi gátia' para gaca idú yöl-la' réajlë' queëli' Lë', udzëjada', en uzí'lena' xibé tsözxön yúgu'tëli'. <sup>18</sup> Lësca' caní ral-la' udzëjali' libí'ili', en uzí'lenli' tsözxön neda' xibé.

### *Ca tunbi' bi'i Timoteo, en bi'i Epafrodito*

<sup>19</sup> Channö caní rë'ënë' Xanru' Jesús, runa' löza isöl-la'tea'-bi' bi'i Timoteo ga zóali', ate' ní'irö udzëjada' cate' huödabi' ududíxjö'ibi' neda' cätëze raca queëli'. <sup>20</sup> Túzibi' lëbi' rizá'

ládxi'bi' ca na' rizá' ládxa'a neda', en ru'ída' ládxi'bi' libí'ili'. <sup>21</sup> Yúgu'të bönni' ia'zíca'rö, le naca quégacasë' tu'í ládxi'gaquië'. Biti' tu'í ládxi'gaquië' xichinë' Cristo. <sup>22</sup> Nöz quézili' ca benbi' bi'í Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'í bönni' rúnlenbi'-në' tsözxön xúzibi' dxin. <sup>23</sup> Isöl-la'a-bi' bi'í Timoteo ga zóali' cate' inözda' nacxi gaca quia' ni <sup>24</sup> sal-la' ruzxöni ládxa'a-në' Xanru' gunë' ga uduyútea' libí'ili'.

<sup>25</sup> Lësca' réquida' run bayudxi isöl-la'a-bi' bi'í böchi'ru' Epafrodito ga zóali'. Bi'í ni bénlenbi' neda' tsözxön dxin queë' Cristo, ate' gudíl-lalentu' tu' xihui'. Libí'í cázali' gusöl-la'li'-bi' ga zoa' para gácalenbi' neda'. <sup>26</sup> Lë cázabi' ré'ëni'bi' uduyúbi' libí'ili', en ru'ída' ládxi'bi' libí'ili' tu' biyönili' ben bayá' queëbi'. <sup>27</sup> Le nácate gü'í'bi', en guqui gátibi', pero buéchi' ládxi'ë-bi' Dios, en calégasö lëbi', pero buéchi' ládxi'ë ca' neda', para cabí isëbirö ládxa'a ca na' risëbi ládxa'a na'a. <sup>28</sup> Que lë ni na', gú'uniröda' isöl-la'a-bi' queëli' para gaca udzëjali' leyúbölö cate' ulé'eli'-bi', en bítirö isëbi ládxa'a neda'. <sup>29</sup> Guli'sí' lu ná'ali' lëbi' lu yöl-la' rudzeja queëli', tu' nácabi' bi'í böchi'ru' réajlë'ëbi' Cristo. Guli'gún bal yúgu'të bönachi nácagaca ca nácabi' lëbi', <sup>30</sup> tu' guzóa bönadxi queëbi' gátibi' tu' benbi' xichinë' Cristo, en tu' gúcalenbi' neda' uláz queëli'.

### 3

#### *Le naca idú tsahui'*

<sup>1</sup> ¡Na'a, böchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queëli' leyúbölö lë na' buzúaja' queëli' zí'alö, tu' gácalen lë ni libí'ili'. <sup>2</sup> Guli'gún chí'í cuinli' lógaca nupa ni' tuá' dö'. Nácagaca ca yugu' bö'cu' sinya', nupa na' tun bayudxi irugu lu xipëla'gaquië' bönni' le naca bë' nazí' lu ná'gaquië' xtídzë'ë Dios. <sup>3</sup> Rë'u nadéli'ru' lë na' naca iduté li, le naca bë' nazí' lu ná'aru' le runnë' queëru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzëjaru' tu' nácaru' tuz len Jesucristo. Biti' ca' ruzxöni ládxi'ru' tu le runru' rácasö queëru'. <sup>4</sup> La'tu' ruzxöni ládxi'ru' lë ni, lësca' neda' chinadéli'da' bi uzxöni ládxa'a. Channö zoë' nu bönni' réquinë' ulé' tu' nacua' le nunë', neda' nadéli'röda' ca bönni' na':

<sup>5</sup> Gurugu lu xipëla'a lë na' naca bë' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xzí'ini xi'sóë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

<sup>6</sup> Bë'da' ládxa'a xibá na' ga bidxintë gudxía ládxa'a bönachi queë' Cristo.

Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca innë quia'.

<sup>7</sup> Na'a, yúgu'të lë na' bena' zxön zí'alö, nuzóa' tsölá'alö tu' néquida' queë' Cristo.

<sup>8</sup> Calégasö yugu' lë na', pero nuzóa' ca' tsölá'alö yúgu'të le dë, para gaca gúnbe'eda'-në' Xanru' Jesucristo, le nácaterö lesaca' ca yúgu'të lë na'. Para gúnbe'eda' Lë' gurú'una' ní'ilo yúgu'të, en réquida' naca ca bëbu, para uzi'a xibë' Cristo, <sup>9</sup> en para gaca' tuz len Lë'. Nuhuóaca' tsahui', caléga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'. <sup>10</sup> Rë'ënisida' gúnbe'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxön, qui'í saca'a ca na' gudí'í guzxa'quë'ë Lë', en soa' sina' gátia' ca gútië' Lë', <sup>11</sup> tu' runa' löza Dios, usubanë' ca' neda' lu yöl-la' guti.

#### *Le runru' para idxinru' xilátjaru'*

<sup>12</sup> Biti' rnní'a' chinadéli'da' yúgu'të lë ni gunnë' quia', en bití' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'.

<sup>13</sup> Böchi' luzá'ado', bití' ca' nadéli'da' yugu' lë ni, pero tuz le runa' bayudxi. Ruzál-la ládxa'a

le chibidéli'da', ate' runa' bayudxi idéli'da' le za'. <sup>14</sup> Runa' ca runē' tu bönni' rixíti'dē'ē para idxinē' xilatjē' para idéli'nē' tu le uzi'ē xibé. Caní runa' para idéli'da' lē na' bulidzē' Dios rē'u para gata' queēru' ni' yehua' yubá tu' nácaru' tuz len Jesucristo.

<sup>15</sup> Caní ral-la' gunru' yúgu'tēru' rē'u, naca idú ca réajlē'ēru' Cristo. Channō réquili' bál-lali' ral-la' gunli' tu le yúbölö, rinábida'-nē' Dios uzéajni'inē' libí'ili'. <sup>16</sup> Na'a, ca naca lē na' bidéli'ru', ral-la' gúntica'siru' caní.

<sup>17</sup> Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. <sup>18</sup> Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnnía': Le tunē' zían bönni' run ga nácagaquiē' ca nupa bití' ta'lé'e Cristo dxi'a, tu' tu'zöē' tsölá'alö le ben cazē' Lē' lē'e yaga cruz. <sup>19</sup> Yugu' bönni' tunē' caní, tsójáquiē' lu guí' gabila, tu' naca le ta'zēsö ládxi'gaquiē' dios quégaquiē', ate' tun ba zxon cuíngaquiē' ni'a que lē na' ral-la' gun ga ulu'tuí'inē'. Tuí'i ládxi'sē le dē yödzölió ni, <sup>20</sup> pero rē'u ni ruí'i ládxi'ru' le dē yehua' yubá ga nabábaru', en ribözaru' dza huödē' Xanru' Jesucristo, Nu rusölá rē'u, urúajē' yehua' yubá na'. <sup>21</sup> Lē' utsē'ē idútē le naca cázaru', le riniti caz, en gunē' ga huóaca ca naca idútē le naca cazē' Lē', le sóatica'sö. Caní gunē' len yöl-la' huáca zxon queē' le ugunē' dxin para inná bé'enē' yúgu'tē.

## 4

### *Ral-la' udzéalentica'siru'-nē' Xanru'*

<sup>1</sup> Que lē ni na', böchi' luzá'ado', guli'gaca tsutsu ca réajlē'ēli'-nē' Xanru'. Nadxí'ide'eda' libí'ili', en rē'ēnda' uduyúa' libí'ili'. Runli' ga rudzējada', en nácali' ca tu le ruzi'a xibé.

<sup>2</sup> Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queē' Xanru'. <sup>3</sup> Na'a, böcha'a idú, rē'ēnda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lē'sca' bulu'dzáguiē' Clemente, en ia'zíca'rē' luzá'a na' netu'. Chinazúajgaca lágaquiē' yehua' yubá ga na' nazúajgaca lágaca nupa chinadéli'gaca yöl-la' na'bán idú.

<sup>4</sup> ¡Buli'dzéalentica'sö-nē' Xanru'!

Leyúbölö, rnnía': ¡Buli'dzeja!

<sup>5</sup> ¡Guli'gaca dxi'i ladxí' len yúgu'tē bönachi!

¡Chizóa huödē' Xanru'!

<sup>6</sup> Bití' ubi uguí'ili', pero guli'nabi-nē' Dios le riquínili', en guli'guíē': "Xclenu" ca naca yúgu'tē lē na' rinábali'. <sup>7</sup> Dios gunē' ga gaca queéli' le cuéqui dxi icja ládxi'do'oli', lē na' nadódirö bē' ca le gaca ila'yéajni'i bönachi. Lē na' ribequi dxi icja ládxi'do'oru' gun chí'i icja ládxi'do'oli', en le rizá' ládxi'li' tu' nácali' tuz len Jesucristo.

### *Ral-la' sa' ládxi'ru' le nácagaca dxi'a*

<sup>8</sup> Ga ruúdxitē, böchi' luzá'ado', guli'sá' ládxi'li':

Yúgu'tē le naca dxi'a, en le naca bica' ba,

en le naca idútē li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

<sup>9</sup> Guli'gún ca na' busédida' libí'ili', lē na' guzxí' lu ná'ali' tsca na' bé'lēna' libí'ili' didza', en tsca na' bena' ga ni' zóali'. Dios, Nu runna queēru' le ribequi dxi icja ládxi'do'oru' sóalenē' libí'ili'.

### *Le tsahui' gulunē' yugu' bönni' Filipos queē' Pablo*

<sup>10</sup> Rudzéalenda'-nē' Xanru' tu' ruí'i ládxi'li' neda' leyúbölö. Bití' rnnía' gul-la ládxi'li' neda', pero bití' guta' queéli' lataj gácalenli' neda' zí'alö. <sup>11</sup> Lē'sca' caní, bití' rnnía' caní tu' zoa bi riyadzaj quia', tu' nazēda' tsaza ládxa'a le dēsö quia'. <sup>12</sup> Chigudöda' lu yöl-la' yechi', en lu yöl-la' tsahui'. Nazēda' soa' nácati'tēs, sal-la' nöljada' o nabila riduna', en

sal-la' dēda' quia' o zoa bi riyadzaj quia'. <sup>13</sup> Yúgu'tē huazéqui'da' tu' rutipē' Cristo lādxa'a. <sup>14</sup> Benli' dxi'a cate' ni' gúcalenli' neda', en butípali' lādxa'a cate' gudí'i guzxáca'a.

<sup>15</sup> Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzjali', tu' guzxí' lu ná'ali' libán bena' neda'. <sup>16</sup> Tsanni ni' guzóa' yödzö Tesalónica, tu' chopa luzuí gusöl-la'li' quia' le bunödzjali' cate' ni' biyadzaj quia'. <sup>17</sup> Biti' ruí'i lādxa'a bi si'a, pero ré'ēnda' gáta'rö queéli' le uzí'ili' xibé yehua' yubá. <sup>18</sup> Rea' libí'ili': Chiguzxi'a yúgu'tē lē na' gusöl-la'li' quia', ate' gudödité bē' tsca le biyádzjada'. Ben ga naca caní lē na' gusöl-la'li' lu ná'abi' bi'i Epafrodito. Lē na' bunödzjali' naca ca tu le rilá' zixi le ridxintē lahuē' Dios, en ca tu le rigú'uru' lahuē' Dios le raza lādxe'ē. <sup>19</sup> Dios gunnē' queéli' yúgu'tē le riyadzaj queéli', tsca naca yöl-la' tsahui' rö'ö yehua' yubá, tu' nácali' tuz len Jesucristo. <sup>20</sup> ¡Gácatica'sö queë' Xúziru' Dios yöl-la' ba! ¡Ca' gaca!

*Yugu' bönachi queë' Cristo tu'gapa Dios luzē'eguequi*

<sup>21</sup> Uláz quia' neda', guli'gapa Dios nupa ni' néquiguequi queë' Dios tu' nácagaca tuz len Jesucristo. Tu'gapē' Dios libí'ili' böchi' luzá'aru' núngaquië' neda' tsözxön ni. <sup>22</sup> Lēsca' yúgu'tē nupa ni' néquiguequi queë' Dios, tu'gapa Dios libí'ili', en lēsca' caní, yugu' bönni' huen dxin nacu'ē lidxe' bönni' rinná bē'ē idú luyú Roma tu'gapē' Dios libí'ili'.

<sup>23</sup> Rinábida'-nē' Xanru' Jesucristo uzá' lādxe'ē queéli' yúgu'tēli'. ¡Ca' gaca!

## DIDZA' GUSÖL-LË'Ë PABLO YÖDZÖ COLOSAS

### *Pablo rugapë' Dios bönachi queë' Cristo nacu'ë Colosas*

<sup>1</sup> Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'. <sup>2</sup> Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxi'do'oli'.

### *Pablo rulidzë' Dios, en rë' Lë': "Xclenu"*

<sup>3</sup> Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' <sup>4</sup> tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios. <sup>5</sup> Caní runlí' tu' runlí' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. <sup>6</sup> Didza' dxi'a na' bidxín queëli' ca ridxín ca' idütë yödzölió. Run dxin, en raca libán que, idütë yödzölió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' idütë le ruzá' ládxë'ë queëru' Dios. <sup>7</sup> Epafras, bönni' nadxí'iru'-në', busëdinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. <sup>8</sup> Bönni' ni gudí'xjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunlí' caní.

<sup>9</sup> Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le rë'ëni quëzinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u. <sup>10</sup> Caní rinábitu'-në' para gaca gunlí' ca ral-la' ilún nupa néquiguequi queë' Xanru', gunlí' yúgu'të le raza ládxë'ë Lë', en séqui'li' gunlí' yúgu'të le naca dxi'a, en gácarö idú ca núnbë'ëli'-në' Dios. <sup>11</sup> Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cózali' zxön ladxi', en udzeja ládxi'li'. <sup>12</sup> Lu yöl-la' rudzeja queëli' guli'guié' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. <sup>13</sup> Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. <sup>14</sup> Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubága'ru'.

### *Nuhuóacaru' tuz len Dios tu' gútië' Cristo uláz queëru'*

<sup>15</sup> Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios. <sup>16</sup> Lu në'ë Cristo benë' Dios yúgu'të le dë, le nacuá' lúzxiba, en le nacuá' luyú, yugu' le rilé'eru', en yugu' le cabí gaca ilé'eru', lë na' nácgaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'. <sup>17</sup> Cristo zoa cazë' zí'alö ca yúgu'të le dë, ate' yúgu'të nacuá'tica'sö ni'a queë' Lë'. <sup>18</sup> Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. <sup>19</sup> Caní guca, tu' guyaza ládxë'ë Dios Xuz sóalen Cristo idütë le naca cazë' Lë'. <sup>20</sup> Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

<sup>21</sup> Libí'ili', zí'atëlö nulá'alenli'-në' Dios, en gúcali' ca yugu' bönni' biti' ta'lë'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'. <sup>22</sup> Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca innë' queëli'. <sup>23</sup> Caní gaca channö ugá'anali' tsutsu ca réajlë'ëli' Cristo. Gácali' ca tu' yu'u zxoa ga rë' xilibi zö'ö que,



en bití' tseaj bö' ládxi'do'oli' ca runlí' löza didza' dxi'a biyónili', lë na' raca libán que idútë yödölió le benë' Dios zخان lúzxiba. Dios buzóë' neda', Pablo, para gaca' huen dxin que didza' dxi'a na'.

### *Dxin budödë' Dios lu në'ë Pablo*

<sup>24</sup> Rudzëjada' na'a ca naca le riguí' rizáca'a para gácalena' libí'ili', en ruúdxí rizá'a lu idútë le naca' le riguí' rizáca'lena' tsözxón Cristo uláz que idú le naca cazë' Lë', le naca bönachi queë'. <sup>25</sup> Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. <sup>26</sup> Ruzéajni'ida' bönachi le nagachi', lë na' bigachi' dza ni'te, ate' cuntú nu benbë' le, pero na'a Dios chibulu'ínë' bönachi néquiquequi quez queë' ca naca que. <sup>27</sup> Dios gú'uni quézínë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

<sup>28</sup> Runtu' libán queë' Cristo, en rusá'atu' ládxi'gaca yúgu'të bönachi, ate' rusëditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesucristo. <sup>29</sup> Para gaca caní runa' dxin, en ruí' ládxa'a údxí guna' lë ni, rugúna' dxin yöl-la' huáca idú na' runnë' Cristo quía'.

## 2

<sup>1</sup> Ré'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödö Laodicea, en le gácalen ca' yúgu'të nupa bití' ila'lé'eni neda'. <sup>2</sup> Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. <sup>3</sup> Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. <sup>4</sup> Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë. <sup>5</sup> Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

<sup>6</sup> Que lë ni na', ca na' guzxí' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguie' Lë' libí'ili'. <sup>7</sup> Ca na' nun ga rë' luí'yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazëdali'. Guli'guíëtica'së' Dios: "Xclenu'."

### *Le cubi nácaru' tu' dzágaru'-në' Cristo*

<sup>8</sup> Guli'gún chi'i cuinli' para cabí gü'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácagaca idútë li, ca naca le ta'lëbi tun bönachi, en ca naca le tu'sedi bönachi le naca que yödölió ni, en calëga le naca xtídzë'ë Cristo.

<sup>9</sup> Idútë le naca cazë' Dios zóalen Cristo sal-la' böáquië' bönachi, <sup>10</sup> ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. <sup>11</sup> Narugu lu xipëla'gaquië' bönni' judío le ruluí'í dá'gaquië' Dios, pero libí'ili', tu' dzágali' Cristo, zóalen libí'ili' le ruluí'í néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'güë' tu' guídido', pero libí'ili', nadúa idútë yöl-la' bönachi queëli' le bënlenli' dul-la'. Caní naca queëli' tu' benli' tsözxón Cristo cate' gútië' lë'e yaga cruz. <sup>12</sup> Cate' bidílali' nisa guca ca bigáchi'lenli'-në' Cristo tsözxón yeru ba, en bubánlenli'-në' tsözxón tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. <sup>13</sup> Zí'atëlö gúcali' ca nupa chinátigaca tu' nözi dul-la' gubága'li', en bití' guzóalen libí'ili' le ruluí'í néquili' queë' Dios, pero na'a Dios nunë' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'. <sup>14</sup> Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugüë' lë na' nabága'ru', en budë'ë le lë'e yaga cruz ca tu le nabáguë'ë Cristo. <sup>15</sup> Cate' gútië' Cristo lë'e

yaga cruz, bugüë' yöl-la' huáca unná bē' quégaca bö' xihui' unná bē', en quégaca bö' xihui' dē lu nē'eguequi yöl-la' huáca, tu' bulu'e lahui le nácagaca bö' xihui' na', en bugüë' idutē le guta' lu nē'eguequi.

*Ral-la' güi'i ládxi'ru' le naca que yehua' yubá*

<sup>16</sup> Que lē ni na', bití' güi'ili' lataj nu uzegui libí'ili' didza' ca naca le rē'aj ráguli', o tu' cabí runlí' zxön yugu' dza laní, o tu' cabí runlí' zxön beo' si' ruzē, o tu' cabí runlí' zxön yugu' dza lá'ayi quégaca bönachi. <sup>17</sup> Yúgu'tē lē ni naca ca tu bixín que le ral-la' gaca, ate' le rulu'í' yúgu'tē lē ni náquiē' Cristo caz. <sup>18</sup> Bití' güi'ili' lataj nu gun ga unítí' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquiē' le cabí bila'lé'enē', en tun ba zxön cuíngaquiē' ca naca le dzö'ösö ícjagaquiē' lu yöl-la' bönáchisö quégaquiē'. <sup>19</sup> Nu run caní bití' da' Cristo. Náquiē' Xanru', en ruzöé' tsutsu idútē le naca cazē', le nácaru' rē'u. Rugahuē' le, en runē' ga naca tuz ni'a que le zeaj lu dxita lu bin, ate' rizxön idútē le naca cazē' ca rē'ēnē' Dios uxönē' le.

<sup>20</sup> Libí'ili' chinátílenlí'-nē' Cristo para cabirö ila'nná be'e xibá que yödzölió libí'ili'. ¿Bizx que runlí' tsca ni nácalí' que yödzölió, en runlí' ca ta'nná bē' xibá que? <sup>21</sup> Caní ta'nná yugu' xibá que yödzölió ni:

Bití' quítjanu' lē ni.

Bití' gagu' lē na'.

Bití' canu' ia'tú le dē.

<sup>22</sup> Yúgu'tē lē ni ila'niti cate' chibugunru' léguequi dxin. Caní nácagaca le ta'nná bē' bönachi, en yugu' xibá nazí' lu nē'eguequi. <sup>23</sup> Le nácatē, yugu' xibá ni, téqui bönachi nápagaca yöl-la' réajni'i. Tun ga tu'lu'í' cuínguequi ca bönachi yudo', en ga tu'lu'í' cuínguequi nöxaj ladxi', en ga tu'saca' zí'gaca idútē le zeaj naca caz, pero xibá ni bití' ca' tácalen rē'u para gaca inná bé'eru' yugu' le rizé ládxi'ru' lu yöl-la' bönáchisö queéru'.

### 3

<sup>1</sup> Na'a, channö nubánlenlí'-nē' Cristo, guli'güi' ladxi' le nácagaca que yehua' yubá ga ni rö'ē Cristo cuita lē'ē ibēla Dios, ga náquiē' lo. <sup>2</sup> Guli'sá' ladxi' le taca xitsá'alö, en calēga le taca luyú ni. <sup>3</sup> Naca queéli' tsca chinátíli', ate' yöl-la' na'bán queéli' rapa chí'ē Cristo ga ni zoa cazē' Dios. <sup>4</sup> Cristo nabánili' libí'ili'. Cate' ulu'í' lahuē' Lē', ní'irö ulu'í' loli' ca' libí'ili' tsözxön len Lē' lu bení' queē'.

*Yöl-la' na'bán gula, en yöl-la' na'bán cubi*

<sup>5</sup> Que lē ni na', guli'gún ga ila'niti le nacua'len libí'ili' que yödzölió ni:

Yugu' le ruá' dö', en le nácagaca xihui',

en yugu' le rizé ládxi'li' le ruá' dö',

en yugu' le rizé ládxi'li' le naca xihui',

en yöl-la' ruhuidí'.

Yöl-la' ruhuidí' naca lēbi ca nu reaj ladxi' budó' guió' budó' yaga, tu' cabí reaj ladxi' Dios nu ruhuidí'. <sup>6</sup> Tun bönachi yugu' le caní, ate' gunē' Dios xíguia' yúgu'tē nupa bití' túngaca ca rnna xtídzē'ē. <sup>7</sup> Yugu' dul-la' caní benlí' ca' libí'ili' cate' ni' nadödili' lu nē'eguequi.

<sup>8</sup> Na'a, bítí'rö gunlí' yugu' lē ni:

Bítí'rö idzá'alí', en bítí'rö leli'.

Bítí'rö nu gunlí' zí', en bítí'rö innē xíhui'li'.

Bítí'rö innalí' le ruá' dö'.

<sup>9</sup> Bití' sí' yé'eli' luzá'alí' tuli' ia'tuli' tu' chinucá'anali' le gúcalí' zí'alö, en yugu' le benlí' zí'alö. <sup>10</sup> Chinácalí' bönachi cubi, ate' tu tu dza ricúbili', ruhuöácaröli' ca naca Nu na' bun libí'ili', para gúnbē'eli' Lē' idú ca náquiē' Lē'. <sup>11</sup> Tu' chidzágaru'-nē' Cristo:

Bítí'rö nácaru' bönni' zí'tu', en bönni' judío.

Bítí'rö nácaru' bönni' narugu lu xipéla'gaquiē' le naca bē' nu da' Dios, en bönni' bití' narugu lu xipéla'gaquiē' lē na' naca bē'.

Bíti'rö nácaru' bönni' ta'yéajni'inë', en bönni' biti' ta'yéajni'inë'.

Bíti'rö nácaru' bönni' nadó'ogaquië', en bönni' biti' nadó'ogaquië'.

Na'a, Cristo náquië' yúgu'të le nácagaca lesaca', en dzáguië' yúgu'tëru'.

<sup>12</sup> Dios nadxí'inë' libí'ili', en guröë' libí'ili' para guéquili' quez queë'. Que lë ni na', ral-la':

Güi'i ládxi'li' luzá'ali', en gácali' dxi'i ladxi',  
en nöxaj ladxi', en cuidi' ladxi',  
en cözali' zxön ladxi'.

<sup>13</sup> Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'. <sup>14</sup> Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxí'i le run ga nácaru' tuz, en ga nácaru' idú. <sup>15</sup> Guli'güi' lataj le ribequi dxi icja ládxi'do'oru' inná bë' lu icja ládxi'do'oli', lë na' runnë' Dios queëru'. Que lë ni na' bulidzë' libí'ili', para gácali' tuz lu idútë le naca cazë' Cristo. Guli'guië' Dios: "Xclenu'."

<sup>16</sup> Guli'sí' lu ná'ali' xtídzë'ë Cristo le gaca queëli' tu yöl-la' tsahui' zxön. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gulla yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiëli'në' Dios: "Xclenu'." <sup>17</sup> Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë Xanru' Jesús, en guiëli'në' Dios Xuz: "Xclenu'", dzáguië' Cristo libí'ili'.

*Le ral-la' gunru' que luzá'aru' tu' néquiru' queë' Cristo*

<sup>18</sup> Libí'ili', nigula nutsaga ná'aleni' bönni' queëli',  
guli'gún ca rnna xtídzá'gaquië' bönni' que queëli'  
ca ral-la' gunli', tu' néquili' queë' Xanru'.

<sup>19</sup> Libí'ili', bönni' nutsaga ná'aleni' nigula queëli',  
guli'dxí'i nigula que queëli',  
en biti' uzéli' bach légacanu.

<sup>20</sup> Libí'ili', bi'i ra'bán,  
guli'gún ca rnna yúgu'të xtídzá'gaquië' xuz xiná'ali'.  
Lë ni raza ládxi'ë' Xanru'.

<sup>21</sup> Libí'ili', núlöli' nácali' xúzgaca bí'ido',  
biti' tödi bë' usína'li' zxi'inili',  
para cabí huőaj ládxi'gacabi'.

<sup>22</sup> Libí'ili', núlöli' nácali' bönni' nadó'ogaquië',  
guli'gún ca rnna yúgu'të xtídzá'gaquië' xanli' luyú ni.  
Calégasö gunli' caní cate' tu'yúé' libí'ili'  
ca na' tun nupa té'ëni ilún ga ila'yaza ládxi'gaca bönachi,  
pero idú ládxi'li' guli'gún xichíngaqië'  
ca ral-la' ilún nupa tadxi Dios.

<sup>23</sup> Ca naca yúgu'të le runli', guli'gún idú ládxi'li',  
gaca ca runli' xichinë' Xanru',  
en calégasö ca runli' xichíngaca bönachi.

<sup>24</sup> Chinóz quézili' ubi'ë Xanru' queëli',  
gunnë' queëli' le chinupë'ë Dios quégaca nupa nácagaca zxi'ini cazë'.  
Caní gaca, tu' runli' xichinë' Xanru' Jesucristo.

<sup>25</sup> Nu ruá' dö', ubi'ë Xanru' que nu na' ca naca dö' ruá' nu na', tu' cabí utsë'ë Dios ca ral-la' ubi'ë que queégaca bönachi.

## 4

<sup>1</sup> Libí'ili', núlöli' nácali' xángaca bönachi,  
guli'gún le naca tsahui', en le naca dxi'a  
ca rugunli' dxin yugu' bönni' huen dxin queëli'.

Guli'tsöjné zoa ca' Xanli' yehua' yubá.

<sup>2</sup> Libí'ili', yúgu'téli',  
buli'lídztica'sé' Dios.  
Buli'subán ládxi'li' ulídzali'-nē' Dios,  
en guli'guié': "Xclenu'."

<sup>3</sup> La' ná'asó cate' rulídzali'-nē' Dios, guli'nabi-nē' ca' gácalenē' netu', en gunnē' netu' lataj quíxjö'ötu' xtídzē'è Xanru', para gaca uzéajni'itu' bönachi le bigachi' ca naca queë' Cristo. Tu' runa' caní nadzuna' lidxi guié ni. <sup>4</sup> Guli'nabi-nē' ca' Dios, gunnē' neda' lataj usalaj lá'ana' le bigachi' na' ca ral-la' guna'.

<sup>5</sup> Lu yöl-la' réajni'i queéli', guli'gún le runli' lógaca nupa bití' ta'yéajlé' Cristo. Guli'gunda' dxin yugu' dza uzá' ládxe'è Dios queéli', gunli' xichiné'. <sup>6</sup> Ral-la' gü'ili' didza' ca raza ládxe'è Dios, en ca ral-la' gun nupa néquiquequi queé'. Ral-la' inözili' ca' naca ral-la' ubí'ili' didza', bi guié'li' tu tu bönachi.

*Yugu' bönachi queë' Cristo tu'gapa Dios luzé'eguequi*

<sup>7</sup> Tíquico quíxjöi'inē' libí'ili' le raca quia' ni. Náquiē' böchi'ru' nadxí'iru'-nē'. Náquiē' ca' huen dxin idú queë' Xanru', en rúnlenē' neda' tsözxön dxin queë' Xanru'. <sup>8</sup> Que lé ni na' risól-la'a-nē' ga zóali', para uzéajni'inē' libí'ili' le raca quia', en utipē' ládxi'li'. <sup>9</sup> Onésimo, böchi'ru' na' nabábalenē' libí'ili' sa'yéajlenē' lé' tsözxön. Náquiē' ca' böchi'ru' nadxí'iru'-nē', en réajlé'è Xanru'. Chopē' ni ulu'siyönnē' libí'ili' yúgu'tē le raca ni.

<sup>10</sup> Aristarco, bönni' na' yú'ulenē' neda' tsözxön lidxi guié rugapē' Dios libí'ili'. Bi'i Marcos, bi'i bönni' queënu nigula zanē' Bernabé rugápabi' Dios ca' libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal. <sup>11</sup> Bönni' ni lé' Jesús, en zoa ia'tú lé' Justo lésca' rugapē' Dios libí'ili'. Nacuá' zían bönachi judío ta'yéajlé' Cristo, pero tsónnasē' ni ladaj bönachi judío tunē' dxin que le rinná bē'è Dios tsözxön len neda', en tu'hu' zxöndē'è neda'. <sup>12</sup> Epafra, bönni' ni nababē' ca' libí'ili' rugapē' Dios libí'ili'. Náquiē' huen dxin queë' Cristo, en idú ládxe'è rulidzē' Dios, en ráta'yutica'sé' lahuē' gácalenē' libí'ili' para gácali' idú ladxi', en sóali' ca' sina' gunli' yúgu'tē le ré'eni quézinē' Dios. <sup>13</sup> Runa' ba nalí queë' Epafra na', ru'ida' ládxe'è libí'ili' enca' nupa nacué' yödzo Laodicea, en nupa nacué' yödzo Hierápolis. <sup>14</sup> Demas, enca' Lucas tu'gape' Dios libí'ili'. Náquiē' Lucas bönni' na' ruúnē' bönachi, ate' nadxí'iru'-nē'.

<sup>15</sup> Guli'gapa Dios böchi'ru' nacué' Laodicea, enca' Ninfas, en bönachi queë' Cristo nacué' lídxinu Ninfas na'. <sup>16</sup> Cate' údxi ulábalí' guichi ni ga ni' zóali', guli'gún ga ulu'laba le bönachi queë' Cristo nacué' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'. <sup>17</sup> Guli'guié' Arquipo: "Bē' ládxe'u gunu' dxin na' budödē' Xanru' lu no'o."

<sup>18</sup> Neda', Pablo, ruzúaj caza' lu guichi dídzado' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guié ni. Rinábida'-nē' Dios uzá' ládxe'è queéli' le naca dxi'a. ¡Ca' gaca!

## DIDZA' ZÍ'ALÖ GUSÖL-LË'Ë PABLO YÖDZÖ TESALÓNICA

### *Pablo rugapë' Dios bönachi queë' Cristo nacua' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

### *Yugu' le taca bë' ta'yéajlë' bönachi Tesalónica Dios*

<sup>2</sup> Rética'stu'-në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'. <sup>3</sup> Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatuca'sili' tsutsu tu' runli' löza Xanru' Jesucristo. <sup>4</sup> Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'. <sup>5</sup> Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

<sup>6</sup> Libí'ili' butsa' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzéjali' tu' zóalenë' Dios Bö' Lá'ayi libí'ili'. <sup>7</sup> Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. <sup>8</sup> Caní naca, tu' guzé xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzé didza' ca réajlë'ëli' Dios. Caní naca, biti' bi run bayudxi innatu', <sup>9</sup> tu' ta'guixjö' la' léguquisö bönachi ni' queëtu' ca benli' netu' bal, en ca na' butsa' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios. <sup>10</sup> Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguië' Dios queëru' dza si' za'.

## 2

### *Xichinë' Dios benë' Pablo yödzö Tesalónica*

<sup>1</sup> Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. <sup>2</sup> Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. <sup>3</sup> Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzé ládxi'tu' le dë queëli', en biti' guzxí' yé'etu' libí'ili'. <sup>4</sup> Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö ruí'itu' didza'. <sup>5</sup> Nöz quézili' catu' caz bë'lentu' libí'ili' didza' le gun zxön libí'ili', en biti' guléaj tsahui' cuintu' ca run nu bi rizë' ladxi' le dë queëli'. Nöz quézinë' Dios naca caní. <sup>6</sup> Biti' gudíljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bë'ëtu' libí'ili' tu' nácatu' gubáz nasöl-lë'ë Cristo <sup>7</sup> guzóalentu' libí'ili' dxi'i ládxi'do', en bentu' ca runnu xiná'agacabi' bi'i huë'ënido', run chí'ínu légacabi' dxi'i ládxi'do'. <sup>8</sup> Caní guca, bidxí'ide'etu' libí'ili', ga bidxintë gú'unitu' udöditu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxí'ide'etu' libí'ili'. <sup>9</sup> Röjnëli', böchi'

luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en tē dza bentu' dxin para cabí usaca' zí'itu' nituli' libí'ili'.

<sup>10</sup> Libí'ili' na' réajlë'ëli' Cristo, huáca gunli' ba nalí, ate' nõzinë' Dios ca na' gudárentu' libí'ili' idú ca raza lãdxë'ë Dios, en idú dxí'ado', en ca na' cuntu nu gaca bi innë que.

<sup>11</sup> Lësca' caní nõzili' ca bentu' ca runë' tu bõnni' quégacabi' zxi'inë', guchízatu' icja nágali', en butípatu' lãdxi'li' tu tuli'. <sup>12</sup> Busá'atu' lãdxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

<sup>13</sup> Que lë ni na' ca', rética'stu'-në' Dios: "Xclenu'." Caní runtu' tu' guxzí' lu ná'ali' xtídzë'ë Dios le biyõnili' bë'ëtu' didza', calëga ca xtídza' bõnáchisõ, pero ca le nácatë naca, xtídzë'ë Dios naca. Xtídzë'ë na' run dxin lu icja lãdxi'do'oli' libí'ili', réajlë'ëli' Cristo.

<sup>14</sup> Bõchi' luzá'atu', raca queëli' ca raca quégaca bõnachi queë' Dios, nupa néquiguequi queë' Jesucristo luyú Judea. Caní naca tu' chigudí'i guxzáca'da'ali' lu ná'agaca bõnachi ulãdz queëli', lëbisõ ca na' gula'gu'í gula'záquië' légaquië' lu ná'agaca bõnachi ulãdz quégacquië', nupa ni' nácgaca bõnni' judío. <sup>15</sup> Yugu' bõnni' judío na' gulútië' Xanru' Jesús, en gulútië' ca' yugu' bõnni' gulu'ë didza' uláz queë' Dios. Gula'bía lãdxi'gaquië', en bulu'láguë' ca' netu'. Biti' tunë' le raza lãdxë'ë Dios, tu' cabí ta'lé'enë' dxi'a yúgu'të bõnachi izá'a. <sup>16</sup> Tu' záguë'ë ca' xinõztu', para cabí guntu' libán lógaca bõnachi izá'a na' bití' nabábagaca légaquië', tu' ruí'ilentu' léguequi didza' para ulu'lágaca. Caní raca, tu' zántica'së' dul-la' nabága'gaquië', en chinabága'gaquië' xíguia' le run ga ichúguie' Dios quégacquië'.

### *Pablo rë'enë' tsöjyüë' bõchi'ru' nacu'ë Tesalónica*

<sup>17</sup> Na'a, bõchi' luzá'atu', ruhuí'initu' ca runë' tu bõnni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la lãdxi'tu' libí'ili'. Que lë ni na', ruí'i lãdxi'rõtu' ulé'etu' loli', tu' rizëda' lãdxi'tu' guntu' caní. <sup>18</sup> Que lë ni na' ca' gú'unitu' guídatu' ga zóali', ate' neda', Pablo, le nácatë bë' lãdxa'a guída' chopá tsonna luzuí, pero Satanás, tu' xihuí', buzaga' xinõztu'. <sup>19</sup> ¿Bizxi caz naca le run ga runtu' lõza, o le run ga rudzëjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? <sup>20</sup> Libí'i cázali' nácali' le run ga nácatu' bica' ba, en le run ga rudzëjatu'.

## 3

<sup>1</sup> Que lë ni na', cate' bítirõ guca guá' ilentu', ben xtídza'tu' ugá'anatu' chópatu' lu yõdzõ Atenas, <sup>2</sup> ate' gusõl-la'tu'-bi' bi'i bõchi'ru', Timoteo ga zóali'. Nácabí' bi'i huen dxin queë' Dios, en rúnlenbi' neda' tsõzxõn libán que didza' dxi'a queë' Cristo. Gusõl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo, <sup>3</sup> para cabí soa nu gaca chopá lãdxi' ni'a que le tu'saca' zí' bõnachi ni netu'. Nõz quézili' zóaru' yõdzõlió ni para guá' ilenru' le caní. <sup>4</sup> Lësca' cate' ni' guzóalentu' libí'ili', busiyõntu' libí'ili' ca chizóa gaca le ulu'saca' zí' rë'u, le gaca ca na' chiguca queëtu', ate' nõz quézili' lë na'. <sup>5</sup> Que lë ni na', cate' bítirõ guca guá' ilena', gusõl-la'a-bi' bi'i Timoteo ga zóali', para ududíxjöi'ibi' neda' ca naca queëli' ca réajlë'ëli'-në' Cristo, en channõ cabí gulú'u tu' xihuí' libí'ili' nõza dul-la', nu na' rigú'u bõnachi nõza dul-la', en channõ cabí bõáca nítisõ dxin na' bentu' ga zóali'.

<sup>6</sup> Cate' buzá'abi' bi'i Timoteo ga zóali', en budxinbi' ga zóatu', busiyõnbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxí'igacali'-në' yugu' bõchi' luzá'aru', en ca na', lu yõl-la' dxi'i lãdxi' queëli' röjnética'sili' netu', enca' ca na' raca lãdxi'li' ulé'eli' netu', ca na' netu' raca lãdxi'tu' ca' ulé'etu' libí'ili'. <sup>7</sup> Que lë ni na', bõchi' luzá'atu', cate' ni' gudí'i guxzáca'tu' yúgu'të lë ni, en zían le guca queëtu', bidxín didza' queëtu' le buí'i zxõn netu' cate' biyõnitu' ca réajlë'ëli'-në' Cristo. <sup>8</sup> Na'a, nuhuóáca lãdxi'tu' tu' riyõnitu' rõ'õli' tsutsu ca réajlë'ëli'-në' Xanru'. <sup>9</sup> ¿Nacxi caz gaca guíëtu'-në' Dios: "Xclenu'" ca ral-la' guntu' ni'a que yúgu'të le run ga rudzeja lãdxi'tu' lahuë' Dios queëru' ni'a que le nácali' libí'ili'? <sup>10</sup> Bayudxi rulidztu'-në' Dios, en rinábitu'-në' rëla, en tē dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

<sup>11</sup> Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'. <sup>12</sup> Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'. <sup>13</sup> Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

## 4

### *Le runru' le raza ládxe'ë Dios*

<sup>1</sup> Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

<sup>2</sup> Chinöz quézili' yugu' le gunná bé'etu' libí'ili' uláz queë' Xanru' Jesús. <sup>3</sup> Le ré'ënë' Dios naca gácali' idú dxi'a, en bití'rö gunli' le cabí naca tsaui', <sup>4</sup> en inözili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. <sup>5</sup> Biti' ral-la' sóalenli'-nu nigula queéli' lu yöl-la' rizé ladxi' le ruá' dö', ca na' tun bönachi bití nabábagaca Dios, en bití' núnbë'gaca Dios. <sup>6</sup> Ca nácagaca lë ni, cuntu nu ral-la' tödi bë', en cabí si' ye'e böchi' luzé'e bagáchi'sö, tu' ichúguië' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. <sup>7</sup> Dios bulidzë' rë'u, calëga para gunru' le ruá' dö', pero para gácaru' idú dxi'a. <sup>8</sup> Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí'i caní didza'.

<sup>9</sup> Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. <sup>10</sup> Le nácatë nadxí'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. <sup>11</sup> Ráta'yutu' loli' ca', gü'íládxi'li' cözali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'. <sup>12</sup> Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

### *Ca gaca cate' huödë' Xanru' Jesucristo*

<sup>13</sup> Lësca', böchi' luzá'atu', ré'ënitú inözili' ca raca quégaca nupa chinátigaca, para cabí huí'inili' ca tun ia'zica'rö bönachi bití' zoa le tun löza. <sup>14</sup> Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huódalengaca tsözxön Jesús nupa ni' chigulati, en gula'yéajlë' Lë'.

<sup>15</sup> Que lë ni na' riguíxjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." <sup>16</sup> Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. <sup>17</sup> Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalentica'siru'-në' Xanru'. <sup>18</sup> Que lë ni na', guli'huí' zxön luzá'ali' tuli' ia'tuli' ca nácagaca didza' ni.

## 5

<sup>1</sup> Na'a, ca naca dza na', o rëla na' cate' ilaca lë ni, bití' run bayudxi uzúaja' queéli' lu guichi, böchi' luzá'atu'. <sup>2</sup> Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö. <sup>3</sup> Cate' ila'nná bönachi: "Raca dxi'a queëru', en bití' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxín le riguí'i rizáca'nu nigula na' chizóa sóabi' bí'ido' queënu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'. <sup>4</sup> Na'a,

böchi' luzá'atu', biti' zóali' chul-la niti, en que læ ni na' biti' idxín dza ni' queéli' bagáchi'sö ca ridxinë' bönni' gubán. <sup>5</sup> Yúgu'tëli' nácali' bönachi que bení', en que lahui' dza. Biti' nácaru' bönachi que chi'i dzó'ölö, en calëga que le naca chul-la. <sup>6</sup> Que læ ni na', biti' ral-la' tódi yëla loru' ca raca quégaca nupa biti' nabábagaca rë'u, pero ral-la' usubán ládxi'ru', en cözaru' ba'a ládxi'do'. <sup>7</sup> Nupa tasi, chi'i dzó'ölö tasi, en nupa ta'zudxi, chi'i dzó'ölö ca' ta'zudxi. <sup>8</sup> Na'a, rë'u ni, nácaru' que lahui' dza, en ral-la' cözaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chi'i ícjaru'. <sup>9</sup> Caní naca, tu' nuzóë' Dios rë'u ni, calëga para idxinru' ga ichúguië' queëru', pero para uláru' tu' ruzxöni ládxi'ru'-në' Xanru' Jesucristo, <sup>10</sup> tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'. <sup>11</sup> Que læ ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

*Pablo richízië' icja nágagaquië' böchi' luzë'ë ta'yéajlë'ë Cristo*

<sup>12</sup> Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá ládxi'li'. <sup>13</sup> Ráta'yutu' loli' ca', gunli' légaquië' bal lu yöl-la' nadxí'i queéli', tu' tunë' dxin na'. Guli'cöza dxí'ado' tuli' len ia'tuli'.

<sup>14</sup> Lë'sca' caní richízatu' icja nágali', böchi' luzá'atu', para usá'ali' ládxi'gaca nupa biti' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa biti' naca tsutsu ca ta'yéajlë' Cristo, en gácali' nöxaj ládxi' lógaca yúgu'të bönachi.

<sup>15</sup> Guli'gún chi'i cuinli' para cabí uzí' læbi luzá'ali', en cabí guá'ali' dö' que nu ruá' dö' queéli', pero guli'güí ládxi'li' gúntica'sili' le naca dxi'a que luzá'ali' tuli' ia'tuli', en quégaca yúgu'të bönachi.

<sup>16</sup> Buli'dzéjatica'sö,

<sup>17</sup> en buli'lídzatica'së' Dios,

<sup>18</sup> en guli'guié' Lë': "Xclenu'."

Caní ral-la' gunli' ni'a que yúgu'të le raca queéli', tu' nácagaca læ ni le rë'ënë' Dios gunli' tu' nácali' queë' Jesucristo.

<sup>19</sup> Biti' uzóa dxili' le rulídzatica'së' Dios Bö' Lá'ayi libí'ili'.

<sup>20</sup> Biti' uzóali' tsölá'alö xtídzë'ë bönni' ru'ë didza' uláz queë' Dios.

<sup>21</sup> Guli'sí' bë' yúgu'të, en guli'sí' lu ná'ali' le naca dxi'a.

<sup>22</sup> Biti' bi gútsa'li' le ruá' dö'.

<sup>23</sup> Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntu nu gaca bi innë queéli' dza ni' huödë' Xanru' Jesucristo. <sup>24</sup> Runë' Dios ca rnnë', Bönni' na' bulidzë' libí'ili'. Lë cazë' gunë' yugu' læ ni.

*Pablo rigu'ë yugu' böchi' luzë'ë lu në'ë Dios*

<sup>25</sup> Böchi' luzá'atu', buli'lidzë' Dios, en inábili'-në' gácalenë' netu'.

<sup>26</sup> Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

<sup>27</sup> Ni'a queë' Xanru' Dios ruchi'a libí'ili' ulábalí' guichi ni lógaca yúgu'të böchi' luzá'aru' nabábagaquië' Cristo.

<sup>28</sup> Rinábida'-në' Xanru' Jesucristo uzá' ládxi'ë queéli' le nácagaca dxi'a queë'. ¡Ca' gaca!



## DIDZA' BUROPI GUSÖL-LË'Ë PABLO YÖDZÖ TESALÓNICA

### *Pablo rugapë' Dios bönachi queë' Cristo nacué' Tesalónica*

<sup>1</sup> Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. <sup>2</sup> Rinábitu' Xúziru' Dios, en Xanru' Jesucristo, uzá' ládxe'ë queëli', en gunë' ga soa dxi icja ládxi'do'oli'.

### *Dios ichúquië' quégaca bönachi dul-la' ila'nítigaca cate' huödë' Cristo*

<sup>3</sup> Ral-la' guíëtica'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxi'ili' luzá'ali' tuli' ia'tuli' zeaj rácarö idú. <sup>4</sup> Que lë ni na', len yöl-la' rudzeja riguíxjö'ötu' ca naca queëli' lógaca bönachi queë' Dios ni, tu' ribözali' zxon ladxí', en réajlë'ëli' Dios sal-la' ta'bíada' ládxi'gaca bönachi libí'ili', en riguí' rizáca'da'ali', pero ruá' rilenli' yúgu'të. <sup>5</sup> Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni' rinná bë'ë Lë'.

<sup>6</sup> Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí' ila'zaca' nupa na'. <sup>7</sup> Ia'stú, libí'ili' riguí' rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxon queë'. <sup>8</sup> Ilá' lahuë' Cristo dza ni' ca tu guí' zxon cate' ni' gunë' zi' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo. <sup>9</sup> Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxon queë', en yöl-la' huáca queë'. <sup>10</sup> Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

<sup>11</sup> Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí' ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni. <sup>12</sup> Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxe'ë queëli' Dios queëru', enca' Xanru' Jesucristo.

## 2

### *Ulu'í lahuë' Bönni' Xihui'*

<sup>1</sup> Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', <sup>2</sup> para cabí guí'ili' lataj nu gun chixi libí'ili' ca nácagaca le guzxi' lu ná'ali'. Bití' cuéqui böniga icja ládxi'do'oli' ni'a que bi ta'nnë' bönni' ta'zì yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'í bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." <sup>3</sup> Bití' ca' guí'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ralla' tsázië' lu guí' gabila. <sup>4</sup> Bönni' ni uzáguë'ë, ate' lu yöl-la' run ba zxon cuinë' tá'baguë'ë yúgu'të le nequi queë' Dios, o le tun zxon bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

<sup>5</sup> ¿Naru' cabí röjneli' busiyönda' libí'ili' yugu' lè ni cate' ni' zóalena' libí'ili'? <sup>6</sup> Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. <sup>7</sup> Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. <sup>8</sup> Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsëpi yösa bení' que dza huödë'. <sup>9</sup> Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. <sup>10</sup> Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu në'eguequi idú ládxi'guequi le naca idútë li, para ulu'láguequi. <sup>11</sup> Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. <sup>12</sup> Caní gaca para ila'baga' xíguia' yúgu'të nupa biti' gula'yéajlë' le naca idútë li, pero gula'yaza ládxi'gaca le cabí naca tsahui'.

### *Nupa gurö cazë' Dios para ulu'lágaca*

<sup>13</sup> Böchi' luzá'atu', libí'ili' na' nadxí'inë' Xanru' libí'ili', ral-la' gufëtica'stu'-në' Dios: "Xclenu" ni'a que le naca queëli', tu' chigurö cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. <sup>14</sup> Para gaca caní queëli', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'. Caní gaca ni'a que didza' dxi'a runtu' libán que.

<sup>15</sup> Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bë'lentu' libí'ili', en buzúajtu' queëli' lu guichi. <sup>16-17</sup> Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhui' zxöntica'só rë'u, en le naca dxi'a runru' löza, yugu' lë na' buzá' ládxi'ë Dios queëru'.

## 3

### *Le ral-la' inábiru'-në' Dios*

<sup>1</sup> Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. <sup>2</sup> Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios. <sup>3</sup> Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'. <sup>4</sup> Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'. <sup>5</sup> Rinábitu'-në' Xanru' usë'ë ládxi'li' para idxí'ili'-në' Dios, en cözali' zxön ládxi' ca na' benë' Cristo.

### *Ca run bayudxi gunru' dxin*

<sup>6</sup> Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'. <sup>7</sup> Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. <sup>8</sup> Biti' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. <sup>9</sup> Caní bentu' para gácatu' loli' ca tu le ruluí'i libí'ili' ca ral-la' gunli', sal-la' dë lu na'tu' inábatu' bi gunli' queëtu'. <sup>10</sup> Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rë'ënë' nu bönni' gunë' dxin, biti' güí'ili' le gahuë'." <sup>11</sup> Canísó rnnatu' tu' riyönitu' nútsa'gaquië' ládjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nnë'. <sup>12</sup> Ni'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quégacasë'.

<sup>13</sup> Na'a, böchi' luzá'atu', biti' soa dxili', gúntica'sili' le naca dxi'a. <sup>14</sup> Channö nútí'tës bönni' biti' gunë' ca rnna xtídzä'tu', le ruzúajtu' lu guichi ni, guli'gún ga gaca bë'ë bönni'

na', en biti' gunli' tsözxön lë' para utuí'inë'. <sup>15</sup> Biti' ral-la' ilé'eli'-në' ca tu bönni' biti' rilé'enë' libí'ili' dxi'a, pero guli'sá' ládxe'ë ca böchi' cázali'.

*Pablo rigu'ë lu në'ë Dios yugu' böchi'ru' nacu'ë Tesalónica*

<sup>16</sup> Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxi'do'oru'.

<sup>17</sup> Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risöl-la'a. Canísö ruzúaja' lu guichi. <sup>18</sup> ¡Le ruzá' ládxe'ë Xanru' Jesucristo queéru' gaca queéli' yúgu'tëli'! ¡Ca' gaca!

## DIDZA' ZÍ'ALÖ GUSÖL-LË'Ë PABLO QUEËBI' BI'I TIMOTEO

### *Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusölá rë'u, enca' tu' gunná bë'ë caní Xanru' Jesucristo, Nu na' runru' löza. <sup>2</sup> Rugapa' Dios li', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

### *Pablo rusë'ë ládxi'bi' Timoteo ca naca xibá cabí naca idú*

<sup>3</sup> Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö, <sup>4</sup> en cabí ilunë' zxön yugu' didza' ridasö, en lágaca ziántërö cö' xuz xtó'ogaca bönachi, yugu' le tun ga tu'i ládxi'gaca bönachi le nácagaca nítisö. Yugu' le caní bití' tun tsutsu bönachi queë' Dios ca naca le ta'yéajlë' Lë'.

<sup>5</sup> Le ré'ëni gun lë ni rea' li', naca para ila'dxi'i bönachi luzë'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlë' Dios. <sup>6</sup> Ca nácagaca lë ni, bití' bulu'rúajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le bití' nácatë. <sup>7</sup> Té'ënnë' ulu'sédinë' bönachi ca naca le rinná bë' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

<sup>8</sup> Ré'u nöziru' naca dxi'a xibá gunná bë'ë Dios, channö nu rugún le dxin ca ral-la' gun. <sup>9</sup> Lë ni nöziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bë' xibá na'.

Nupa bití' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

<sup>10</sup> Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zì' yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'baga yugu' xibá tsahui'.

<sup>11</sup> Nöziru' naca caní tu' bidxín queëru' didza' dxi'a buzá' ládxë'ë Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

### *Pablo rë' Cristo: "Xclenu" tu' buéchi' ládxë'ë lë*

<sup>12</sup> Rea'-në' Xanru' Jesucristo, Nu rutipa ládxa'a, "Xclenu" tu' buzxöni ládxë'ë neda', en buzöë' neda' guna' xichinë'. <sup>13</sup> Caní benë' sal-la' zì'alö neda' gunné' zì'a queë', en gudxía ládxa'a bönachi queë', en zían le bi'a dö' quëguequi, pero Cristo buéchi' ládxë'ë neda', tu' bena' caní lu yöl-la' bití' réajni'i quia' cate' ni' bití' réajlë'ë nida' Lë'. <sup>14</sup> Na'a, zxöntërö naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

<sup>15</sup> Didza' idütë' li lë ni, en le naca lesaca' ila'zì' lu ná'agaca yúgu'të bönachi, le rnna: Lë cazë' Jesucristo bidë' yödzülió ni para busölë' bönachi dul-la', ate' busölë' neda' sal-la'

nácara' bönni' dul-la' ca yúgu'tè bönachi. <sup>16</sup> Que lè ni na' buéchi' láchxè'è neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le rulu'i lógaca nupa ila'yéajlè' Lè', en gata' quéguequi yöl-la' na'bán idú. <sup>17</sup> Na'a rnníá': ¡Yöl-la' ba Dios, Nu rinná' bé'tica'sö, Nu catu caz údxi que, en Nu biti' gaca ilé'eru', la's dui Dios Nu nözi caz yúgu'tè! ¡Queë' Lè' gácatica'sö yöl-la' run bal, en yöl-la' ba, na'a dza, en yúgu'tè dza zá'gaca! ¡Ca' gaca!

<sup>18</sup> Zxí'ina'do' Timoteo, rudöda' lu no'o xibá ni para gunu' xichinè' Dios ca runè' tu bönni' idú láchxè'è rejè' gudil-la, en para uzi'u xibé yugu' le gula'guíxjö' zí'alö nupa ni' gulu'i didza' uláz queë' Dios ca gaca quiu'. <sup>19</sup> Len yöl-la' réajlè' quiu' Cristo ral-la' gunu' caní, naca idú dxi'a icja láchxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlè'èru' Cristo. <sup>20</sup> Caní gulunè' Himeneo, en Alejandro, nupa na' busana' lu na' Satanás tu' xihui' para ila'zèdè' ca ral-la' ilunè', para cabirö ila'nnè' zi'è que le nequi queë' Dios.

## 2

### *Le rusedi rë'u ulídzaru'-nè' Dios*

<sup>1</sup> Que lè ni na' le naca lo le richízia' icja nágagaca bönachi naca ca ral-la' ulídzaru'-nè' Dios, en ca ral-la' gáta'yuru' lahuè', en ca ral-la' inábiru'-nè' gunnè' bi riquíniru', en ca ral-la' guièru'-nè': "Xclenu'." Yugu' lè ni ral-la' gunru' uláz quéguequi yúgu'tè bönachi. <sup>2</sup> Lësca' caní ral-la' gunru' uláz quégaca nupa ta'nná' bē', en quégaca yúgu'tè nupa nácagaca lo. Caní ral-la' gunru' para gaca dxi'a queèru', en gata' queèru' yöl-la' riböza tsáhuí'do'. Ral-la' gunru' caní lu yöl-la' réajlè' queèru' Dios, en lu yöl-la' ba'a ladxi' queèru'. <sup>3</sup> Lè ni naca dxi'a, en le raza láchxè'è Dios, Nu rusölá' rë'u. <sup>4</sup> Dios caz ré'èné' ulu'lágaca yúgu'tè bönachi, en ré'èné' ilúnbè'e le naca idútè li. <sup>5</sup> Tuzè' náquiè' Dios, en tuzè' bönni' ruúnè' dzaga Dios, en bönachi. Nu ni naca Jesucristo, Nu gulaj bönachi. <sup>6</sup> Lè cazè' budödi cuiné' lu yöl-la' guti, le benè' tu' nözi dul-la' nabága' gaca yúgu'tè bönachi. Dios benè' ba nalí queë' cate' bidxín dza queë' gútiè'. <sup>7</sup> Ca naca lè ni, Dios buzóè' neda' para guna' libán que, en gaca' gubáz nasöl-lè'è Cristo, para usédigacada' bönachi izá'a ca naca le réajlè'èru' Cristo, en ca naca le naca idútè li. Rilítèda', en biti' ca' rizí' yè'a.

<sup>8</sup> Na'a, ré'ènda' ulu'lidzè' bönni' Dios, en iláta'yuè' lahuè' gátitès, nácagaquiè' idú dxi'a, en cabí ila'lenè' luzá'agaquiè', en cabí ila'dil-la dídza'gaquiè'. <sup>9</sup> Lësca' caní, ré'ènda' iláccunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxi', en le naca idú ladxi', en calèga le tu'pá'asinu icja lógacanu len oro, en yugu' bugá, en lari' nazáca'da'. <sup>10</sup> Yugu' le dxi'a tunnu ulu'lu'i lahui le nácagacanu ca na' run le táccunu le naca ba'a. Caní ral-la' ilunnu nigula núnbè'gacanu Dios. <sup>11</sup> Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxaj. <sup>12</sup> Biti' runna' yugu' nigula lataj ulu'sédinu, en calèga ila'nná' bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. <sup>13</sup> Caní ral-la' gaca, tu' buzóè' Dios zí'alö Adán, ate' gudödi na' buzóè'-nu Eva. <sup>14</sup> Adán na', biti' guzxí' ye'e tu' xihui' lè', pero nigula queë', guzxí' ye'e lènu. Caní guca, gudítsjanu xibá queë' Dios, <sup>15</sup> pero ulanu nu nigula ruzóanu-bi' bí'ido' channö gúntica'sinu ca röjlöz le réajlè'èru' Dios, en yöl-la' nadxí'i, en channö gáccanu idú dxi'a, en idú ladxi'.

## 3

### *Ca ral-la' ilácagaquiè' bönni' tapa chi'è bönachi queë' Cristo*

<sup>1</sup> Didza' idútè li lè ni rnna: Channö ru'i láchxè'è nu bönni' gáquiè' nu gapa chi'i bönachi queë' Cristo, dxin dxi'a rizé láchxè'è. <sup>2</sup> Nu bönni' rapa chi'è bönachi queë' Cristo run bayudxi gáquiè':

Tu bönni' cuntu nu gaca bi innè' queë'.

Zoa túzinu nigula queë'.

Ral-la' gáquië' ban ladxi', en idú ladxi', en nōxaj ladxi'.

Ral-la' gu'ë ga ila'cu'ë böchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

<sup>3</sup> Biti' gáquië' bönni' re'jë', en calëga bönni' sínia'.

Biti' gaquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídi'në'.

<sup>4</sup> Ral-la' gáquië' bönni' rinná bé'enë' dxi'a bönachi nacuá' lidxë'.

Ral-la' ilunbi' xzí'inë' ca rnna xtídzë'ë lu yöl-la' run bal xúzgcabi'.

<sup>5</sup> ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacuá' lidxë'? <sup>6</sup> Biti' ral-la' gáquië' tu bönni' si' gusí lahuë' të'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. <sup>7</sup> Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

#### *Ca ral-la' iláquië' bönni' tácalenë' bönachi queë' Cristo*

<sup>8</sup> Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé ládxi'së' dumí.

<sup>9</sup> Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

<sup>10</sup> Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë' quégaquië'. <sup>11</sup> Lësca' caní, nigula que queëgaquië' ral-la' ila'cuá'anu idú ládxi'gacanu, en cabí ilácanu unnë' que luzé'e. Ral-la' ilácanu zxön ladxi', en ilácanu li ladxi' lu yúgu'të le tunnu. <sup>12</sup> Yugu' bönni' ilácalenë' bönachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a xzí'inigaquië', enca' bönachi ulidxi' que queëgaquië'. <sup>13</sup> Run bayudxi gaca caní, tu' ta'déli'në' lataj ga ilún bal bönachi xtídzá'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

#### *Le bigachi' que le reaj ládxi'ru'-në' Dios*

<sup>14</sup> Yugu' didza' ni ruzúaja' quiu' lu guichi, sal-la' runa' löza uduyútea' li. <sup>15</sup> Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacuá' lidxë' Dios, nupa nácgaca bönachi queë' Dios ban, en nácgaca tsutsu, en ta'guíxjö' dxi'a le naca idútë li. Nácgaca ca yugu' ya'zxön, en le nunída'gaca zö'ö, le nácgaca tsutsu, en ta'zön yu'u. <sup>16</sup> Le nácatë, zxöntërö naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios bulu'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayépisëtërë'.

## 4

*Nupa ulu'huöaj ládxi'gaca ca naca le réajlë'ëru'-në' Cristo*

<sup>1</sup> Yálajdo' riguíxjö'ë Dios Bö' Lá'ayi, rnnë': Dza tsöjsétëgaca, ila'dá'baga' bal-la bönachi Cristo. Ulu'huöaj ládxi'gaquië' ca naca le réajlë'ëru' Cristo. Ulu'zë nágagaquië' xtídza'gaca bönachi nacuá'len bö' ta'zí' yë' léguequi, ate' ulu'zë nágagaquië' yugu' xibá queguequi bö' xihui'. <sup>2</sup> Ulu'zë nágagaquië' xtídza'gaca bönachi tu'lu'isö tsahui' cuínguequi. Yugu' bönachi na' tu'i didza' le cabí nácatë, en chinazidi ládxi'do'guequi, para cabí uxösa léguequi. <sup>3</sup> Caní naca, tu'záguë'ë xinözguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en té' Dios: "Xclenu'" cate' tahuë' le. <sup>4</sup> Dxi'a naca yúgu'të le benë' Dios, en biti' bi ral-la' uzóaru' tsölá'alö channö ráguru' le, en rëru'në' Dios: "Xclenu'." <sup>5</sup> Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'në' Dios, en inábiru'në' gun lá'ayë' lë na' gáguru'.

### *Ca rurúajë' dxi'a huen dxin queë' Jesucristo*

<sup>6</sup> Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'në' Cristo, en ca naca xibá dxi'a rapa chi'u. <sup>7</sup> Gurú'una yugu' didza' ridasö que yödzölió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca rë'ënë' Dios. <sup>8</sup> Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tódi uzá'aru' yödzölió ni. <sup>9</sup> Didza' idútë li lë ni, en le naca lesaca' ila'zí' lu ná'agaca yúgu'të bönachi. <sup>10</sup> Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zí' xibé le benë' nupa na' ta'yéajlë' Lë'.

<sup>11</sup> Gunná be'e, en busedi bönachi ilún yugu' lë ni. <sup>12</sup> Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le ulu'i nupa ta'yéajlë' Dios ral-la' ilún ca runu' li'. Caní ulu'ínu' légaquië':

Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

<sup>13</sup> Tsanni za'a idxina' quiu', bë'tica'sö ladxí' ulabu' guichi lá'ayi lógaca bönachi nacuá' ga ni' zu'. Guchiza icja nágagaquië' lë ni, en busedi légaquië'. <sup>14</sup> Biti' udödu' cá'asö le buzá' ladxë'ë Dios quiu', lë na' bennë' quiu' ca na' gula'nná nupa ni' gulu'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

<sup>15</sup> Béntica'sö yugu' lë ni. Bë'tica'sö ladxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. <sup>16</sup> Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

## 5

### *Ca ral-la' gunbi' Timoteo ni'a quégaca bönachi queë' Cristo*

<sup>1</sup> Biti' uzenu' bach yugu' bönni' gula, pero guchiza icja nágagaquië' didza', tsca nácagaquië' xuzcazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi'cazu'.

<sup>2</sup> Guchiza icja nágagacanu nigula gula didza', tsca nácagacanu xiná'cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zancazu', ca na' röjlöz le naca idú dxi'a.

<sup>3</sup> Ben bal yugu' nigula ba guti bönni' que queëgacanu, nácagacanu túzinu. <sup>4</sup> Channö zóanu tu nigula caní nacuá'abi' bi'i queënu o xzí'ini xi'sóanu, ral-la' ila'zédabi' ilunbi' ca rë'ënë' Dios, para ilácalenbi' zí'alö bönachi nacuá' lídxigacabi', en ulu'bí'ibi' quégaquië' xuz xiná'agacabi'. Lë ni naca dxi'a, en le raza ladxë'ë Dios. <sup>5</sup> Na'a, nigula na' nagá'ananu túzinu, runnu löza Dios, ate' rëla, en te dza rinábatca'sinu lahuë' Dios, en rulídzanu Lë'

ni'a quégaca bönachi queë', <sup>6</sup> pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. <sup>7</sup> Lësca' caní, gunná be'e bönachi nacuá' ga ni' zu', para ilún ca sa'yéaj yugu' lè ni, para ilaca bönachi cuntu nu gaca bi inné queéquequi. <sup>8</sup> Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacuá' lidxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

<sup>9</sup> Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queënu para sóalennu-në' ia'tué' bönni'. <sup>10</sup> Run bayudxi soa nu gun ba nalí queënu ca nácagaca le dxi'a runnu.

Gácalenli'-nu channö buscúlunu-bi' yugu' bí'ido',  
en channö ruí'inu ga ila'cuá' böchi'ru' zá'gaquië' yödzö zi'tu',  
en channö ruí'inu le ilë'aj ilágugaca bönachi queë' Dios,  
en channö rácalennu nupa ta'guí'i ta'zaca',  
en channö rúntica'sinu yúgu'të le naca dxi'a.

<sup>11</sup> Yugu' nigula túzinu biti' yu'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. <sup>12</sup> Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö. <sup>13</sup> Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unnë que luzë'e, en tsöjgútsa'gacanu ga yúbölö, en ila'nnanu le cabí nácatë. <sup>14</sup> Que lè ni na', rë'ënda' ulu'tsaga ná'gacanu leyúbölö nigula túzinu caní yú'ugacanu iz cuidi', en ulu'scúlanu-bi' yugu' bí'ido', en ila'nná bé'enu bi'i nacuá'abi' yu'u que queé'gacanu, para cabí iluí'inu nu ridá'baga' rë'u lataj bi inné queëru', rë'u na' réajlë'ëru' Cristo. <sup>15</sup> Caní ral-la' gaca, tu' chibulu'bíga'nu bál-lagacacnu, ate' tunnu ca rë'ëni Satanás tu' xihui'.

<sup>16</sup> Channö nútí'tës bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen lé'gacanu, para cabí ulu'saca' zi' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

<sup>17</sup> Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bë'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi. <sup>18</sup> Nazúaj lu guichi lá'ayi le rnna: "Biti' cu'u du ruá'aba' bëdxi na' rulíbiba' zxoá' xtila." Rnna ca': "Náquië' lesaca' nu bönni' huen dxin si'ë lazxië'."

<sup>19</sup> Biti' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channö cabí nacuá' chopá tsonna nupa tun ba nalí que le benë'. <sup>20</sup> Nupa túntica'sö dul-la', busidxi lé'guequi lógaca yúgu'të bönachi queë' Cristo para iladxi ia'zica'rö bönachi ni' Dios. <sup>21</sup> Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en biti' gunu' bal tuzë' bönni'. <sup>22</sup> Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

<sup>23</sup> Bítí'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

<sup>24</sup> Yugu' dul-la' qué'guequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios lé'guequi, ate' tödi ni' ila'lá' lahui dul-la' nabága'gaca ia'zica'rö bönachi. <sup>25</sup> Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

## 6

<sup>1</sup> Yúgu'të bönni' nadó'ogaca ral-la' ilúndë'ë bal xángaqüë', para cabí gaca nu inné zi' que La lá'ayi queë' Dios, en que xibá queë'. <sup>2</sup> Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asö lé'gaquië' tu' nácagaquië' böchi'guequi. Ral-la' ilunrö dxi'a



xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacua' ni', en guchiza le icja nágagaquië'.

*Le reaj ládxi'ru'-në' Dios le ruzí'iru' xibé*

<sup>3</sup> Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios, <sup>4</sup> bönni' ni run ba zxön cuinë', en biti' bi nözinë'. Didza' biti' naca dxi'a rizé ládxe'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nnë' zi' bönachi que luzë'eguequi, en ta'zá' ládxi'gaca que luzë'eguequi le cabí nácatë. <sup>5</sup> Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu në'eguequi le naca idútë li. Téquini huáca ila'z'í' dumí zían channö ilúngaca tsözxön nupa ta'yéaj ládxi'gaca Dios. Gucuíta ga nacua' bönachi caní. <sup>6</sup> Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-në' Dios. <sup>7</sup> Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. <sup>8</sup> Que lë ni na', channö dësö queëru' le gáguru', en le gácuru', ral-la' udzëjaru'. <sup>9</sup> Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zë ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. <sup>10</sup> Tu' ta'zë ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zi' légaquië'.

*Nu run dxin queë' Cristo naca ca tu bönni' rejë' gudil-la*

<sup>11</sup> Na'a, bönni' queë' Dios, gucuíta ga raca le caní. Bë'tica'sö ládxi'u gunu' le naca tsahui', en le rë'ënë' Dios. Guyéajlë'tica'së' Cristo, en bidxí'i yugu' luzó'o. Bë' ladxi' gacu' zxön ladxi', en nöxaj ladxi'. <sup>12</sup> Ca runë' tu bönni' idú ládxe'ë rejë' gudil-la, ben dxin que le réajlë'ëru' Cristo, ate' beni quiu' yöl-la' na'bán idú. Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. <sup>13-14</sup> Ni'a queë' Xanru' Dios, Nu na' nabánigaca yúgu'të le nacua', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' li' gun chí'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le güi'i lataj nu bi innë quiu', ga idxintë dza ni' ulu'í lahuë' Xanru' Jesucristo. <sup>15</sup> Cate' idxín dza na' huödë' Jesús, Dios ulu'ë lahui Lë'.  
 ¡Dios náquië' lá'ayi!  
 ¡Tuzë' Lë' dë lu në'ë yöl-la' unná bë',  
 en rinná bé'enë' yúgu'të nupa ta'nná bë',  
 en náquië' ca' Xángaca yúgu'të nupa nácagaca xan!  
<sup>16</sup> ¡Tuzë' Lë' zóatica'së'!  
 ¡Zoë' lu bení' ga biti' gaca nu idxín rácasö que!  
 ¡Catu caz nu bilé'e Lë', en biti' gaca nu ilé'e Lë'!  
 ¡Queë' Lë' gácatica'sö le run Lë' bal, en yöl-la' unná bë'!  
 ¡Ca' gaca!  
<sup>17</sup> Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cúngaquië', en para cabí ulu'zxöni ládxi'gaquië' yöl-la' tsahui' na' biti' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! <sup>18</sup> Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'í ládxi'gaquië' léguequi. <sup>19</sup> Channö

ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

*Le gulu'ë Pablo lu ná'abi' bi'i Timoteo*

<sup>20</sup> Bõcha'ado' Timoteo, ben chi'i le nadödi lu no'o. Gucuíta ga nacuá' nupa tuí'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun. <sup>21</sup> Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' lãdxë'ë quiu' le nácagaca dxi'a queë'.

¡Ca' gaca!

## DIDZA' BUROPI GUSÖL-LË'Ë PABLO QUEËBI' BI' TIMOTEO

### *Pablo rugapë' Dios bi'i Timoteo*

<sup>1</sup> Neda', Pablo, naca' gubáz nasöl-lë'ë Cristo. Caní naca' tu' rë'ënë' Dios gaca' caní, para caní gaca le guzxí' lu në'ë, gunnë' queëru' yöl-la' na'bán idú, le ruzá' lãdxë'ë Jesucristo queëru'. <sup>2</sup> Rugapa' Dios li', böcha'ado' Timoteo. Nacu' ca zxi'ini caza' tu' benru' tu zxon xichinë' Cristo, ate' nadxí'ida' li'. Rinábida'-në' Xúziru' Dios, enca' Xanru' Jesucristo, uzá' lãdxë'ë quiu', en huéchi' lãdxë'ë li', en gunë' ga cö' dxi icja lãdxi'do'o.

### *Timoteo ral-la' gunbi' ba nalí queë' Jesucristo*

<sup>3</sup> Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú lãdxa'a ca na' gulunë' xuz xtá'ahua'. <sup>4</sup> Cate' røjneda' ca na' gurödxu', rizë lãdxa'a ulé'eda' li', para gaca udzëjada' idú lãdxa'a. <sup>5</sup> Rea'-në' Dios: "Xclenu'" tu' zoa le run ga røjneda' ca réajlë'u Cristo idú lãdxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alö ca li', ate' runa' löza, lësca' caní réajlë'u Lë' na'a.

<sup>6</sup> Tu' naca caní, rusá'a lãdxu'u para usubanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios. <sup>7</sup> Bö' na' bennë' Dios queëru' biti' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxí'iru' luzá'aru', en run ca' ga rinná be'e cuinru'. <sup>8</sup> Que lë ni na', biti' utuí'inu' gunu' ba nalí queë' Xanru', en biti' utuí'inu' ca raca quia' neda' ni, nadzuna' lidxi guié tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. <sup>9</sup> Dios caz busölë' rë'u, en bulidzë' rë'u para gácaru' idú dxi'a. Biti' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' lãdxë'ë caní queëru'. Dza ni'te buzóë' caní queëru' zí'atëlö ca guta' yödzölió ni, tu' néquiru' queë' Jesucristo. <sup>10</sup> Na'a, chibuluí'i lahui le ruzá' lãdxë'ë Dios queëru', tu' buluí'i lahuë' Jesucristo Nu rusölá rë'u. Bugúë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

<sup>11</sup> Cristo buzóë' neda' para guna' libán que didza' dxi'a na', en para gaca' gubáz queë' para usédigacada' bönachi izá'a. <sup>12</sup> Que lë ni na' riguí'i rizáca'a ca' yugu' le raca quia' ni, pero biti' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chi'ë le budöda' lu në'ë ga idxintë dza ni' huödë'.

<sup>13</sup> Didza' dxi'a na' biyönnu' bena' libán que ral-la' gaca quiu' tu le ruluí'i ca ral-la' usédinu' bönachi ca réajlë'ëru' Jesucristo, en ca nadxí'iru' Lë'. <sup>14</sup> Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

<sup>15</sup> Chinöz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj lãdxi'gaquië' neda'. Figelo, en Hermógenes nabábagaquië' bönni' ni. <sup>16-17</sup> Rinábida'-në' Xanru' Dios huéchi' lãdxë'ë bönachi nacua' lidxë' Onesíforo, tu' butipë' lãdxa'a bönni' ni zían luzuí. Cate' bidxinë' Roma, idú lãdxë'ë buguiljë' neda', ate' budzölinë' neda'. Biti' butuí'inë' ni'a quia' neda' tu' nadzuna' lidxi guié ni, nága'a du guié. <sup>18</sup> Rinábida'-në' Xanru' huéchi' lãdxë'ë lë' dza ni' idxinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' guzóaru' yödzö Éfeso.

## 2

*Ral-la' gácabi' Timoteo ca tu bönni' idú lãdxë'ë rejë' gudil-la*

<sup>1</sup> Na'a, zxi'ina'do', butipa ladxu'u ca naca le ruzá ladxë Jesucristo quiu'. <sup>2</sup> Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

<sup>3</sup> Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ladxë' rejë' gudil-la. <sup>4</sup> Nu bönni' rejë' gudil-la, biti' ca' gútsë'ë yugu' le tun bönachi yödzölió ni, para tsaza ladxë'ë bönni' na' nuzóë' lë' gáquië' bönni' queë' rejë' gudil-la. <sup>5</sup> Lësca' caní, nu nutsa' lu huitaj, biti' bi ideli' channö cabí run ca ral-la' gun. <sup>6</sup> Nu bönni' gúz gú'una runë' dxin, zí'alö lë' uzi'ë xibé lë na' razë'. <sup>7</sup> Busá' ladxu'u lë ni rea' li', ate' Xanru' caz gunë' ga tséajni'inu' yúgu'të.

<sup>8</sup> Yöjné ca guca queë' Jesucristo. Guljë', en gúquië' zxi'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que. <sup>9</sup> Tu' runa' libán que didza' dxi'a, riguí'i rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero biti' ca' nága'të xtídzë'ë Dios. <sup>10</sup> Que lë ni na' ruá' riléna' yúgu'të lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. <sup>11</sup> Catëz naca lë ni rna:

Channö nátilenru' Lë', sóalenru'-në' ca' ibanru'.

<sup>12</sup> Channö guá' ilenru' le quí'i sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

<sup>13</sup> Sal-la' biti' runru' ca rnnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

### *Nu bönni' huen dxin queë' Cristo rurúajë' dxi'a*

<sup>14</sup> Busá' ladxí'gaca nupa nacué' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácagaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi. <sup>15</sup> Bë'tica'sö ladxu'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxi'ado' ral-la' ugunu' dxin didza' idútë li. <sup>16</sup> Na'a, gucuíta ga nacué' nupa tu'í didza' biti' nazaca', en didza' cá'asö, tu' tun didza' caní ga ilunrë' le cabí rë'ënë' Dios. <sup>17</sup> Ila'zë didza' tu'ë ca rizxón huë' nudzu' le ridúdu' rilá. Himeneo, en Fileto nabábagaquië' nupa tu'í didza' caní. <sup>18</sup> Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baröli bal-la bönachi ga ridxintë bití'rö ta'yéajlë' Cristo. <sup>19</sup> Le benë' tsutsu Dios zóatica'sö, en dë tu le naca bë', le rna: "Núnbë'ë Dios nupa néquiguequi queë'." Rna ca': "Guli'cuíta ga raca le ruá' dö', yúgu'tëli' libí'ili' néquili' queë' Cristo."

<sup>20</sup> Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. <sup>21</sup> Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

<sup>22</sup> Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxi'ado'. Ca nácagaca lë ni, ben tsözxön nupa tu'lidza Xanru', naca idú dxi'a icja ladxí'do'guequi. <sup>23</sup> Na'a, gurú'una yugu' didza' cá'asö, en didza' biti' nazaca', tu' chinöz quézinu' tun didza' caní ga ta'dil-la didza' bönachi. <sup>24</sup> Bönni' huen dxin queë' Xanru' biti' ral-la' tíl-lalenë' bönachi didza', pero ral-la' gáquië' nöxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'. <sup>25</sup> Lu yöl-la' nöxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'í ladxí'gaquië' para ilúnbë'ë le naca idútë li. <sup>26</sup> Caní ulu'lë' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca rë'ënë' Dios.

## 3

*Ca ilaca bönachi dza tsöjsétégaca*

<sup>1</sup> Lësca' ral-la' inözinu' lë ni: Dza tsöjsétégaca ilaca dza ila'guí'i ila'zaca' bönachi. <sup>2</sup> Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huídi'në'.

Ilún ba zxön cuíngaquië', en ulu'luí'i cuíngaquië' zxön.

Ila'nnë zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca ré'enë' Dios.

<sup>3</sup> Biti' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Biti' ila'nná be'e cuíngaquië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

<sup>4</sup> Ilácagaquië' hueti luzë'e, en bití ila'dzáguië' dxi'a.

Ulu'luí'i cuíngaquië' ca bönni' nayëpisëgaquië'.

Ila'dxí'inë' le ila'yázaso ládxi'gaquië', en calëga Dios.

<sup>5</sup> Ulu'luí'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacuá' bönachi caní. <sup>6</sup> Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula bití bi nözguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en iluí'i ládxi'gacanu yugu' le ila'zësö ládxi'gacanu le cabí nazaca'. <sup>7</sup> Ila'yönitica'sinu nigula ni didza' ilún libán que bönachi, pero bití ca' ila'déli'nu ila'yéajni'ininu le naca idútë li. <sup>8</sup> Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. <sup>9</sup> Bití ila'déli'rönë', pero gaca bë' nácagaquië' bönni' bití bi nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

*Le rigu'ë Pablo lu ná'abi' bi'i Timoteo*

<sup>10</sup> Nöz quézinu' ca naca le rusédidá' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'. <sup>11</sup> Nözinu' ca' yugu' le gula'bía ládxi'gaca bönachi neda', en yugu' le gudí'i guzxáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. <sup>12</sup> Yúgu'të nupa té'ëni ilaca idú dxi'a tu' néquiquequi queë' Jesucristo, lësca' ila'guí'i ila'záquië' yugu' le ila'bía ládxi'gaca bönachi légaquië'.

<sup>13</sup> Na'a, bönni' tuá' dö', en bönni' ta'zí' yë'ë ilácarë' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

<sup>14</sup> Na'a, ben chi'i yugu' le buzëdu', en le guxzí' lu no'o, tu' nunbë' casu' nupa bulu'sedi li'.

<sup>15</sup> Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zëajni'ide'e li' para uló' tu' réajlë'u Jesucristo. <sup>16</sup> Yúgu'të le nazúajgaca lu guichi lá'ayi guchizië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. <sup>17</sup> Caní run, para gaca sina' nu naca queë' Dios, en gácada' gun yúgu'të le naca dxi'a.

## 4

1-2 Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o biti' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. <sup>3</sup> Caní ral-la' gunu' tu' idxín dza cate' biti' ulu'zë nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. <sup>4</sup> Ulu'cá'anë' le naca idütë li, en ila'zí' lu ná'agaquië' yugu' didza' ridasö. <sup>5</sup> Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

<sup>6</sup> Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. <sup>7</sup> Ca runë' tu bönni' idú ládxi'ë rejë' gudilla, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. <sup>8</sup> Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxi'i Lë, en idú ládxi'guequi ta'böza dza huödë'.

*Le buzúajë' lu guichi Pablo gunbi' Timoteo*

<sup>9</sup> Bë' ladxi' guídateo' ga ni zoa' <sup>10</sup> tu' guléaj ládxi'ë Demas neda', tu' nadxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. <sup>11</sup> Tuzë' Lucas zóalenë' neda'. Guchë'ë-bi' bi'i Marcos para guí dalenbi' li' tsözxön, tu' nácabi' gúnlenbi' neda' tsözxön xichinë' Cristo. <sup>12</sup> Gusöl-la'a-bi' bi'i Tíquico lu yödzö Éfeso. <sup>13</sup> Cate' guídu', biá' quia' lari' guitsa' na' bucá'ana' lu yödzö Troas lu yu'u lidxi' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

<sup>14</sup> Alejandro, bönni' gubëdxi guié, zián le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. <sup>15</sup> Ben chi'i cuinu' queë' bönni' ni, tu' ridá'bagadë'ë didza' runru' libán que.

<sup>16</sup> Cate' le zí'alö luzuí bidxina' lógaquië' bönni' yúlalui', cuntu nu gúcalen neda', pero bulu'béaj ládxi'gaca yúgu'të bönachi neda'. Biti' rë'ënda' uzí' lëbë' Dios légaquië'. <sup>17</sup> Guzóalenë' Xanru' neda', en butipë' ládxi'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tsca burúaja' lu ruá'aba' bëdxi guixi'. <sup>18</sup> Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë ni' yehua' yubá. ¡Gácatíca'sö queë' yöl-la' ba yúgu'të dza zá'gaca! ¡Ca' gaca!

*Pablo rugapë' Dios bönachi queë' Cristo*

<sup>19</sup> Bugapa Dios Priscila, en Aquilo, enca' bönachi nacuá' lidxi' Onesíforo. <sup>20</sup> Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. <sup>21</sup> Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

<sup>22</sup> Rinábida'-në' Xanru' Jesucristo sóalenë' li'. ¡Gácalen li' le ruzá' ládxi'ë Dios quiu'! ¡Ca' gaca!

## DIDZA' GUSÖL-LË'Ë PABLO QUEËBI' BI'I TITO

### *Pablo rugapë' Dios bi'i Tito*

<sup>1</sup> Neda', Pablo, naca' huen dxin queë' Dios, en gubáz nasöl-lë'ë Jesucristo. Gusöl-lë'ë neda' para guna' ga ila'yéajlë' bönachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. <sup>2</sup> Caní naca' tu' runa' löza uzi'a xibé yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusi' lo rata' yúgu'të le dë, ate' run cazë' Lë' le nazi' lu në'ë gunë'. <sup>3</sup> Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busölá rë'u, neda'. <sup>4</sup> Rugapa' Dios li', böcha'ado' Tito. Nacu' idú xzí'ini caza' tu' naca lëbisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

### *Dxin queë' Cristo runbi' bi'i Tito luyú Creta*

<sup>5</sup> Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacuá' ni', para ilácagaca idú bönachi queë' Cristo, en para ucú'u bönni' gula yúgu'të yödzo para ilún chi'ë bönachi queë' Cristo nacuá' tu tu yödzo ni', ca na' chigunná bé'eda' li' gunu'. <sup>6</sup> Nu bönni' gula rapa chi'ë bönachi queë' Cristo ral-la' gáquië':

Bönni' cuntu nu bi gaca innë queë'.

Zoa túzinu nigula queë'.

Yugu' xzí'inë' ral-la' ila'yéajlë'ëbi' Cristo.

Biti' soa nu gaca innë quégacabi' ta'dá dzágasibi' ca',

o ta'dá'baga'bi' xuz xiná'agacabi'.

<sup>7</sup> Nu bönni' rapa chi'ë bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribízxjanë',

o bönni' rizë' ládxi'së' dumí.

<sup>8</sup> Ral-la' gu'ë ga ila'cu'ë böchi'ru' ta'dxinë' lidxë'.

Ral-la' së' ládxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

<sup>9</sup> Ral-la' gun chi'ë didza' idútë li ca chinazëdë',

para gaca ichízië' icja náagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

<sup>10</sup> Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío. <sup>11</sup> Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

<sup>12</sup> Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunnë': "Ta'zí' yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ë xöhuëdi." <sup>13</sup> Didza' ni benë' ba nali' quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, <sup>14</sup> en para cabí ulu'zë' náagagaquië' yugu' didza' ridasö quégaquië' bönni' judío, en biti' ilunë' ca ta'nná bë' bönachi nucá'anagaca le naca idútë li.

<sup>15</sup> Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca. <sup>16</sup> Ta'nnë' núnbë'gaquië' Dios, pero le túngaquië' biti' röjlöz le ta'nnë'

tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

## 2

### *Xibá dxi'a le ral-la' usëdiru'*

<sup>1</sup> Na'a, ral-la' gu'u didza' le röjlöz xibá dxi'a.

<sup>2</sup> Busedi yugu' bönni' gula:

Biti' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxí'inë' luzá'agaquië', en ila'bözë' zxön ladxi'.

<sup>3</sup> Busedi yugu' nigula gula:

Ilunnu le raza ládxë'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

<sup>4</sup> Ral-la' ulu'sédinu' nigula ni' yú'ugacanu iz cuidi' para ila'dxí'inu bönni' que queëgacanu, enca' zxi'inigacanu.

<sup>5</sup> Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queëgacanu.

Ral-la' cabí bi ilunnu le güí'i lataj nu innë zi' que xtídzë'ë Dios.

<sup>6</sup> Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

<sup>7</sup> Ral-la' gúntica'su' le naca dxi'a, ulu'ínu' bönachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

<sup>8</sup> Ral-la' usédinu' didza' dxi'a le cabí gaca nu bi innë que.

Caní gunu' ga utuí'inë' bönni' ridá'baguë'ë, en biti' gaca bi innë' queëli' runli' le ruá' dö'.

<sup>9</sup> Busedi böchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nōxaj lōgaquië' xāngaquië'.

Ral-la' ilunë' yúgu'të le ila'yaza ládxí'gaquië' xāngaquië'.

Biti' ral-la' tá'baga'gaquië' le ta'nná bē'ë.

<sup>10</sup> Biti' bi ulu'cáchi'lanë'.

Ral-la' ulu'lu'i cuíngaquië' tsahui' ca naca yúgu'të le tunë'.

Caní ulu'i lo naca dxi'a xibá queë' Dios, Nu busölá rë'u.

<sup>11</sup> Cristo, bönni' na' buzá' ládxë'ë Dios queëru' chibulu'í lahuë' lógaca yúgu'të bönachi para ulu'lágaca. <sup>12</sup> Lë' rusédinë' rë'u ucá'anaru' le cabí raza ládxë'ë Dios, en cabí së ládxí'ru' le naca que yōdzōlió ni, pero cōzaru' zxön ladxi', en gácaru' tsahui' dza ni zóaru' na'a, en gunru' ca ré'ëni quézinë' Dios. <sup>13</sup> Ral-la' cōzaru' le runru' löza le gun ga gácaru' bica' ba, lë na' gaca dza ni' cate' ulu'í lahuë' Jesucristo lu bení idú queë'. Náquië' Dios zxön, Nu rusölá rë'u. <sup>14</sup> Lë cazë' budödi cuinë' uláz queëru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en güí'i ládxí'ru' gunru' le naca dxi'a.

<sup>15</sup> Yugu' lë ni bē' didza', en guchiza icja nágagaca bönachi ni', ate' len yöl-la' unná bē' gudil-la léguequi. Béntica'sö caní, para cabí si' lataj nu ucá'ana cá'asö xtídzü'u.

## 3

### *Le ral-la' ilún bönachi ta'yéajlë' Cristo*

<sup>1</sup> Busá' ládxí'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlahui', para ilunë' ca rnna xtídzá'gaquië'. Ral-la' ila'cu'ë sina' ilunë' le naca dxi'a. <sup>2</sup> Biti'



bi le ruá' dö' ral-la' ila'nnë' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nöxaj ladxi', en idú ladxi' lógaca yúgu'të bönachi.

<sup>3</sup> Lësca' rë'u, zí'alö gúcaru' yugu' bönni' biti' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buxzé'eru' luzá'aru'. Biti' bila'lé'e bönachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'. <sup>4</sup> Ní'irö bulu'e lahui Dios, Nu rusölá rë'u. Naca bë' náquië' idú dxi'a, en nadxi'inë' yúgu'të bönachi, <sup>5</sup> tu' busölë' rë'u, calëga tu' zoa bi le naca dxi'a benru' rë'u, pero tu' buéchi' ládxië'ë rë'u. Bunë' rë'u dxi'a, en benë' ga nácaru' bönachi cubi. Dios Bö' Lá'ayi rucubë' rë'u. <sup>6</sup> Dios gusöl-lë'ë Dios Bö' Lá'ayi queëru' tu' néquiru' queë' Jesucristo, Nu rusölá rë'u. <sup>7</sup> Buzá' ládxië'ë queëru', en bunë' rë'u tsahui' para gata' yöl-la' na'bán idú queëru', le runru' löza gunnë' queëru'.

<sup>8</sup> Didza' idútë li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para iluí'i ládxi'gaquië' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zí' lu ná'agaca yúgu'të bönachi. <sup>9</sup> Na'a, biti' gu'u lataj nu gü'i didza' le cabí nazaca', o nu gü'i ladxi' ca nácagaca lágaca ziántërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

<sup>10</sup> Channö zoa nu bönni' ni', rubéajë' choplö bönachi queë' Cristo, tödi usó'o ládxië'ë tu ia'tú luzuí, bubéajë' bönni' na'. <sup>11</sup> Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

#### *Le buzúajë' Pablo lu guichi le gunbi' bi'i Tito*

<sup>12</sup> Cate' isöl-la'a-në' Artemas o Tíquico ga zu', bë' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga. <sup>13</sup> Zenas, bönni' na' rudödë' didza' ca rinná bë' bönachi yúlahui', enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'. <sup>14</sup> Busedi yugu' böchi' luzá'aru' ilúntica'së' le naca dxi'a, en bi ulu'nödziejë' quégaca nupa bi riyadzaj quéguequi, para gaca bë' caní le nácagaquië' queë' Cristo.

#### *Pablo rugapë' Dios bönachi queë' Cristo*

<sup>15</sup> Yúgu'të nupa nacuá'len neda' tu'gapa Dios li'. Bugapa Dios nupa ni' nadxi'igaca rë'u tu' ta'yéajlë' Dios. Le ruzá' ládxië'ë Dios queëru' gácalen yúgu'tëli'. ¡Ca' gaca!

## DIDZA' GUSÖL-LË'Ë PABLO QUEË' FILEMÓN

### *Pablo rugapë' Dios Filemón*

<sup>1</sup> Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. <sup>2</sup> Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxu'. <sup>3</sup> Rinábida'-në' Xúziru' Dios, enca' Xanru' Jesucristo, uzá' ládxe'ë queëli', en gunë' ga soa dxi icja ládxi'do'oli'.

### *Ca runë' Filemón tu' réajlë'ë Cristo*

<sup>4</sup> Rética'sa'-në' Dios queëru' "Xclenu", en röjnética'sida' li' cate' rulidza'-në'. <sup>5</sup> Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'. <sup>6</sup> Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zí' xibé nupa nacuá' ni' yúgu'të le naca dxi'a, le ruzá' ládxe'ë Jesucristo queëru'. <sup>7</sup> Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huóaca ládxi'gaca bönachi ta'yéajlë' Cristo.

### *Filemón ral-la' uniti lahuë'-bi' Onésimo, bi'i nadó'o queë'*

<sup>8</sup> Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu', <sup>9</sup> ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. <sup>10</sup> Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

<sup>11</sup> Bi'i ni, zí'aló biti' gúcabi' lesaca' quiu', pero na'a nácabi' lesaca' quiu' li', enca' quia' neda'. <sup>12</sup> Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. <sup>13</sup> Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, <sup>14</sup> pero biti' bi' rë'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rë'ëni quézinu' ca'. <sup>15</sup> Nadxi ca' que lë ni na' buzá'abi' Onésimo ga zu' tu' chí'ido' para udxinbi' tsaz ga zu'. <sup>16</sup> Na'a, bíti'rö gácabi' quiu' ca tu' bi'i nadó'o, pero gácabi' quiu' ca bi'i böchi' cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasö ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

<sup>17</sup> Que lë ni na', channö nunu' neda' tuz, ben lëbi' bal ca neda' caz runu' bal. <sup>18</sup> Channö bi' xíguia' benbi' quiu' o channö bi' rál-la'bi' quiu', gunnátëz neda' ral-la'a. <sup>19</sup> Neda', Pablo, len na'a caza' ruzúaja' quiu' lu guichi lë ni: Neda' caz quizxja' bi' rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. <sup>20</sup> Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huóaca ládxa'a.

<sup>21</sup> Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'. <sup>22</sup> Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

### *Pablo ruzúajë' lu guichi le rugapa Dios Filemón*

<sup>23</sup> Epafras, bönni' yú'ulenë' neda' tsözxön lidxi guié ni tu' runë' xichinë' Jesucristo, rugapë' Dios li'. <sup>24</sup> Lësca' tu' gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

<sup>25</sup> Rinábida'-ně' Xanru' Jesucristo uzá' lădxě'ë queěli'. ¡Ca' gaca!

## DIDZA' RUZÉAJNI'I YUGU' BÖNACHI HEBREO

*Dios bë'lenë rë'u didza' lu ru'ë Zxí'ini cazë'*

<sup>1</sup> Zián luzuí, en zián ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. <sup>2</sup> Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. <sup>3</sup> Zxí'inë' na' náquië' ca tu le rulu'í lahui yöl-la' zxön queë' Dios, en ca náquië' Zxí'inë' rulu'í lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

*Zxí'inë' Dios nayëpisëtërë' ca yugu' gubáz lá'ayi*

<sup>4</sup> Zxí'inë' Dios nayëpisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. <sup>5</sup> Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë': Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë': Naca' Xuzë', ate' Lë' náquië' Zxí'ina'.

<sup>6</sup> Lësca' caní, cate' Dios buzóë' Bi'í que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

<sup>7</sup> Ca nácaqaquië' gubáz lá'ayi queë', ranna: Lë' runë' ga nácaqaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaqaquië' ca guí'.

<sup>8</sup> Na'a, ca naca cazë' Zxí'inë', rnnë': Ga rö'u rinná bë'u, inná bë'tica'su', Dios. Tsahuí' naca ca rinná bë'u.

<sup>9</sup> Nadxí'ínu' le naca tsahuí', en calëga le ruá' dö'. Que lë ni na' Dios budödë' lu no'o yöl-la' unná bë', en benë' ga ruzí'itëru' Li' xibé yöl-la' unná bë' ca le tu'z'í' xibé luzó'o.

<sup>10</sup> Lësca' caní rnnë': Li', Xan, cate' gusí lo, benú' yödzölió, ate' len ná'asu' buzú' lúzxiba.

<sup>11</sup> Huadödi quéguequi, pero Li', tsaz idí'u. Yúgu'të itëbigaca ca ritëbi lari',

<sup>12</sup> en ca lari' utubu' léguequi, en utsó'o léguequi, pero Li', catu caz utsá' cuinu' en catu caz igulu'.

<sup>13</sup> Dios catu caz gudxë' tuë' gubáz lá'ayi queë' ca gudxë' Zxí'inë', gunnë': Gurö'ö cuita lë'a ibëla cate' gunra' ga ulu'zëchu zxíbigaca lo' nupa bití' ta'lé'e Li' dxi'a.

<sup>14</sup> Yúgu'të gubáz lá'ayi queë' Dios nácaqaquië' bö' huen dxin queë' Dios, ate' nasöl-lë'ë légaquië' para ilácalenë' nupa ni nulágaca.

## 2

*Biti' ral-la' ucá'anaru' cá'asö yöl-la' rusölä*

<sup>1</sup> Que lë ni na', ral-la' gü'i ládxi'röru' le chibiyöniru', para cabí gaca chopá ládxi'ru'.  
<sup>2</sup> Guca bē' naca idútē li didza' na', le bidxín dza ni'te lu ná'agaquiē' gubáz lá'ayi queē' Dios, ate' yúgu'tē nupa gula'dōdi bē' ca rna didza' na', en bití' gulún ca rna, Dios benē' léguequi xíguia' ca na' röjlöz le gulúngaca. <sup>3</sup> Lësca' caní bití' ca' uláru' rē'u lu xíguia' na' channō ucá'anaru' cá'asō yöl-la' rusölá ni, le benē' Lē cazē' Xanru' libán que zí'alō, ate' nupa bila'yōni Lē' bulu'lu'i rē'u naca idútē li. <sup>4</sup> Lësca' caní Dios caz benē' tsözxön légaquiē' ba nalí, tu' benē' le nácagaca bē', en le tun ga rubániru', en yugu' yöl-la' huáca zxön. Gudísie' ca' yugu' le runödzejé' Dios Bō' Lá'ayi quégaquiē' tsca gú'uni quézinē' Dios.

*Dios benē' ga böáquiē' Jesús idú ca nácaru' rē'u*

<sup>5</sup> Dios bití' budödē' yödžolió si' za' lu ná'agaquiē' gubáz lá'ayi que yehua' yubá queē', lë na' ru'iru' didza' que. <sup>6</sup> Na'a, ca naca lë ni, nazúaj lu guichi lá'ayi didza' bē' nu run ba nalí le rna:

Dios, rubánide'eda' tu' ru'i ládxi'u bönachi.

Rubánide'eda' tu' rácalenu' léguequi.

<sup>7</sup> Ia'látisō cá'asō ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxön, en yöl-la' run bal,

en budödu' yúgu'tē le benu' Li' lu nē'eguequi.

<sup>8</sup> Yúgu'tē budödu' lu nē'eguequi para ila'nná be'e le.

Nazúaj lu guichi lá'ayi lë na' rna: "Budödu' lu nē'eguequi yúgu'tē." Bití' bi bucá'anē' le cabí budödē' lu nē'eguequi, pero ga ridxintē na'a dza, bití' rilé'eru' yu'u lu nē'eguequi yúgu'tē. <sup>9</sup> Réquibe'eru' le guca queē' Jesús. Tu chí'isō, Dios benē' ga böáquiē' ia'látisō cuidí' ca yugu' gubáz lá'ayi que yehua' yubá queē'. Guljē' bönachi para gútiē', ate' gudí'i guzxáquē'ē Jesús lu yöl-la' guti uláz quégaca yúgu'tē bönachi, tu' buzá' ládxi'ē Dios queēru' caní. Tu' benē' Jesús caní, Dios benē' ga rata' queēru' yöl-la' zxön, en yöl-la' run bal.

<sup>10</sup> Dios benē' yúgu'tē le rilé'eru', en runē' ga nacuá'tica'sō. Dios benē' ca ral-la' gunē' cate' benē' ga naca bē' náquiē' Cristo idú tsahui' ni'a que le gudí'i guzxáquē'ē. Caní benē' Dios queē' Cristo, Nu bideli' yöl-la' rusölá para gaca ichē'ē bönachi zían yehua' yubá queē'.

<sup>11</sup> Cristo ruúnē' tsahui' bönachi para ilequi quez queē' Dios. Tuzē' náquiē' Xúzugequi nupa na' ruúnē' Cristo tsahui', en Xuz cazē'. Que lë ni na', bití' ca' rutuí'inē' Zxí'inē' Dios cate' rnnē' nácagaquiē' böchi' luzē'ē. <sup>12</sup> Ca naca lë ni nazúaj lu guichi lá'ayi le rna:

Usiyōnda' böchi' luzá'a ca nacu' Li', Dios.

Gatsaj láhui'lō bönachi tu'dubi quiu',

gul-la' yöl-la' ba quiu'.

<sup>13</sup> Lësca' caní rnnē':

Uzxōni ládxa'a-nē' Dios.

Ga yúbölō nazúaj le rnnē':

¡Buli'yútsōca' neda', en yugu' zxí'inē',

nupa na' Dios bennē' quia'!

<sup>14</sup> Que lë ni na', tu' néquiquequinē' bēla' en rön yugu' zxí'inē' na', lësca' caní Cristo ben cuinē' ca nácagaquiē'. Guljē' bēla' en rön. Caní guljē' para guca gútiē', en caní guca busunítiē' yöl-la' huáca unná bē' que tu' xihui', nu na' dē lu nē'e guti bönachi. <sup>15</sup> Caní benē' Cristo para guca busanē' yúgu'tē nupa gulaca ca bönni' nadó'ogaquiē' tsanni ni nacuá' nabángaca, tu' guladxi yöl-la' guti. <sup>16</sup> Naca bē' bití' benē' caní para gácalenē' yugu' gubáz lá'ayi que yehua' yubá queē' Dios, pero para gúcalenē' yugu' zxí'ini xi'sóē' Abraham.

<sup>17</sup> Que lë ni na', ben bayudxi böáquiē' Cristo idú ca nácagaquiē' böchi' luzē'ē na', para gáquiē' lahuē' Dios tu bixúz lo, tu bixúzi runē' ca rnnē', en ruhuéchi' ládxi'ē bönachi, enca' para gunē' le gun ga gata' lu nē'ē ugúē' dul-la' nabága'gaca bönachi. <sup>18</sup> Na'a, tu' gudí'i guzxáquē'ē Lē cazē' Cristo, ate' guzxí' bē' tu' xihui' Lē', que lë ni na' napē' yöl-la' huáca gácalenē' nupa ni, rizí' bē' tu' xihui' léguequi.

## 3

*Jesús nayëpisëtërë' ca Moisés*

<sup>1</sup> Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasöl-lë'ë Dios, enca' bixúz lo que le nazí' lu ná'aru'. <sup>2</sup> Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. <sup>3</sup> Nayëpisëtërë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. <sup>4</sup> Yúgu'të yu'u, zoa nu ben le, pero Dios náquië' Nu ben yúgu'të le rilé'eru'. <sup>5</sup> Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, <sup>6</sup> pero Cristo runë' ca rnna xtídzë'ë Dios, en náquië' Zxí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzëjalenru' lë na' runru' löza.

*Dë lataj ga ulu'zì' ládxi' gaca bönachi queë' Dios*

<sup>7</sup> Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyónili' didza' ru'ë Dios,

<sup>8</sup> bitì' gácali' zidi lu icja ládxi'do'oli'

ca na' gulaca nupa ni' gula'dá'baga' Dios cate' ni' gula'zì' bë' Lë' lu lataj cá'asö.

<sup>9</sup> Gula'zì' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

<sup>10</sup> Que lë ni na' guléda' bönachi dza ni', en gunniá':

“Ta'chíxítica'sinë' ca ta'zá' ládxi'gaquië'.

Bitì' té'ënnë' ila'nözinë' le rë'ënda' ilunë'.”

<sup>11</sup> Que lë ni na' guléda' légaquië', en bena' tsutsu xtídzä'a, gunniá':

“Bitì' ila'yázië' ga ulu'zì' ládxi'gaquië' tsözxön len neda'.”

<sup>12</sup> Gulí'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë'ë, en para cabí usanli'-në' Dios ban. <sup>13</sup> Na'a, buli'zëajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. <sup>14</sup> Yúgu'tëru' gunru' tsözxön Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.

<sup>15</sup> Caní ral-la' gunru' tsanni ni rnna:

Na'a, channö riyónili' chi'ë Dios,

bitì' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

<sup>16</sup> ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. <sup>17</sup> ¿Nupxi na' gulënë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. <sup>18</sup> ¿Nupxi ni' benë' tsutsu xtídzë'ë Dios, gunné' bitì' ila'yaza ga ulu'zì' ládxi'guequi tsözxön len Lë'? Gulaca nupa ni' bitì' gulún ca rnna xtídzë'ë Dios. <sup>19</sup> Na'a, réquibe'eru' bitì' guca ila'yázië' tu' cabí gula'yéajlë'ë Dios.

## 4

<sup>1</sup> Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzì' ládxi'ru', ral-la' gádxiru' para cabí unítiru' lataj tsú'uru' ni'. <sup>2</sup> Biyönru' rë'u didza' dxi'a ca na' bila'yönnë' légaquië', pero légaquië' bitì' bulu'zì'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le. <sup>3</sup> Rë'u ni réajlë'ëru' Dios, en tsú'uru' lataj queë' ga uzì' ládxi'ru'. Raca ca na' gunné' Dios: Que lë ni na' guléda' légaquië' en bena' tsutsu xtídzä'a, gunniá':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödölió ni, en chiruzí' ládxi'ë. <sup>4</sup> Nazúaj lu guichi lá'ayi ga ru'í didza' ca naca que dza igadxi, le rnna: “Buzí' ládxi'ë Dios dza igadxi yugu' lu dxin benë'.” <sup>5</sup> Ga yúbölö rnna: “Biti' tsú'ugaquië' ga ulu'zí' ládxi'lenë' neda'.” <sup>6</sup> Nupa ni' bila'yöni zí'aló didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni. <sup>7</sup> Que lë ni na' ca', Dios bulu'e tu dza yúbölö, gunné': “Na'a dza.” Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyönili' didza' ru'ë Dios,  
biti' gácali' zidi lu icja ládxi'do'oli'.

<sup>8</sup> La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'. <sup>9</sup> Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. <sup>10</sup> Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. <sup>11</sup> Que lë ni na', ral-la' güi' ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlë' Dios, en biti' gula'yu'ë ni'.

<sup>12</sup> Xtídzë'ë Dios naca ban caz, en napa caz yöl-la' huáca. Richúgurö ga rë' ca guíë tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' röxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'. <sup>13</sup> Biti' bi gaca ucáchi'ru' ga biti' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

### *Jesús náquië' bixúz lo, Nu nácatëro zxön*

<sup>14</sup> Zoa queëru' tu bixúz lo, nácatëre' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. <sup>15</sup> Zoa queëru' tu bixúz lo, Nu gaca huéchi' ladxí' rë'u ca nácgaca le raca queëru', tu' guzxi' bë' tu' xihui' Lë cazë' idútë ca na' rizi' bë' tu' xihui' na' rë'u, pero biti' bi dul-la' benë' Lë'. <sup>16</sup> Que lë ni na', idú ládxi'ru' ral-la' íbígá'ru' gala' ga rö'ë rinná bë'ë Dios, Bönni' ruzá' ladxë'ë queëru', en inábaru' lahuë' huéchi' ládxi'ë rë'u, en uzá' ládxi'ë queëru', para gácalenë' rë'u cate' bi raca queëru'.

## 5

<sup>1</sup> Dios ribö cazë' núti'tës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bëdxi tútigaquië'-ba' lu bucugu lá'ayi tu' nözi dul-la' nabága'gaquië'. <sup>2</sup> Bixúz lo na', tu' raca queë' lëbisö ca raca quégaca bönachi, gaca gáquië' zxön ladxí' len nupa nácgaca yugu' bönni' canöz, en nupa ta'chixi ta'nigui. <sup>3</sup> Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

<sup>4</sup> Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. <sup>5</sup> Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzóa' Li' na'a.

<sup>6</sup> Lësca' caní gudxë' Lë' le nazúaj ga yúbölö, gunné':

Li' nácatica'su' bixúz,

ca na' gúquië' Melquisedec bixúz.

<sup>7</sup> Cristo, cate' ni' zoa cazë' yödzölió ni, bulidzë' Dios, en gúta'yuë' lahuë'. Gurödxí'ë, en gurödxë' lahuë' Dios, Bönni' guca usölë' Lë' lu yöl-la' guti, ate' Dios biyönnë' Lë' tu' gúdxinë' Lë' idú láchxë'ë. <sup>8</sup> Sal-la' gúquië' Zxí'inë' Dios, bizédë' gunë' ca rna xtídzë'ë Dios tu' gulaca queë' yugu' le gudí'i guzxáque'ë. <sup>9</sup> Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rna xtídzë'ë. <sup>10</sup> Ní'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

*Zoa bönadxi queëru' huöaj láchxi'ru', en tá'baga'ru'-në' Cristo*

<sup>11</sup> Ca naca lë ni, zían le ral-la' güi'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'. <sup>12</sup> Chigudödi dza ral-la' gaca usédili' bönachi xtídzë'ë Dios, tu' chibiyönili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en calëga la' huagu tsutsu. <sup>13</sup> Yúgu'të bönni' naquíniguequinë' nu usedi légaquië' lë na' biti' naca böniga, nácagaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'. <sup>14</sup> La' huagu tsutsu tu'zì' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

## 6

<sup>1</sup> Que lë ni na', biti' ral-la' usédatica'siru' yugu' xibá buzédaru' cate' si' gusí lo riyöniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i láchxi'ru',

en ca bítirö gunru' le ruá' dö',

en ca ral-la' tséajlë'ëru'-në' Dios,

<sup>2</sup> en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

<sup>3</sup> Caní gunru' channö gunnë' Dios rë'u lataj.

<sup>4-6</sup> ¿Naru' huácatsö gunru' ga ulu'bí'i láchxi'gaca leyúbölö nupa tu'huöaj láchxi', en ta'dá'baga' Dios? Channö bidxín quéguequi bení' queë' Dios, en bulu'zì' xibé le runödzjé' Dios zoë' yehua' yubá, en gulaca tuz len Dios Bö' Lá'ayi, en channö bulu'zì' xibé didza' dxi'a queë' Dios en yöl-la' huáca que dza si' za', en channö ní'irö tu'huöaj láchxi', en ta'dá'baga' Dios, biti' ca' gaca nu gun ga ulu'bí'i láchxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahui' lógaca bönachi. <sup>7</sup> Nupa tun caní nácagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzaj le tu'zì' xibé nupa tá'ana yu na', raza láchxë'ë Dios le, <sup>8</sup> pero channö ruzóasö yu na' lubá yötsi', en bësígá', naca ditaj, en nabía dö', en naca para nu uzegui le.

*Le runru' löza le run ga nácaru' tsutsu*

<sup>9</sup> Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zì' xibé nupa nulágaca. <sup>10</sup> Dios náquië' tsahui', en biti' gal-la láchxë'ë dxin tsahui' benli', en yugu' le benli' tu' nadxí'ili' Lë'. Gúcalenli' nupa néquiguequi quez queë' Dios, en runli' xichínguequi. <sup>11</sup> Na'a, rë'ënitü' güi' láchxi'li' luzá'ali' tu ia'tuli', en gunli' caní ga idxinrö dza údxi, para gata' idú queëli' lë na' runli' löza. <sup>12</sup> Rë'ënitü' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön láchxi', para idéli'li' yugu' le guzxí' lu në'ë Dios gunnë' queëru'.

<sup>13</sup> Caní gaca, tu' benë' tsutsu Dios xtídzë'ë cate' guzxí' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë. <sup>14</sup> Caní gunnë' Dios: "Le nácate' guna' ga gaca dxi'a quiu', en guna' ga ila'yánda'abi' zxi'ini xi'sú'." <sup>15</sup> Gulözë' Abraham zxön láchxi', ate' bidéli'në' le guzxí' lu në'ë Dios gunnë' queë'.



<sup>16</sup> Cate' tu bönni' runë' tsutsu xtídzë'ë, ruzötjë' nu nácatërö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë. <sup>17</sup> Que lë ni na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' ulu'ínë' nupa ulu'zí' xibé le guzxi' lu në'ë unödzejë' quéguequi, nácada' löza, en tsaz naca le nuzóa lahuë' gunë'. <sup>18</sup> Le guzxi' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, biti' gaca si' yë'ë Dios. Caní benë' Dios para gácada' löza queëru' tu le huë' tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' sí'iru'. <sup>19</sup> Lë na' runru' löza ruzóatic'a'sö tsutsu icja ládxi'do'oru', en naca ca tu du guié' ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rö'ö yehua' yubá. <sup>20</sup> Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

## 7

### *Jesús náquië' bixúz lo ca gúquië' Melquisedec*

<sup>1</sup> Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisëtërë'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. <sup>2</sup> Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxië'." <sup>3</sup> Biti' zoa lu guichi le rnna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxí'inë' Dios tu' náquië' tsaz bixúz lo.

<sup>4</sup> Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la. <sup>5</sup> Lu xibá queë' Moisés, Dios rinná bé'enë' yugu' zxí'ini xi'sóë' Leví, nupa nácagaca bixúz, ila'zi'ë tu cö' tu' chi cö' que le ta'zí' bönachi Israel, sal-la' nácagaca di'a dza quégaquië', tu' nácagaquië' yúgu'të' zxí'ini xi'sóë' Abraham. <sup>6</sup> Melquisedec na' biti' náquië' di'a dza quégaquië', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, <sup>7</sup> ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídí'rö. <sup>8</sup> Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi nácagaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. <sup>9</sup> Na'a, huáca innaru' queë' Leví, en quégaca zxí'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guízxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquië'. <sup>10</sup> Caní naca, tu' huáca innaru' Abraham ni' nu'ë lë'ë Leví, en yugu' zxí'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

<sup>11</sup> Ta'zí' bönachi Israel xibá gunná bë'ë Moisés lu ná'agaca bixúz, nupa nácagaca zxí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. <sup>12</sup> Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'. <sup>13</sup> Xanru', Nu na' nazúaj lu guichi ca naca queë' yugu' lë ni, nababë' ia'turö cö' zxí'ini xi'sóë' Israel ca le nababë' Leví na', ate' que cö' zxí'ini xi'sóë' ga nababë' Xanru', cuntú nu guca bixúz lahuë' Dios. <sup>14</sup> Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

<sup>15</sup> Nácatërö bë' lë ni ni'a que le raca na'a. Ca na' gúquië' Melquisedec bixúz, chibulu'í lahuë' ia'turë' bixúz, Jesús. <sup>16</sup> Bönni' ni, biti' gúquië' bixúz tu' rinná bë' xibá ca ral-la' ilaca

di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi.  
<sup>17</sup> Nazúaj lu guichi lá'ayi le run ba nalí queë' le rnna:

Tsaz nacu' bixúz  
 ca na' gúquië' Melquisedec bixúz.

<sup>18</sup> Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun.  
<sup>19</sup> Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

<sup>20</sup> Cate' benë' Dios ga náquië' Jesús bixúz, benë' tsutsu xtídzë'ë. <sup>21</sup> Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídza'a neda', Xanu', gunnía':

“Biti' utsá'a ca guna'.

Tsaz nacu' bixúz  
 ca na' gúquië' Melquisedec bixúz.”

<sup>22</sup> Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. <sup>23</sup> Yugu' bixúz ni' guláquië' bönni' zían, tu' cabí guca ulu'gá'anë' yödzülió ni tu' gulátië', <sup>24</sup> pero tu' zóatica'së' Jesús, tsaz náquië' bixúz, en biti' gaca nu huöáza xilatjë' para gaca bixúz. <sup>25</sup> Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quëgaquië' lahuë' Dios.

<sup>26</sup> Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxön bönachi dul-la', pero nayépisëtëre' ca yúgu'të le nacua' ni' yehua' yubá. <sup>27</sup> Jesús ni, biti' náquië' ca yugu' bixúz lo yödzülió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichön cazë' tu' nözi dul-la' nabága'gaca yúgu'të bönachi. <sup>28</sup> Lu xibá queë' Moisés bönachi biti' nacagaca idú dxi'a nacagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

## 8

### *Jesús náquië' Bixúz Lo queëru'*

<sup>1</sup> Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. <sup>2</sup> Lë' runë' dxin ca Bixúz Lo lu lataj nácatëro lá'ayi, le naca yudo' le naca idütë, lë na' buchisë' Xanru', en calëga bönachi. <sup>3</sup> Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichöngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. <sup>4</sup> La'tu' zoë' luyú ni, biti' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. <sup>5</sup> Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': “Buyútsöca', ben yúgu'të idú ca naca lë na' bulu'ida' li' lu guí'a ni'.” <sup>6</sup> Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lë' zoa tu didza' rucá'ana tsahui' queëru' le nácatëro lesaca', en le ruí'i didza' que le nácatëro lesaca' guzxí' lu në'ë Dios gata' queëru'.

<sup>7</sup> La'tu' gudapa didza' na' rucá'ana tsahui' le guzóa zí'alö idütë yöl-la' huáca, biti' ben bayudxi soa didza' buropi ni rucá'ana tsahui'. <sup>8</sup> Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zágaca dza  
 cate' uzóa' tu didza' cubi ucá'ana tsahui',  
 le gúnlena' bönachi Israel, en bönachi Judá.

<sup>9</sup> Biti' gaca ca guca didza' rucá'ana tsahui' na',  
lë na' bénlena' xuz xtó'ogaquië',  
dza ni' gudéla'a ná'agaquië',  
en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',  
neda' bucá'ana' légaquië', rnnë' Xanru'.

<sup>10</sup> Que lë ni na', caní gaca didza' ucá'ana tsahui'  
gúnlena' bönachi Israel

tödi yugu' dza ni', rnnë' Xanru'.

Uchízia' icja ládxi'do'gaquië' xibá quia'  
en uzúaja' le lu icja ládxi'do'gaquië'.

Ní'irö gaca' Dios quégaquië'  
ate' légaquië' iláquië' bönachi quia'.

<sup>11</sup> Biti' gun bayudxi nu usedi luzé'e, inná:

Bénbë'ë Xanru', tu' ilúnbë'ë yúgu'të' neda',  
ga isí lo nu naca cá'asö, ga idxintë nu naca lo.

<sup>12</sup> Huéchi' ládxa'a légaquië',

en uniti lahua' le cabí naca tsahui' gulunë',  
en bíti'rö tsöjneda' dul-la' nabága'gaquië'.

<sup>13</sup> Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na'  
guzóa zí'alö, ate' chizóa idúa lë na' nagula, en chinaca gulasi.

## 9

### *Lataj lá'ayi dë luyú, en lataj lá'ayi dë yehua' yubá*

<sup>1</sup> Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. <sup>2</sup> Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios. <sup>3</sup> Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, <sup>4</sup> ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, lë na' bubö' ni'a në'e, enca' yugu' guiöj blaga na', nazúaj láhuilö quequi didza' rucá'ana tsahui'. <sup>5-6</sup> Lahui guí'ina na' gula'cuá' chopa gubáz lá'ayi néquiquequini oro, légaca querubín que lataj ga buluí'i lahuë' Dios, ate' bulu'zxóa xiliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na'a idütë ca nácagaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. <sup>7</sup> Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. <sup>8</sup> Caní ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö. <sup>9</sup> Yugu' lë ni naca tu le ruluí'isö que le raca na'a dza. Yugu' le gula'gu'ë lahuë' Dios, en rön quégacaba' böa' bédxi na' gulútië'-ba' lahuë' Dios bití' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní. <sup>10</sup> Yugu' lë ni buluí'i lahui quégacasö le gulé'aj gulahuë', en ca ral-la' ila'guíbi cúngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsë'ë yúgu'të.

<sup>11</sup> Na'a, chibuduluí'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácáro lo, en nácáro idú, en bití' néquini lu ni'a lu náagaca bönachi, en bití' naca que luyú ni. <sup>12</sup> Na'a, chiguyázië'

Cristo lu lataj lá'ayi na', calëga len xichõngacaba' bédxido', en xichõngacaba' chivo, pero len rön queë cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. <sup>13</sup> Le nácatë xichõngacaba' bédxi, en chivo, en dö queëba' bédxido' bulu'zégui'ë-ba', yugu' le gula'gu'ë lu ícjagaca nupa nabága'gaca dul-la', guca ulu'gúa dul-la' na' nabága'gaca bõnachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. <sup>14</sup> Na'a, gúntërö ca' xichõnë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichõnë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

<sup>15</sup> Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bõnachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégaquië' bõnni' bulidzë', le zóatica'sö. <sup>16</sup> Cate' ratië' nu bõnni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bõnni' na' para gaca ilunë' ca rnna didza' na' nucá'anë'. <sup>17</sup> Cate' chinátië' bõnni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. <sup>18</sup> Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti. <sup>19</sup> Cate' ni' gudíxjöi'inë' Moisés bõnachi ni' ca nácgaca yúgu'të xibá queë' Dios, gudélë'ë rön quégacaba' bédxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bõnachi. <sup>20</sup> Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." <sup>21</sup> Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. <sup>22</sup> Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

### *Xichõnë' Jesucristo rugúa dul-la'*

<sup>23</sup> Caní naca, ben bayudxi guzóa le bun dxi'a yudo' luyú ni le naca tu le rulu'ísö ca naca lë na' röö yehua' yubá, pero ca naca lë na' röö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichõngacaba' böa' bédxido' caní. <sup>24</sup> Biti' guyázië' Cristo lataj lá'ayi néquini lu ni'a lu náagaca bõnachi, lë na' naca tu le rulu'ísö ca naca le naca idú, pero guyázië' yehua' yubá caz para gaca ulu'í lahuë' na'a lahuë' Dios uláz queëru'. <sup>25</sup> Bixúz lo zoë' luyú ni razië' lataj nácatërö lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zían luzuí para udödi cuinë' lahuë' Dios. <sup>26</sup> La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzülió ga ridxintë na'a dza, pero na'a cate' naca dza údxi, tsaz bulu'í lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'. <sup>27</sup> Ca na' run bayudxi ilátigaca bõnachi tu luzuísö ate' tõi ni' uchi'a usöröë' Dios léguequi, <sup>28</sup> lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bõnachi zían. Na'a, ulu'í lahuë' le buropi luzuí, calëga para ugúë' dul-la', pero para usölë' tsaz nupa ta'bõza Lë'.

## 10

<sup>1</sup> Xibá na' gunná bë'ë Moisés guca tu le rulu'ísö ca zeaj naca le tsahui' si' zá'gaca, en biti' guca idú ca nácgaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bédxido', lë na' gula'gú'utica'së' lahuë' Dios yugu' iz. <sup>2</sup> La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bõnni' guca caní quégaquië' nabága'gaquië' dul-la' channö chibulu'huöáquië' idú tsahui'. <sup>3</sup> Rön ni' gula'gu'ë lahuë'

Dios yugu' iz busá' ládxi'gaquië' nabága'gaquië' dul-la'. <sup>4</sup> Caní guca, tu' cabí guca xichõngacaba' bëdxi, en chivo ugúa dul-la'.

<sup>5</sup> Que lë ni na', cate' bidxinë' Cristo yödzülió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bëdxi lo' pero benu' ga naca' bönáchisö.

<sup>6</sup> Biti' raza ládxi'u nu uzegui'-ba' böa' bëdxi lo', o nu cu'u xichõngacaba' lo' tu' nözi dul-la'.

<sup>7</sup> Ní'irö gunniá': Ni zoa' para guna' ca ré'ënu' Li', Dios. Naca ca na' nazúaj lu guichi lá'ayi ca gaca quia'.

<sup>8</sup> Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bëdxi lahuë'." Didza' ni ruluí'i rë'u bíti'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. <sup>9</sup> Gudödi ni' rnna: "Ni zoa' para guna' ca ré'ënu' Li', Dios." Didza' ni ruluí'i rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxf'ini cazë' lahuë'. <sup>10</sup> Na'a, Dios ruúnë' rë'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gütië' tu luzuísö.

<sup>11</sup> Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichõngacaba' böa' bëdxi, yugu' le cabí gaca ulu'gúa dul-la'. <sup>12</sup> Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. <sup>13</sup> Ribözë' ni' dza gunë' Dios ga ulu'zechu zxíbigaca lahuë' nupa bití' ta'lé'e Lë' dxi'a. <sup>14</sup> Ni'a que tuz le gulu'ë lahuë' Dios, tsaz benë' ga nácgaca idú tsahui' nupa na' bunë' dxi'a, en bubéajë' léguequi quez queë' Dios. <sup>15</sup> Lësca caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

<sup>16</sup> Caní gaca didza' ucá'ana tsahui' gúnlena' légaquië' tödi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

<sup>17</sup> Gudödi na' gunné':

Bíti'rö tsöjneda' dul-la' nabága'gaquië' en dö' biá'gaquië'.

<sup>18</sup> Que lë ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

### *Huáca ibíga'ru' gala' ga zoë' Dios*

<sup>19</sup> Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. <sup>20</sup> Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljé' Cristo ni'a queëru' tu' budödë' idütë le naca cazë'. <sup>21</sup> Jesús náquië' queëru' tu bixúz nayëpisëtërë', en rinná bé'enë' bönachi queë' Dios. <sup>22</sup> Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idütë le naca cázaru' len le naca tu nisa nácatërö idú. <sup>23</sup> Ral-la' gácaru' tsutsu, en cabí gaca chopá ládxi'ru' ca naca le runru' löza que le nazi' lu ná'aru', le guzxi' lu në'ë Dios gunné' queëru', ate' Lë' runë' ca rnnë'. <sup>24</sup> Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. <sup>25</sup> Bal-la' bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilé'ëru' chizóa idxín dza huödë' Xanru'.

<sup>26</sup> Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. <sup>27</sup> Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. <sup>28</sup> Cate' nu bönni' buzóë' xibá queë' Moisés tsölá'alö, gulútië' lë'

channö chopa tsonna bönachi gulún ba nalí que le benë', ate' cuntu nu buéchi' ladxi' bönni' na'. <sup>29</sup> Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxi' queëru' le riquíniru'. <sup>30</sup> Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'."

<sup>31</sup> Ral-la' gadxi idzöbi nu ral-la' si' xíguia' lu në'ë Dios ban.

<sup>32</sup> Guli'tsöjné yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. <sup>33</sup> Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxön ca' nupa gula'gu'i gula'zaca' caní. <sup>34</sup> Caní guca, tu' buéchi' ladxí'li' nupa nadzúngaca lidxi guíë, en lu yöl-la' rudzeja queëli' biá' gulenli' nupa gula'béaj lídxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá. <sup>35</sup> Na'a, biti' ucá'anali' lë na' runli' löza, le nachë' tu le zxön ubi'ë Dios queëli'. <sup>36</sup> Run bayudxi cözali' zxön ladxi', para cate' chibenli' ca rë'ënë' Dios, sí'ili' le guzxí' lu në'ë gunné' queëli', ca na' nazúaj lu guichi lá'ayi, ca gunné' Dios le rnna:

<sup>37</sup> Ia'tú chí'ido'osö idxinë' Bönni' na' ral-la' guidé'.

Biti' ca' tsenë'.

<sup>38</sup> Ní'irö nu naca tsahui' lahua' neda',  
ulá nu na' tu' réajlë' neda'.

Channö huöaj ladxi', en tá'baga' neda',  
bíti'rö tsaz ladxá'a nu na'.

<sup>39</sup> Na'a, rë'u ni, biti' nácaru' ca nupa tu'huöaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

## 11

### *Ca naca yöl-la' réajlë' queëru' Dios*

<sup>1</sup> Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'. <sup>2</sup> Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

<sup>3</sup> Tu' réajlë'ëru' Dios, réquibe'ëru' benë' Lë' yödzölió ni len didza' bë'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

<sup>4</sup> Tu' guyéajlë'ë Abel Dios, gulu'ë rön queëba' böa' bédxido' lahuë' Dios, tu le nácatërö lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

<sup>5</sup> Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bíti'rö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ladxë'ë Dios." <sup>6</sup> Na'a, channö cabí réajlë'ëru' Dios, biti' gaca gunru' le raza ladxë'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruí'ladxi' Lë'.

<sup>7</sup> Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

<sup>8</sup> Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'. <sup>9</sup> Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxí' lu në'ë unödzjë' queë'. Guzóë' lu yu'u

guídido', en lëbisö ca gulunë' Isaac, en Jacob, zxí'ini xi'sóë' Abraham, nupa ni' guzxí' lu në'ë Dios unödzjë' quëguequi lë na' guzxí' lu në'ë unödzjë' queë' Abraham. <sup>10</sup> Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë cazë'.

<sup>11</sup> Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxí' lu në'ë queënu. <sup>12</sup> Que lë ni na', sal-la' chibigúladë'ë Abraham, gula'cuá'abi' ziantëröbi' zxí'ini xi'sóë'. Gula'cuá'abi' tsca rö'öba' böljaj lúxiba, en tsca rö'ö yuzxi tu ra' nisa zxön, cunttu nu gaca ulaba légacabi'.

<sup>13</sup> Yúgu'të bönni' ni gulatië', en biti' gula'zi'ë lë na' guzxí' lu në'ë Dios unödzjë' quëgaquië', pero gula'yéajlë'ë Dios, ate' zi'tu' zítu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödzölió ni. <sup>14</sup> Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. <sup>15</sup> La'tu' gula'zá' ládxi'gaquië' caní que luyú ga ni' bila'rúajë', le nácaté ulu'dzölinë' nacxi huöajgaquië' ni', <sup>16</sup> pero gula'zá' ládxi'gaquië' que luyú na' nácarö dxi'a, le rö' yehua' yubá. Que lë ni na' biti' rutuí'në' Dios cate' ta'nnë' náquië' Dios quëgaquië', tu' chinupë'ë tu yödzö quëgaquië'.

<sup>17</sup> Tu' guyéajlë'ë Abraham Dios, cate' guzxí' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxí' lu në'ë Dios unödzjë' queë'. <sup>18</sup> Caní benë' sal-la' gudxë' Dios lë', gunné': "Lu ná'abi' bi'i Isaac quiu' ichísagaca'-bi' zxí'ini xi'sú'." <sup>19</sup> Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë'-bi' lu yöl-la' guti sal-la' biti' guti cázabi'.

<sup>20</sup> Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esau' ca zeaj naca le ulu'zí'ibi' xibé dza si' za'. <sup>21</sup> Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' zxí'inë' José, ate' guyéaj ládxi'ë Dios, ni' nayéchuë' lu xiyaga queë'. <sup>22</sup> Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' zxí'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

<sup>23</sup> Tu' gula'yéajlë'ë Dios, cate' gúljabi' bí'ido' Moisés, xuz xiná'abi' bulu'cáché'ë-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'. <sup>24</sup> Tu' guyéajlë'ëbi' Moisés Dios, cate' guzxönbi', bítirö bë'ëbi' lataj nu uzóa lëbi' bi'i bönni' queënu nigula zxí'inë' Faraón, bönni' na' rinná bé'enë' bönachi Egipto. <sup>25</sup> Caní benbi' tu' gúquibi' nácarö dxi'a nu usaca' zi' lëbi' tsözxön len bönachi queë' Dios ca uzí'ibi' xibé tu chí'sö yugu' le tu'z'í' xibé nupa tun dul-la'. <sup>26</sup> Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahu' quëgaca bönachi Egipto, tu' guzá' ládxi'bi' ca naca le ubi'ë Dios queëbi'. <sup>27</sup> Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulënë' ca run nu rilé'e Dios, Nu na' biti' gaca ilé'ëru'.

<sup>28</sup> Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxigaquië', para cabí guti zxí'inigaquië' nu na' ral-la' usuniti yugu' bi'i bönni' zí'alö quëgaca bönachi Egipto. <sup>29</sup> Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láchui'lö nísado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yëpinë' nisa, en gulátigaquië' lu Nisa Xiná na'.

<sup>30</sup> Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chí'i yödzö na'. <sup>31</sup> Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti'

gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

<sup>32</sup> ¿Bíxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

<sup>33</sup> Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në'  
le guzxí' lu në'ë Dios unödzjé' quégaquië'.

Bulu'sayjé' ruá'agacaba' bëdxi guixi'.

<sup>34</sup> Bulu'lé' yugu' lu guí' zxön.

Bila'rúajë' lu ná'agaca nupa gulé'ëni iluti légaquië' len guié tuchi'.

Dios bunë' légaquië' tsutsu cate' ni' gula'cuidí'në'.

Bulu'huóáquië' ca' tsutsu lu gudil-la.

Bulu'láguie' bönni' guizxi yu röjáquië' gudil-la quégaquië' bönni' zi'tu'.

<sup>35</sup> Yugu' nigula dza ni' bulu'zí'inu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulé'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. <sup>36</sup> Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guié, nága'gaquië' du guié. <sup>37</sup> Bulu'ladxi' bönachi bal-lë' guiöj, en gula'chözë' ia'bal-lë'. Gula'zí' bë'ë légaquië', en gulútigaca zíangaquië' len guié tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö. <sup>38</sup> Caní guláquië' bönni' na', ate' biti' gulaca bönachi yödzölió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú. <sup>39</sup> Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxí' lu në'ë Dios unödzjé' quégaquië'. <sup>40</sup> Caní guca, tu' nupë'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxön.

## 12

### *Ral-la' uyuru'-në' Cristo*

<sup>1</sup> Que lë ni na', lësca' rë'u, tu' nacué' idú gásibi'ilö ga ni zóaru' ziantëro nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazöngaca rë'u, ate' lu yöl-la' riböza zxön ladxi' queëru', ral-la' gunru' xichinë' Dios, le naca tsca xíti'ru' lu huitaj le zoa loru'. <sup>2</sup> Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí'i guzxáquë'ë lë'e yaga cruz, en biá' gulënë' yöl-la' rutuí'i que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

<sup>3</sup> Buli'yüë' Jesús, ca na' gudí'i guzxáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopa ládxi'li'. <sup>4</sup> Ga ridxintë na'a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. <sup>5</sup> Nadxi ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' zxí'ini cazë', ca na' nazúaj lu guichi le rnnë':

Zxí'ina', biti' uzú' tsölá'alö le gunë' Xanru',

cate' usëdi uzéajni'inë' li',

en biti' huóaj ládxi'u cate' uní'inë' li'.

<sup>6</sup> Xanru' runí'inë' nu nadxí'inë',

en rusëdi ruzéajni'inë' yúgu'të nupa ta'zí' lu në'e ilaca zxfí'ini cazë'.

<sup>7</sup> Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' zxí'ini cazë'. Biti' ca' zóabi' tubi' bí'ido' biti' uní'inë'-bi' xúzibi'. <sup>8</sup> Na'a, channö cabí runí'inë'



Dios libí'ili' ca na' runë' quégaca yúgu'të zxí'ini cazë', ní'irö nácali' ca yugu' bi'i lan, en biti' nácali' idú zxí'inë' Dios. <sup>9</sup> Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnroru' ca rnaa xtídzë'ë Xúziru' zoë' yehua' yubá para sóaru' ibanru' tsaz. <sup>10</sup> Yugu' xuz xiná'aru', tu chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'. <sup>11</sup> Le nácatë biti' nalá' lahui na'a le uzí'iru' xibé que le runí'inë' rë'u, pero run ga ruhuí'iniru'. Channö gü'iru' lataj usëdi rë'u le runí'inë' rë'u, gun ga cözaru' dxí'ado', en ga gácaru' tsahui'.

### *Soa bönadxi queëru' channö cabí uzë nágaru' chi'ë Dios*

<sup>12</sup> Que lë ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxi'li' para gunli' le naca dxi'a. <sup>13</sup> Guli'sóa nöza tsahui', para cabí gunli' ga ucá'ana nu ricuidi' ládxi' nöza na', pero guli'gún ga huöáca ládxi' nu na'.

<sup>14</sup> Guli'gü' ládxi'li' cözalenli' dxi'a yúgu'të bönachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'. <sup>15</sup> Guli'gún chi'i cuinli' para cabí soa nu ucá'ana le ruzá' ládxi'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. <sup>16</sup> Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxí'inë' Isáac. Esaú na' bëti'ë le ral-la' gata' lu në'ë tu' náquië' bi'i bönni' huaca queë' xuzë' para guzxi'ë tu le do' gudahuë'. <sup>17</sup> Chinöz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxi'ë xuzë' lë', pero biti' guta' lataj ubí'i ládxi'ë Esaú na' sal-la' gudilaj ládxi'ë le len yöl-la' ribödxi queë'.

<sup>18</sup> Ca raca queëli' biti' naca ca guca quégaquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böáca chul-la lahui' dza tu' gurö'ö böaj gasaj, en guyécjada' bö'. <sup>19</sup> Bila'yönnë' ta'bödxi lúzuba' böa', enca' chi'ë Dios Nu bë' didza'. Cate' bila'yönnë' lë ni, guláta'yuë' lahuë' Moisés para cabirö gü'ilenë' Dios légaquië' didza'. <sup>20</sup> Caní gulunë' tu' cabí guca guá' iléngaquië' lë na' gunná bé'enë' Dios légaquië', gunné': "Channö tsöjlibiba' tuba' böa' guíxi'do'os guí'a ni, ral-la' ulu'ládxi'ë-ba' guiöj, o ulu'dödë'-ba' yaga tuchi'." <sup>21</sup> Lë na' bila'lé'enë' ben gádxida' légaquië', ate' Moisés gunné': "Radxi ridzöbida', en rixízida'a."

<sup>22</sup> Na'a, libí'ili' ral-la' gádxitë'röli' tu' ribíga'li' gala' tu lu guí'a nazí'i le Sión, en ga zoa yödzö queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. <sup>23</sup> Ribíga'li' gala' ga ni' nudúbigaca zxí'ini cazë' Dios lahuë' Lë', nupa na' nazúajgaca laguequi lu guichi ni' yehua' yubá, enca' ga zoë' Dios Nu ruchi'a rusöröë' yúgu'të bönachi, en ga na' nacuá' yugu' bö' gulaca cazë' yugu' bönni' tsahui', tu' bunë' Dios légaquië' tsahui'. <sup>24</sup> Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguië' Dios queëbi' bi'i böché'ë.

<sup>25</sup> Que lë ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatë'rö löza biti' ca' uláru' rë'u channö tá'baga'ru' Nu na' rulidza rë'u, zoë' yehua' yubá. <sup>26</sup> Dza ni' guzxizi luyú ni tu' biyön chi'ë Dios, pero na'a chiguzxí' lu në'ë, gunné': "Ia'tú luzuísö, en calégasö luyú uxízia', pero lúzxi'ba ca' uxízia'." <sup>27</sup> Cate' ni' rnnë': "Ia'tú luzuísö", lë ni ruluí'i rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá. <sup>28</sup> Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guiëru'-në' Dios: "Xclenu'", ate' lu yöl-la' ba'a ládxi', en lu yöl-la' radxi Lë' tseaj ládxi'ru' Lë' ca na' raza ládxi'ë Lë', <sup>29</sup> tu' náquië' Dios queëru' ca tu guí' le rusuniti le cabí naca idú tsahui'.

## 13

*Le ral-la' gunru' le raza ládxë'ë Dios*

<sup>1</sup> Ral-la' idxí'itica'sili' luzá'ali' tuli' ia'tuli'. <sup>2</sup> Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' guléqui'e nácagaquië' gubáz lá'ayi.

<sup>3</sup> Guli'tsöjné nupa nadzúngaca lidxi guië tsca nunli' légaquië' tsözxón, nadzunli' ca' lidxi guië. Guli'güí' ládxili' yugu' bönni' ta'bía ládxigaca bönachi légaquië', tsca libí'ili' riguí'i rizáca'lenli' légaquië' tsözxón.

<sup>4</sup> Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

<sup>5</sup> Biti' bi uhuí'di'li', pero guli'tsaza ládxili' tsca le dë queëli' na'a, tu' chigunnë' Dios: "Catu caz uca'ana' li', en biti' ca' ubéaj ládxa'a li'." <sup>6</sup> Caní naca, huáca innaru' idú ládxiru' lë na' rnna:

Xanru' náquië' Nu rácalen neda'.

Biti' ca' gádxida' bi gun bönachi quia'.

<sup>7</sup> Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

<sup>8</sup> Lëbisö ca náquië' Jesucristo, néaje, en na'a, en cá'tica'sö. <sup>9</sup> Biti' güí'ili' lataj yugu' xibá izá'a, en xibá nadzá' iché'gaca libí'ili' nöza yúbölö. Naca dxi'a gunli' tsutsu icja ládxido'oli' ca naca le ruzá' ládxë'ë Dios queëli', en calëga ca nácagaca xibá que le rë'aj ráguru', lë na' biti' ulu'zí' xibé nupa tuí'i ládxigaca léguequi.

<sup>10</sup> Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. <sup>11</sup> Bixúz lo que yu'u lá'ayi na' gulu'ë xichóngacaba' böa' bëdxi lu lataj idú lá'ayi tu' nözi dul-la', pero bulu'zéguië' bëla' cá'asö quégacaba' ga naca ní'ilö ra' yödzo. <sup>12</sup> Lëscá' caní gudí'i guzáquë'ë Jesús ní'ilö ra' yödzo para bunë' bönachi dxi'a len rön queë cazë'. <sup>13</sup> Tsöjtá'aru'-në' Jesús, sal-la' ila'béaj bönachi rë'u lu yödzo, en sí'iru' tsözxón len Lë' lë na' bulu'lidza ditaj bönachi Lë'. <sup>14</sup> Biti' zoa tu yödzo queëru' yödzo'lió ni le soa tsaz, pero riguí'jaru' lë na' si' za'. <sup>15</sup> Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu'" ni'a que le náquië' Lë'. <sup>16</sup> Biti' gal-la ládxili' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxë'ë Lë'.

<sup>17</sup> Guli'gún ca rnna xtídzagaquië' böchi'ru' tu'yúë' libí'ili', en guli'güí' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uzí'ili' xibé dxin na' ilunë' lu yöl-la' risëbi ladxi' quégaquië'.

<sup>18</sup> Buli'lidzë' Dios, inábili'-në' gácalenë' netu', tu' runtu' löza soa dxi icja ládxido'otu', para cabí uxösa netu', ate' ruí'i ládxitu' gúntica'situ' le naca dxi'a. <sup>19</sup> Le nácáro lo, ráta'yua' lolí' inábili'-në' Dios ugu'ë neda' tu nöza para udxina' ga zóali' bayöntë.

*Dios uzá' ládxë'ë queëru' le gácalen rë'u*

<sup>20</sup> Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, <sup>21</sup> rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'ënë' Lë', ate' gunë' queëli' le raza ládxë'ë Lë', tu' néquili' queë' Jesucristo. ¡Queë' Cristo gácatica'sö yöl-la' ba! ¡Ca' gaca!

<sup>22</sup> Ráta'yua' loli', böchi' luzá'ado', gü'i ládxi'li' didza' ni ruzéajni'i libí'ili', tu' naca láti'do'os lë ni ruzúaja' queéli'. <sup>23</sup> Ral-la' inözili' chiburúajbi' bi'i Timoteo, bi'i böchi'ru'do', lidxi guié, ate' channö idxíntëbi' ga zoa' ni, gunbi' neda' tsözxön uduyútu' libí'ili'.

<sup>24</sup> Buli'gapa Dios böchi'ru' tu'yúé' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlë' Cristo nacua' luyú Italia.

<sup>25</sup> ¡Dios uzá' ládxi'ë queéli' yúgu'tëli'! ¡Ca' gaca!

## LE BUZÚAJË' LU GUICH SANTIAGO

### *Santiago rugapë' Dios bönni' judío ta'dë'ë Cristo*

<sup>1</sup> Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

### *Yöl-la' réajni'i le runnë' Dios queëru'*

<sup>2</sup> Böchi' luzá'ado', cate' gaca bi gaca queëli' le si' bë' libí'ili', ral-la' udzëjali' idú ládxi'li' <sup>3</sup> tu' nöz quézili', cate' bi raca queëli' le rizi' bë' libí'ili' ca réajlë'ëli' Cristo, lë ni rusedi libí'ili' cözali' zxön ladxi'. <sup>4</sup> Guli'güi' ládxi'li' gaca idú yöl-la' zxön ladxi' queëli', para údxi gácali' bönni' ta'yéajni'inë', en biti' bi yadzaj queëli' ca nácgaca lë ni.

<sup>5</sup> Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzjë' yödxi yana' quégaca yúgu'të bönachi, en biti' ca' réqui quézinë' gunnë' queëru'. <sup>6</sup> Na'a, nu bi rinabi-në' Dios, run bayudxi tséajlë' Lë', en cabí gaca chopa ladxi'. Nu raca chopa ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. <sup>7</sup> Nu naca caní biti' ral-la' gun löza si' bi unödzjë' Xanru'. <sup>8</sup> Bönni' na' reaj bö' ládxi'da'ahuë' biti' ridzölinë' nácalö gunë'.

<sup>9</sup> Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzëjanë' tu' chinadéli'në' tu lataj lo lahuë' Dios. <sup>10</sup> Bönni' böchi'ru' na' rilé'enë' yöl-la' tsahui' queë' ral-la' udzëjanë' cate' runë' Dios ga bíti'rö ruzxöni ládxi'ë lë na' dë queë'. Nu ruzxöni ladxi' yöl-la' tsahui' que, gaca que nu na' ca raca que xiyija guíxi'do', la' ridödité que. <sup>11</sup> Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxité guixi' na', en riguinnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

### *Le ta'zí' bë' rë'u*

<sup>12</sup> Bica' ba bönni' böchi'ru' na' ruá' rilenë' le rizi' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzjë' quégaca nupa nadxi'iguequi Lë'. <sup>13</sup> Cate' bi raca queëru' le run ga guë'eniru' gunru' le ruá' dö', biti' ral-la' innaru': "Dios rizi' bë'ë rë'u len le naca xihui'." Dios biti' rizi' bë'ë nu bönni' len le cabí naca dxi'a. <sup>14</sup> Na'a, channö nu bi raca que le rizi' bë' le len le cabí naca dxi'a, naca tu' rizë ladxi' le ruá' dö', ate' lë ni ben ga gú'uni gun le ruá' dö'. <sup>15</sup> Lë na' rizë ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xigua' gátiru'.

<sup>16</sup> Böchi' luzá'ado', biti' si' ye'e la' cuínsili'. <sup>17</sup> Yúgu'të le naca dxi'a, en yúgu'të le naca idú le ruzi'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsë'ë ca runë', rúnnatica'së' queëru' le naca tsahui'. <sup>18</sup> Ca rë'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' gurö cazë' Dios.

### *Le reaj ládxi'ru'-në' Dios le naca li ladxi'*

<sup>19</sup> Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yönili', pero biti' ral-la' innëtëzili', en biti' ilëtëzili'. <sup>20</sup> Nu na' riletëz biti' run le naca tsahui' lahuë' Dios. <sup>21</sup> Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

<sup>22</sup> Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. <sup>23</sup> Nu riyónisö didza' ni, en bití' run ca rnna, nu ni naca ca tu bönni' ruyúë' lahuë' tu lu guié dxili, <sup>24</sup> tu' ruyú cuinë', en söhuöjë', ate' la' ral-latë láchxë'ë ca rinë'ë. <sup>25</sup> Na'a, nu bönni' bití' ral-la láchxë'ë le riyönnë', pero ruí'i láchxë'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

<sup>26</sup> Channö nu bönni' ladaj libí'ili' réquinë' naca dxi'a ca reaj láchxë'ë Dios, pero bití' rapa chi'ë lúdxë'ë para cabí innësë' ca', bönni' ni rizí' yé'enë' la' cuinsë', ate' bití' raza láchxë'ë Dios ca reaj láchxë'ë bönni' na' Lë'. <sup>27</sup> Le reaj láchxi'ru'-në' Dios, le naca idú, en le naca dxi'a, naca gácalenru' yugu' bi'i uzëbido', enca' yugu' nigula nagá'ananu túzinu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

## 2

### *Tuz ca ral-la' gunru' bönachi bal*

<sup>1</sup> Böchi' luzá'ado', channö réajlë'ëli' Xanru' Jesucristo, Nu nácatërö lo, bití' ral-la' utsá'ali' ca gunli' bal tu tu bönachi. <sup>2</sup> Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, <sup>3</sup> channö gunli' bal bönni' na' nácuë' lari' nazáca'da', en guiëli'-në': "Gurö'ölen rë'u ga ni naca dxi'a", pero guiëli' bönni' yéchi'do' na': "Ná'asö guzui'", o guiëli'-në': "Gurö'i lu yu ni." <sup>4</sup> Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzë'e, bití' naca dxi'a ca rizá' láchxi'li'.

<sup>5</sup> Böchi' luzá'ado', buli'zë nágali' lë ni. Dios gurö cazë' yugu' bönni', sal-la' téquiguequi bönachi yödzölió ni nácaquië' cá'asö, para ila'délinë' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lë na' guzxi' lu në'ë Dios unödzjé' quégaca nupa ta'dxi'i Lë'. <sup>6</sup> Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlalui'. <sup>7</sup> Yugu' bönni' na' dë yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

<sup>8</sup> Runli' dxi'a channö runli' idú ca rinná bë' xibá lo, le nazúaj lu guichi, en rnna caní: "Ral-la' idxi'ínu' luzó'o ca nadxi'i cuinu'." <sup>9</sup> Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítsjali' xibá na'. <sup>10</sup> Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'. <sup>11</sup> Lë' cazë' Dios gunné': "Bití' gunu' dul-la' le riguitsaj xibá que yöl-la' nutsaga na'", en gunné' ca': "Bití' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idútë xibá queë' Dios. <sup>12</sup> Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'. <sup>13</sup> Nupa cabí tu'huechi' láchxi'gaca luzë'eguequi, uchi'a usöröë' Dios léguequi, ate' cuntu nu huéchi' ladxi' léguequi, pero nupa na' tu'huechi' láchxi'gaca luzë'eguequi ulu'rúaj dxi'a cate' uchi'a usöröë' Dios léguequi.

### *Le ral-la' gunru' tu' réajlë'ëru' Cristo*

<sup>14</sup> Böchi' luzá'ado', bití' bi uzi'ë xibë tu bönni' channö innasë': "Réajlë'a Cristo", pero bití' runë' le naca tsahui'. Bití' gaca ulë' bönni' na' channö innasë' réajlë'ë Cristo. <sup>15</sup> Channö nacué böchi' luzá'aru' ta'yéajlë'ë Cristo, en bití' dë le ilácuë', en calëga le ilahuë', <sup>16</sup> ate' channö tu nu dzaga libí'ili' guiësö légaquië': "Böaj lídxili' tsáhui'do'. Chibölaj budzé'eli'", pero channö cabí unödzaj quégaquië' lë na' ta'yádzjanë', bití' ca' gúcalen légaquië'. <sup>17</sup> Lësca' caní raca que nu bönni' rnasë' réajlë'ë Cristo. Channö cabí runë' le naca bë' naca idú ca réajlë'ë Lë', bití' naca lesaca' yöl-la' réajlë' queë'.

<sup>18</sup> Nadxi ca' guië' tu bönni' luzë'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ída' li' réajlë'a Cristo ni'a que le naca tsahui' runa'." <sup>19</sup> Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. <sup>20</sup> Li', bönni' bití' bi nözínë'. Ral-la' inözi quézinu' channö zoa nu rnnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. <sup>21</sup> Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. <sup>22</sup> Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. <sup>23</sup> Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë: "Luzë'ë Dios."

<sup>24</sup> Na'a, rilé'e quézili' naca bë' rurúajë' tu bönni' dxi'a ni'a que le runë', en calégasö tu' réajlë'ë Dios. <sup>25</sup> Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélé'ë yöjhuöjgaquië' nöza yúbölö. <sup>26</sup> Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

### 3

#### *Yugu' le rnna lúdxiru'*

<sup>1</sup> Böchi' luzá'ado', bití' guntëz zían cuinli' bönni' tu'sédinë' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi. <sup>2</sup> Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. <sup>3</sup> Cate' rigú'uru' guíë ruá'agacaba' böa' para gunru' ga ilunba' ca rë'ëni'ru', gaca inná bé'ëru' légacaba' lu idútë le tunba'. <sup>4</sup> Buli'yú ca' ca raca quéguequi barco. Sal-la' zxöntërö naca tu barco, en récjada' bö' ruzéaj le, cuídido'os naca në'e xiyágui barco na' le ruzecaj rudxi'i barco para tseaj gátitës ga guë'ënnë' bönni' rusë'ë le. <sup>5</sup> Lësca' caní naca lúdxiru'. Sal-la' cuídido'os naca, zióntërö le rnna lúdxiru' na'. Buli'yútsöca' ca run guí. Sal-la' guí' do'os ribíbiru', tu guí'a sibi huayégui. <sup>6</sup> Lësca' lúdxiru' na' naca ca tu guí. Yúgu'të le ruá' dö' raca yödzölió ni rnna lúdxiru', en tu' dzaga lúdxiru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxiru' ribequi guí, le ruzegui' rë'u ca naca yúgu'të le runru', ate' tu' rnna caní lúdxiru' na', naca que tsca chinaguéla'të guí le nabequi' tu' xihui'. <sup>7</sup> Yúgu'tëba' böa' guixi' ta'daba' luyú, en yugu' böa' zoa xiligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönachi luyú ni légacaba', <sup>8</sup> pero cuntú nu bönni' gaca inná bé'enë' lúdxë'ë, tu' rnna lúdxiru' le ruá' dö', en bití' gaca nu uzaga' xinözi. Zióntërö le rnna lúdxiru' le naca ca tu le nachë' yöl-la' guti. <sup>9</sup> Len la' lúdxiru' ná'asö rulidza tsáhuru'-në' Dios Xuz, en rulidza dítjaru' ca' yugu' bönni', ate' benë' Dios légaquië' ca naca cazë' Lë'. <sup>10</sup> Caní naca, len la' ruá'asiru' na' rulidza tsáhuru' bönachi, en rulidza dítjaru' bönachi. Böchi' luzá'ado', bití' ral-la' gaca caní. <sup>11</sup> Bití' ca' ta'lén nisa siziá', en nisa zöna' la' tuzi ga ta'lén. <sup>12</sup> Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lësca' caní, nitú ga rilén nisa bití' gaca ila'lén nisa zöna', en nisa siziá'.

#### *Yöl-la' réajni'i le naca idú*

<sup>13</sup> Channö zoë' tu bönni' ladjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'. <sup>14</sup> Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, bití' ral-la' gun ba zxon cuinli' ca naca yöl-la' réajni'i queëli'. Nu run caní rizí' yë', en ridá'bagá' le naca idútë li. <sup>15</sup> Yöl-la'

réajni'i caní biti' naca le runödzejë' Dios, pero que yödžölió ni naca, enca' quégaca bönachi yödžölió ni, en que tu' xihui'. <sup>16</sup> Yugu' bönni' tu'zxé'enë' luzá'agaquië', en tē'ënnë' ila'gú'u bönachi légaquië' yöl-la' ba, lësca' ta'dil-la dídžë'ë, en tunë' yúgu'të le ruá' dö'. <sup>17</sup> Yugu' bönni' nápaqaquië' yöl-la' réajni'i na' runödzejë' Dios:

Tunë' le naca idú tsahui', en ta'bözë' dxí'ado'.

Nácagaquië' zxön ladxi', en nöxaj ladxi'.

Tu'huechi' ládxi'gaquië' bönachi,

en tunë' le naca dxí'a.

Tuz ca tu'chi'a tu'söröë' luzá'agaquië',

en biti' ta'béaj bë'ë luzá'agaquië'.

<sup>18</sup> Nupa tu'í ládxi'gaca ila'bequi dxi le raca, ta'böza dxí'ado', para gaca ca' dxi'a idútë le zeaj naca caz.

## 4

### *Nupa tun zxön le nacua' yödžölió*

<sup>1</sup> ¿Bizx que na' ridíl-lali', en raca didza' bizxaj queëli'? Raca caní queëli' tu' rizë ládxi'li' zían le rizë ládxi'li' tu tuli', en que lë ni na' ridíl-lalenli' luzá'ali'. <sup>2</sup> Zían le ruhuídi'li', en tu' cabí rizí'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribö'öli', en ridíl-lali'. Biti' rata' queëli' le rë'ënilí', tu' cabí rinábali'-në' Dios lë na'. <sup>3</sup> Sal-la' zoa bi rinábali', biti' bi rizí'ili', tu' cabí naca dxí'a ca rinábali', tu' rë'ënilí' lë na' rinábali' para ugunli' le dxin ca raza ládxi'sili'. <sup>4</sup> Libí'ili', bönachi nusanli'-në' Dios, ¿naru' cabí nözili' channö runli' zxön le nacua' yödžölió ni, chinuhuóacali' ca nu biti' rilé'e Dios dxí'a? Núti'tës nu rë'ëni gun zxön le nacua' yödžölió ni, nuhuóaca ca nu biti' rilé'e Dios dxí'a. <sup>5</sup> Biti' rnnasö ca' le nazúaj lu guichi lá'ayi le rnna: "Dios risöl-lë'ë Dios Bö' Lá'ayi queëru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'." <sup>6</sup> Na'a, zxöntërö le ruzá' ládxi'ë'ë Dios queëru', tu' nazúaj lu guichi lá'ayi le rnna: "Dios ruzáguë'ë xinözguequi nupa tun ba zxön cuínguequi, pero ruzá' ládxi'ë'ë quégaca nupa nácagaca nöxaj ladxi'." <sup>7</sup> Que lë ni na', guli'sóa nöxaj ladxi' lahuë' Dios. Guli'nná be'e tu' xihui', ate' uzxunnaj ga zóali'. <sup>8</sup> Guli'gü' ládxi'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reaj bö' ládxi'do'oli', en chopa le nadxí'ili', guli'gún dxí'a icja ládxi'do'oli'. <sup>9</sup> Guli'sëbi ládxi'li', en buli'huí'ini, en guli'cödxí. Na'a ruzxídxili, pero ral-la' cödxili'. Rudzëjali', pero ral-la' huí'inili'. <sup>10</sup> Guli'gaca nöxaj ladxi' lahuë' Xanru', ate' Lë' gunë' ga tsëpisëli'.

### *Biti' ral-la' ichugu bë'ëru' le run luzá'aru'*

<sup>11</sup> Böchi' luzá'ado', biti' innëli' que luzá'ali' tuli' ia'tuli'. Nu bönni' rinnë' que böchi' luzë'ë, en rilaga yudxë' le runë', bönni' ni rinnë' que xibá queë' Dios, en ruchí'a rusöröë' le rinná bë' xibá na'. Na'a, channö ruchí'a rusöröu' le rinná bë' xibá na', run cuinu' nu ruchí'a rusöröë' le, en biti' runu' ca rinná bë' xibá na'. <sup>12</sup> Na'a, tuzë' náquië' Dios, Nu ben xibá na', en náquië' ca' Nu ruchí'a rusöröë' le runru'. Lë cazë' gaca usölë' bönachi o usunítie' bönachi na'. Na'a, ¿núzxitë run cuinu', rilaga yudxu' luzó'o?

### *Biti' gaca gunru' löza le gaca cuxö huidzaj*

<sup>13</sup> Na'a, buli'zë nágali', núlöli' rnnali': "Cuxö huidzaj tséajtu' yödžö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queëtu'." <sup>14</sup> Biti' nözili' bizxi gaca cuxö huidzaj. ¿Nacxi caz naca queëru', tsca zóaru' yödžölió ni? Nácaru' ca böchila le nalá' tu chí'ido'osö, en la' rinítitë. <sup>15</sup> Que lë ni na', caní ral-la' innali': "Channö guë'ënnë' Xanru', sóaru' ibanru', en tu ia'tú le gunru'." <sup>16</sup> Na'a, libí'ili', lu yöl-la' run ba zxön queëli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'. <sup>17</sup> Channö nöziru' le naca dxí'a le ral-la' gunru', en biti' gunru' lë na', runru' dul-la'.

## 5

*Santiago rusë'ë ládxi'gaquië' bönni' dë yöl-la' tsahui' quégaquië'*

<sup>1</sup> Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'. <sup>2</sup> Chinaca ditaj yöl-la' tsahui' queéli', ate' chinutögacaba' le ráculi' bóljado' que. <sup>3</sup> Chinaca que dumí oro, en dumí plata queéli' ca naca que guíë nazõn yõni que, ate' yõni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yöl-la' tsahui' dza ni zóaru' chirõjsétëgaca. <sup>4</sup> ¡Buli'yútsöca'! Yugu' bönni' huen dxin gula'lapë' yöla queéli' chita'naba yúdxinë' lázjagaquië', tu' cabí riguízjanili' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bé'enë' ni'a në'ë guizxi yu. <sup>5</sup> Benli' ga buné'eli', en güi' gudágutica'sili' le rnnasö queéli' lu yödzölió ni. Buxõn cuinli', pero chizóa idxín dza údxi queéli'. Gaca queéli' ca raca queëba' bëdxi renni', chibú'u dza gútiru'-ba'. <sup>6</sup> Richúguli' quégaquië' bönni' tsahui', en rútili' légaquië', ate' légaquië' bití' ta'dá'baguë'ë libí'ili' cate' rútili' légaquië'.

*Cözaru' zxon ladxí', en ulídzaru'-në' Dios*

<sup>7</sup> Na'a, böchi' luzá'ado', guli'cöza zxon ladxí' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxon ladxí' ribözë' guiõjsiu', en guiõj cusu lin, ate' tödi ni' ulapë', en utubë' yöz zían. <sup>8</sup> Lësca' caní, libí'ili' na' réajlë'ëli' Cristo, guli'cöza zxon ladxí', en buli'tipa ládxi'li', tu' chizá' gala' dza huödë' Xanru'. <sup>9</sup> Böchi' luzá'ado', bití' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca'! ¡Chirudzaga lo udxinë' Xanru', ate' uchi'a usöröë' le runli'! <sup>10</sup> Böchi' luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácagaquië' ca tu le rulu'i' rë'u ca ral-la' quí'i sáca'ru', en cözaru' zxon ladxí'. <sup>11</sup> Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí' gula'zaca'. Chibiyõnili' ca benë' Job. Gulözë' zxon ladxí' sal-la' gudí'i guzácá'dë'ë, ate' nõzili' ca' ca benë' Xanru' queë' ga búdxitë. Ruhuéchi'da' ládxië'ë Xanru' rë'u, en ruí'i ládxië'ë rë'u.

<sup>12</sup> Böchi' luzá'ado', le nácaterö lo naca lë ni rea' libí'ili': ¡Bití' uzõtjali' Nu zoa yehua' yubá, en bití' uzõtjali' le nacué' luyú ni, en bití' uzõtjali' bití'tës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Bití'" ral-la' innásili' "Bití'." Caní ral-la' gunli', para cabí ibága'li' xíguia' lahuë' Dios.

<sup>13</sup> Channö riguí' rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'. <sup>14</sup> Channö re'e nu dzaga libí'ili', ral-la' ulidza bönni' gula tapa chi'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. <sup>15</sup> Cate' ulu'lidzë' Dios, en ta'yéajlë'ë gunë' Cristo ga huóáquië' bönni' huë' na', ní'irö gunë' Xanru' ga huóása uzöë', en channö benë' dul-la' bönni' huë' na', Xanru' uniti lahuë' lë'. <sup>16</sup> Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxië'ë, nácada' lesaca'. <sup>17</sup> Elías, bönni' ni' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiõj, idú tsonna iz yu' xopa beo' bití' gulaj guiõj luyú ni. <sup>18</sup> Gudödi ni' bulidzë' Dios leyúbölö, ate' böálaj guiõj, ate' bunödzej le gulazë' yugu' bönni' dza ni'.

<sup>19</sup> Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxië'ë bönni' na' richixi riníguinë', <sup>20</sup> nu na' gun ga ubí'i ládxië'ë bönni' dul-la' na' gudë' ga yúbölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!



## DÍDZA'DO' ZÍ'ALÖ BUZÚAJĚ' PEDRO

### *Pedro rugapë' Dios nupa ta'dá' Cristo*

<sup>1</sup> Neda', Pedro, naca' gubáz nasöl-lë'ë Jesucristo. Ruzúaja' queëli' lu guichi ni, libí'ili' násilasili' zì'tu' gapa dë lãdzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. <sup>2</sup> Gurõ cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bõ' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichõnë' Cristo. Rinábida'-në' Dios uzá' lãdxë'ë queëli', en gunë' ga soa dxi icja lãdxi'do'oli'.

### *Le rúntica'siru' löza*

<sup>3</sup> ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxõn queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza, <sup>4</sup> en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödzejë' quégaca bõnachi queë', biti' initi, en biti' itëbi, en biti' igula. <sup>5</sup> Tu' réajlë'ëli' Lë', lu yöl-la' huáca zxõn queë', Dios gun chi'ë libí'ili' cate' idxinrõ dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

<sup>6</sup> Que lë ni na' rudzëjadel'eli', sal-la' na'a ral-la' quí'i sáca'li' tu chí'ido' tu' taca zían le ta'zì' bë' libí'ili'. <sup>7</sup> Tu' ruá' rilenli' yugu' lë na' ta'zì' bë' libí'ili', naca bë' naca idú ca réajlë'ëli' Cristo. Lësca' caní rizi' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queëli' Cristo, le nácarõ lesaca' ca oro, gaca queëli' yöl-la' zxõn, en yöl-la' run bal dza ni' ulu'í' lahuë' Jesucristo.

<sup>8</sup> Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rilé'eli'-në' na'a, ate' rudzëjali'. Yöl-la' rudzeja zxõn queëli' le cabí gaca quíxjõ'õru' tsca naca, naca idútë li. <sup>9</sup> Caní naca, tu' ridéli'li' yöl-la' rusölá que bõ' naca cázali', le rata' queëli' tu' réajlë'ëli'-në' Cristo.

<sup>10</sup> Dza ni'te yugu' bõnni' gulu'ë didza' uláz queë' Dios bulu'sëdë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' lãdxë'ë Dios queëru'. <sup>11</sup> Bõ' Lá'ayi dzáguië' Cristo buzéajni'inë' zí'atëlõ bõnni' na' gulu'ë didza' uláz queë' Dios, en buluí'inë' légaquië' ca ral-la' qui'í sáquë'ë Cristo, enca' ca gaca queë' yöl-la' zxõn tõi na'. Que lë ni na' gulu'í' lãdxi'gaquië' ila'nõzinë' bátaxi gaca lë ni, en nuzxi na' gaca que lë na' buluí'inë' Bõ' dzáguië' Cristo légaquië'. <sup>12</sup> Dios buluí'inë' bõnni' na' gulu'ë didza' uláz queë' biti' naca tu le ila'lé'enë' légaquië', pero rë'u ni rilé'eru' lë na' gulu'ë didza' que, ate' libí'ili' riyõnili' na'a ca naca que. Yugu' bõnni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bõ' Lá'ayi légaquië', Nu na' risöl-lë'ë Dios zoë' yehua' yubá queëru', ate' të'ennë' gubáz lá'ayi queë' Dios ila'nõzinë' ca naca lë na' gulu'ë didza' que dza ni'te.

### *Dios rulidzë' rë'u para gácaru' lá'ayi*

<sup>13</sup> Que lë ni na', guli'sóa ban ladxi', en guli'cözatica'sõ bá'ado'. Idú lãdxi'li' buli'zxõni lãdxi'li' lë na' uzá' lãdxë'ë queëli' Dios dza ni' ulu'í' lahuë' Jesucristo. <sup>14</sup> Guli'gún ca rnna xtídzë'ë Dios, en biti' gü'ili' lataj yugu' le rizë lãdxi'li' ila'chë' libí'ili' ga yúbölõ, ca na' benli' dza ni' biti' núnbë'ënili'-në' Dios. <sup>15</sup> Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulidzë' libí'ili' para guéquili' queë'. <sup>16</sup> Lësca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

<sup>17</sup> Rëli'-në': "Xuztu'" cate' rulídzali'-në' Dios, ate' Lë', lëbisõ ca ruchí'a rusõrõë' yúgu'të bõnachi tsca naca le núngaca tu tu bõnachi na'. Que lë ni na' ral-la' gádxili' Lë' tsanni ni zóali' yõdzölió ni, le cabí naca idú lãdzali'. <sup>18</sup> Dios busölë' libí'ili' lu lë na' gúcali' dza ni' cate' benli' ca nácgaca le cá'asõ bulu'dödë' xuz xtó'oli' loli'. Nöz quézili' böá'uë' libí'ili', calëga

len tu le initi ca naca oro, en plata, <sup>19</sup> pero len xichönë' Jesucristo le nácatërö lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. <sup>20</sup> Dios gurö cazë' Cristo zí'atëlö ca benë' yödzülió ni, ate' dza ni zóaru' na'a benë' ga bulu'i lahuë' para uzi'ili' xibë'. <sup>21</sup> Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'li' Lë'.

<sup>22</sup> Na'a, chinún cuinli' dxi'a tu' runli' ca rnna le naca idütë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxi'ili' luzá'ali' tuli' ia'tuli'. <sup>23</sup> Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö. <sup>24</sup> Caní naca, tu' nazúaj lu guichi lá'ayi le rnna:

Yúgu'të bönachi nácagaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

<sup>25</sup> pero xtídzë'ë Dios zóatica'sö.

Didza' ni bidxín queëli' lu didza' dxi'a.

## 2

<sup>1</sup> Que lë ni na', guli'cá'ana yúgu'të le ruá' dö'. Bítirö si' yë'ëli', en biti' ubéaj dxi'a cuinli' lógaca bönachi. Bítirö uzxé'eli', en biti' innëli' que luzá'ali'. <sup>2</sup> Ral-la' së ládxi'li' le naca queë' Dios Bö' Lá'ayi para gálali' ca na' tunbi' bi'i huë'ënido', ta'zë ládxi'bi' nidxi'. Caní ral-la' gunli' ga idxinrö dza uláli', <sup>3</sup> channö réquibe'eli' náquië' Xanru' dxi'i ladxi'.

### *Cristo náquië' ca tu guiöj naca ban*

<sup>4</sup> Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö. <sup>5</sup> Lësca' caní, libí'ili' nácali' ca yugu' guiöj nabángaca. Guli'güí' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queëli' lahuë' Dios, lë na' raza ládxi'ë Dios. <sup>6</sup> Que lë ni na' nazúaj ca' lu guichi lá'ayi le rnna:

Rigu'a lu zö'ö yödzo Sión tu guiöj lo squin zö'ö,

le gurö caza' neda', en naca lesaca'.

Nu réajlë' Lë', biti' ichixi inigui.

<sup>7</sup> Naca guiöj ni queëli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guiöj na' bulu'zóë' bönni' tu'cu'ë zö'ö tsölá'alö,

tu' guléquinë' naca cá'asö,

guiöj ni chinaca guiöj lo squin zö'ö.

<sup>8</sup> Lësca' caní nazúaj lu guichi lá'ayi le rnna:

Guiöj ni gun ga tsöjchégu'gaca bönachi,

en gun ga tsöjtsö'ögaca.

Le nácatë yöjchégu'gaquië' bönni' biti' ta'yéajlë'ë Cristo, tu' gula'chíxinë' cate' bulu'zóë' xtídzë'ë Dios tsölá'alö. Dios bucu'ë légaquië' para ilunë' caní.

### *Nupa néquiguequi quez queë' Dios*

<sup>9</sup> Libí'ili' nácali' bönachi gurö cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzo nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxon benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení idú queë'.

<sup>10</sup> Zí'atëlö biti' gúcali' bönachi queë' Dios,

pero na'a chinácali' bönachi queë'.

Zí'atëlö cuntu nu buéchi' ladxi' libí'ili',

pero na'a Dios caz ruhuéchi' ládxe'ë libí'ili'.

*Zóaru' nabanru' para gunru' ca rë'enë' Dios*

<sup>11</sup> Böchi' luzá'ado', nácali' ca bönachi zi'tu', en ridásili' yödzölió ni. Que lë ni na', ráta'yua' loli', biti' güf'ili' lataj ila'nná be'e le rizësö ládxi'li' libí'ili', yugu' le ta'díl-lalen bö' naca cázali'. <sup>12</sup> Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

<sup>13</sup> Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nu-cuá'agaca bönachi légaquië', sal-la' náquië' bönni' rinná bé'enë' idútë yödzölió, tu' náquië' bönni' lo unná bë', <sup>14</sup> o channö náquië' bönni' rinná bé'enë' tu yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. <sup>15</sup> Caní rë'enë' Dios gunli' para ila'bö' dxië' yugu' bönni' biti' bi nözguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

<sup>16</sup> Guli'gaca ca yugu' bönni' nazángaqië', pero biti' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogaqië' queë' Dios.

<sup>17</sup> Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzölió.

*Le gudí'i guzxáquë'ë Cristo ruzéajni'i rë'u ca ral-la' gunru'*

<sup>18</sup> Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tu'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'.

<sup>19</sup> Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca rë'enë' Dios, urúajli' tsahui' lahuë' Dios. <sup>20</sup> Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' riböza zxön ladxi' queëli' guá' ilenli' lë na' gaca queëli'? Channö ribözali' zxön ladxi', en ruá' rilenli' le riguí' rizáca'li', ate' benli' le naca dxi'a, ní'irö urúajli' dxi'a lahuë' Dios. <sup>21</sup> Dios bulidzë' libí'ili' para quí'i sáca'li' caní, tu' gudí'i guzxáquë'ë Lë' cazë' Cristo uláz queëli', en buzóë' queëli' tu le ruluí'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'.

<sup>22</sup> Cristo biti' bi dul-la' benë', en catu caz guzxí' yë'ë.

<sup>23</sup> Cate' bulu'dídza' yúdxinë' Lë',  
biti' butsagui yúdxinë' légaquië'.

Cate' bulu'saca' zi'ë Lë',

biti' buzenë' légaquië' le bach,

pero budödi cuinë' lu në'ë Dios,

Nu na' ruchi'a rusöröë' le runru' ca sa'yéaj.

<sup>24</sup> Lë' cazë' Cristo guzxí'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huóácaru' rë'u dxi'a. <sup>25</sup> Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chí'ë bö' naca cázali'. Náquië' queëli' ca tu' bönni' uyú bö'cu' zxila'.

### 3

*Ca ral-la' ilún nupa nutsaga ná'gaca*

<sup>1-2</sup> Lësca' caní, libí'ili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ru'ilenli' légaquië' ca naca

queë' Cristo. <sup>3</sup> Yöl-la' lachi queëli' biti' naca le zoa lähuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'. <sup>4</sup> Yöl-la' lachi queëli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. <sup>5</sup> Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. <sup>6</sup> Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

<sup>7</sup> Lësca' caní, libí'ili', bönni', ral-la' gü'i ládxi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la queëli', pero lësca' tu' nadéli'gacanu yöl-la' na'bán na' runnë' Dios queëru', lébisö ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-në' Dios.

### *Huaguí'i huazáca'ru' sal-la' gunru' le naca dxi'a*

<sup>8</sup> Ga ruúdxitë, guli'gaca tuz tuli' len ia'tuli' yúgu'tëli', en guli'gü' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. <sup>9</sup> Biti' ubí'ili', cabí guá'ali' dö' que nu ruá' dö' queëli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba. <sup>10</sup> Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxí'ado',  
ral-la' ucá'anë' didza' xihui', en cabirö si' yë'ë.

<sup>11</sup> Ral-la' ucá'anë' le ruá' dö', en gunë' le naca dxi'a.

Ral-la' gü'i ládxi'ë cözë' zxön ladxi', en gúntica'së' caní,

<sup>12</sup> Xanru' rapa chi'ë yugu' bönni' tsahui'  
en ruzë' náguië' le tu'lidzë' Lë',  
pero ruzáguë'ë xinözguequi nupa tua' dö'.

<sup>13</sup> ¿Nuzxi caz guá' dö' queëli' channö ruí'i ládxi'li' gúntica'sili' le naca tsahui'? <sup>14</sup> Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' <sup>15</sup> pero buli'zxöni ládxi'li'-në' Cristo, en gü'ili' Lë' lataj inná bé'enë' lu icja ládxi'do'oli'. Guli'sóa sina' quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxi' queëli', en lu yöl-la' run bal nupa na'. <sup>16</sup> Guli'gúntica'sö le naca dxi'a lahuë' Dios, en channö nacua' nupa ta'nnë xihui' que le naca tsahui' runli' tu' réajlë'ëli' Cristo, ní'irö ulu'tuí' tu' nözi le ta'nnë queëli'. <sup>17</sup> Channö quí'i sáca'li', dxí'arö gaca channö naca tu' runli' le naca dxi'a, en calëga tu' ruá'ali' dö', channö Dios ré'ënë' quí'i sáca'li' caní.

<sup>18</sup> Lë cazë' Cristo gudí'i guzxáquë'ë, en gútië' uláz queëru' para bugüë' dul-la' nabága'ru'. Lë' náquië' dxi'a, pero gútië' ni'a queëru', yugu' bönni' dul-la'. Caní benë' para bunë' ré'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. <sup>19</sup> Lu bö' naca cazë' guyijë' yöjenë' libán lógaca bö' nadzúngaca. <sup>20</sup> Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxön ladxi' queë', en biti' busiúdxë' légaquië', tsanni ni' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. <sup>21</sup> Nisa ni' naca tu le ruluí'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' lähuisö, pero ruluí'i ruí'i ládxi'ru' gaca dxi'a icja ládxi'do'oru' lahuë' Dios. <sup>22</sup> Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

## 4

*Ral-la' ugunru' dxin yöl-la' huáca queë' Dios para gunru' xichinë' Cristo*

<sup>1</sup> Que lë ni na', ca na' gudí'i guzxáqueë' Cristo lu le naca cazë', lësca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'. <sup>2</sup> Na'a isí lo, ral-la' gúntica'sili' ca rë'ënë' Dios, en calëga ca rizësö ládxi'li' lu yöl-la' bönachi queéli'. <sup>3</sup> Tsca'ti' gaz le chibenli' chibenli'. Bítirö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzë ládxi'li' le ruá' dö'. Guzúdxili'. Gudödi bë' güí'i gudáguli', en guyéaj ládxi'li' budó' guiöj budó' yaga, le rigútinë' Dios. <sup>4</sup> Na'a, tu'bánnë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. <sup>5</sup> Légaquië' run bayudxi ulu'luí' cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. <sup>6</sup> Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

<sup>7</sup> Chizóa idxín dza údxi que yúgu'të le dë. Que lë ni na', guli'gaca ba'a ladxí', en buli'subán ládxi'li' para gaca ulídzali'-në' Dios. <sup>8</sup> Tu' runtë bayudxi, guli'dxí'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queéli'. <sup>9</sup> Guli'güí' lataj ila'cuá' böchi' luzá'ali' lídxili', en biti' innëli' quégaquië'. <sup>10</sup> Ral-la' ugunli' dxí'ado' dxin yugu' le buzá' ládxi'ë' Dios queéli', en gácalenli' luzá'ali' tuli' ia'tuli'. <sup>11</sup> Nu bönni' runë' ba nali', ral-la' gunë' ba nali' que xtídzë'ë' Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë'! ¡Ca' gaca!

*Le ila'guí'i ila'zaca' bönachi ta'yéajlë' Cristo*

<sup>12</sup> Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbë'gaca bönachi. <sup>13</sup> Guli'dzëjade'e tu' dë lataj queéli' gunli'-në' tsözxön Cristo lu le riguí'i rizáqueë' Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxön queë'. <sup>14</sup> Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzölió ni tu'dzaga yudxi Lë', pero libí'ili' runli'-në' bal. <sup>15</sup> Channö riguí'i rizáqueë' nu bönni' dzáguië' libí'ili', ral-la' gaca caní tu' dë'ë' Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë' ga yúbölö. <sup>16</sup> Na'a, channö núlöli' riguí'i rizáca'li' tu' dá'ali' Cristo, biti' ral-la' utuí'ili', pero guli'cu'ë' Dios yöl-la' ba tu' nazí' lali' bönachi queë' Cristo.

<sup>17</sup> Chibidxín dza isí lahuë' Dios uchi'a usöröë' bönachi rö queë'. Channö zí'alö uchi'a usöröë' rë'u, ¿nácxitëro gaca quégaca nupa biti' túngaca ca rnna didza' dxi'a queë' Dios? <sup>18</sup> Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? <sup>19</sup> Caní naca, yugu' bönni' ni ta'guí'i ta'zaqueë' tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

## 5

*Pedro ruzéajni'inë' nupa ta'yéajlë' Cristo*

<sup>1</sup> Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzxáqueë' Cristo, ate' guna' ca' tsözxön libí'ili', uzí'iru' xibé yöl-la' zxön na' ilá'lahui'. <sup>2</sup> Guli'gaca ca bönni' tu'yüë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca rë'ënë' Dios, en calëga tu' run bayudxi queéli', o tu' rizë ládxi'li' dumí. Guli'gún xichinli' tu'rë'ënisili', <sup>3</sup> en calëga tu' rë'ënili' inná bé'esili' nupa na' nagu'ë lu ná'ali'. Guli'güí' ládxi'li'

gácali' tu le rulu'i ca ral-la' ilaca nupa na' run chí'ili'. <sup>4</sup> Caní naca, cate' ulu'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

<sup>5</sup> Lësca' caní, bi'i cuidi', guli'gún ca ta'nné' yugu' bönni' gula. Yúgu'téli' ral-la' gunli' bal luzá'ali', tuli' ia'tuli', lu yöl-la' nōxaj ladxi' queéli', tu' nazúaj lu guichi lá'ayi le rnna: Dios ruzáguë'ë xinōzguequi nupa tun ba zxön cuínguequi pero rácalenë' nupa nácagaca nōxaj ladxi'.

<sup>6</sup> Guli'sóa nōxaj ladxi' lu në'ë Dios, ate' Lë' uchisë' libí'ili' cate' izá'a dza. <sup>7</sup> Guli'cú'u yúgu'të le run ga ruúbi ruguí'ili' lu në'ë Dios, tu' ruí'í ládxe'ë libí'ili'.

<sup>8</sup> Guli'gaca ba'a ladxi', en buli'subán ládxi'li', tu' zoa tu' xihui', nu biti' rilé'e libí'ili' dxi'a, ridá idú gásibi'ilö, en naca ca tuba' bēdxi guixi' ribōdxi'aba', riguiljba' nu gáguba'.

<sup>9</sup> Guli'gaca tsutsu ca réajlë'ëli' Cristo, en guli'zága' xinōza tu' xihui', tu' nōzili' ta'guí' ta'záquë'ë böchi' luzá'ali' idútë yōdzölió ni ca na' riguí' rizáca'li' libí'ili'. <sup>10</sup> Ní'irō cate' chigudí' guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá ládxe'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo.

<sup>11</sup> ¡Gácatíca'sö yöl-la' ba, en yöl-la' unná bē' queë' Lë'! ¡Ca' gaca!

### *Pedro ruzenë' didza' nupa ta'dá' Cristo*

<sup>12</sup> Dídza'do' ni ruzúaja' queéli' lu guichi lu në'ë Silvano. Réquida' náquië' böchi'ru' idú ladxi'. Rë'ënda' utipa' ládxi'li', en runa' ba nalí loli', le nácatë lë ni naca le ruzá ládxe'ë queëru' Dios. ¡Guli'gaca tsutsu tu' ruzí'ili' xibé lë ni!

<sup>13</sup> Yugu' bōnachi queë' Cristo nacúa' Babilonia tu'gapa Dios libí'ili'. Dios gurō cazë' léguequi ca na' gurōë' libí'ili'. Lësca' bi'i Marcos rugápabi' Dios libí'ili'. Nácabi' ca zxí'ini caza'. <sup>14</sup> Guli'gapa Dios luzá'ali' tuli' ia'tuli', en lu yöl-la' nadxí'i queéli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'téli' na' néquili' queë' Jesucristo. ¡Ca' gaca!

## DÍDZA 'DO' BUROPI BUZÚAJĚ' PEDRO

### *Pedro rugapě' Dios nupa ta'dá' Cristo*

<sup>1</sup> Neda', Simón Pedro, naca' huen dxin queë' Jesucristo, en gubáz nasöl-lë'ë Lë'. Rugapa' Dios libí'ili', réajlë'ëli'-në' Jesús. Lëbisö ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusöla' rë'u, tsahui'. <sup>2</sup> Rinábida'-në' Dios gunë' ga gata' queëli' idútë le ruzá' ládxi'ë queëru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

### *Le nácgaca nupa ta'yéajlë' Cristo*

<sup>3</sup> Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. <sup>4</sup> Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dö' raca yödžolió ni tu' ta'zë ládxi'gaca bönachi le cabí naca tsahui'. Nuláru' para gácaru' ca náquië' Lë' cazë' Dios. <sup>5</sup> Que lë ni na':

Channö réajlë'ëli' Cristo,

guli'güí' ládxi'li' gácali' dxi'i ladxi'.

Channö chinácali' dxi'i ladxi',

guli'güí' ládxi'li' gata' ca' queëli' yöl-la' rácada'.

<sup>6</sup> Channö nápalí' yöl-la' rácada',

guli'güí' ládxi'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribözali' zxön ladxi',

guli'sóa ba'a ladxi'.

<sup>7</sup> Channö zóali' ba'a ladxi',

guli'dxí'i luzá'ali'.

Channö nadxí'ili' luzá'ali',

guli'dxí'i ca' yúgu'të bönachi.

<sup>8</sup> Channö caní runli', en zeaj rácarö idú ca runli' caní, lë ni gun ga biti' gaca nítisö yöl-la' réajlë' queëli' Lë', ate' tseaj gácarö idú ca núnbë'ëli'-në' Xanru' Jesucristo. <sup>9</sup> Nu bönni' biti' ruí'i ládxi'ë gunë' caní, náquië' ca tu bönni' nachul-la nanítië', tu' chizá' ral-la ládxi'ë bunë' Cristo lë' tsahui', en bugüë' yugu' dul-la' gubáguë'ë zí'atëlö. <sup>10</sup> Que lë ni na', böchi' luzá'ado', ral-la' güí'itëro ládxi'li' guéquibe'eli' bulidzë' Dios libí'ili', en gurö cazë' libí'ili'. Channö gunli' caní, biti' ca' ichixi iníguili'. <sup>11</sup> Caní gaca, idú ládxi'ë Dios gúnnasë' queëli' lataj tsázali' ga inná bë'tica'së' Xanru' Jesucristo, Nu rusöla' rë'u.

<sup>12</sup> Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca idútë li na' chiguzxi' lu ná'ali'. <sup>13</sup> Runi neda' ral-la' usubana' ládxi'li' ca nácgaca lë ni tsanni ni zoa' nabana'. <sup>14</sup> Ral-la' guna' caní tu' nözda' si' gátia'. Xanru' Jesucristo chigudxi' cazë' neda' gaca caní quia'. <sup>15</sup> Que lë ni na' ruí'ida' ládxi'a' guna' ga tsöjnélica'sili' yugu' lë ni tödi gátia'.

### *Nupa bila'lé'e yöl-la' zxön queë' Cristo*

<sup>16</sup> Biti' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. <sup>17</sup> Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunnë': "Bönni' ni náquië'

Zxí'ina'. Nadxí'ida' Lë', en raza ládxa'a Lë'." 18 Netu' biyõn quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

19 Lë' na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' gü'i ládxi'li' didza' na', tu' naca ca tu guí' ruzeni' tu ga naca chul-la ga idxintë dza uzeni' lu icja ládxi'do'oli' Nu na' naca ca bölj hui sila queëru'. 20 Lë' ni runda' bayudxi tséajni'ili': Cuntu nu bönni', rácasö queë' biti' gaca tséajni'inë' didza' bë'ë tu bönni' uláz queë' Dios. 21 Yugu' didza' gulu'ë yugu' bönni' uláz queë' Dios biti' ca' gulu'ë tu' gulë'ëni' quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

## 2

### *Ca nácgaca nupa tu'sédinë' le cabí nácatë*

1 Yugu' bönni' ta'zì' yë'ë gula'cuá'lenë' bönachi Israel, en gula'nnë' nácgacquië' bönni' tu'ë didza' uláz queë' Dios. Lësca' caní yugu' bönni' ila'zì' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queëli' ucá'anali' le naca idütë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. 2 Zianli' libí'ili' gunli' légaquië' tsözxõn lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idütë li. 3 Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queëli'. Chinarugu quégaquië' bönni' ni, ate' naca löza ila'nítië' tsaz.

4 Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. 5 Lësca' caní, biti' buniti lahuë' bönachi gula'cuá' dza ni'te cate' gusöl-lë'ë nisa guiõj le busuniti yödzölió le beti bönachi nácgaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. 6 Lësca' caní, Dios guchúguië' quégaca bönachi gula'cuá' yödzö Sodoma, en yödzö Gomorra. Busunítië' léguequi lu guí', ate' bulu'huóaca dö. Le guca quéguequi naca tu le rulu'i le run gadxi nupa tua' dö'. 7 Cate' busunítië' yugu' yödzö na', Dios busölë' Lot, tu bönni' tsahui', lu guí' na'. Bu'inida' ládxi'ë Lot cate' bilé'enë' le xihui' gulún bönachi tuá' dö' na'. 8 Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxi'ë yúgu'të dza ni'a que yugu' le cabí naca tsahui' gulúngaca. 9 Caní naca, Xanru' nözinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa biti' nácgaca tsahui' ga idxinrö dza ichúguië' quéguequi ila'niti tsaz.

10 Ichúguda'arö quégaquië' bönni' ni tunë' yugu' le ta'zë ládxi'ë le ruá' dö', en ta'dá'baguë' yöl-la' unná bë' queë' Xanru'. Nácgacquië' rugu ladxi', en zidi ladxi'. Biti' tádxinë' tu'lidza ditjë' gubáz lá'ayi ta'dë' lu bení'. 11 Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

12 Yugu' bönni' ni nácgacquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nnë' xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. 13 Dios ubi'ë quégaquië' le ila'guí' ila'záquë'ë, tu' bulu'saca' zì'ë bönachi. Téquinë' naca xibágaquië' tu'zì'ë xibé le raca na'a dza. Nácgacquië' ca tu huë' nudzu', en tu le run ditaj cate' ni' tahuë' tsözxõn len libí'ili', ate' tu'dzéjanë' tu' ta'zì' yé'enë' libí'ili'.

14 Lu yöl-la' rizë' ladxi' quégaquië' le ruá' dö' tu'yúë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácgaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chinuchúguië' quégaquië' ilátigaquië'.

15 Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam,



zxí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'. <sup>16</sup> Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tuí'i didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

<sup>17</sup> Nácagaquië' bönni' ni ca tu buduá' chibuí'i nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la. <sup>18</sup> Caní nácagaquië' tu' tu'ë didza' yugu' le zxön lu yöl-la' biti' bi nözi quégaquië', en tu'gunë' dxin yugu' le ta'zë ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. <sup>19</sup> Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxi'do'gaquië'. <sup>20</sup> Channö bulu'lë' lu le cabí naca tsahui' nacuá' yödzülió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga røjsetë ca le gula'báguë'ë zí'alö. <sup>21</sup> Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. <sup>22</sup> Chibudxín quégaquië' didza' na' rnna:

Ruhuécjaba' bö'cu', ruhuöáguba' le si' gúbaba'.  
Ruyázaba' cuchi na' si' gudíbiru'-ba' lu guna'.

### 3

#### *Naca löza huödë' Xanru'*

<sup>1</sup> Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca nácagaca lë ni. <sup>2</sup> Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

<sup>3</sup> Ral-la' tsöjnéli' lë ni naca lo. Dza tsöjsëtëgaca ulu'luí'lahuë' bönni' ilunë' le ta'zë ládxi'ë le ruá' dö'. <sup>4</sup> Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzülió ga ridxintë na'a dza." <sup>5</sup> Tu'zóë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. <sup>6</sup> Len nisa ca' busunítië' Dios yödzülió dza ni'te cate' ni' gusöl-lë'ë nisa guiöj le beti yugu' bönachi dul-la'. <sup>7</sup> Lúzxiba, en yödzülió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi biti' nácagaca tsahui' gátigaca.

<sup>8</sup> Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. <sup>9</sup> Biti' ridzenë' Xanru' gunë' le guzxi' lu në'ë gunë'. Téquiquequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i ládxi'gaca yúgu'të bönachi.

<sup>10</sup> Tsárido'os idxín dza huödë' Xanru' ca ridxinë' tu bönni' gubán chí'i dzö'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí' zxön. Ila'yegui yödzülió ni, en le nacuá' yödzülió ni.

<sup>11</sup> Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. <sup>12</sup> Ral-la' cözali' dza huödë' Xanru', en güí'i ládxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacuá' ni lu guí'. <sup>13</sup> Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

<sup>14</sup> Que lë ni na', böchi' luzá'ado', tsanni ni ribözali' yugu' lë ni, guli'güí' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë queëli', en cözali' dxí'ado' cate' idxinrö dza ni'. <sup>15</sup> Ral-la' inözili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queëli' lu guichi, zóalen lë' yöl-la' réajni'i na' bë'ë Xanru' queë'. <sup>16</sup> Yúgu'të lu guichi ruzúajë', ru'ë didza' ca nácagaca

lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

<sup>17</sup> Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zí' ye'e bönachi biti' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. <sup>18</sup> Guli'güí' ládxi'li' gácarö idú ca núnbë'ëli'-né' Xanru' Jesucristo, Nu rusölá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

## DÍDZA 'DO' ZÍ'ALÖ BUZÚAJË' JUAN

### *Didza' nabániru'*

<sup>1</sup> Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. <sup>2</sup> Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en ruluí'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibuduluí'i lahuë' ga zóaru'. <sup>3</sup> Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. <sup>4</sup> Ruzúajtu' queëli' lu guichi lë ni para gaca udzëjaru' idú ládxi'ru'.

### *Dios náquië' bení'*

<sup>5</sup> Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rnna: Dios náquië' bení', ate' nitú le naca chul-la' que dul-la' bití' zóalen Lë'. <sup>6</sup> Channö innaru': "Nácaru' tuz len Dios", pero channö runru' le naca chul-la' que dul-la', lë ni naca bë' rizí' yé'ëru', en bití' runru' le naca idútë li. <sup>7</sup> Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

<sup>8</sup> Channö rnnaru': "Bití' bi dul-la' runru'", rizí' yé'ëru' la' cuínsiru', en bití' nazí' lu ná'aru' le naca idútë li. <sup>9</sup> Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. <sup>10</sup> Channö innaru': "Bití' bi dul-la' nabága'ru'", naca ca innaru': "Dios rizí' yë'ë", ate' bití' runru' ca rnna xtídzë'ë.

## 2

### *Cristo náquië' Nu rudödi xtídzaru' lahuë' Dios*

<sup>1</sup> Libí'ili', zxí'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'. <sup>2</sup> Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödzölió.

<sup>3</sup> Channö runru' ca naca le gunná bé'enë' rë'u, nöziru' chinúnbë'ëru' Lë'. <sup>4</sup> Nu rnna: "Neda' núnbë'a-në' Dios" pero bití' run ca rinná bë' xibá queë', nu ni rizí' yë', en bití' run le naca idútë li. <sup>5</sup> Nu run ca rnna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nöziru' néquiru' queë' Dios. <sup>6</sup> Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

### *Tu xibá cubi*

<sup>7</sup> Böchi' luzá'ado', ruzúaja' queëli' lu guichi xibá ni. Bití' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyönili' dza ni'te. <sup>8</sup> Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridödi que le naca chul-la' que dul-la', ate' bení' idú chiruzení'.

<sup>9</sup> Nu rnna: "Zoa' lu bení'", pero bití' rilé'e dxi'a böchi' luzé'e, nu ni ni run le naca chul-la' que dul-la'. <sup>10</sup> Nu nadxí'i böchi' luzé'e zoa lu bení', ate' le run ga nu ichixi inigui bití' zóalen nu na'. <sup>11</sup> Le naca chul-la' que dul-la' run ga nu bití' rilé'e dxi'a böchi' luzé'e, en ga ridá nu na' ga chul-la. Bití' nözi ga zeaj, tu' run le naca chul-la na' ga nachul-la naniti nu na'.

<sup>12</sup> Ruzúaja' queéli' lu guichi, zxi'ina'do', tu' chibunít lahuë' Dios dul-la' nabága'li', tu' runë' le guzxí' lu në'ë gunë'. <sup>13</sup> Ruzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucúl-lali' tu' xihui'.

<sup>14</sup> Chibuzúaja' queéli' lu guichi, zxi'ina'do', tu' núnbë'ëli'-në' Dios Xuz. Chibuzúaja' queéli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

<sup>15</sup> Biti' idxí'isili' yödzülió ni, en calëga le dë yödzülió ni. Channö zoa nu nadxí'i yödzülió, bití' nadxí'i Dios Xuz. <sup>16</sup> Caní naca, tu' naca le tun bönachi yödzülió ni le cabí rë'ënë' Dios Xuz, pero naca le të'ëni bönachi yödzülió ni.

Tunë' le riyaza ladxi' yöl-la' bönáchisö quegaquië'.

Tunë' le ruá' dö' le ridani guiöj lógaquië'.

Tun ba zxon cuíngaquië' ni'a que le dë quegaquië'.

Caní nácgaca le ruá' dö' tunë'. <sup>17</sup> Huadödi que yödzülió ni, enca' que le ta'zë ladxí'gaca bönachi, pero nu run ca rë'ënë' Dios sóatica'sö.

### *Nu ruí'i didza' idútë li, en nu rizí' yë'*

<sup>18</sup> Zxi'ina'do', chizóaru' dza údxi, en ca na' chibiyónili' huidë' bönni' ridá'baguë'ë Cristo, lësca' na'a chigusí'lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi. <sup>19</sup> Bila'rúajë' bönni' caní ladjaru', pero bití' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' bití' nácgacaquië' yúgu'të' tuz len rë'u.

<sup>20</sup> Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të.

<sup>21</sup> Buzúaja' queéli' lu guichi, tu' chinözili' le naca idútë li, en calëga tu' cabí nözili' le. Nözili' ca' bití' ca' rizí' yë' nu nözi le naca idútë li.

<sup>22</sup> ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusöl-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxi'inë' Dios. <sup>23</sup> Núti'tës nu ridá'baga' Dios Zxi'ini, bití' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxi'inë' Dios, lësca' zóalenë' Dios Xuz nu na'.

<sup>24</sup> Na'a, guli'güi' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxi'ini, enca' len Dios Xuz. <sup>25</sup> Le guzxí' lu në'ë Dios naca lë ni: Gunnë' gunnë' yöl-la' na'bán idú queëru'.

<sup>26</sup> Chibuzúaja' queéli' lu guichi lë ni ca naca quégaca nupa ta'zí' ye'e libí'ili'. <sup>27</sup> Na'a, zóalenë' Dios Bö' Lá'ayi libí'ili'. Cristo gusöl-lë'ë Lë' queéli', ate' Lë' cazë' zóalentica'së' libí'ili'. Que lë ni na' bití' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en bití' rizí' yë'ë. Ca na' chinazédali', guli'sóalentica'së' Cristo.

<sup>28</sup> Na'a, zxi'ina'do', guli'sóalentica'së' Cristo para cate' uluí'i lahuë' Lë', gácaru' rugu ladxi', en bití' utuí'iru' sóaru' lahuë' Lë' cate' huödë'. <sup>29</sup> Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácgaca zxi'inë' Dios.

## 3

### *Nupa nácgaca zxi'inë' Dios*

<sup>1</sup> Bulí'yú ca nadxí'ide'enë' Dios Xuz rë'u, benë' ga nazí'i laru' zxi'inë' Dios caz. Que lë ni na' bönachi yödzülió ni bití' ca' núnbë'gaca le nácaru', tu' cabí gulúnbe'e Jesús. <sup>2</sup> Böchi' luzá'ado', na'a chinácaru' zxi'inë' Dios, en bití' naca bé'eni le ral-la' gácaru'. Nöziru' cate' uluí'i lahuë' Jesús, gácaru' ca náquië' Lë', ate' ilë'eru'-në' catëz náquië' Lë'. <sup>3</sup> Núti'tës nu run löza gaca ca náquië' Jesús, ruí'i ladxi' nu na' gaca dxi'a ca na' náquië' Jesús dxi'a.

<sup>4</sup> Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.

<sup>5</sup> Nözili' buluí'i lahuë' Jesús para bugüë' dul-la' nabága'ru', en bití' bi dul-la' runë' Lë'.

<sup>6</sup> Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'. <sup>7</sup> Zxí'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. <sup>8</sup> Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' buduluí'i lahuë' Zxí'inë' Dios, para usunítië' yugu' le nun tu' xihui'.

<sup>9</sup> Núti'tës nu naca zxí'inë' Dios biti' rúntica'sö dul-la', tu' zóalencia'sö le guzxi' lu në'ë Dios Xuz nu na'. <sup>10</sup> Caní naca bë' nupa nátagaca zxí'inë' Dios, en nupa nátagaca zxí'ini tu' xihui'. Núti'tës nu biti' run le naca tsahui', en biti' nadxi'i böchi' luzé'e biti' nequi queë' Dios.

### *Ral-la' idxí'iru' yugu' böchi'ru' ta'yéajlë'ë Cristo*

<sup>11</sup> Lë ni naca didza' biyönili' dza ni'te, le rnna: Ral-la' idxí'iru' luzá'aru' turu' ia'turu'. <sup>12</sup> Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

<sup>13</sup> Böcha'ado', biti' ubánili' channö cabí ta'lé'e bönachi yödzülió ni libí'ili' dxi'a. <sup>14</sup> Nöziru' chigudödiru' lu yöl-la' guti, en chidë yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzé'e, chinati caz nu na'. <sup>15</sup> Núti'tës nu biti' rilé'e dxi'a böchi' luzé'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que. <sup>16</sup> Caní núnbë'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'. <sup>17</sup> Na'a, núti'tës nu dë yöl-la' tsahui' que, lë na' dë yödzülió ni, ate' rilé'e böchi' luzé'e, bi riyadzaj queë', en biti' ruhuéchi' ladxi' lë', bi unödzej queë', ¿naru' nadxi'itsö nu na' Dios? <sup>18</sup> Libí'ili', zxí'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ládxi'ru', enca' len idütë yöl-la' run queëru' ral-la' idxí'iru' luzá'aru'.

### *Le runru' löza lahuë' Dios*

<sup>19-20</sup> Channö caní nadxi'iru' yugu' böchi' luzá'aru', nöziru' néquiru' que Nu na' naca idütë li, ate' lahuë' Dios huáca cö' dxi icja ládxi'do'oru' channö ruxösa ládxi'do'oru' rë'u, tu' rácada'arë' Dios ca ládxi'do'oru', ate' Lë' nözinë' yúgu'të. <sup>21</sup> Böchi' luzá'ado', channö cabí ruxösa ládxi'do'oru' rë'u, dë le runru' löza lahuë' Dios <sup>22</sup> tu' nöziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ládxi'ë Lë'. <sup>23</sup> Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bé'enë' rë'u. <sup>24</sup> Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

## 4

### *Le naca bë' zóalenë' Dios Bö' Lá'ayi rë'u*

<sup>1</sup> Böchi' luzá'ado', biti' tséajlë'ëli' núti'tës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zían bönni' ta'zí' yë'ë yödzülió ni. Ta'nnë' tu'ë didza' uláz queë' Dios. <sup>2</sup> Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' bönachi. <sup>3</sup> Lësca' caní, biti' nequi queë' Dios nu bönni' biti' rnnë' yalaj lulu ca bidë' Jesucristo, rnnë' biti' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyönili' ral-la' guidë', ate' na'a chiridë' yödzülió ni.

<sup>4</sup> Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzülió ni. <sup>5</sup> Légaquië' nátagaquië' bönachi yödzülió. Que lë ni na' tu'ë didza' que le naca que yödzülió, ate' bönachi yödzülió ni tu'zë nátagaca légaquië'. <sup>6</sup> Néquiru' rë'u queë' Dios. Nu nunbë' Dios ruzé nagui rë'u. Nu

biti' nequi queë' Dios biti' ruzé nagui rë'u. Caní núnbe'ëru' nu na' yu'u le Bö' ruí'i didza' le naca idútë li, enca' nu na' yu'u le tu bö' rizi' yë'.

### *Náljalén Dios yöl-la' nadxí'i*

<sup>7</sup> Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzé'e náljalén ca' Dios, en núnbe'e Dios. <sup>8</sup> Nu biti' nadxí'i luzé'e, biti' núnbe'e Dios, tu' náljalén Dios yöl-la' nadxí'i. <sup>9</sup> Caní bulu'e lahui Dios ca nadxí'inë' rë'u, gusöl-lë'ë la's dui Zxí'ini cazë' yödzölió ni, para gata' yöl-la' na'bán idú queëru' ni'a queë' Lë'. <sup>10</sup> Caní naca bë' yöl-la' nadxí'i idú, caléga ca nadxí'iru'-në' Dios, pero ca na' Lë' bidxí'inë' rë'u, en gusöl-lë'ë Zxí'ini cazë' para gútië', en caní bugúë' dul-la' nabága'ru'.

<sup>11</sup> Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. <sup>12</sup> Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'. <sup>13</sup> Nöziru' zóalenru'-në' Dios, ate' Lë' zóalenë' rë'u, tu' guchizië' Dios Bö' Lá'ayi rë'u. <sup>14</sup> Netu' bilé'etu' le benë' Dios Xuz, en runtu' ba nalí que. Lë' gusöl-lë'ë Zxí'ini cazë' Nu rusölá bönachi yödzölió. <sup>15</sup> Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

<sup>16</sup> Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzé'ë, zóalenë' bönni' na' Dios, ate' Dios zóalenë' lë'. <sup>17</sup> Caní run dxin yöl-la' nadxí'i lu icja ladxí'do'oru', run ga bití'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödzölió ni. <sup>18</sup> Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ladxí'ru', runë' ga biti' rádxiru'. Nu radxi, riguí'i rizáca'a. Nu na' radxi, biti' nadxí'i Dios idú ladxí'.

<sup>19</sup> Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. <sup>20</sup> Channö nu inná: "Neda' nadxí'ida'-në' Dios", pero biti' rilé'e dxi'a böchi' luzé'e, nu ni rizi' yë'. Nu biti' nadxí'i böchi' luzé'e nu rilé'e caz, ¿nacxi caz gaca idxí'i Dios, en catu caz bilé'e Lë'? <sup>21</sup> Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzé'e.

## 5

### *Ca gaca idéli'ru' lu le raca queëru' yödzölió ni*

<sup>1</sup> Núti'tës bönni' réajlë'ë Jesús náquië' Cristo, náquië' zxí'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzé'ë nu naca bi'i queë' Dios. <sup>2</sup> Caní réquibe'ëru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. <sup>3</sup> Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u biti' naca böniga. <sup>4</sup> Núti'tës bönni' náquië' bi'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. <sup>5</sup> ¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

### *Dios Bö' Lá'ayi runë' ba nalí queë' Cristo*

<sup>6</sup> Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi. <sup>7</sup> Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácagaquië' tuz. <sup>8</sup> Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. <sup>9</sup> Channö si' lu ná'aru' le tun ba nalí bönachi, le runë' ba nalí Dios nácatërö lesaca'. Lë' na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'. <sup>10</sup> Nu réajlë' Zxí'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rnna nu na': Dios rizi' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. <sup>11</sup> Lë' ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië'

Nu nabániru' caní. <sup>12</sup> Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

*Ca nöziru' dë yöl-la' na'bán idú queëru'*

<sup>13</sup> Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

<sup>14</sup> Lë ni naca le ruzxöni ládxi'ru' Lë'. Channö bi inábiru' Lë' ca rë'ënë' Lë', Lë' riyönnë' rë'u. <sup>15</sup> Channö nöziru' riyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

<sup>16</sup> Channö ilé'eru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnnía': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnnía' inábali' que nu run dul-la' caní. <sup>17</sup> Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. <sup>18</sup> Nöziru' bití' rúntica'sö dul-la' nu naca zxí'inë' Dios, tu' rapa chi'ë Zxí'ini cazë' Dios nu na', ate' tu' xihui' bití' sequi' bi gun que.

<sup>19</sup> Nöziru' yú'uru' lu në'ë Dios, ate' yúgu'të bönachi tuí'i ládxi'gaca le dë yödzölió ni yú'ugaca lu na' tu' xihui'.

<sup>20</sup> Na'a, nöziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. <sup>21</sup> Zxí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

## DÍDZA'DO' BUROPI BUZÚAJË' JUAN

*Núnbë'ëru' le naca idútë li, en yöl-la' nadxí'i*

<sup>1</sup>Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxí'inu'. Nadxí'ida' libí'ili' tu' núnbë'ëru' le naca idútë li, en calëgasö neda', pero lësca' yúgu'të nupa chinúnbë'gaca le naca idútë li ta'dxí'i libí'ili'. <sup>2</sup>Nadxí'itu' libí'ili' tu' núnbë'ëru' le naca idútë li, le zóalëntica'sö rë'u. <sup>3</sup>Rinávida'-në' Dios Xuz, en Xanru' Jesucristo, Zxí'ini cazë' Dios, uzá' ládxe'ë queëli', en huéchi' ládxe'ë libí'ili', en gunë' ga soa dxi icja ládxi'do'oli' tu' núnbë'ëli' le naca idútë li, en nadxí'ili' luzá'ali'.

<sup>4</sup>Budzéjade'eda' cate' biyönda' tunbi' zxí'inu' ca naca le naca idútë li, tu' tunbi' ca na' gunná bé'enë' Dios Xuz rë'u. <sup>5</sup>Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. <sup>6</sup>Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

*Nupa tē'ëni ila'z'í ye'e rë'u*

<sup>7</sup>Lë ni riguixjöi'ida' libí'ili', tu' chita'dá zían nupa ta'z'í yë' yödzölió ni, nupa na' bití' ta'z'í lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo. <sup>8</sup>Guli'gún chi'i cuinli' para cabí initi le nadéli'li' tu' guzxí' lu na'li' Cristo, pero guli'güí' ládxi'li' idéli'li' idútë le ral-la' sí'ili' lu në'ë Dios.

<sup>9</sup>Núti'tës nu riguela' nöza yúbölö, en rucá'ana xtídzë'ë Cristo, bití' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxí'inë' nu na'. <sup>10</sup>Channö núti'tës nu za' ga zóali', en rusedi xibá yúbölö, bití' ulëbili' nu na' lídxili', en bití' guiëli' le: "Guyú'u len netu'." <sup>11</sup>Nu rë le: "Guyú'u len netu'", run tsözxön nu na' ca naca le ruá' dö' run nu na'.

*Runë' Juan löza idxinë' ga nacu'ë böchi' luzë'ë*

<sup>12</sup>Sal-la' le zían ral-la' uzúaja' queëli' lu guichi, bití' rë'ënda' uzúaja' yúgu'të lu guichi. Runa' löza guída' ga zóali', ate' güí'iru' didza' ruá'a cuinru', para gaca udzëjaru' idú ládxi'ru'.

<sup>13</sup>Zxí'ininu nigula zxilu', nigula rö queë' Dios, tu'gápabi' Dios li'. ¡Ca' gaca!



## DÍDZA'DO' BUNNI BUZÚAJË' JUAN

### *Le naca tsahui' runë' bönni' lë' Gayo*

<sup>1</sup> Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútë li.

<sup>2</sup> Böcha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. <sup>3</sup> Rudzëjada' tu' ta'dxinë' yugu' böchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li. <sup>4</sup> Biti' bi dë le runrö ga rudzëjada' ca lë ni, riyönda' tun nupa nácagaca ca bi'i que caza' ca rna le naca idútë li.

<sup>5</sup> Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' bití' núnbe'enu' légaquië'. <sup>6</sup> Yugu' böchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxi'inu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. <sup>7</sup> Légaquië' bila'rúajë' ni tu' nadxi'igaquië' Jesús, en bití' bi ta'zi'ë lu ná'agaca bönachi bití' ta'dá' Cristo. <sup>8</sup> Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

### *Le cabí naca tsahui' runë' Diótrefes*

<sup>9</sup> Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza ládxë'ë gáquië' lo ladjagaquië', bití' runë' netu' bal. <sup>10</sup> Que lë ni na', channö huida' ga zóali', usá'a ládxi'li' cate' udúbili' ca nácagaca le runë'. Rizí' quídzë'ë netu', en rnnë' queëtu' le cabí nácatë. Bití' rizxön ládxe'ë tsa lë nisö, pero lësca' bití' runë' bal böchi'ru' ta'dxinë' ni', ate' ruzáguë'ë xinözguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

<sup>11</sup> Böcha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

### *Le naca tsahui' runë' Demetrio*

<sup>12</sup> Yúgu'të böchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nözili' nácatë lë ni runtu' ba nalí queë'.

### *Le rinabë' Juan lahuë' Dios*

<sup>13</sup> Ziánrö ca' le gú'unida' uzúaja' quiu' lu guichi, pero bití' ré'ënda' uzúaja' le lu guíchisö. <sup>14</sup> Na'a, runa' löza ilé'eteda' li', ate' güi'iru' didza' ruá'a cuinru'.

<sup>15</sup> Rinábida'-në' Dios gunë' ga soa dxi icja ládxi'do'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

## DÍDZA'DO' BUZÚAJË' JUDAS

### *Judas rugapë' Dios nupa nulidzë' Dios*

<sup>1</sup> Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chi'ë libí'ili' tu' nácali' tuz len Jesucristo. <sup>2</sup> Rë'ënda' inözili' ca ruhuéchi'da' ládxë'ë Dios libí'ili', en nadxí'ide'enë' libí'ili', enca' ruzóadë'ë dxi icja ládxi'do'oli'.

### *Nupa tu'sedi le cabí nácatë*

<sup>3</sup> Libí'ili', böchi' luzá'ado', gúcada' ládxa'a uzúaja' queëli' lu guichi ca naca yöl-la' rusölá nadéli'ru', pero run bayudxi uchízia' icja nágali' para idú ládxi'li' tíl-lalenli' nupa ta'dá'baga' le réajlë'ëru'-në' Dios, lë na' budödë' Dios tsaz lu ná'agaca nupa néquiguequi quez queë' para ulu'zë didza' que lógaca yúgu'të bönachi. <sup>4</sup> Caní run bayudxi guna' tu' bagáchi'sö chigula'yázalenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj ládxi'gaquië' Dios bönni' caní. Tu' zoa le ruzá' ládxi'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

<sup>5</sup> Chinöz quézili' lë ni, pero rë'ënda' usá'a ládxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca ládjaguequi, en bití' gula'yéajlë' Lë'. <sup>6</sup> Lësca' caní, yugu' gubáz lá'ayi queë' Dios, nupa ni' bití' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chul-la. Nága'gaquië' tsaz ni' ga idxinrö dza usiúdxë' Dios yödzölió ni. <sup>7</sup> Lësca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzö na'. Bulu'dödi cuíngaquië' para gulunë' le ruá' dö', en le gula'zësö ládxi'gaquië' le tun ga nu rutuí'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisö.

<sup>8</sup> Sal-la' gulaca lë ni, la' canisö tunë' bönni' ni, bönni' röjácalenë' yëla ta'nënë'. Tun dítjanë' idütë le naca cazë'. Ta'dá'baguë'ë le rinná bé'enë' Dios rë'u, en ta'nnë' zi'ë quégaca nupa ta'nná'bë' yehua' yubá. <sup>9</sup> Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, bití' burúguinë' udxíë' dö' tu' xihui' na', pero gudxë' le: "Xanru' uzenë' li' bach." <sup>10</sup> Yugu' bönni' ni ta'nnë' zi'ë quégaca le runë' Dios, yugu' le bití' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa' guixi' bití' ta'yéajni'iba', lë ni tu'gunë' dxin, en caní tu'dxía dö' cuíngaquië'.

<sup>11</sup> Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés. <sup>12</sup> Yugu' bönni' ni tágulenë' tsözxön libí'ili' cate' ráguli' yugu' gü'i huagu lu yöl-la' nadxí'i queëli'. Tunë' ga ta'chixi ta'nigui nupa dzágagaca libí'ili', tu' t'ë'aj tagu lizë'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba bití' nachë'gaca nisa, ate' ruá' bö' léguequi ná'alö ní'ilö. Nácagaquië' ca' ca yugu' yaga chibidxín dza bi ila'bía, pero bití' bi ta'bía. Nácagaquië' ca' ca yugu' yaga chigula'bidxi idú luí, en chinaládzugaca. <sup>13</sup> Nácagaquië' ca' ca nísado' cate' riyasa ridxía, ate' ribö' bidxina' que, lë na' ruluí'i ca naca yöl-la' stu' tunë'. Nácagaquië' ca yugu' böljaj lúzxiba nucá'anagacaba' xinözgacaba'. Dios chinunë' quégaquië' ila'yázië' tsaz lataj chul-la.

<sup>14</sup> Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' zxi'ini xi'sóë' Adán. Gunnë': "Buli'yútsöca', zë'ë Xanru', ate'

dzágagaca Lë' zián gayuá' bönachi néquiguequi quez queë'. <sup>15</sup> Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'. <sup>16</sup> Yugu' bönni' caní ta'nnë' queë', en ta'zí quídzë'ë, en tunë' ca naca le ta'zësö ládxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéquequi, tu'ë didza' le ta'gú'u bönachi yöl-la' zxön.

*Judas rusë'ë ládxi'gaca nupa ta'yéajlë' Cristo*

<sup>17</sup> Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. <sup>18</sup> Yugu' bönni' na' gulé' libí'ili': "Yugu' dza tsöjsétëgaca ulu'luí'i lógaquië' bönni' ulu'titjë' le naca lá'ayi, en ilunë' ca naca le ta'zësö ládxi'gaquië' le ruá' dö'." <sup>19</sup> Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en biti' zóalenë' Dios Bö' Lá'ayi légaquië'.

<sup>20</sup> Na'a, böchi' luzá'ado', guli'sóa tsutsu lu yöl-la' réajlë' queëli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. <sup>21</sup> Buli'gá'analenë' Dios, Nu nadxí'i rë'u, en guli'cöza dza ni' ulu'í'i lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queëru'.

<sup>22</sup> Guli'gún ga ila'dipa ládxi'gaca nupa raca chopa ládxi'gaca. <sup>23</sup> Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi' queëli' buli'huéchi' ládxi'li' ia'zica'rö bönachi. Guli'gún chi'í cuinli', para cabí gunli' tsözxön légaquië', en cabí gútsa'li' le ruá' dö' tunë'.

*Le rigú'uru' Dios yöl-la' zxön*

<sup>24-25</sup> Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

## LE BULUÍ'INĒ' DIOS JUAN

### Apocalipsis

#### *Le bulu'e lahui Dios ca naca queë' Jesucristo*

<sup>1</sup> Lë ni naca le bulu'e lahui Jesucristo, le bē'ë Lë' lataj Dios ulu'ínē' yugu' huen dxin queë' ca naca le run bayudxi ilácatē. Jesucristo gusól-lē'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínē' neda' ca naca lë ni. <sup>2</sup> Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtídzē'ë Dios, en que le benē' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zē nágagaca nu na' ulaba xtídzē'ë Dios ni, en ilún ca rnna lë ni nazúaj lu guichi, tu' chizóa gaca.

#### *Juan ruzúajē' le uzéajni'i gadxi cō' bōnachi queë' Cristo*

<sup>4</sup> Neda', Juan, ruzúaja' lu guichi didza' ni le uzéajni'i gadxi cō' bōnachi queë' Cristo nacua' luyú Asia. Dios, Bōnni' zoa cazē', en guzóatica'sē', en ral-la' huödē', rinábida'-nē' uzá' ladxē'ë queë'li', en gunē' ga cō'ō dxi icja ladxí'do'oli', ate' dzágagaca gadxi bō' Lë' nacua' lahuē' Lë' ga ni' rō'ë rinná bē'ë. <sup>5</sup> Dzáguiē' ca' Jesucristo Lë'. Jesús ni runē' ca rnnē', en runē' ba nalí queë' Dios. Zí'alō Lë' bubanē' tsaz lu yöl-la' guti, en rinná bé'enē' bōnni' ta'nná bē'ë yödzölió ni. Lë' nadxí'inē' rē'u, en gudibē' rē'u, tu' bugüē' dul-la' nabága'ru' len xichōnē' le bulaljē' lē'e yaga cruz, cate' gútiē' uláz queë'ru'. <sup>6</sup> Jesucristo benē' ga rinná bé'ëru', en ga nácaru' yugu' bixúz, para cú'uru'-nē' Dios, Xuzē' Jesús, yöl-la' ba. ¡Yöl-la' ba Lë', en gácatíca'sō queë' yöl-la' unná bē'! ¡Ca' gaca!

<sup>7</sup> ¡Buli'yútsōca'! ¡zē'ë Cristo lu bōaj lúzxiba! ¡ila'lé'e Lë' yúgu'tē bōnachi, enca' nupa ni' gulún Lë' huē', en bétigaca Lë'! ¡ila'bōdxi yechi' yúgu'tē bōnachi yödzölió ni cate' ila'lé'e Lë'! ¡La'tu' gácatē caní! ¡Ca' gaca!

<sup>8</sup> Caní rnnē' Lë': "Neda' naca' Bōnni' zoē' zí'alō, enca' Bōnni' röjsétiē' ca naca le risí lo, en le ruúdxitē." Caní rnnē' Xanru', Bōnni' napa cazē' yöl-la' huáca. ¡Zoa cazē' Lë', en guzóatica'sē', en sí' ulé'ë!

#### *Rilé'enē' Juan yöl-la' zxōn queë' Jesucristo*

<sup>9</sup> Neda', Juan, naca' böchi' luzá'ali', en tsözxōn riguí'i rizáca'lēna' libí'ili', en tsözxōn len libí'ili' ruzi'a xibé le rinná bē'ë Dios, en nadéli'da' yöl-la' ribōza zxōn ladxi' na' rnnē' Jesucristo queë'ru'. Nadzuna' tu luyú bidxi ni gatsaj láhui'lō nísado', nazí'i le Patmos. Nadzuna' tu' bena' libán que xtídzē'ë Dios, en tu' bena' ba nalí queë' Jesucristo. <sup>10</sup> Lu dza lá'ayi queë' Xanru', guzóalenē' Dios Bō' Lá'ayi neda', ate' biyōnda' cúdzu'la' chí'ë tu bōnni' rulidzē' zidzaj. Biyōn chí'ë ca ribōdxi lúzuba' bōa' bēdxi. <sup>11</sup> Bōnni' ni gudxē' neda': "Neda' naca' Bōnni' zoē' zí'alō, en Bōnni' röjsétiē' ca naca le risí lo, en le ruúdxitē. Buzúaj lu guichi le riyōnnu', en rilé'enu', ate' gusól-la' le quéguequi gadxi cō' bōnachi quia' nacua' luyú Asia, nupa nacua':

Lu yödzö Éfeso,  
 lu yödzö Esmirna,  
 lu yödzö Pérgamo,  
 lu yödzö Tiatira,  
 lu yödzö Sardis,  
 lu yödzö Filadelfia,  
 lu yödzö Laodicea."

<sup>12</sup> Buécja' para ilé'eda' Bōnni' na' rulidzē' neda'. Cate' buécja', bilé'eda' gadxi le nuá'gaca guí' le néquiguequini oro. <sup>13</sup> Ladaj gadxi le nuá'gaca guí' na' bilé'eda' tu Bōnni' rinē'ë

ca tu bönni'. Nácüë' tu lari' tunna le ridxín xini'ë, en luchu'ë nasíë' tu le néquini oro. <sup>14</sup> Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiöj lahuë' ca guí'. <sup>15</sup> Rëpi yösa bení' ni'ë ca guíë bronze dxíldo', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön. <sup>16</sup> Lu në'ë ibëla zxóagacaba' gadxi böläj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. <sup>18</sup> Naca' Nu nabán caz. Gútia', ate' na'a zóaticá'sa' nabana'. Dë lu na'a inná bé'eda' yöl-la' guti, en lataj ga nacúa' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. <sup>20</sup> Lë ni naca le nagachi' ca naca quégacaba' gadxi böläj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiquequini oro. Gadxi böläj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

## 2

### *Didza' gusöl-lë'ë yödzö Éfeso*

<sup>1</sup> Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi böläj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquiquequini oro. <sup>2</sup> Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxí' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'. <sup>3</sup> Ribözali' zxön ladxi', en chigudí'i guzxáca'li' tu' dá'ali' neda', pero biti' gucuidi' ládxi'li'. <sup>4</sup> Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö. <sup>5</sup> Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xilataj. <sup>6</sup> Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj ládxi'gaca budó' guiöj budó' yaga, en tun le ruá' dö', lë na' lësca' biti' rilé'eda' dxi'a. <sup>7</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

### *Didza' gusöl-lë'ë yödzö Esmirna*

<sup>8</sup> Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. <sup>9</sup> Caní rnnía': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. <sup>10</sup> Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi' guíë. Caní si' bë' libí'ili', ate' quí'i sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queëli'. <sup>11</sup> Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

### *Didza' gusöl-lë'ë yödzö Pérgamo*

<sup>12</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíë tuchi' na' natuchi' iropa la'a. <sup>13</sup> Neda' nöz quézida' le runli'. Nözda' ca' zóali' ga ni rinná bë'

Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nali' quia', en gútië' ga ni' zoa Satanás, tu' xihui'. <sup>14</sup> Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bëdxido' gulútigaquië'-ba' lógaca budó' guiöj budó' yaga, en gulunë' le ruá' dö'. <sup>15</sup> Lësca' caní nacuá'len libí'ili' nupa ni' nazí' lu në'eguequi xibá quégaca bönachi nicolaíta, lë na' bití' rilé'eda' neda' dxi'a. <sup>16</sup> Que lë ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guíë' tuchi'. <sup>17</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntú nu nunbë' le, pero núpasö na' ila'zí'i le, ilúnbë'e la na'."

### *Didza' gusöl-lë'ë yödzo Tiatira*

<sup>18</sup> Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca ca guí', ate' ni'ë nácagaca ca guíë' bronze dxí'lido'. <sup>19</sup> Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxon ladxi' queëli'. Nözda' nácáro idú ca runli' yugu' lë ni ca benli' zí'alö. <sup>20</sup> Nacuá' tu chopa le tu'zegui libí'ili' didza': Ru'í'ili'-nu lataj nigula na' lënu Jezabel, rnnanu ru'ínu didza' uláz queë' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bëdxido' ta'gu'ë légacaba' lógaca budó' guiöj budó' yaga. <sup>21</sup> Neda' bë'a-nu lataj ubí'i ládxi'nu, pero bití' rë'ëninu ucá'ananu le ruá' dö' na' runnu. <sup>22</sup> Que lë ni na' chú'una'-nu tu le gátí'nu ga na' quí'i sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'. <sup>23</sup> Guna' ga ilátibi' zxi'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícaguequi, en le ta'zá' ládxi'gaca bönachi, ate' ubi'a queëli' tsca naca le runli'. <sup>24</sup> Ia'zíca'li' zóali' yödzo Tiatira, nülöli' bití' nazí' lu ná'ali' lë na' rusédinu, en bití' nazédali' lë na' ta'nná bönachi ni' naca le nayéajni'i idú, pero le nácátë naca xtídza' Satanás, tu' xihui', rea' libí'ili': Bití' usubága'a libí'ili' ia'tú le ral-la' gunli'. <sup>25</sup> Na'a, lë na' chinazí' lu ná'ali', guli'gún chi'i ga idxintë dza huöda'. <sup>26</sup> Bönni' ni' ila'déli'në' lu le raca yödzölió, en ilunë' ca ré'ënda' neda' ga údxitë, neda' guna' ga ila'nná bé'enë' bönachi idútë yödzölió. <sup>27</sup> Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzo, ate' gata' lu ná'agaquië' tu xiyaga guíë, ate' ulu'zxuzxjë' bönachi na' ca nu ruzxuzxaj zxiga' yö'öna néquini yu. <sup>28</sup> Gu'a ca' le naca ca bölj hui sila quégaquië'. <sup>29</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

## 3

### *Didza' gusöl-lë'ë yödzo Sardis*

<sup>1</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. <sup>2</sup> Buli'subán ládxi'li'. Guli'gún tsutsu le nacuá'len libí'ili', le chízóa ilátigaca, tu' réquibe'eda' le runli' bití' naca idú tsahui' lahuë' Dios. <sup>3</sup> Guli'tsöjné na'a xibá na' biyönili' le guzxi' lu ná'ali'. Guli'gún ca rnna xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en bití' inözili' bizxi dza na' guída' ga zóali'. <sup>4</sup> Nacuá'len bal-la bönachi libí'ili' lu yödzo Sardis, nupa bití' nácagaca xihui'."

Ila'dalen nupa ni neda', nácugaca lari' chiguíchido'os le rulu'í nuhuóácagaca idú tsahui', en nácagaca lesaca' gaca caní quéguequi. <sup>5</sup> Nupa ila'deli' lu le raca yödzölió ugácua' léguequi lari' chiguíchido'os, en bití usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'. <sup>6</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

### *Didza' gusöl-lë'ë yödzö Filadelfia*

<sup>7</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu në'ë zxi'ini guié queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntú nu gaca usayaj le, en rusayjë' ga nu riyaza, ate' cuntú nu gaca isalaj le. <sup>8</sup> Bönni' ni rnnë': Neda' nöz quézida' le runli'. Nözda' nápalí lático'os yöl-la' huáca, pero runli' ca rnna xtídza'a, en bití rutuí'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntú nu gaca usayaj le. <sup>9</sup> Buli'yútsöca', ta'dë' bönni' ni' Satanás, tu' xihui', en ta'zì' yë'ë, ta'nnë' nácagaquië' bönachi judío ta'yéaj ládxi'gaca Dios, pero bití nácagaquië' caní, guna' ga ila'dxinë' loli', en ulu'zechu zxi'bagaquië' xini'ali'. Ní'irö iléquibe'enë' nadxi'ida' libí'ili'. <sup>10</sup> Tu' benli' ca rnna xtídza'a, en gulózali' zxon ladxí, gun chi'a libí'ili' dza na' ila'guí'ila'zaca' yúgu'të bönachi lu yödzölió ni, lë na' gaca para si' bë' léguequi. <sup>11</sup> ¡Si' guída'! Que lë ni na' guli'gún chi'i le nápalí, para cabí gaca nu gun ga cabí sí'ili' lë na' ral-la' gunna' queëli'. <sup>12</sup> Núlöli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxon, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. <sup>13</sup> Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

### *Didza' gusöl-lë'ë yödzö Laodicea*

<sup>14</sup> Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nali, en náquië' ca' Bönni' na' gulén lu në'ë yúgu'të le benë' Dios. <sup>15</sup> Caní rnnë': Neda' nöz quézida' le runli'. Ca runli' naca ca nisa bití naca ziaga, tu' cabí rucá'anali' tsaz neda', en bití naca ca nisa zögui', tu' cabí dá'ali' neda' idú ládxi'li'. Dxi'arö gaca la' gácali' ca nisa ziaga o ca nisa zögui'. <sup>16</sup> Na'a, tu' nácali' ca nisa nati yúlasö, en bití nácali' ca nisa ziaga, en bití nácali' ca nisa zögui', chú'una' libí'ili' ca run nu ruhuëbi nisa nati yula na'. <sup>17</sup> Libí'ili' rnnali' rilé'eli' yöl-la' tsahui' queëli', en raca dxi'a queëli', en bití bi riyadzaj queëli', pero bití réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö!  
<sup>18</sup> Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí, para gata' yöl-la' tsahui' idú queëli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queëli' le run ga nu rutuí'ili'. Ral-la' gá'uli' ca' quia' le gun ga ulu'huóaca guiöj loli' para gaca ilé'eli' le naca quia'. <sup>19</sup> Neda' ruzeda' bach, en run zì'a yúgu'të nupa nadxi'ida' channö cabí tun le naca dxi'a. Que lë ni na', buli'bí'i ládxi'li', en guli'gún xichina' idú ládxi'li'. <sup>20</sup> Buli'yútsöca', neda' caz zuína' ga nu riyaza, en rulidza'. Channö nútí'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'. <sup>21</sup> Núlöli' idéla'li' lu le raca yödzölió, neda' guna' ga cö'öli' tsözxön len neda' ga na' rō'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' gurō'lena' Xuza' tsözxön ga na' rō'ë rinná bë'ë. <sup>22</sup> Nu riyöni, ral-la' uzë nagui lë ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo."

## 4

*Yöl-la' ba ta'gu'ë Dios yehua' yubá*

<sup>1</sup> Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxí lúzuba' böa' bëdxi. Chi'i ni bulidza neda', gunná: "Gudá xitsá'alö ni, ate' neda' uluí'ida' li' le run bayudxi ilaca tödi ni."

<sup>2</sup> La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. <sup>3</sup> Rëpi yösa bení' Nu na' rö'ö lataj na', ca na' rëpi yösa bení' guiöj jaspe, en guiöj cornalina, yugu' guiöj nazáca'da'. Idú gásibi'ilö lataj na' zoa biguita' le naca lachi ca naca guiöj esmeralda, le rëpida' yösa bení'. <sup>4</sup> Idú gásibi'ilö lataj na' nacua' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguíchido'os, en dxíagaca ícjagaquië' le néquiquequini oro. <sup>5</sup> Ta'rúaj yösa, en guziú' rinnë lu lataj lo ga ni' rö'ö Nu na', ate' bö zxon ru'u. Lahui' lo lataj na' tu'zení' gadxi le ta'gú'u bení', le nácagaca gadxi bö' dzágagaca Dios. <sup>6</sup> Ca dödilö lahui lataj ni dë tu ca naca tu nísado' le rëpi yösa bení' ca guiöj jara.

Nacua' tapa nupa nabángaca cuiti lataj na', tsölá'a huéaj, ate' zían guiöj lógaca dxíagaca zaca' cüdzi'löguequi, en láhuilöguequi. <sup>7</sup> Tu nu nutsa' ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'. <sup>8</sup> Idápatë nupa ni, nacua' xopa xíligaca que queëguequi, ate' idá'alöguequi, en lé'elöguequi xíliguequi dxíada'gaca zían guiöj löguequi. Rëla, en te za bití' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

<sup>9</sup> Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, <sup>10</sup> tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiquequini oro dxía ícjagaquië' lahui' lo lataj ga ni' rö'ö rinná bë' Nu na', ta'nnë':

<sup>11</sup> ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'të le dë!

¡Ca rë'ëni quézinu' nacua', en gula'sí lo nacua'!

## 5

*Tu guichi, en Bönni' náquië' Bö'cu' Zxíla'do'*

<sup>1</sup> Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le. <sup>2</sup> Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

<sup>3</sup> Cuntu nu guca usalaj guichi na', en bití' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. <sup>4</sup> Ní'irö gurödxá' tu' cabí bidzöli nu naca lesaca' usalaj guichi na', en bití' bidzöli nu naca lesaca' ulaba le, en cuntu nu naca lesaca' uyú le. <sup>5</sup> Ní'irö tuë' bönni' gula ni' gudxë' neda', gunné': "Bití' cödxi'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidélinë' lu yúgu'të le raca, en séqui'në' uladzu'ë le naguéla'gaca guichi ni, en usalajë' le."

<sup>6</sup> Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxíla' zoa nu bëti lëba' lahuë' Dios, nacua' gadxi lúzuba', en gadxi guiöj



loba', le tu'lu'i ca nácagaca gadxi bö' na' dzágagaca Dios, nasöl-lë'ë léguequi idútë yödzölió.  
 7 Gudödë' Bönni' náquië' Bö'cu' Zxíla'do', en gudélé'ë guichi na' lu na' ibëla Nu na' rö'ö lataj lo na'.  
 8 Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaqueië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' rulu'i yöl-la' rulidza Dios quégaca bönachi queë'.  
 9 Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',  
 en uládu'u le naguéla'gaca le,  
 tu' bë'u lataj yugu' bönni' gulútië' Li',  
 ate' len xichönu' böá'uu' bönachi para ilequi queë' Dios,  
 nupa nácagaca bönachi izá'a nacuá' idútë yödzölió,  
 bönachi tu'i yúgu'të didza' yúbölö,  
 en nabábagaca yúgu'të yödzö,  
 en yúgu'të luyú nacuá' idútë yödzölió.

10 Benu' ga nácagaquië' bönni' ta'nná bë'ë  
 en ga nácagaquië' bixúz queë' Dios queëru'.  
 Benu' ga ta'nná bë'ë lu yu yödzölió.

11 Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë.  
 Nacu'ë idú gásibi'ilö lataj lo na' tsözxön len nupa na' nabángaca, enca' yugu' bönni' gula na'.  
 12 Tu'ë zidzaj didza' yúgu'të', ta'nnë':  
 ¡Bönni' na' náquië' Bö'cu' Zxíla'do' gulútië',  
 náquië' lesaca' gata' yöl-la' unná bë' lu në'ë,  
 en yöl-la' tsahui', en yöl-la' réajni'i, en yöl-la' huáca!  
 ¡Náquië' lesaca' gunru'-në' bal, en tseaj ládxi'ru' Lë',  
 en cú'uru'-në' yöl-la' ba!

13 Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacuá' yugu' lataj na', ta'nná:  
 ¡Yöl-la' ba Nu na' rö'ö lataj lo,  
 enca' Bönni' na' náquië' Bö'cu' Zxíla'do'!  
 ¡Gúntica'siru'-në' bal  
 en cú'utica'siru'-në' yöl-la' ba,  
 ate' inná bë'tica'së' Lë'!

14 Idápatë nupa na' nabángaca ta'nná: "¡Ca' gaca!"

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

## 6

### *Yugu' le naguéla'gaca guichi*

1 Ní'irö bilé'eda'-në' Bönni' náquië' Bö'cu' Zxíla'do', ate' buládu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chi'i ca guziú' rinnë, gunná: "¡Gudá uyú'!"

2 Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatërö lo para idéli'në' lu gudil-la.

3 Cate' buládu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú'!"

4 Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzjë' queë' tu guié tuchi' zxön.

<sup>5</sup> Cate' buládu'ë le bunni le naguela' guichi na', biyönda' nu bunni na' nabán, ate' gunná: "¡Gudá uyú!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zzigóns. <sup>6</sup> Biyönda' ruí' didza' tu chi' gatsaj láhui'lö tapa na' nabángaca, ate' gunná: "Chopa guíë zxoá' xtila len lazxaj que tu dza huen dxin tu' gaca gubín, en xopa guíë zxoá' cebada len lazxaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la."

<sup>7</sup> Cate' buládu'ë le budapi le naguela' guichi na', biyönda' ruí' didza' nu budapi na' nabán, ate' gunná: "¡Gudá uyú!"

<sup>8</sup> Buyúa', en bilé'eda'-ba' tuba' böa' gulaj, ate' nu na' dxía lëba' nazí' le Yöl-la' Guti, ate' zéajlen nu na' nu nazí' le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guíë tuchi', en len yöl-la' ridún, en len yugu' yödzöhuë', en len yugu' böa' guixi' sínia' dzö'öba' luyú.

<sup>9</sup> Cate' buládu'ë le guyu' le naguela' guichi na', bilé'eda' zcan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. <sup>10</sup> Guluí' zidzaj didza' yugu' bö' ni, gula'nná: "¡Xantu' Lá'ayi, runu' ca rnno! ¿Bátaxi caz uchi'a usöröu' queëtu', en uzí' lëbu' yugu' bönni' nacu'ë yödzölió tu' gulútië' netu'?"

<sup>11</sup> Bulu'nödzjë' quéguequi yugu' lari' chiguíchido'os ilácuë', en gulë' léguequi: "Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ili'."

<sup>12</sup> Cate' buládu'ë le buzzopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. <sup>13</sup> Gula'guínnaj böljá lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. <sup>14</sup> Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. <sup>15</sup> Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bë'enë' bönni' röjáquië' gudil-la, en yugu' bönni' dë lu ná'agaquië', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquië' gapa naca zcan bulóaj, en gapa naca lë'e guiöj lu guí'ado'. <sup>16</sup> Gulë' yugu' guí'ado' na', en yugu' lë'e guiöj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. <sup>17</sup> Chibidxín dza uluí' lahui yöl-la' rilé quéguaquië', ate' ¿nuzxi caz sequi' guá' ilén le?"

## 7

### *Tu gayuá' yu' tapa-un milë' bönni'*

<sup>1</sup> Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'záguë'ë xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'tüë' gubáz lá'ayi zë'ë rirúajë' ga rilén gubidza. Nu'ë tu le udë'ë nupa náacagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. <sup>3</sup> Gudxë' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

<sup>4</sup> Biyönda' tsca náacagaquië' bönni' da' légaquië' lë na' naca bë'. Náacagaquië' idú tu gayuá' yu' tapa-un milë' ladaj yúgu'të cö' zxi'ini xi'söë' Israel. <sup>5</sup> Yugu' bönni' na' da' légaquië' lë na' naca bë' náacagaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.  
<sup>6</sup> Chinnu milë' di'a dza queë' Aser.  
 Chinnu milë' di'a dza queë' Neftalí.  
 Chinnu milë' di'a dza queë' Manasés.  
<sup>7</sup> Chinnu milë' di'a dza queë' Leví.  
 Chinnu milë' di'a dza queë' Isacar.  
<sup>8</sup> Chinnu milë' di'a dza queë' Zabulón.  
 Chinnu milë' di'a dza queë' José.  
 Chinnu milë' di'a dza queë' Benjamín.

*Bönachi guizxi yu nácugaca lari' chiguíchido'os*

<sup>9</sup> Gudödi guca lë ni buyúa', en bilé'egacada' bönachi zián, cuntu nu gaca ulaba léguequi. Nabábagaquië' yúgu'të yödzö tu'i didza' yúbölö idútë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin. <sup>10</sup> Tu'ë zidzaj didza' yúgu'të, ta'nnë':

¡Yöl-la' rusölá za' lu në'ë Dios queëru', rö'ë lataj lo ni,  
 en za' ca' lu në'ë Bönni' na' náquië' Bö'cu' Zxíla'do'!

<sup>11</sup> Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj ládxi'gaquië' Dios, <sup>12</sup> ta'nnë':

¡Ca' gaca! ¡Yöl-la' ba Li', Dios queëtu'!  
 ¡Napu' yöl-la' zxön, en yöl-la' réajni'!  
 ¡Rëtu' Li': "Xclenu'", en runtu' Li' bal!  
 ¡Napu' yöl-la' unná bë', en yöl-la' huáca!  
 ¡Gácatíca'sö caní quiu', Dios queëtu'!  
 ¡Ca' gaca!

<sup>13</sup> Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquië'?"

<sup>14</sup> Neda' gudxa' lë: "Xan, li' nöz quézínu'."

Lë' gudxë' neda': "Nupa ni gula'guí'i gula'záca'da'. Gula'guíbë' lari' nácugaquië', en bulu'un léguequi chiguíchido'os len xichönë' Bönni' na' náquië' Bö'cu' Zxíla'do'. <sup>15</sup> Que lë ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chi'i légaquië' tu' zóaléntica'sö légaquië'. <sup>16</sup> Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá <sup>17</sup> tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxila'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ruí'i yöl-la' na'bán, ate' Dios uzxië' lógaquië' nisa ta'bödxë'."

## 8

*Le igadxi le naguela' guichi*

<sup>1</sup> Cate' buládzu'ë le igadxi le naguela' guichi na', gur'ö dxi yehua' yubá idú gatsaj hora.  
<sup>2</sup> Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. <sup>3</sup> Ní'irö bidë' ia'túë' gubáz lá'ayi, nu'ë tu' zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzéguí'ë le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. <sup>5</sup> Ní'irö gubáz lá'ayi na' bulié' zxíga'do' na' len bo' yalaj dxía lu bucugu na', ate' gurú'unë' le luyú. Gunnë' guziú', ate' bö zidzaj biyón. Guyëpi yösa, en gudödi budó' zxu'.

*Tu'cödxë' lúzuba' böa' bëdxi*

<sup>6</sup> Ní'irö igádxitë' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

<sup>7</sup> Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

<sup>8</sup> Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön. <sup>9</sup> Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láchui'lö nisa na'.

<sup>10</sup> Bucödxë' gubáz lá'ayi bunni lúzuba' böa' bëdxi, ate' böxaj tu bölj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. <sup>11</sup> Bölj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ní'a que nisa na' böáca silá'.

<sup>12</sup> Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bölj. Caní guca, bití' buzení' gubidza ia'láti'do'os ca gatsaj tu gatsaj dza, en bití' bulu'zení' bölj, en beo' ia'láti'do'os ca gatsaj tu gatsaj rëla.

<sup>13</sup> Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láchui'lö lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tonnë' gubáz lá'ayi na' lúzuba' böa' bëdxi!"

**9**

<sup>1</sup> Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bölj lúzxiba böxaj luyú, ate' bulu'nödzejë' nu na' zxí'ini guië' que lataj chul-la. <sup>2</sup> Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ní'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë léga'caba' lataj iládu'ba' bönachi ca tunba' xöjnö' dzö'öba' luyú. <sup>4</sup> Gunná bé'enë' léga'caba' bití' ilún dítjaba' guixi' rö'ö luyú, en bití' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' bití' da' lë na' naca bë' nu nequi queë' Dios ra' xigágaquië'. <sup>5</sup> Bití' bë'ë léga'caba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. <sup>6</sup> Yugu' dza na' ilë'ënë' yugu' bönni' iluti cuíngaquië', pero bití' ila'zéqui'në'. Ilë'ëninë' ilátië', pero ucuíta cuini yöl-la' guti.

<sup>7</sup> Nalá'gacaba' böchi'zu na' ca náca'gacaba' böa' nácu'gacaba' le néquiquequini guië', para tsöjácaba' gudil-la. Dxíagaca íc'jagacaba' le náca'gaca ca tu le néquini oro. Naca lógacaba' ca naca lógaca bönachi. <sup>8</sup> Naca guitsa' íc'jagacaba' ca naca guitsa' íc'janu nigula. Náca'gaca láyi'gacaba' ca náca'gaca láyi'ba' bëdxi guixi'. <sup>9</sup> Nácu'gaca luchú'ugacaba' le néquini guië'. Ta'gú'u bö xiligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. <sup>10</sup> Náca'gaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. <sup>11</sup> Zoa nu rinná be'ë léga'caba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

<sup>13</sup> Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'i didza' gatsaj láchui'lö tapa le náca'gaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. <sup>14</sup> Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

<sup>15</sup> Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacuá' yödzölió. <sup>16</sup> Biyönda' tsca nácagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopa gayuá' mil milë'.

<sup>17</sup> Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bédxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. <sup>18</sup> Yugu' lë na' ta'rúaj ruá'agacaba' bétigaca tu cö' tsa tu tsonna cö' bönachi nacuá' luyú, lë na' nácagaca guí', en dzön, en lë na' ruzégui'da'. <sup>19</sup> Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

<sup>20</sup> Ia'zícá'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guiöj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. <sup>21</sup> Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

## 10

### *Gubáz lá'ayi, nuá' lu në'ë tu guíchido'*

<sup>1</sup> Ní'irö bilé'eda'-në' ia'túë' gubáz lá'ayi nál-la, bötjë' birúajë' yehua' yubá, nácuë' böaj lúzxiba, en zoa ca tu biguita' ícjalë'. Rëpi yösa bení'lahuë' ca run gubidza, ate' nácagaca ni'ë ca ya'zxön ta'yegui. <sup>2</sup> Zoa lu në'ë tu guíchido' nayalaj, ate' tu ni'ë ibëla nulibë' lu nísado', en ia'tú ni'ë yögöla nulibë' luyú bidxi. <sup>3</sup> Ní'irö bë'ë zidzaj didza', ate' biyön chi'ë ca riyön cate' ribödxí'aba' bédxi guixi', en cate' budxi bë'ë zidzaj didza' na', bila'yöni chí'igaca gadxi guziú'. <sup>4</sup> Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí' didza' yehua' yubá, rë neda': "Bucáchi'sö didza' ni gulu'i gadxi guziú' na'. Biti' uzúaju' didza' na' lu guichi."

<sup>5</sup> Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxibalö, <sup>6</sup> ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacuá' ni', enca' yödzölió, en le nacuá' ni', enca' nísado', en le nacuá' ni', ate' gunné': "¡Bíti'rö tse! <sup>7</sup> Cate' ucödxë' gubáz lá'ayi igadxi lúzuba' böa' bédxi, usudxinë' Dios le nagachi' queë', lë na' buluf'inë' yugu' huen dxin queë', bönni' ni' gulu'ë didza' uláz queë'."

<sup>8</sup> Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxí' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

<sup>9</sup> Guyija' ga na' zoë' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxë' neda', gunné': "¡Guzxí', gudagu! Lu ru'u gaca zxixi ca naca bidxína'do' queë'ba' buz, pero lë'u huóaca silá'."

<sup>10</sup> Guzxí'a guíchido' na' zönë', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böaca silá' lë'a. <sup>11</sup> Ní'irö gudxë' neda': "Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacuá' yúgu'të yödzö, en gapa tu'i zían didza' yúbölö, en lógaca zían bönni' unná bë'."

## 11

### *Chopë' bönni' tunë' ba nali'*

<sup>1</sup> Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacuá' ni' ta'yéaj ládxi'gaca Dios. <sup>2</sup> Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'."

<sup>3</sup> Gudxë' ca' neda': "Isól-la'a chopë' bönni' ilunë' ba nali quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquië' lari' le naca bödzádzado'." <sup>4</sup> Chopë' bönni' ni tunë' ba nali, nácugaquië' chopa yaga olivo na' nazúaj lu guichi lá'ayi ca naca quégaquië', en nácugaquië' ca' chopa le nuá'gaca guí' na' nacuá' lahuë' Dios, Xani yödzölió. <sup>5</sup> Channö guë'ëni nu guá' dö' quégaquië', irúaj guí' ruá'agaquië' le usuniti nu na' rë'ëni guá' dö' quégaquië', en guti nu na', enca' nupa ta'dá'baga' légaquië'. <sup>6</sup> Chopë' ni dë lu ná'agaquië' ulu'záguë'ë xinöza nisa guió'j lúzhiba, para cabí galaj guió'j tsca dza na' ralla' ilu'ë didza' uláz queë' Dios, ate' dë lu ná'agaquië' ca' ilunë' ga huóaca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilé'ënnë'. <sup>7</sup> Cate' údxi ilunë' ba nali, irúajba' böa' sínia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'. <sup>8</sup> Le gulaca cazë' ila'tulusö ca' la' nöza lu yödzö zxön, ga ni' gudë'ë ca' Xanru' lë'e yaga cruz, en ca rucúdzuru' didza', nazí'i le ca' Sodoma, enca' Egipto. <sup>9</sup> Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tuí'i zían didza' yúbölö, en bönachi yúgu'të luyú, ila'lé'eni le gulaca cazë', en biti' iluí' lataj nu ucache' légaquië' yeru ba. <sup>10</sup> Ulu'dzëjade'e nupa nacuá' yödzölió tu' gulatië', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacuá' yödzölió.

<sup>11</sup> Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'. <sup>12</sup> Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzhiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. <sup>13</sup> La' ní'isö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

<sup>14</sup> Chigudödi le buropi le rusuniti bönachi, ate' chizóa idxín le bunni le usuniti léguequi.

*Rucödxë' gubáz lá'ayi igadxi lúzuba' böa' bëdxi*

<sup>15</sup> Bucödxë' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió  
nadödigaca lu në'ë Xanru' Dios,  
en lu në'ë Cristo.  
Lë' inná bë'tica'së'.

<sup>16</sup> Ní'irö idapa uru'ë bönni' gula na' röögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios. <sup>17</sup> Ta'nnë':

¡Xantu' Dios, napa cazu' yöl-la' huáca!  
¡Guzóa cazu', en zoa cazu', en ral-la' guída cazu'!  
¡Xclenu', tu' chibugunu' dxin yöl-la' huáca zxön quiu',  
en risí lo' rinná bë'u!

<sup>18</sup> ¡Gula'lé bönachi yugu' yödzö  
pero chibidxín dza gunu' léguequi xíguia'!  
¡Naca dza uchi'a usöröu' nupa chinátigaca!  
¡Ubi'u quégaquië' huen dxin quiu',  
yugu' bönni' gulu'ë didza' uláz quiu',  
nupa néquiguequi quez quiu', en gulún bal Lo',  
nupa nácagaca cá'asö, en nupa nácagaca lo!  
¡Chibidxín dza usunítu' nupa bulu'suniti yödzölió!

<sup>19</sup> Ní'irö gualaj judo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' zxu', en gurö'ö guió'j bögui' yöla sunna.

## 12

### *Tunu nigula, en tuba' bëla zxön xitsiní'*

<sup>1</sup> Ní'irö bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu böljaj bení'. <sup>2</sup> Nigula ni chizóa soa bí'ido' queénu, en ribödxinu tu' rúdia' lë'ënu. Riguí'i rizáca'nu ruzóanu bí'ido' queénu. <sup>3</sup> Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' lé'gacaba' luyú. Guzuí'ba' bëla zxön xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bi' bí'ido' queénu na' ca gáljabi' na'. <sup>5</sup> Buzóanu-bi' tubi' bi'i bönni'do' ral-la' inná bé'ebi' yúgu'të yödzo len tu xiyaga guié. La' bucuítatë'ë-bi' Dios bí'ido' queénu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. <sup>6</sup> Buzúnnajnu nigula na', zéajnu lu lataj cá'asö, ga ni' chinupë'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

<sup>7</sup> Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsiní' na'. Gula'díl-la bëla zxön na', en yugu' gubáz xihui' dá'gaca lëba' <sup>8</sup> pero biti' bila'deli' lu gudil-la na'. Que lë ni na' bí'ti'rö bidzöli xilátjagaca yehua' yubá. <sup>9</sup> Caní guca, gula'ró'unë'-ba' bëla zxön xitsiní' na' ní'lö. Nácaba' bëla na' zóaba' dza ni'te, lëba' tu' xihui'. Gula'ró'unë' tu' xihui' yödzo'lió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chí'i ruí'i zidzaj didza' yehua' yubá, rna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'ró'unë' ní'lö nu na' buzegui yugu' böchi' luzá'aru' didza'. Rëla, en të dza buzegui lé'gaquië' didza' lahuë' Dios queéru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali queë'. Biti' gulu'í'i ládxi'gaquië' yöl-la' na' bán quégaquië', pero gulatië'. <sup>12</sup> Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzo'lió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

<sup>13</sup> Cate' gúquibe'eba' bëla zxön xitsiní' na' chigula'ró'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queénu. <sup>14</sup> Ní'irö Dios bë'ë-nu nigula na' chopa xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj. <sup>15</sup> Bëla zxön xitsiní' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Guyalaj luyú na', en güí'i nisa yegu na' gúbaba' bëla zxön xitsiní' na'. <sup>17</sup> Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queénu di'a dza queénu, nupa na' tun ca rna le gunná bë'ë Dios, en nazí' lu në'eguequi le nunë' Jesucristo ba nali.

## 13

### *Chópaba' böa' sínia'*

<sup>1</sup> Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chí le néquini oro, ate' láhuigaca ícjaba' da' tu la le naca xihui' le cabí rilé'e Dios dxí'a. <sup>2</sup> Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budödiba' lu na'aba' böa' sínia' ni yöl-la' huáca queëba', enca' xilátjaba' ga rinná bë'ëba', en yöl-la' unná bë' zxön queëba'. <sup>3</sup> Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani

yúgu'tè bönachi yödzülió, en yöjdá'gaca böa' sínia' na'. <sup>4</sup> Gula'yéaj ládxi'gaquié'-ba' bëla zxon xitsiní' na', tu' budödiba' yöl-la' unná'bè' queéba' lu ná'aba' böa' sínia' na'. Gula'yéaj ládxi'gaquié'-ba' böa' sínia' na', en gula'nné': “¿Nuzxi caz naca zxon ca naca zxon böa' sínia' na', en nuzxi caz sequi' tíl-lalen lëba'?”

<sup>5</sup> Guta' lu ná'aba' böa' sínia' na' bë'ëba' didza' ba zxon, en didza' xihui' le rinnëba' queé' Dios. Idú ca chopa-un beo' guta' lu ná'aba' yöl-la' unná'bè'. <sup>6</sup> Gusí loba' rinnëba' queé' Dios, en rinnë xihui'ba' que Lë' Dios, en que lataj lá'ayi queé', en quégaca nupa nacua' yehua' yubá. <sup>7</sup> Guta' lu ná'aba' gudíl-lalenba' nupa néquiquequi quez queé' Dios, en bucúl-laba' légaquié'. Guta' ca' lu ná'aba' gunná'bè'ëba' yúgu'tè bönachi izá'a, bönachi yúgu'tè yödzü, en bönachi tuí' yúgu'tè didza' yúbölö, en bönachi iduté yödzülió. <sup>8</sup> Yúgu'tè bönachi nacua' yödzülió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajë' Bönni' na' náquié' Bö'cu' Zxíla'do' queé' Dios cate' si' guta' yödzülió. Buzóa' cazë' Dios gútië' Bönni' na' ní'a quégaca bönachi queé'.

<sup>9</sup> Channö nu riyöni, ral-la' uzë nagui. <sup>10</sup> Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxon ladxi' nupa néquiquequi queé' Dios, en ta'yéajlë' Lë'.

<sup>11</sup> Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxon xitsiní' na'. <sup>12</sup> Dë lu ná'aba' böa' sínia' ni yúgu'tè yöl-la' unná'bè' queéba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'tè bönachi nacua' yödzülió böa' sínia' zí'alö na', böa' na' buniti hué' le guti lëba'. <sup>13</sup> Böa' buropi na' runba' ca' le nácagaca bë' ga ridxintë runba' ga ruhuöxaj guí' le za' lúzxiba, en ruhuöxaj luyú lógaca yúgu'tè bönachi. <sup>14</sup> Rizí' yé'eba' bönachi nacua' yödzülió len le nácagaca bë' dë lu ná'aba' runba' loba' böa' sínia' zí'alö na'. Rinná'bè'ëba' bönachi nacua' yödzülió ilunë' tu budó' ca nácaba' böa' sínia' na' gúcaba' hué' que guié tuchi', ate' nabanba'. <sup>15</sup> Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gú'i didza' budó' ni, en gun ga nu guti yúgu'tè nupa bití' ila'yéaj ládxi'gaca le. <sup>16</sup> Benba' ga gudá' yúgu'tè bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. <sup>17</sup> Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. <sup>18</sup> Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

## 14

### *Le tul-lë' tu gayuá' yu' tapa-un milë' bönni'*

<sup>1</sup> Gudödi ni' buyúa', en bilé'eda'-në' Bönni' na' náquié' Bö'cu' Zxíla'do' zuiné' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquié' Lë' Bönni' na' náquié' Bö'cu' Zxíla'do', enca' Lë' Xuzë'. <sup>2</sup> Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxon, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que. <sup>3</sup> Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacua' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquié' ladaj bönachi yödzülió. <sup>4</sup> Nácagaquié' bönni' ni idú ladxi'. Bití' gula'cuá'lenë' nigula, tu' nácagaquié' idú bönni' ra'bán. Söjácalenë' Bönni' na' náquié' Bö'cu' Zxíla'do' gátitës ga sa'yéajë'. Cristo caz böá'uë' légaquié' ládjagaca bönachi, ate' nácagaca nupa bulu'dödi cuíngaquié' zí'alö queé' Dios, enca' queé' Bönni' na' náquié' Bö'cu' Zxíla'do'. <sup>5</sup> Catu caz gula'zí' yë'ë, ate' cuntu nu gaca bi innë quégaquié' ga na' nacu'ë ca dödilö lahui lataj lo ga rö'ë Dios.



*Didza' röjuá'gaquië' tsonna gubáz lá'ayi*

<sup>6</sup> Ní'irö bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacua' yödölió, bönachi idütë luyú, yúgu'të bönachi izá'a, en bönachi tu'i yúgu'të didza' izá'a, en bönachi yúgu'të yödö. <sup>7</sup> Ru'ë zidzaj didza', rnnë': "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Guli'tséaj ládxe'ë Dios, nunë' lúzxiba, en luyú, en nísado', en gapa ralaj nisa!"

<sup>8</sup> Ia'tué' gubáz lá'ayi söjnhuë' gubáz lá'ayi ni, en rnnë': "¡Chibudxi que yödö Babilonia! ¡Chibudxi que yödö zxon na'! Caní guca que, tu' gulún nupa nacua' ni' ga gula'z'í lu ná'agaquië' bönni' yúgu'të yödö ilunë' ca ná'agaca le ta'zë ládxi'gaquië' le ruá' dö'."

<sup>9</sup> Ia'tué' gubáz lá'ayi söjnhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na', enca' budó' queëba', en gü'i lataj ta' ra' xigué o lu në'e le naca bë' da' lëba', <sup>10</sup> gunë' Dios nu ni xigua' lu yöl-la' rilé queë! ¡Qui'i saca' nu na' lu guí, en lu lë na' ruzéguí'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! <sup>11</sup> Cuéntica'sö dzön que guí' ga ni' qui'i saca' nu na'. Rëla, en te dza qui'i saca', ate' catu caz gata' lataj ulu'z'í ládxi'gaca nupa ila'yéaj ládxi'gaca-ba' böa' sínia' na', en budó' queëba'. Biti' ulu'z'í ládxi'gaca nupa ilu'i lataj ta' laba' léguequi. <sup>12</sup> Que lë ni na' nupa na' néquiquequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxon ladxi'."

<sup>13</sup> Ní'irö biyönda' chi'i nu ruí' didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'z'í ládxi'gaquië' lu dxin gulunë', en ulu'zi'ë xibé ca sa'yéaj le gulunë'!"

*Tu'zi'ë le rulá' luyú*

<sup>14</sup> Ní'irö buyúa', en bilé'eda' tu böaj lúzxiba chiguí'chido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë. <sup>15</sup> Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu zxoa' xtila, tu' chibidxín dza nu uzí' le! ¡Chinábídx do que le dë yödölió!"

<sup>16</sup> Ní'irö Nu na' rö'ö lu böaj na' bugún dxin guíë tuchi' idütë yödölió, ate' buzi'ë le rulá' luyú.

<sup>17</sup> Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. <sup>18</sup> Birúajë' ia'tué' gubáz lá'ayi ra' bucugu ni', dë lu në'ë inná bé'enë' guí, ate' bë'ë zidzaj didza', en bulidzë' gubáz lá'ayi z'í'alö na' nu'ë guíë tuchi', gunné': "¡Bugún dxin guíë tuchi' quiu', en butubi tu'xóa huéaj le ta'bía lubá uva rö'gaca yödölió, tu' chiná le ta'bía lubá uva!"

<sup>19</sup> Ní'irö gubáz lá'ayi ni bugunë' dxin guíë tuchi' idütë yödölió, en butubë' le ta'bía lubá uva rö'gaca luyú, ate' yöjchú'unë' le ta'bía lubá uva na' lu yeru zxon ga izí xisi. Yugu' lë ni rulu'i ca gunë' Dios, gunë' xigua' bönachi nacua' yödölió. <sup>20</sup> Bulu'libë' le ta'bía lubá uva na' lu lerui zoa ní'ilö ra' yödö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsa gaca sá'aru' idú chinnu dza.

## 15

*Yugu' gubáz lá'ayi nuá'gaquië' gadxi yödöhuë'*

<sup>1</sup> Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödöhuë' röjsétegaca, le ugunë' dxin Dios, údxi gunë' xigua' bönachi yödölió.

<sup>2</sup> Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca

tu nísado', en nuá'agaquië' le tul-la, yugu' le bë'ë Dios quégaquië'. <sup>3</sup>Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxöntëro nacu' Li'!

¡Zxöntëro naca yúgu'të le benu',

le tun ga rubánu'!

¡Li' rinná bé'enu' yugu' yödzö!

¡Idú dxí'ado', en idú tsahui' naca ca bi runu'!

<sup>4</sup>¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzö,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

<sup>5</sup>Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'. <sup>6</sup>Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. <sup>7</sup>Ní'irö tu nu nutsa' ladaj idapa nupa na' nabángaca, bë' que queëgaquië' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé queë' Dios, Bönni' zoa cazë'. <sup>8</sup>Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

## 16

### *Yugu' zxíga'do' yúdzugaca le rulu'i yöl-la' rilé queë' Dios*

<sup>1</sup>Ní'irö biyönda' chí'i nu ru'i zidzaj didza' lataj lá'ayi na', en rë gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queë' Dios!"

<sup>2</sup>Guyijë' gubáz lá'ayi zí'alö, en yöjlaljë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queëba'.

<sup>3</sup>Ní'irö guyijë' gubáz lá'ayi buropi, en yöjlaljë' le yudzu zxíga'do' na' zönë' lu nísado', ate' nisa na' böaca rön ca naca rön queë' tu bönni' nati, ate' gulati yúgu'të nupa nabángaca nacuá' lu nísado' na'.

<sup>4</sup>Guyijë' gubáz lá'ayi bunní, en yöjlaljë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön. <sup>5</sup>Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tsahui' nacu' tu' richugu' caní quégaca bönachi <sup>6</sup>tu' bulu'laljë' rön quégaca nupa néquiguequi quez quiu', en quégaca nupa gulu'i didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca quégaquië'!"

<sup>7</sup>Ní'irö biyönda' ru'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tsahui' naca ca richugu' quégaca bönachi!"

<sup>8</sup>Guyijë' gubáz lá'ayi budapi na', en yöjlaljë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len gu' que. <sup>9</sup>Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnë' zi'i queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

<sup>10</sup>Guyijë' gubáz lá'ayi guyu' na', en yöjlaljë' le yudzu zxíga'do' zönë' lu xilataj böa' sínia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'gu'i gula'zaca' bönachi, guláguya'a lúdxi'guequi, <sup>11</sup>pero biti' bulu'bí'i ládxi'gaca para cabirö ilúngaca le

ruá' dö' tunë'. Gula'nnë zi'i queë' Dios zoë' yehua' yubá tu' ta'guí'i ta'zaca', en tu' dxíagaca yudzu' ya'a na'.

<sup>12</sup> Guyijë' gubáz lá'ayi buzxopi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para íbá'a nōza ga ila'dōdi nupa ta'nná bē', nupa ila'rúaj zaca' ga rilén gubidza.

<sup>13</sup> Ní'irō bilé'eda' bëla zxön xitsini' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. <sup>14</sup> Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yōjaca bö' xihui' na' idú yōdzōlió, en yōjtúbigaca nupa ta'nná bë', para tsójáquië' lu gudil-la na' gaca lu dza zxön queë' Dios, Bönni' napa cazë' yöl-la' unná bë'. <sup>15</sup> Caní rnnë' Dios: “¡Buli'yútsōca! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sō dxi'a, para cabí gun bayudxi ta xiguídisō, en para cabí utuí'i nu na' lahui' lógaca bönachi.” <sup>16</sup> Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

<sup>17</sup> Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë' lataj lo na', rnna: “Chinaca.”

<sup>18</sup> Ní'irō guyëpi yōsa, en gurō'ōda' bö, en gunnë' guziú'. Gudōdida' budó' xzu', le gudōdida'rō ca gudōdi tsanni ni nacuá' bönachi yōdzōlió. <sup>19</sup> Birúaj tsonna cō'ölō yōdzō zxön na', ate' gula'guínnaj yōdzō nacuá' yōdzōlió. Yōjnenë' Dios le naca xihui' gulún bönachi yōdzō zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. <sup>20</sup> Bila'gachi' yugu' luyú bidxi dzō'ō lu nísado', ate' bítirō gula'lá' yugu' guí'ado'. <sup>21</sup> Bōxaj ca' guiōj bögui' yōla sunna, le za' lúzxiba, en yōjsóa ícagaca bönachi, ate' nál-li' tu tu guiōj bögui' na' ca tu gayuá' guië, ate' yúgu'të bönachi gula'nnë xihui' queë' Dios tu' nōzi guiōj bögui' na' tu' bulu'sáca'da' zi'i léguequi.

## 17

### *Dios richúquië' queënu nigula udá dzaga*

<sup>1</sup> Ní'irō bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bë'lenë' neda' didza', gunnë': “Gudá ni, ate' uluí'ida' lí' ca gunë' Dios, gunë'-nu xíguia' nigula udá dzaga na', rō'ōnu lu nísado' zían. <sup>2</sup> Gula'cua'len lënu nupa ta'nná bë' luyú yōdzōlió, en gulún le ruá' dö', ate' gula'zudxi nupa nacuá' yōdzōlió ni, tu' gulunlen lënu le bití' naca dxi'a.”

<sup>3</sup> Dios Bö' Lá'ayi guzóalenë' neda', ate' gubáz lá'ayi na' guchë'ë neda' tu lu lataj cá'asō, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nnë xihui' queë' Dios.

<sup>4</sup> Nigula na' dxíanu lëba' nácunu lari' xiná chul-la, en lari' xiná guí'ido'os. Nazí'i biquitaj queënu le néquiguequini oro, en yugu' guiōj nazaca', en yugu' bugá. Lu ná'anu rō'ō tu zxíga'do' néquini oro, en yudzu le nácagaca xihui', en le ruá' dö' runnu. <sup>5</sup> Ra' xigánu dá'gaca ca lënu, le tu'luí'i tu le nagachi', en ta'nná caní: “Yōdzō Babilonia Le Naca Lo”, en “Xiná'agacanu Nigula Udá Dzaga”, en “Xiná'agaca Le Xihui' Dzō'ō Yōdzōlió.”

<sup>6</sup> Gúquibe'eda' nazúdxinu nigula na' tu' bennu ga gulaj rōn quégaca nupa néquiguequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'. <sup>7</sup> Gudxë' gubáz lá'ayi na' neda', gunnë': “¿Bizx que rubáninu? Uzéajni'ida' lí' lë na' nagachi', le ruluí'i ca naca nigula ni, enca' le ruluí'i ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'. <sup>8</sup> Böa' sínia' na' bilé'enu' guzóaba' zí'alō, pero bití' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúajë' Dios dza ni'te quez cate' si' gata' yōdzōlió. Cate' ila'lé'eni böa' sínia' na' guzóaba' zí'atëlō, pero bití' zóaba' na'a, ulu'bani tu' nubanba'.

<sup>9</sup> Lë ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi guí'ado' gapa r'önu nigula na'. <sup>10</sup> Lësca' caní gadxi ícjaba' na' tu'luí'i gadxë' bönni' ta'nná bē'ë. Gáyu'ë bönni' ni chigudödi quégaquië'. Tuë' bönni' ni rinná bē'ë na'a, ate' ia'túë' bití' ridxíninë', pero cate' guidé', inná bē'ë tu chí'ido'osö. <sup>11</sup> Böa' s'inia' na' guzóaba', pero bití' zóaba' na'a, ruluí'i tu bönni' izxunu', inná bē'ë. Nunë' tsözxön bönni' gadxi na', ate' tödi ni nítië' tsaz.

<sup>12</sup> 'Chi lúzuba' na' bilé'enu' tu'luí'i chië' bönni' ila'nná bē'ë. Bití' ta'z'í'ininë' yöl-la' unná bē', pero ila'zi'ë yöl-la' unná bē' tu chí'ido'osö, en ila'nná bē'ë tsözxön len böa' s'inia' na'. <sup>13</sup> Chië' bönni' ni, lébisö nácagaquië', ate' ulu'dödë' yöl-la' unná bē' quégaquië', en le nazí' lu ná'agaquië' lu ná'aba' böa' s'inia' na'. <sup>14</sup> Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bē'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

<sup>15</sup> Gubáz lá'ayi na' gudxë' ca' neda', gunné': "Yugu' nísado' na' bilé'enu' gapa ni' r'önu nigula udá dzaga na', tu'luí'i bönachi yugu' yödzö, en yugu' bönachi izá'a, en bönachi tuí'i yugu' didza' yúbölö, en bönachi yugu' luyú. <sup>16</sup> Chi lúzuba' böa' s'inia' na' bilé'enu', en tu'luí'i chië' bönni', bití' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahuë' xipéla'nu, en ulu'zégui'ë-nu len guí'. <sup>17</sup> Dios uchízië' icja ládxi'do'gaquië' chië' bönni' na' le gun ga ilunë' ca ré'ëni quézinë' Lë', ate' ilácagaquië' tuz, en ulu'dödë' yöl-la' unná bē' quégaquië' lu ná'aba' böa' s'inia' na' para gaca ca rnna xtídzë'ë. <sup>18</sup> Nigula na' bilé'enu'-nu ruluí'i yödzö zxön na' rinná be'e nupa ta'nná bē' yödzölió ni."

## 18

### *Riguinnaj yödzö Babilonia*

<sup>1</sup> Gudödi na' bilé'eda'-në' ia'túë' gubáz lá'ayi ruhuötjë' rirúajë' yehua' yubá, en dë lu në'ë yöl-la' unná bē' zxön, ate' guyëpi yösa bení' luyú ni'a que yöl-la' bení' queë' gubáz lá'ayi na'. <sup>2</sup> Bē'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihuí', en xilátjagaca bö' xihuí' tun ditaj bönachi!

¡Yugu' biguínni xitsiní', en yugu' biguínni xihuí' tu'zóaba' xilátajgacaba' ni'!

<sup>3</sup> Caní guca que yödzö na' ni'a que le gulún bönachi nacuá' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bē' luyú yödzölió gulunlen légaquië' le ruá' dö',

ate' guta' yöl-la' tsahui' quégaquië' bönni' to'o tuti' nacu'ë yödzölió

tu' guyánda' yugu' le nazaca' gula'zë ladxi' bönachi ni'.

<sup>4</sup> Ní'irö biyönda' ruí'i didza' ia'tú nu zoa yehua' yubá, rnna:

Gulí'ruáj lu yödzö na', libí'ili' néquili' quia'

para cabí gunli' dul-la' tsözxön len légaquië',

en para cabí quí'i sáca'li' le gaca quégaquië'.

<sup>5</sup> Nayánda' dul-la' nabága'gaquië',

en chinayasa nadxín caz lúzxiba,

pero Dios röjnenë' le ruá' dö' núngaquië'.

<sup>6</sup> Bulí'bí'i quégaquië' ca na' gulunë' queéli'.

Bulí'bí'i quégaquië' chopa cö' tsca le gulunë'.

Bulí'bí'i quégaquië' chopa cö' tsca le naca xihuí' gulunë' queéli'.

<sup>7</sup> Gulí'gún ga ila'guí'i ila'záquië', en ila'bödxí yéchë'ë

tsca guca yöl-la' ba, en yöl-la' zxön guluí'i cuíngaquië'.

Ta'zá' ládxi'gaquië', ta'nnë':

Rö'ötu' ni, rinná bē'ëtu'.

Bití' nácatu' uzëbi, en catu caz cödxí yéchi'tu'.

<sup>8</sup> Que lë ni na', tu dzasö ila'dxín quégaquië' le ila'guí'i ila'záquië',

yöl-la' guti, en yöl-la' ribödxí yechí', en yöl-la' ridún.  
 Iléguië' lu guí', tu' napa cazë' yöl-la' huáca zxon Xanru' Dios.  
 Lë cazë' usiúdxë' quégaquië'.

<sup>9</sup> Ní'irö gunné': "Ila'bödxí nupa ta'nná bë' luyú yödzölió, en gulún le ruá' dö' tsözxön len légaquië', en bulu'zí' xibé le nequi quégaquië'. Ila'bödxë', en ila'bödxí yéchë'ë cate' ila'lé'enë' dzön que yödzö zxon na' régui. <sup>10</sup> Zí'tu' zí'tu'sö ila'cu'ë tu' iládxiné' ca gaca xíguia' le gaca que yödzö na', ate' ila'nnë': ¡Bica' bayechi' Babilonia, yödzö zxon ni, le gúcada' lo! ¡Tu dzasö guca xíguia' que!"

<sup>11</sup> Ní'irö gunné': "Ila'bödxë' ca' bönni' to'o tuti' nacu'ë yödzölió, en ila'bödxí yéchë'ë ni'a que yödzö na' tu' cabirö soa nu ga'u bi ilúti'ë ni'." <sup>12</sup> Cúnturö nu ga'u ni':

Le néquiquequini oro, en plata,  
 en yugu' guió'j zaca', en yugu' bugá,  
 en yugu' lari' nazáca'da', en lari' xiná chul-la,  
 en lari' dxí'ado', en lari' xiná guí'ido'os,  
 en yugu' yaga rilá' zxixi,  
 en le néquiquequini dxita nazáca'da',  
 en le néquiquequini yaga nazáca'da',  
 en le néquiquequini guíë cobre,  
 en le néquiquequini guíë,  
 en le néquiquequini guió'j jara.

<sup>13</sup> Cúnturö nu ga'u ni':

Canel, en yugu' le rilá' zxixi, en yalaj,  
 en le rilá' zxixi que mirra, en que yöj olíbano,  
 en xisi uva nál-la, en le naca za,  
 en yiözja dxí'ado', en zxoá' xtila,  
 en yugu' búrrodo', en yugu' bö'cu' zxila',  
 en yugu' böa', en yugu' carreta,  
 en yugu' bönni' huen dxin, en ia'bal-la bönachi.

<sup>14</sup> Nupa na' to'o tuti' ilë légaquië', ila'nná:

Nadúagaca le guzé ládxi'li'.  
 Chigudödi quégaca yöl-la' tsahui',  
 en le nácgaca lachi queéli',  
 ate' bítirö idzölili' léguequi.

<sup>15</sup> Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zí'tu' zí'tu'sö tu' iládxiné' ca gaca xíguia' le gaca que yödzö na', en ila'bödxí yéchë'ë." <sup>16</sup> Ila'nnë':

¡Bica' bayechi' yödzö ni guca zxon!

Guca ca tu nigula nácunu lari' nazáca'da',  
 en lari' xiná chul-la, en lari' xiná guí'ido'os,  
 en nazí'i biquitaj queënu le néquiquequini oro  
 en le néquiquequini guió'j zaca', en yugu' bugá.

<sup>17</sup> Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacuá' lë'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zí'tu' zí'tu'sö." <sup>18</sup> Cate' ila'lé'enë' dzön que yödzö na' régui, ila'bödxë', en ila'nnë': "¿Bízxilö yödzö guca zxon ca naca yödzö ni?"

<sup>19</sup> Ní'irö gunné':

Ulu'dxíë' bëchtö ícjagaquië'.  
 Ila'bödxë', en ila'bödxí yéchë'ë, ila'nnë'.  
 ¡Bica' bayechi' yödzö ni guca zxon!

Yöl-la' tsahui' que yödzo ni ben ga guta' yöl-la' tsahui'  
 quégaca yúgu'tè nupa nácagaca xan barco lu nísado'.  
 Tu dzasö guniti yödzo ni.

<sup>20</sup> Buli'dzeja ca gaca que yödzo ni, libí'ili' zóali' yehua' yubá,  
 enca' libí'ili' néquili' queë' Dios,  
 libí'ili', bönni' gubáz queë',  
 en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzo ni  
 ni'a que bi gulún queëli' nupa nacua' lu yödzo ni.

<sup>21</sup> Ní'irö tuë' gubáz lá'ayi nál-la buchisë' tu guiöj zxon le naca ca tu guichi riyëtu, ate'  
 gurú'unë' le lu nísado', gunnë':

La' canísö gaca que yödzo Babilonia,  
 tu' iguinnaj yödzo na' guca lo,  
 ate' bítirö nu udzöli le.

<sup>22</sup> Bítirö nu yöni lu yödzo na' nupa ta'guinni lë'e le rul-la,  
 en calëga nupa tu'cödxí gui  
 en calëga nupa tu'cödxí lúzuba' böa' bëdxi.

Bítirö udzöli bönni' huen dxin ni',  
 en bítirö yöni bö rigú'u le rutu ni'.

<sup>23</sup> Bítirö uzení' nitú guí' lu yödzo na',  
 en bití' yöni chí'ë bönni' rutsaga në'ë ni',  
 en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzo ni,  
 en guzxi' yé'eli' bönachi idútë yödzo lió len yöl-la' gudzá' queëli'.

<sup>24</sup> Lu yödzo ni gulaj xichöngaquië' bönni' gulu'ë didza' uláz queë' Dios,  
 en xichöngaca nupa néquiquequi queë' Dios,  
 enca' xichöngaca yúgu'tè bönachi yödzo lió,  
 tu' bëtigaca nupa nacua' yödzo ni léguëqui.

## 19

<sup>1</sup> Gudödi lë ni biyönda' tuí'i zidzaj didza' bönachi zián nacua' yehua' yubá, ta'nná:  
 ¡Yöl-la' ba Dios! ¡Yöl-la' rusölá runë',

ate' yöl-la' zxon, en yöl-la' unná bë' napë' Dios queëru'!

<sup>2</sup> ¡Naca idútë li, en tsahui' ca rusiúdxë'!

¡Guchúguië' que yödzo na' naca ca tu nigula udá dzaga,  
 en quégaca bönachi lu yödzo na' ila'niti tsaz!

¡Gulún ditaj bönachi yödzo lió tu' nözi le ruá' dö' gulunë'!

¡Dios buzí' lëbë' légaquië'

tu' gulútië' yugu' huen dxin queë'!

<sup>3</sup> Leyúbölö gula'nnë': "¡Yöl-la' ba Dios! ¡Cuéntica'sö dzön ga régui yödzo na'!"

<sup>4</sup> Idapa uru'ë bönni' gula ni' bulu'tsaga lógaquië' lu yu tsözxön len idapa nupa ni'  
 nabángaca, en ta'yéaj lãdxi'gaquië' Dios, Bönni' rö'ë lataj lo queë'. Gula'nnë': "¡Ca' gaca!  
 ¡Yöl-la' ba Dios!"

<sup>5</sup> Ní'irö biyönda' ruí'i didza' tu nu zoa lataj lo na', rnna:

¡Guli'cu'ë Dios queëru' yöl-la' ba  
 yúgu'tëli' runli' xichinë', libí'ili' na' rádxili' Lë',  
 nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië' Bö'cu' Zxíla'do'*

<sup>6</sup> Biyönda' ca' nu ruí'i zidzaj didza', le biyön ca riyön cate' tuí'i didza' bönachi zián, en  
 biyön ca' ca riyön ga ridödi tu yegu zxon, o ca riyön cate' rinnë guziú', ate' rnna:

¡Yöl-la' ba Dios tu' risí lahuë' rinná bē'ë!  
 ¡Napa cazë' yöl-la' huáca!  
 7 ¡Ral-la' udzeja ládxi'ru', en uzí'iru' xibé',  
 en cú'uru'-nē' yöl-la' ba  
 tu' chibidxín dza laní que yöl-la' rutsaga na'  
 queë' Bönni' na' náquië' Bö'cu' Zxíla'do'!  
 ¡Si' lu nē'ë Cristo nupa néquiguequi queë'!  
 ¡Chinabá'a queëbi' bí'i utsaga ná'alēbi' Lē'!  
 ¡Nácabi' le rulu'i nupa na' néquiguequi queë'!  
 8 ¡Dios ru'ë-bi' lataj gácubi' lari' nazáca'da'  
 le naca idú, en rēpi yōsa bení'!

Lari' nazáca'da' na' rulu'i le naca tsahui' núngaca nupa néquiguequi queë' Dios.

9 Ní'irō gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios caz!"

10 Buzóa zxiba' xini'ë gubáz lá'ayi na' para tseaj ládxa'a lē', pero gudxë' neda': "¡Biti' gunu' caní! Neda' ca' naca' huen dxin queë' Dios ca' nacu' li', en ca' nácagaquië' böchi' luzó'o nazí' lu ná'agaquië' le naca idútë li' ca' naca queë' Jesús. ¡Guyéaj ládxi'ë Dios!"

Nupa tu'i didza' uláz queë' Dios, tu'i didza' le naca idútë li' ca' naca queë' Jesús.

### *Bönni' dxíë'-ba' böa' chiguichi*

11 Ní'irō bilé'eda' nayalaj lúzxiba, ate' buluí'i loba' tuba' böa' chiguichi, ate' lē' Bönni' dxíë'-ba', Nu Run Ca Rnna, enca' Nu Ru'i Didza' Le Nácate. Caní lē' tu' ruchi'a rusöröë' ca' naca le naca idútë li, enca' caní tsejë' gudil-la. 12 Rēpi yōsa bení' guiōj lahuë', le nácagaca ca' guí', en dxíagaca icjë' zían le néquiguequini oro. Nazúaj lahuë' tu' le lē', le cuntu nu nōzi, pero tuzë' Lē' nōzinë'. 13 Nácuë' tu' lari' nē'aj rōn, en lē' ca' "Nu Naca Xtídzë'ë Dios." 14 Rōjnógaquië' Lē' ni'a nē'ë guizxi yu nacu'ë yehua' yubá, dxíagaquië'-ba' böa' chiguichi, en nácugaquië' lari' nazáca'da', le naca chiguíchido'os, en biti' naca bōsaj. 15 Rirúaj ru'ë le naca ca' tu' guíë tuchi' le gúninë' zi' bōnachi yugu' yōdzō. Inná bé'enë' légaquië' len tu' xiyaga guíë, en gunë' légaquië' xíguia', le gaca quégaquië' ca' raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bē'. 16 Nazúaj lu' lari' nácuë', enca' lu xigatsjë' ca' lē', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

17 Ní'irō bilé'eda'-nē' tuë' gubáz lá'ayi zuínë' lu gubidza, ate' bē'ë zidzaj didza', en gudxë'-ba' böa' ta'daba' lúzxiba, rnnë': "¡Gulí'dá, bulí'dubi ga ni gáguli' laní zxōn queë' Dios! 18 Gáguli' xipéla'gaca nupa ta'nná bē', en xipéla'gaca nupa ta'nná be'e bönni' rōjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bōnachi, nupa bití' nadó'ogaca, en nupa nadó'ogaca, nupa nácagaca cá'asō, en nupa nácagaca lo."

19 Ní'irō bilé'eda'-ba' böa' sínia' na', enca' yugu' bönni' ta'nná bē'ë yōdzōlió, en bönni' rōjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lē' ni'a nē'ë guizxi yu. 20 Bidzunba' böa' sínia' na', enca' bönni' na' bē'ë didza' uláz queëba', bönni' na' benë' yugu' le nácada' bē' loba', en guzxi' yé'enë' nupa ni' gulu'i lataj nu uzúaj láhuiguequi lē' na' naca bē' dá'gaca lēba', en gula'yéaj ládxi'gaca budó' queëba'. Böa' sínia' na', enca' bönni' na' bē'ë didza' uláz queëba', gula'ru'unë' léguequi nabángacasō ca' ga rō'ō guí' zxōn le réguilen lē' na' ruzégui'da'. 21 Bönni' na' dxíë'-ba' böa' chiguích bētië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipéla'guequi.

## 20

### *Chi gayuá' iz*

<sup>1</sup> Gudödi lë ni bilé'eda' ruhuötjè' tu gubáz lá'ayi, zè'è yehua' yubá, en zönè' xzí'ini guíè que lataj chul-la, ate' nu'è tu du guíè yödx. <sup>2</sup> Guzxönè'-ba' bëla zxön xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguè'è-ba', en buca'anè'-ba' caní chi gayuá' iz. <sup>3</sup> Yöjchú'unè'-ba' lataj chul-la, en busayjè' lataj na', ate' budè'è tu le riguela' le rusayaj lataj na' para cabirö si' ye'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

<sup>4</sup> Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixé' yénguequi yugu' bönni' bití' nácagaquiè' tsahui' tu' gulún ba nali' queè' Jesús, en tu' gulún libán que xtídzè'è Dios. Yugu' bönachi ni bití' gula'yéaj ládxi'gaca böa' sínia' na', en budó' queéba', en bití' gulu'i lataj nu uzúaj ra' xigáquequi, o lu né'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, <sup>5</sup> pero ia'zica'rö bönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. <sup>6</sup> ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö bití' bi gaca gun quéguequi, pero ilácagaca bixúz queè' Dios, enca' queè' Cristo, ate' ila'nná bë'len Lë' chi gayuá' iz na'!

<sup>7</sup> Cate' izá'a chi gayuá' iz na', ulu'sanè' Satanás ga na' nadzún. <sup>8</sup> Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. <sup>9</sup> Guizxi yusö gula'dödè' idútè luyú, ate' gula'cu'è lé'ajlö lataj ga na' nacuá' bönachi néquiquequi queè' Cristo, le naca yödzö na' nadxí'inè' Dios. Ní'irö benè' Dios ga böxaj guí' le birúaj yehua' yubá, le buzegui' légaquiè'. <sup>10</sup> Tu' xihui' na' nazí' ye'e légaquiè', yöjchú'unagaquiè' le ga rö'ö guí' zxön que lë na' ruzégui'da', ga na' chizóaba' böa' sínia' na', enca' bönni' na' bë'è didza' uláz queéba'. Ila'guí'i ila'zaca' ni' rëla, en te dza yúgu'tè iz zá'gaca.

### *Ta'dxín bönachi lahuè' Dios ga rö'è ruchi'a rusöröè'*

<sup>11</sup> Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröè' lataj na'. Lahui' lo Nu ni gula'nítitè yödzölió, en lúzxiba, ate' bíti'rö budzöli xilátjaguequi. <sup>12</sup> Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinè' lahuè' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröè' Dios nupa na' chinátigaca tsca naca le nazúaj yugu' lu guichi na', lë na' gulúngaca. <sup>13</sup> Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröè' Dios tu tu tsca naca le gulúngaca. <sup>14</sup> Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. <sup>15</sup> Nupa bití' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

## 21

### *Tu lúzxiba cubi, en tu luyú cubi*

<sup>1</sup> Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dè nísado'. <sup>2</sup> Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoè' Dios, en chinabá'a que ca nabá'a queébi' bi'i nigula chizóa utsaga ná'alénbi' tu bönni'. <sup>3</sup> Biyönda' ruí'i didza' nu rnna yehua' yubá: "¡Buli'yútsöca'! ¡Ga zoè' Dios zóalen bönachi! ¡Sóalenè' léguequi, ate' léguequi ilácagaca bönachi queè'! ¡Dios caz sóalenè' léguequi, en gáquiè' Dios quéguequi! <sup>4</sup> Dios uzxié' nisa ribödxí zoa guí'ój lóguequi. Cúnturö nu gati, en cúnturö nu cödxí, en cúnturö nu cödxí yechí, en cúnturö nu qui'i saca', tu' chigudödi quégaca lë na' gulaca zí'alö."



<sup>5</sup> Ní'irö Nu na' rö'ö lataj lo ni' gunná: “¡Buyútsöca! ¡Yúgu'tè ruúna' cubi!”

Gudxi ca' neda': “¡Buzúaj lu guichi lè ni, tu' naca idútè li didza' ni, en naca löza!”

<sup>6</sup> Ní'irö gudxi neda': “¡Chinaca caz! ¡Neda' naca' Nu zoa zí'atèlö, enca' Nu röjsete ca naca le risí lo, en le ruúdxitè! ¡Nu ribidxi nisa, neda' guna' ga guí'aj nisa na' runna yöl-la' na'bán! <sup>7</sup> Nupa ila'deli' lu le raca yödzölió, gaca quéguequi yúgu'tè lè ni. Neda' gaca' Dios quéguequi, ate' léguequi ilácagaca zxi'ini caza', <sup>8</sup> pero nupa tadxi, en nupa biti' ta'yéajlè' neda', en nupa nácgaca xihui', en nupa tuti bönachi, en nupa tun le biti' naca tsahui', en nupa nácgaca udzá', en nupa ta'yéaj ládxi'gaca budó' guió'j budó' yaga, en yúgu'tè nupa ta'z'í' yé', chizóa riböza xilátjaguequi lu guí', ga ni' rö'ö guí' zxon que lè na' ruzégui'da', lè na' naca yöl-la' guti le raca burópilö.”

### *Yödzö Jerusalén le naca cubi*

<sup>9</sup> Ní'irö tuè' gubáz lá'ayi nababè' gadxè' gubáz lá'ayi ni' gula'zönè' gadxi zxi'ga'do' yúdxugaca gadxi yödzöhué' yöjsétegaca, bidè' ga zoa'. Gudxè' neda': “¡Gudá ni! ¡Uluí'ida' li' bi'i nigula na' si' utsaga ná'alenbi' Bönni' na' náquiè' Bö'cu' Zxíla'do'!”

<sup>10</sup> Guzóalenè' Dios Bö' Lá'ayi neda', ate' guchè'è gubáz lá'ayi na' neda' tu lu guí'a sibi, en buluí'inè' neda' yödzö lá'ayi Jerusalén, ruhuötaj, rirúaj yehua' yubá ga zoè' Dios. <sup>11</sup> Yödzö ni rëpi yösa bení' tu' zóalen le yöl-la' bení' queè' Dios. Rëpi yösa bení' ca rëpi yösa bení' tu guió'j nazáca'da' ca naca guió'j guí'do'os nazí'i le jaspe. Naca yödzö na' yení'ido' ca naca guió'j jara. <sup>12</sup> Zoa tu zö'ö zxon, en sibi idú gásibi'ilö yödzö na'. Lè'e zö'ö na' nacua' chinnu gapa nu riyaza. Ra' gapa nu riyaza na' nacu'è chinnuè' gubáz lá'ayi tapa chi'è. Tu tu ga nu riyaza na' nazúaj tu tu lágaca idxinnu cö' di'a dza zxi'ini xi'sóè' Israel. <sup>13</sup> Lè'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsölá'a ga ridödi gubidza beo' ziaga nacua' tsonna gapa nu riyaza, en saca' ga ribía gubidza nacua' ca' tsonna gapa nu riyaza. <sup>14</sup> Zxan zö'ö que yödzö na' nacua' chinnu xilibi zö'ö, ate' lé'egaca xilibi zö'ö na' nazúajgaca lágaquiè' idxinnutè' bönni' gubáz queè' Bönni' na' náquiè' Bö'cu' Zxíla'do'.

<sup>15</sup> Gubáz lá'ayi na' ruí'ilenè' neda' didza' zönè' tu yaga urixi le néquini oro para urixè' tsca naca yödzö na', en tsca nácgaca gapa nu riyaza, en tsca naca zö'ö que. <sup>16</sup> Yödzö na', lédi'i nácgaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixè' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. <sup>17</sup> Burixè' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lè na' ruríxinè' gubáz lá'ayi na'.

<sup>18</sup> Zö'ö na' néquini guió'j jaspe, ate' yödzö na' néquini órotèz, le naca yení'ido' ca naca guió'j jara. <sup>19</sup> Yugu' xilibi zö'ö que yödzö na' nazí'gaca biquitaj guió'j nazáca'da'gaca.

Xilibi zö'ö zí'alö néquini guió'j jaspe.

Le buropi néquini guió'j zafiro.

Le bunny néquini guió'j ágata.

Le budapi néquini guió'j esmeralda.

<sup>20</sup> Le guyu' néquini guió'j ónice.

Le buzxopi néquini guió'j cornalina.

Le igadxi néquini guió'j crisólito.

Le izxunu' néquini guió'j berilo.

Le igá néquini guió'j topacio.

Le idxí néquini guió'j crisoprassa.

Le idxinéaj néquini guió'j jacinto.

Le idxinnu néquini guió'j amatista.

<sup>21</sup> Chinnu gapa nu riyaza na' ta'yáyjani chinu bugá. Tu tu ga nu riyaza na' riyáyjani tuz bugá. Luyú la' nōza lo que yōdzō na' néquini órotēz, le naca yení'ido' ca naca guiōj jara.

<sup>22</sup> Biti' bilé'eda' tu yudo' lu yōdzō na', tu' náquiē' Xanru' Dios yudo' que, napa cazē' idútē yōl-la' unná bē', en lēasca' caní náquiē' Bōnni' náquiē' Bō'cu' Zxíla'do', náquiē' yudo' que yōdzō na'. <sup>23</sup> Biti' run bayudxi tsení'gaca gubidza, en beo' lu yōdzō na', tu' uzení' yōl-la' bení' queē' Dios lu yōdzō na', ate' lēasca' Bōnni' náquiē' Bō'cu' Zxíla'do' náquiē' le uzení' ni'. <sup>24</sup> Bōnachi yugu' yōdzō, nupa nulágaca, ila'dá lu bení' que yōdzō na', ate' yugu' bōnni' ta'nná bē'ē yōdzōlió idiguá'agaquiē' yōl-la' tsahui' quégaquiē' lu yōdzō na'. <sup>25</sup> Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla. <sup>26</sup> Bōnachi yugu' yōdzō idiguá'agaquiē' ni' le nácagaca lesaca', en yōl-la' tsahui' quéguequi. <sup>27</sup> Tu le ruá' dō' bití' ca' tsaza ni', en calēga tu le naca xihui', en calēga nu rizí' yē', pero tsázagacasō ni' nupa nazúajgaca láguequi lu guichi queē' Bōnni' náquiē' Bō'cu' Zxíla'do', ga na' nazúajgaca lágaca nupa nadéli'gaca yōl-la' na'bán.

## 22

<sup>1</sup> Ní'irō gubáz lá'ayi na' buluí'inē' neda' tu yegu yení'ido', le naca nisa yegu le runna yōl-la' na'bán. Rēpi yōsa bení' yegu na' ca rēpi yōsa bení' guiōj jara. Rirúaj yegu na' lu lataj lo ga rō'ē Dios, en ga rō'ē ca' Bōnni' náquiē' Bō'cu' Zxíla'do'. <sup>2</sup> Rizá' yegu ni gatsaj láhui'lō nōza lo que yōdzō na'. Tsōlá'a huéaj ra' yegu na' rō'ō tu yaga le runna yōl-la' na'bán, ate' ta'bía chinu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō. <sup>3</sup> Biti' soa ni' nitú le dxía dō'. Soa lu yōdzō na' lataj lo ga rō'ē Dios, enca' ga rō'ē Bōnni' náquiē' Bō'cu' Zxíla'do', ate' yugu' huen dxin queē' ila'yéaj lādxi'gaquiē' Lē'. <sup>4</sup> Ila'lé'enē' lahuē' Lē', ate' le nazí'i Lē' nazúaj ra' xigágaquiē'. <sup>5</sup> Biti' gaca rēla ni', ate' nupa nacué' ni' bití' ila'quínna tu le cu'u bení', en calēga bení' que gubidza, tu' gáquiē' Xanru' Dios bení' quégaquiē'. Nupa nacué' ni' ila'nná bē'tica'sō.

### *Chizóa huödē' Cristo*

<sup>6</sup> Ní'irō gubáz lá'ayi na' gudxē' neda', gunné': "Didza' ni naca idútē li, en naca lōza. Xanru' Dios, Nu ruchiza Bō' Lá'ayi icja lādxi'do'gaquiē' yugu' bōnni' tu'ē didza' uláz queē', chigusól-lē'ē gubáz lá'ayi queē' para uluí'inē' yugu' huen dxin queē' le ral-la' gácatē. <sup>7</sup> Caní rnnē' Jesucristo: ¡Chizóa huōda! ¡Bica' ba nu run ca rnna didza' ruá'a uláz queē' Dios, le nazúaj lu guichi ni!"

<sup>8</sup> Neda', Juan, biyōnda', en bilé'eda' yugu' lē ni. Gudōdi biyōnda', en bilé'eda' yugu' lē ni, buzóa zxiba' xini'ē gubáz lá'ayi na' buluí'inē' neda' yugu' lē ni para guna' lē' zxōn. <sup>9</sup> Ní'irō lē' gudxē' neda': "Biti' gunu' caní, tu' naca' neda' huen dxin queē' Dios ca nacu' li', en ca nácagaquiē' böchi' luzó'o na' tu'ē didza' uláz queē' Dios, enca' ca nácagaca yúgu'tē nupa tun ca rnna le nazúaj lu guichi ni. ¡Ben zxōn Dios!"

<sup>10</sup> Gudxē' ca' neda': "Biti' ucachu'u xtídzē'ē Dios ni, didza' ruá'a uláz queē', en nazúaj lu guichi ni, tu' chizóa ilaca yugu' lē ni. <sup>11</sup> Nu ruá' dō' guá'tica'sō dō'. Nu run le cabí naca tsahui' gúntica'sō le cabí naca tsahui'. Nu run dxi'a, gúntica'sō dxi'a, ate' nu nequi quez queē' Dios, guéquitica'sō quez queē'." <sup>12</sup> Rnnē' Jesús: "¡Chizóa huōda! Nu'a lu na'a le nadéli'gaca bōnachi, ate' ubi'a que queé'guequi tsca naca le gulúngaca. <sup>13</sup> Neda' naca' Nu zoa zí'atēlō, enca' Nu rōjsete, ca naca le risí lo, en le ruúdxitē. Naca' ca' Nu run ga risí lo, en Nu rusiúdxí."

<sup>14</sup> Ní'irō gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuē' le ribía yaga le runna yōl-la' na'bán, en gaca ila'yaza gapa nu riyaza lu yōdzō na'! <sup>15</sup> Nupa nácagaca xihui', en nupa nácagaca udzá', en nupa tun le ruá' dō', en nupa tuti bōnachi, en nupa ta'yéaj lādxi'gaca budó' guiōj budó' yaga, en nupa ta'yaza lādxi'gaca ta'zí' yē' ila'cuá' ní'ilō ra' yōdzō na'. <sup>16</sup> Neda', Jesús, gusól-la'a gubáz lá'ayi quia', ate' buluí'inē'

libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxí'ini xi'sóë'. Naca' ca' bölaj hui sila."

<sup>17</sup> Tu'ë didza' Dios Bö' Lá'ayi, enca' bi'i nigula utsaga ná'aleni-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxi' le, ral-la' guídi, en guí'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. <sup>19</sup> Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

<sup>20</sup> Xanru', Nu run ba nalí quéguequi lë ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

<sup>21</sup> Rinábida'-në' Xanru' Jesucristo uzá' láchë'ë queëli' yúgu'tëli'. ¡Ca' gaca!